

Esuquidistu Chuiquin  
Tantiamete



New Testament in Matsés (PE:mcf:Matsés)

**Esuquidistu Chuiquin Tantiamente  
New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

Mateyon Dada uaid . . . . .	1
Madcosën Dada uaid . . . . .	69
Ducasën Dada uaid . . . . .	109
Uanën Dada uaid . . . . .	174
Esus Chuibenequidon Naid . . . . .	223
Doma yacnocquidon Iste . . . . .	281
Codinto yacnocquidon Iste 1 . . . . .	312
Codinto yacnocquidon Iste 2 . . . . .	338
Cadasia yacnocquidon Iste . . . . .	354
Epeso yacnocquidon Iste . . . . .	365
Pidipos yacnocquidon Iste . . . . .	375
Codosas yacnocquidon Iste . . . . .	382
Tesadonica yacnocquidon Iste 1 . . . . .	389
Tesadonica yacnocquidon Iste 2 . . . . .	395
Timoteyon Iste 1 . . . . .	398
Timoteyon Iste 2 . . . . .	407
Titon Iste . . . . .	413
Pidemonën Iste . . . . .	417
Ebedeyon Isadaidbon Iste . . . . .	419
Santiacon Dada uaid . . . . .	438
Petedon Dada uaid 1 . . . . .	445
Petedon Dada uaid 2 . . . . .	454
Uanën Dada uaidëmpi 1 . . . . .	459
Uanën Dada uaidëmpi 2 . . . . .	466
Uanën Dada uaidëmpi 3 . . . . .	467
Udasën Dada uaid . . . . .	469
Esusën Uan Ismiaid . . . . .	472

## MATEYON DADA UAID

### *Esuquidistun tsusedpabotedi chiaid*

*(Duc 3.23-38)*

<sup>1</sup> Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

<sup>2</sup> Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic. <sup>3</sup> Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. <sup>4</sup> Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. <sup>5</sup> Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. <sup>6</sup> Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

<sup>7</sup> Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. <sup>8</sup> Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. <sup>9</sup> Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. <sup>10</sup> Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. <sup>11</sup> Osiasën madobic Econias cuëmëdquid. Aid Econias caid aton matsesadobëdtabi yuanuen Babidonia yacnocquidon aton nidaidën buampampic.

<sup>12</sup> Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmëdpampic. <sup>13</sup> Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. <sup>14</sup> Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. <sup>15</sup> Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. <sup>16</sup> Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

<sup>17</sup> Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi. Adoshombic Econias ënquin chuiboed chuioaquin padpiden bedanquin aton matses 14tedbidi chuiquin Esusquibi ënquin chiombi.

### *Esuquidistu tishaid*

*(Duc 2.1-7)*

<sup>18</sup> Nëbi aid tishaidquio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. <sup>19</sup> Usundoacsho isun abi inuequidën Osen dada utsin chudaid danec: —“Nëbi

mibi bedtiapimbo iquebi,” quequin bedenquo icnuen dada uashun Madia menenu —queuidpac caondash. Nuquin Papan chiapadquo bédambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquo yequi: —Bedenquo icnuen dada uaid menenu —queuidpac caondash.

<sup>20</sup> Adnubien Nuquin Papan abi yacnoshon uaidën mayan bédan Ose ushquin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquo icquin Nuquin Papan Mayanën Madia bacuë usundomiaye. Dacuëndenda. Dacuëdenquo icquin Madia min shubuno buanta. <sup>21</sup> Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquo iquendac,” quequin Esus cuënta —quequin mayan bédan Ose ushquin ismepac caondash.

<sup>22</sup> Aden mayan bédan Esus tishte chiapadomboen Nuquin Papan ambi chiaid naden dada uamepampic.

<sup>23</sup> “Dadan inacmaidëmbi bacuë usundoshon dada bacuë tishendac.

Aidi Imanued cuëmendac.

‘Nuquin Papapadquidquibidi matsesbéd tabadnuec choash nec,’ quequin Imanued cuëmendac,”

quequin Esus tishte Nuquin Papan dada uamepampic.

<sup>24</sup> Aden mayan bédan chiac isucunshumbien aidën chiapadomboen Osen aton shubuno Madia buampac caondash. <sup>25</sup> Buanshun Osen chudenquo icnubi dada bacuë tishpac caondash. Tishacsho Esus cuëmpac caondash.

## 2

### *Uispa isquido Esus isec choaid*

<sup>1</sup> Nidaid Udeya caid yacno tabadquin shubu daëdpactsëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin

<sup>2</sup> anocquido chuituidpac caondash. —Min matses isadaidbo chuiquid dapa ictequidquo nëbi tishtsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bédamboshë ictequid nec,” quiash aid isnuec chopobi —quetuidpac caondash.

<sup>3</sup> Adsho tantiash dacuëdcuededpac caondash abitedimbo. —Padtec. ¿Midapadquid bacuë nependabac? —quecuededpac caondash Edodes isadaidbo ancaquid ambi ancaidobëdi.

<sup>4</sup> Adshumbien Edodesën abi yacno tsusiobo cho-chomepac caondash. —¿Mitsicquid caique? Tantanu —qeshun abi yacno Moisesën dada uampid chuibanquido abi chuiquid dapabobëdta cho-chomepac caondash. Cho-chomeshumbic: —¿Mitsishunquo Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: <sup>5</sup> —Ai, tantiëmbi. “Nidaid Udeya caid yacno tabadquin shubu daëdpactsëcquid Beden caid yacnoshon aid bacuë tishendac,” quiampicpadembi tantiëmbi. Nuquin Papan ambi chiaid nuquin tsusedpa dada uamepampic naden. <sup>6</sup> Shubu daëdpactsëcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.

‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bédamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

<sup>7</sup> Adoquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin

tauao? ¿Nëid inchëshën ushëmbida isbeno? ¿Ëndenda isbenonda? En chui. Tantuanu —cac chuisho <sup>8</sup> tantiashun: —Beden yacno istan. Ano nidshun mimbi chiacpadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

<sup>9</sup> Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec niduntidpac caondash: —Bacuë ictsaid shubu nëid iquec —quec. <sup>10</sup> Adsho isashien cuishonquepac caondash uispa isquido. <sup>11</sup> Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën seabudpac caondash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidtedi menepac caondash. Adoash ushtopac caondash. <sup>12</sup> Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquo yec podqued utsin nidpac caondash aton shubuno nidec.

### *Equipito yacno Osen buanaid*

<sup>13</sup> Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

<sup>14</sup> Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash. <sup>15</sup> Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindambi,’ quiosh Nuquin Papa,” quequin Nuquin Papan chiaid dada uapampic.

### *Bacuëbo dadpen cuesun siatanaid*

<sup>16</sup> Adnubien isadaidbo ancaquid Edodes: —Uispa isquidon cacuidposhi —quiash comapenec nëishun aton yuabo sondado chuipac caondash. —Uispa isquidon chuibocpadtsëcquid comapenec onquecuenabi ictsëcquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash. <sup>17</sup> Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

<sup>18</sup> “Abi yacnuësh aton bacuëbo nibëdansho isash isadaidbon chidobo sedenquecuededendac.

Unësaid tantiec baded ënëdenquo yec sedenquebudnendac,” quequin chiampicpadomboen aton bacuëbo nibëdamepac caondash.

<sup>19</sup> Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. <sup>20</sup> —“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien <sup>21</sup> isucunanec aidën chuibocno buanec nidpac caondash.

<sup>22</sup> Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unësaidën mado Adquedayo caid ancanquidquibidien

nechitec –quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. –Cuesunenushe. Min nidaid Udeya caidën nidenda –quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquo yec uguëmbo nidpac caondash. <sup>23</sup> Uguëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquo canipac caondash Esus.

### 3

#### *Uan acten mentoanquidën chuibeniaid*

*(Mad 1.1-8; Duc 3.1-9, 15-17; Uan 1.19-28)*

<sup>1</sup> Adash yuecquo ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. <sup>2</sup> Adquid icquin Esus chote chuibampac caondash naden. –Mibi icsaid ënash bëdamboec tabadta. Nuquin Icbombo choeque –quequin chuipac caondash. <sup>3</sup> Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho chuibenendac.

‘Chuiquid dapa choeque. Podqued andëdbanshunta,’ quiachimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuipampic.

<sup>4</sup> Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi nacnenaid tsiupondash. Aton pete bacumbëd shioshbimboecquid icpondash. <sup>5</sup> Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash. <sup>6</sup> Cho-chosho Uanën chuisho tantiash: –Nuquin Papan chiaid niac-niaquec icsapobi. Icsaboedi aid tantiec bëdamboec tabadtiadquid iquebi –quesho: –“Nëid Nuquin Papa tantianu,” quequid nec –quequin acte Odan caidën mentopac caondash Uanën.

<sup>7</sup> Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: –Matses unësaid uincuenenquo iquendac –quequido nec. Aido cho-chosho isun Uanën: –Nisibimboecquido mibi nec. Adquidën icsa uachimboen matses icsa uaquido mibi nec. Bëdambo icquid damianquiec mibi iquec. “Nuquin Papan mibi cuidnushe. Tantiatan,” quequin ¿tsuntsin chiac cho? <sup>8</sup> Mentomete bunec Nuquin Papan chiaid niac-niacboedi ënash bëdamboec tabadta. <sup>9</sup> “Ëbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icsho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiatia. <sup>10</sup> “Icsambo icquid nec,” queshun ambi nitsinaid cuëte bacuëesa dëdshun nëdëncachimboen ambi chiacpadomboen naisa Nuquin Papan cuidendac –quepac caondash Uan padiseyobo saduseyobobëdta chiec.

<sup>11</sup> Adshumbic padpiden chuiquin Esusën nate chuipac caondash. –Nuquin Papa tantianuequid acten mentobanquin chuibanquid nebi. Padnuen con tsyuecquid chosho aidëntsen chuibanendac. Ëbi bëdiactsëc tantiaquid ictsëcnuc aidquien comapenen tantiaquidquo yec bëdamboshë iquendac. “Aidquid bëdamboshë icquid icnuc ¿atotsieshun icsaquidquibi: ‘Aid choec,’ quequin chuiquidquo Nuquin Papan ëbi



icneposh?” quec tsadebi. Ēmbi chuiboed choshon: “Ēbi tantiaquid nec,” queshun aton Mayan menequin bēdamboec tabadte mibi tantiamendac. Abi tantiesaboen cuidendac. <sup>12</sup> Piacbo choeshashun putu bushcaquin secacimboen abi tantiesabo chian anēdēnquiacno nēsecaindac. Adshumbic abi tantiaquido abēdi tabadmendac —quepac caondash Uan acten mentoanquid.

*Uanēn Esus mentoaid*  
(*Mad 1.9-11; Duc 3.21-22; Uan 1.32-34*)

<sup>13</sup> Acte Odan caidēn matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuēsh tauamboen matses ismenuec choec: —Ēbitsen mento —quetuidpac caondash. <sup>14</sup> Adshobien Uanēn: —Padenquio iquembi. Nuquin Papan chomiaid icquin mimbibi ēbi naquien bēdambo ictsiash. ¿Atotsieshun ēbi aden chie? Padi —queshobien: <sup>15</sup> —En na. Bēdambo iquec. Ēbi mentoquin mimbi Nuquin Papan chiacpadomboen natsiaque. Ēbi acten mento —quesho tantiashun Esus acten mentopac caondash Uanēn.

<sup>16</sup> Adoac Esus pudundonobien canchedacimboec abu shēcuē yampac caondash. Adsho isaquien aid shēcuē yacnuēshquio dēbimbimboec budec Nuquin Papan Mayan Esusquio matsadtopac caondash abēd icnuec. <sup>17</sup> Adnubien abucuēshquio Nuquin Papa onquiampac caondash. —Nēid ēmbi tantiaidquio con Mado nec. Ēmbi chiacpadomboen nasho isash bēdambo iquebi —quepac caondash Esus caic.

## 4

*Satanasēn Esus icsamenuequin tanuidaid*  
(*Mad 1.12-13; Duc 4.1-13*)

<sup>1</sup> Uanēn acten mentobocshobien Nuquin Papan Mayanēn masiuidpambo yacno matses nibēdacno Esus nidmepac caondash. —Ma Nuquin Papa chieshēnquid Satanasēn Esus icsamenuequin ma tanu —quequin ambo nidmepac caondash.

<sup>2</sup> Adoaquien buna mēmūnquin penquio yec Esus tsadpac caondash. Inchēshēn ushē abentsēc nidmiash utsi tashquecuntsēc nuc 40tedec ushquin penquio yec comapenec bumpac caondash. <sup>3</sup> Bunec tsadshobien Satanasēn istuidpac caondash. Istuidtanquimbien: —¿Nuquin Papan Madombobida mibi neque? Aidēn Madombo icquin nēid cuēnote cain: “Pete icta,” cata —caquien <sup>4</sup> Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bēdamboec tabadpec? Nuquin Papan chiacpadomboenuidi naquien matses bēdamboec tabadtsiash,” quequin dada uapampid iquec —quepac caondash Esus.

<sup>5</sup> Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasēn Esus manidtomēpac caondash abucquio. <sup>6</sup> Adotanquimbien padpiden chuioaquin: —¿Nuquin Papa caidēn Madombobida mibi neque? Aidēn Mado yec nēuēshquio pudunta. Nuquin Papan mibi paēdmenquio ictsiashe. Nadentsen Nuquin Papan chiaid dada uapampic.

“‘Uidēn uata,’ quequin ambi abi yacnoshon uaido mayan bēdabo Nuquin Papan chiac mibi uidēn uaindac paēdenquio icnuc.

‘Cuēnoten tadquēdnushe,’ queshun adoendac,”

quequin Nuquin Papan chiaid dada uapampique. Pudunta —caquien <sup>7</sup> Esus: —Padi. Nuquin Papan chiaid dada uapampid nad iquec. “‘¿Icsamboen tantiaquin ēmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

<sup>8</sup> Adoaquien Satanasēn padpiden buanquin macuēsh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobēd icquido ismequinc aidon dayun uaidtedi ismequinc capac caondash.



<sup>9</sup> Adoshombic: —Nëidtedi mibi menetsiambique. Èbi con icbo cata. Èbi aden chuiquin ismenuen danëshën sebudta. Adsho isun èmbi ismiactedi mibi menembi. Aidèn icbo mibi icmembi —caquien <sup>10</sup> Esusèn: —Padi. Baded cuenta. Nuquin Papan chiaidquio chuiquin naden dada uapambique. “Nuquin Papa abentsëcquiobi mimbi tantiaiduidtsëqui min Icbombo neque. Aidèn namiaidquio icta,” quequin dada uapambique. Cuenta —capac caondash Esusèn. <sup>11</sup> Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abèdi tabadquin Esus bédambo icmepac caondash.

*Cadidia yacnoshon Esusèn chuibeniaid*  
(Mad 1.14-15; Duc 4.14-15)

<sup>12</sup> Adashic aton nidaid Cadidia caidèn Esus nidpac caondash. —Mibi acten mentondaid Uan bedshun quènèn nauedac caosh —quesho tantiash nidpac caondash. <sup>13</sup> Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. <sup>14</sup> Esus ambo tabadte chuiquin Nuquin Papan con tsusedpa Isayas cuëmédquid dada uamiampicpadec ambo tabadpac caondash Esus. Naden dada uapampic.

<sup>15</sup> “Nuquin Papa tantiamequidèn chuisho nëidtedishun tantiendac. Nëidic nidaid cuëshë utsi Netadi caidèn tabadquidon. Nëidic nidaid cuëshë utsi Sabudon caidèn tabadquidon. Nëidic chian dapambo anoentsëqui tabadquidon. Nëidic acte dapa Odan caid cuëman tabadquidon. Nëidic isadaidpembo dadpen tabadacno Cadidia caidèn tabadquidon.

<sup>16</sup> Aidtedishun Nuquin Papan chomiaid tantiendac. Pabiate cuënédac bimboec icsamboec tabadquin Nuquin Papa tantienquio icboedombi tantiabenendac. Nuquin Papa tantiamenuen chuibansho tantiashun matsesèn paposhquiac bimboen Nuquin Papa tantiabenendac. Abi tantienquio icsho Nuquin Papan cuidtsenaidombi Nuquin Papa tantiabenendac ushash isucunac bimboen,” quequin Isayas Esus choash tabadte dada uamepampic Nuquin Papan.

<sup>17</sup> Ashunquiobi Nuquin Papan chiaid chuiquin tauamboen Esusèn matses abitedimbo chuibenepac caondash. —Icsaid ènash Nuquin Papa tantiec ambi chiacpadec bédamboec tabadta. Nëbi Nuquin Papan abèd tabadtequido icmequin matses bédamboen tabadmen-dac —quepac caondash Esus ambibi naid chiequi.

*Nuëcquid bedquido Esusèn: Cho, caid*  
(Mad 1.16-20; Duc 5.1-11)

<sup>18</sup> Aden chuibenec chian dapa Cadidia caid cuëman nidquin isquien dadan aton utsibèdtambi nëshaid dapambo acte nënepec. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusèn. <sup>19</sup> Adshumbien Esusèn: —Nuquibi icnu. Cho. Nuëcquid bedquid icboedi nëbi èbi chuibanquid mibi icmenu <sup>20</sup> —caquien aton nëshaid nianec nidquimbi Esus tsibanampac caondash.

<sup>21</sup> Udictsëc nidquin isquien dada daëd cano antabèdpec. Acobo aton utsi Uambèd icpac caondash. Aton papa Sebedeyo caidbèdi cano antabèdquin nuëcquid bednun aton nëshaid dapa nacnempac caondash. Adsho istuidshun Esusèn: —Nuquibi icnu. Cho —caquien <sup>22</sup> aton papabèdta cano nianec Esusbèd icnuec nidpac caondash.

*Matses dadpen Esusèn chuibeniaid*  
(Duc 6.17-19)

<sup>23</sup> Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bēdamboen iste matses chuibeniac caondash. Adshumbic daicsaidotedi bēdamebampac caondash. <sup>24</sup> Adosho istanquin: —Bēdamequidquio nec —quequin isboedon Esusën naid chuibenepac caondash. Ēnapen nidec nidaid utsi Sidia caidēn nidshun chuibeniac caondash. Aden chiac daicsaidotedi bē-bēpac caondash. Dada paēmboeshē icquido yec podobitsi icsa dapuduedaido yec unēsanequido yec dada shēquēquenquio icquido yec quenuc bē-bēacsho aitedi bēdamepac caondash Esusën. <sup>25</sup> Aden: —Bēdamiosh —quequin chiac isec chochoash dadpenquio tsucus-tsucustsēcquio yec tsidadash niqianquin Esus tsibanampac caondash. Nēidtedshun tsibananac caondash. Nēidic nidaid Cadidia caidēn tabadquidon. Nēidic shubu dadpen icquid Decapodis caid yacno tabadquidon. Nēidic shubu dadpen icquid Edusaden caid yacnocquidon. Nēidic nidaid Udeya caidēn tabadquidon. Nēidic acte Odan caid uquē cuēma utsiuc tabadquidon. Aitedtedshun Esus tsibanampac caondash.

## 5

### *Nadquido bēdambo iquendac, quequin Esusën chiaid (Duc 6.20-23)*

<sup>1</sup> Matses dadpenhshun tsibananac macuēsh dapa cuēte nibēdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abēd icquido Esusën dayunquio tabadpondash. <sup>2</sup> Adshobien Nuquin Papan matses bēdamboen isquin bēdambo icmete Esusën matses abitedi chuibampondash.

<sup>3</sup> —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbembī bēdamboec tabadtiapimbo iquebi. Bēdapenquio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

<sup>4</sup> “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

<sup>5</sup> Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yuecshun ambi nidaid chuca uaidēn tabadmendac.

<sup>6</sup> Pete bunachimboec ambi chiacpadec bēdamboec tabadte bunquid Nuquin Papan bēdamboen tabadmendac.

<sup>7</sup> Abi chieshēnquidi chieshēnenquio icquin bēdamboen isquid Nuquin Papan bēdamboen isendac.

<sup>8</sup> Ambi chiacpadomboenuidi nate bunquid Nuquin Papan bēdambo icmequin abibi bēismendac.

<sup>9</sup> Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi adembidi con champi caindac.

<sup>10</sup> Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. <sup>11</sup> “Esus tantiaquid nec,” queshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso adembidi mibi bēdambo icmendac. Adembidi mibi muauasho Nuquin Papan mibi bēdambo icmendac. <sup>12</sup> Aden utsibon: “Esus tantiaquid nec,” queshun chieshēnaqui cuishonqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Adembidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta —quequin chuipondash Esusën.

*Abi tantiaquido bēdamboec tabadte chiaid*  
(Mad 9.50; Duc 14.34-35)

<sup>13</sup> Abi macuēsh dapa poctse tsadquin Esusēn chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yac bimboec icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi matses bēdamboec tabadenquio yec icsambo icsho Nuquin Papan chian anēdēnquiacno nēsecatequid nendac —quepondash Esus.

<sup>14</sup> Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nuntan-shunda ēapadic? Padenquio. Umanucshumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo. <sup>15</sup> ¿Utsibo chuinuecta abentsēqui uano icpadic? Padenquio. “Ma nēidēn tantianu,” quec aibdēdi bēdamboec tabadquin chuibanquid. <sup>16</sup> Adembidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin Papan chiacpadomboen nata. “‘Nuquin Papa bēdambo iquec,’ ma utsibotsen quenu,” queshun adota —quequin Esusēn chuipondash.

*Nuquin Papan Moises chuimiaid chiaid*

<sup>17</sup> Nadentsen Esusēn chuipondash. —Ēmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquio icquin utsi uapec,” mimbi ēbi capec. Mambi utsi uainquio yoc. Nuquin Papan chiaid utsi uainquio icquin ambi chiac tedimbo namenuec nebique. <sup>18</sup> Abimbo chuinu. Tantia. Abubēdta nidaid nibēdamiabi icnuc Nuquin Papan chiaid bēnudtiapimbo iquendac. Ambi chiac tedimbo naquin Nuquin Papan nainendac.

<sup>19</sup> Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac. <sup>20</sup> Moisesēn dada uampid chuibanquido padiseyobobēd Nuquin Papa yacno puduedtequidoen mimbi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusēn.

*Chieshēmēnquido nēish bēdante chiaid*  
(Duc 12.57-59)

<sup>21</sup> Adshumbic Esusēn padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidēn cuesunemequin cuidquid,” quequin chuipampid mimbi tantiec. <sup>22</sup> “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquio icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshēnquin shēpiaquid Nuquin Papan icsano nēsecaquin cuidtequido nendac. <sup>23</sup> “Chieshēmēnquid Nuquin Papan cuidtequid nendac,” quequin ēmbi chuisho tantiashun bēdamboen nata. Nuquin Papa tabadte shubu uashunaidēn puduedash: “Ambi chiacpadomboen musuc menenu,” mibi quepec.

Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata. <sup>24</sup> Adshun: “Ai, ëmbi chieshëmeboed iquec,” queshun Nuquin Papa tantiaquin mimbi bëboed meniabi mibëd chieshënamboed yacno nidash aidbëd bëdamboec onqueta. Adec bëdamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bëdamboec onqueta.

<sup>25</sup> Mibëd chieshënamboed utsimbic: “Nëid cuidmenuen cuidte chuiquid yacno buanchitimbimbi iquec,” queshun: “Baded nid,” cac podquedën nidec aidbëd bëdamboec onquenidta: “Ma nëish bëdanu,” quiash. “Matses cuidte chuiquidën cuidchitoshe,” quiash badedquo mibëd chieshënamboedbëd bëdamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiacted piucquid ëmbi bedabi icnuc ma tsadpanu,” mibi catsiash. Quënën nauedshun <sup>26</sup> ambi chiacted piucquid nibëdnuc mibi cuemenquo ictsiashe. Mibëd chieshënamboedbëdi bëdamboec onqueta. “Nuquin Papan adembidi cuidnushe,” quiash adta –quequin Esusën chuipondash.

### *Icsaquin chudaid chiaid*

<sup>27</sup> Adshumbic naden Esusën chuipondash. –Chiaid utsitsen mimbi tantiec. “Min chidopenquo chudenda. Min bënëpenquo chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. <sup>28</sup> Aden chiaid niac-niaquec icsambo icquid icnubi nadquid icsambo icoaic. Aton chidopenquo isec: “Aidquo chudtiadquo icchitebi,” quequin otacquo tantiequi matses icsapec. <sup>29</sup> Ëshën isec mibi min chidopenquo bunec icsaic. Ëshë chicshuniac bimboec icsainquo yec ënëdash mibi bëdambo ictsiaic. Icsaid ënenquo icquid Nuquin Papan chian anëdënquiacno nësecaquin cuidendac. <sup>30</sup> Min chidopenquo chudte bunquin mëismec mibi icsaic. Mëteshuniac bedtiapimbo yac bimboen mibi icsaid ënta. Ënenquo icquid Nuquin Papan cuidendac –quequin Esusën chuipondash.

### *Aton chidobëd cuëshëdte chiaid (Mat 19.3-9; Mad 10.11-12; Duc 16.18)*

<sup>31</sup> Nadentsen Esusën chuipondash. –Nuquin Papan Moises chuimiaid utsitsen mimbi tantiec. “Aton chido bunenquo icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. <sup>32</sup> Utsitsen chuinu. Aton chidon bënëpenquo chudmesho istuidshun Moisesën chiacpadomboen nac bëdambo ictsiashe. Aton chido dada utsi chudmesa icshobi dadan ambimbi dada uaid menequin nidmiac icsambo ictsiashe. Aden nidmequin chido icsametsiashe. Chido nidmiacsho bedquidtsen icsatsiashe –quepondash Esus.

### *Abimbo chiac bimboen chienda, quequin Esusën chiaid*

<sup>33</sup> Adshumbic Esusën padpiden chuipondash. –Naden Nuquin Papan ambi chiaid nuquin tsusedpa Moises dada uamepampic. “‘Nuquin Papa utsi uatiapimbo yac bimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. <sup>34-36</sup> Aidën chiacpadec muainquo ictiadquidi mimbi abimbo chiac bimboen utsi uain icsamboen chiec. “Abi cuëmëdquid cuënec muasho ëbi cuidtsiashe. Nuquin Papa cuëmëdquid cuënenquo yec muasho Nuquin Papan ëbi cuidenquo ictsiashe,” queshun mimbi utsi chiec. “Abu utsi uatiapimbo yac bimboen ëmbi chiacpadomboen naimbi. Muainquo iquebi,” mibi quepec. Adechidi: “Nidaid utsi uatiapimbo yac bimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiac bimboen chienda. “Nuquin Papa cuëmëdquid cuënenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuecshun. ¿Min mapin icboda mibi nedî? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo



chiaczimboen icsamboen chienda. <sup>37</sup> Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiacpader mibi muapeque. Adenda –quepondash Esus.

*Chieshë nec cuidnanenda, quiaid*  
(Duc 6.29-30)

<sup>38</sup> Adashic padpider Esus onquec: –Nuquin Papan Moises chuiquin dada uamiampid mimbi tantiaboed nad iquec. “Chieshënquin ëshë ansiac adecbidi cuidnanec ëshë anse nanquid. Chieshënquin sëcsiac adecbidi cuidnanec sëcsenanquid,” quequin chiaid icnuc <sup>39</sup> utsitsen chuinu. Tantia. Mibi cuesquid cuidenda. Chieshënaqui cuidnanenquo icquin adembi bëdamboen ista. <sup>40</sup> Min matses: “Ëbi cuidquin mimbi ëbi meniambo iqueque. Min dashcute beccho,” qesho mimbi menenquo icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bëdamboec tabadta. <sup>41</sup> Utsibic: “Nëbi nidtuidquin con na buanec nid,” quequin ancabudac nëbi nidtuidenquo icquin udimbo buanshunta. <sup>42</sup> Aton na nibëdquid: “Mitsana beccho,” qesho meneta. Utsibic: “Mitsana buanshun bëuaindambi,” qesho: “Padi,” cainda. Meneta. Aden bëdamboen nata –quepondash Esus.

*Chieshënquidobi bëdamboen iste chiaid*  
(Duc 6.27-28, 32-36)

<sup>43</sup> Adshumbic abi macuësh dapa poctse tsadquin bëdamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënquido chieshënta,” quequin chuiampic. <sup>44</sup> Utsi mibi chuinu. Tantia. Mibi chieshënquidobi bëdamboen isquin tantiata. Chieshënaqui: “Ëbi chieshënquid bëdamboen ista, Papa,” quequin Nuquin Papa chianeta. <sup>45</sup> Aden chianec Nuquin Papabimboec mibi ictsiac. Mibi utsibo bëdamboen nashunquid ictsiac. ¿Bëdambo icquido yacnoudida Nuquin Papan ushë chëncamepadic? Padenquo. Icsaido yacnotsen ushë chëncamec. ¿Bëdambo icquido yacnoudida ue chomepadic? Padenquo. Icsaido yacnotsen ue chomec. Bëdambo icquidobëdtabi icsambo icquido Nuquin Papan bëdamboen nashunec. <sup>46</sup> ¿Mibëd tantiananquido min shubun icquidoudi mimbi bëdamboen nashunsho isunda Nuquin Papan mibi: “Bëdambo iquec,” capec? Padenquo. Mimbi icsambo iquec caidontsen ambi tantiaido nashuntsiashe. Aidombien piucquid bedshumënquido icquimbi aton shubun icquidoudi nashuntsiashe. Aden nainda. Utsibotsen bëdamboen nashunta. <sup>47</sup> ¿Min shubun icquidobëduidida mibi onquec tabadpe? Nuquin Papa tantiesaboen adpec. Utsibotsen bëdamboen ista. <sup>48</sup> Nuquin Papabimboec icta. Bëdambo icquid icta. Bëdambo icquidobëdta icsambo icquidobi Nuquin Papan bëdamboen tantiacpadomboen utsibotsen bëdamboen tantiata –quepondash Esus.

## 6

*Utsibo bëdamboen nashunte chiaid*

<sup>1</sup> Adshumbic abi macuësh dapa poctse tsadquin Esusën chuipondash. –Nadquid icsambo iquec. Nuquin Papa tantienquo icquimbi aton matses ismenuenuidi naic icsambo iquec. Adquid Nuquin Papan bëdamboen istiapimbo iqueque. “Utsibo nashunu,” quequin utsibo ismenquo icquin nata. <sup>2</sup> “Aton na nibëdquido menenu,” qeshun utsibo ismequin menenda. Ismenquo icquin meniac bëdambo ictsiash. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuembien muaquidën matses dadpen yacnoshonuidi menedenepec. Adosho isun aton matsesënuidi bëdamboen isnubi Nuquin Papan bëdamboen istiapimbo iquec. <sup>3</sup> Aton

na nibëdquido menequin utsibo ismenda. Meneshun: “Menebanombi,” quequin utsibo chienda. <sup>4</sup> Adsho isun mimbi utsibo ismenquo icquin naid tantiaquid icquin Nuquin Papan bëdamboen isquin abëdi mibi tabadmendac —quequin Esusën chuipondash.

*Nuquin Papa chianete Esusën chiaid*  
(Duc 11.2-4)

<sup>5</sup> Adshumbic Nuquin Papa chianetetsen Esusën chuipondash naden. —Bëdambo icquid damianquidën nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidothon comapenec onquequin Nuquin Papa chianepec. Adash umanuc puduenshun matses dadpen ismenuenuidi padpiden adem-bidi chianec. Adquid aton matsesën: “Bëdambo iquec,” canubi Nuquin Papan padenquo iquec. Bëdamboen istiapimbo iquendac. <sup>6</sup> Mibi adenda. Utsibo ismenuenuidi nainquo icquin matsesën isacmaidquo Nuquin Papambo tantiaquiquin chianeta. Aden chianequid mibi icsho Nuquin Papan mimbi utsibo ismenquo icquin naidtedi tantiaquid icquin mibi bëdamboen isquin abëdi tabadmendac.

<sup>7</sup> Nuquin Papa chuiquin bëdamboen chianeta. Nuquin Papa tantiesabon ambi tantiaid chuibudac bimboen Nuquin Papa chuibudenda. “Yuenquo chuibudac nuqui tantia boedën nuqui nashunsiash. Padenquo icac nuqui nashunenquo ictsiash,” qeshun Nuquin Papa tantiesabon yuen chuibudac bimboen nainda. <sup>8</sup> Adoenquo icquin Nuquin Papa chianeta. Mimbi chiabi: “Adopashuni. Aid nibëdnuc unësebi. Utsi icnuc bëdambo ictsiabi,” quequin mimbi otacquo tantiaid Nuquin Papan tantieque. <sup>9</sup> Naden Nuquin Papa chuita.

“Bëdamboshë icquid icsho matses abitedishunquo mibi tantiapashun, Papa.

<sup>10</sup> Matses abitedishunquo mibi con Icho capashun. Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi mimbi chiacpadomboen matses abitedishunquo napashun.

<sup>11</sup> Bumianenda, Papa. Badiadquidën badiadquidënquien con pete icmeta.

<sup>12</sup> Utsibon chieshënaqui ëbi cuidnanenquo icsho isun ëbi icsashobi cuidenquo icquin ëbi bëdamboen ista, Papa.

<sup>13</sup> Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icbombo yec abitedimbo namequidquo mibi nec, Papa.

Ëmbi mibi chuisho tantia, Papa.

Ënenquo icquin abitedishunquo: ‘Bëdambo iquec,’ mibi capashun. Padi,” quequin Nuquin Papa chianeta —quequin Esusën chuipondash.

<sup>14</sup> Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquo icsho isun Nuquin Papan mibi cuidenquo icquin bëdamboen istsiash. <sup>15</sup> Cuidnanec chieshënansho isun Nuquin Papan mibi bëdamboen istiapimbo ictsiash —uequin Esusën chuipondash.

*Buna mëmunte chiaid*

<sup>16</sup> Adshumbic utsibo ismenquo icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nac bimboen ismenda. Muaquido: “Buna mëmunquid nec,” aton matses camenuc abibi maniumëdash nënquidbitsëcquiec mamënenquo iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” qeshun bëdamboen istiapimbo iquec. <sup>17</sup> “Nuquin Papauidi tantiaquin nëidtedec ushquin buna mëmunu,” qeshun Nuquin Papambo tantiaquin nata. “Utsibon tantianushe,” qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda. <sup>18</sup> Aden bëdamboen manëdaid shueshcata isun: “Buna mëmunec nec,” cainquo ictsiash utsibon mibi chuiquin. Nuquin Papambien: “Ëbiuidtsëqui tantianuen

naic,” quequin tantiatsiash. Adshun mimbi utsibo ismenquo icquin naidtedi tanti-  
aquid icquin abëdi mibi tabadmendac –quequin chuipondash Esusën.

*Nuquin Papa yacno tabadte bunta, quiaid*  
(Duc 12.34)

<sup>19</sup> Adshumbic padpiden Esusën chuipondash. –Ëmbi chuiboedquo tantiashun  
mimbi dayun uatequiduidi tantienda. Dayun uatequid nadquo iquec. Chodquete-  
quid yec shocosh chiuidtequid yec matsesën ampeshuntequid yec quec icsabudtequid  
nec. Adquiduidi tantienda. <sup>20</sup> Icsabudesambo tantiata. Nuquin Papambo tantiec  
aidbëd tabadte bunquin ambi chiacpadomboen nata. Chodquetiapimbo icquid yec  
shënbudtiapimbo icquid yec ampeshuntiapimbo icquid yec quec Nuquin Papa yacno  
iqueque. Aidquo tantiata. <sup>21</sup> Mibi bunaidquo ënenquo icquin tantiec mibi tabadtsiac.  
Nuquin Papabëd tabadte bunquin aid tantiata –quepondash Esus.

*Pabiate shëcuë cuembo icquid chiaid*  
(Duc 11.34-36)

<sup>22</sup> Adshumbic abi macuësh dapa poctse tsadquin utsitsen Esusën chuipondash. –  
Pabiate shëcuë cuembo icquin Nuquin Papa tantiaquiec mitsanauidi tantienquo yec  
mibi bëdamboec tabadtsiac. <sup>23</sup> Pabiate cuënëdabimboec yec Nuquin Papa tantienquo  
yec mitsanauidi tantiec ¿bëdamboecta tabadtsia? Padenquo. Adec mibi icsamboec  
tabadtsiaque. Adenda –quequin chuipondash Esusën.

*Bedteuidi tantienda, quiaid*  
(Duc 16.13)

<sup>24</sup> Adshumbic naden Esusën chuipondash. –Mitsanauidi tantiec mibi icsamboec  
tabadtsiac. ¿“Naic cho,” quequin daëdshun chiacta aid daëdi mimbi nashumpatsia?  
Padenquo mimbi ictsia. Abentsëc nashunquin utsin chiaid mimbi natiapimbo ictsia.  
Aden mitsana bedtequiduidi tantiaquin aid bednuenuidi mimbi natsiac. Aden naquin  
Nuquin Papan chiacpadomboen mimbi natiapimbo ictsiaque. Mitsana bedteuidi  
tantienda. Nuquin Papauidsëqui tantiata –quequin Esusën chuipondash.

*Nuquin Papan abi tantiaquido dayun uaid*  
(Duc 12.22-31)

<sup>25</sup> Adshumbic Esusën padpiden chuipondash. –Ëmbi aden chuisho tantiash  
dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda.  
Nuquin Papan nac unësabi mibi tabadeque. Aidëmbien petebëdta dasiuidte icmeque.  
“Con na nibëdtsiash,” quiash dacuëdec tabadenda. <sup>26</sup> ¿Uicchunënda ambibi cuëte ëshë  
siac bacuëacsho chepadic? Padenquo. Adecbidi ambi pete dayun uatequid shubumpi  
nibëdec. Adquid icsho Nuquin Papan aton pete bedmec. Uicchun abipadquidpenquo  
icshobi aton pete Nuquin Papan bedmec. ¿Ad icnuc ambi abipadquid uaidobi matses  
icsho aton pete bedmenquioda icpadic? Nuquin Papan mibi nashunquin min pete  
icmeque. Dacuëndenda. <sup>27</sup> ¿“Unëstiapimbo iquebi. Dacuëdebi,” quequidta unësenquo  
icpadic? Adequi dacuëdquid unëstiashe. Unësteuidi dacuëdënenda.

<sup>28</sup> “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte  
bacuëec bëdamboshë isadtsec,” quepec nuquin matses. ¿Aton sedquidi shoyontsëcshun  
abi dasiuidte daëdcash dasiuidtsashta bëdamboshë isadpadic? Padenquo. Nuquin  
Papan uacpadquiobi iquec. <sup>29</sup> ¿Cuëte bacuëec bëdamboshë isadquidbimboecta nuquin  
tsusedpa chuiquid dapa Sadomon cuëmëdquidën dashcute icpampic? Padenquo. Ad-  
penquien icpampic. <sup>30</sup> Cuëte bacuëec bëdamboshë isadboed abadiadtsëcshumbi isac ënden  
chodquiac. Aid badedquo chodquequid nec. Ad icnuc ¿abipadquid Nuquin Papan  
uaido mibi icsho mibi dasiuidte bedmenquioda icpadic? Padenquo. Mibi dasiuidte  
icmeque. Dacuëndenda. Mitsana nibëdquo icte dacuëdënquimbi mimbi Nuquin Papa  
bëdiactsëc tantiatseque. <sup>31</sup> Dacuëdec tabadenda. “¿Atotsimbi pepe? ¿Atotsimbi acpe?



¿Atotsibi dasiuidpe?” quec dacuëdenda. <sup>32</sup> Nuquin Papa tantiesaboen adquid bedteuidi bunqueique. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. <sup>33</sup> Adenquio yec: “Con Icho mibi nec, Papa,” quequin ambi tantiacpadec bëdamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe. <sup>34</sup> Èbi adsho tantiashe badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomben mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquio yec —quequin chuipondash Esusën.

## 7

### *Utsibo icsaid chienda, quiaid* (Duc 6.37-38, 41-42)

<sup>1</sup> Naden Esusën Nuquin Papan chiapadec tabadte chuipondash. —Mibi icsaid ucuðambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. <sup>2</sup> “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papan: “Mibi icsambo iquec,” canushe. Utsibo icsaiduidi chienda. <sup>3-4</sup> ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquio. <sup>5</sup> Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbia mibi icsaid ënshun: “Icsaid ënash bëdamboequien tabadtiad,” quequin utsibo bëdamboen chuita. Bëdambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. <sup>6</sup> Mimbi bëdamboen chiaqui tantienquio icsho chuidonenda. Nuquin Papan chiaid chuibudaqui tantiatipimbo icquin niac-niacsho isun adenuidi chuidonenda. Opa icsan abi pemequid piacbimboen mibi chieshëntsiashe. Chanchon icbon dashcute nebudshun bëchish uaqun tin-tincacbimboen Nuquin Papan chiaid niac-niacsiashe. Adquid chuidonenda —quepondash Esus.

### *Ënenquio icquin Nuquin Papa chianete chiaid* (Duc 11.9-13)

<sup>7-8</sup> Nadembidi Esusën chuipondash. —Nuquin Papa ënenquio icquin chuidoneta. Bacuëbon: “En na,” cadoniacbimboen chuidoniac Nuquin Papan mibi tantiatsiashe. Adembidi: “Èbi bëdamboen name, Papa,” mimbi cacpadomben bëdamboen mibi nametsiashe. Adembidi: “Èbi nashunquin ëbi bëdambo icmeta, Papa,” quequin chuidoniac Nuquin Papan mibi bëdambo icmendac.

<sup>9</sup> ¿Icsambo icquidta Nuquin Papa icpadic? Padenquio. Bëdambo icquidquio nec. Bacuëmpi: “Bundobique. Penu. Beccho, papa,” ¿qeshoda amën cudasënquin cuënotebi menepadic? Padenquio. <sup>10</sup> ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquio. <sup>11</sup> Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Èbi nashunta, Papa,” qesho tantiashe bëdamboen nashuntsiashe. Nuquin Papa chianeta.

### *(Duc 6.31)*

<sup>12</sup> Nuquin Papan tantiaido icquin utsibo bëdamboen isquin bëdamboen nashunta. Utsibo caic: “Aidon nashumpashuni,” quequin mimbi otacquio tantiacpadomboembidi utsibotsen nashunta. Aden Nuquin Papan chiaid Moisesbëdtan nuquin tsusedpabo utsibon dada uaqun chiampicpadomben mimbi natsiaque. Aden utsibo nashunta —quequin chuipondash Esusën.

### *Daëdpactsëcshun Esus tantiabente chiaid* (Duc 13.24)

13-14 Adshumbic Esusën naden chuipondash. —Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedacimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidacimboec matses dadpenquo abi tantiesabo yec Nuquin Papan icsaido nësecacno nidendac —quepondash Esus.

*Icsambo icquid nec, quequin tantiate chiaid*

*(Duc 6.43-44)*

15 Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquo chuiquid nebi,” quec bëdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bëdi dapa nëish yua pete bunquiabimboec mibi icsamete bunquieque. Adquidën chuisho tantienda. 16 “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icscho tantiashun: “Utsi uain chiec,” mimbi catsiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic. 17 Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. 18 ¿Cuëte bëdan bacuë chetemaidta nepec? Padenquo. ¿Cuëte icsan bacuë chetequidta icpec? Padenquo. 19-20 Chetemaidbimboec muaquid bëdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icscho: “Muaquid nec,” quequimbidi mimbi tantiatsiaque. Adquidën chuisho tantienda. Cuëte bacuëesa dëdshun nëdëncacimboen: “Nuquin Papan chiaid chiembi,” quec muaquid Nuquin Papan icsaido cuidacno nësecaindac —quepondash Esus.

*Nuquin Papa yacno puduednu, queuidte chiaid*

*(Duc 13.25-27)*

21 Utsitsen Esusën chuipondash. —Ëbi caic: “Con Icbo mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomben naquidquien abi yacno puduedtsiash. 22 Nuquin Papa yacno ëmbi yuedte ushën matses dadpenshun ëbi chuiuidendac. “Con Icbo mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,” 23 quesho ëbimbo tantiec Nuquin Papan chiacpadec bëdamboec tabadabi icscho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bëdamboec tabadta —quepondash Esus.

*Shubu uaquidbimboecquid chiaid*

*(Duc 6.47-49)*

24 Adshumbic Esusën padpiden chuipondash naden chuiquin. —Ëmbi chiacpadomben nata. Aden mimbi bëdamboen natsiaque. Shubu uaquin bëdamboen tantiaquidbimboec mibi icsiaque. Tantia. Chuinu. Bëdamboen tantiaquidën mananënquo shubu uaquin buintad nitsinquid. 25 Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid. 26 Aden ëmbi chiacpadomben naquid icnubi utsibo ëbi tantiesa iquendac. Aido shubu uaquin tantienquo icquidbimboec iquec. Tantienuo icquidën nadoquid. Acte cuidi cuëmanquiobi shubu uaquin badedi unëstsëcquidquo cuate nitsinquid. 27 Adquid nitsinaid ue dapabëd conquequid choquin shubu chimeshquid. Adecbidi acte cubudtoquidën shubu nuntan

mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata –quequin chuipondash Esusën.

*(Mad 1.22)*

<sup>28-29</sup> Adsho tantiash: –Ma comapenen tantiaquidquio Esus neyoc. Nuquin matses tsu-siobon Moisesën chiampid bëdiactsëc tantiatsëcquin chuitsëccosh. Padnuen Esusënquio comapenen tantiaquin chuiposh –quecuededpondash matses dadpenquio.

## 8

*Esusën daicsaid bëdamiaid  
(Mad 1.40-45; Duc 5.12-16)*

<sup>1</sup> Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenshun tsibanampondash.

<sup>2</sup> Adnubien dada ushumbo yec daicsaidquio choshon Esus ismenuen danëshën sebud-pondash. –Ëbi bëdamete bunquin mimbi ëbi bëdametsiaque. Ëbi bëdame, Icbo –caquien Esus: <sup>3</sup> –Ai, mibi bëdamete bunebi. Mibi bëdanendac –quequin mishtemaidquiobi mishnubi badedquio bëdampondash daicsaid nibëdquiec. <sup>4</sup> Adsho Esusën: –Ütsibo chienquio yec nëish yua abided unës uaquido ismenuec nidta. Mibi isash: “Bëdamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bëdamioshi,” quequin Nuquin Papa menetequid buanquin ismec nidta –quequin Esusën chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusën bëdamiaid  
(Duc 7.1-10)*

<sup>5</sup> Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. <sup>6</sup> –Tantia. Chuinu, Icbo. Con shubun icquid con yua shëquëquenquio iccosh. Natiambo yec unëstiadsëcquio iccoshe. Bëdameta <sup>7</sup> –quesho tantiashun: –Ai, bëdamec nidnu. Nid –caquien: <sup>8</sup> –Padi. Mibi bëdamboshë icquidquio nec. Ëbibi icsactsëcquid icquin mibi con shubun puduedmetiapimbo iquebique. Nëshunquiobi bëdameta. Nidenquio icquin nëshunquiobi mimbi: “Bëdanta,” cac con yua bëdantsiashe. Mimbi tantiacpadomboen namequidquio mibi nec. <sup>9</sup> Ëbibic chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquio choec. Con yuan ëmbi: “Nata,” cac ëmbi chiacpadomboen naic. Mibi adquidquibidi neque. Con yua bëdameta –quepondash sondado chuiquid dapa.

<sup>10</sup> Adsho tantiashun Esusën abi tsibambëquido chuipondash. –Bëdamboen nëidën chuipec. “Comapenen tantiaquin chuiquinuidi con yua bëdametsiashe,” quequin ëbi bëdamboen tantiaquid nec. Isadaidbo adquid nibëdec. Isadaidbon ëbi bëdiactsëc tantiabededtsec. <sup>11</sup> Tantia. Chuinu. Matses utsi icquimbi sondado chuiquid dapan ëbi bëdamboen tantiec. Adec nidaid utsi-utsiec yacnoquido isadaidpembo ëbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. <sup>12</sup> Padnuen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tënquebudquiendac –quequin abi tsibambëquido isadaidbo chuipondash Esusën. <sup>13</sup> Adshumbic sondado chuiquid dapa chuiquin: –Nidec nid. Mimbi tantiacpadec min yua bëdaneque –cac nidshun isquien bëdanac Esusën chuibocpadequi.

*Petedon nachi Esusën bëdamiaid  
(Mad 1.29-31; Duc 4.38-39)*

<sup>14</sup> Adash yuec-yuecpectsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. <sup>15</sup> Uesho istuidshun mëdinquin Esusën bédamepondash. Aden bédamiac Esus pemepondash.

*Esusën matses dadpen bédamiac*  
(Mad 1.32-34; Duc 4.40-41)

<sup>16</sup> Petedon nachi bédamiac inchëshbudtsëqui Esus ismenuequin matses daicsaido dadpen bë-bëpondash. Bë-bëshobien podobitsi icsa dapuedaido comapenec cuëdquin cuemeshumbic daicsaidotsen Esusën bédamebampondash. <sup>17</sup> “Nuqui icsaid ucquin nuqui daicsaidobi bédamiac,” quequin ëndenquo Nuquin Papan Esusën nate Isayas dada uamepampicpadomboen nanuen adopondash Esusën.

*Abëd icte bunquido Esusën chiaid*  
(Duc 9.57-62)

<sup>18</sup> Adashic abi isnuec matses dadpenquo datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus. <sup>19</sup> Pudianec nidaneshobien Moisesën dada uampid chuibanquidën Esus chinuntu-idpondash. —Con Icho mibi caindambi. Mibëd nidendabi —caquien: <sup>20</sup> —¿Ëbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiac yec quenenuquo yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

<sup>21</sup> Adnubien abëd capucuenoed utsin: —Chiata, Icho. Con pa unësoshe. Chococatamono —caquien: <sup>22</sup> —Padi. Cho. Ma unësaidën tantienquo yacnimboen ëbi tantienquo icquidon ma papa chococanu. Ëbëdtan bédamboen naic cho —capondash Esusën amë unësaid chuiquin. Adobidanec nidanepondash chian yacno.

*Natiambo cunquenuc acte tēccuasquiaid Esusën ënëdmiaid*  
(Mad 4.35-41; Duc 8.22-25)

<sup>23</sup> Chian budash Esus chedo cano antabëdtopondash. Adashic potenuc puduampondash. <sup>24</sup> Aden potenubi nënantanquo icnuc cunquetuidpondash. Adnubien acte comapenec tēccuasquiampondash. Adec acte tēccuasquenuc cano acte ancushad-ancushadquiec yampondash cano mentoadtiadtsëcquo yec. Adsho isun abëd icquidon: —Dacuëdampambo iquec —quetanquin isquien Esus ushpec.

<sup>25</sup> Adshobien tinquin: —Nuqui mentoadteque. Isucun, Icho. Baded ëbi nashun —caquien: <sup>26</sup> —¿Atotsi quiash dacuëde? Ëbi bëdiactsëc tantiatsec dacuëdquidquo mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquo ënëdpondash cano mentoadtsenquionobi. Actetsen tēccuasquenquo yampondash. <sup>27</sup> Adsho isashien: —¿Mitsipadquidënquo actebëdta cunquequid ënëdmepashba? —quecuededpondash Esusbëd icquido.

*Dada daëd dapuedaido podobitsi icsabo Esusën cuemiaid*  
(Mad 5.1-20; Duc 8.26-39)

<sup>28</sup> Aden chian potia sh pudundonobien Cadada yacnocquid podobitsi icsa dadpen dapuedaido dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquiec dacuëdampambo icsho isash aid yacno matses nidenquo icpondash. <sup>29</sup> Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

<sup>30</sup> Uano chanco dadpenshun natiacquin udquin pebededpondash. <sup>31</sup> Adnubien podobitsi icsabon aid dada daëd oncameoac: —Èbitedi cuemiach chanco icbo-icboec dapuduedtsiabi —quecuededpondash podobitsi icsabo. <sup>32</sup> Adsho tantiashun Esusën: —Ai, mimbi tantiacpadec nid —cac nidash chanco icbo-icboec dapuduednubi chanco abitedi macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bëdambo yampondash.

<sup>33</sup> Adsho istanequien chanco pemequido aton matses chiec niquianec shubu dadpen yacno nidanepondash. Chanco mentoadbudneboedbëdta podobitsi icsabo dapudue-meboed uesquin chuituidpac caondash. —Nuqui dacuëdëmboedobi bëdambo yanosh —quequin <sup>34</sup> chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Èbi yacno choenda. Nidec nid —cabededpondash. Adoac Esus nidpondash.

## 9

### *Shëquëquenquo icquid Esusën bëdamiaid (Mad 2.1-12; Duc 5.17-26)*

<sup>1</sup> —Nid —cac nidanec chian budash cano antabëdtoshon chian potiasch abi iccondacnobidi Esus choapondash. <sup>2</sup> Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Èbi caic: “Aidën bëdametsiasch,” qeshun bëac —quequin daicsaid chuipondash naden. —Dacuëdenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bëdamboen ismembique —capondash Esusën.

<sup>3</sup> Adsho tantiash aid datsidadash tabadquido Moisesën dada uampid chuibanquido: —¿Aspecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

<sup>4</sup> Uanuësh adsho ambembi tantiashumbien Esusën aido chuipondash. —¿Atotsi quequin mimbi èbi chieshëmpe? <sup>5</sup> Ambi namiaid icquin èmbi: “Nuquin Papa cuidmenquo icquin mibi bëdamboen ismembi” cac Nuquin Papan nëid cuidenquo iquendac. Adem-bidi ambi namiaid icquin èmbi: “Caputa,” cac nëid capuendac. <sup>6</sup> Istac. Mibi ismembique. “Nuquin Papan chomiaid nec. Icsaidobi Nuquin Papa bëdamboen ismequid nec,” mabi canu,” qeshun naimbique. Istac —quetanquin dada shëquëquenquo icquid chuiquin: —Caputa —capondash Esusën. <sup>7</sup> Adoac bëdanash aton shubuno nidpondash. <sup>8</sup> Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec —quecuededpondash isquido.

### *Èbëd iquec cho, quequin Esusën Mateyo chiaid (Mad 2.13-17; Duc 5.27-32)*

<sup>9</sup> Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na èmbi chiactedi piucquid bedshun èbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec <sup>10</sup> nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec èbëdtan piucquid bedshunquidobëdi con matsesën: “Icsaido nec,” caidombo pudued-puduedpondash. <sup>11</sup> Adsho isumbien Esus chieshënquido Padiseyobo caidon Esusbëd icquido chuituidpondash. —¿Atotsi quiash mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

<sup>12</sup> Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuc nebi. <sup>13</sup> Nuquin Papan naden dada



uamiampid pausudshun bēdamboen naic nid. “Ēmbi chiacpadomboen abentse-abentsen mimbi naic. Adoquimbi ěmbi chiaid utsi niaquec mimbi icsaido caido mimbi bēdamboen istiapimbo iquec. Adsho isun: ‘Mibi bēdambo iquec,’ catiapimbo iquebi” quequin Nuquin Papan dada uamiampid pausudta. Ēbibi matses bēdamboen ismequid nebi. Muaquido: “Bēdambo icquid nebi,” qesho bēdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquio yec ěnēdta,” canuec nebi —quepondash Esus abi chieshēnquido chiec.

*Esusēn buna mēmunquido chiaid  
(Mad 2.18-22; Duc 5.33-39)*

<sup>14</sup> Adnubien Uan acten mentoanquidbēd icquidon choshon Esus chuituidpondash. — Nuquin tsusedpabon nacpadomboen Nuquin Papauidi tantianuen buna mēmunquidquio nebi. Padiseyobo adembidi naquidquio nec. ¿Atotsieshun mibēd icquidon aden nainquio icpec? ¿Natiapimboda iquec? —caquien <sup>15</sup> Esus nadpondash. —¿Icbon: “Pec cho,” cacta aid tantiec sedenquecuededquin buna mēmumpadic? Padenquio. Adquidbēdtan pec cuishonquec tabadquid. Icbo nibēdanan sedenquecuededquin buna mēmunquid. Ēbi nibēdanan ěbēd icquidon ěbiuidi tantianuen buna mēmunendac —quepondash Esus.

<sup>16</sup> Adshumbic Esusēn naden chuipondash. —Dashcute chuca cuēshun dashcute shēni nedesquiaidbēdta tuscaisa. Aden tuscashun panac shēni badedquio nedesquequid. <sup>17</sup> — ¿“Machi sandono,” qeshun tsitsan shēnimbida sandopadic? Padenquio. “Machi sebudnushe,” qeshun tsitsan shēnin sandoenquio icquid. Tsitsan chuca daēdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquio icquin ambi bēdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbēd icquido chiec.

*Champi uincuemiaidbēdta chido bēdamiaid  
(Mad 5.21-43; Duc 8.40-56)*

<sup>18</sup> Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unēstiadsēcquio iccoshe. Mishec cho. Mimbi mishac bēdantsiashe —capondash. —Mibi con Icbo canu —quequin danēshēn sebudquin ismepondash. <sup>19</sup> Adoquien Esus aidbēdi nidpondash.

<sup>20-21</sup> Nidnubien chido intac budted-budtedec seta 12tedi matamec bēdanenquio yec nacchoadbudquidēn Esusēn cachoetsēqui choquin: —Bēdamianquidēn dashcute mishec bēdampatsiashe icmanendac —qeshun ismenquio icquin dashcute cuēmano mishtsac caondash. <sup>22</sup> Adoquien bidadquin isun Esusēn chuipondash. —Dacuēdenda. Mibi: “Aidēn nac bēdantsiabi,” quiacpadec mibi bēdanendac —Esus quenubi bēdampondash.

<sup>23</sup> Aid bēdamebidanec nidequi chuibante shubun tabadsho isquidēn shubun puduedshun isquien matses dadpen tabadec. Champi unēsacsho isash sedenquecuededec tabadec. Nēidic matses unēsān con matsesēn nacpadomboen shoncate shoncaquido. Nēidic comapenec sedenquecuededquido dadpen. Aidtedi icpondash. <sup>24</sup> Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —qeshun Esus mamēnshumbededpondash. <sup>25</sup> Niecunan Esusēn champi uiacno quēnēn puduedtanquin mēdinac champi uincuenash bēdambo yec capupondash. <sup>26</sup> Adsho isun champi unēsaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

*Bēshuaid daēd Esusēn bēdamiaid  
(Duc 18.35-43)*

<sup>27</sup> Auēshquio puđuanec nidshobien bēshuaid daēdshun chinunshun comapenec cuēdquin Esus chuituidpondash. —Daidēn tsyuecquid Nuquin Papan chomiaid icquin bēdamboen isquin ěbi bēdame —quebud-quebudpondash. <sup>28</sup> Shubu utsin puduedash

abëdi tabadshobien Esusën: —“Ëbi bëdametsiash,” ¿caindabi ique? —caquien: —Ai, adebi —quepondash.

<sup>29</sup> Adshobien aid daëdi bëmishquin: —Mimbi tantiacpadec bëdanta —cac  
<sup>30</sup> bëdampondash. Adsho isun Esusën: —“Bëdamioshi,” quequin utsibo chienda —  
capondash. <sup>31</sup> Adoboqui anocquidotedi chuiben-chuibempac caondash.

### *Esusën onquesa bëdamiaid*

<sup>32</sup> Bëshuaid bëdamiaid puduenubien podobitsi icsa dapuduedaid onquesa dada Esus  
ismenuen bëpondash. <sup>33</sup> Bëacsho isun Esusën podobitsi icsa dapuduemiad bëdanash  
onquiampondash. Aden bëdamesho isash: —Nuquin nidaid Isadaid caidënsun adoen  
ictenec —quecuededpondash isquido.

<sup>34</sup> Adnubien Esus chieshënuquido Padiseyobo: —Podobitsi icsan icbon namiaid icquin  
podobitsi icsa cuemequidien nechitec —quecuededpondash Esus caic.

### *Esusën matses tantiaquiaid*

<sup>35</sup> Aden onquesa bëdamianec nidash capucuen-capucuenquin shubu dadpen ic-  
quid yacno Nuquin Papan chiaid chuibante shubun puduedshun Nuquin Papan  
matses icsaido bëdamboen iste chuipondash. Adshumbic anocquido daicsaidotedi  
bëdamebampondash. Adenuidi shubu dadpen yacno-yacnomboen chuibanquimbi mat-  
ses bëdamebampondash. <sup>36</sup> Abi tantienquio icquido dadpen cho-chosho isash unësquio  
icnuc shubiantiadquio icpondash Esus. —Abi isquid nibëdnuc bacuëbo icsamboec  
tabadacimboec icsambo iquec. Nuquin Papa bëdamboen ismete chiabi yac tantien-  
quio yec natia chieshëmë nec bëdamboec tabadtiapimbo iquec —quiash shubiantiadquio  
icpondash Esus.

<sup>37</sup> Adshumbic abëd icquido chuipondash. —Pete dadpen nitsinaid caniacsho bedta-  
nenquio icnuc sinash chodquebudnequid. Adecbidi Nuquin Papan chiaid chuibanquid  
nibëdnuc matses icsamboec tabadec. Aden chuibanquid nuqipadquid daëdpactsëcquio  
iqueque. <sup>38</sup> Nuquin Papa chianeta. “Matses dadpenshunquio mimbi bëdamboen iste  
tantiabi iqueque. Mimbi chiaid chuibanquid dadpen icmeta, Papa,” quequin Nuquin  
Papa chianeta —quequin chuipondash Esusën abëd icquido chuiquin.

## 10

### *Esusbëd icquido 12tedi chiaid (Mad 3.13-19; Duc 6.12-16)*

<sup>1</sup> Adshumbic Esusën abëd icquido 12tedi chuipondash. —Ëmbi naid chuibeneta.  
Ëmbi namiaid icquin ëmbi nabocpadomboen podobitsi icsa matses dapuduedaid mimbi  
cuemendac. Adembidi daicsaido abitedi mimbi bëdamendac —quequin chuipondashi  
nëidtedi. <sup>2</sup> Nëidic Petedo caidbidi Simon cuëmëdquid. Nëidic abëdta tishaid Andedes  
cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpon-  
dash. <sup>3</sup> Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi  
Mateyo con matses piucquid bedshundenedi. Nëidic Acobo cuëmëdquid utsi Adpeon  
mado. Nëidic Debeyo caidbidi Tadeyo cuëmëdquid. <sup>4</sup> Nëidic Simon cuëmëdquid utsi  
con matses yuaquido cuemete bunquid. Nëidic Iscadiote caidbidi Udas cuëmëdquid abi  
chieshënuquido Esus bedmequid. Aidtedi abëd icquido icsho chuipondashi.

### *Abëd icquido: Chuibeneta, caid (Mad 6.7-13; Duc 9.1-6)*

<sup>5</sup> Adshumbic: —Ëmbi chiacpadomboen chuibenenuc nidshun isadaidpembo  
chienda. Aido yacno nidenda. Nidaid cuëshë Samadia caid yacnocquidon shubu  
datambidanta. <sup>6</sup> Nuquin matses isadaidbuidi chuibeneta. Bënudshun podqued  
tantienquio yachimboen nuquin matsesën Nuquin Papambo tantienquio iqueque.



<sup>7</sup> “Mibi icsaid ënash bédamboec tabadta. Nèbi abéd tabadtequido icmequin Nuquin Papan matses bédamboen tabadmendac,” quequin chuibeneta. <sup>8</sup> Adembidi daicsaido bédamequinc unësaido uincuemequinc dada ushumbo yec daicsaido bédamequinc podobitsi icsa dapuedaido cuemeshunquinc cabeneta. Adoshon: “Pucquid beccho,” cainda. Ëmbi nabocpadomboembidi mibi namembique. “Pucquid beccho,” quequin nainquio iccombique. Adembidi nashumbanta. <sup>9</sup> Aden chuibenec nidquin min piucquid buanenda. <sup>10</sup> Adembidi pete sandoaid buanenda. Dashcute utsibèdta tapucudte utsi sandoshon buanenda. Mibi tidinquete cuate abentsëqui buanta. Adec mēdadauidquio chosho isun mimbi bēdamiaidon: “Mibi bēdambo iquec. Ëbi yacno ushec cho,” mibi cac bēdambo ictsiash. Adembidi: “Mitsana nibēdsho isun mibi menenu,” mibi cac bēdambo ictsiash.

<sup>11</sup> Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidën shubun ushta. Auëshquio nidabi yec aidën shubunuidi ushta. <sup>12</sup> Aidën shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. <sup>13</sup> Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquec. <sup>14</sup> Shubu dadpen icquid utsi yacno mibi nidacsho anocquidon cuemiad naden ismeta. Auëshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. <sup>15</sup> Mimbi adosho isun matses cuidte ushēmbi Nuquin Papan aido comapenen cuidendac. Ëndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsëc Sodoma canubi shubu dadpen icquid utsi Comoda capampic. Aid daēd yacnocquido bēdiactsëc cuidshun mimbi chiaid tantienquio icquido comapenen cuidendac —quepondash Esus abéd icquido chiec.

### *Esus tantiaquido chieshēnte chiaid*

<sup>16</sup> Adashic padpiden chuioaic: —Ëmbi naid chuibenequido icsho utsin-utsinquien mibi chieshēnendac. Bēdi nēish yua acte bunacbimboec chieshēmēnquido mibi cuate bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita. <sup>17</sup> Mibi chieshēnquin cuesunetiadquio iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquio mibi cueshcaten cueshcaindac. <sup>18</sup> Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ëbi chuiquidon chuiquid dapabēdta isadaidpembo ëmbi naid chuibanu,” ëbi quenuc mibi aden buanendac. <sup>19</sup> Adoac dacuēdenda. “Chuiquid dapa yacnoshon ¿atotsimbi chuipatsiaba? ¿Adambi bēdamboen chuipatsiaba?” quec dacuēdenda. Chuiquid dapa mimbi bëisnubi Nuquin Papan ambi tantiacpadomboen mibi oncamendac. <sup>20</sup> Aden aton Mayanën ambi tantiacpadomboen mibi oncamendac —quepondash Esus.

<sup>21</sup> Adashic padpidec onquec: —Ëbi chieshēnquidon ëbi tantiaquidotsen comapenen chieshēnendac. “Esus tantiaquid nec,” qeshun aton buchimbi aton utsi cuesunemendac. Amēmbi ambi tishmiaid cuesunemendac. Aton bacuēbombi chieshtoshon anibēdta amē cuesunemendac. <sup>22</sup> “Esus tantiaquid nec,” qeshun matses dadpenshun aden chieshēnaqui chieshtoenquio icquin ëbi tantiasho Nuquin Papan abi yacno mibi puduedmendac. <sup>23</sup> Shubu dadpen yacno nidacsho chieshēnac shubu dadpen icquid utsi yacno cuenta. Anoshontsen ëmbi naid chuisho chieshēnoac shubu dadpen icquid utsi

yacnotsen cuenoata. Adecuidi cuendeneta. Nēid nidaid Isadaid caidēn shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuēsh choaindabi.

<sup>24</sup> Mibi tantiamequid nebi. Ēmbi tantiamiaido icsho ēbi icbocpadomboembidi mibi chieshēnendac. Abi chuiquid dapa chieshēnacpadembidi ambi namiaidotsen chieshēnquid. Icbo chieshēnquimbi yuabotsen chieshēnquid. <sup>25</sup> Adembidi ěmbi chiacpadomboen natiadquio icsho mibitsen chieshēnendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshēnendac – quequin chuipondash Esusēn abēd icquido chuiquin.

*Dacuēdenquio icquin chui, quequin chiaid*  
(Duc 12.2-7)

<sup>26</sup> Adshumbic padpiden chuiquin: –Mibi chieshēnquido dacuēdēnenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsēcquin chiaid Nuquin Papan utsibo tantiamendac. Adembidi mimbi bēdamboen naidtedi Nuquin Papan utsibo tantiamendac. <sup>27</sup> Nēbi ěmbi mibitedictsēqui chuiboed dacuēdenquio icquin utsibo chuibeneta. <sup>28</sup> Chuibenesho min dadauidtsēqui cuesunetequid dacuēdēnenda. Min tantiate unēstiapimbo icquid icsho nibēdametiapimbo iquec. Min dada unēsan min tantiate abi icsho cuidnuequin chian anēdēnquequid nēsecanquid tantia. Adquid Nuquin Papa icsho dacuēdēnta.

<sup>29</sup> Utsibon chieshēnaqui dacuēdēnda. Nuquin Papan mibi tantieque. ¿Padichucu cuesaid isashta unēsquio icti? Padenquio. Padnuen ambi tantiacpadomboembi padichucu dadpen icquid abentsēc cuesac paēdsho Nuquin Papan tantiec. <sup>30</sup> Adembidi min manēdaid Nuquin Papan tambanāidquio nec. Aden min manēdaid abentsēc paēdsho aidēn tantiec. <sup>31</sup> Aden min manēdaid tambanquid icquin padichucu bēdiactsēc tantiatseccquin mibien comapenen tantieque. Mibi chieshēnquido dacuēdēnenda –quequin chuipondashi Esusēn.

*Esus con Icbo nec, quequido chiaid*  
(Duc 12.8-9)

<sup>32</sup> Adshumbic padpiden chuiquin: –Utsibo chuiquin: “Con Icbo Esus nec. Nuquin Papa yacno ēbi puduedmequid nec,” quequin chianequid Nuquin Papa yacno chosho isun: “Nēid ēbi tantiaquid neque. Puduedmeta, Papa,” quequin Nuquin Papambo chien-dambi. <sup>33</sup> Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bēdamboen istiapimbo iquebi. “Nuquin Papa yacno puduednu,” quesho: “Padi. Ēbi tantiaquidpenquio neque. Puduedmenda,” quequin Nuquin Papa chien-dambi –quequin Esusēn chuipondashi.

*Esus tantiaquidobēdi cuēshēdte chiaid*  
(Duc 12.51-53; 14.26-27)

<sup>34</sup> Adshumbic padpiden chuiquin: –Ēmbi chuiboed tantiashun: “Nuquin Papa yacnuēsh choquid icquin abitedimbo bēdamboen tabadmetsiash,” ¿caquindabi ique? Padenquio ictsiambi. Ēbi tantiaquidobēd ēbi tantiesabo cuēshēdenquio icte danenda. Ēbi tantiaquidobēdi ēbi tantiesabo cuēshēdendac. <sup>35</sup> Amēbēd aton mado cuēshēdendac. Adecbidi anibēd aton champi cuēshēdendac. Adecbidi aton chayabēd aton babanēn cuēshēdendac. <sup>36</sup> Aden aton shubun icquidombi ēbi tantiaquid chieshēnendac.

<sup>37</sup> Padnubic aton matsesuidi tantiaquidēn ēbi bēdiactsēc tantiatsēctsiash. Aton tita tantiaquinc aton papa tantiaquinc cain aidēn chiacpadomboenuidtsēqui naquidēn ēbi bēdiactsēc tantiatsēcquin ěmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bēdambo icmeteuidtsēqui bunquin ēbi bēdiactsēc tantiatsēcquin ěmbi chiacpadomboen natiapimbo ictsiash. Adquido

bëdamboen istiapimbo iquebi. Èbi tantiesabo nec. <sup>38</sup> Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsiash. Adquidot-sen ëbi tantiaquidpenquo iquendac. <sup>39</sup> Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsiash —quequin Èsusën chuipondashi.

*Nuquin Papan bëdambo icmete chiaid*  
(Mad 9.41)

<sup>40</sup> Adshumbic Esusën ëbi chedo padpiden chuipondash. —Mibi chieshënquido icnubi mibi bëdamboen isquid iquendac. Èmbi naid mimbi chuisho tantiash: “Ai, abimbo caic,” queshun ëbi tantiabenquin ëbi chomequidtsen tantiabenendac. <sup>41</sup> “Naden naindambi,” quequin ambi chiaid chuibenequid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bëdamboen chuisho tantianu,” quequid icsho Nuquin Papan bëdamboen isendac. Adembidi abi tantiec ambi chiacpadec bëdamboec tabadquid Nuquin Papan bëdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” queshun bëdamboen isquidotsen Nuquin Papan bëdamboen isendac. <sup>42</sup> Adembidi ëbi tantiaquid yec acte bundoacsho acte menequid Nuquin Papan cuidnanquin bëdambo icmendac. Adembidi utsibon Esus tantiaquido bëdamboen nashunsho Nuquin Papan bëdambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

## 11

*Uan acten mentoanquidën chuimiaid*  
(Duc 7.18-23)

<sup>1</sup> Esusën: —Chuibenetan —cac abëd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbëd icoaic cho-chopondac.

<sup>2</sup> Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash. <sup>3</sup>—Uanën: “Chuitan,” cac chobi. ¿Èmbi cainaid Nuquin Papan chomiaidquioda mibi nepe? Mibi adquidpenquo icnuc ¿ada utsi chopatsiash? —caquien <sup>4</sup>Esusën: —Èmbi nadatiambo icquin nabamboedbëdta ëmbi chuiboed Uan chiec nid. <sup>5</sup> “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bëdanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquo icquido Nuquin Papan bëdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquo nec,” quequin ëbi tantiendac. <sup>6</sup> Adshumbic nadentsen chuita. “‘Muambo nec, ëbi cainquo icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,’ quiosh,” quequin chiec nid —cac nidanepondash Uambëd icquido.

*Uan acten mentoanquid chiaid*  
(Duc 7.24-35)

<sup>7</sup> Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuc nidonda? ¿Cunquequidën ishacunaid isnucta nidtionda? Padenquo. <sup>8</sup> ¿Dashcute bëdaidquo dasiuidaid isnucta nidtionda?

Padenquio. Icsactsëcquid Uan dasiuidpondash. Dashcute bēdambošē icquid dasiuidquido ancanquidēn shubu dapan tabadquido nec. <sup>9</sup> Ad icnuc ¿atotsi quenuec nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiidquio Uan nec. <sup>10</sup> Uanēn abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bēdambo icquid choeque. Icsainquio yec ēnēdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. <sup>11</sup> “Nuquin Papan chomiidquido choec,” quequin chuiquid Uanpadquid utsi nibēdec. Adquid yequi: “Abi choec,” quequin ambi chuiboedēn ěmbi nabansho isabi yequi bēdapabi Uan ictsec. Padnuen ěmbi Nuquin Papan chiacpadomboen nabansho isash ěbi tantiaquido bēdambošē iquendac. <sup>12</sup> Uanēn chuisho Nuquin Papa tantiabenacpadomboen ěmbitsen Nuquin Papan bēdamboen iste chuisho tantiashun adembidi abi icsaid ěnshun icsaboedon dadpenshun Nuquin Papa tantiendac. <sup>13</sup> Nēbi Uanēn: “Nuquin Papan abi yacnoshon bēdambo icquid chomendac,” quequin chuipondash. ¿Ambiada adopondash? Padenquio. Ĕndenquimboshē tauamboen nuquin tsusedpa Moisesēn chuibempampic. Adshumbic utsintsen. Adshumbic utsintsen. Aden Nuquin Papan ambi bēdambo icquid chomete chuiquin dada uamianepampic. <sup>14</sup> Adembidi Uan chote chuiquin dada uamepampic. “Nuquin Papan ambi tantiacpadomboen oncamiidquio Edias cuēmēdquid choendac,” quequin Ediasbimboecquid Uan chote chuiquid. Bēdamboen tantiaquin: “Nuquin tsusedpa Ediasbimboecquid Uan nec,” mimbi catsiac. <sup>15</sup> Bēdamboen tantiaquidēn adembidi tantiatsiash —quepondash Esus abi datsidadquido chiec.

<sup>16</sup> Aden chuisho tantiash chieshtoshobien Esusēn chuipondash naden. —Nuquin Papan chiaid tantienquio icquido yec nēmbo icquido ¿midapadquidoen nec? Bacuēbo nēishnanacbietsëcquieci mibi iquec. Bacuēbo: “Ĕmbi chiacpadomboen nanuna,” queuidash ambi chiacpadomboen aton utsibon nainquio icsho isash nēishash chushcananquid. <sup>17</sup> “ ‘Cuēdēnuna,’ queuidbosh ěbi cuēdēnubi ma mibi cuēdēnenquio icboc. ‘Sedenquenuna,’ queuidbosh ěbi sedenquenubi ma mibi sedenquenquio icboc,” quetsash bacuēbo nēishnanacbietsëcquieci ma mibi iqueyoc. Adec nēishēmēnquido yec icsambo ma mibi iqueyoc. <sup>18</sup> Uan pete utsi-utsien pesa iccosh. Adecbidi acte paēmbo icquid aquesambo niosh. Adquid icsho isash nēishash: “Ĕmbi nacpadomboen naisa nec. Podobitsi icsa dapudedashien nechitec,” mibi quepondac. <sup>19</sup> Ĕbien nuquin matsesēn piacbimboen pequid nec. Adembidi actequid acquid nebi. Adsho isash nēishun ěbitsen icsamboen chuishunquin: “Peteuidi tantiaquin nua pequid nec. Tantiadenuen acte paēmbo icquid acquid nec. Adecbidi nuquin matses piucquid bedshunquidobēd onquec icsambo icquid caidobēd onquec quequid ma aidobēdi icsambo icquid nepayoc,” mimbi ěbi capec. Padnuen bēdamboen tantiaquidēn Nuquin Papan chiacpadomboen nasho isun Uambēdta ěbi: “Bēdambo iquec,” caindac —quepondash Esus abi chieshēnquido chiec.

### *Shubu dadpen icquidēn tabadquido cuidte chiaid*

*(Duc 10.13-15)*

<sup>20</sup> Adshumbic Esusēn padpiden chuipondash. —Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bēdamboec tabadtiadquio iquebi,” quetiadquidi chieshec adenquio iquec —queshun Esusēn naden chushcapondash. <sup>21</sup> —Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ĕmbi aido ismebocpadomboen ismiac isadaidpembo cuidadenquio ictsempampic. Aden ismiaqui: “Ai, icsapobi,” quiash shubibudequi icsainquio yec ēnēdtsempampic. Shubu dadpen icquid Tido caid yacnocquidobēdi shubu



dadpen icquid utsi Sidon caid yacnocquido adtsempampic. <sup>22</sup> Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobëdta bëdiactsëc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobëdta Betsaida caid yacnocquido comapenec sidquenuc cuidendac. <sup>23</sup> Adembidi nëmbo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshënquido cuidacno nidmetequido ma mibi nepayoc. Èndenquimboshë yampido shubu dadpen icquid Sodoma caid yacnocquido cuidquin Nuquin Papan nibëdamepampic. Èmbi mibi ismebocpadomboen ismiac aidon abi icsaid èntsempampic. Abi icsaid ènsho Nuquin Papan cuidenquo ictsempampic. Cuidenquo yac nëbi aton matses abi ictsiash. <sup>24</sup> Nuquin Papan matses abitedi cuidte ushën: “Comapenen tantiaquin ismiacmaido nec,” qeshun Sodoma caid yacnocquido bëdiactsëc cuidendac. Nuquin Papan chomiaid icquin èmbi ismeboedo Capednaun caid yacnocquidoen comapenec sidquenuc cuidendac –quequin abi tantiesabo Esusën chushcapondash.

*Esusën dayacquiobimboecnuc icmete chiaid*  
(Duc 10.21-22)

<sup>25</sup> Adshumbic Esusën Nuquin Papa chuipondash. –Mibi bëdamboshë iquec, Papa. Mibi yacnocquidotedishun Icbombo yec nidaidën tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ëbi tantiamiabi iquec. Mimbi tantiamiac nëidon ëbi tantiec. Aden mimbi bëdamboen naic. <sup>26</sup> Mimbi tantiacpadomboen mimbi bëdamboen naic. Mibi bëdamboshë iquec, Papa –quequin Esusën Nuquin Papa chuipondash.

<sup>27</sup> Adshumbic abi datsidadquido chuipondash. –Nuquin Papan ambi tantiaidtedi ëbi chuimec. Èmbi naboedbëdta èmbi nate abitedi con Pan ambentsëqui tantiec utsibon tantienquo icnuc. Adembidi Nuquin Papan natebëdta ambi naboed abitedi èmbentsëqui tantiembi. Aden Nuquin Papa tantiaquin: “Nëidtedi matses bëdamboen tantiamembi,” qeshun: “Nuquin Papa nadquo iquec,” quequin tantiamembi. <sup>28</sup> Èbi tantiata. Dayacquio yacbimboecnuc mibi bëdambo icmembique. “¿Mitsipadequibi Nuquin Papa yacno puduedpe?” quec ¿uimambo yacbimboecta mibi icpe? Adquidën ëbi tantiasho Nuquin Papa yacno puduedtequid mibi icmembique. Èbi tantiata. <sup>29</sup> Con Icbo ëbi cata. Con yuambo icquin èmbi chiacpadomboen nasho mibi bëdamboen isquin dayacquio yacbimboecnuc mibi bëdambo icmembique. Ancanesambo yec bëdambo icquidini neque. Con Icbo ëbi cata. Adsho mibi bëdambo icmembique. <sup>30</sup> Mibi ancainquio icquin dayacquio yacbimboecnuc bëdamboen mibi tabadmembique. Con Icbo ëbi cata –quequin chuipondash Esusën.

## 12

*Esusbëd icquidon petsëcsho istuidshun chushcaid*  
(Mad 2.23-28; Duc 6.1-5)

<sup>1</sup> Adshumbic chonoadtemaid ushën Esusbëd capucuenequin tied matanquin bundotsëcshun tiedën caniquid èshchicshun petempi petsëccondambi. <sup>2</sup> Pesho istuidshumbini con tsusedpabon chiampid namequido padiseyobon: –Is. Mibëd icquido chonoadtemaid ushëmbi chonoadequo –capondash Esus chuiquin.

<sup>3</sup> Adoquien Esus: –Ma icsapenquo icpayoc. ¿Nuquin tsusedpa Dabidën bundoshon ambi petemaidquo pepampid chuiquin dada uapampid isamboda ictio? <sup>4</sup> Aidën Nuquin Papa tabadte shubu uashunaid abi puduedtemaidën puduedshun ambi petemaid pan sanaid istuidpampic. Aid panëmpi nëish yua abided unës uaquidon petequid

nepampic. Aid panëmpi bedshun abëd icquidobëdtan Dabidën pepampic. Aden nuqui bëdambo icquid caidën ambi natemaïdi napampic. <sup>5</sup> Adembidi chonoadtemaïd ushën natemaïd chiaïd niacquimbi nëish yua abided unës uaquidon aid ushëmbi Nuquin Papa tabadte shubu uashunaïdën puduedshun nacnendenepec. Nuquin Papan chiaïd padomboen naiqui icsainquio icpec. <sup>6</sup> Nuquin Papa tabadte shubu uashunaïd tantiaquin adopec. Aid shubu bëdapabi icnuc bëdamboshë icquid nebi. <sup>7</sup> Nuquin Papan naden chiaïd mimbi bëdamboen tantienquio iquec.

“Èmbi chiaïd padomboen abentse-abentsen mimbi naic.

Adoquimbi èmbi chiaïd utsi niaquec mimbi icsaïdo caïdo mimbi bëdamboen istiapimbo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaïd bëdamboen tantiaïshun ëbëd icquidon bëdamboen nasho mimbi chushcainquio ictsenoc. <sup>8</sup> Tanta. Nuquin Papan chomiaïd icquin chonoadtemaïd ushë èmbibi chiampid icnuc èmbi tantiaïd padomboen aid ushëmbi èbi tantiaquido namembique –quepondash Esus èmbi petsëcsho istuidquido chiec.

*Mëicsatsaïd bëdamaïd  
(Mad 3.1-6; Duc 6.6-11)*

<sup>9</sup> Adanec nidec Nuquin Papan chiaïd chuïbante shubun puduedshun <sup>10</sup> isaquien mëicsatsaïd icpondash. Adnubien padiseyobon: –Chonoadtemaïd ushëmbi bëdamequid Nuquin Papan chiaïd niacquidien nechitec. Nuquin Papan chiaïd Esus niacmenuna. Aden niacmeshun: “Icsambo mibi iquec,” canuna –queshun Esus chuituidpondash. –¿Nadquid chonoadtemaïd ushëmbi matses bëdamequinda Nuquin Papan chiaïd niacpec? –caquien <sup>11</sup> Esusën: –¿Ada min nëish yua obeca caïd icpec? Adquid chonoadtemaïd ushën shëcuë uquëduc ampaëdacsho istuidshun ¿chiquenquioda mimbi icpatsia? Ai, mimbi chictsiaïc. Chonoadtemaïd ushëmbi mimbi chonoadquin chicpatsiaïc. <sup>12</sup> Aden min obeca bëdiactseïc tantieïc mibi bëdapabi icnuc matses tantiaquiquin nashunquid bëdamboshë ictsiash. Nadquid chonoadtemaïd ushëmbi matses aden bëdamboen nashunquidën Nuquin Papan chiaïd niaquenquio ictsiash –quequin Esusën abi icsamenu caquido chuïpondash.

<sup>13</sup> Adotanquimbien Esusën mëicsatsaïd chuïquin: –Mëcueta –cac mëcuc bëdampondash aton mëdante abiuc daëdi bëdambo yec. <sup>14</sup> Adsho isashien abi chieshënquido padiseyobo nëishquiopac caondash. Adec nëishanec nidash aton matses utsibobëd: –Cuesunequimbien Esus ictiaïd –quecuededpac caondash.

*Esusën nate ëndenquimboshë chiampid*

<sup>15</sup> Adnubien Esus: –Èbi cuesunetiadquio iquec –quianec auëshquiobi puduanec nidpondash. Nidsho isumbien matses dadpeshun tsibanampondash. Adshumbic aidon bëaïd daicsaïdotedi bëdamebampondash. <sup>16</sup> Adshumbic ambi bëdamaïdo chuïquin: –“Bëdamioshi,” quenda –quequin chuïpondash Esusën: –Èbi abi chuïquid dapa icmenushë –quiash adpondash Esus. <sup>17</sup> Aden Esusën nate chuïquin Nuquin Papan isadaïdbo tsusedpa Isayas dada uamepampic naden chuïquin.

<sup>18</sup> “Èmbi chomiaïd èmbi chiaïd padomboen naquidquio nec.

Aid tantiaquieïc bëdambo iquebi.

Con Mayan bëdambo icquid abëdi tabadmimbi.

Adoac èmbi bëdamboen iste isadaïdbobëdta matses utsibo abitedi bëdamboen chiendac.

<sup>19</sup> Chushcanante bunenquio yec ancanenquio iquendac.

Chuïquid dapa ictiapimbo iquendac.

<sup>20</sup> Icsambo icquido yec shubiquido yec natiaïc tabadquido yec daicsaïdo yec quequidon abi bëdiactseïc tantiaïbentsëcsho bëdamboen isquin bëdamboen tantiamendac.

Nuquin Papan chiaïd padec cuidte ushë choabi icnuc adoendac.

21 ‘Nuquin Papan tantiacpadomboen matses bédamboen namendac,’ queshun nidaid utsi-utsiec yacnocquidon matses dadpeshun aidi tantiendac,” quequin Esusën bédamboen nate chuipampic Isayasën.

*Podobitsi icsan namiaidi Esus nec, quiaid  
(Mad 3.20-30; Duc 11.14-23; 12.10)*

22 Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi onquesa nepondash. Isenquio yec onquenquio icshobien Esusën bédamepondash. Adoac isbenequi onquiampondash. 23 Adsho isashien Esus datsidadquido: —Is. Comapenen tantiaquin nabanquidquio nëid neque. ¿Nuquin tsusedpa Dabidën tsyuecquidta nepec? Adquid yec nuqui cainaidquio Nuquin Papan chomiaidien nechitec —quecuededpondash.

24 Adsho tantias Esus chieshënquido padiseyobo: —¿Aidta nedic? Ma aidpenquio neyoc. Betsibu caidën podobitsi icsan icbon namiaid icquimbien Esusën podobitsi icsa cuemehitec —quequin otacquo tantiapanëdash.

25 Adshobien Esusën aidon otacquo tantiaid ambembi tantiasshun naden chuipondash. —¿Adquidënda aton yuabi cuemepatsiash? Padenquio. Chuiquid dapan aton yuabo nëishtanquin chushcac cuësh-cuëshëdec aton yuabo uesadec nietsiash. Aido nibëdnuc chuiquid dapa ictiapimbo ictsiash. Adecbidi shubu dadpen icquidën tabadquido chushcananash cuësh-cuëshëdec niquian shubu dadpen icboedi daëdpactsëc yanec. 26 “Betsibu caidbidi Satanas caidëmbi namiaquien podobitsi icsa cuemehitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquio ictsiash. Satanasën cuemiac aidbëdi aton yuabo cuësh-cuëshëdtsiash. Adnuc Satanas aton icbopenquio yantsiash. 27 Mibëd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien nachitec,” cainda ictio? Ma mimbi padenquio icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido mibëd icquido. 28 Nuquin Papan Mayanën namiaquimbi podobitsi icsa cuemioc. Èmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec —quepondash Esus.

29 Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi ampeshuntiapimbo iquec. Icbo uidënquio icquid bucun cataneshun ampeshunquid. Adecbidi Satanas bëdiactsëc tantiaquid icnuc ëbien comapenen tantiaquidquio nec. Uidën uacbimboen nadatiambo icquin nabanquin aton yua cuemepombi. 30 Èbi con icbo cainquio icquido Satanasën yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

31 Adshumbic nadentsen chuipondash. —Nuquin Papan chiaid niac-niacboedëmbi ënacsho Nuquin Papan bédamboen isec. Nuquin Papan icsamboen chuishunquidëmbi abi icsaid ënacsho Nuquin Papan bédamboen isec. Aton Mayanën namiacsho isash: “Icsambo iquec,” quequin bédamboen tantienquio icsho Nuquin Papan bédamboen istiapimbo iquec. 32 Èbi chieshënquin icsamboen chuishunquidëmbi ënacsho Nuquin Papan bédamboen isec. Aton Mayanën namiacsho isash: “Icsambo iquec,” quequin icsamboen tantiassho Nuquin Papan bédamboen istiapimbo iquec. Aden ënenquio icquin icsamboen tantiassho adembidi ënenquio icquin bédamboen istiapimbo iquendac —quequin abi chieshënquido Esusën chuipondash.

*Bédambo icquid nec, quequin tantiate chiaid  
(Mat 7.15-20; Duc 6.43-45)*

33 Adshumbic naden bédamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën



tantiec. Adembidi matses bēdambo icquid bēdamboec onquec bēdamboec tabadsho isun: “Aid bēdambo icquid nec,” quequin matsesēn tantiatsiash. <sup>34</sup> Ma mibi adquidpenquoio neyoc. Nisibimboec icsa uanquido mibi nec. ¿Icsambo icquinda mimbi bēdamboen chuidio?. Ma mimbi padenquoio icboc. Mimbi icsamboen tantiaid ma mimbi utsibo icsamboen chuiboc. <sup>35</sup> Bēdambo icquidēn ambi bēdamboen tantiaid bēdamboen chuitsiash. Icsambo icquidēmbien ambi icsamboen tantiaid icsamboen chuitsiash. Aden mimbi icsamboen chuipoc. <sup>36</sup> Ambi cuidte ushēn Nuquin Papan: “¿Ada bēdamboen tantiaquin chuidenio?” quequin matses abitedi chuimendac. <sup>37</sup> Adoac abimbo chiec: “Ai, bēdamboen nadeniombi,” qesho icsano nidmenquoio iquec. Padnuen utsi: “Padenquoio. Icsamboembimbi chuidenechitoc,” qesho icsano nidmequin cuideque. Icsamboec onqueboedi ēnēdta –quequin Esusēn abi chieshēnquido chuipondash.

*Padiseyobon: Ēbi isme, quequin Esus chiaid  
(Mad 8.12; Duc 11.29-32)*

<sup>38</sup> Aden chuisho tantiashumbien abi chieshēnquido utsibon Esus chuituidpondash. – “Nuquin Papan chomiaidini nec,” quequin ēbi ismequin nadatiambo icquin nabanta. Isnu –quepondash padiseyobo Moisesēn dada uapampid chuibanquidobēdi.

<sup>39</sup> Adoaquien Esus: –Padi. Nuquin Papan chiaid niac-niaquec mibi icsamboshē iquec. Ēbi tantiate bunenquoio icquimbi mimbi: “Ēbi isme,” ēbi capec. Adsho nēbi mibi ismenquoio iquembi. Yuecshumbimbi mibi ismendac. ¿Ada nuquin tsusedpa Onas caidēn nampid tantie? Aid yampicpaden naindambi. <sup>40</sup> Chishcambiecquid dapan chebudac aidēn pucun uec daēdec ushacsho ucbudac Onas padpidec nidpampic. Adecbidi unēsacsho chococac Onas yampicpadec daēdec ushash uincuenendabi. Aden ismendambi. <sup>41</sup> Ēbi tantienquoio yec mibi icsambo iquec. Padnuen Nuquin Papan chiaid Onasēn chuibanac shubu dadpenquoio icquid Ninibe caid yacnocquido badedi icsainquoio yec ēnēdpampic. Nuquin Papan chiaid chuibanquid Onas bēdambo icpampic. Ēbien bēdamboshē icquidquoio nec. Adquid icquin nadatiambo icquin dadpen ismiaqui mimbi ēbi tantienquoio iquec. Aden ēbi tantienquoio icquido icsho Nuquin Papan matses abitedi cuidte ushēn Ninibe caid yacnocquidon: “Icsambo iquec,” mibi caindac. <sup>42</sup> Adquid cuidte ushēmbi matses utsi Sud yacnocquido ancaquidēn nuquin tsusedpa Sadomonēn chuisho tantiec chopampidēntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuēmēdquid dadpen tantiaquid nec,” quequin chuituidac Sadomonēn chuisho tantianuec nidshun aid chidon tantiatuidpampic. Adash: “Nuquin Papan tantiamiaidēnquoio Sadomonēn bēdamboen chuipoc,” quepampic. Ēmbien abitedi tantiaquid icquin nadatiambo icquin ismeuidpoc. Adoquī mimbi tantienquoio icpec –quepondash Esus abi chieshēnquido chiec.

*Abi nianaid podobitsi icsa dapuduedoaid  
(Duc 11.24-26)*

<sup>43</sup> Adshumbic naden Esusēn chuipondash. –Icsaquido mibi nec. Podobitsi icsa dapuduedaidbimboecquid mibi nec. Tantia. Mibi chuinu. Abi dapuduedaid matses nianashi podobitsi icsa abi dapuduedtequid nibēdacno yuec capucuen-capucuenec. Adtanequi: “Ēbi icbocnobidi dapuduedoaic nidebi,” quianec choec. <sup>44</sup> Chonobi ambi niamboed matses: “Ēbi dapuduedaid podobitsi icsa nibēdnuc bēdambo iquebi. Adquid chomeoatiapimbo iquebi. Ēmbimbo naic bēdamboec tabadquidquoio nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuduedtequidquoio nēid nec,” quianec <sup>45</sup> abipadquid utsi bedec nidoaic. Nidshumbic 7tedi icsamboshē icquido istuidshun bēash aidobēdi dapuduedec. Adnuc podobitsi icsa abentsēc dapuduedaid yec ēnden icsambo icboedi aido dadpen dapuduedaid yec buēdanquiec aid

matses icsamboshë yanec. Adquo mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

*Anibëdi Esusën utsibo choaid  
(Mad 3.31-35; Duc 8.19-21)*

<sup>46</sup> Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi <sup>47</sup> utsin puduedshun Esus chuituidpondash. —Mibi isec tita min utsibobëdi choaccosh. Umanuc tabadec —caquien badedi nidenquo yec <sup>48</sup> Esus: —Utsitsen con ta caimbi. Adembidi utsitsen con utsi caimbi —quetanquin <sup>49</sup> abëd icquido mëdquin ismepondash. —Nëid ëbëd icquido con utsibo caimbi. <sup>50</sup> Nuquin Papan chiapadomboen naquidquo icscho con matses caimbi. Con utsi caquinc con chibi caquinc con ta caquinc caimbi —quepondash Esus.

## 13

*Piacbo ëshë siaid chiaid  
(Mad 4.1-9; Duc 8.4-8)*

<sup>1</sup> Adtanec nidec chian budash cuëmano tabadtuidpondash. <sup>2</sup> Tabadtuidsho isash matses dadpenquo cho-choash tsucus-tsucustsëcquo yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

<sup>3</sup> Adshumbic abi tantiate chuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquo. <sup>4</sup> “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. <sup>5</sup> Èshë utsibic nidaid tsasimbo yacno siac badedi dëyucuidash <sup>6</sup> aton tapun nidaidën puduedenquo icnuc ushë chënquequidën badedi unësquid. <sup>7</sup> Èshë utsibic nisanquid diadacno siaid dëyucash canidouidtsëcsho nisanquidën dayunac unësquid. <sup>8</sup> Padnuen ëshë utsi-utsiec nidaid bëdanquo siac dëyucash caniasht dadpenquo ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

<sup>9</sup> Adashic: —¿Min pabiate shëcuë nibëdquiecta iquec? Èmbi chuiboed bëdamboec pausudta —quepondash Esus.

*Ompoacbimboen chiec nebi, quiaid  
(Mad 4.10-12; Duc 8.9-10)*

<sup>10</sup> Adsho tantiashtun abëd icquidon Esus chuipondash. —¿Atotsieshtun ompoacbimboen nëid matses dadpen chie? —caquien <sup>11</sup> Esus nadpondash. —Utsibo tantiamenquo icquin Nuquin Papabëd tabadte chuiquin nëbi mibiuidtsëqui tantiamembi. <sup>12</sup> Nuquin Papa tantiatadquo icquidën ëbi tantiasht bëdamboen tantiamendambi. Nuquin Papa tantiauidtsëcquidën ëbi tantienquo icscho ëmbi ompoacbimboen chiac tantienquo ictsiasht. <sup>13</sup> Ompoacbimboen aido dadpen chuibanembi. Èmbi naid isun ëbi tantienquo iquec. Èmbi chuisho pamumëdacbimboen tantienquo iquec. Adsho aidon tantiatapimbo icnuc chiembi. <sup>14</sup> Nëidon tantienquo icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquioboshombi: ‘Ai, aidi nec,’ cainquo iquendac.

<sup>15</sup> Ai, ëmbi chiaid tantiatapimbo iquec.

Ushacbimboen tantienquo yec pamumëdacbimboec chieshëmënquidombo iquec.

Èbi tantiate bunenquo iquec.

Èmbi chiaid tantiaquidombien paposhquiacbimboen bëdamboen tantiabentsiasht.

Pausunacbimboen tantiashtun ëmbi chiapadomboen natiadquo yansho aton chiesh bëdametsiambi. Aton chiesh bëdamete bunenquo iquec,”

quequin Nuquin Papan dada uamepampic –quepondash Esus abëd icquido chiec. <sup>16</sup> Adashic aidobidi chiec: –Isayasën chiapadomboen utsibon ëbi tantienquo icnubi mimbien ëbi tantiec. Ëbi isec mibi tabadec. Ëmbi chuibansho tantiash: “Ai, abimbo caic,” quec mibi bëdambo iquec. <sup>17</sup> Ëbi chote chuipampidobëdtan bëdamboec tabadquido dadpeshun mimbi ëbi isapadomboen ëbi iste bunequi ëbi isambobi unëspampic. Mimbi ëmbi chuisho tantiapadomboen tantiatiadquo yequi tantiambobi unëspampic –quepondash Esus.

*Piacbo siaid sebadënquo chiaid*  
(Mad 4.13-20; Duc 8.11-15)

<sup>18</sup> Adashic abi onquec: –Tantia. Ëmbi piacbo ëshë siaid quequin chuiboed sebadënquo mibi chuinu. <sup>19</sup> Nuquin Papabëd tabadte chiaid piacbo ëshë siaidbimboecquid nec. Nuquin Papan chiaid chiaqui tantiadenquo icsho Satanasën nac badedi bëshumpec. Uicchunën piacbo ëshë paëdaid badedi chiabimboen adopec. <sup>20</sup> Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishongueuidtsec. <sup>21</sup> Adsho: “Nuquin Papan chiaid tantiaquid nec,” queshun utsibon chieshënac badedi chieshtoshon tantienquo yanendac. Piacbo ëshë tapunuidtsash unësacimboen adoendac. <sup>22</sup> Utsibic Nuquin Papan chiaid tantiatsashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac unësacimboen adoendac. <sup>23</sup> Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquo icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac –quequin abi tantiate chuipondash Esusën.

*Ëshë icsambo icquid seuanaid chiaid*

<sup>24</sup> Adshumbic Esusën naden chuipondash. –Tantia. Nuquin Papan namiaid tantiamenuen utsi chiabimboen chuinu. Tiedën caniquid pete adosbiecquid icbon siac caondash. <sup>25</sup> Adanec nidambic inchëshëmbi choshon chieshëmëncquidën ëshë icsambo icquidtsen daëd uain seuanac caondash. <sup>26</sup> Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. <sup>27</sup> Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” quesho tantiash: “Icsambo icquidbëd tancandaëdec canidopacvoc. ¿Mitsipaden sio?” quequin yuabon icbo chuipac caondash. <sup>28</sup> Adoaquien: “Chieshëmëncquidëmbien seuanchitash,” cac: “¿Chicshunetanquindambi icpe?” yua quesho: <sup>29</sup> “Padi. Petebëdi chiquidtsiash. <sup>30</sup> Aidbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo –quequin Esusën chuipondash.

*Esus tantiaquido dadpen yante chiaid*  
(Mad 4.30-32; Duc 13.18-19)

<sup>31</sup> Adshumbic abi tantiaquido dadpen yante tantiamenuen Esusën naden chuipondash. –Cuëte bacuë ëshëmpi <sup>32</sup> pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac –quepondash Esus.

*Abi bëdamboen tantiate Esusën chiaid*  
(Mad 4.33-34; Duc 13.20-21)

<sup>33</sup> Adshumbic Esusën abi bëdamboen tantiate chuipondash. –¿Mitsipad nami uaid icpec? Aniaactsëc nami uashun utsibëdta daëd uain cabiunac abichobi batambo yanec.

Adembidi ëbi bëdiactsëc tantiatsëcboedi ëmbi chiaid tantiash ëbi bëdamboen tantiaquid yarendac <sup>34</sup> —quequin Esusën chuipondash. Sebadënquio chienquio icquin ompoacbimboenuidi Esusën chuipondash. <sup>35</sup> Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquio chienquio icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

### *Ëshë icsambo icquid seuanaid sebadënquio chiaid*

<sup>36</sup> Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmënnquidën ëshë icsambo icquid siaid nec,” quequin mimbi chuiboed en sebadënquio chui, Icbo. Tantianu. ¿Atotsi chuitiadquio icquin aden chio? <sup>37</sup> —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquio tantiamequin matses bëdambo icmequid nebi. <sup>38</sup> Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënnquid Satanasën yuaido icsambo icquid siaidbimboecquid nec. <sup>39</sup> Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquïn icsametiadquio iquec. Adsho badedi cuidenquio icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. <sup>40</sup> Icsambo icquid tsindoshon nëdëncacimboben Nuquin Papan cuidte ushëmbi icsambo icquido cuidendac. <sup>41</sup> Ëmbimboen mayan bëdabo namendac. “Icsamianquidobëdta icsaidotedi bedshun chian anëdënnquiacno nëseca,” quequin ëmbi chiac <sup>42</sup> bedshun chian anëdënnquiacno nësecaindac. Adoac natiaic mëyadbudec sidquequiendac. <sup>43</sup> Padnuen ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata —quepondash Esus.

### *Nuquin Papabëd tabadte bunquiota, quiaid*

<sup>44</sup> Adshumbic padpiden Esusën chuipondash. —Tantia. Matses ambi istuidaaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” qeshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquio icquin Nuquin Papan chiacpadomboenuidi nac bëdambo ictsiash.

<sup>45</sup> Tantia. Casëdu bëdaidquio bunaidtsen mibi chuinu. Dadan casëdu bëdaidquio bunquin bednuen nibënbepac caondash. <sup>46</sup> Adshun bëdaidquio istuidash: “Nadquid utsi nibëdec,” quiaid comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabëd tabadte bunquin matsesën ëbi tantiaquiac bëdambo ictsiash —quepondash Esus.

### *Nuquin Papan cuidte ushë Esusën chiaid*

<sup>47</sup> Adshumbic Esusën naden chuipondash. —Tantia. Mibi chuinu. Nuëcquid nibedacimboben naindambi. Isadaidbon nuëcquid dadpenquio bedte nëshaid dapa acte

nënequin <sup>48</sup> nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaid-bon nuëcquid bedquid. <sup>49</sup> Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacimboen matses bédambo icquido Nuquin Papa yacno nidmequimbi <sup>50</sup> icsambo icquido chian anëdënquiacno nësecaindac. Adoac natiaic shubiquiendac –quequin Esusën Nuquin Papan cuidte chuipondash.

<sup>51</sup> Adshumbic: –¿Ada ëmbi chuiboedtedi tantie? –caquini: –Ai, tantiembi –quepondac. <sup>52</sup> Adsho tantiashun Esusën chuipondashi. –Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac –quepondash Esus.

### *Nasaded yacno Esus nidaid*

*(Mad 6.1-6; Duc 4.16-30; Uan 4.44)*

<sup>53</sup> Adanec auëshquiobi nidequi <sup>54</sup> abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: –¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? <sup>55</sup> ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh. <sup>56</sup> Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquio neyoc –quequin <sup>57</sup> Esus chieshënquin tantienquio icpondash.

Adsho tantiashun Esusën nadopondash: –Nuquin Papan: “Ëmbi tantiamiacpaden chuibanta,” caidën chiac utsibon tantiaquid. Adquidën abi caniacnoshon chuibancho tantienquio icquid –quepondash Esus. <sup>58</sup> Adshun nadatiambo icquin nabanquin daëdpectsëc ismetsëccondash: –“Nuquin Papan chomiaidquio nec,” quetiapimbo iquec –queshun.

## 14

### *Uan acten mentoanquid*

#### *unës uaid*

*(Mad 6.14-29; Duc 9.7-9)*

<sup>1</sup> Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. <sup>2</sup> Adshumbic aton yuabo chuipac caondash. –Uan pado acten mentoanded nepash icnui. Ëmbi mapi butemiondaidi uincuempash icnui. Adquid icquin comapenen tantiaquin nabampash icnui –quepac caondash Edodes.

<sup>3-4</sup> Edodesën Uan cuesuniac caondaic chuinu. Tantia. Uanën: –Mimbi bedaid Edodias caid min chidopenquio nec. Min utsi Uedipe caidën chido bedshun Nuquin Papan chiaid mimbi niaquec –cadoniaquien Edodesën chieshtoshon uidën uameshun Uan quënën nauedmepac caondash.

<sup>5</sup> Adshumbic Uan cuesunetiadquio icquimbi aton matses: –Nuquin Papan chiaid chuibanquidquio nec –quesho tantiashun aido dacuëdënquien Uan badedi cuesunenquio icpac caondash.

<sup>6</sup> Adshumbic Edodesën: –Ëbi tishaid ushë nec –queshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: –Bédamboenshë mimbi naic –queshun <sup>7</sup> naden chuipac caondash. –Tantia, champi. ¿Atotsi buneque?



Mibi bunaidquoio mibi menenu. “Nuquin Papan cuidnushe,” quiash muatiapimbo iquebique. En ëbi chui –capac caondash Edodesën. <sup>8</sup> Adoaquien champin aton tita chuitampac caondash. Chuitanec choshon anin chiaid chuituidpac caondash. –Uan acten mentoanquidën mapi butetanquin pada-padaid dapan ananshun baded ëbi mene –capac caondash champin Edodes chuiquin. Uanën –Min bënë nianshun utsi bedmec mibi icsaic –cac champin tita Uan cuesunemete bumpac caondash.

<sup>9</sup> Adoaquien Edodesën: –¿Atotsi quepequini ado? ¿Adoenquoio ictiadtsimbi icpoba? –quequin ambi chuiboed niactiadquoio icpac caondash. –Ëbi isedquidon: “Mibi muambo nec,” canushe –quetanquin champin chiacpadomboen aton yuabo: –Uan mapi butetan –capac caondash.

<sup>10</sup> Adoac quënën tsadacnobi Uan mapi buteshun <sup>11</sup> mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

<sup>12</sup> Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

*Comapenen tantiaquin 5000tedi pemiaid  
(Mad 6.30-44; Duc 9.10-17; Uan 6.1-14)*

<sup>13</sup> Nidshumbic: –Mibi acten mentondaaid mapi butiaccosh –catuidpondash. Adsho tantianec cano antabëdtoshon chian potiash pudundoanec matses nibëdacnombo Esus nidanepondash. Aden chian potesho isash: –Nuquitsen nidnu. Nid –quianec matses dadpen chian dëquiadec podqued nidquidën nidanepac caondash.

<sup>14</sup> Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquoio icquin daicsaidotedi bëdamebampondash.

<sup>15</sup> Ushë budambi Esusbëd icquidon: –Inchësheque. Pete nibëdacno nuqui tabad-  
eque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu –caquien <sup>16</sup> Esusën: –Padi. Ma tabadnu. Mimbibi peme –capondashi.

<sup>17</sup> Adoaquini: –Ma panëmpi 5tedpactsëc icpayoc. Nuëcquidëmpi daëdquiobi ictsec –quepondac. <sup>18</sup> Adsho: –Aidtedtsëqui beccho –cac meniondambi.

<sup>19</sup> Adoaquien Esusën abi datsidadquido chuiquin: –Uasinën tabadbud –capondash. Adoac tabadbudnubi abuc isquin Nuquin Papa chuipondash. –Mimbi uaid pete bëdambo iquec, Papa –quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

<sup>20</sup> Adoaquien nua cubudcuededquin pebededpondash abitedishumbi. Piacsho isun napi uaid bedtanquin tsitsan dapan sandotanquin isquien tsitsan dapa 12tedi cubu-  
cubuctsëcquoio iquec pete cuësh-cuëshaid napi uaid. <sup>21</sup> Aden matses dadpenquoio pe-  
mëbampondash. Aido datedi tambanac 5000tedi icpondash. Aton chido aton bacuëbobëdta tambanambo iccondambi.

*Acte bëntse Esus choaid  
(Mad 6.45-52; Uan 6.16-21)*

<sup>22</sup> Adshumbic Esusën abëd icquido chuiquin: –Chian potec nidta –capondash. Adoac cano antabëdtoanec potec nidnubi Esusën abi datsidadquidotsen: –Nidanec nid –cac nidanepac caondash. <sup>23</sup> Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

<sup>24</sup> Adnubien chian dapa potequi abëd icquidotsen inchëshpondash. Chian nënantanquoio yanubi cunquetuidpondash. Adnuc acte comapenec tëccuasquiampondash uncadenquoio yec. Comapenec acte ishcnudnuc cano mentoadtiadpambo icpondash.

<sup>25</sup> Adnubien badiadte anoentsëqui acte bëntse Esus chopondash. <sup>26</sup> Acte bëntse chosho isashini: —Podobitsi nec —quiash dacuëdtanec sidquecuededpondac. <sup>27</sup> Adshobini Esusën: —Ëbien neque. Dacuëndenda —capondash. <sup>28</sup> Adoaquien Petedon: —¿Con Icbombobida ne? Con Icbo icquin: “Acte bëntse cho,” ëbi ca —capondash.

<sup>29</sup> Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëcondash. <sup>30</sup> Esusuidi isec bëdamboec niduidtsequi acte comapenec tëccuasquesho isash dacuëdtanec acte bëntse niduidtsëboedi mentoadtsempondash. —Ëbi bed, Icbo. Mentoadebique —caquien <sup>31</sup> Esusën badedquio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

<sup>32</sup> Adtanec Petedobëdi cano antsadtonobien cunqueboedi cunquenquio yampondash. Actetsen tëccuasquenquio yanondash. <sup>33</sup> Adsho isun cano antabëdquidon: —Mibi bëdamboeshë iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bëdamiaid*  
(Mad 6.53-56)

<sup>34</sup> Adashic chian potiash Quenesaded yacno pudundopondash. <sup>35</sup> Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. <sup>36</sup> Bë-bëshumbic: —Dashcuteuidtsëqui mishashi bëdantsiash —queshun Esus chuituidquin: —Min dashcute cuëmano daicsaido mishme —cac mishmiaqui bëdampondash abitedi.

## 15

*Padiseyobo icsaid Esusën chiaid*  
(Mad 7.1-13)

<sup>1</sup> Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash. <sup>2</sup> Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquio icquin nuquin tsusedpabon chiaid ma niac-niacpaboc —quepondash Esus chieshënkuido.

<sup>3</sup> Adsho tantiashun Esusën: —Ma mimbi. ¿Atotsieshun Nuquin Papan chiaidquio niac-niaque? Nuquin tsusedpabon chiapadomboen naquin ma mimbi Nuquin Papan chiaidquio niac-niacpayoc. <sup>4</sup> Tantia. Mibi chuinu. “Titabëdta papa chieshënenquio icquin bëdamboen tantiata,” quequin Nuquin Papan chiampidquio ma mimbi niacpaboc. Adembidi: “ ‘Con pa unëspashun,’ quec chieshëmënkuid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec. <sup>5</sup> Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bëdambo ictsiash,” mibi quepec. “ ‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquio iquembi. Nuquin Papa menetequid nec,’ quequidën <sup>6</sup> cudasënac bëdambo ictsiash,” mibi quepec. Aden nuquin matsesën chiaid naquin Nuquin Papan chiaidquio ma mimbi niac-niacpayoc. <sup>7</sup> “Nuquin Papa tantiaquidquio nebi,” quec muaquid mibi nec. Ëndenquimboshë Nuquin Papan chuimiic nuquin tsusedpa Isayas caidën mimbi icsamboen tantiate chuiquin dada uapampic naden.

<sup>8</sup> “Isadaidbo: ‘Nuquin Papambo tantiembi,’ quepec. Adboedëmbi ëmbi chiaid niacquin ëbi tantienquio iquec.

<sup>9</sup> “Ma Nuquin Papan ëbi bëdamboen isnu,’ queboedëmbi ëbi bëdamboen tantienquio iquec. Ëmbi chiaidquio namenquio icquin aton matsesën chiaiduidi namepec,”



quequin Isayasën Nuquin Papan chiaid dada uapampic –quequin Esusën abi chieshënquido chushcapondash.

*Ana shëcuënuësh choaid chiaid  
(Mad 7.14-23)*

<sup>10</sup> Adshumbic abi isec datsidadquido ompoacbimboen chuipondash. –Tantia. Mibitedi chuinu. <sup>11</sup> Ana shëcuën puduedaidën matses icsaten mimbi dampec. ¿Adquidënda matses icsapec? Padenquio. Ana shëcuënuësh choaidëmbien matses icsatsiash –quequin Esusën chuipondash. <sup>12</sup> Adnubien abëd icquidon: –Mimbi aden chuiboed tantiashun padiseyobon mibi chieshënosh, Icho –caquien: <sup>13</sup> –Dacuëdenda. Icsa bescatanquin tsindoshon nëdëncacimboen ambi tantiamiabi yaido ambembi chuiquido Nuquin Papan cuideque. <sup>14</sup> Dacuëdenda. Padiseyobo bëshuaidbimboec icquido neque. Bëshuaidën aton matses bëshuaid utsi bëdamboen buantiapimbo iquec. Buanuec abi shëcuë ampaëdtsiash. Adembidi Nuquin Papan chiaidpenquio namequin aton matses bëdamboen tantiametiapimbo iquec –quepondash Esus abëd icquido chiec.

<sup>15</sup> Adshobien Petedon: –Mimbi ana shëcuënuësh choaid quequin chuiboed tantiambo iccombique. Aid sebadënquio chui. Tantanu, Icho –caquien: <sup>16</sup> –¿Tantiamboda icco? <sup>17</sup> Chuinu. Tantia. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquio iquec. <sup>18</sup> Matses onquiaidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquio tantiaquin naic matses icsatsiash. <sup>19</sup> Icsambo icquido yec: “Ai, adoembi,” quequin otacquio tantiashun Nuquin Papan chiaid niactsiash nadquidën. Nëidic unës uanquid. Nëidic aton chidopenquio chudquid. Nëidic aton bënëpenquio chudmequid. Nëidic aben uequid. Nëidic ampequid. Nëidic muaquid. Nëidic icsamboec chuishumënquid. <sup>20</sup> Adquidtedi: “Ai, adote bunebi” quequin otacquio tantiash icsaquid nec. Padnuen penush mëpamëdenquio icquin Nuquin Papan chiaid niaquenquio ictsias –quepondash Esus abëd icquido chiec.

*Isadaidpembo chidon Esus tantiaid  
(Mad 7.24-30)*

<sup>21</sup> Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

<sup>22</sup> Adnubien anocquid cananeyabo chidon Esus cuëntuidpondash. –Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec natiambo iqueque. Con champi bëdameta –caquien <sup>23</sup> Esusën ëcbedenquio icpondash. Ècbedenquio yaqui chidon tsibanbanquin cuënbampondash. Adsho tantiashun Esusbëd icquidon: –Chieshanquiecu cuëdpeque. Cuemepa –caquien <sup>24</sup> Esusën cuemenquio icquimbi aid chuiquin: –Nuquin Papan chiacpaden Isadaidbo matsesba Nuquin Papa bëdamboen ismete tantiamenuec nebi. Bënudacimboec icquin Nuquin Papa tantienquio icsho aidoba tantiamenuec nebi –quepondash Esus.

<sup>25</sup> Adsho tantiash nidenquio yec chido cuëdboed Esus ismequin danëshën sebudtsec: –Èbi nashunta, Icho. Con champi bëdameta –queshobien Esusën: <sup>26</sup> –¿Aton bacuëbo pemenquio icquimbi aton opa pemiacta bëdambo icpatsiash? Padenquio. Adembidi Nuquin Papan con matses caidotedi tantiamiabi utsibo ëmbi nashunac icsambo ictsias. Isadaidboba tantiamenuec nebi –quepondash Esus.

<sup>27</sup> Adsho tantiashun chidon: –Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta <sup>28</sup> –caquien Esusën: –Ai. Èbi tantiaquidquido mibi nec. Mimbi chiacpadec min champi bëdanendac –quesho tantianec aton shubuno nidshun isquien aton champi bëdanac Esusën chuinubi.

*Daicsaido dadpen Esusën bēdamiaid*

<sup>29</sup> Adanec auēshquiobi nidec chian dapa Cadidia caid cuēman nidquid podquedēn nidanepondash. Adashic macuēsh dapa dectatoec poctsebi tabadtuidpondash.

<sup>30</sup> Tabadtuidsho isun matses dadpenquo cho-choquin daicsaido dadpen Esus ismenuen bē-bēpondash. Tidinequido yec bēshuaido yec shēquēquenquo icquido yec onquesabo yec daicsaido utsibotedi yec quenuc bē-bēpondash. Adsho Esusën bēdamebampondash. <sup>31</sup> Bēdamiac onquenquo icboedi onquianondash. Bēshuacboedēmbi isbenondash. Capuenquo icboedi capucuenondash. Daicsaido utsibo adecbidi bēdanondash. Adsho isquido nadpondash. —¿Adquidta ictenec? Nuquin matses isadaid-bon tantiadēn Nuquin Papan namiaid icquin bēdamepash icnui. Nuquin Papa bēdambo iquec —quepondash Esusën bēdamiaid tantiash.

*Matses 4000tedi pemiaid  
(Mad 8.1-10)*

<sup>32</sup> Adec tabadsho isashien Esus: —Nēido tantiac unēsquo iquec. Ēmbi nabansho isnuec choash 3tedec ushquin piac ambi bēboed pete naimēdaccosh. Ēmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash.

<sup>33</sup> Adsho tantiashun abēd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

<sup>34</sup> Adoaquien Esusën: —¿Tedtsi panēmpi iquec? —cac: —Sieteted ictsec. Nuēcquidēmpi daēdpactsēc ictsec —quesho <sup>35</sup> tantiashumbien abi datsidadquido chuiquin: —Nēmbo tabadbud —capondash. Adoac tabadbudpondash abitedi.

<sup>36</sup> Adshumbic panēmpibēdta nuēcquidēmpi bedshun Nuquin Papa chuipondash. —Nēid mimbi uaid bēdambo iquec, Papa —quesun pete cuēsh-cuēshbantsēcshun abēd icquido menebampondash: —Pemeban —quequin. Adoac abitedimbo pemebampondash. <sup>37</sup> Aden pemiab abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsēcquo icnuc sandobampondambi.

<sup>38</sup> Esusën pemiaido dadpenquo icpondash. Tambanac 4000tedi dada icpondash. Chido bacuēbobēdta tambanambo iccondambi. <sup>39</sup> Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabēdtoshon Esusën chian potepondash. Chian potiash nidaid Mactada caid yacno pudundopondash.

**16***Saduseyobon: Ēbi isme, quiaid  
(Mad 8.11-13; Duc 12.54-56)*

<sup>1</sup> Pudundoanec nidshobi anocquidon abi chieshēnquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ēbi isme —cabededpondash padiseyobobēdtan saduseyobon.

<sup>2</sup> Adshobien Esusën: —Nuquin matsesën chiaid mimbi tantiec. “Inchēshbudtsēqui abu piumbo icsho isash: ‘Tanunquo badiadec,’ quequid. <sup>3</sup> Badiadnubi abu inchēshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiabimboen bēdamboen tantiatiadquidi Nuquin Papan nēbimbobi naid mimbi tantienquo iquec. <sup>4</sup> Icsambo icquid icquimbi mimbi: “Ēbi isme,” cadednepec. Nēbi mibi ismenquo iquemi. Nuquin Papan nuquin tsusedpa Onas chishcambiecquid dapan chebudacsho daēdec ushun ucbudmiabimboec unēs uacsho chococac daēdec ushash uincuenendabi. Aden ēbi tantiesabo ismendambi —quianec nidpondash Esus.

*Padiseyobon chiaid tantienda, quiaid  
(Mad 8.14-21)*

<sup>5</sup> Adanec nidec chian budash cano antabēdtoshon chian poteoapondash. Chian potequien Esusbēd icquido: —Pete nianchitombi. Bētiadquidi nepobi —quepondash.

<sup>6</sup> Adshobien Esusën abëd icquido chuiquin: —Padiseyobëdtan saduseyobon naid pan bidiscamete bimboecquid iqueque. Ista —caquien <sup>7</sup> tantienquio yec abëd icquido naded onquecuededpondash. —Nuqui niamboed pete chiequi nepanui —quepondash. <sup>8</sup> Adsho ambembi tantiash Esus: —Ëbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquio. <sup>9</sup> ¿Bëshunashta mibi nepe? Pete 5tedtsëcboedi ëmbi 5000tedi pemiaidën napi uaid dadpen iccondaïd ¿tantienquioda yano? <sup>10</sup> ¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandoboed tantienquioda yano? <sup>11</sup> ¿Aden comapenen tantiaquid icquimbidambi pete niamboed chuijadi? Padenquio. Pan bidiscamete pictsëc cabiunac pan abichobi nua bidisquiac bimboecquid padiseyobëdtan saduseyobon chiaïd iquec —quepondash Esus.

<sup>12</sup> Aden chuïsho tantiash abëd icquido nadpondash. —Pan chienquio icquimbi nuquin matses tsusiobon chiaïdshenda capec. Aïdo caic: “Icsamenda,” quepecshenda niosh. “Padiseyobon chiaïdbëdta saduseyobon chiaïd tantienda,” quepecshenda niosh —quepondash Esusbëd icquido.

*Nuquin Papan Mado mibi nec, quiaïd  
(Mad 8.27-30; Duc 9.18-21)*

<sup>13</sup> Adash yuectaniash puduanec nidequien Esus nidaïd utsi Sesadeya Uedipo caïdën nidanepondash. Adshumbic abëd icquido chuïmepondash. —Utsibon ¿tsutsi ëbi caosh? —caquien: <sup>14</sup> —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaïd oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon. <sup>15</sup> Adsho tantiashun Esusën: —Ma mimbibi. ¿tsutsi ëbi mimbi cao? —caquien <sup>16</sup> Petedo Simon caïdën: —“Quidistu caïd Nuquin Papan chomiaïdquio nec,” caombi mibi. Aton Madombo mibi nec —capondash.

<sup>17</sup> Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caïd yec matsesien mibi nec. Adquid icquimbi matsesën tantiaïd chienquio icquin Nuquin Papan tantiamiaïdquio mimbi abimbo chioc. <sup>18</sup> Tantia. Ëmbitsen mibi chuïnu. “Cuënote bimboecquid nec,” quequin mibi Petedo cuënondambi. “Cuënote dapa utsi ictiapimbo yac bimboec chieshtoenquio icquid iquendac,” qeshun mibia ëbi tantiaquido chuïquid dapambo icmendambi. Adec mimbi namiaïdo ëbi tantiaquido iquendac. Satanasën aïdo: “Nëïd yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. <sup>19</sup> Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaïdtsen mimbi chiendac —quepondash Esus Petedo chiec.

<sup>20</sup> Adashic abëd icquido abitedi chuïoic: —“Nuquin Papan chomiaïdquio nec,” quequin utsibo ëbi chienda —quepondash Esus.

*Abi unës uate Esusën chiaïd  
(Mad 8.31-9.1; Duc 9.22-27)*

<sup>21</sup> Adshumbic tauaquin abi unës uate chuidondash. —Shubu dadpen icquid Edusaden caïd yacno nidendabi. Anoshon nuquin matsesën ëbi chieshënquiendac nëïdtedshun. Nëïdic tsusiobon. Nëïdic nëish yua abided unës uaquido chuïquid dapabon. Nëïdic Moisesën dada uampid chuïbanquidon. Aïtedishun mëyanquioquin ëbi unës uamendac. Adoacsho chococac daëdec ushash uincuenendabi —quequin chuïsho <sup>22</sup> tantiashun Petedon uanotantsëcquin tsadumbudshun Esus chuïpondash. —Unësquio icnuc mimbi chieque. Aden chienda. Ma mibi unës uatiapimbo icpayoc —capondash Petedon. <sup>23</sup> Adoaquien Esusën: —Satanasën oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaïd mimbi

ëbi niacmetiadquoio iqueque. Cuen –quetanec Petedobi chiec: –Matsesën tantiaid chuiquimbi Nuquin Papan tantiaidquoio mimbi chienquoio iccoc –capondash.

<sup>24</sup> Adashic abëd icquidotedi chuioaic: –Ëbi tantiaquidon aton nauidi nainquoio icquin ëmbi chiacpadomboen natsiash. Adsho chieshëmëñquidon: “Unës uachitomane,” cac chieshtoenquoio icquin ëbi tantiatsiash. Adquid ëbi tantiaquidquoio nec. <sup>25</sup> Padnuen ëbi tantiatsëccquid: “Esus tantiasho unës uachitoshe,” quiash ëbi tantienquoio yanec unësash Nuquin Papan cuidaidobëd nidendac. Padnuen chieshtoenquoio icquin ëbi tantiaquid Nuquin Papa yacno tabadendac. <sup>26</sup> ¿Nuquin Papa tantienquoio yec tabadecta matses bëdambo icpatsiash? Abi bunaidtedi bedquin Nuquin Papa tantienquoio yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piuccquid meniashta Nuquin Papa yacno tabadpatsiash? Padenquoio. Adotiapimbo iquec. ¿Atoda meniantiapimbo iquec? <sup>27</sup> Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquoio yec icsaquido icsano nidmendambi. <sup>28</sup> Tantia. Chuïnu. Utsi-utsiec unësabi icquin ëbi tantiaquido dadpen yansho mimbi isendac –quepondash Esus.

## 17

### *Esus bëchamauanquiecsho isaid (Mad 9.2-13; Duc 9.28-36)*

<sup>1</sup> Aden chiash 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuc buanash macuësh dapa dectatoash mananënquoio tabadtuidpac caondash. <sup>2</sup> Tabadtuidshun isquien Esus utsiacimboec isadpec. Aton dashcutebëdi aton bëtantete ushëbimboec bëchamauanquiec yanac caondash.

<sup>3</sup> Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. <sup>4</sup> Adsho isashien Petedo: –Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icbo. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? –quenubi <sup>5</sup> abu ushu bëchamauanquiec icquidën isadenquoio icnuc bëtimpac caondash. Adnubien abu ushu nënantanuëshquoio Nuquin Papa onquiampac caondash. –Nëid con Madombo nec. Ëmbi tantiaidquoio yec ëmbi bëdamboen isaidquoio neque. Nëidquoio tantiata –quec dacuëdampamboec onquenubien <sup>6</sup> uinte paëdtampamboec dacuëdtanec uebudcuededpac caondash Petedo chedo.

<sup>7</sup> Adshobien Esusën camishquin: –Dacuëdenda. Nidto –cac <sup>8</sup> nidtoquin isquien Esus abentsëqui iquec.

<sup>9</sup> Adtanec macuësh budequi Esus: –Mimbi isboed nëbi utsibo chienda. Unës uac ëbi uincuenacsho isun chianta –quepac caondash abëd icquido chiec.

<sup>10</sup> Adsho tantiash Petedo chedo: –“Nuquin Papan chomiaidquoio nec,” quequin nëbi mibi tantiambi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh –queshobien <sup>11</sup> Esusën: –Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. <sup>12</sup> Adquid Ediasbimboecquid chondash. Choacsho tantienquoio icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac –quesho tantiashien: <sup>13</sup> –“Ediasbimboecquid nec,” quequinshenda chuiposh. Uan pado acten mentoanded caquinshenda Edias capec –quepac caondash Petedo chedo.



*Madompi dapuedaid podobitsi icsa cuemiaid  
(Mad 9.14-29; Duc 9.37-43)*

<sup>14</sup> Bëchamuanquiec ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun chuipondash. <sup>15</sup> — Con mado bëdamboen isquin bëdameta, Icho. Baded-badedquiec unësanec cuëten pichiquianec. Adecbidi unësanec acten mentoadtsenaccosh. <sup>16</sup> Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenquio iccoshe. Mim-bimbo bëdameta —caquien <sup>17</sup> Esusën ambo icquidotedi chuipondash. —Ëmbi nadatiambo icquin nabanquin ismiaqui mimbi ëbi tantienquio iquec. Adsho isash chieshtoash cuentiadquio icchitebi. Adtiadquio yequi padenquio iquec nebique. Min mado beccho —cac <sup>18</sup> bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

<sup>19</sup> Adsho isun abëd icquidon Esus chuipondash utsibo tantiamenquio icquin. —Ëmbi: “Cuemenu,” cac ¿atotsi quiash podobitsi icsa cuenenquio icposh? —caquien: <sup>20</sup> —Nuquin Papa bëdamboen tantiaquin mimbi bëdamboen natsenoc. Mimbi bëdiactsëc tantiatsec. Pete ëshëmpi mostasa caid pistsëcquidi siac nua yec canitsiash. Adecbidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tantiaquidquio yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash. <sup>21</sup> Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

*Abi unëste Esusën chuioaid  
(Mad 9.30-32; Duc 9.43-45)*

<sup>22</sup> Adanec aton nidaid Cadidia yacnobi capucuenequimbi Esusën abëd icquido chuipondash. —Ëbëd icquid abentsëcshun ëbi chieshënquido ëbi bedmendac. <sup>23</sup> Bedshun ëbi unës uamendac. Aden unës uamiacsho chococaquini daëdec ushash uincuenendac —quesho tantiatanequien abëd icquido: —Unësquio icnuc chiec —quiash shubiantiadtsëcquio icpondash.

*Chuiquid dapa menetequid piucquid Petedon istuidaid*

<sup>24</sup> Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuenquien piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshëmpi abentsëc menepatsiash? —cac <sup>25</sup> Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —¿Atotsi mimbi chie, Simon? Aton matsesën na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aido bedshunenquio icquin ¿ada ambi bedaido aton yuabo piucquid bedshumpec? —caquien <sup>26</sup> Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. <sup>27</sup> Aden tantiaquimbi: “Nëishnushe,” queshun menenun nanuna. Chianën ansetetan. Tauaquin ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiacpadomboen menetampac caondash.



## 18

*¿Mitsicquid chuiquid dapa mimbi icmepatsia?*

*quequin chiaid*

*(Mad 9.33-37; Duc 9.46-48)*

<sup>1</sup> Adshumbic abëd icquidon Esus chuipondash. —Abitedishun Icbo icquin matses mimbi namendac. Èbi chedo caic ¿mitsicquid mibëdtan chuiquid dapa mimbi icmepatsia? —quesho <sup>2</sup> tantiashun abi tabadacno nënantanquio bacuë tsaduntsëcshun Esusën chuipondash. <sup>3</sup>—Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiapadomboen nacbimboen ëbi tantiaquiota. Adash ambi namiaid yanash Nuquin Papa yacno mibi puduedendac. <sup>4</sup> Aden ëmbi chiapadomboen naquidquio icsho mibi Nuquin Papan: “Bëdamboshë iquec,” caindac. <sup>5</sup> Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

*Tantiabentsëcquido icsamete chiaid*

*(Mad 9.42-48; Duc 17.1-2)*

<sup>6</sup> Adshumbic padpiden chiec: —Èbi tantiabentsëcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tēdectanshun acte nënepatecnëdan,” caimbi icsamiente bunquidquio. <sup>7</sup> Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

<sup>8</sup> Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yacbimboec icsainquio yec ënëdta. Taën capuec mibi icsaic. Tateshuniac caputiapimbo yacbimboec icsainquio yec ënëdta. Ènëdenquio icsho Nuquin Papan mibi cuidendac. <sup>9</sup> Adecbidi ëshën isec mibi icsate bunquiec. Èshë chicshuniacbimboec icsainquio yec ënëdacsho: “Bëdambo iquec,” catsiambi. Ènëdenquio icsho Nuquin Papan chian anëdënquiacno nësecaindac —quequin Esusën chuipondash.

*Matses ëbi tantiamete Nuquin Papa bunaid*

*(Duc 15.3-7)*

<sup>10</sup> Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquinobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquin Nuquin Papa yacno puduedshun mimbi mamënshumboed Nuquin Papa chuinushe. Adtsëcquidëmpi mamënshunenda. Èbi tantiabentsëcquido con Pan tantiaquieque. <sup>11</sup> Èmbitsen aido tantiambi. “Bënudaid istuidacbimboen ëbi tantienquio icquidobi ëbi tantiaquido icmenu,” quiash matsesondabi —quepondash Esus.

<sup>12</sup> Adashic padpidec: —¿Mitsipadquio nuquin matses icpec? Nëish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshun aid abentsëc nibënbenequin istuidquid. <sup>13</sup> Aden istuidash comapenec cuis-honquequid: “Con yua nibëdantsenquiac,” quiash. Aton yua utsi yacno bëash abi icboctedi icsho isash bëdambo icquid. Adecbidi matsesën ëbi tantiabensho isash Nuquin Papabëd cuishonquebi bënudaid istuidacbimboec. <sup>14</sup> Icsaido cuidacno matses nidmete Nuquin Papa bunenquio iquec. Matses bëdamboen isquin abëd tabadmete Nuquin Papa bunquiec —quepondash Esus.

*Chieshënquidobëdi onquete chiaid*

*(Duc 17.3)*

<sup>15</sup> Adashic padpidec: —¿Ada ëbi tantiaquid utsin mibi icsa uaosh? “Ai, icsa uaoshi. Chieshëmiantiadquio icchitosh,” queshun nadoac bëdambo ictsiash. Aid abentsëqui chuiquin aidbëd bëdamboec onquequin: “Èbi icsa uaquin Nuquin Papan chiaid mimbi

niac-niaccoc. Adec icsainquo yec ënëdta,” mimbi cac: “Ai, adebi,” quish mibëdi bëdamboec tabadtsiash Nuquin Papa tantiesabimboec icuidboedi. <sup>16</sup> Mimbi: “Icsainquo yec ënëdta,” caqui: “Padi. Adequi icsaibi,” qesho tantiashun ëbi tantiaquid utsi beduanshun aidbëdtan chuitanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota. <sup>17</sup> Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantiec iccuededquido chuiquido chuituidta. “Mimbisen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ëbi tantiaquido cuëdënacno chomenda. <sup>18</sup> Aden mimbi: “Esus tantiesabimboecquid neque. Cuëdënacno chomenquo ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquo yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

<sup>19</sup> Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbëdtan mimbi Nuquin Papa chianiac mimbi chiacpadomboen Nuquin Papan natsiash. <sup>20</sup> Ëbi tantiec daëd tabadnuc aidbëd con Mayan yec ëbëd yachimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

### *Yuan bëdamboen istiapimbo yaid*

<sup>21</sup> Adec: —Icsa uanec chieshtomiantiadquido iquec —Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquo icquin bëdamboen ispe? Chieshënquin padpiden icsa uac ¿padpidendambi bëdamboen isoape? ¿Mëdante utsiuc daëd tauadoquin sietetedembi nashun padpiden bëdamboen isenquo icquin ënacta bëdambo icpatsiash? —caquien <sup>22</sup> Esusën: —“Mëdante utsiuc daëd tauadoec sietetedi” quequin daëdpactsëcquido mimbi chuipec. 70 por 7 caid ¿tedtsi icpec? Aidteden 490tedembi ënenquo icquin bëdamboen isoadoniac bëdambo ictsiash —quepondash Esus.

<sup>23</sup> Adashic abi onquec: —Nuquin Papan chiacpadomboen matses bëdamboen iste mibi chuinu. Tantia. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash. <sup>24</sup> Abia chomiaidën piucquid dadpenquioshë bedshun aton icbo meniambo icpac caondash. <sup>25</sup> Adsho icbon: “Mimbi bedactedi beccho,” cac: “Nibëdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuëbobëdtabi cuësh-cuëshëdmeshun aidtedi piucquid bednu. Mibi icsambo iqueque,” cac <sup>26</sup> yua abi yuaquid ismequin danëshën sebudash: “Padi. Ëbi yuamenuen cuësh-cuëshëdmenda. Chiata. Yuecshun aidtedi bedshun mibi menenun nanu,” capac caondash. <sup>27</sup> Adoquien icbon bëdamboen isquin: “Padi. Ëbi menenda. Mibi utsibo yuamenuquo iquembique. Dacuëdenda. Nidec nid,” quequin icbon aton yua bëdamboen nidmepac caondash.

<sup>28</sup> Adoac nidquimbien aid yuan icbon bëdamboen isboedën ambi: “Ma bënu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin tëtëdinquin: “Mimbi bedactedi piucquid beccho. Unës uachitomane,” caquien <sup>29</sup> aidtsen ambi piucquid bedshunondaid ismenuen danëshën sebudtsec: “Chiata. Ëbi unës uainda. Yuecshun bedshun mibi menenun nanu. Chiata,” quepac caondash yua utsi. <sup>30</sup> Adsho tantiashun icbon bëdamboen isboedëmbi chieshënquin: “Padi. Mibi cuidmembu,” qeshun quënën nauedmepac caondash. “Piucquid aidtedi abi menianenquo yacpadequi ma quënënuësh mëyadbudchitono,” qeshun nauedmiac caondash.

<sup>31</sup> Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bëdamboen isboedëmbi min yua utsi

quënën nauedmiac: ‘Piucquid menianenquio iquec,’ queshun,” quequin icbo chuipac caondash. <sup>32</sup> Adsho tantiashun icbon ambi cuidenquio icquin bēdamboen isboed chomeshun chushcapac caondash. “Icsambo icquidquio mibi nec. ‘Chiata. Mibi menenun nanu,’ mibi quesho: ‘Padi. Ēbi menenda,’ quequin mibi bēdamboen isombi. <sup>33</sup> ĴĒmbi mibi adobocpadomboen utsi bēdamboen istiapimboda icco? ‘Ma bēnu,’ queshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadec nēishun mibi cuidembi,” quepac caondash icbo. <sup>34</sup> Adshun quënën nauedmepac caondash. “Ambi bedactedi piucquid dadpenquio meniash ma puduemanu,” queshun quënën nauedmiac caondash. <sup>35</sup> Aden matses yuan icbon nacpadomboen Nuquin Papan naindac. Utsibon chieshēnaqui chieshēnasho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista –quepondash Esus.

## 19

### *Chidobēd cuēshēdte Esusēn chiaid (Mad 10.1-12; Duc 16.18)*

<sup>1</sup> Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash. <sup>2</sup> Adec nidshobien matses dadpenhshun tsibanampondash. Abi tsibanansho isun nidtuidshun daicsaidtedi Esusēn bēdamepondash.

<sup>3</sup> Adnubien tsusedpabon chiampid namequido padiseyobon chieshēnquin: –Nuquin Papan chiaid niacmenu –quequin Esus chuituidpondash. –ĴAtotsi mimbi chuipe? Dada uashun aton chidobi nidmete Ĵmitsipaden mimbi chuipe? En chui. Tiantianu –capondash.

<sup>4</sup> Adoaquien Esus: –ĴNuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. <sup>5</sup> Adembidi: “Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquio yec aibdēd tantiananquiec dada aton chidobēd abentsēc yac bimboec tabadquid,” quequin dada uaid ma mimbi ispaboc. <sup>6</sup> Aden Nuquin Papan tantiapadomboen aton chido nianenquio yec aibdēdi tantiananquiec abentsēc yac bimboec tabadac bēdambo ictsiash. Padnuen aton chido nianec aibdēdi cuēshēdquin Nuquin Papan chiaid niactsiash. Adecbidi chido aton bēnē nianec icsaquid –Esus quesho <sup>7</sup> tantiashumbien abi chieshēnquidon: –ĴAbimboda mimbi capadi? Nuquin Papan chiaid dada uaquin Ĵatotsieshun Moisesēn naden chuipampic? “Aton chido bunenquio yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesēn dada uapampid ma icpayoc –quequin chuipondash Esus chieshēnquidon.

<sup>8</sup> Adsho tantiashun Esusēn chuipondash. –Ai, Nuquin Papan chiacpadec aton chidobēd bēdamboec tabadtiaipimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiambo icpampic. <sup>9</sup> Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquio chudmesho istuidash aibdēd cuēshēdquin Nuquin Papan chiaid niaquenquio ictsiash –quepondash Esus.

<sup>10</sup> Adnubien abēd icquidon: –Adotiaipimbo icte mimbi chuipec. Aton chidobēd cuēshēdenquio icte mimbi chuisho tantiashun: “Aton chido bedesambo dada bēdambo ictsiash,” caimbi –quepondash abēd icquido. <sup>11</sup> Adsho tantiash Esus: –Ai, utsi-utsiec pabiate shēcuē nibēdac bimboen Ēmbi chiaid tantiatiapimbo iquec. Utsiboen aton chido bedash Nuquin Papan chiacpadec bēdamboec tabadquid nec. <sup>12</sup> Utsibic mimbi chiacpadquid chido bedesa iquec. Nēidtedi chido bedesa iquec. Nēidic aton padibi impadishtsaid. Nēidic matsesēn inicsa uaid. Nēidic: “Nuquin Papan yuambo icquin aidēn chiacpadomboenuidi naquin chido bedtiaipimbo iquebi,” queshun chido bedesa.

Adquidtedi chido bedesa nec. Ĕmbi chuiboed tantiashun Ĕmbi chiacpadomboen nac bĕdambo ictsiash –quepondash Esus.

*Esusĕn bacuĕbo chiaid  
(Mad 10.13-16; Duc 18.15-17)*

<sup>13</sup> Adnubien Esus ismenuen bacuĕbo bĕ-bĕpondash. –Mamishquin ma Nuquin Papa Esusĕn chuinu –quequin bĕ-bĕsho isumbimbi: –Padi. Bĕenda –cauidpondac. <sup>14</sup> Adshobini Esusĕn: –Chĕn. Ma bĕnu. Cuemenda. Bacuĕbimboecquid Nuquin Papa yacno puduedtequid nec. Amĕn chuisho tantiash bacuĕ badedi: “Abimbo caic,” quiacbimboen ĕbi tantiaquid Nuquin Papa yacno puduedtequid nec. Bacuĕbo bĕdambo iqueque. Beccho –cac bĕ-bĕpondash. <sup>15</sup> Adshobien mamishbanquin Nuquin Papa chuipondash. Adobidanec nidondash Esus.

*Cania aton na dadpenquio dayun uaquid Esusbĕd onquiaid  
(Mad 10.17-31; Duc 18.18-30)*

<sup>16</sup> Adnubien dada caniampinquo Esus chuituidpondash. –Mibi bĕdambo iquec. Bĕdamboen chuiquidquo mibi neque. Ĕbi chui. Padpidec unĕstiapimbo icquid icmenun bĕdambo icquid Nuquin Papan abi yacno puduedmetsiash. Ĥatotsi nasho Nuquin Papan ĕbi bĕdambo capatsiash? –caquien <sup>17</sup> Esusĕn: –Ĥmitsipadquid bĕdambo icquid cai? Nuquin Papauidtsĕqui bĕdambo icquid nec. Aidbĕd tabadnuen ambi Moises dada uamiampictedi nata –capondash. <sup>18</sup> Adoquien cania: –Nuquin Papan chiaid Ĥmitsipadquid cai? –quesho tantiashumbien: –Naden chiaid caimbi. “Cuesunenda. Min chidopenquo chudenda. Min bĕnĕpenquo chudmenda. Ampenda. Muainda. <sup>19</sup> Titabĕdta papa chieshĕnquo icquin bĕdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi –capondash Esusĕn. <sup>20</sup> Adsho tantiash cania: –Aidtedi niaquenquo icquin nabanquidquo nebi. Bacuĕtsĕc icquimbi tauaondambi. “Nuquin Papabĕd tabadnuen Ĥatotsimbi utsi nape?” caimbi –quepondash.

<sup>21</sup> Adsho tantiashumbien Esusĕn: –Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibĕdquido min piucquid uesquin menebanta. Adsho abĕd tabadmenun Nuquin Papan mibi bĕdamboen istsiashe. Adota. Adotanequic ĕbĕd iquec cho –caquien <sup>22</sup> cania: –Con na dadpenquo icsho uesquin menetiapimbo iquebi –quiash shubiantiadtsĕcquo ictanec nidpondash Esusĕn chiacpadomboen natiapimbo yec.

<sup>23</sup> Adsho isun Esusĕn abĕd icquido chuipondash. –Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedĕmbi ĕbi tantiatipimbo iquec. Aton nauidtsĕqui tantiec. <sup>24</sup> ĤAda nĕishamĕn pinchuc chichte ancumpadic? Padenquo. Adecbidi aton na dadpenquo dayun uaquidĕn aton nauidtsĕqui tantiaquin ĕmbi chiacpadomboen natiapimbo yec Nuquin Papa yacno tabadtiapimbo iquendac –quequin Esusĕn chuipondash.

<sup>25</sup> Adec: –ĤAda nĕishamĕn pinchuc chichte ancumpadic? –quesho tantiashien abĕd icquido nadpondash. –ĤTsudain Nuquin Papa yacno puduedtequid icchitotsiash? Nibĕdchitequien iquec –quesho tantiashumbien <sup>26</sup> Esusĕn abĕd icquido bĕisquin naden chuipondash. –Matses namiantipimbo icnuc Nuquin Papain namianquidquo nec. Ambi natiapimbo ictequid nibĕdec –quepondash.

<sup>27</sup> Adsho tantiashun Petedon: –Mimbi: “Nuquibi icnu. Cho,” cac con na abitedi nianec mibĕd icnuec chopondabi. ĤMitsimbo tabadtequidini nepe? ĤAtotsimbi nape? –caquien <sup>28</sup> Esusĕn: –Tantia. Mibi chuinu. Nuquin Papan ambi uaid abitedi chuca uabocnoĕshquo ĕbĕdtan chuiquid mibitedi iquendac ĕmbi abitedi namiacnuĕshquo. Ĕbĕd icquido icsho isun Nuquin Papan mibi chuiquid icmendac. Nuquin tsusedpa



Acobon mado ¿tedtsi icpampic? Aidedi 12tedshun tsyuecquidon shubu 12tedi shubunshubunquieci chuiquid dapabo mibitedi iquendac. <sup>29</sup> Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icscho ambi nianaidobëd tabadac bimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnuc. <sup>30</sup> Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac –quepondash Esus.

## 20

### *Chonoadquido chiaid*

<sup>1</sup> Adshumbic abëd icquido Esusën ompoacbimboen chuipondash. –Tantia. Ëbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. <sup>2</sup> Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. <sup>3</sup> Ushë abucquio yanubi tied icbon pete meniacno nidshun utsibo nainquio yec samëdsho istuidpac caondash. <sup>4</sup> Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac <sup>5</sup> tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. <sup>6</sup> Inchëshbudtsëqui nidoaquin utsibo nainquio yec samëdsho istuidoashun: “¿Atotsi quiash samëduidequi ique?” cac <sup>7</sup> samëdquido: “Chonoa uanquid nibëdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

<sup>8</sup> Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec chochoedba menequin tauatanquin ushë budambi chochoedotsen meneta. Adoshombic ushë cuembo icnuc chochoedotsen. Adoshombic ushë abuctoan chochoedotsen. Adoshombic badiadnubi abia chochoedo ënquimbi meneta,” cac menequin tauapac caondash. <sup>9</sup> Inchëshbudtsëqui chonoadec chochoedoba menequin badiadnuc chonoadec taëboed tied icbon: “Menenu,” cactedquio piucquid menepac caondash.

<sup>10</sup> Adoshon isashien badiadnubi chochoedo: “Aido aden meneshun nuqui chonoadquiboed yuapambo nuqui menec,” queshobi aidedtedtsëcbidi piucquid menepac caondash. <sup>11</sup> Aidedtedtsëcbidi meniaquien tied icbo chushcapac caondash. <sup>12</sup> “Tsyuec chonoadboed meniactedtsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidedtedtsëc menianec mibi chieshanquieci iquec. Ëbi dadpen meniac bëdambo ictsiash,” quequin chushcapac caondash.

<sup>13</sup> Adoquien tied icbon: “¿Chieshanquiectabi ique? Ëmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidedtedquio menepaboc. <sup>14</sup> Mimbi bedboed buanec nid. Ëbi bunacpaden tsyuec choash chonoadquid mibi meniactedquibi meniombi. ¿Icsamboda iquec? <sup>15</sup> ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bëdambo iquec?” quequin tied icbon chuipac caondash –quequin ompoacbimboen chuipondash Esusën. <sup>16</sup> Adashic: –Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac –quequin chuipondash Esusën.



*Abi unëste Esusën padpiden chuioaid  
(Mad 10.32-34; Duc 18.31-34)*

<sup>17</sup> Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquo icquin abëd icquido <sup>12</sup>tedi icquid chuinen uanotantsëcquin buampondashi. <sup>18</sup> Buanshun chuipondashi naden: —Edusaden yacno nidacsho Nuquin Papan matsesmiaid icsho ëbi chieshënquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” queshun <sup>19</sup> matses utsibo isadaidpembo ëbi bedmendac. Aden bedmiac matses utsibon mamënsnunquin ëbi cueshcaten comapenen cueshcaindac. Adshumbic ëbi unës uanuen cuesten dectanendac. Aden unës uaqui daëdec ushash uincuenendabi —quequin Esusën abi unës uate padpiden chuioapondashi.

*Uanën titan chiaid  
(Mad 10.35-45)*

<sup>20</sup> Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chi-acpadomboen ëbi nashunta, Icbo —caquien: <sup>21</sup> —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: <sup>22</sup> —Ëmbi naid tantienquo icquin mimbi chuipoc —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

<sup>23</sup> Adsho tantiashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmendac —quequin Esusën chuipondash.

<sup>24</sup> Adnubimbi: —Chuiquid dapa ëbi icme —Esus casho tantiashun Uan chedo nëishëmpondac. <sup>25</sup> Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. <sup>26</sup> Ëbi tantiaquido icquin mimbi adoenuo iquendac. “Bëdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac. <sup>27</sup> Bëdambo icquid ictiadquo icquin yuan aton icbo nashunacimboen mimbi utsibo nashuntsiac. <sup>28</sup> Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Esusën abëd icquido chuipondash.

*Bëshuaid daëd Esusën bëdamiaid  
(Mad 10.46-52; Duc 18.35-43)*

<sup>29</sup> Adashic yuecquo ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tibanampondash. <sup>30</sup> Adnubien aid podqued cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icbo —quepondash Esus caic.

<sup>31</sup> Adsho tantiashun matses dadpenshun chushcapondash. —Padi. Chën. Adec cuëdec chieshanquieci mibi iqueque —caquien abi niacbidanec buëdanquieci cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icbo —queopondash.

<sup>32</sup> Adoaquien Esusën nidtuidshun ëcbedpondash. —¿Atotsi chuinuec ne? —caquien:  
<sup>33</sup> —Isbente bunquiebi, Icbo —quepondash. <sup>34</sup> Adsho tantiash: —Unësquio iquec —  
 quetanquin Esusën bëshuaid daëdi bëmishpondash. Adoac abi daëdi bëdampondash.  
 Bëdandshun aidëntsen Esus tsibanampondash bëshuacboedëmbi.

*Edusaden yacnoshon chuiquid dapabimboecnuc Esus bëdamboen isaid*

## 21

*Edusaden yacnoshon chuiquid dapabimboecnuc Esus bëdamboen isaid*  
*(Mad 11.1-11; Duc 19.28-40; Uan 12.12-19)*

<sup>1</sup> Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. <sup>2</sup> —Nëid podquedën nidquin shubu daëdpactsëc yacno nidshun cabayobitsecquid aton bacuë caniatseëcbëdta mimbi badedquio istuidendac. Istuidshun tënëshaid tēdiadsho tēchicta. <sup>3</sup> Mimbi tēchicsho isquidën: —¿Atotsi acnun nai? —cac: —Nuquin Icbo: “‘Bedtan,’ quiosh,” mimbi cac: “‘Ai, buantan,” quendac —quequin Esusën chuipondash. <sup>4</sup> Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

<sup>5</sup> “Shubu dadpen icquid Sion caidën tabadquido chui. Edusaden cain Sion capec. ‘Is. Mibi chuiquid dapa cabayobitsecquidën bacuë caniatseëc catsadtoash choeque.

Ancanenquio yec bëdamboshë icquidquio neque. Is,’ quequin chui,” quequin dada uapampic. <sup>6</sup> Aden dada uampicpadomboen ambi: —Bedtan —caidon bedtampondash.

<sup>7</sup> Adotanquin cabayobitsecquid anibëdta caniatseëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatseëquën Esus catsadtopondash.

<sup>8</sup> Adanec nidsho istanquin matses dadpenshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun. <sup>9</sup> Matses dadpen bëyuc nidnubi aitedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,” quec cuëdëncuededpondash.

<sup>10</sup> Adec Edusaden yacno matses dadpenquio cuëdënidëc nidsho isashien Edusaden yacnocquido: —¿Tsutsi tantiec cuëdëncuededpec? —quepondash. <sup>11</sup> Adsho tantiashun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

*Esusën chushcaquin cuemiaid*  
*(Mad 11.15-19; Duc 19.45-48; Uan 2.13-22)*

<sup>12</sup> Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec:

—Nëid bedquidën: “Ma Nuquin Papan ëbi bédamboen isnu,” queshun pichicametsiash — quequin aton nëish yua menequin piucquid dadpenquo bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. <sup>13</sup> —¿Adenda mimbi Nuquin Papan chiaid bédamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,” quequin Nuquin Papan chiacpadomboen aton shubun puduedshun aid chianeti-adquidi mimbi adoenuo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

<sup>14</sup> Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bédamepondash.

<sup>15</sup> Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bédamboshë iquec —quec Esus caic cuëdëncuededsho tantiaash nëishquidpondash. <sup>16</sup> Adshumbic: —Icsambo iquec — queshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bédambo iquec,’ caindac.”

quequin chuipampic —quepondash Esus. <sup>17</sup> Adanec nidec shubu dadpen icquid Betania yacno nidash ushtuidpondash.

*Esusën cuëte unës uaid  
(Mad 11.12-14, 20-26)*

<sup>18</sup> Badiadnubi ënden aubidi nidoaic Edusaden yacnobidi nidoapondash. Piabi nidec bundoshon <sup>19</sup> podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquo icpec. Adsho isumbien Esusën: —Adequi bacuëesambo yec unësta —capondash. Adoac badedquo unëspondash.

<sup>20</sup> Adosho isun abëd icquidon: —¿Atotsi quiash badedquo unësposh? —caquien <sup>21</sup> Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquo icquin: “Nuquin Papan ambi chiacpadomboen naquidquo nec,” queshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi acte nantan tabadoata,” mimbi cac nëid macuësh acte nantan tabadoatsiash. <sup>22</sup> “Ambi chiacpadomboen naquidquo Nuquin Papa nec,” queshun mimbi aid chianiac mimbi chiaid Nuquin Papan mibi nashuntsiash —quequin Esusën abëd icquido chuipondash.

*¿Tsuntsin: Naic nid, cac nai? quequin Esus chuimiai  
(Mad 11.27-33; Duc 20.1-8)*

<sup>23</sup> Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiaashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tantianu —caquien <sup>24</sup> Esusën: —En mimbia chui. Èmbia tantianu. Mimbi chuisho tantiaashun ëbi namequidtsen chuinu. <sup>25</sup> ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoquien badedquo chienquo yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquo Uan pado

nepadenec,” cac Esusën: “¿Atotsieshun aidën chiacpadomboen nainquio ique?” canushe. Aden chienquien ictiad. <sup>26</sup> Nuqui: “Ambembi napondash,” quesho tantiashun nëmbo icquidon nëishënushe: “Nuquin Papan namiaid Uan pado niondash,” queshun. Aden chienquien ictiad –quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. <sup>27</sup> Adashien Esus padpiden chuioaic: –Tsaudi. ¿Tсандан chiaquien nachitondash? –queshobien: –Mimbi chienquio icsho tantiashun ëmbitsen ëbi namequid chienquio iquembi –capondash Esusën abi chieshënquido cuidquin chuiquin.

### *Mado daëdshun nachimboecquido chiaid*

<sup>28</sup> Adshumbic Esusën padpiden chuipondash. –Tantia. Mibi chuinu. Ëmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: <sup>29</sup> “Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiaish neshcaic nidac caondash.

<sup>30</sup> Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash. <sup>31</sup> ¿Mitsicquidën aton papan chiacpadomboen napac caondash? En chui. Tiantianu –caquien Esus chieshënquido: –Abia chiac chieshuidboedën –quesho tantiashumbien Esusën: –Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidachimboecquid aido nec. Aton matses piucquid bedshundenodo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquio iquec. <sup>32</sup> Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquio iccondac. Aton papan chiaid niacquidbimboecquid mibi nec –quepondash Esus abi chieshënquido chieci.

### *Abi chieshënquido icsaid Esusën chuioaid (Mad 12.1-12; Duc 20.9-19)*

<sup>33</sup> Adshumbic Esusën abi chieshënquido ompoachimboen chuipondash naden. –Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacnempac caondash. Adoshombic: “Ampequid chosho isnu,” queshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. <sup>34</sup> Adash yuectaneshumbien abëd nidondaido aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. <sup>35</sup> Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. <sup>36</sup> Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

<sup>37</sup> Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiash,” queshun aton madotsen nidmepac caondash. <sup>38</sup> Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” queshun <sup>39</sup> tied tsitsuno buanshun cuesunepac caondash –quequin Esusën chuipondash.

<sup>40</sup> Adshumbic ambi chuiboedquio abi datsidadquido chuimenuen chuipondash. –Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi

tied icbon napatsiash? —quesho <sup>41</sup> tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

<sup>42</sup> Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bēdambo icquid istuidashi: ‘Nēidquio shubu uanun nitsinembi,’ quetiadquidi isuidacimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bēdambo iquec,’ caimbi,”

quequin dada uapampic. <sup>43</sup> Aden ambi namiaid ēbi chieshënsho isash mibi caic Nuquin Papa nadpec. “Ēmbi con matses caid isadaidbo ēbi bēdamboen tantiametiadquidi chuiquid dapabon namenuo icsho isun utsibotsen: ‘Ēbi chuiquid icta,’ caindami,” quepec Nuquin Papa. Aden ambi chiacpadquidēn bēdamboen chuibanac abi tantiaquido dadpen yanendac. <sup>44</sup> Mibien Nuquin Papan cuidtequido nec. Cuēte uebudquin catashac canite uesadec podquēd-podquēdacimboecnuc mibi comapenen cuidendac — quepondash Esus abi chieshēnquido chiēc.

<sup>45</sup> Adsho tantiashun padiseyobobēdtan nēish abided unēs uaquido chuiquid dapabon: —Nuquien cachitec —quequin tantiabempanēdash. <sup>46</sup> Adshumbic Esus cuesunemenuen bedtiadquio icquimbi bedenquio icpanēdash. —Abi datsidadquidon: “Nuquin Papan chiaid chuibanquidquio Esus nec,” queshun Esus bedsho isun nuqui cuesnushe — queshun aton matses dacuēdēnquin bedenquio icpanēdash.

## 22

### *Cacuidanaid chiaid (Duc 14.15-24)*

<sup>1</sup> Adshumbic Esusën padpiden ompoacbimboembidi chuipondash naden. <sup>2</sup> —Tantia. Isadaidbon nacpadomboen aton mado chido bednuesho tantiashun amēn matses dadpen: “Pec cho,” cauidaid mibi chuinu. <sup>3</sup> Chuiquid dapan aton yuabo chuiquin: “‘Con icbon madon chido bedequē. Aidbēd cuishonquenuen pec cho,’ quequin ēmbi tantiaidotedi chuitan,” cac yuabon chuitanaqui choenquio icpac caondash.

<sup>4</sup> Adsho isumbien chuiquid dapan aton yua utsibo chuiquin: “Nēish nua bēchichoquidquio dadpen codoquiaccoshe. Padpiden chuitan,” cac chuitanoaqui <sup>5</sup> choenquibidi icpac caondash. Adec cacuidanquiec abentsēc aton tied nantan nidnubi utsi piucquid bednuequin ambi aton na menebante shubuno nidpac caondash.

<sup>6</sup> Utsimbic abi: “Pec cho,” cashobi yuabo mēyanquin cuesun secapac caondash.

<sup>7</sup> Adoshobien chuiquid dapan nēishtanquin shēpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nēdēncapac caondash. <sup>8</sup> Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. <sup>9</sup> Ēmbi: ‘Pec cho,’ cacmaidobi chuibenetan. Podquēdēn nidquin mimbi istuidaidtedi: ‘Pec cho,’ cabenetan,” cac nidshun <sup>10</sup> ambi istuidaidtedi chuibenetanac matses dadpenquio pec cho-chopac caondash. Icsambo icquidobēdi bēdambo icquido cho-choash chuiquid dapan shubun puduedash pec tabadte quēnē dapan tabadcuededpac caondash tsucus-tsucustsēcquio yec.

<sup>11</sup> Adshun chuiquid dapantsen puduedshun isquien dashcute bēdaidquio dasiuidabi icquid abentsēc tsadtsec. <sup>12</sup> Adshobien chuiquid dapan: “¿Atotsi quiash dashcute bēdaidquio dasiuidambobi cho, buchi?” caqui ēcbedenquio yec tsadec. <sup>13</sup> Adshobien chuiquid dapan: “‘Chido bedacno isnuec dashcute bēdaidquio dasiuidquid,’



quepadenec. Mibi icsambo iqueque. Mibi cuidnu,” qeshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquieq natiaic shubiquiopac caondash.

<sup>14</sup> Adembidi Nuquin Papan ambi matses bëdamboen iste dadpen tantiamiaqui utsin-utsinquien tantienquo iquendac. “Abi yacno puduednu,” queuidboedi bëdambo icte bunenquo yec abi tantiatipimbo icsho Nuquin Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac –quequin Esusën chuipondash.

*Chuiquid dapa piucquid menete chiaid*  
(Mad 12.13-17; Duc 20.20-26)

<sup>15</sup> Adsho tantianec nidash abi chieshënquido padiseyobo: –Esus icsamboen chuime-nuna. Icsamboen chuisho tantishun bedshun unës uamechitono –qeshun ambi chuibanquin tantiamiaido chuipac caondash. <sup>16</sup> –Icsamboen chuimetan –caquien chuiquid dapa Edodes caid tantiaquidobëdtan icsamboen chuimenuc cho-choshon chuituidpondash. –Bëdamboen chuiquid mibi neque. En ëbi chui. Tiantianu. Muesambo icquin Nuquin Papan chiacpadec bëdamboec tabadte mimbi abimbo chuipoc. Matses dacuëdënenquo icquin Nuquin Papan chiaidquo mimbi chuipoc. <sup>17</sup> Adquid icquin ¿atotsi mimbi chuïpe? Tiantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniac ¿ada bëdambo icpatsiash? –capondash. <sup>18</sup> Adoquien Esusën ambembi tantishun: –Bëdambo icquid damianquieq mibi muambo nec. ¿Atotsieshun ëbi icsamboen chuimetiadquo ique? –quetanquin: <sup>19</sup> –Chuiquid dapa menetequid piucquid shocoshëmpi beccho –ambi cac <sup>20</sup> bësho bedshun Esusën chuipondash. –¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tiantianu –caquien: <sup>21</sup> –Ma nuqui yuaquid chuiquid dapambo Sesad neyoc –quepondash. Adsho tantishumbien Esusën: –Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta –quequin Esusën bëdamboen chuipondash. <sup>22</sup> Adsho tantishun icsamboen chuimetiadquo icboedi: –Bëdamboen chuïpec –quetanec nidanepondash.

*Matses uincuemetete chiaid*  
(Mad 12.18-27; Duc 20.27-40)

<sup>23</sup> Adnubien aid ushëmbi Saduseyubo: –Matses unësaid uincuenesambo nec –quequidotsen: –Esus icsamboen chuimenu –quec cho-chopondash. <sup>24</sup> –Bëdamboen chuiquidquo mibi neque. Mimbi chuisho tiantianu. ¿Mitsipaden mimbi chuipatsia? Nuquin tsusedpa Moisesën naden chuïquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibëdeque. Con buchin madobimboecnuc tishmenu,’ quequin tishmequid,” quequin Moisesën dada uapampic. <sup>25</sup> Aid tantiaquin chuïnu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash <sup>26</sup> bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. <sup>27</sup> Adashic bacuë tishambobi aid chidotsen unëspac caondash. <sup>28</sup> Aid abitedi uincuemiac ¿mitsicquidën chido icpatsiash? –caquien <sup>29</sup> Esusën: –Nuquin Papan chiaidquo tantienquo icquin Nuquin Papan natiambo icquin nabanquin uincuemetete mimbi tantienquo iqueque. Chuïnu. Tiantia.

<sup>30</sup> Uincuemiad dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bēdabobimboec matses uincuemiaido iquen-dac. Aden uincuemiaidën chido bedesa –quepondash Esus. <sup>31</sup> Adshumbic padpiden chuipondash. –Ambi unēsaid uincuemete chuiquin Nuquin Papan dada uamepampid ¿isbanabida ictio? Ma mimbi aid isbampaboc. <sup>32</sup> Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unēsampid chiequi. Unēsun matses tantienquien mimbi danec. Unēsash aton dada chodquiambic aton tantiate unēsambo icnuc abi Nuquin Papa tantiatshash –quepondash Esus. <sup>33</sup> Adsho tantiasash abi datsidadquido: –¿Mitsipadquid nepec? Bēdamboenshēen chuipec –quepondash.

*Moisesën dada uampid chiaid*  
(Mad 12.28-34)

<sup>34</sup> Aden unēsaid uincuemete chuisho tantiashumbien Saduseyobon padpiden: –En chui –cainquio icpondash. Adsho isashien Esus chieshënquid utsibo Padiseyobo: –Nuquin Papan chiaid Esus icsamboen chuimenu. Nid –quianec Esus chuimec cho-chopondash. <sup>35</sup> Cho-choquin abentsēcshun Nuquin Papan Moises dada uamiampid tantiaquidquido icquin chuimetuidpondash. <sup>36</sup> –Chuiquidquido mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsēc ëmbi nasho Nuquin Papan: “Bēdamboshë iquec,” capatsiash? –caquien <sup>37</sup> Esus: –“Nuquin Papa tantiaquieci ambi chiacpadec tabadte bunquiota,” quequin <sup>38</sup> chiampidba naic Nuquin Papan chiacpadec mibi bēdamboec tabadtsiandac. <sup>39</sup> Adembidi Moisesën chiampid utsitsen naic matses bēdamboec tabadtsiash. “Min dada mibibi datantiadacimboen utsibotsen tantiaquiota,” quequin chiampic-padomboen nasho Nuquin Papan bēdambo catsiash. <sup>40</sup> Aden matses bēdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic –quequin Esusën bēdamboen chuipondash abi chieshënquido chuiquin.

*Nuquin Papan chomiaidquido chiaid*  
(Mad 12.35-37; Duc 20.41-44)

<sup>41</sup> Adshumbic Esusëntsen abi icsamboen chuimete bunquido Padiseyobo chuipondash. <sup>42</sup> –Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madoudida nepec? –capondash Esusën abibi cadquimbi. Adoaquien badedi: –Nuquin tsusedpa yampid Dabidën tsyuecquid icsho Dabidën mado caimbi –quepondash Padiseyobo.

<sup>43</sup> Adsho tantiashumbien Esusën: –¿Bēdamboenda chuidio? Mimbi chiacpadquid aton mado icsho ¿atotsieshün Nuquin Papan Mayanën tantiamiacpadomboen Dabidën con Icbo capampic? Naden Dabidën dada uapampic.

<sup>44</sup> “Nuquin Papan con Icbo naden chiendac.

‘Con abiuc tsadash abitedishun Icbombo icnush nēmbo cho.

Mibi chieshënquidobi con Icbo mibi camenu,’ quequin Nuquin Papan con Icbo chien-dac,”

quequin Dabidën dada uapampic. <sup>45</sup> Con mado cainquio icquin con Icbo capampic Dabidën. ¿Atotsieshün mimbi: “Dabidën mado nec,” quequin tantiape? –caquien <sup>46</sup> ëcbedenquido yec otacquido tabadpondash. Esusën bēdamboen chuisho tantiasash: –Icsamboen chienquien icchitec. Ëmbi padpiden: “Icsamboen chuimenu,” cac bēdamboembidi chuioatsiash –queshun abi chieshënquido abitedishun Esus padpiden chuimenquido icquin ënaccondash.

## 23

### *Bëdambo icquid damianquido tanenda, quiaid (Mad 12.38-39; Duc 11.43, 46; 20.46)*

<sup>1</sup> Adshumbic Esusën abëd icquidobëdta abi datsidadquido tantiamequin chuipondash. <sup>2</sup>—Tantia. Moisesën dada uampid chuibanquidobëdta tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. <sup>3</sup> Aden Moisesën dada uampid abimbo chiac adenuidi mimbi nac bëdambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niacniaquec. <sup>4</sup> Chieshëmëncquido nec. Nuquin Papan chiaid nametiadquidëmbi tsusedpabon ambembi chiaid dadpenquio namepec chushcanquin. “Matsesën aitedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquio iquec.

<sup>5</sup> Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec queshun matses ismenuenuidi naic. Adembidi aton dashcute tëdiadte nacenuequin: “‘Nuquin Papa chianequidquo nec,’ ma ëbi canu,” queshun sedquid shoyonaid ënapenpactsëcnuc cuididicash matses ismenuec matses tabadacno capucenepec. Adec Nuquin Papa chianequid damianquiec. <sup>6</sup> “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abëdi tsadmequid,” quiash icbobëdi tsadte bunquiec. Nuquin Papan chiaid chuibante shubun puduedash: “Tsusio dapambo nec,” camenuc utsibobëd tabadenquio yec tsusiobobëduidi tabadquid nec. <sup>7</sup> “Chuiquidquo yec mibi bëdambo iquec,” camete bunquiec matses dadpen tabadacno nidtenepec.

<sup>8</sup> Mibitsen adenda. Utsibo: “Mibiuidtsëqui bëdambo iquec, Icbo,” camenuc adenda. Min Icbo abentsëcquiobi ëbi iquec. Ëbi abentsëqui con Icbo cata. Con yuabo yec con utsibo mibi neque. Bëdamboec isnanta. <sup>9</sup> Adembidi mibi chuibanquid chuiquimbi: “Mibiuidtsëqui bëdambo iquec, Papa,” cainda. Nuquin Papauidtsëqui aden chuita. <sup>10</sup> Adembidi: “Chuiquid dapa yec mibiuidtsëqui bëdambo iquec,” utsibo camenuenuidi nainda. Ëbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquo utsi nibëdec.

<sup>11</sup> Padnuen ambi chiacpadomboen utsibo nashunquidquo utsibo dëniacte bunenquio icquid Nuquin Papan bëdamboshë catsiash. <sup>12</sup> Utsien abibi cadequi: “Ëbiuidtsëqui bëdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bëdambo caindac —quepondash Esus abi datsidadaido chiec.

### *Abi chieshëncquido Esusën chushcaid (Mad 12.40; Duc 11.39-45, 52; 20.47)*

<sup>13</sup> Adshumbic abi chieshëncquidotsen chuipondash. —Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquiec mibi icsambo iquec. Nuquin matses: “Nuquin Papabëd tabadte tantianu,” queshobi mimbi bëdamboen chienquio iquec. Ëmbi Nuquin Papabëd tabadte bëdamboen chuisho mimbi tantienquio iquec. Aden tantienquio icquin: “Aidën chiaid tantienda,” quequin mimbi utsibotsen Nuquin Papabëd tabadte tantiametiapimbo iquec.

<sup>14</sup> Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquo damenuen utsibo tantiamequinuidi buëdpambo cuëdquin Nuquin Papa chiacbimboen mimbi chianepec. Aid abimbo mimbi

chienquo iquec. Adec chieshanquiecsho isun Nuquin Papan mibi comapenen cuidendac.

<sup>15</sup> Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquo yanash Satanasën yuambo yanec Nuquin Papan cuidtequidombo iquendac.

<sup>16</sup> Nuquin Papan cuidtequido mibi nec. Isadaidbo chuiquid icquin bēdamboen tantiamenquien mimbi icchitec. “‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidën Nuquin Papan chiaid niacquid,” quetiadquidi mibi adenquo iccoc. “‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquo iccoc. Padenquo yec: “‘Nuquin Papa tabadte shubu uashunaid dapan icquid shocosh piu nacnenaidquo utsi uatiapimbo yacpaden abimbo chiombi,’ quequid muesa nec,” quechitequien mibi iquec. <sup>17</sup> Aden tantienquo icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bēdapenquioda icpec? “Aid bēdamboshë icnubi aid nuntan icquid bēdiactsëc bēdambo iquec,” caimbi. Mimbien icsamboen tantiec. <sup>18</sup> Nadentsen mimbi icsamboen chiec. “‘Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquo iccoc. “‘Nuquin Papa mabi bēdamboen isnuequin pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec. <sup>19</sup> ¿Adenda mimbi bēdamboen chuipe? Pashuacximboen mimbi bēdamboen tantienquo iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish pichicate nacnenaid dapa bēdambo icnuc aidën pichicatequidi nēishquo bēdapabi ictsec. Nuquin Papamboen bēdamboshë iquec. <sup>20</sup> Nēish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. <sup>21</sup> Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. <sup>22</sup> Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidën chiaidquo tantiec: “Abimbo cacximboen chuiquid icsaquid nec,” quetiadquidi mibi adenquo iccoc.

<sup>23</sup> Bēdambo icquid damianquid yec Nuquin Papan cuidtequido mibi nec. Nuquin Papan chiaid abentsëqui tantiatsëcquin min tiedën canitsëcquid musuquëmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshëmianquid icboedi: “Ëbi bēdamboen ista,” quesho bēdamboen istiapimbo mibi iquec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquo iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquo icpaboc. <sup>24</sup> Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquiabi abi nēsamedpanumbobi acacximboembien mimbi nachitec. “Nuquin Papa meneta,” quequin chiaiduidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niacniacchitec.

<sup>25</sup> Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaidbēdta dēshote chieshquin cachocuidtsëqui dapanshun anauc ampanambo icquidi ampanaid damianacximboec mibi bēdamboec tabadquid damianquiec. Nuquin Papan chiaid dadpen nainquo icquin mitsanauidi bednuen mibi bunaiduidi mimbi napec.



<sup>26</sup> Pamumëdabimboec tantiatiapimbo mibi iquec. Dëshote abichobi bëdamboen ampanacimboec icsaid ucludash bëdambo icta. Adec icsainquo yec ënëdash Nuquin Papan chiacpadec mibi bëdamboec tabadtsiac.

<sup>27</sup> Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacnenac bëdambo isadec ënden pisenambi. <sup>28</sup> Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid  
(Duc 11.47-51)*

<sup>29</sup> Nuquin Papan cuidtequidombo mibi nec. Nuquin Papan oncamiaidobëdta bëdamboec tabadquido nuquin tsusedpabon unës uampido tantiaquin aido chococampicno shubu uaquin mimbi nacnempec. <sup>30</sup> Adoshombic: “Nëmbo con tsusedpabon chieshënquin unës uampid chococac. Aidbëd tabadquin ëmbi unës uainquo ictsenëdac. Ëmbien bëdamboen istsenëdac,” queshun mimbi aido chococacno nacnempec. <sup>31</sup> Adoboedëmbi nuquin tsusedpabon bëdambo icquid unës uampicpadomboen adoante bunquin mimbitsen chieshtoshon adoaindac. <sup>32</sup> Ai, nuquin tsusedpabon Nuquin Papan oncamiampid unës uacpadombota –quepondash Esus abi unës uate chiec.

<sup>33</sup> Adashic abi padiseyobo chiec: –Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. <sup>34</sup> Icsaido icsho isun: “Ma Nuquin Papan bëdamboen iste tantiamenu,” queshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. <sup>35</sup> Adosho isun Nuquin Papan mibi cuidendac. Nuquin Papan chiacpadec bëdamboec tabadsho tsusedpan chieshënquin tauamboen cuesuniampid Abed nepampic. Adoshombic adecbidi bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquo cuesunepampic. Aidtedi unës uampido tantiaquin aido unës uaquido cuidacimboen Nuquin Papan mibitsen cuidquiendac. <sup>36</sup> “Yuecshun min tsyuecquido cuidendac,” quec nenquo iquebi. Nëbi caimbi –capondash Esusën abi chieshënquido chuiquin.

*Edusaden yacnocquido Esusën shubi uaid  
(Duc 13.34-35)*

<sup>37</sup> Adshumbic Esusën chuioapondash. –Tantia, Edusaden yacnocquido. Mibitsen chuinu. Mibi tantiac unësquo iquec. Mibi yacnobidi tabadquin Nuquin Papan oncamiaidon chuisho nuquin tsusedpabon unës uapampic. Adembidi Nuquin Papan: “Isadaidbo chiec nid,” caido chosho utsi-utsien cuënoten seshunequiopampic. Adembidi mimbi nëbi naindac. Adquidombo icsho mibi tantiaquiemi. ¿Mitsipadec cachina aton bacuë cudaspec? “Penushe,” quiash aton bacuëmpi nua shoccoshon madadec cudasquid. Adecbidi: “Satanasën yanushe,” quiash cudasquiec mibi Nuquin Papa bëdamboen ismete tantiametiadquo iccobi. “Tantiamenu,” cac tantiate bunenquo mibi icchitoc. <sup>38</sup> Èbi nidambic ëbi tantiatiapimbo icsho Nuquin Papan namiac min shububëdtabi mibi nibëdamendac. <sup>39</sup> Nëbi mimbi ëbi isenquo yanendac. Padnuen min matsesën yuecash chosho ëbi isendac. Aden isash: “Nuquin Papa yacnuësh choquid bëdambo iquec,” min matses quendac –quequin Edusaden yacnocquido Esusën chuipondash.



## 24

### *Nuquin Papa tabadte shubu uashunaid nibédante chiaid*

*(Mad 13.1-2; Duc 21.5-6)*

<sup>1</sup> Adash Nuquin Papa tabadte shubu uashunaid daquënë uacno tabadanec nidequi Esusbéd icquido Nuquin Papa tabadte shubu uashunaid caic: —En is, Icbo. Nēid shubu bēdamboen nacnenaidquio neque —quepondash. <sup>2</sup> Adsho tantiashun Esusēn: —Mimbi isboedquio cuēnote bēdamboen nacnenaid matses utsibon cuēnote chic-chiquendac nibēdquiecnuc —capondash.

### *Nuquin Papan cuidte ushē chiaid*

*(Mad 13.3-13; Duc 21.7-19)*

<sup>3</sup> Adanec nidequi macuēsh dapa Odibos caidēn pudundoec poctsebi tabadtuidshun abéd icquidon utsibo tantiamentuquo icquin Esus chuipondash. —En mibi chote chui. Tantaranu. “Nēbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nēbi nec,” quepe? —capondash abéd icquidon.

<sup>4</sup> Adoquien Esusēn naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. <sup>5</sup> Adquido choshon: “Nuquin Papan chomiaidquio Quidistu caid nebi,” quequin muaquin chiaqui dadpenshun: “Ai, abimboen mimbi caic,” capendac.

<sup>6</sup> Èbi choabi icnuc: “Matses dadpenquio cuesnan-cuesnanac caosh,” quecuedendac. Adsho tantiash dacuēdenda. Nuquin Papan matses abitedi cuidte ushē choabi icnuc ambi tantiacpadec matses adonanendac. <sup>7</sup> Adec matses utsi dadpen icquido matses utsibobéd cuesnanendac. Nidaid utsi-utsiec yacno pete nibēdquiecnuc icted-ictedendac. Nidaid utsi-utsiec yacno nidaidquiobi comapenec uēdēquedenendac. <sup>8</sup> Adsho isash chido bacuē nēncuenacsho isun: “Nēbien tishchitec,” quequin tantiacbimboen tantiata. “Nuquin Papan abitedi cuidte nēbi nec,” quequin tantiata —quepondash Esus.

<sup>9</sup> Adashic abi onquec: —Èmbi chiacpadquio icnuc chieshēmēnquidon èbi tantiacquido bedshun chieshēnquin utsi-utsien cuesendac. Utsi-utsien unēs uaindac. Aden nidaid utsi-utsiec yacno tabadquidon dadpenshun èbi tantiaquido chieshēnquiendac.

<sup>10</sup> Adoac èbi tantiatsēchoedēmbi chieshtoshon èbi tantienquio yanendac. Aidēmbi èbi tantiaquid ompodacsho istuidmeshun mēyamendac. Adashic abipadquid utsibobéd chieshēnanendac.

<sup>11</sup> Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpenshun: “Ai, abimboen mimbi chiec,” caindac.

<sup>12</sup> Matses dadpenquio icsamboecshē tabadsho isun èbi tantiatsēchoedēmbi èbi tantienquio yanendac. <sup>13</sup> Padnuembi èbi choabi icshobi ēnenquio icquin èbi tantiaquido Nuquin Papa yacno tabadmendac.

<sup>14</sup> Èbi choabi icnuc: “Ma matses abitedishun Nuquin Papabéd tabadte tantianu,” queshun èbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

### *Matses icsamboshē icquid chote chiaid*

*(Mad 13.14-20; Duc 21.20-24; 17.22-24)*

<sup>15</sup> Adashic abi onquec: —Èbi chote ushē nēbi yanuc matses icsamboshē icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Èmbi chiacpadomboenuidi nata,” quequin Nuquin Papa chieshēnquin chiendac. Èndenquimbo nuquin tsusedpa Danied caidēn aden icsa uate chuiquin Nuquin Papan chiaid dada uapampic. Aidēn dada uampid mimbi isaidquio nec. <sup>16</sup> Aden: “Nuquin Papa tabadte shubu uashunaid dapa icsa uanuec puduedosh,” quesho tantiash Udeya yacnocquido macuēsh dapa yacno ompodec cuenac bēdambo ictsiash.

<sup>17</sup> Adec cuenec shubu dayun icquido puduedenquo yec: “Con na bednu,” quenquo yec umanucuëshi cuenac bédambo ictsiash. <sup>18</sup> Adecbidi badedquo cuenuen tied nantan icquidon aton dashcute utsi aton shubuno beduanenquo yac bédambo ictsiash. <sup>19</sup> Nidequi bacuë usunquid yec bacuë chishmequid yec quec badedquo cuentiapimbo yec mëyadquiendac. <sup>20</sup> Adec cuente tantiec: “Ue sequenumbo cuemenquo icpashuni,” queta. “Pete bedmianenquo icnushe,” quiash “Chonoadenquo icte ushënquo cuemenquo icpashuni,” queoata. <sup>21</sup> Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquo natiambo chieshëmënquiec tabadendac. Nuquin Papan tauamboen matses uac adec tabadenquo ictenec. Nëbi adec tabadenquo iquec. Aido icsamboecshë tabadquido nibëdanambic utsibo adquidpenquo yanoaindac. <sup>22</sup> Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” queshun yuenquo icsamboen tabadmenquo icquin ënëdmendac –quepondash Esus.

<sup>23</sup> Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquo Quidistu neque,” quependac. Utsibic: “Is. Nëidquien Nuquin Papan chomiaidquo Quidistu caid neque,” quequin icsamboen chuioaindac. Adsho tantiashun: “Nuquin Icho Esus choashien nec,” cainda.

<sup>24</sup> Adec muaquidoba choendac. “Nuquin Papan chomiaidquo nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiad nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bédamboen tantiamiado yec adtiapimbo iquendac. <sup>25</sup> “ ‘Chieshëmënkuido iquendac,’ quequin tantienquo icquidën ëbi tantienquo yanushe,” queshun: “Aden ëbi tantiaquido chieshënquiendac,” quequin chiombi –quepondash Esus.

<sup>26</sup> Adashic padpidec onquec: –Ëmbi aden chuiboed tantiashun utsibo muasho tantienda. Ëbi caic: “Utsibo ismenquo yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque. <sup>27</sup> Ëbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquo isenquo icpadic? Ai, isec. Adembidi ëbi choasho matses abitedishunquo isendac. <sup>28</sup> Adec choendabi. ¿Ada edeste pisen chec budenquo icpadic? Ai, budec. Adecbidi Nuquin Papan cuidte ushë chonoc choendabi –quepondash Esus.

*Abi chote Esusën chiaid  
(Mad 13.24-37; Duc 21.25-33)*

<sup>29</sup> Adashic padpiden chiec: –Aden matses icsamboshë icquidon ëbi tantiaquido natiamenubi ushë chënquenquo yanendac. Inchëshën ushëtsen chënquenquo yanendac. Uispa chedo paëdbudnendac. Uispabimboecquid abitedimbo uëdëquendac. <sup>30</sup> Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquo yec chosho isash cuidadtequido abitedimbo dacuëdec natiaic shubiquiendac. <sup>31</sup> Adnuc nua shoncanubimbi Nuquin Papan abi yacnoshon uaido mayan bédabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

<sup>32</sup> Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc seccuduquiaid isun: “Nëbi seta taëec,” quequin tantiaquid. <sup>33</sup> Adembidi ëmbi chuiboed isun: “Nëbimbobi Esus choec,” quequin tantiata. <sup>34</sup> ¿Muectabi nedi? Ëmbi chuibocpadquo iquendac. Ëmbi chiapadec yanabi matses abitedi nibëdantiapimbo iquendac. <sup>35</sup> Abimbo caimbi. Abu nibëdanendac. Nidaidt-sen nibëdanendac. Padnuen ëmbi chuiboedquo nibëdantiapimbo iquendac. Bënuendenquo

iquendac. Ucuttiapimbo iquendac. Ĕmbi chuibocpadquio iquendac –quepondash Esus abĕd icquido chiec.

*Esus chote ushĕ tantienquo icte chiaid*  
(*Mad 13.32-33; Duc 17.26-35*)

<sup>36</sup> Adashic abi onquec Esus: –Ĕbi chote tantienquo iquembi. “Aid ushĕnquo choendabi,” quetiapimbo iquebi. Adembidi mayan bĕdabon tantienquo iquec. Ĕmbibi Nuquin Papan Madonquiobi tantienquo iquembi. Nuquin Papanuidtsĕquien tantiec. <sup>37</sup> Matses ĕbi caic: “Nĕbi choec,” quetiapimbo icnuc choendabi. Noen cano nacnenubi ĥmitsipaden aton matses icsambo icquidon tantiapampic? <sup>38</sup> Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiapadomboen cano dapa anshubu uaquin nacnenash puduedpampic. <sup>39</sup> Aton matses: “Nĕbimbobini Nuquin Papan cuidchitec,” quenquo icnubi ue dapambo choec mauanquidĕn matses abitedimbo unĕsbudnepampic Noe ambi cano anshubu uaidĕn nuadtonobi. Adecbidi Nuquin Papan cuidtequido ĕbi caic: “Choec,” quenquo icnubini choendac.

<sup>40</sup> Choquin Nuquin Papa yacno tabadmenuen beduamendambi. Ĕmbi: “Bedtan,” cac tied nantan dada daĕd icsho istuidshun ĕbi tantiaquid abentsĕc icsho beduanendac. Ut-sibic ĕbi tantiesa icsho nianendac. <sup>41</sup> Adembidi Nuquin Papa yacno tabadmenuen chido daĕdshun macueso istuidshun abentsĕc ĕbi tantiaquid icsho aid abentsĕc beduanendac. Chido utsibic ĕbi tantiesa icsho nianendac.

<sup>42</sup> Aden ĕmbi chuiboed tantiashun: “ĤNĕbida con Icho chopeba?” quequin ĕnenquo icquin tantiata. Ĕbi chote mimbi tantienquo iquec. <sup>43</sup> Ĥ“Nĕbi ampequidĕn ampec,” quequinda tantiapadic? Padenquo. Tantiacquidĕnquien aid ushĕnquo aton na bĕdamboen isquin ampemenquo icsiash. Aden tantienquo icquin: “Ampesho isnu,” quequin ĕnenquo icquin isquid. <sup>44</sup> Adembidi ĕbi chote ushĕ mimbi tantienquo ye. Ĥ“Nĕbida nuquin Icho chopeba?” quec Nuquin Papabĕd tabadte bunec bĕdamboec tabadta. Matses dadpen: “Nĕbien chochitec,” quenquo icnubini choendac –quepondash Esus abĕd icquido chiec.

*Esus bĕdamboen cainte chiaid*  
(*Duc 12.41-48*)

<sup>45</sup> Adshumbic abi bĕdamboen cainte Esusĕn chuipondash. –Tantia. Aton icbo tantiaquin yua bĕdambo icquidĕn naid mibi chuinu. Icbon: “Ĕbi nidan mibĕdta yuaido pete sandoaid musucshun ĕmbi chiapadĕn ĕmbi chiapadĕnquien menianeta,” cac yua bĕdambo icquidĕn adotsiash. <sup>46</sup> Adnubien icbon choshon ambi chiapadomboen yuan nasho isun bĕdamboen istsiash. <sup>47</sup> Adshumbic aton yua chuitsiash. “Bĕdamboen tantiaquid mibi neque. Con yua utsibo namequin con natedi dayun uata,” catsiash icbon yua bĕdambo icquid caquin. <sup>48</sup> Padnuen yua icsambo icquid: “Ĕndenquimbo con icbo nidondash. Choenuien icchitec. Con nauidi nanu,” <sup>49</sup> quiampatsiash. Adshumbic chieshtoshon abĕdta yuaido cuesanetsiash. Adashic icsambo icquidobĕdi icsamboec tabadtsiash. <sup>50</sup> Adec: “ĤNĕbida con icbo chopeba?” quenquo icnubien aton icbo chotsiash. <sup>51</sup> Choshon ambi chiapadomboen nainquo icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bĕdambo icquid damianquido cuidacno icsamboshĕ yacno nidmendac. Adoac natiaic shubiquiendac –quequin abi bĕdamboen cainte Esusĕn chuipondash.

*chiaid*

<sup>1</sup> Adshumbic Esusën ompoacbimboen chuiquin abi chote ushë tantienquo icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aïdbëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” queshun aton tabote bëchin taboadquid icbo-icboen buanuen sanambededpac caondash. <sup>2</sup> Aid chido 5tedi tantienquo icquido icnubi 5tedbidi bëdamboen tantiaquido icpac caondash. <sup>3</sup> Tantienquo icquidon: “Tabote bëchi naimëdsho cushtonon buanu,” quenquo icquin bëchi uesadbudtsaid taboteuidtsëqui sananquin caimpac caondash. <sup>4</sup> Padnuen bëdamboen tantiaquidon naimëdsho cushtonoequin tabotebëdta sedunten cushtoaid bëchi sananquin caimpac caondash. <sup>5</sup> Aden cainaqui: “Chido bedtanu,” quianec nidboed choenquo icsho isash abitedi ushcastoash ushcuededpac caondash. <sup>6</sup> Inchësh poctsemboen: “Choeque. Bëquednu. Nid,” cac <sup>7</sup> isucunshun chidobon tabonoen tabote dëbedpac caondash. Adoshon bëdamboen tantiaquidon ambi bëboed bëchi cushtonobien <sup>8</sup> icsamboen tantiaquidon: “Bëchi beccho. Con na naimëdeque,” caquien bëchi bëboedën <sup>9</sup> bëdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. <sup>10</sup> Adoac bëchi bedec nidnubien chido bedtanec dada chopac caondash. Chosho bëdamboen tantiaquidon aton tabote taboshon chido bedtanec choquid bëquedstampac caondash. Adtanec abëdi choash puduedshun bëtashte puduedtiapimbo icnuc bëdamboen bëtashpac caondash. <sup>11</sup> Adnubien bëdamboen tantienquo icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” <sup>12</sup> caquien chido bedquid: “Padi. Èmbi tantiacmaido mibi nec,” quepac caondash.

<sup>13</sup> Èmbi chuiboed tantiashun chido icsamboen tantiaquido tanenda. Bëdamboen nabi icsho: “Èmbi tantiacmaid mibi neque. Puduedenda,” aïdo cacbimboen èmbitsen Nuquin Papa yacno puduedmenquo icquin cacumechitomane. Èbi chote ushë tantiadenquo icnuc: “¿Nëbida con Icbo chopeba?” quequin èbi bëdamboen tantiec èmbi chiacpadec bëdamboec tabadta —quepondash Esus abëd icquido chiec.

*Icbon piucquid daëd uaid chiaid  
(Duc 19.11-27)*

<sup>14</sup> Adshumbic abi tantiaquidon ambi chiacpadomboen nate Esusën ompoacbimboen chuoapondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuiyac caondash. <sup>15</sup> “Nëidën bëdamboen tantiaquidquo icquin con piucquid èbi daëd uashuntsiash,” queshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid èbi daëd uashuntsiash,” queshun utsitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi èbi con piucquid daëd uashuntsëctsiash,” queshun utsitsen piucquid abentsëcquiobi menetsac caondash. Adanec nidpac caondash icbo. <sup>16</sup> Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udiçtsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. <sup>17</sup> Adembidi piucquid 2ted meneboedën 2bidi daëd uapac caondash 4tedi icnuc. <sup>18</sup> Padnuen abentsëc meneboedën chieshquin aïd daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

<sup>19</sup> Yuecquo ictaneshumbien icbon choshon ambi piucquid meniondaïdo chuituidpac caondash. “¿Atotsi nao?” cac <sup>20</sup> sincoted meniondaïdën: “Is, icbo. Mimbi èbi meniondaïdtedbidi daëd uaombi. Nëbi mitsana 10tedi iquec,” caquien <sup>21</sup> icbon: “Ai,



con na daëdpactsëc icboedi daëd uaqin mimbi bëdamboen nac. Nëbi ëbëdtan chuiquid dapa icta. Èbëd cuishonquec tabadec cho,” capac caondash. <sup>22</sup> Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien <sup>23</sup> icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

<sup>24</sup> Adnubien piucquid abentsëcquiobi meniondaidën chieshquidëntsen: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquio icsho isash chushcanquidquio mibi nec. <sup>25</sup> Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien <sup>26</sup> icbon: “Chieshquiec mibi icsac. Èmbi chiacpadomboen nambo mimbi iquec. Èbi caic: ‘Ancanquid icquin ëbi chushcanushe,’ qeshun <sup>27</sup> nuquin matsesën nacpadomboen utsibo meneshun piucquid daëd uaqin mimbi bedtsempac. Adoacsho aid daëd uaqin bedtsenombi. Chieshquin mimbi icsamboen nac,” <sup>28</sup> quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. <sup>29</sup> Adembidi naindambi. Èbi tantiaquin ëmbi chiacpadomboen naquid adembidi namequin bëdamboen tantiamendambi. Èbi tantiesabo ëmbi chiaid niacquid bëdamboen tantiamenquio iquendambi. <sup>30</sup> Aid yua icsambo icquid cuidacbimboen Nuquin Papan ëbi tantiesabo cuidquiendac. Ambi icsaido cuidquiagno nësecac natiaic shubiquiendac –quepondash Esus abëd icquido chiec.

### *Mates nashunesa cuidte chiaid*

<sup>31</sup> Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Àbitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. <sup>32</sup> Adshumbic matses abitedimbo cho-chomequin tsidadmendambi. Adshumbic icbon aton nauidquio tsinacacbimboen ëbi tantiaquido naden chiendambi. <sup>33</sup> “Èbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Èbi tantiesabo cuidadtequido mibi neque. Con copioc tabadec cho,” caindambi. <sup>34</sup> Adshumbic ëbi tantiaquido padpiden chuioaindambi. “Èbëdi tabadec cho. Matses uaqin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. <sup>35</sup> Mimbi ëbi nashundenec. Bundoacsho mimbi ëbi pemedenec. Acte bundoacsho adembidi mimbi ëbi acmedenec. Mimbi isacmaidquio icsho mimbi ëbi yuedtenec. <sup>36</sup> Con dashcute nibëdsho mimbi ëbi dashcute menedenec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenec,” caindambi. <sup>37</sup> Adoquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemi-ambo yoc. Mambi mibi acte bundoacsho acmiambo yoc. <sup>38</sup> ¿Èmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. <sup>39</sup> Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquio icnuc chuipec,” ëbi caindac. <sup>40</sup> Adoac naden chiendambi. “Tantia. Mibi chuinu. Èmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacbimboen mimbi utsibo nashundenec. Èbëdi tabadec cho,” caindambi.

<sup>41</sup> Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton



yuabo podobitsi icsabobëdta ënenquo icquin cuidacno nid. <sup>42</sup> Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenuo ictenec. Acte bundoacsho mimbi ëbi acmenquo ictenec. <sup>43</sup> Mimbi isacmaid icsho mimbi ëbi cacumedenec. Dashcute nibëdsho mimbi ëbi menenuo ictenec. Daicsacsho isash mibi ëbi datsadenquo ictenec. Quënën nauedacsho mimbi ëbi istanenuo ictenec,” caindambi. <sup>44</sup> Aden chiaquien: “Tantiadenquo icnuc mimbi chiec. ‘Pete bundopash,’ quequin tantienquo iccondambi. ‘Acte bundopash,’ quequin tantienquo iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquo icnuc mimbi chuipec,” caindabi ëmbi chiacpadomboen naisabon. <sup>45</sup> Adoac naden chiendambi. “Ëbi tantiaquido nashunenuo icquin ëbibi nashunenuo yacbimboen ëmbi chiacpadomboen naisabo mibi neque. Nuquin Papan cuidacno nid,” caindambi. <sup>46</sup> Adoac icsamboec tabadquido ënenquo icquin cuidacnombo nidnubi bëdamboec tabadquido Nuquin Papa yacno ënëdenquo yec tabadendac –quequin Esusën chuipondash.

## 26

### *Esus bedshun unës uanuequin chiaid* (*Mad 14.1-2; Duc 22.1-2; Uan 11.45-53*)

<sup>1</sup> Aden abi chote ënquin chuitanquimbic abi unës uatetsen abëd icquido Esusën chuipondash. <sup>2</sup> –Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquo icnu,” queshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac –quepondash Esus.

<sup>3</sup> Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash. <sup>4</sup> Adashic: –Nëbien Esus unës uametiad utsibo ismenquo icquin bedshun. <sup>5</sup> Nuquin matses obeca pec tabadnuc bedenquien ictiad. “Esus bëdambo icquidi cunesunec,” queshun obeca penuec chochoquidon nuqui cunesushe –quepac caondash.

### *Chidon Esus machiuinaid* (*Mad 14.3-9; Uan 12.1-8*)

<sup>6</sup> Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash. <sup>7</sup> Puduedshun pec samëdshobien chidon puduedshun ambi piucquid dadpenquo menequin bedaid tëchumpin icquid bëdambo nuadquid Esus machiuimpondash: –Esus bëdamboshë icquid nec –queshun. <sup>8</sup> Adsho isumbien Esusbëd icquidon: –¿Adenda bëdamboen nai? Ma icsambo yoc. <sup>9</sup> Utsibo menequin dadpen piucquid bedshun piucquid nibëdquido aid piucquid menetiadquidi mibi nec –quequin chido chushcapondash.

<sup>10</sup> Adsho tantiashumbien Esusën: –¿Atotsieshun chido chushcai? Ëbi bëdamboen tantiaquin ëbi ismequin bëdamboen nashunebique. Chushcainda. <sup>11</sup> Mimbi chuiboed piucquid nibëdquido ënëdenquo yec mibëdi tabadendac. Ëbien mibëdi tabadenquo yanendac. <sup>12</sup> Ëbi unës uashun chococate tantiachimboen machiuinoshibique. Chushcainda. <sup>13</sup> Ëmbi chiaid chuibeniacnoshon nëid chidon ëbi machiuimboed chiendac –quepondash Esus abëd icquido chiec.

### *Udasën Esus bedmenun piucquid bedaid* (*Mad 14.10-11; Duc 22.3-6*)

<sup>14</sup> Adnubien Udas Iscadiote caid Esusbëd icboedi Esus chieshënuo chuiquid dapabo chiec nidpac caondash. <sup>15</sup> Nidshumbic chuituidpac caondash. –Utsibo ismenquo icquin mibiuidtsëqui Esus bedmenu. ¿Tetsi piucquid ëbi menetsia? –caquien badedi

pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. <sup>16</sup> Meniac bedanec nidec: —¿Mitsishunquiemi utsibo ismenquo icquin Esus bedmepeba? —quepanëdash Udas. Adashic Esusbëdi tabadoaic chopondash.

*Unësnush abëd icquidobëd Esus pec tabadaid*  
(1Cod 11.23-26)

<sup>17</sup> Adnubien Esusbëd icquidon: —Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquo icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: <sup>18</sup> —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid <sup>19</sup> —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

<sup>20</sup> Inchëshëmbi abëd icquido 12tedbëd samëdquin Esusën pepondash. <sup>21</sup> Pec samëdquin Esusën chuipondash. —Tantia. Mibi chuinu. Èbi chieshënquido ëbi bedmequid abentsëc nëmbobi iquec —quesho tantiashun <sup>22</sup> unësquo yanshun abentsëcshun abentsëcshunquien Esus chuipondash abëd icquidon. —¿Èbida cai, Icho? —quequin abi chuishobien <sup>23</sup> Esusën: —Èbëdtan pete codocaid ënë punquid ëbi bedmequid nendac. <sup>24</sup> Èbi Nuquin Papan chiaid dada uamepampicpadquid matsesmiaid yec unësendabi. Padnuen ëbi bedmequid comapenen cuidtequidquo nec. Anin aid tishenquo icpatecnëdan. Cuidac natiaquiendac —quepondash Udas caic.

<sup>25</sup> Adoaquien Udasën abi bedmequidënquo: —¿Èbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

<sup>26</sup> Adshumbic Esusën pete sananquin: —Mimbi pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacimboen ëbi mëyanquin unës uaindac. Èbi unës uate tantiaquin nëid peta —cac pebededtsëccondambi. <sup>27</sup> Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsë-pictsen acbampondambi. <sup>28</sup> Aid actequid acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësendabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquo iquec,” quequin nëid acquin tantiata —capondashi.

<sup>29</sup> Adashic: —Nadquid actequid padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus ëbi chedo chiec. <sup>30</sup> Adashic cuëdënten abentsec cuëdëdash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

*Petedo chieshuidte Esusën chiaid*  
(Mad 14.26-31; Duc 22.31-34; Uan 13.36-38)

<sup>31</sup> Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiacpadec ëbi nianec mibitedi niquendac. Nuquin Papan naden chuipampic. “‘Icho cuesnu,’ canubi aton yuabo niquendac,” quequin Nuquin

Papan dada uamepampicpadec mibitedi adec niquendac. <sup>32</sup> Padnueni unēsash uincuenendac. Adanec mibi cainuec nidaid cuēshē utsi Cadidia caid yacno ēbia nidendabi – quepondash Esus abēd icquido chiec.

<sup>33</sup> Adoquien Petedo: –Mibi cuesnuec cho-chosho isash utsibo dacuēdec niquenuec ēbimboen cuenenquimbo ictsiandac –queshobien <sup>34</sup> Esusēn: –Tantia. Mibi chuinu. Nēid inchēshēmbi cachina bēnē cuēdanabi icnuc: “Ēmbi isacmaidquio aidi nec,” mimbi ēbi caindac. Cachina bēnē cuēdanabi icnuc 3tedec mibi adendac –caquien <sup>35</sup> Petedo: – Pada. Adtiapimboeni iquec. Chieshēmēnquidon: “Esusbēd icquid mibi neque. Mibi cuesunenu,” caqui: “Ēmbi isacmaid neque. Padi,” quenquio iquendabi. Mibēdquiobi unēstsiandabi –Petedo quenubini: –Ai, ēbībic adecbidi ictsiac –quecuededpondabi Esusbēd icquidotedi.

*Quetsemani caid yacnoshon Esusēn Nuquin Papa chiaid  
(Mad 14.32-42; Duc 22.39-46)*

<sup>36</sup> Adanec nidequi cuēte dadpen nitsinacno Quetsemani yacno nidpondash. Auēshquio Esus nadpondash. –Ambobi tabadta. Udicsēc nidshun Nuquin Papa chuitanu – quepondash.

<sup>37</sup> Adashic Petedobēdta Sebedeyon mado daēd buanec nidpondash. Udicsēc nidequi unēsquio yanec shubiantiadtsēcquio yampac caondash. <sup>38</sup> Adshumbic Petedo chiec: –“Matsestedī icsaid ēmbi bedshunsho isun Nuquin Papan ēbi istiapimbo yanendac,” quīash unēsquio iquebi. Ēbi yacpadec ushenquio yec nēmbobi isec tabadta –quianec <sup>39</sup> udicsēc nidash nidaidēn uebudshun Nuquin Papa chuipac caondash. –¿Ada mimbi ēbi unēs uamenquio icpatsia, Papa? Mimbi: “Ai, mibi unēs uamenquio iquembi,” cac bēdambo ictsiabi. Mimbi: “Nēbi mibi unēs uamenu,” cac mimbi tantiacpadequi unēsēndabi –quepac caondash Esus Nuquin Papa chiec.

<sup>40</sup> Adtanec choshon isquien Petedo chedo ushpec: –Ushenquio yec isequi tabadta –caboqui. –¿Yuec-yuecpactsec ushenquio icquin istiapimboda icco? <sup>41</sup> “Satanasēn icsamenushe,” quesun ushenquio icquin Nuquin Papa chuita. “Ushenquio iquebi,” queboedobi ushcas mēmunenquio yec mibi ushpec –capac caondash Esusēn Petedo chedo chuiquin.

<sup>42</sup> Adtanec padpidec nidoashun Nuquin Papa chuioaic: –Ēbi unēs uametiadquio icquin ēbi unēs uameta, Papa. Ēbi unēs uametiapimbo icquin mimbi ēbi unēs uamenquio ictsiac. Mimbi tantiacpadomboen nata, Papa –quetanec <sup>43</sup> choaquin isquien Petedo chedo ushoaic ushcas mēmuntiapimbo yec.

<sup>44</sup> Adsho istanec nidoashun ambi chuibocpadomboembidi Esusēn Nuquin Papa chuitanepac caondash tedesteden.

<sup>45</sup> Adtanec choaquin ushash uesho istuidoashun: –¿Ushecta ue? Nēbimbobi ēbi unēs uamenuen ēbēd icboedēmbi icsambo icquido ēbi bedmeque. <sup>46</sup> Nidnu nid. Is. Ēbi bedmenuc ēbi bedmequid choeque –quepondash Esus Udas chosho isash.

*Abi chieshēnquidon Esus bedaid  
(Mad 14.43-50; Duc 22.47-53; Uan 18.2-11)*

<sup>47</sup> Adnubien Udasēn Esusbēd icboedēn bedtanac matses dadpen cuesantiadpambo yec chēshtebēdta cuate sanambededtsēcquiec cho-chopondash. Nēish yua abided unēs uaquido chuiquid dapabobēdtan con matses tsusiobon: –Bedtan –cac cho-chopondash.

<sup>48</sup> Ambi bedtanaidobēd cho-choquimbien Udasēn: –“Nēid Esus nec,” quequin adoendambi –abi quiacpadembi <sup>49</sup> Esus tansudcatuidpondash: –Chobi, Icho –quequin.

<sup>50</sup> Adoquien Esusēn: –Ēmbi tantiaboedquio mibi nec. Ēmbi adoboedēnquiobi mimbi tantiacpadomboen nata –queshobien cho-choquidon Esus bedtuidpondash. Aden bedshun: –Cuidmenun chuiquid dapa yacno mibi buanu –capondash.

<sup>51</sup> Aden Esus bedshobien abëd icquidën abi tsiusudaïd chështe chictanquin chuiquid dapan yua pateshunepondash. <sup>52</sup> Adoshobien Esusën: –Padi. Chën. Min chështe tsiusudoata. Cuesanquid icsho adembidi cuidnushe. <sup>53</sup> ¿Tantienquioda ique? Èmbi chiac con Pan ambi abi yacnoshon uaido mayan bédabo dadpenquioshë ëbi cudasmenuen chometsiash. <sup>54</sup> Nuquin Papan aden ëbi cudasmiac bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? –capondash pateshunianquid chuiquin.

<sup>55</sup> Adashic abi bedquido chiec: –¿Atotsi quenuec chështebédta cuate sanambéd-edsëcquiec ëbi bednuec cho? ¿Nuqui chuiquid dapan chiaïd niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidën badiadquidënquien Nuquin Papa tabadte shubu uashunaïd daquënë uaidën puduedshun chuideneshobi ma mimbi ëbi bedenquio icboc. <sup>56</sup> Padenquio icboedombi Nuquin Papan tantiapadënquiobi mimbi ëbi bedec. Èbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec –quequin Esusën chuinubini niquepondac: –Cuenenquio ictsiabi –queboedi.

*Caipas caïd yacno Esus buanaïd*

*(Mad 14.53-65; Duc 22.54-55, 63-71; Uan 18.12-14, 19-24)*

<sup>57</sup> Adnubien chuiquid dapambo Caipas cuëmédquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash. <sup>58</sup> Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaïdo sondadobëdi tsadtuidpac caondash Petedo.

<sup>59</sup> Adnubien cho-choboedo tsusio dapabo: –Esus unës uamenuen: “Esus icsasho isombi,” quequin muaquidon chuïsho tantianuna –queshun chomiac muaquido dadpenshun: –Esusën icsamboen nasho isombi –quequin chuipac caondash. <sup>60</sup> Aden Esusën naïd muaquin chuiquin Esus unës uatiadquio icquid chiambo icpac caondash. Adnubien muaquid daëdshun chuituidpac caondash. <sup>61</sup> –Nuquin Papa tabadte shubu uashunaïd caic: “Uesquin chic-chictanquin padpiden nacnenoaquin daëdec ushqin nainendambi,” ma Esus quepondac –quepac caondash.

<sup>62</sup> Adshobien chuiquid dapabo chuiquidën Esus chuiquin: –¿Atotsi quenuec ado? ¿Atotsi nëidën chiec? –caquien <sup>63</sup> Esusën ëcbedenquio icpac caondash. Adshobien chuiquid dapan: –Abimbo chuita. “Nuquin Papan cuidchitoshe,” quesahun abimbo cata. ¿Nuquin Papan chomiaïdquio aton Madombobida mibi nepe? –caquien <sup>64</sup> Esusën: –Ai, mimbi chiaïdquio nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac –quepac caondash Esus.

<sup>65</sup> Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. –¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naïd utsi chuïsho tantiatiapimbo iquebi. Ambibi Nuquin Papa muauasho tantiashun <sup>66</sup> ¿Atotsi natiadquio ique? –caquien abëdtan chuiquid utsibo: –Adquid cuidquid quedeneque. Unës uamequimbien ictiad –quecuedepac caondash.

<sup>67</sup> Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. <sup>68</sup> Bëcuestanquin: –“Nuquin Papan madombobien nec,” canu. En chui. Tantanu. ¿Tsundan mibi naoshe? –cabededtsëcquien mamënshumpac caondash Esus.

*Esus caic: Ĕmbi isacmaid nec, quequin Petedon chiaid  
(Mad 14.66-72; Duc 22.56-62; Uan 18.15-18, 25-27)*

<sup>69</sup> Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbéd ma mibi icpaboc —caquien: <sup>70</sup> —Tantiadenquo icnuc mimbi chiec. Ĕmbi isacmaidquo mimbi chiec —quec Petedo muaic taëpac caondash.

<sup>71</sup> Adanec daquënë uaidën puduedte shëcuë dayun nidash niduntuidpac caondash.

Adshobien chido yua utsin: —Nasaded yacnocquid Esusbéd ma nëid icpaboc —caquien <sup>72</sup> Petedo: —Ma Ĕmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

<sup>73</sup> Adash yuec-yuecpactsëcshumbien ambo tabadquidontsen Petedo chuipac caondash. —Aidbéd icquidien mibi nec. Cadidia yacnocquid onquiacimboec ma mibi onquepayoc —quesho tantiash <sup>74</sup> Petedo: —Comapenen Nuquin Papan cuidchitoshe muasho. Abimbo caimbi. Ma Ĕmbi isacmaidquo neyoc —queoapac caondash.

Adec 3tedec Petedo muanubien cachina bënë cuëdampac caondash. <sup>75</sup> Adsho tantiashun Petedon Esusën chuiboedquo tantiactampac caondash. —Cachina bënë cuëdanabi icnuc mimbi ëbi caic: “Ĕmbi isacmaid nec,” capendac tedesteden —quequin Esusën chuiboedquo tantiactanec umanuc puduenanec nidec Esus muauabosh natiaic shubinidpac caondash.

## 27

*Pidato caid yacno*

*Esus buanaid  
(Mad 15.1; Duc 23.1-2; Uan 18.28-32)*

<sup>1</sup> Adnubien chuiquid dapabo aton tsusio utsibobëdi Esus isec ushenquo badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —qeshun <sup>2</sup> podo cataneshun ancanquid Pidato cuëmëdquid ismenuen Esus buampac caondash.

*Esus bedmequid Udas tëtaniadaid*

<sup>3</sup> Adnubien Udas Esus bedmeboed: —Unës uamechitembien iquec. Unës uameti-apimbo iquebi. Ĕmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash. <sup>4</sup> Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. <sup>5</sup> Adoquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash tëtaniadpac caondash Udas.

<sup>6</sup> Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. <sup>7</sup> Matsu nacnenquidën tied bedquin nëid menenuna. Nuquin matsespenquo isedquido unësacsho ambo chococanun aid tied bednuna —qeshun piucquid meniac caondash. <sup>8</sup> Aidon bedacsho isun nëbi aid tied cuënquin nadopec. —Unës uamequidën bedaid tied nec —capec. <sup>9</sup> Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaïdbon piucquid shocoshëmpi 30ted meneuidaid bedoashun <sup>10</sup> matsu nacnenquidën tied bedquin meneoapondash,’ quequin Nuquin Papan chiaïd dada uaombi,” quepampic Edemias.

*Pidato caidën Esus chuimiaïd  
(Mad 15.2-5; Duc 23.3-5; Uan 18.33-38)*



<sup>11</sup> Adnubien isadaidbo yuaquid ancanquid Pidaton Esus bëacsho chuipac caondash. — ¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. <sup>12</sup> Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquio icpac caondash.

<sup>13</sup> Adshobien Pidaton Esus padpiden chuioaquin: —Mibi icsaid dadpen chuipac. ¿Tantienquioda ique? ¿Ëcbedantiapimboda ique? —caquien <sup>14</sup> ëcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iquembi —quepac caondash Pidato.

*Esus unës ua, quequin chiaid*  
(*Mad 15.6-15; Duc 23.13-25; Uan 18.38-19.16*)

<sup>15</sup> Nuquin Papan isadaidbo unës uainquio icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedenec. Pidaton: — ¿Tsutsi abentsëquimbi cuemepe? —cac isadaidbon chiacpadquid abentsëc cuemedenec.

<sup>16</sup> Esus bëabi icnuc uimanëmënquidquio Badabas cuëmëdquid nauedpac caondash.

<sup>17</sup> Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. <sup>18</sup> — Esus chieshënquidon: “Nuqui padenquio yanuc nuqui dëniaquec Esus chuiquid dapa yanushe,” queshun Esus bëaccosh. Nëmbo tabadquidon: “Esusquio cueme,” capashuni —quequin tantiaquin aden chuipanëdash Pidaton.

<sup>19</sup> Adashic matses icsaido cuidte chuinuec tsadte dapan abucquio tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “ ‘Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

<sup>20</sup> Adnubien Esus chieshënquido tsusiobon ambo tabadquido chuibudpondash. — Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

<sup>21</sup> Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. <sup>22</sup> Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

<sup>23</sup> Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiec cuëdec: —Cuesten dectanquin unës ua —quecuededpondash.

<sup>24</sup> Adsho —Padi icnuna —caqui niacbidanquiec adequi unës uate bunquiec cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uametiapiambo iquebi. Nëid unës uamete bunec mibien cuidadtequidombo nendac. Ëmbien adotiapiambo iquec. Mëpamëdec bëchish ucuadachimboec mimbi icsamiaid ucudebi —quiash mëpamëdquin ismepondash Pidaton. <sup>25</sup> Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

<sup>26</sup> Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

*Esus mamënshunaid*  
(*Mad 15.16-20; Uan 19.2-3*)

<sup>27</sup> Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamënshumbedepac

caondash unës uanumbi. <sup>28</sup> Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin <sup>29</sup> mauete pinchucpinchucpambo icnuc nacnenaid mauemepac caondash. Adshumbic aton matses chuiquid dapan sananacbimboen sananuc abiucshun cuate sanamepac caondash. Adshumbic aton matses chuiquid dapa ismiacbimboen mamënshunquin: —Is. Isadaidbo chuiquid dapambo neque —qeshun danëshën sebudquin Esus ismepac caondash. <sup>30</sup> Adshumbic dacuishtucatanquin ambi cuate sanameboed bedshuntanquin aidëmbi matombudnepak caondash. <sup>31</sup> Aden mamënshuntanquin ambi dasiuimboed chictanquin aton dashcutebidi dasiuinoapac caondash. Adoshon: —Ma unësnequin cuestas dectanec nidnu. Nid —quequin Esus buampac caondash.

*Esus cuestas dectanaid*  
(*Mad 15.21-32; Duc 23.26-43; Uan 19.17-27*)

<sup>32</sup> Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash. <sup>33</sup> Adobidanec nidec macuësh dapa yacno matses mapi canitebimboec isadquid Codocota caid yacno chopondash.

<sup>34</sup> Choshombien sondadon uba chinaid actequid paëmbo dauë nēcushaid Esus meneuidpondash. —Në. Ac —cac pictsëc tantanec: —Padi —quepondash aquenquio yec. <sup>35</sup> Adshobien cuate napotiaid bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tēchun sandoshon cadotanequin dada uatempi puduemiaid isbanquin Esusën dashcute bedbampondash. <sup>36</sup> Adash: —Esus unëso isnu —quec sondado tabadcuededpondash.

<sup>37</sup> Adshumbic: —“Nadquid icsho cuidquin unës uac,” quequin ma isquidon tantianu —qeshun cuate cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. <sup>38</sup> Ampequid daëd cuestas ëquë dectambudcuenquin dectantanquin nënantanquio Esus dectampondash.

<sup>39</sup> Adshobien podqued cuëmanquio Esus diadsho isbidanequin chieshënquin chuipondash. <sup>40</sup> —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquio yec auëshquiobi bud —cabidanepondash. <sup>41</sup> Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënshunec nadpondash. <sup>42</sup> —Utsibo ismenuembien comapenen tantiaquin matses bēdamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. <sup>43</sup> “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquio icsho isnu —quepondash tsusiobo. <sup>44</sup> Adnubien abēdta cuestas dectamboedon ampequidontsen Esus mamënshumpondash.

*Esus unësaid*  
(*Mad 15.33-41; Duc 23.44-49; Uan 19.28-30*)

<sup>45</sup> Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë budambi ushëmbo yanoapondash. <sup>46</sup> Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bēdamboen isenquio yano, Papa Edoen? —quec adondash.

<sup>47</sup> Adec cuëdsho tantiaish isquido nadpondash. —Edias yampid cuëchitequien nec —quiampondash. <sup>48</sup> Adnubien Esus isec tabadquid abentsëc titinquianec nidshun shapu-shapupactsëcquid bedtampondash. Bedtanshumbic actequid mucacquid

anidtsēcquidën shapu-shapupactsēcquid punshun cuate dēdectanshun abuc sananec: — Chishmenu — queuidpondash. <sup>49</sup> Adnubien abi isquido: — Padi. Nuquin tsusedpa Edias yampid choshon budmesho isnu — quepondash.

<sup>50</sup> Adnubien padpidec buēdanquiecuēdtanec Esus unēspondash. <sup>51</sup> Esus unēsnuubi Nuquin Papa tabadte shubu uashunaid yacnuësh: — “Quēnē uquēducquidën Nuquin Papa tabadtembo nec,” caidën utsi puduednushe — qeshun dashcute ēnapen icquid dectanaid abucueësh canchedbudcuenac caondash abitiombi. Nuquin Papan ambi bēdamboen iste tantiamenuen nanēdash. Adnubien nidaid uēdēquequidën cuēnote dapa dadpen cuëshēdbudnepac caondash. <sup>52</sup> Adec unēsaid nauedaid shēcuē bētashte cuēnote dapambo cuëshēdnubien Nuquin Papa tantiaquido ēnden unēsaido abentse-abentsec uincuenanec chopac caondash. <sup>53</sup> Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

<sup>54</sup> Nidaid uēdēquenuc dacuēdampambo icscho isashien: — Esus unēsō isnu — quiash tabadquido sondado chedo abi chuiquidbēdi dacuēdtanec: — Ma Nuquin Papan Madombobi nepayoc — quepac caondash.

<sup>55</sup> Adnubien chidobo Cadidia yacnuësh Esusbēd choquin abi codocashumboedo Esus unēsō isnuec ancuenshun isec tabadpac caondash. <sup>56</sup> Nēidted icpac caondash. Nēidic Madia Mactada yacnuësh choquid. Nēidic Madia utsi Acobon tita. Aid Ose cuēmēdquidën titabidi niosh. Nēidic Sebedeyon chido Uanēn tita. Aid Acobo cuēmēdquidën titabidi niosh. Aidedi uanoshon isbededec tabadpac caondash.

*Esus chococaid*  
(*Mad 15.42-47; Duc 23.50-56; Uan 19.38-42*)

<sup>57</sup> Adnubien inchēshbudtsēqui aton na dadpen dayun uaquid shubu dadpen icquid Adimateya caid yacnocquid Ose caid: — Esus tantiaquid nebi — quianec Esus bedec chopac caondash. <sup>58</sup> Choshombic chuiquid dapa Pidato caid chuituidpac caondash. — Esus bednuec chobi — cac aton yua chuiquin: — Ma buanu. Bedmetan — capac caondash Pidaton. <sup>59</sup> Aden bedtanshun Osen Esus dashcute bēchish nibēdquidënquo nuamboshē icnuc datanedonepac caondash. <sup>60</sup> Adotanquimbic nidaid cuēnoteuidpambo icquid macuësh tsimpiduc shēcuē uaboed ambi: — Èbi unēsacsho nauedte nendac — caidēmbi Esus nauedpac caondash Osen. Adotanquimbic cuēnote dapabidi bētashte uaid bincumbēshun bētimpac caondash. Adotanec nidpac caondash Ose. <sup>61</sup> Adnubien Madia utsibēd Mactada yacnuësh choquid Osen Esus nauedsho isbosh ambobi tsadpac caondash.

*Esus nauedaid isec sondado tabadaid*

<sup>62</sup> Isadaidbon obeca bacuē unēs uacpadën Esus unēs uamiash abentsec ushashi chonoadtemaid ushēmbi Esus chieshēnquido Pidato caid chiec nidpac caondash. Padis-eyobobēdi nidshun chuiquid dapabon Pidato chuituidpac caondash. <sup>63</sup> — Esus nadpadenec. “Unēsash daēdec ushash uincuenendabi,” quec muapadeneque. <sup>64</sup> Daēdec ushquin min sondado Esus nauedaid cudasmeta. Esusbēd icboedon chicshun buanushe. Aden buanash: “Uincuenaccosh,” quec muanushe. Unēsabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshē ictsiashe. Min sondado: “Cudasta,” quequin chuita — capac caondash Esus chieshēnquidon. <sup>65</sup> Adoaquien Pidaton: — Ai, con sondado buantan. Aden buanshun: “Unēsaid nauedaid cudasec databēdta,” cata — capac caondash. <sup>66</sup> Adoaquien isadaidbo tsusiobon sondado buanshun cuēnote dapa bētashaid bucun bēbitaccapac caondash. — Bēbitaccaid isash: “Chuiquid dapan bēbitaccamiaid nec. Cuidnushe. Esus chictiapimbo iquebi,” ma quenu — qeshun bucun bēbitaccapac caondash. Adoshon: — Beduanushe. Isquiecuēdtanec tabadta — capac caondash sondado chedo chuiquin.

## 28

*Esus uincuenaid**(Mad 16.1-8; Duc 24.1-12; Uan 20.1-10)*

<sup>1</sup> Esus unēsbon abentsec ushash abi chonoadtemaidētsen abentsecbidi ushash dominco badiadnuc chidobo Esus nauedshun bētimboed isec tabadnuec padpidec choapac caondash. Mactada yacnuēsh choquid Madia utsibēd isec choapac caondash. <sup>2</sup> Choash isec tabadnubi nidaid uēdēquiampac caondash. Adnubien Nuquin Papan abi yacnoshon uaid mayan bēda abucuēsh budtanquin cuēnote dapa bētashaid shēcbempac caondash. Adtanec cuēnoten tsadtopac caondash. <sup>3</sup> Mayan bēda yec abu bed-bedquiacbimboec ushēmboeshē bēchamauanquiec icpac caondash. Aton dashcute adquiobidi bēchish nibēdquiec ushumboshē icpac caondash. <sup>4</sup> Adec dacuēdampambo icsho isashien unēsaid cudasquido sondado dacuēdtanec uēdēquec tantiadempambo yec padishbudnepac caondash abitedi.

<sup>5</sup> Adnubien mayan bēdan Madia chedo chuipac caondash. —Dacuēdenda. Cuesten dectanquin unēs uaboed Esus isnuec mibi tabadec. <sup>6</sup> Nibēdec. Nidosh. Ambi chuibocpadequi uincuenash nidosh. Abi uebocono en isec cho —cac chidobon anisnubien padpidec onquequin chuiopac caondash. <sup>7</sup> —Mimbi isboed Esusbēd icboedo chiec nid. Badedquio nidshun naden chuita. “Unēsboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien <sup>8</sup> auēshquiobi chidobo dacuēdboedi cuishonquec titinquianec nidanepac caondash.

<sup>9</sup> Tinquianec nidaneshobien Esusēnquiotsen bēquedpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenuen danēshēn sebudquin taē uidēn uapac caondash. <sup>10</sup> Adoquien Esusēn: —Dacuēdenda. Con utsibo ēbēd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

*Esus uincuensho isun sondadon muauaid*

<sup>11</sup> Madia nidnubien Esus nauedaïd isquido sondado abi chomeboedo isadaïdbo chuiquido chiec chopac caondash. Mayan bēda chonoc Esus uincuemboed chuituidpac caondash.

<sup>12</sup> Adoquien isadaïdbo chuiquidon aton chuiquid utsibobēd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquio menepac caondash. <sup>13</sup> —Mimbi isboedquio chienquio icquin naden chuita. “Ēbi chedo ushtoan abēd icboedon Esus ampequin beduanaccosh,” quequin utsibo chuita. <sup>14</sup> Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —queshun <sup>15</sup> piucquid meniac bedanec nidec isadaïdbo chuiquidon chiacpadec muapac caondash sondado. Adembidi nēbi isadaïdbo dadpenshun: “Esus ampiac,” quequin chuioaic.

*Ēbi chuibeneta, quequin Esusēn chiaïd**(Mad 16.14-18; Duc 24.36-49; Uan 20.19-23)*

<sup>16</sup> Adnubini Esusbēd icboedo 11tedi yec Esusēn chiacnombo Cadidia yacno nidec macuēsh dapa yacno nidanepondac. <sup>17</sup> Macuēsh dapa yacno nidquimbi Esus istuidpondambi. Istuidshumbic: —Con Icho neque. Ismenu —queshun danēshēn sebudpondambi. Utsibombien: —¿Con Icbombobida nepeba? —capondash.

<sup>18</sup> Adsho isun Esusēn anoentsēqui choquin chuituidpondash. —Ēbipadquid utsi nibēdec. Nuquin Papan uaido abitedi con na nec. Abitedishun Icbombo icquin abitedimbo namequidquio nebique. Mibitsen namenu. <sup>19</sup> Nidaïd utsi-utsiec yacno nidshun ēbi tantiaquido icmenuen matses abitedi ēmbi chiaïd chuibeneta. Adoac ēbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid

nec. Nēidbēd Nuquin Papan Mayan tabadeque. Utsibo ismenu,” quetanquin aden acten mentobeneta. <sup>20</sup> Mimbi mentoaido chuiban. “Nuquin Icbon chiacpadec bēdamboec tabadnuna,” quequin ěmbi chuiboedtedi chuiban. Mimbi adosho isash mibēd iquendabi. Nidaid abitedi nibēdanabi icnuc mibi chedo nianenquio iquendambi. Adembidi ěbi tantiaquidotedi niantiapimbo iquebi –quepondash Esus ěnquimbi chiec.



## MADCOSËN DADA UAID

*Bëyuc choshon Uanën Esus chote chiaid*

*(Mat 3.1-12; Duc 3.1-18; Uan 1.19-28)*

<sup>1</sup> Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

<sup>2</sup> Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi.

Aidën chuibanac ambi tantiaid icsa ënshun mibi cainquidombo iquendac, mado.

<sup>3</sup> Shubu nibëdacnoshon comapenec onquequin mibi chotequid aidën chuibanendac naden:

Nuquin Icbo choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

<sup>4</sup> Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquio icscho mibi cuidentquio yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën. <sup>5</sup> Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Chochoash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. <sup>6</sup> Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. <sup>7</sup> Aidëmbi naden chuibampondash: —Con tsyuecquid choendac. Aidi nadatiambocquin naquidquio nendac. Aidi bëdamboshëcquid icnuc ëbi icsaquid icscho jatotsieshun aid choec quequin chuiquidquio Nuquin Papan icmioshi? quec tsadebi. <sup>8</sup> Mibi acten mentoquid nebi; aidien abipadquiocquid aton Mayan menianquidquio nendac —quepondash Uan.

*Esus acten mentoaid*

*(Mat 3.13-17; Duc 3.21-22)*

<sup>9</sup> Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. <sup>10</sup> Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemboec Esusbëd icnuec budpondash. <sup>11</sup> Aden budmetanec ambi bëcadoacnoëshi: —Mibentsëcquiobi icscho ëmbi tantiaidquio mibi nec, mado. Ëmbi bëdamboen isaidquio mibi nec —quepondash aton Papa Esus chiec.

*Esus Nuquin Papan chiaid niacmenuequin Satanasën tanaid*

*(Mat 4.1-11; Duc 4.1-13)*

<sup>12</sup> Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. <sup>13</sup> Ambo tsadquimbi ushë abentsëc nidmec utsi choaid abutometsëcquiec tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon

caid chedo icpondash. Ambo tsadshobi ambi uaido mayan bédabon cho-choshon nashumbededpondash.

*Cadidia yacnoshon tauamboen chuibanaid*  
(Mat 4.12-17; Duc 4.14-15)

<sup>14</sup> Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. <sup>15</sup> —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata —quepondash Esus comapenec onquec.

*Ëbëd iquec cho Esusën abia caido*  
(Mat 4.18-22; Duc 5.8-11)

<sup>16</sup> Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. <sup>17</sup> Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. <sup>18</sup> Adsho tantiash nëshaid abëd icquid menianec abi chuiquidbëd nidanepondash.

<sup>19</sup> Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. <sup>20</sup> Aden nacnesho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

*Mayan icsa Esusën dapuduemiaid*  
(Duc 4.33-37)

<sup>21</sup> Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. <sup>22</sup> Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. <sup>23</sup> Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: <sup>24</sup> —Esus Nasaded yacnoësh choquid mibëd icquidpenquio nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. <sup>25</sup> Adoquien: —Otaquio tabad —quetanquin: —Dapuduen —capondash Esusën. <sup>26</sup> Adoac comapenec abi dapuduedaid uëdëquenuc sidquianec dapuduempundash.

<sup>27</sup> Adsho isash: —¿Abimbodambi ispo? ¿Mitsipadquidquio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. <sup>28</sup> Adec onquecuededash auëshquio nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

*Simonën nachi bëdamiaid*  
(Mat 8.14-15; Duc 4.38-39)

<sup>29</sup> Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash.

<sup>30</sup> Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin.

<sup>31</sup> Aden chiaquien Simonën nachi yacnombo choshon Esusën mëdinquin uëtsëndoac

abi chumbo yaid badedquoio bēdampondash. Adec bēdanash nidtoshon codocashun abi choquidtedi pemebampondash Simonën nachin.

*Esusën dadpen bēdamiaid*  
(Mat 8.16-17; Duc 4.40-41)

<sup>32</sup> Adnubien inchēshbudtsēqui Capednaun caid yacnocquidēn daicsaidtedi bē-bēpondash. Adembidi mayan icsa dapuduedaidtedi bē-bēpondash. <sup>33</sup> Bē-bēash Simonën shubu shēcuē cuēmano puduedabi tabadcuededpondash. <sup>34</sup> Adsho isun daicsaidtedi Esusën bēdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsēcquiobi mibi nec quequin chuinushe qeshun oncamenquiocpondash.

*Shubu nibēdacno Nuquin Papabēd onque Esus onquiaid*  
(Duc 4.43-44)

<sup>35</sup> Adashic badiadte anoentsēqui yanubi isucunanec puduanec shubu nibēdacno Esus nidpondash. Nidec tabadtuidshun Nuquin Papabēd onquequin chuibampondash. <sup>36</sup> Esus nidacshobi isucunshun Petedo Simombēd icquidēn nibēnampondash. <sup>37</sup> Aden nibēnquin istuidashi: —Mibi isec cho-choquidtedishun mibi nibēmbededec —quepondash Esus caic.

<sup>38</sup> Adoaquien Esus: —Capucuenequin utsibotsen Nuquin Papan shubu abentsēquēn yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. <sup>39</sup> Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsēquēn yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuoapondash. Adembidi mayan icsa dapuduemeoapondash.

*Nami mishac tantiadenquiocquid bēdamiaid*  
(Mat 8.2-4; Duc 5.12-13)

<sup>40</sup> Aden Esusën chuibanubien daushachimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ēbi bēdame —quequin Esus chiec comapenec cuēdpondash.

<sup>41</sup> Adec cuēdshobi nēid isash unēsquoio iquebi quequin ēquēducshun tantiaquin mishec Esus: —Mibi bēdamembique. Bēdambo icta <sup>42</sup> —quenubi daicsaid nibēdquoio yec bēdampondash.

<sup>43</sup> Aden bēdametanquin nidmepondash: —Nidec nid. <sup>44</sup> Nidquimbi, Esusën bēdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbicquid daēd meneta Moisesën chiapadomboen ma anocquidēn napanueshun. Aden meniac abentsēc cuesuneshun utsi cuesunenu quenquiocquin cuesuniaidēn intac pun-tanequin intac mibi daseccashun dēbimbicquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash —quepondash Esus ambi bēdameboed chiec. <sup>45</sup> Adsho tantiaboshombi niacbidanquin Esusën bēdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiaimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen cho-chopondash.

## 2

### *Cuembo yec uishquiaid Esusën bēdamiaid (Mat 9.2-8; Duc 5.18-26)*

<sup>1</sup> Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. <sup>2</sup> Dadpen cho-choash puduedash tsucus-tsucustsēcquo yec tabadnubi adecbidi shēcuē cuēmano tabadpondash. Adec tabadsho isun Esusën Nuquin Papa yacno shubu abentsēquēn tabadte iquec quequin chuibampondash. <sup>3</sup> Adnubien cuembo yec uishquiaid bēc dada daēd-daēdquiec 4ted cho-chopondash. <sup>4</sup> Cho-choshon matses tsucus-tsucustsēcquo yec tabadsho isun dectatoshon macano nacnenaid chic-chictanquin Esusën dayunquo uishquiaid imbudpondash. <sup>5</sup> Aton dayunquo imbudsho isun Esusën bēdamec quequin abi imbudboedēn tantiec quequin ambibi tantiapondash Esusën. Adashic: —Mado, mibi cuidenquo yec mibi icsaid bēpiscudobi —quepondash Esus.

<sup>6</sup> Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. <sup>7</sup> ¿Atotsi quiash adec Esus onquepeque? Tantianu. Nuquin Papa icsamboen chuiquidien aid nechitec. Nuquin Papauidi matses cuidenquo yec abi icsaid bēpiscudquid nec, quetsēcquiec tabadpondash.

<sup>8</sup> Aidon tantiaid tantiec nadpondash Esus: —¿Atotsieshun aden mimbi icsamboen tantiape? <sup>9</sup> ¿Mibi cuidenquo yec mibi icsaid bēpiscudobi quequin ěmbi chiaidquo bēdantequidpenda nedic? Adecbidi, ¿Mibi icsambochoedi mibi bēdanoque. Nidtoшон mibi imbudboed chiadtoshon buanec nid quequin ěmbi chiaid bēdantequidpembidida neoadic? <sup>10</sup> Ai, adquidquibidi nec. Mibi cuidenquo yec mibi icsaid bēpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ěbi tantiamenuequin <sup>11</sup> cuembo yec uishquiaid naden chiembique Tantia. Mibi icsambochoedi mibi bēdamiombique. Nidtoшон mibi imbudboed chiadtoshon buanec nid —capondash Esusën. <sup>12</sup> Adoquien nidtoшон abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsēcquiec onquiash Nuquin Papan naid nec quec cuēdēncuededpondash.

### *Ēbēd iquec cho Esusën Debi caid (Mat 9.9-13; Duc 5.27-32)*

<sup>13</sup> Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanapondash Esusën. <sup>14</sup> Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuēnondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid Debi nepondash. Adshobien: —Ēbēd iquec cho —Esusën cac: —Ai, mibēd nidnu. Nid —quianec badedi Esus tsibananec Debi nidpondash.

<sup>15</sup> Adshumbic Debin shubuno nidshun Esusbēd icquidon pepondash. Ashunquibidi aton na buansho isun piucquid bedshunquid Debipadquidēn utsin-utsinquien pepondash. Ashunquibidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. <sup>16</sup> Aden adquidbēdtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantianu. Ēbi chui —quepondash padiseyobo Esusbēd icquido chiec.

<sup>17</sup> Adsho tantiashien Esus: —¿Dada bédambocquidta dauëchoquidën bédametequid nedic? Padenquo. Daicsaidien dauëchoquidën bédamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbëd icquid mibi iquendac quequin chiesa nebi. Icsaquid nebi queshun mibi icsaid ënta. Aden ënash, ëbëd icquid mibi iquendac quequin chuiquid nebi —quepondash Esus.

*¿Atotsi quiash mibëd icquid buna mëmunesa nec? quiaid  
(Mat 9.14-17; Duc 5.33-39)*

<sup>18</sup> Adnubien abi chuiquid quënën nauedan aid tantiec unësquiocquin Uan acten mentoanquidbëd icquidën buna mëmunubi padiseyobobëd icquidon unësaid tantiec unësquiocquin buna mëmunoapondash. Aden buna mëmunsho isanec nidequi Esus yacno nidash Esusbëd icquidon buna mëmunenquo icsho isash utsibo: —¿Atotsieshun Uambëd icquidon adembidi padiseyobobëd icquidon buna mëmunubi mibëd icquidon buna mëmunenquo icpec? Tântianu. Chui —quepondash.

<sup>19-20</sup> Adoaquien Esus: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquo iquec. Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec.

<sup>21</sup> “Adembidi dashcute shënbëdta chucambocquid bëtuscaisa matses nec. Shënbëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. <sup>22</sup> Adembidi dadpen icquid chodo uashun sandoc. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiacpadec pausudnu queshun mibi icsaid ënacsho isun Nuquin Papan pausunendac —quepondash Esus.

*Chonoadtemaid ushë icbo nebi quiaid  
(Mat 12.1-8; Duc 6.1-5)*

<sup>23</sup> Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusbëd icquidon pepondash. <sup>24</sup> Adshobien: —Mibëd icquido is. Chonoadtemaid ushën chonoadequë. Abi chuiquid mibi iquec ¿atotsi quiash, Padi. Chën, quenquo ique? —quepondash padiseyobo Esus caic.

<sup>25</sup> Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda? <sup>26</sup> Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

<sup>27</sup> Aden chuishumbic naden padiseyobo Esusën chuioapondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. <sup>28</sup> Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënuquido padiseyobo chiec.

### 3

*Mëuesadaid Esusën bëdamiaid  
(Mat 12.9-14; Duc 6.6-11)*



<sup>1</sup> Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi <sup>2</sup> Esus chieshënquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bédamepeque. Nëid badiadën bédamesho isun bedmeshun quënën nauedmenu quetsëcquiec padiseyobo tabadcuededpondash. <sup>3</sup> Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

<sup>4</sup> Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bédamepe? ¿Bédamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

<sup>5</sup> Adoaquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. <sup>6</sup> Adosho isash puduenanec nidquin edodesbo padiseyobon badedquido istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

### *Esus yacno matses dadpen choaid*

<sup>7</sup> Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. <sup>8</sup> Adnubien Esusën nabansho isboedon chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiaash cho-chopondash. <sup>9</sup> Adec cho-choash tsucus-tsucustsëcquio yec tabadquin tsiciatiac nënantanquio tsadacnoëshi catashnushe quiash Esus: —Cano bec cho —quiampondash abëd icquidquico caic. <sup>10</sup> Dadpen bédamiosh cadoshe. Ëbitsen bédanu quequin ambibi tantiaquin Esus mishbededpondash. <sup>11</sup> Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. <sup>12</sup> Adoaquien: —Padi. Aden ëbi chienda —quepondash Esus.

### *Abëd 12ted icquid Esusën tantiamenu caid*

*(Mat 10.1-4; Duc 6.12-16)*

<sup>13</sup> Adashic macuësh dapa yacno nidnushi abëd 12ted icquido chomeshun nadopondash: <sup>14</sup> Ëmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. <sup>15</sup> Adembidi mayan icsa dapuduedaid dapuduemequidbidi mibi icmembi quequin abëd icquido Esusën chuipondash. <sup>16</sup> Ambi tantiamenu caid nëidtedi icpondash: Simon cashumbic Esusën Petedo capondash, <sup>17</sup> utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. <sup>18</sup> Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. <sup>19</sup> Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidtedi Esusën tantiamequin chuiquin ismiaido niondash.

### *Bedtsibu caidën dausunaid Esus nec quiaid*

*(Mat 12.22-32; Duc 11.14-23; 12.10)*

<sup>20</sup> Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquo icpondash. <sup>21</sup> Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

<sup>22</sup> Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënuquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

<sup>23</sup> Adoquien Esus: —Mimbi icsamboen tantieque. Mibi chuibanu. Tantieci tabadta. ¿Mayan icsan icbo ambi dapuduedmiaid dapuduemequidta nepadic? Padenquo. <sup>24</sup> Adquiecbidi shubu icbo abëd icquido cuëshëdmesa nec. <sup>25</sup> Icbon abëd icquido cuëshëdmiash shubu abentsëquën tabadtiapimbo iquendac. <sup>26</sup> Adembidi ambi dapuduedmiaid dapuduemias adquidën icbo ictiapimbo Satanas iquec. Icbo icnuequid abëd icquid puduemesa nec. <sup>27</sup> Dadpeshun icbo Satanas nec. Adquid icquin ambi matses dapuduedmiaid dëniacanquidënuidquid nadatiambocquin nabanquin cuemepec. Adquid icquin ëmbi nac mayan icsa dapuduedaid Satanasën yua icboedi icbombo tantieci bëdambo yanec ëbëd iquendac. <sup>28</sup> Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiasun Nuquin Papan aid pauquendac. <sup>29</sup> Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquo iquendac. Adquid ënëdenquo yec icsaquid nendac —quepondash Esus <sup>30</sup> Satanasën tantiamiac mayan icsa dapudemequid Esus nec abi caquido chieci.

*Esus yacno aton utsibo anibëd choaid*  
(Mat 12.46-50; Duc 8.19-21)

<sup>31</sup> Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieci. <sup>32</sup> Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. <sup>33</sup> Adoquien Esus: —Adquid utsi chuinu. Tantiata. <sup>34</sup> Në tabadquido ëbëd icquido neque. Is —quepondash Esus abëd iccuededquido chieci. <sup>35</sup> Adashic: —Nuquin Papan chiacpadomboen nabanquid ëbëd icquid nec. Adquid buchi caindami. Adquid chido chuchu caindami. Adquid utsi tita caindami —quepondash Esus.

## 4

*Tantiamequin pete ëshë nësecain chiaid*  
(Mat 13.1-9, 18-23; Duc 8.4-15)

<sup>1</sup> Adashic padpidec chian cuëmano nidshun Esusën tantiamequin chuibanoapondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. <sup>2</sup> Adec tabadshobi, matses nadquo iquec quequin tantiaquin tiedën caniquid ëshë Esusën tantiamequin naden chuibampondash: <sup>3</sup> —Tied icbo pete ëshë nësecanuec aton tied yacno nidquid. <sup>4</sup> Adec nësecanuec nidshun pete ëshë nësecac maisec pudun-pudunaid uicchunën chequid. <sup>5</sup> Adnubien nidaid cuënote dadpen samëdacno utsi-utsiec paëdash badedquo dëyucuidtsash <sup>6</sup> tapunenquo iquec ushën shoedec. <sup>7</sup> Adnubien pete ëshë utsi-utsiec nisanquid dëyucacno paëdash dëyucash canidoidtsacsho nisanquidën bëtinaç podo sinash bacuëtiapimbo iquec. <sup>8</sup> Adnubien

nidaid bédambo yacno paëdaid dëyucaid caniaş dadpen pete eşhë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec –quepondash Esus.

<sup>9</sup> Aden chiash: –Ëmbi chuiboed tantianu quiash bédamboen tantiec papuedta –quepondash Esus.

<sup>10</sup> Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: –Mimbi chuibamboed tantianu. Èbi chui –capondash Esus chuiquin.

<sup>11</sup> Adoaquien: –Nuquin Papan shubun tabadquid tantiamendambi utsiboembi, Mibi nadquido iquec, quenquiocquin chuibanoc. <sup>12</sup> Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac”

–quepondash Esus abëd icquido caic.

<sup>13</sup> Aden chiashic: –¿Mimbítsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanşo mimbi tantiapë? Èmbi chuiboed nad iqueque. Tanta. Chuinu. <sup>14</sup> Pete eşhë sequidbimboecquid Nuquin Papan chiaid chuibanquidquo nec. Eşhë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiapë nec. <sup>15</sup> Nidaidën paëdash pete eşhë dëyuçtiapimbocsho uicchunën chiaidbimboec matses utsi-utsiec iquec. Adquid Nuquin Papan chiaid tantiash papuednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec. <sup>16-17</sup> Nidaid cuënote dadpen samëdacno pete eşhë paëdash badedquo dëyucuidtsaş tapunenquio yec uşhën shoedaiddimboec matses utsi-utsiec iquec. Adquid Nuquin Papan chiaid tantiauidash bédambo iquec queboedi ¿Esus tantiaquid nebi quecta icco? quequin utsibon mamënshunac badedquo tantiesa nebi quendac. <sup>18-19</sup> Nisanquid dëyucacno pete eşhë paëdash dëyucaş caniduidtsaşo nisanquidën bëtínac podo sinaş bacuëesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aidtedi tantiaquin Nuquin Papan chiaid tantiesa yanshun bédamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec. <sup>20</sup> Eşhë utsibic nidaid bédambocquidën paëdash dëyucaş caniaş dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bédamboec tabadquin utsi ismequid nec. Aden ismiac Nuquin Papan chiaid tantiaquid daëdpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioşhë yanendac –quepondash Esus abëd icquido tantiamenuec.

*Tabote nënantan nanac chënquiacbimboec ictiad quiaid*

*(Duc 8.16-18)*

<sup>21</sup> Aden chuishumbic abëd icquido naden Esusën chuipondash: –¿Tabote icbon ambi dayun uaboed taboşon tsadte tédion nanshun isaidta nedic? Adembidi ¿Tabote matsun bëtashun isaidta neoadic? Padenquio. Nënantan tabote nanac chënquiacbimboec ismenu quec ictiad. <sup>22</sup> Adquiobidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquiocboedëmbi nëbi ëbi ismec ma con mado chuibanu quequid con Pa nec. <sup>23</sup> Ambi chiaid tantianu qeshun tantiaquiec papuedta –quepondash Esus.

<sup>24</sup> Aden chiash Esus: –Chiaid bëda tantiatequidquo iquec qeshun tantiaquiec papuedquid icta. Aden chiaiduidi tantiec papuedquid abipadquid bédambocquid ambia tantiaquidën Nuquin Papan mibi icmendac. <sup>25</sup> Adquid ambi tantiadoniaidquo iquendac. Aden tantienquioçtsëcquidën tantiaid bëda uesadendac nibëdquiec –quepondash.

*Ambi siaboed ichon isenquiocnoc bacuëec quiaid*

<sup>26</sup> Adec onquequin abëd icquidquo chuishumbic cho-choquidtsen naden Esusën chuipondash: —Nuquin Papan shubu abentsëquën tabadec caidaidquo chuibanu. Tantiata. Nidaid bëdan tiedën caniquid pete ëshë siash <sup>27</sup> tabadquin cainquidquo icbo nec. Dadpen ushquin ambi seboed isenquio yec icbo tabadnubi <sup>28</sup> ambi seboed dëyucash caniec tauitanec bacuëec. <sup>29</sup> Ambi siaid isenquiocnoc canitanec bacuëacsho badedquo bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papuduedquioshon tantiabenec. Adquid isash con shubun puduedquido neque. Bednu quependac Nuquin Papa —quepondash Esus.

*Mostasa caid ëshë chiaid  
(Mat 13.31-35; Duc 13.18-19)*

<sup>30-32</sup> Adec onquequin chuibanashic Esus: —Nadquo Nuquin Papan shubun icquido iqueque. Chuinu. Tantia. Mostasa caid pistsëc ëshëmpi ictëcquid nësecaid dëyucash nuamboshë caniec cuidi-cuidipambo iquec shubu-shubupambo yec podoc. Ambo uicchunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

<sup>33</sup> Aden chuibanashumbic adomboembidi Esusën chuibampondash. Aden chuibanash, aidtedquo tantiapec abibi queshumbic aden chiaid chuiquin ëmpondash Esusën. <sup>34</sup> Aden abited chuibanashumbic abëd icquidoudtsëqui bëdamboen tantiamequin chuipondash.

*Acte tëccoasquiaid ënëd cac ënëdaid  
(Mat 8.23-27; Duc 8.22-25)*

<sup>35</sup> Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquuidtsëqui nidnu. Nid —quiampondash abëd icquido caic. <sup>36</sup> Aden chiac chian cuëman tabadcuededquido niananec badedquo nidquin canon Esus buampondash. Abëd icquidon potenubien cano antabëdtoanquin utsin-utsinquien potepondash. <sup>37</sup> Aden potenubien cunquequid dapan acte tëccoasquequin cano acte uemiaidën mentoadtsempondash Esus tëotadec ushnubi. <sup>38</sup> Adec uec usho: —Cunquequid dapan acte tëccoascaidën nuqui mentoeque. Isucunta, icbo —quequin Esus timpondash.

<sup>39</sup> Aden tinac uëtsëdtoshon Esusën: —Mibi comapenec cunqueque. Ënëd —cac badedquo ënëdpondash. Adembidi: —Mibi comapenec tëccoasqueque. Ënëd —cac badedquo ënëdoapondash acte.

<sup>40</sup> Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic. <sup>41</sup> Adec Esus cuënubi badedquo cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquiondash abëd icquido.

**5***Mayan icsa dadpen dapuduedaid bëdamiaid  
(Mat 8.28-34; Duc 8.26-39)*

<sup>1</sup> Adshumbic acte tëccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. <sup>2</sup> Ambobi choash pudundoshon mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. <sup>3</sup> Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. <sup>4</sup> Abi mëtaniaid shocosh bucu seccuduatanquin tës-tëstenepac caondash. Adosho isac abi tanebocpadquid utsi



nibëdpac caondash. <sup>5</sup> Aidi inchëshën capucuenequi mëyanac bimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

<sup>6</sup> Aidi abi yacno Esus canon chosho isanec titinquianec choash: —¿Tsusio, ada cho? —quiashic: <sup>7</sup> —¿Mibëd icquidtabi nedi? Mimbi namiaidpenquo nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquo iquembi. Abimbo chiembi quequin ëbi chuita —quepondash mayan icsa dapuduedaid Esus chiec. <sup>8</sup> Adec mayan icsa dapuduedaid abi onqueshobien Esusën: —Dapuduen —cashic: <sup>9</sup> —¿Tsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yac bimboec onquec.

<sup>10</sup> Adashic: —Mibi nadatiambocquid cadoque. Èbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

<sup>11</sup> Adnubien macuësh potseshun chancho dadpenhun pec tabadpondash. <sup>12</sup> Aden pec tabadsho isashien: —¿Ada mimbi èbitedi chancho dapuduedmetsia? —quepondash mayan icsa Esus caic.

<sup>13</sup> Adoaquien: —Dada dapuduencuededash chancho dapuduedcuededta —Esusën cac dapuduencuededash acte dapa quiusudacnombo comapenec niquec pudun-pudunec mentoadbudnepondash chancho nibëdquiec.

<sup>14</sup> Adsho isash chancho pemequin isquido chiec nidanepondash. Adec nidquimbi shubu dadpen icquid uano-uanoc tabadquido chuituidac aidotsen isec chochopondash. <sup>15</sup> Esus yacno cho-choson mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquiochoedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquiec tabadcuededpondash. <sup>16</sup> Adec tabadsho isun mayan icsa dapuduedaid bëdamequin chancho dapuduedmesho isboedon cho-choquido tantiamenuen chuibampondash. <sup>17</sup> Aden chuisho tantiaishun cho-choboedon: —Nëmbo tabadenquo yec nidec nid. Mibëd tabadtiapimbo iquebique —capondash comapenen Esus chushcaquin.

<sup>18</sup> Adsho tantiaish cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash.

<sup>19</sup> Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapuduemoed Nuquin Papa tantiaquin chuiban. Nuquin Papan ëbi ad icsho unësquiocquin dapuduemiac quequin chuiban —quepondash Esus. <sup>20</sup> Aden Esusën chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choson Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamiash, quec abibi onquec tabadcuededpondash.

*Nua intac budaid bëdameshun champi unësaid bëdamaid*  
(Mat 9.18-26; Duc 8.40-56)

<sup>21</sup> Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. <sup>22</sup> Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bëdambocquid nec quequin ismenuec Esus taebudshun: <sup>23</sup> —Con champi unëseque. Aid mishquin bëdamec cho —cac <sup>24</sup> Aidobëdi Esus nidpondash.

Adec nidshobi matses dadpenhun tsibanampondash. Tsucus-tsucustsëcquio yec nidquin Esus tsibanampondash. <sup>25</sup> Esus tsibanquidquio chido utsi icpondash. Aid



chido seta 12ted matamec intac budash bēdanenquiocquid icpac caondash. <sup>26</sup> Dauë meniaqui bēdanenquio icpac caondash. Dauëchoquid utsi-utsien piucquid menequin dauë bedshun chequi bēdanenquio yec intac nuambo yampac caondash aton piucquid naimēdnubi. <sup>27</sup> Adec intac icnubi capuquin Esusën nabanaid chuisho tantianec nidquimbi matses dadpeshun tsibananubi aidētsen tsibanampondash. Aden matses dadpeshun tsibananubi ismenquiocquin cachoc choshon Esusën dashcute mishpac caondash. <sup>28</sup> Aden aton dashcuteuidtsēqui mishec bēdampatsiash icmane qeshun mishtsequi bēdampac caondash. <sup>29</sup> Intac bēdanenquiocquid Esus mishec bēdampac caondash. Ēmbi tantiacpadquiequi bēdanobi quequin ambibi tantiapondash.

<sup>30</sup> Adec chido bēdanubien ěmbi nadatiambocquin naoc quequin tantiec amibidi bidinguin isec Esus: —¿Tsuntsimbini mishposh? —quepondash.

<sup>31</sup> Aden chuisho tantiashun abēd icquidēnquio: —Tsucus-tsucustsēcquio matses dadpen iquec, ¿tsuntsimbini mishosh, quecta ique? —capondash.

<sup>32</sup> Adec abēd icquid cuēdnubi onquenquiocquin, ¿Midaquidēnquio mishoshibique? Isnu, abibi quequin matses utsi-utsien bēispondash Esusën. <sup>33</sup> Aden bēisbanubi, ěmbi mishoc quenquio yec bēdamboed uēdēquec choequi mibi nadatiambocquin naquid nec quequin tantiequi Esusën taēno uebudshun abi mishec bēdanaid chuibampondash. <sup>34</sup> Adoquien Esusën: —Champi, mimbibi tantiacpadquiequi mibi bēdanoc. Dada icsambo icboedī nēbi dada bēdambo mibi iqueque. Bēdambo yec nid —capondash chido chuiquin.

<sup>35</sup> Aden nidmenubien Aidon shubun icquid cho-choshon: —Min champi unēsoshe. Tsusio chomenda —capondash Aido chuiquin.

<sup>36</sup> Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ěbi tantiata —quepondash Esus.

<sup>37</sup> Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobēdta Acobo Uan, Acobon utsimbo aidtedi buanec Esus nidpondash. <sup>38</sup> Adec nidequi Aidon shubuno choquin comapenec shubicuededsho tantiatuidpondash. <sup>39</sup> Aden tantiequi puduedash Esus: —¿Atotsi quec comapenec shubicuedede? Champi unēsenquio yec ushachimboec uec nec —quepondash.

<sup>40</sup> Adshobien tantiesa icquin mamēnshumbededpondash. Adoquien aidtedi puduemish champin tita aton papa chedo abēd icquidbēd champi yacno Esus puduedpondash. <sup>41</sup> Ambo choshon mēdante mēdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. <sup>42</sup> Adoac badedquio isucunash nidtoash capupondash. Champi seta 12ted icquid niondash. Aidi bēdansho isun abitedishun, Adopeshenda iquec quequin isbededpondash. <sup>43</sup> Aden champi bēdameshun Esusën: —Ēmbi naboed utsi chienda. Abimbo caimbi. Abentsēcquiobi chienda —capondash. Aden chuitanequi: —Champi peme —quepondash Esus.

## 6

### *Abi icnēdacnoshon Esus chieshēnquido (Mat 13.53-58)*

<sup>1</sup> Auēshquio puduanec nidequi abi icnēdacno Nasaded caid yacno Esus choapondash. Abēdi abēd icquido chopondash. <sup>2</sup> Ambo tabadashic chonoadtemaid ushēn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsēc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidēn ismiac Esusën nadatiambocquin nabampec? —queoapondash.

<sup>3</sup> Adnubien utsi: —Nēmbocquid, cuēte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquieci tabadec onquecuededec chieshcuededpondash.

<sup>4</sup> Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnocquido chiec. <sup>5</sup> Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquio daëdpactsëc icsho mishquin bédamepondash. <sup>6</sup> ¿Atotsi quiash ëmbi chiaid tantiatiapimbo icpec? Adembidi nadatiambocquin nasho istiapimbo icpec quepondash Esus abibi onquec.

*Abëd icquido Esusën nidmiaid*  
(Mat 10.5-42; Duc 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. <sup>7</sup> Adec cuenadquin chuibanecqui abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. <sup>8</sup> Nidquin dadpen mitsana sauedshun buanenda. <sup>9</sup> Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. <sup>10</sup> Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta. <sup>11</sup> Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

<sup>12</sup> Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. <sup>13</sup> Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichiquid ënë dachinquin bédameoapondash Esusën nidmiaidon.

*Uan acten mentoanquid mapi butiaid*  
(Mat 14.1-12; Duc 9.7-9)

<sup>14</sup> Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiaish: —Uan acten mentoanondaïd mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

<sup>15</sup> Adnubien utsibo: —Ediasien nechitec. Nuquin Papan chiampicpadquieci choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

<sup>16</sup> Adnubien Edodes: —Èmbi mapi butemiondaïd, Uan pado, uincuempash icnui —quepac caondash.

<sup>17</sup> Ènden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: <sup>18</sup> —Min utsin chido mimbi bëdaïd natemaïd niosh —queshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpenshun tantianushe quesahun Uan bedmeshun quënën nauedmepac caondash Edodesën. <sup>19</sup> Adoaquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes

caic. <sup>20</sup> Uan bédambocquid Nuquin Papan chomiaidbidi nec queshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëid napeba? Ambi chuibanaid bédambo iquec. Aidën chuisho tantiash bédambo iquebi, abibi queshumbic Edodesën chomedednepac caondash chuisho tantianuen.

<sup>21</sup> Adnubien aton chido bunacpadomboen Uan cuesunemete ushë chonobi naden napac caondash: Aton bënëni abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash.

<sup>22</sup> Aden aidtedi cho-chomiashtab adnubien aton chidon champi puduedpac caondash. Puduedacsho: –Baidata –cac baidapac caondash. Adsho isash: –Bédamboen mimbi naoc –quecuedepac caondash Edodesën chomiaido champi caic.

Adec onquesho tantiashien Edodes aton chidon champi caic: –Mibi bunaid mibi menenu. Èbi chui. <sup>23</sup> Abimbo caimbi. Mibi bunaid èbi chuita. Mitsanatedi bunebi èbi casho tantiashun dadpen mibi menembi –quepondash.

<sup>24</sup> Aden Edodesën chuisho tantiash: –¿Atotsibi bumpeba? –quetanec aton tita yacno puduedshun: –“Mibi bunaid mibi menenu. Èbi chui,” Edodesën caoshi. ¿Atotsimbi chuipe, tita? –quepac caondash ani chiec.

Adsho tantiashun anin: –Uanën mapi bunebi quequin chuita –capac caondash aton champi chuiquin.

<sup>25</sup> Aden chiaquien badedquio Edodes yacno titinquec choec puduedshun champin: –Nëbimbobi Uan acten mentoanquidën mapi maspanën nandoshon èbi mene –capac caondash anin chuibocpadomboen chuituidquin.

<sup>26</sup> Adsho tantiash Uan tantiec unësquio icpac caondash Edodes. Adec unësquiocquin ambi champi chiapadomboen natiapimbo iquec èmbi chomiaido quenushe queshun adoembi abibi queshun: <sup>27</sup> –Uanën mapi bec cho –capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin <sup>28</sup> maspanën nandoshon bëshun champi meniac bedshun champin aton tita menetuidpac caondash. <sup>29</sup> Adnubien, Uan mapi butiac, quesho tantiash Uambëd icquido nidshun Uanën dada bedshun buanshun chococapac caondash.

### *Dada 5000ted Esusën pemiaid*

*(Mat 14.13-21; Duc 9.10-17; Uan 6.1-14)*

<sup>30</sup> Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. <sup>31</sup> Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: –Matses nibëdacno tabadec nidnu. Nid –quepondash abëd icquido caic.

<sup>32</sup> Aden chiashic cano antabëdtoanec matses nibëdacno nidpondash aidtedtsëqui. <sup>33</sup> Adec nidsho isash matses dadpen abi nidte yacno tantiec: –U nidanec –quiash titinquec choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. <sup>34</sup> Adec aidtedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantiamequin Nuquin Papan chiaid chuiquid nibëdabimboecnuc matses cho-choec quequin tantiec unësquio iquebi queshun tauain chuibampondash Esusën. Yuen chuibampondash.

<sup>35</sup> Yuen Esusën chuibanubi ushë budpondash. Ushë budsho isun abëd icquidon: –Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. <sup>36</sup> Nidmiac shubu yacno nidshun piucquid menequin ma aton pete bedpanuna penun –capondash Esus chuiquin.

<sup>37</sup> Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquoio yoc —quepondash abëd icquido Esus caic.

<sup>38</sup> Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid doted iquec —quepondash.

<sup>39</sup> Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. <sup>40</sup> Adoac ambi chiac tedtedquieci tabadbudpondash. <sup>41</sup> Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbibi nadatiambocquin naid ismembibi —queshun cuësh-cuëshshun: —Meneban —Esusën cac abëd icquidon menebampondash. <sup>42</sup> Menebanac piash: —Padi. Piombi —quecuededpondash pequido. <sup>43</sup> Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. <sup>44</sup> Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedictsequi tambampondash 5000ted iquec quequin.

*Acte bëntse Esus choaid*  
(*Mat 14.22-27, 34-36; Uan 6.16-21*)

<sup>45</sup> Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembibi —quepondash Esus abëd icquido caic. <sup>46</sup> Adoac canon potenubi matsestedi nidmianec matses nibëdacno macuësh yacno Nuquin Papa chuinec Esus nidpondash. <sup>47</sup> Adnubien inchëshbudtsëqui abëd icquido acte nënantanquoio canon noadpondash. Ambobi noadnubi Esus abentsëqui mananuc tsadpondash. <sup>48</sup> Ashunquoio Esusën isaquien abëd icquido bëdiactseccquoio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboconoc acte bëntse choquin abëd icquido Esusën ismetuidpondash. <sup>49</sup> Datantsensho isash, Mayambien nechitec, quequin ambibi tantiec sidquecuededec <sup>50</sup> dacuëdcuededpondash.

Adsho isumbien: —Ëbibi nebique. Dacuëdenquoio yec tabadta —capondash Esusën. <sup>51</sup> Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepc —quepondash abëd icquido. <sup>52</sup> Panëmpi daëdpactsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquoio icoapondash pamunachimboecquin.

<sup>53</sup> Ashunquoio chian potiashic nidaid Quenesaded caid yacno choshon cano nëshpondash. <sup>54</sup> Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi <sup>55</sup> daicsaid aton ueten nandoshon Esus yacno bëbëpondash. <sup>56</sup> Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, quesahun daicsaido bëbëpondash. Adoac —Min dashcute ëbi mishme —capondash bëbëaidon. Aden ambi tantiacpaden Esusën dashcute mishash bëdancuededpondash.

## 7

*Nuquin Papan paucaid*  
(*Mat 15.1-20*)

<sup>1</sup> Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, <sup>2</sup> Ëmbi mishboed mishtemaid ictsias, quesa iquec tsusedpabon chuinëdacadquieci mëpanudabi Esusbëd icquidon pesho ispondash.



<sup>3</sup> Padiseyobo isadaidbobidi yec tsusedpabon chuinedacpadquieq penush mëpanudanequid nec. <sup>4</sup> Tiedën caniquid ambi piucquid menequin bedacnoësh choec adecbidi penush tsusedpabon chuinedacpadquieq mëpanudanequido isadaidbo nec. Isadaidbo tsusedpabon naden nata quequin ambibi chuinedaid utsi-utsiec dadpen iquec. Ambi chuinedacpadomboen dëshotetsen cachonouidi dapanquidquibidi nec. Adembidi matsu nacnenaïd cachonouidi dapanoaquidquibidi nec. Shocosh matsu cachonouidi dapanoaquidquibidi neoaic. Tsusedpabon chuinedacpadomboen naquidquio nec.

<sup>5</sup> Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinedaid tantiaquid neoaic. Adec tsusedpabon chuinedacpadquieq Esusbëd icquido mëpanudenquiocsho isash padiseyobo: –Atotsieshun mibëd icquidon tsusedpabon chuinedacpadomboen nainquiocquin mëpanudabi pepeç –quepondash Esus caic.

<sup>6</sup> Adoaquien Esus: –Isayasën ëndenquio dada uaqin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bëdambocquid nec quequin chiacpadomboen tantiesa isadaidbo nec.

<sup>7</sup> Abia Yampidënquio Nuquin Papan nadomboen nata quequin chiaïd tantiesa icquin tsusedpabon nadomboen nata quequin chuinedaid tantiaquidquio nec.”

<sup>8</sup> Aden tsusedpabon chuinedacpadomboen nabanquin Abia Yampidënquio chiaïd niacquid mibi nec –quepondash Esus isadaidbo tsusiobo caic Nuquin Papan Isayas dada uamepampid tantiamenuc.

<sup>9</sup> Aden chuishumbic adomboembidi chuioaic: –Badedquio Nuquin Papan chiaïd chieshënquin tsusedpabon nadomboen nata quequin chuinedacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape?

<sup>10</sup> Nuquin Papan chiacpadomboen Moisesën dada uampid nad iquec: “Titan papabëdtan chiaïd chieshenquiocquin naban.” Adquidën chiaïd utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. <sup>11</sup> Mibien tsusedpabon chuinedaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabëdta tita tantiaquin nashunenquiocquin Nuquin Papan chiaïd niacquid mibi nec. <sup>12</sup> Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. <sup>13</sup> Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinedacpadomboenuidi nata quequin chuiquidien mibi nechitec. Adembidi Nuquin Papan chiaïd utsi-utsien naisa mibipadquid utsibo icmequin tsusedpabon chuinedaid nata quequin mimbi chiec –quepondash Esus isadaidbo tsusiobo caic.

<sup>14</sup> Aden Nuquin Papan chiacpadomboen niacquido chiashic: –Utsibo, tantiec cho. Mibi bëdamboen chuïnu. Bëdamboec papuedta. <sup>15</sup> Tsusedpabon chuinedacpadquieq mëpanudabi mimbi piaïd min tantiate icsabudtemaid nendac. Icsamboen tantiec mibi icsaic. <sup>16</sup> Ëmbi chiaïd tantiaquin utsi chuïbanta –quepondash Esus.

<sup>17</sup> Aden chiash iccuededquido abi tabadnubi shubun puduedash tabadpondash Esus. Tabadsho isash: –Mimbi chuïboed ëbitedi tantieme –quepondash abëd icquido.

<sup>18</sup> Adoaquien: –Utsitedishun tantienquio icbocpadquido mibitedi neque. Tantia. Mimbi piaïdën mimbi tantiaïd icsabudtiapimbo iquec. <sup>19</sup> ¿Min tantiate yacnoda mimbi piaïd nidpec? Padenquio. Mimbi piaïd min pucu yacno bud-budec auëshquio chimu nëncuenash puduenec –quepondash abëd icquido caic.

<sup>20</sup> Aden chiec onquiashic: –Mimbi tantiacpadquiequi mibi icsabudec. <sup>21</sup> Chido mimbi inacmaid isash chudtiadquio iquec quequin mimbi tantiacpadomboen chido



isuidtiapimbocquin mimbi chudted-chudtedec. Utsin na bedtiadquoio iquebi quequin mimbi tantiacpadomboen mimbi ampec. Cuesunetiadquoio iquebi quequin mimbi tantiacpadomboen mimbi cuesunepec. Utsin chido chudtiadquoio iquec quequin mimbi tantiacpadomboen aidi mimbi chudpec. Dada utsin ëbi bēdaidquiocsho ispec quequin mimbi tantiacpadomboen min bēnēpenquoio chudmequid mibi nec. <sup>22</sup> Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquoio mibi yampec. Mibibi icsambocquid nec quiash chieshēmēnquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bēdambo icsho isash chieshēnquid mibi icpec. Utsi icsamboen chuiquid mibi nendac. Utsin chuisho, Ēbentsēqui tantiaquidquoio nebi, quequin mamēnshunquid mibi nendac. Adembidi nasho mamēnshunoaquidbidi mibi nendac. Ēmbia tantiaquid nebi, quequin mimbibidi nabanaid icsa isash bēdambo iquec quec mibi mamēnec tsadec. <sup>23</sup> Ēmbi chuiboedtedi icsaquidēn naid nec. Aden tantiaquid icsabudte nec –quepondash Esus.

*Sidopenisia caid yacnoësh chido ambi tantiacpadquiec bēdanaid*

*(Mat 15.21-28)*

<sup>24</sup> Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsēqui yacno choash shubun puduedash: –Nēmbo ëbi choaid chienda –quepondash Esus. Ambi chiacpadpenquiocnoc chuisho tantiapondash anocquidon. <sup>25</sup> Adoac: –Esus chosh –quesho tantiashien mayan icsa dapuduedaidēn tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec. <sup>26</sup> Isadaidpembon chido nidaid Sidopenisia caid yacnocquid niondash. Aidi Esus tauebudash: –Con champi mayan icsa dapuduedaid dapudueme, tsusio, –quepondash comapenen chiec.

<sup>27</sup> Adoaquien Esus: –Mabi con matses isadaidboba bēdamenuec choboc. ¿Bacuëbo cubudabicnubi opashēmpida pete menequin anin bēnepadic? Padenquoio. Adembidi, ¿isadaidbotedi bēdamiabidambi matses utsibo, isadaidpembo, bēdamepadi? –quepondash Esus.

<sup>28</sup> Adsho tantiashien chido: –Icbo, mimbi bēdamboen chiec. Padnuen anin me-niac bacuëbon pete sananaid cuēshēmpi paēdtsacsho opashēmpin ambibi bedshun pec. Adembidi mimbi nadatiambocquin nabanac isadaidbo dadpen bēdanubi isadaidpembo abentsēc tantiaquid yec bēdanoapec –quepondash chido.

<sup>29</sup> Aden chidon chuishobien: –Bēdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid –capondash Esusēn isadaidpembon chido chuiquin.

<sup>30</sup> Adsho tantianec choec shubun puduedquin isaquien aton champi uebocno ënden mayan icsa niqian bēdanash abi ushaidēmbi uec.

*Pashu buēd onquenquiocquid Esusēn bēdamiaid*

<sup>31</sup> Adashien Tido caid anoentsēcuësh nidequi Sidon caid matambidanec chian Ca-didia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. <sup>32</sup> Ambo choash tsadnubien dada icsa, pashu buēd onquenquiocquid, Esus yacno bēash tsadquin: –Nēid mishquin bēdame –capondash.

<sup>33</sup> Adsho tantiashun iccuededquido ismenquiocnuen udictsēc dada icsa buanshun aton mēdante bushbi pashun pabiate pausuntanquin chicpondash Esusēn. Adshun, min anatsen mishnu quetanquin ismequin uicchun mēpidadtanquin pashun ana mishpon-dash. <sup>34</sup> Aden amishec abuc isec: –Ēpata –quepondash. Paucud, quec adpondash Esus.

<sup>35</sup> Adec Esus cuëdnubi pashu buëd onquenquiocboedi tantiadcuenash onquiampondash.

<sup>36</sup> Aden pashuaid bëdamiash: —Esusën naid nec quequin chienda —quepondash Esus. Adoboqui niacbidanquin chuibampondash. <sup>37</sup> Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

## 8

### *4000ted matses Esusën pemiaid (Mat 15.32-39)*

<sup>1</sup> Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash: <sup>2</sup> —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac. <sup>3</sup> Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiec.

<sup>4</sup> Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

<sup>5</sup> Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

<sup>6</sup> Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. <sup>7</sup> Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiemi, Papa —queshun: —Nëidtsen meneban —Esusën cac menebanoapondash. <sup>8</sup> Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. <sup>9</sup> Peboedo dada caniaid dadpen 4000ted icpondash. Chidon aton bacuëbobëdtambi pepondash. <sup>10</sup> Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

### *Nadatiambocquin nata. Isnu, padiseyobo quiaid (Mat 16.1-4; Duc 12.54-56)*

<sup>11</sup> Aden potiaish tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

<sup>12</sup> Adsho tantiash, Ëbi tantiesa nec, quec unësquio yec tsadequi —Ëmbi naid dadpen mimbi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquio iquembi. Abimbo caimbi —quepondash Esus. <sup>13</sup> Aden chianec nidec cano antabëdtoanquin uquë cuëma utsiuc poteapondash.

### *Nuquin Papan chiaidbëdta ambi chiaid daëd uaquin chuiquid padiseyobo (Mat 16.5-12)*

<sup>14</sup> Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. <sup>15</sup> Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquec. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane quesahun ambi tantiacpadomboen nabanenda —capondash Esusën abëd icquido chuiquin.

<sup>16</sup> Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

<sup>17</sup> Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadacimboecta tsadpo? <sup>18</sup> Adecbidi ¿Ëmbi chuibanaid tantienquio yec pashuacimboecta tsadoapo? <sup>19</sup> ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseded iccosh —quepondash abëd icquido.

<sup>20</sup> Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

<sup>21</sup> Adoaquien Esus: —¿Nadatiambocquid Esus nec quequin ëbi tantienquioda mimbi icpe? —quepondash abëd icquido caic.

### *Betsaida caid yacnoshon bëshu bëdamiaid*

<sup>22</sup> Adshumbic Betsaida caid yacno poteopondash Esusbëdtambidi. Aden potiash chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquio icquin mishquin bëdame —capondash Esus chuiquin.

<sup>23</sup> Adsho Esusën bëshu mëdinanquin Betsaida caid anoentsëqui buanshun uicchun bëcuishtuatanquin bëmishec: —¿Ada mimbi isequè? Èbi chui —capondash Esusën.

<sup>24</sup> Adsho tantias Esus isquin: —Bëdamboen isenquiocquin cuète podo inchëshquio yacimboecnuc mibi isembi —capondash bëshuaidën. <sup>25</sup> Aden chuishobi Esusën bëshuaid padpiden bëmishoaquien bëucudquiopondash bëdamboen isec. <sup>26</sup> Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

### *Quidistu mibimbo neyoc, Petedo quiaid* (Mat 16.13-20; Duc 9.18-21)

<sup>27</sup> Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

<sup>28</sup> Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

<sup>29</sup> Adsho tantiasun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiacimboen chuioaic.

<sup>30</sup> Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

### *Abi unës uate Esusën chiaid* (Mat 16.21-28; Duc 9.22-27)

<sup>31</sup> Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. <sup>32</sup> Abi unës uatequid chuipecshenda niondash. Aden Esusën chiaquien aibdëtsëqui uano nidshun Petedon: —Aden tantiaquin chienda —capac caondash.

<sup>33</sup> Aden Petedon chuisho tantiash auchidi bidiadquin abëd icquid utsibo isec Esus nadpondash: —Niddec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

<sup>34</sup> Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. <sup>35</sup> Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac. <sup>36</sup> Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic? <sup>37</sup> ¿Nuquin Papa mitsana menecta abi yacno puduedpatsia? Padenquio. <sup>38</sup> Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bëdabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

## 9

<sup>1</sup> Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

### *Esus bëdaidquio icmiaid (Mat 17.1-13; Duc 9.28-36)*

<sup>2</sup> Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aidtedi ambi chiactedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. <sup>3</sup> Abi dasiuidaid dashcute icboedi nac-nacquio yampac caondash. <sup>4</sup> Edias, Moises, aid daëd ënden yampidi Esusbëd onquesho ispac caondash Esusbëd choboedon. <sup>5</sup> Aden isequi: —Chuiquid Dapa, nuquibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aidted icnuc —quepac caondash Petedo. <sup>6</sup> ¿Atotsimbi chuipe? quetiapimbo yec dacuëdcuededquin aden chuipac caondash Petedon.

<sup>7</sup> Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibansho bëdamboen tantiata —capac caondash Nuquin Papan.

<sup>8</sup> Adsho isbanquin isaquien Esusbëd choboeduidi icoapac caondash.

<sup>9</sup> Adanec macuësh yacnoësh budtanequi: —Mimbi isboed nëbi chienda. Ëbi Nuquin Papan mado matsesacsho unësmiac ëbi uincuenan mimbi isboed chuita —capac caondash Esusën. <sup>10</sup> Adsho tantiash utsi chienquio yec abi uincuemete ¿mitsipadquio icpec? quec abibi onquecuededpac caondash Esusbëd choboedo.

<sup>11</sup> Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

<sup>12</sup> Adoquien: —Ai, Ediasën matses bëdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matsesash nëbi tabadsho matsesën chieshënquid mëyanendac quequin

chuiampid nec. <sup>13</sup> Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Ëndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash –quepondash Esus abëd icquido chiec.

*Mayan icsan buëd onquetiapimbo icmiaid Esusën bëdamiaid  
(Mat 17.14-21; Duc 9.37-43)*

<sup>14</sup> Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpodash. <sup>15</sup> Adnubien Esus chosho isash iccuededquido, Bëdamanquid choec. ¿Atotsi aidën napatsiashe? Isnu, quetanec titinque choec: –¿Ada cho? –quepondash.

<sup>16</sup> Adoaquien: –¿Atotsi quec ëbëd icquidbëd comapenec onquecuedede? –quepondash Esus.

<sup>17</sup> Adshobien: –Chuiquid Dapa, mibi ismenuen con mado bëombi. Mayan icsan buëd oncamenquio yaid nec. <sup>18</sup> Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh –quepondash mayan icsan buëd onquetiapimbo icmiaidën papa.

<sup>19</sup> Aden chuisho tantiashe abëd icquido caic: –Esus nadatiambocquid nec quequin ëbi tantiesa mibi nepec. ¿Tedetsi icshun ëmbi chiacpaden mimbi tantiabempe? Mibi tantiesa icsho ¿mitsipadembimbi tantiamepe? –queshumbic: –Madompi bec cho –capondash Esusën.

<sup>20</sup> Adsho tantiasheun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëcbacush-ëcbacushpambo yec cuididiquepondash.

<sup>21</sup> Adsho isash: –¿Tedtsi seta matamec ad iccondashe? Chui. Tiantianu –quepondash Esus madompin papa chiec.

Adoaquien: –Bacuë ictsequi ad iccondash. <sup>22</sup> Cuëte dëtsiadaid nënedeniosh abi dapuduedaidën. Actetsen nënedeniosh unësmenuequin. Mibi bëdamequidquio icquin ëbëdta tantiaquin ëbi con mado bëdameshun –quepondash madompin papa Esus caic.

<sup>23</sup> Adoaquien: –¿Mibi bëdamequidquio icquin ëbi con mado bëdameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac –quepondash Esus.

<sup>24</sup> Adsho tantiashe: –Tantiembi. Ëmbi abimbo tantienquiocsho isun ëbi tantiam, Icho –quepondash madompin papa Esus caic.

<sup>25</sup> Adsho tantiasheun matses dadpen titinquec chosho isun mayan icsa chuiquin: –Matses buëd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquio yec dapuduen –capondash Esusën.

<sup>26</sup> Aden chiaquien sidquec madompi cuididiquenubi dapuduempondash. Adnubien unësabimboec madompi uesho isash: –Unësosh –quepondash isquido. <sup>27</sup> Adnubien madompi mëdintanquin Esusën uëtsëndopondash. Adoac abembi nidtopondash.

<sup>28</sup> Adnubien shubun puduedacsho: –¿Atotsieshumbimbi mayan icsa dapuduemetiapimbo icpo? –quepondash abëd icquido Esus caic utsibon tantienquiocnobi.

<sup>29</sup> Adoaquien Esus: –Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuide-neshun mayan icsa dapuduen cac dapuduenendac –quepondash.

*Abi unës uate chuioaid  
(Mat 17.22-23; Duc 9.43-45)*



<sup>30-31</sup> Aden chianec nidaid Cadidia caid matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenquo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecshenda adec Esus onquepondash. <sup>32</sup> Aden chuisho bëdamboen tantienquo yequi dacuëdec ëbi bëdamboen tantiamequin chui quetiapimbo icpondash abëd icquido.

*¿Mitsicquid chuiquid dapa icpec? quequin chiaid  
(Mat 18.1-5; Duc 9.46-48)*

<sup>33</sup> Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abëd icquido chuiquin. <sup>34</sup> Adsho tantiash cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tantianu, quec onquequin ambi chiaid chienquo yec tabadpondash. <sup>35</sup> Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

<sup>36</sup> Adec onqueshumbic bacuëmpi abentsëc mëdintanquin abëd icquid tabadacno nënantanquo tsadumbudpondash. Aden tsadumbudshun bacuë icuquequi: <sup>37</sup> —Esus tantiaquid nebi quequin ismequin bacuë yuedquin nashunquid ëbi yuedquin nashunac bimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoac bimboecquid neoaindac —quepondash Esus abëd icquido chiec.

*Nuqui chieshënesa nuqui bëdamboen chuibanquid nec quiaid  
(Mat 10.42; Duc 9.49-50)*

<sup>38</sup> Adnubien utsin naid chiec Uan onquedopondash: —Icho, mimbi chiacpadomboen utsin chuisho tantiapombi. Aidën: “Esus nadatiambocquin naquidquo nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduempsh. Adosho isun, Esusbëd icquidpenquo mibi neque. Adenda quequin chuipombi —quepondash Uan.

<sup>39</sup> Adoquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. <sup>40</sup> Nuqui chieshënesa nuqui bëdamboen chuibanquid adquid nec. <sup>41</sup> Abimbo chiembique. Tanta. Esus tantiaquid nec quequin mibi nashunquid Nuquin Papan cuidnanquin bëdamboen naoaindac —quepondash Esus.

*Icsa uanquin tantiabenabicquid ismequid cuidendac quiaid  
(Mat 18.6-9; Duc 17.1-2)*

<sup>42</sup> Abi Esusën onquequin chuibanec: —Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta tëtaneshun acte dapa nënepatecnëdan. <sup>43-44</sup> Adembidi mimbi icsamboen tantiaquin mishaid ëntiapimbocquin ismedeniad adomboembidi utsin tantiec. Bednu quenquo yec mëtaniac bimboec tsad ënëdenquo yec chian anëdënquiacno nidmane quiash. <sup>45-46</sup> Adecbidi capuquin mibi icsaid mimbi ismebeneque. Capunu quequin tantienquo yec tateshuniac bimboec tsadta ënëdenquo yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. <sup>47</sup> Adecbidi ëshën isec mibi icsaid ëntiapimbocquin mimbi ismedoniad adomboembidi utsin tantiec. Ëshë chicshuniac bimboec tsad ënëdenquo yec chian anëdënquiacno nidmane quiash ma mibi tsadacpadec mimbi ismiaid tsadoapanu. <sup>48</sup> Icsa uadenequin ënenquo yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquo yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. <sup>49</sup> Sa casecac

pambid batambo yac bimboec Esus padquid icnu quiash mibi icsaid ënëdnuen mëmunec mibi bëdambo yampec. <sup>50</sup> Sa batambocquid bëdambo iquec. Sa batambochoedi batapenquio yec icsasho ¿mitsipadentsi batambo icmeoapec? Sa batambocquid casecac daëdash batambo yac padec utsibëd bëdamboec tabadta –quepondash Esus.

## 10

### *Aton chido bedshun nidmequid* (Mat 19.1-12; Duc 16.18)

<sup>1</sup> Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec chochocho isun Nuquin Papan chiaid chuibanoapondash Esusën.

<sup>2</sup> Adecbidi cho-choquid padiseyobon Esus Nuquin Papan chiaid icsamboen chuinu queshun: –Aton chido bedash bunenquio yanshun cuemec. ¿Aden naicta bëdambo iqueque? Tantuanu. Chui –capondash Esus chuiquin.

<sup>3</sup> Adoaquien: –¿Atotsi quequin Moisesën chui pampic? –queoapondash Esus.

<sup>4</sup> Adoaquien: –Aton chido bedash bunenquio yanshun, Con chido icsambocquid nec, quequin ambi tantiacpaden aton bënënda dada uashun nidmiacsho isash, Padi, quenquiocpampic Moises –quepondash padiseyobo.

<sup>5</sup> Adoaquien Esus: –Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. <sup>6</sup> Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. <sup>7</sup> Adomboembidi nanuec dada aton tita aton papabëd tabadenquio yec aton chido bedash abëdi ambi quënë uaidëmbi tabadec. <sup>8</sup> Aden aton chido bedash tabadequi matses abentsëc icboedi daëdec. Matses daëd icboedi abentsëc yac bimboec tabadec. <sup>9</sup> Aden dada aton chidobëdta Nuquin Papan daëd uacsho ma cuëshëdmenquio icpanuna –quepondash Esus.

<sup>10</sup> Aden chiash shubun puduedacsho: –Mimbi chuibod ëbitedi tantieme –capondash abëd icquidon.

<sup>11</sup> Adoaquien: –Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. <sup>12</sup> Adembidi chido aton bënënda bedac aton bënë nianshun dada utsi bedmequid Nuquin Papan menepampid niacquin tantiesa neoaic –quepondash Esus.

### *Esus yacno bacuëbo bë-beaid* (Mat 19.13-15; Duc 18.15-17)

<sup>13</sup> Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: –Padi. Esusën naid utsi neque. Bacuëbo buantan –capondash Esusbëd icquidon. <sup>14</sup> Aden nidmesho isash nëishash: –Bacuëbo nidmenda. Ma cho-chono. Anin chiacpadomboen tantiaquidquio bacuëbo neque. Adomboembidi badedquio Nuquin Papan chiaid tantiendac. Nuquin Papan shubu abentsëquën tabadquid aido nec. <sup>15</sup> Abimbo chiembique. Tantia. Nuquin Papan chiaid bacuëbon badedquio tantiacpaden tantiesa Nuquin Papa yacno puduedtiapimbo iquendac –quepondash Esus. <sup>16</sup> Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

### *Na dadpen icquid chiaid* (Mat 19.16-30; Duc 18.18-30)

<sup>17</sup> Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: –Chuibanquin tantiamianquid, bëdamboquid mibi neque. ¿Nuquin Papan shubu abentsëquën tabadnuequin atotsimbi napeba? –quepondash choobod Esus chiec.

<sup>18</sup> Adoaquien Esus: —¿Nuquin Papabëdtabidabi mibi bëdambocquid nec, ëbi cape mimbi? Nuquin Papauidtsëqui bëdambocquidquio nec <sup>19</sup> —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidedi Nuquin Papan dada uamiampid nabanquidta ne? —quepondash Esus choboed caic.

<sup>20</sup> Adoaquien: —Abimbo chiembique. Tantia, Icbo. Aidedi nabanquidquio nebi. Bacuëtsëc icquimbi adquid nabanondambi ënenquiocquin —quepondash choboed.

<sup>21</sup> Adsho tantiaash, Aibdëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquio menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquio mibi iquendac. Adec Nuquin Papa tantiaquidquio yec ëbëd iquec cho —quepondash Esus.

<sup>22</sup> Adsho tantiaash choboed mamënenquio yec unësquio yec nidpondash con na menebantiapimbo iquebi quiash.

<sup>23</sup> Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

<sup>24</sup> Aden Esusën chuisho tantiaash, ¿Abimboda capec? quequin ambibi tantiec abëd icquido otacquio tabadsho isec Esus: —Abuido, Nuquin Papan shubu abentsëquën mases badedquio puduedtiapimbo iquec. <sup>25</sup> Adembidi shëcuën puduedte nidaidën capuquid dapan badedquio tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid masesën badedquio tantiatiapimbo iquec. Ambi tantiacpadequi puduedte bunec —quepondash Esus.

<sup>26</sup> Adsho tantiaash abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimboconoc ¿tsutsi puduedquid icpeba? —quepondash abëd icquido Esus chiec.

<sup>27</sup> Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Mases abibi puduedtiapimboconoc Nuquin Papambien abi yacno yuedanquid mibi tantiamendac —quepondash Esus.

<sup>28</sup> Aden chiaquien Petedo nadpondash: —Chuinu. Tantia, Icbo. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

<sup>29</sup> Adoaquien: —Abimbo chiembique. Tantia. Esusbëd icnu queshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidedimboesho <sup>30</sup> daëd uaquin Nuquin Papan menendac. Nëbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yuecash ënëdenquio yec Nuquin Papan shubun mibi tabadendac mibi chieshënquid nibëdacno.

<sup>31</sup> Nidaidënshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid  
(Mat 20.17-19; Duc 18.31-34)*

<sup>32</sup> Aden chianec Edusaden caid yacno podquedën nidec Esus bëyucanec nidpon-dash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquieq abëd icquido tsyuec nidanepon-dash. Adnubien abi tsibanquid utsibo dacuëdecbidi nidanepondash. Adnubien: — Èbëd icquidoudtsëqui padpiden chuoanu —quiash Esus nidtuidshun cho-chosho isquin naden abi mëyante chuiquin tauapondash: <sup>33</sup> —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. <sup>34</sup> Aden meniac bedshun aidon ëbi oncain mamënsumbededquimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chieq.

*Èbi daëdi nashunta Acobo Uambëd quiaid  
(Mat 20.20-28)*

<sup>35</sup> Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Èbi daëdshun chiacpadomboen ëbi daëdi nashunenquioda mimbi icpe? —quepondash.

<sup>36</sup> Adoaquien: —¿Atotsimbi mibi nashuneque? Èbi chui. Tantaranu —capondash Esusën.

<sup>37</sup> Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdtan Esus chuiquin.

<sup>38</sup> Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

<sup>39</sup> Adoaquien: —Ai, adquid tantiembi —quepondash.

Adoaquien: —Ai, adomboembidi mimbitsen tantiendac —quepondash Esus. <sup>40</sup> Aden chieq abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Èmbi padenquio iquec —quepondash Esus Uambëdta Acobo chieq.

<sup>41</sup> Aden Esusën chiaqui abëd icquidquio utsitedi Acobobëdtan Uanën chuiboed tantiaish nëishcuededpondash. <sup>42</sup> Adec nëishash tabadsho isash: —Cho —quepondash Esus. Aden chomiash: —Utsi namequid isadaidpembo nec quequin mimbi tantieq. Aidon matses utsi yuaquin mëyanquin namebanec. <sup>43</sup> Aden namesa mibi nec. Chuiquid dapa icnu quiash utsi nashunquid icta. <sup>44</sup> Adecbidi tsusio icnu quiash yuabimboe yec utsin namiaid icta. <sup>45</sup> Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi —quepondash Esus.

*Bëshuaid, Badttimeyo cuëmëdquid bëdamiaid  
(Mat 20.29-34; Duc 18.35-43)*

<sup>46</sup> Aden chiashic Edico caid yacno chonobi abi tsibanquid utsibo dadpen chochopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badttimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash. <sup>47</sup> Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chieq cuëdpondash bëshuaid.

<sup>48</sup> Adec cuëdsho tantiaishun: —Esus cuënenquio yec otacquio tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.



<sup>49</sup> Adoac nidtuidshun Esusën: —Cuënquid chome —capondash.

Adoaquien: —“Chome,” queque. Nidtoash nid —capondash utsibon.

<sup>50</sup> Adsho tantiash bëshuaid aton dashcute bëntsecquid chicanec badedquio nidtoanec Esus yacno chopondash. <sup>51</sup> Adec chosho isun: —¿Atotsimbi mibi nashumpeba? —capondash Esusën.

Adoaquien: —Iste bunebi, Icbo —quepondash bëshuaid.

<sup>52</sup> Adoaquien: —Esusën ëbi bëshuaid bëuquec quequin mimbi tantiacpadquiec mibi bédanoque. Nidec nid —Esus quenubi isbenquiopondash bëshuaidën. Adec bédanshun Esus nidsho isun tsibampondash.

## 11

### *Chuiquid dapabimboec yec Edusaden yacno Esus choaid (Mat 21.1-11; Duc 19.28-40; Uan 12.12-19)*

<sup>1</sup> Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: <sup>2</sup> —Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. <sup>3</sup> Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

<sup>4</sup> Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash. <sup>5</sup> Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantianu. Chui —capondash anocquidën.

<sup>6</sup> Adoaquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoaquien: —Buanec nid —queoapondash.

<sup>7</sup> Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid aidën catsadtonoeshun. Adoaidën Esus catsadtopondash. <sup>8</sup> Adembidi chuiquid Esus nec quequin ismequin utsibontsen aton dashcute bëntsecquid chicbededshun podqued ansambampondash ma chuiquid dapa bédambocquid capunueshun. Adembidi tantiaquin utsibon budëdbiecquid podo tebededshun podqued ansambanoapondash. <sup>9</sup> Aden ansambanash matses dadpen bëyucanec nidanenubi Esus nënantanquio nidnuc aidedebidi tsyuec choquin tsibambëpondash. Adec abitedi nidanec Esus tantiec nadece cuëdëncuededpondash: —¿Adeduya! Nuquin Papan bédambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec. <sup>10</sup> Ëbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. ¿Adeduya! —quec cuëdëncuededpondash Esusbëd nidquido.

<sup>11</sup> Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneoapondash Esus.

### *Cuëte bacuësa chiaid (Mat 21.18-19)*

<sup>12</sup> Abadiadtsashi Betania yacnoësh nidanec Esus bundopondash. <sup>13</sup> Adec bundoshombi cuëte icueda caid podo buntac-buntacpambo ancuenquio nidsho istuidec



Esus: —Icueda podo buntac-buntacpambo podoash nideque. Isbono. ¿Bacuëshida neque? —quianec nidpondash. Adec nidquimbi icueda podouidquio icsho ispondash. Ushë utsin bacuëtiadquidi bacuëabi podopac. <sup>14</sup> Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

*Nuquin Papa tabadte shubu uashunaid yacnoshon cuemiaid*  
(*Mat 21.12-17; Duc 19.45-48; Uan 2.12-22*)

<sup>15</sup> Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. <sup>16</sup> Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. <sup>17</sup> Aden chushcashic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. <sup>18</sup> Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. <sup>19</sup> Adnubien inchëshbudtsëqui Edusaden yacnoësh nidoapondash Esus.

*Cuëte bidiquiaid*  
(*Mat 21.20-22*)

<sup>20</sup> Abadiadtsashi Edusaden yacno nidoaquimbi cuëte icueda caid bidiquiacsho istuidpondash. <sup>21</sup> Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuiboed bidiquiaye. Is, Icbo —quepondash.

<sup>22</sup> Adoaquien Esus: —Nuquin Papa nadatiambocquin nabanquid nec, quequin tantiaquiota. <sup>23</sup> Abimbo chiembique. Nuquin Papa nadatiambocquin nabanquidquio nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. <sup>24</sup> Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. <sup>25</sup> Aden Nuquin Papa chuinish mibi utsin icsambocquin naid tantienquio yec bëpiscudta. Adsho abucshun isash Nuquin Papan mimbi icsa uanquin naid tantienquio yec bëpiscudendac. <sup>26</sup> Adenquio mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatiapimbo iquendac —quepondash Esus abëd icquido caic.

*¿Mitsicquidën chuibanta caid mibi ne? quiaid*  
(*Mat 21.23-27; Duc 20.1-8*)

<sup>27</sup> Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: <sup>28</sup> —¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

<sup>29-30</sup> Adoaquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquio, quequin, ¿Ambibi tantiapadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiembi —capondash Esusën tsusiobo chuiquin.

<sup>31</sup> Aden Esusën chuisho tantiash udictsëc nidash isadaidbo tsusiobo onquec nad-cuededpondash: —Nuquin Papan tantiamicpadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus.  
<sup>32</sup> Naden Uan padon ambi tantiamicpadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimi-aid Uan pado niondash, quequin tantiabededquin nuqui cuënoten seshunetsiash — quecuededpondash. <sup>33</sup> Aden chiec onquecuededashic —¿Tsuntsin tantiamicpadom-boen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamicpadomboen Uan padon nabampondashba? que-quin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiec.

## 12

### *Tied icbo nashunta quequin chiaid (Mat 21.33-46; Duc 20.9-19)*

<sup>1</sup> Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquo nitsinshun cuate bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nactemposh. Aden nactenshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

<sup>2</sup> “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. <sup>3</sup> Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. <sup>4</sup> Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

<sup>5</sup> “Adosho isash, Padi, quenquiocquimbidi, Con uba bedtan, cac yua utsitsen nidoa-posh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

<sup>6</sup> “Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

<sup>7</sup> “Aden nidmiac ancuenquo chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

<sup>8</sup> “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. <sup>9</sup> Adoacsho tantiashun ¿atotsi tied icbon napec? Naden naindac. Ütsibëd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

<sup>10</sup> Aden chuishumbic Esusën: —¿Adomboembidi chuiquin Nuquin Papan dada uami-ampid tantienquioda icco? Nad iqueque. Tantia.

“Shubu uanuequidën buintad isuidaids utsin abia nitsinaid icoaposh. Adquiobidi Nuquin Papan chuimiaid matsesën tantiauidaids iquendac.

<sup>11</sup> Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquo tantiec”

—quepondash Esus Nuquin Papan chiampidquio chiec. Nuquin Papain shubu abentsëquën abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

<sup>12</sup> Adsho tantiash, Ëbitedishun isuidaibimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpeshun tantiabededpondash. Dadpen icsho isash dacuëdcuededec Esus bednu quenquio yec nidanepondash chieshëmënuquido isadaidbo tsusiobo.

*Bec cho quequin bedshunquid nec, quequin chiaid  
(Mat 22.15-22; Duc 20.20-26)*

<sup>13</sup> Isadaidbo tsusiobo nidshun padiseyobo edodesbobëdta istuidshun: —Nëidon Esus icsamboen chuimetsiash —queshun aido Esus yacno nidmepondash. <sup>14</sup> Aden nidmiac Esus yacno choshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? <sup>15</sup> ¿Adambi menepeba? —quepondash padiseyobobëd edodesbo Esus caic.

Adoaquien, Ëbi icsamboen chuimenuc adec onquec, quequin ambibi tantiec: —Shocosh piucquid bec cho ma isnu —quepondash Esus.

<sup>16</sup> Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

<sup>17</sup> Adoaquien: —Ai, aidën na nec. Aid bec cho, queshe meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshënquido tabadcuededpondash.

*Abuc tabadequi, ¿mitsicquidën chido neque? chui quiaid  
(Mat 22.23-33; Duc 20.27-40)*

<sup>18</sup> Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: <sup>19</sup> —Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec —quepondash saduseyobo. <sup>20</sup> Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. <sup>21</sup> Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën <sup>22</sup> aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. <sup>23</sup> Adec unësash abuc tabadequi, ¿Mitsicquidën chido aid icpatsiashe? Chui. Tantianu —capondash saduseyobon Esus chuiquin.

<sup>24</sup> Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoic. <sup>25</sup> Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. <sup>26</sup> Adembidi unësash uincuenaid tantianu queshe ¿Moisesën dada uaid isenquioda ictionda? Aidën cuëtempi abibi nëdënqueshe istanec nidtuidquin nadec Nuquin Papa onqueshe tantiapampic: “Min tsusedpabon

Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. <sup>27</sup> Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac –quepondash Esus matses uincuenta iquec quequin saduseyobo tantiamenuc.

*Naden nata quequin chiaid ¿mitsicquid adquidpadquid utsi nibëdpec? quiaid (Mat 22.34-40)*

<sup>28</sup> Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantiash Esus icsamboen chuimenuc aidtsen: –Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? –quepondash.

<sup>29</sup> Adoaquien Esus nadpondash: –Nëid chiaidpadquid utsi nibëdeque. Chuinu. Tantia. “Nuquin Icho Nuquin Papa nec. Nuquin Icho Abentsëcquiobi iquec. <sup>30</sup> Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota. <sup>31</sup> Aden nabanquin Nuquin Papa bëdambo icmequin ut-sibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec –quepondash Esus.

<sup>32</sup> Adoaquien Esus icsamboen chuimenuc choboed nadpondash: –Mimbi chui-boed abimbo iquec. Nuquin Papa abentsëcquiobi iquec. Aidpadquid utsi nibëdec.

<sup>33</sup> Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac –queoapondash choboed.

<sup>34</sup> Aden choboedën bëdamboen chuiasho tantiash: –Nuquin Papan shubu abentsëquën tabadaid mimbi bëdamboen tantiatsempoc –quepondash Esus.

Adoac Esus icsamboen chuimenu quetiapimbo icpondash utsibo.

*¿Tsuntsin mado Quidistu nepc? quiaid (Mat 22.42-46; Duc 20.41-44)*

<sup>35</sup> Abi icsamboen chuimenuquid utsi nibëdnuc Nuquin Papa tabadte shubu uashu-  
naidën tabadquimbi Esusën Nuquin Papan dada uamiampid chuibanquin nadopon-  
dash: –Nuquin Papan chomiaidquio tsusedpa Dabidën mado nendac, quequin tsused-  
pabon chiaid tantiamequidon chiec. ¿Atotsi chuiquin naden chieque? Tantia. Chuinu.

<sup>36</sup> Naden Nuquin Papan Mayanën Dabid chuimiampic:

“Icho utsi icsho mibi chiembique. Tantia, mado, quequin chiec Icho Dapa nadpampic:  
Ëquë con dayun abiucquio cainec tsadec cho ma mibi chieshënquidtedi mimbi namiaid  
ma icpanu,”

quequin chuipampic. <sup>37</sup> Aden Nuquin Papa icbo dapanquio aton dayunquio chomiaid  
chiec Dabid pado, Con icbo nec, quiashic, ¿mitsipadquiec, Con mado nec, queopampic?

Nuquin Papan chometequid, aton mado, Dabidën icbo yec ¿mitsipadectsi Dabidën tsyuecquid icoapec? –quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bëdamboen chiec, quequin comapenen tantiapondash.

*Nuquin Papan chiaid tantiamequidon chuisho tantienda quiaid*  
(*Mat 23.1-36; Duc 11.37-54; 20.45-47*)

<sup>38</sup> Aden tantiamequimbi Esusën nadopondash: –Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquio yec tsusiobimboec isadnu quiash aton matses dadpen yacno capuquid nec. <sup>39</sup> Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. <sup>40</sup> Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac –quepondash Esus.

*Nuquin Papa tantiaquin nianten meniaid*  
(*Duc 21.1-4*)

<sup>41</sup> Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi <sup>42</sup> aton na daëdpactsëcquidquio niantè choquimbi aton shocosh piucquid daëdquibictscëcquid sandopondash aton na utsi nibëdquiocnoc.

<sup>43</sup> Adosho isun abëd icquido chomeshun Esusën nadopondash: –Abimbo chiem-bique. Tantia. Niantè aton na bedtequid dayun uanu quenquioctscëcquin Nuquin Papa tantiaquioquin sandoquidquio nec utsibon aden sandoenquiocnobi. <sup>44</sup> Utsibon aton na bedtequid dadpen uesenquiocquin sandobededposh. Aido daëdpactsëc icquid sandoacimboen sandoquido nec quequin tantiembi. Adquidpenquio niantè nec. ¿Bednun tedtsimbi dayunoape? quenquiocquin aton na daëdquibictscëcquidi nibëdquiocnoc sandoposh nianten. Dadpen icquid sandoacimboen sandosho aid isembi –quepondash Esus.

## 13

*Nuquin Papa tabadte shubu uashunaid chic-chicte chiaid*  
(*Mat 24.1-2; Duc 21.5-6*)

<sup>1</sup> Aden chianec Nuquin Papa tabadte shubu uashunaidën puduenubien: –Nuquin Papan shubu cuënote nacnenaid bëdaidquio iqueque. Is, Icbo –quepondash abëd icquid abentsëc Esus caic.

<sup>2</sup> Adoaquien: –¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquiendac –quepondash Esus.

*Abitedi naimbudte tauanun ismete chiaid*  
(*Mat 24.3-28; Duc 21.7-24; 17.22-24*)

<sup>3</sup> Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidted icpondash. Utsibon tantienquiocnoc aidon: <sup>4</sup> –Cuënote nacnenaid nebudte mimbi chuiboed ¿mitsipadën nebudte icpeque? Tantianu. Èbi chui. Adembidi aidi tauanun ismete ¿atotsi icoapeque? Tantianu. Aid chuioa –capondash.



<sup>5</sup> Adoaquien Esusën nadopondash: —Muaquin chiaid tantiamane queshun Nuquin Papan chiaid isban-isbanquiota. <sup>6</sup> Nuquin Papan chomiaid nebi quec muaquid chochoendac. Aid chosh, quequin chiac utsin-utsinquien, Abimbo caic, quequin tantiabededendac. <sup>7</sup> Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac. <sup>8</sup> Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcuendac canchednuec. Adecbidi bunquiete iquendac. Aidtedi icsamboshëcquid taëyendac.

<sup>9</sup> “Adquid yanubi Nuquin Papan chiapadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. <sup>10</sup> Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. <sup>11</sup> Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

<sup>12</sup> “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquid adembidi aton titan chiaid niacoaquin cuesunemendac. <sup>13</sup> Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

<sup>14</sup> “Adnubien Nuquin Papa chieshënte ushë choendac. Aid chonoc Edusaden yacno abi chieshënquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushe quiash anoentsëqui icquido cuenenquiochoedi ma cuempanuna. Abimbo chiembique. Bëdamboen tantiata caimbi.

<sup>15</sup> Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquio yec cuenta. <sup>16</sup> Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquio yec badedquio cuenta. <sup>17</sup> Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta.

<sup>18</sup> Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu. <sup>19</sup> Comapenen Nuquin Papa chieshënquin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. <sup>20</sup> Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac. <sup>21</sup> Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta. <sup>22</sup> Aid ushë icnuc, Nuquin Papan chomiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiambocquin nabanendac. Adosho isun ëbi tantiaquidëmbi utsin-utsinquien tantiauidtsendac adquid. Nuquin Papapenquio aid nec, quequin Nuquin Papambo tantiata. <sup>23</sup> Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota —capondash Esusën.

*Nuquin Papan madombo choaid*  
(*Mat 24.29-35, 42-44; Duc 21.25-36*)

<sup>24</sup> Aden chiash abi onquec: —Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac. <sup>25</sup> Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuqui cuempeba? quendac.

<sup>26</sup> “Adnubien Nuquin Papan madombo matsesaïd ëbi choasho matsesën isendac. Abu ushun nadatiambo yec ushumbo yec bëdaïdquio iquequi ëbi choasho isendac matsesën.

<sup>27</sup> Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaïdo bëdnuc nidaïdtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

<sup>28</sup> Aden chiashic: —Abi chiembique. Tantiä. Suc seccuduquiac nëbi cunquecuenec, quequin matsesën tantiec. <sup>29</sup> Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuïnanta. <sup>30</sup> Abimbo chiembique. Tantiäta. Ëmbi chuibamboed naimbudabicnuc ëmbi chuibamboed tantiäquidën tsyuecquido naimëdbudenquio iquendac. <sup>31</sup> Aden matsesën isnubien nidaïdbëdi abu ënëdendac. Ëmbi chiaïdtedi abimbo yec adquiouidi iquendac.

*Nëid ushënquio tauadoendac, quetiäpimbo matses iquec quiaïd*

<sup>32</sup> “Adnuc nëid ushënquio Nuquin Papa chieshënquin tauaindac quetiäpimbo matses iquec. Ambi uaido mayan bëdabo adecbidi quetiäpimbo icoaic. Aton madombo yec adtiäpimbo iquebi. Nuquin Papa abentsëcquiobien adquid tantiäquid nec. <sup>33</sup> Äid tauadote ushë choäid tantiätiäpimbocquin Nuquin Papan chiaïd niacmane queshun isbanquin nabanta. <sup>34</sup> Nad iqueque. Tantiä. Chuïnu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. <sup>35</sup> Adec icbo nidan abi choate ushë mimbi tantienquio iqueque. Bëshunenquiocquin tantiäquiota. Inchëshbudtsëqui choapatsiash, quequin tantiäta. Adembidi inchëshpotsembo chopatsiash queshun adembidi tantiäquiota. Adembidi, cachina cuëdanubi chopatsiash, queshun isucunshun tantiädenequiota <sup>36</sup> ëmbi tantienquiocnoc con icbo chochitondac, queshun. <sup>37</sup> Adquiecbidi bëdamboec tabadquin Nuquin Papan chiaïd isted-istedta Nuquin Papa chieshënquidën niacmenushe queshun —quepondash Esus.

## 14

*Esus cuesunete bunaid chiaïd*  
(*Mat 26.1-5; Duc 22.1-2; Uan 11.45-53*)

<sup>1</sup> Adashic, bëyuc tishaid unësmenuequid aton shubu datamenuequin Isadaïdbo tsusedpabon nidaïdën capuquid yuaded cuesunepampic. Äid tantiäid ushëbëdtabi pan bidisquesa tantiäid ushë Pascuas caïd daëdec ushash choendac. Äid chonoshe queshun isadaïdbo tsusiobon Esus nibëmbëdëdpondash. <sup>2</sup> Aden nibënec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiä. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaïdbo tsusiobo.

*Esus unësec queshun nachimboen noadte machiuinte chiaïd*  
(*Mat 26.6-13; Uan 12.1-8*)

<sup>3</sup> Adnubien Betania caïd yacno tabadquin Esusën Simonën shubun puduedshun pepondash. Simon daushacbimboecquid, nami mishac tantiädenquiocquid icsho Esusën bëdamiaïd nepondash. Adec puduedshun pec tabadnubi comapenec noadquid bëc chido puduedpondash. Piucquid dadpen menequin comapenec noadquid bedquid chido nec. Ambi bëdaïd sedunte postichoquid dëusunäid dëchictanquin Esus chidon machiüimpondash.

<sup>4</sup> Aden machiuinsho isash utsibo nëishun: —¿Atotsieshun machiuino? <sup>5</sup> Noadte menequin piucquid dadpen bedshun aton na nibëdquid dadpen menetsiandac — quec onquecuededpanëdash Esus machiuimboed chido chushcaic. <sup>6</sup> Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bëdaidquio nec. <sup>7</sup> Badiadquidën-badiadquidënquieç ënëdenquio yec aton na nibëdquid ënabi iquec. Aidi menenu qeshun mimbi menepec. Èbien nashuntiapimbo iquendac. <sup>8</sup> Èbi unësabicnuc nëid chidon tantiaquin chococanuequin nachimboen noadte machiuimpaboc. <sup>9</sup> Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

*Esus bedmembali, Udas quiaid*  
(Mat 26.14-16; Duc 22.3-6)

<sup>10</sup> Adnubien Udas Iscadiote, Esusbëd icquid abentsëc, Esus bedmenu, quianec isadaidbo tsusiobo yacno nidpondash. <sup>11</sup> Adec nidequi isadaidbo tsusiobo yacno choshon Esus mibi bedmembali quequin chuituidac bëdambo icpac caondash aido. Adem-bidi: —Esus ëbi bedmesho isun piucquid mibi menembi —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

*Nidaidën capuquidded cuesuniaid abëd icquidobëdtan piaid*  
(Mat 26.17-29; Duc 22.7-23; Uan 13.21-30; 1Cod 11.23-26)

<sup>12</sup> Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembi nacnempatsia? —quepondash Esusbëd icquido.

<sup>13</sup> Adsho tantiash Esus abëd icquid daëd chieç nadpondash: —Edusaden yacno nidquimbi dadan acte bësho istuidash tsibananec aibdëdi nidta. <sup>14</sup> Aden aid tsibanec puduedash, ¿Èbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icbo chuita. <sup>15</sup> Aden chiac buanshun dectatomeshun abuc quënë dapa mibi ismendac. Ambo pete sante cuate iquendac. Ashunquio penun nacnenta —quepondash Esus ambi daëd chuimiaid caic.

<sup>16</sup> Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempondash.

<sup>17</sup> Adnubien inchëshbudtsëqui aid daëdtsëqui yacno Esusbëd icquid utsibo chopondash. <sup>18</sup> Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

<sup>19</sup> Adsho tantiash, Icsambo iquec, quequin tantieç: —¿Èbida chienquio ique? —quepondash abëd icquidtedi.

<sup>20</sup> Adoaquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënquido bedmendac. <sup>21</sup> Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Èbi bedmequid icsamboshë iquendac. Abi cuidte icsamboshë icnushe qeshun aidi tishenquiocpatecnëdan —quepondash Esus.

<sup>22</sup> Adashieç pebededquin pete bedshun Nuquin Papa chieç onquetanquin pete cuësh-cuëshun abëd icquido menebanquin: —Nëid pete cuëshë ëmbi piaid con dadabëd daëdacpadquieç Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

<sup>23</sup> Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac apondash.

<sup>24</sup> —Nëid acquin Esused Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin

tantiaata. <sup>25</sup> Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi –quepondash Esus abëd icquido caic.

<sup>26</sup> Aden chiash Nuquin Papan naid chiec cuëdënanec macuësh Odibos caid yacno nidoapondash.

*Esus tantiesa nebi quequin Petedon chuite chiaid*  
(*Mat 26.30-35; Duc 22.31-34; Uan 13.36-38*)

<sup>27</sup> Adshumbic Esusën: –Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëdendac,”

quequin Nuquin Papan chuipampid nec. <sup>28</sup> Unës uac uincuenash Cadidia yacno ëbia nidoaindabi. Mibitsen ambo nidta –capondash Esusën abëd icquido chuiquin.

<sup>29</sup> Adoaquien: –Esus tantiaquid nebi quenquio utsitedi icnuc ëbien padenquio iquec –quepondash Petedo.

<sup>30</sup> Aden Petedon chuisho tantiaash: –Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac –quepondash Esus Petedo caic.

<sup>31</sup> Adsho tantiaash: –Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquio iquendabi –quepondash Petedo comapenec onquec. Adecbidi Esusbëd icquidtedi onquepondash.

*Quetsemani caid yacno choash tabadaid chiaid*  
(*Mat 26.36-46; Duc 22.39-46*)

<sup>32</sup> Adashic cuëte odibo caid dadpen icsho Quetsemani quequin cuënacno choash nidtuidash: –Nuquin Papa chuinuec udi nidebique. Nëmbobi tabad –quepac caondash Esus abëd icquido caic.

<sup>33</sup> Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. <sup>34</sup> Adquio iquec: –Ëbibi unësquioshë yec udictsëc nidebi. Chieshtomane queshun nëmbobi tabadquin Nuquin Papa chuiban –quepac caondash Esus ambi nëid 3ted, Cho, caboed chiec. <sup>35</sup> Aden chianec udictsëc nidash Nuquin Papa chuinuec nidaidën uebudash uec onquec: –¿Adabi adquid icmenquioctsia? Papa –quepac caondash Esus Nuquin Papa chiec. <sup>36</sup> Aden chuishumbic: –Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquio iquembi queshun mimbi adoenquioctsiandac, Papa. Ëbi bunacpaden nainquiocquim mibi bunacpadomboen nata, Papa –capac caondash Esusën Nuquin Papa chuiquin.

<sup>37</sup> Aden chiash choquin abëd choboed 3ted icquid usho istuidec Petedo caic: –Simon, ¿ushecta ne? ¿Ëbibi chieshmane quiash yuecpactsëc iquec ushenquio yec tabadtiapimboda icco? <sup>38</sup> Chieshmane queshun Nuquin Papa chuita Nuquin Papan chiaid niacmenuequidën Satanas caidën chiaid tantiamane queshun. Chieshenquio iquebi quiash dacuëdash badedquio mibi chieshendac –quepac caondash Esus.

<sup>39</sup> Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. <sup>40</sup> Adtanec choashumbic abëd choboedo adecbidi ushacsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquio tabadpac caondash.

<sup>41</sup> Adnubien padpidec nidoashun Nuquin Papa chuioatanec choec: –¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon tishac



matsesaid ëbi icsho nëbimbobi ëbi chieshënquidon bedmeque. <sup>42</sup> Nidtoash ëbëdi nid. Ënden choaye. Is –quetuidpac caondash Esus abi bednuec choquido isec.

*Esus bedshun buante chiaid*  
(*Mat 26.47-56; Duc 22.47-53; Uan 18.2-11*)

<sup>43</sup> Aden chuinubien Esusbëd icboedquiobi Udasbëd matses dadpen cho-chopondash. Cho-choquid utsi-utsiec chështe sanampamboec chonobi utsi cueste sanampamboec chopondash. Aided Udasën chiac isadaidbo tsusiobon chomiaido nepondash.

<sup>44</sup> Esus bednuequid tantiamenuen ambiabi Udasën: –Ëmbi tanchoccaid mimbi bedtequid nendac. Aidquiobi bedshun buanta. Cuenushe queshun bëdamboen ista –capac caondash. <sup>45</sup> Aden chiashic aidobëdi choquimbi: –Icbo –quequin Udasën Esus tanchoccatuidpondash.

<sup>46</sup> Aden Udasën tanchoccasho isun Esus bedpondash. <sup>47</sup> Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

<sup>48</sup> Adnubien: –¿Cuesanquid Esus nec, queshun utsin cueste sananubi utsibon chështe sananec ëbi bedecta cho-choec ne? <sup>49</sup> Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniami mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, –quepondash Esus abi bedquido caic. <sup>50</sup> Adec onquesho tantiashun cuenquin abëd icquidtedishun Esus niampondash.

<sup>51</sup> Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi. <sup>52</sup> Aden bedac dasiuidte bëdaidquio nianec dadauidquio cuempondabi.

*Isadaidbo tsusiobo iccuededacno Esus buante chiaid*  
(*Mat 26.57-68; Duc 22.54-55, 63-71; Uan 18.12-14, 19-24*)

<sup>53</sup> Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. <sup>54</sup> Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. <sup>55</sup> Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. <sup>56</sup> Abimbo chiacimboen dadpenshun chuibededpondash. Aden chuiquin abentsëcshun chiacpadomboen chienquiocquin utsin chuiopondash.

<sup>57</sup> Adnubien, Chuinu. Tantia, queshun Esusën chiacimboen utsi uain chuipondash utsibon. <sup>58</sup> Aden chuinubien utsi onquec: –Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash –quepondash utsi. <sup>59</sup> Aden abentsëcshun chuinubi utsin aden chienquiocquin chuipondash.

<sup>60</sup> Aden chuisho tantiash isadaidbo tsusio dapa nënantanquio nidtoash nidquin: –¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tantiu –capondash isadaidbo tsusio dapan Esus chuiquin.

<sup>61</sup> Adsho tantiash ëcbedenquio yec otacquio nidsho isash: –¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? –queopondash isadaidbo tsusio dapa Esus caic.



<sup>62</sup> Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquoio tsadash abu ushun ëbi chosho mat-sesën isendac —quepondash Esus.

<sup>63</sup> Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? <sup>64</sup> Nuquin Papa icsamboen Esusën chuisho mimbi tantioc. ¿Midapaden mimbi chieque? Tantianu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

<sup>65</sup> Adsho tantiashun Esus dacuishtuquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tanti-aquidquoio mibi neque. Ëbi chui. Tantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpon-dash.

*Esus ëmbi tantiacmaidquoio nec quiaid*

*(Mat 26.69-75; Duc 22.56-62; Uan 18.15-18, 25-29)*

<sup>66</sup> Adnubien Petedo umanuc daquënë uaidën tsadnubi isadaidbo tsusio dapan yua chido chopondash. <sup>67</sup> Choshon Petedo cuëte cuëc tsadsho isun: —Nasaded caid yacnocquid Esusbëd icquid mibi nec —capondash.

<sup>68</sup> Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuoio yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

<sup>69</sup> Adec Petedo ambo tsadsho chido yuaidën istuidtanquin padpiden: —Esusbëd icquidquoio nëid nec —quequin anocquido chuiopondash.

<sup>70</sup> Adoaquien: —¿Aidbëd icquidtabi nedi? —quepondash Petedo.

Adnubien yuecpactsëc yash: —Aidbëdi Cadidia yacnocquid mibi nec —quepondash ambobidi tabadquido.

<sup>71</sup> Adoaquien: —Ëmbi tantiacmaidquoio nec quequin abimbo chiembi. Ëmbi abimbo chienquoio icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

<sup>72</sup> Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquoio Esus nec, quequin mimbi chiendac tedestedec onque-quin,” quequin Esusën chioshi quequin tantiec unësquoio yanec shubianquiopondash Petedo.

## 15

*Pidato yacno nidshun Esus meniaid*

*(Mat 27.1-2, 15-31; Duc 23.1-5, 13-25; Uan 18.28-19.16)*

<sup>1</sup> Badiadnuc isadaidbo tsusiobo iccuededpondash. Nëidted icpondash: isadaidbo tsu-sio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqeshun Esus mëtaneshun buanshun isadaidpembo ancaquid Pidato caid menepondash. <sup>2</sup> Aden meniac Pidato: —¿Isadaidbo ancaquidta mibi neque? Ëbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

<sup>3</sup> Adnubien, Esus icsaded-icsadedosh, quequin chiec isadaidbo tsusiobo onquecued-ednuc cuëdenquoio yec Esus tsadpondash. <sup>4</sup> Adec tsadsho isun: —¿Ëcbedanenquoio yec otacquioda tsade? Mibi icsaid dadpen nëidon chuibanec —Pidaton caqui <sup>5</sup> adquiecbidi Esus tsadpondash. Adec tsadsho isash ¿Mitsipadquidquoio Esus nepec? Utsimbien, Ic-sapenquiocquid nebi, quequin chuipac, Aden chienquoio Esusën iquec, quequin ambibi tantiec Pidato tsadpondash.

<sup>6</sup> Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. <sup>7</sup> Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. <sup>8</sup> Adnubien Pidaton seta utsin quënën nauedmiaid abentsëc ambi nidmiondacadpaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

<sup>9</sup> Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. <sup>10</sup> Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. <sup>11</sup> Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. <sup>12</sup> Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

<sup>13</sup> Adoaquien: —Cueste nitsinshun dectan —quec comapenec cuëdcuededpondash isadaidbo.

<sup>14</sup> Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuëdcuededpondash.

<sup>15</sup> Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

### *Sondadon Esus mamënshumbededaid chiaid*

<sup>16</sup> Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash.

<sup>17</sup> Choshon dashcute abichobicquid bëdaidquio bedshun ancanquid dasiuidac bimboecnuc dasiunshun pinchuc-pinchucquid mauete uashun Esus matoncashun

<sup>18</sup> ancanquid cuënacpaden cuënec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado.

<sup>19</sup> Adoquimbi ancanquidën sanante cueste bëdaidquibimboecnuc sananguin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. <sup>20</sup> Aden mamënshumbededquin mëyanshun dashcute bëdambocquid ambi dasiuimboed dachicshun aton dashcutebi dasiunshun

cuesten dectanuequin Esus buampondash.

### *Esus cuesten dectante chiaid*

*(Mat 27.32-44; Duc 23.26-43; Uan 19.17-27)*

<sup>21</sup> Aden abi dectante cueste Esusën buantiapimboenoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niondash. <sup>22</sup> Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota

quequin isadaidbon aton onqueten cuëmpondash. <sup>23</sup> Ambo choshon uba sicaid paëacsho paëmbocquid dauë cacushtanquin meniac aquenquiocpondash Esusën. <sup>24</sup> Aden isuidsho isun cuesten dectampondash. Aden dectanshun aton dashcute bednu quequin

sondadon abi cuëmëdquidtedi dada uabanshun tëchun sandoshon cadotanequin dada uatsaidëmpi puduemiaid isbanquin Esusën dashcute bedbampondash.

<sup>25</sup> Ushë dectatoec 9 yanuc Esus cuesten dectampondash. <sup>26</sup> Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiapaden dada uaid nepondash. <sup>27</sup> Cuesunetanquin ampequid daëd ëquë dectambudcuen-shun nënantanquio Esus dectampondash. <sup>28</sup> “Dectanquin icsaquidbëdta dectanendac,” quequin Nuquin Papan chuimiampicpadembi napondash. <sup>29</sup> Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënsumbededpondash. Adec cuenquin mamënsunquin: –Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque. <sup>30</sup> Abimbo chuiquid yec unëstiapimbocquid nebi quianec mibibi budta –cabidanepondash.

<sup>31</sup> Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantiaquid chedo onquecuedec: –Utsi-utsien bëdamequimbi utsi unësacsho uincuemboed yec mëtoccid abembi chiquidtiapimbocquid nec –quepondash isadaidbo tsusiobo Esus caic. <sup>32</sup> –Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi –quepondash. Aden cuenquidën mamënsunubi abëdta dectanaidën adembidi chuioapondash.

### *Esus unës uate chiaid*

*(Mat 27.45-56; Duc 23.44-49; Uan 19.28-30)*

<sup>33</sup> Adnubien ushë cuembocnoc 12 yanan inchëshquio ichoedi ushë budec 3 yanuc uëshëmbo yanoapondash. <sup>34</sup> Ushë 3 yanuc: –Eloi, Eloi, ¿lama sabactani? –quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiadquin isenquio ique? quec adpondash Esus.

<sup>35</sup> Aden Nuquin Papa Esusën chuisho tantiaquido, Nuquin Papa cuë nec, quenquio yec: –Edias cuëneque. Tantia –quepondash.

<sup>36</sup> Aden tantianubi badedi titinqueshun sicaid mucambocquid nëcushtanquin puntanquin cuate dëdectanshun acmenuequin ëccuëscadonequi: –Chiata. Edias Esus bedec chonoshe caimbono –quepondash.

<sup>37</sup> Adnubien comapenec cuëdec Esus unësbudpondash.

<sup>38</sup> Esus unësbudnubi abi inchëshacimbocnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. <sup>39</sup> Adec Esus cuëdbud-cuëdbudec unëso isash: –Abimbo chuiquid niosh. Nuquin Papan madombo nëid nec –quepondash sondado chuiquid uquë tsadbudec.

<sup>40</sup> Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. <sup>41</sup> Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

### *Esus chococate chiaid*

*(Mat 27.57-61; Duc 23.50-56; Uan 19.38-42)*

<sup>42</sup> Adashic biednes ushë budtsambi: –Inchëshbudtsëqui seis icnuc chonoadtemaid ushë chonoshe Esus unësoshe chococatanu –quianec Esus tantiaquid utsi nidpondash.

<sup>43</sup> Aidi, Ose Adimateya caid yacnoshon tishaid Pidato yacno nidpondash. <sup>44</sup> Adec nidshun: –Esusën dada bedshun chococatiadquio iquebique. ¿Ada buantan mibi quepe? –caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: –¿Ada Esus unësosh? –capondash.

<sup>45</sup> Adoac: –Ai –quesho tantiashun: –Ai, bedshun buanta –capondash Pidaton Ose chuiquin.

<sup>46</sup> Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaqun ambi nacnenaidën nauedshun cuënote dapan bëtashpondash. <sup>47</sup> Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

## 16

### *Esus uincuente chiaid*

(*Mat 28.1-10; Duc 24.1-12; Uan 20.1-10*)

<sup>1</sup> Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin.

<sup>2</sup> Bedtsash badiadtsëcnubi dominco ushë caidën Esus chococacno nidanequi: <sup>3</sup> – ¿Tsuntsin cuënote shëcnepeba? – quec onquecuedepac caondash.

<sup>4</sup> Adec onquequin ancuenquo isquien cuënote ënden shëcniac. Cuënote dapa yuëmbocquid nepondash. <sup>5</sup> Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquo tsadpondash. Aidi isash dacuëdcuededec tabadpac caondash chidobo.

<sup>6</sup> Adec dacuëdec tabadsho isun: –Dacuëdenquo yec tabad. Esus cuesten dectanaid mimbi nibënaid tantiembi. Uincuenash nidac. Nëmboi nanac ueuidoshe. Is. <sup>7</sup> Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquo utsibobëdta chuituiedec nid –quepondash nëbi caniquid chidobo chiec.

<sup>8</sup> Aden chuisho tantiash uëdëquequi chococaid shëcuënuësh puduenanec titinquec dacuëdec onquenquo yec nidanepac caondash chidobo.

### *Esus abuc indote chiaid*

(*Mat 28.16-20; Duc 24.13-53; Uan 20.11-23*)

<sup>9</sup> Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. <sup>10</sup> Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. <sup>11</sup> Esus uincuenash capusho isombi, Madia qesho tantiash, Aidquo mimbi isambo iquec, quec tantienquo yec tabadcuéd-epondash.

<sup>12</sup> Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. <sup>13</sup> Aden ismiac aid daëdi auchidi Edusaden yacno nidshun ambi isboed chuiopondash. Adembidi tantienquo icoapondash utsibon.

<sup>14</sup> Adashic, abëd icquidquo 11ted pete sante cuesten tabadnubi Esus chopondash. Adec choshon: –Uincuenac quequin ëbi isquidon chiaid tantienquo mimbi icpoc. Chobique. Is –capondash Esusën.

<sup>15</sup> Adashic: –Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsstedi mimbisen chuiban. <sup>16</sup> Aden chuisho tantiaquid, Èbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimbocnoc. <sup>17</sup> Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquicoedëmbi tantiaquin ëbi chuibanendac. <sup>18</sup> Adecbidi, nisinquo

piaqui bidisquenquo iquendac. Adecbidi, unësmenuequin acmiaqui unësenquo iquendac. Adembidi, utsi unëstsensho mishac bēdanendac. Nuquin Papan nadatiambocquin namiaidēnquo adobanendac –quepondash Esus.

<sup>19</sup> Aden chuiquin ënacsho Esus abuc buanaqui Nuquin Papan dayun abiucquo Esus tsadtuidpondash. <sup>20</sup> Ambo tsadquimbi nadatiambocquin namiac nidaidēn tabadquimbi abēd icquido nidaid utsi-utsiec yacno capuquin Nuquin Papan shubu abentsēquën tabadaid chuibenepondash nadatiambocquin nabanquimbi.

Ëmbi abimbo chuiboedquo mimbi isec aidquo tantianeta. Padi. Aidedi dada uaombi.



## DUCASËN DADA UAID

Mibi ismenuequin dada uaquid Ducas nebi.

<sup>1</sup> Utsin-utsinquin ambi naidbëdtabi Esuquidistu chuibanquin dada uaid dadpen iquec. <sup>2</sup> Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. <sup>3</sup> Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. <sup>4</sup> Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

*Uan, acten mentoanquid tishte chiaid*

<sup>5</sup> Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. <sup>6</sup> Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. <sup>7</sup> Edisabed bacuë tishesa icpanëdash. Adquid yequi aton bënëbëdi tsusio budpanëdash.

<sup>8</sup> Adashic, Nuquin Papa tabadte shubu uashunaid nuntanshun nabanuec padpitemboec Sacadias puduedpanëdash. <sup>9</sup> Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpadec Sacadias puduedpanëdash. <sup>10</sup> Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

<sup>11</sup> Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. <sup>12</sup> Adec tabadsho isash dacuëdampambo iquec, quetanec Sacadias uëdëquiampanëdash. <sup>13</sup> Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta. <sup>14</sup> Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. <sup>15</sup> Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. <sup>16</sup> Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icbo Nuquin Papa nec, queoaindac. <sup>17</sup> Min mado Nuquin Icbo bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icbo bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

<sup>18</sup> Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

<sup>19</sup> Adoquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique.

<sup>20</sup> Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquo icscho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

<sup>21</sup> Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. <sup>22</sup> Aden yuen caimbudnubien puduenash onquenuequi buëd cuëdenquiocpanëdash Sacadias. Adsho isun: —Ushquin isachimboen isbenac —cabededpanëdash. Adnubien Sacadiasën iccuededquido nidmenuen mëdante uic-uicapanëdash.

<sup>23</sup> Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. <sup>24</sup> Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. <sup>25</sup> Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacscho utsibon ëbi isec. Èbi tantiaquin Nuquin Papan usundomiaid nebi —quepanëdash Edisabed.

### *Esus tishendac, quequin chiaid*

<sup>26</sup> Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash.

<sup>27</sup> Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. <sup>28</sup> Adec choshon: —Mibi tantiaquin Nuquin Papan bëdamboen icmiaidquo mibi nec. Nuquin Icho mibëdi tabadendac —capanëdash Cabadedën.

<sup>29</sup> Adoaquien Madia, ¿Atotsi quepeba? quequin otacquo tantiec tsadpanëdash. <sup>30</sup> Adec tsadsho isun Cabadedën: —Dacuëndenda. Mibi bëdamboen tantiaquin Nuquin Papan naden nanu quequin chiaid nad iqueque. <sup>31</sup> Chuinu. Tantiata. Bacuë usundoshon min mado mimbi tishendac. Tishun, Èmbi tishaid Nuquin Papa yacno yuedanquidquo nec, quequin Esus cuënta. <sup>32</sup> Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. <sup>33</sup> Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

<sup>34</sup> Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

<sup>35</sup> Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquo Madia usundomiaid, icsa nibëdquid, Nuquin Papan madombobi nec, utsibon cabededendac. <sup>36</sup> Min utsi Edisabed macho icquin bacuë usundoenquiochoedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. <sup>37</sup> Utsin natiapimbo yaid Nuquin Papan naidquo nec —quepanëdash Cabaded.

<sup>38</sup> Adoaquien Madia: —Ai, con Icbon namiaidquo nebi. Ma mimbi chiacpadquo icpanuna —quepanëdash. Aden chiaquien Cabaded nidpanëdash.

### *Madia Edisabed isedec nidaid*

<sup>39</sup> Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. <sup>40</sup> Adec nidashic Sacadias oncamenquo yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. <sup>41</sup> Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed <sup>42</sup> Madia chiec nadec comapenec onquepanëdash: —Nuquin Papan

bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec. <sup>43</sup> Nuquin Icbon tita mibi yec ¿atotsi quiash ëbi isnuec cho? <sup>44</sup> Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. <sup>45</sup> Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

*Nuquin Papan naid chiec Madia cuëdënaid*

<sup>46</sup> Adnubien Madia naded onquec cuëdëmpañëdash:

“Nuquin Papan naid chuibanu. Tantia.

<sup>47</sup> Ëbi usundomiaid Nuquin Papa yacno Yuedanquid nec, quequin tantiec bëdambo iquebi.

<sup>48-49</sup> Ëbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

<sup>50</sup> Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadachimboecnuc adquid tabadmendac.

Adenuidi tantiaquin nampidquio abi iquec.

<sup>51</sup> Nadatiambocquin naded-nadedquidquio Nuquin Papa nec.

Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.

<sup>52</sup> Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

<sup>53</sup> Ambi chiaid tantiec bëdamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bëdamboec tabadebi quequid unësacsho cacumiac uano tabadendac.

<sup>54</sup> Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiac.

<sup>55</sup> Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdëdash Madia ënëdpañëdash. <sup>56</sup> Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

*Uan tishaid*

<sup>57</sup> Adnubien Edisabedën bacuë tishite ushë chonoc dada bacuë tishpañëdash. <sup>58</sup> Bacuë tishenquiochoedëmbi nëbi aton bacuë tishosh, qesho tantiaish aton matses ado shubu utsinquidotedi Edisabedbëd bëdambo icpañëdash.

<sup>59</sup> Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi <sup>60</sup> Edisabed: —Padenquio. Abi cuëmëdquid Uan nec —quepanëdash.

<sup>61</sup> Adoquien utsibo: —Min matses utsi Uan cuëmëdquid nibëdec —queshun <sup>62</sup> Sacadiaz ismenuequin mëdante uic-uiccaquin: —Abi cuëmëdquid chui. Tantanu —capanëdash utsibon.

<sup>63</sup> Adoquien dada uate bedshun, Abi cuëmëdquid Uan nec, quequin dada uaquin Sacadiazën ismepañëdash.

Adoquien: —¿Abimboda mimbi cape? —quecuededpañëdash utsibo.

<sup>64</sup> Adnubien Nuquin Papan oncameoac Nuquin Papan naid Sacadasën chuibampanëdash. <sup>65</sup> Aden chuibansho tantiash: —Dacuëdampambo iquec. ¿Atotsiepashun onquenquicoedëmbi nëbi onquequin Nuquin Papan naid chuibampec? — quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. <sup>66</sup> Adoac: —¿Mitsipadquidquico aton mado nepec? — quecuededpanëdash Sacadasën mado Nuquin Papan tantiamiaidquico isbededec.

### *Sacadas oncamiaid*

<sup>67</sup> Adnubien Uanën papa Sacadas Nuquin Papan Mayanën oncamiac nadec Esus chiec onquepanëdash:

<sup>68</sup> “Nuquin Papa isadaidbon Icbo nec, quequin chuibanuna. Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquico isadaidbo iquendac.

<sup>69</sup> Abi mënchicquid nadatiamboquid nendac. Tsusedpa Dabidën tsyuecquidquico aid nendac.

<sup>70</sup> Ambi chuimiaidon chiampicpadembi Nuquin Papan adquidquico icmianac.

<sup>71-73</sup> Nuquin tsusedpa Abadauan tantiaquin Nuquin Papan ambi chiampicpadembi nuquin tsusedpabo aton tsyuecquidbëdtabi abi chieshënquido nidtiapimbo yacnombo abi yacno yuedanquid Nuquin Icbo Abentsëcquiobi nec.

<sup>74</sup> Abi cudasquin mënchicquid yec dacuëdenquico yec Nuquin Papan namiaidombo iquendac.

<sup>75</sup> Adquid yec icsaisa abipadquico bëdamboec tabadquid icsho nuqui aidën isendac ënenquiocquin.”

Adec Esus chiec onquiashic nadec aton mado chiec Sacadas onqueoapanëdash:

<sup>76</sup> “Adnubien nëbi Nuquin Papan chomiaid chuibanquidquico mibi nec, quequin utsibon mibi cuënendac, mado. Nuquin Icbo choec, quequin utsibon tantiabicnuc bëyuc tantiashun abi chuiquidquico mibi iquendac.

<sup>77</sup> Adquid icquin mibi icsaquid icsho cuidnushe quiash abided cuidadquid tantiasho isash Nuquin Papa mibi icsaid tantienquico yec bëpiscudendac, quequin chuibanquid mibi iquendac, mado.

<sup>78</sup> Nuquin Papan matses tantiaquin naquidquico icquin abipadquidquico icsaisa abi yacnoshon chomiaidquico iquendac.

<sup>79</sup> Aidën tantiamiac unësash abi iquendac. Adquid shubu abentsëquën tabadacpadec tabadendac, quequin mimbi chiendac, mado,”

quec Uanën papa Sacadas Nuquin Papan Mayanën oncamiac onquepanëdash.

### *Matses nibëdacno Uan tabadcueniaid*

<sup>80</sup> Adashic, Sacadasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

## 2

<sup>1</sup> Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, ¿Ëmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuipanëdash. <sup>2</sup> Sidenio nidaid Sidia caid yacnoquido chuiquid, cobednadod caid icpanëdash.

<sup>3</sup> Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

<sup>4</sup> Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampid-nombobi nidaid Udeya caid yacno shubu dadpen icquid Beden caid yacno chopanëdash.

<sup>5</sup> Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash. <sup>6</sup> Ambo choquin aton bacuë nuambo usumpanëdash.

<sup>7</sup> Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

### *Obeca pemebanquin buanquido Nuquin Papan uaidon chiaid*

<sup>8</sup> Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash. <sup>9</sup> Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenec obeca pemebanquin buanquido dacuëdcuededpanëdash. <sup>10</sup> Dacuëdsho isash: —Chiaid bëda chuinuec chobique.

Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac. <sup>11</sup> Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. <sup>12</sup> Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquiec uesho istuidash, Nuquin Papan chomiaid Quidistu nec, mibi quependac. <sup>13</sup> Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec nadec cuëdëncuededpanëdash:

<sup>14</sup> “Nuquin Papa abucquio tabadquid abitedi uaquidquio bëdamboshë iquec.

Nuquin Papan bëdamboen isaïdo ma abëdi tabadpanuna,”

quec cuëdëmpañëdash. <sup>15</sup> Adec cuëdëdash Nuquin Papan uaido mayan bëdabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu.

Nid —quianec nidpanëdash. <sup>16</sup> Adec nidshun nidaidën capuquidën pete santen bacuë nanacsho istuidpanëdash. <sup>17</sup> Isanec nidquimbi ambi isboedbëdta ambi tantiaboed chiac

<sup>18</sup> tantiaquidtedi: —¿Midapadquidien capec? —quecuededpanëdash. <sup>19</sup> Aden obeca pemebanquin buanquidon chiaid tantiash bëpiscudenquio yec Èsusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañëdash.

<sup>20</sup> Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiec onquecuededpanëdash.

### *Nuquin Papa tabadte shubu uashunaid yacno Esus buanaid*

<sup>21</sup> Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpanëdash.

<sup>22</sup> Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte



shubu uashunaid yacno choshon, Con bacuë Nuquin Papan namiaidquio nec, quequin ismepanëdash. <sup>23</sup> Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. <sup>24</sup> Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

<sup>25</sup> Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash. <sup>26</sup> Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquio choacsho unësabicquin isendambi, quequin tantiapanëdash. <sup>27</sup> Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash. <sup>28</sup> Esus bësho isun Simeyonën Esus bedshun icucquin Nuquin Papan naid naden chuibanpanëdash:

<sup>29-30</sup> “Abitedishun Icho icquin mimbi ëndenquio chiampid nëbi nëid isembi.

Nëid isash unësmane quenquio yec, Cuishon, quec unësebi, Papa.

<sup>31</sup> Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

<sup>32</sup> Nëidëmbi mimbi tantiacpaden chuibanquin

isadaidbo bëdambo icmendac,”

quepanëdash Simeyon.

<sup>33</sup> Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. <sup>34</sup> Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madi- auidtsëqui naden Simeyonën chuiapanëdash: —Chuinu. Tantiata. Nëid bacuë tantiesä isadaidbo utsi-utsiec icsho Nuquin Papan uguë nësecaindac. Min mado tantiaquid utsi- utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dad- penshun icsamboen chuided-chuidedendac. <sup>35</sup> Adsho ambi ompoquin naid icsabëdta ambi tantiaid icsa tantiamequid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

<sup>36</sup> Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënënen bedac abëdi seta 7ted matamiash tabadnubi <sup>37</sup> aton bënë unësapanëdash. Aton bënë unësan Nuquin Papa tabadte shubu uashu- naid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenepanëdash. <sup>38</sup> Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo icsaquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

<sup>39</sup> Adashic, Nuquin Papan naden nata quequin chiacpaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash.

<sup>40</sup> Ambo tabadnubi aton bacuë Esus dada bëdambo yec canicuempanëdash. Aidi comape- nen tantiaquidquio Nuquin Papan bëdamboen isaidquio icpanëdash.

*Canicuenash Nuquin Papa tabadte shubu uashunaidën Esus tabadaid*

<sup>41</sup> Adashic, Ęmbi bëyuc tishaid unës uamenushe queshun intaquën aton shubu shëcuë ěcnoshcacsho isun aidon bëyuc tishaid unës menquiocquin Nuquin Papan uaid mayan bėdan matampampid tantiata ushë yanuc Madia Osebėd Edusaden yacno nidoapanėdash. Nuquin Papan chiapadequi setan-setanquiec nidtenepanėdash. <sup>42</sup> Adecbidi, Esus abi tishaid seta 12ted yanash canicuenash anibėd Edusaden yacno nidpanėdash. <sup>43</sup> Adec ambo nidashic nami uabicquid petequid tantiaid ushėtedi tantiec tabadtenepanėdash. <sup>44</sup> Adec ambo tabadquin nainash Esus ambobi icnubi tantienquio yec Madia Osebėd auėshquio nidoapanėdash. Adec nidash inchėshbudtsėqui abėd chobedo yacno capuquin Esus nibėmbenepanėdash. <sup>45</sup> Aden nibėnquin istuidabi yec Edusaden yacno padpidec nidoapanėdash. <sup>46</sup> Daėdec ushquin nibėnshun Nuquin Papa tabadte shubu uashunaid yacno puduedshun Esus tsadsho istuidpanėdash. Ambo tsadec Nuquin Papan chiaid tantiamequin chuibanquidbėd onquecuededsho istuidpanėdash. <sup>47</sup> Adec onquec tsadsho isquin, Bėdamboen tantiaquin chuibanquidquio nėid nec, quequin utsibon tantiabededpanėdash. <sup>48</sup> Adnubien, ĵMitsipadquid con mado nepec? quequin otacquio Madian tantiapanėdash. Aden tantiequi: –ĵAtotsi quiash ěbi daėdi tantienquio yec nėmbo choash mibi tabade, mado? Unėsquiocquin papabėdtambi mibi nibėmbeniombi –capanėdash anin.

<sup>49</sup> Adoquien Esus: –ĵAtotsieshun ěbi nibėno? Con Pa shubu uashunaidėn tabadnuec chobosh nebi. ĵTantienquioda mimbi icpe? <sup>50</sup> Aden Esusėn chuisho anibėdtan Osen tantienquiocpanėdash.

<sup>51</sup> Adashien: –Nidnu. Nid, mado –anin cac cacuidenquio yec Nasaded yacno anibėdi choash tabadquin Madian chiaidbėdta Osen chiaid tantiaquin Esusėn nadenepanėdash. Adec tabadnubi aton titan ambi isboedbėdta ambi tantienquio yaid bėpiscudenquiocquin tantiadenepanėdash.

<sup>52</sup> Adnubien comapenen tantiec bėdamboec canidopanėdash. Adquid icsho Esus Nuquin Papan bėdamboen isacpadomboen adomboembidi matsesėn isbededpanėdash.

### 3

#### *Esus choec, quequin Uan mentoanquidėn chiaid*

*(Mat 3.1-12; Mad 1.1-8; Uan 1.19-28)*

<sup>1</sup> Adashic, seta 15ted matamec Tibedio Sesad cuėmėdquid, Doma yacno tabadequi abitedi ancaquid dapa, empedadod caid icpanėdash. Aidi Doma yacnocquido ancaquid dapa icnubien Ponsio Pidato cuėmėdquid, nidaid Udeya caid yacnocquido ancaquid, cobednadod caid icpanėdash. Aid daėd ancanquid icnubien Edodes cuėmėdquid, nidaid Cadidia caid yacnocquido ancaquid, cobednadod caidbidi icpanėdash. Ancanquid aidtedi icnubien Edodesėn utsi, Uedipe cuėmėdquid nidaid Itudeya caid yacnocquidobėdi nidaid Tėdaconite caid yacnocquido ancaquid, cobednadod caidbidi icpanėdash. Ancanquid aidtedi icnubien Disanias cuėmėdquid nidaid Abidinia caid yacnocquido ancanquid cobednadod caid icpanėdash. <sup>2</sup> Ancanquid aidtedi icnubien Anasbėdi Caipas isadaidbo tsusio dapabo icpanėdash. Aid daėdi isadaidbo tsusio icnubien Uan, Sacdiasėn mado matses nibėdacnombo tabadshobi Nuquin Papan, Ęmbi chiaid chuibanta, capanėdash. <sup>3</sup> Adoac acte Odan caid cuėmano capuquimbi naden chuibanpanėdash. Mimbi tantiaid icsa ěnta. Aden ěnsho isun mimbi icsambocquin naboed tantienquio yacnimboen Nuquin Papan mibi bėdamboen isendac. Ęmbi tantiaid icsa nainquiocquin ěnu, mibi quesho tantiashun mibi acten mentono, quequin chochoquid cho-choquidquien Uanėn chuidednepanėdash.

<sup>4</sup> Ęndenquimbo Nuquin Papan tantiamiac Isayasėn Uan chuiquin dada uampicpadequi Uan icpanėdash. Naden Isayasėn Uan chuiquin dada uapampic: “Matses nibėdacnombo tabadquidėn ěcauanshun naden chiendac: Nuquin Icombo choeque. Aid tantianu, quequin mimbi tantiaid icsa ěmbanta.

<sup>5</sup> Umbo ancuenquo chosho isnu quequin cuembocnoc andëdshun ambescabanac bimboen abimbo chuiquidënquo chiaid tantianu, quequin mimbi tanti-aid icsa ëmbanta.

<sup>6</sup> Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,” quequin Isayasën Uan tishabicnuc chuiquin dada uapampid nec.

<sup>7</sup> Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuid-nushe queshun ambi mënchictequid icta, quequin mibi chiosh? ¿Aidën chiaid tanti-ashta acten mentomenuec cho? <sup>8</sup> Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquid icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquid nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan. <sup>9</sup> Adequi onquebudec: —Cuëte icsatedi matenu, quequin cuëte bacuëesa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, queshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

<sup>10</sup> Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccuededquido.

<sup>11</sup> Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

<sup>12</sup> Adecbidi ancanquid dapan matses utsin na bedtequid nëidted bedta caidotsen acten mentomenuec cho-chopanëdash. Choshon Uanën chuibansho tantiash: —Chian anëdënquequid nësiate ictiapimbocquin ¿atotsimbi napeba? —quepanëdash.

<sup>13</sup> Adoaquien: —Ancanquid dapan chiactedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

<sup>14</sup> Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

<sup>15</sup> Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

<sup>16</sup> Adsho tantiash: —Mibi acten mentoquidquid nebi. Padnuen ëbipadquidpenquo nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquid Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquid icmendac aton Mayanën. Adoac ënsho isun pauquendac —quepanëdash Uan. <sup>17</sup> Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. <sup>18</sup> Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

<sup>19</sup> Adshumbic, ancanquid Edodesën tantiaid icsatsen Uanën chuibanpanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuoapanëdash. <sup>20</sup> Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe queshun.

*Esus acten mentoaid*  
(*Mat 3.13-17; Mad 1.9-11*)

<sup>21</sup> Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquin mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec <sup>22</sup> dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadece aton Papa onquepanëdash: — Mibentsëquiobi icshe ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

*Esuquidistun tsusedpabo chiaidtedi*  
(*Mat 1.1-17*)

<sup>23</sup> Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiahe aton matses nadpanëdash. Osen mado nec, quish, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icho icnuc Esusën tsusedpabo nëidtedi iquec: aton buchido Edi cuëmëdquid icpanëdash. <sup>24</sup> Aidën papabic Matic cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, <sup>25</sup> aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, <sup>26</sup> aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, <sup>27</sup> aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, <sup>28</sup> aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, <sup>29</sup> aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matic cuëmëdquid, <sup>30</sup> aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, <sup>31</sup> aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, <sup>32</sup> aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, <sup>33</sup> aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, <sup>34</sup> aidën papabic Acoho cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, <sup>35</sup> aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid, <sup>36</sup> aidën papabic Cainan cuëmëdquid, aidën papabic Adpashad cuëmëdquid, aidën papabic Sen cuëmëdquid, aidën papabic Noe cuëmëdquid, aidën papabic Damec cuëmëdquid, <sup>37</sup> aidën papabic Matusaden cuëmëdquid, aidën papabic Enoc cuëmëdquid, aidën papabic Aded cuëmëdquid, aidën papabic Macadaded cuëmëdquid, aidën papabic Cainan cuëmëdquid, <sup>38</sup> aidën papabic Enos cuëmëdquid, aidën papabic Sed cuëmëdquid, aidën papa abia uampid Adan cuëmëdquid, aidën papambo Nuquin Papa abia yanampidquio nec. Abi tabadec. Aidedi Esusën tsusedpabo nec.

## 4

*Satanas Esus icsamete bunaid*  
(*Mat 4.1-11; Mad 1.12-13*)



<sup>1</sup> Adshumbic, Matses nebi, quequin Nuquin Papan chiacpaden nanuen acten mentomepanëdash Esusën. Aden Uanën acten mentoquien Nuquin Papan Mayanën chiacpadec acte Odan caid yacnoësh puduanec matses nibëdacnombo nidash tsadpanëdash. <sup>2</sup> Ushë utsi nidash utsi choaid abuctotsëcquiecnuc ambobi tsadpanëdash. Aidtedi ushquin penquio yash Esus bundopanëdash.

<sup>3</sup> Bundoacsho isash Nuquin Papa chieshënquid choash Satanas nadpanëdash: — Nuquin Papan madombo icquin penun cuënotebi pete icta cata —capanëdash Satanasën Esus chuiquin.

<sup>4</sup> Adoquien: —Padi: “Peteuidi pec bëdamboec tabadtemaid nec,” quequin dada uapampic —quepanëdash Esus Satanas caic.

<sup>5</sup> Adoshombic, macuësh dapa abucquio yacno Esus buanshun Satanasën badedquio nidaidtedi ismebampanëdash. <sup>6</sup> Ismiash: —Nidaidën icquidtedishun icbo icmiaidquio nebi. Abitedi con na nec. Ęmbi menenu cac aidtedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. <sup>7</sup> Nidaidën tabadquidtedi chuiquid dapa icnu quequin, Con icbo mibi nec, ëbi casho adquid mibi icmëmbi —quepanëdash Satanas Esus caic.

<sup>8</sup> Adoquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icbombo neque. Aidën namiaidquio icta” —quepanëdash Esus Satanas caic.

<sup>9</sup> Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta. <sup>10</sup> Naden dada uapampid iqueque. Tantia. Chuinu.

“Mibi pudunsho isun, Tsicatequin bëdamboen budmeta, quequin Nuquin Papan ambi uaido mayan bëdabo chiendac.

<sup>11</sup> Aidombi min taën tsasimbocquid tincanushe qeshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanasën Esus chuiquin.

<sup>12</sup> Adoquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

<sup>13</sup> Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuquin Esus tanun nanuna, quequin ambibi tantianec Esus nianec Satanas nidpanëdash.

### *Nasaded yacnoquido Esus bunesabo*

*(Mat 4.12-17; 13.53-58; Mad 1.14-15; 6.1-6)*

<sup>14</sup> Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. <sup>15</sup> Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusën chuibampanëdash. Aden chuisho tantiaish, Nuquin Papan chiaid tantiaquidquio Esus nec, quec cuëdëncuededpanëdash.

<sup>16</sup> Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash.

<sup>17</sup> Nidtosho isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniac sananquin seccudoabanquin isbanec nadec Esus onquepanëdash:



18 “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

19 Aidën Nuquin Icbon bëdamboen iste chuibanta caidquio nebi.”

20 Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. 21 Adoac: —Nuquin Papan chiaid mimbi tantiaboed nëbimbobi tauadoec —quepanëdash Esus abibi chiadequi.

22 Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

23 Adoaquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. 24 Abimbo chiembique. Tantiata —quiash Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuibansho tantienquiocquid icpec. 25 Ëndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënuua chidobo dadpen icpampic. Aido adquid icnubien seta abentsëc chotsëcnuc matamec aton pete nibëdquiec yanubi isadaidbon bënuuabo bunec tabadpampic. 26 Adec bunec tabadsho isun, Isadaidbon bënuua yacno nidta, quenquiocquin isadaidpembon bënuua yacno pemenuec nidta cac Edias nidshun ambi chiapadomboen isadaidpembon bënuuan nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. 27 Adashic, adecbidi isadaidbo abi daushumbo yacno mishac mishadenquio yacbimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembon abentsëc Naman cuëmëdquid Ediseyon bëdamepampic. Ëbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

28 Aden Esusën isadaidpembon nashumpampid chuisho tantiaish iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash. 29 Adec nëishash nidanec nuntanuësh pudue-nanec shubu ënëdacno nidshun acte dapa quiusudacnombo nebudnuequin Esus buampänëdash. 30 Aden nidmiaquien matses dadpen icquid natsusash Esus nidpanëdash.

*Mayan icsa dapuduedaid cuemete  
(Mad 1.21-28)*

31 Adec abi caniacnoësh Nasaded caid yacno nidtanashi nidaid Cadidia yacno nid-  
equi Capednaun caid yacno Esus choapanëdash. Ambo choash chonoadtemaid ushë  
icnuc Nuquin Papan chiaid chuibante shubun puduedshun Nuquin Papan chiaid  
chuibampänëdash. 32 Aden chuibansho tantiaish: —Ambia tantiaquidën chiacpaden  
chuibanquidien Esus nechitec —quecuededpanëdash anocquido.

33 Aden Esusën chuibanubien Nuquin Papan chiaid chuibante shubu nuntan mayan  
icsa dapuduedaid icpanëdash. Aidi comapenec sidquetanec onquec: 34 —¿Nasaded  
yacnocquid Esus caid atotsi quec mibi cho? ¿Ëbipadquidtedi naimbudmenuecta cho?  
Ëmbi isaid mibi nec. Nuquin Papan bëdamboen isaidquio, icsapenquiocquidquio mibi  
nec —mayan icsan caquien: 35 —Otaquio tabad. Adec tabadec dapuduenta —Esusën cac  
mayan icsan abi dapuduedaid tacpanën nebudec icsa uainquio yec dapuduempanëdash.

<sup>36</sup> Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnoquido. <sup>37</sup> Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

*Daicsambocquid dadpen Esusën bëdamiaid*  
(*Mat 8.14-17; Mad 1.29-34*)

<sup>38</sup> Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

<sup>39</sup> Simonën nachi yacno choash dayunquio nidtuidec: —Chumbocquid daebudta —Esus quenubi badedquio daebudpanëdash. Adec daebudash nidtoson codocashun Esusbëd icquido pemepanëdash Simonën nachin.

<sup>40</sup> Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. <sup>41</sup> Adembidi mayan icsa utsi-utsien dapudue-mepanëdash. Adoac, Nuquin Papan madombobi mibi nec, quec sidquesho tantiasun: —Nuquin Papan chomiaid nec, quequin ëbi chiec adec onquenda —Esusën cac mayan icsa ënëdpanëdash.

<sup>42</sup> Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquio yec ëbëdi tabadta —capanëdash istuidquidon.

<sup>43</sup> Adoquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuc nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

<sup>44</sup> Aden chiashic Nuquin Papan chiaid chuibante shubu utsin-utsinquec pudued-cuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choson aden Esusën chuibampanëdash.

## 5

*Abëd tabadmenuen chomiaid*  
(*Mat 4.18-22; Mad 1.16-20*)

<sup>1</sup> Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash. <sup>2</sup> Adnubien masi yacno aton cano daëd nëshun icbon aton nëshaidtedi pambampanëdash. <sup>3</sup> Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

<sup>4</sup> Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

<sup>5</sup> Adoquien: —Icho, inchëshëmbi nuëcquid bednuec nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

<sup>6</sup> Adash shodombo yacno nidshun nëshaid nënetanquin nuëcquid dadpenquioshë bedac nëshaid tësëdec taëpanëdash. <sup>7</sup> Adsho isun abëdtan nuëcquid beduidboedo cuënquin, Cadoc cho, quequin ismiac aido cano utsin choson cano cubu-cubutsëcquiocnoc nuëcquid sandoac cano daëd mentoadtsempanëdash.

<sup>8</sup> Adoanec Esus yacno choequi danëshën sebudec shuebudash Simon Petedon: —Icho, ëbëd iqenquio yec nidaneta. Icsambocquid nebi que —capanëdash Esus chuiquin.

<sup>9</sup> Abëd icquidobëdtan nuëcquid dadpen bedboed tantiadempanbo iquec, Esus nadatiambocquid nec, quequin tantiec onquepanëdash Petedo. <sup>10</sup> Acobo Uan chedo tantiadempanbo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic. <sup>11</sup> Aden chiaquien aton cano acte cuëman nëshanec aton natedi nianec, Esusën chiapaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bëdamiaid*  
(*Mat 8.1-4; Mad 1.40-45*)

<sup>12</sup> Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

<sup>13</sup> Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

<sup>14</sup> Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

<sup>15</sup> Adnubien Esusën bëdamesho isquidon Esusën bëdamiaid chuibanac matses dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash. <sup>16</sup> Adashien matses nibëdacnombo nidash Nuquin Papa chiec onquepanëdash.

*Dada shëquëquenquiocquid bëdamiaid*  
(*Mat 9.1-8; Mad 2.1-12*)

<sup>17</sup> Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Caidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuc Esus icpanëdash. <sup>18</sup> Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan nënantanquio Esus icnubi <sup>19</sup> matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chicchicshun dada shëquëquenquiocquid abi bëquidon imbudpanëdash.

<sup>20</sup> Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

<sup>21</sup> Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bëpiscudquidquio nec —quepanëdash ambibi tantiacpadec onquec.

<sup>22</sup> Aidon tantiaid tantiec Esus: —¿Atotsi quiash mimbibi icsamboen tantiec onquepe? <sup>23</sup> ¿Mimbi tantiaid icsa cuidenquio yec bëpiscudtequidquio nendac ëmbi chiaidquio bëdantequidpenda nedic? Adecbidi, ¿Mibi icsambochoedi mibi bëdanoque. Nidtoash nidta, quequin chiaid bëdantequidpenda nedic? <sup>24</sup> Nuquin Papan chomiaid icquimbi mimbi tantiaid icsa cuidenquio yec bëpiscudtequidquio nendac ëmbi cac ad iquendac.

Nuquin Papan chuimaidquoio nec mibitedi camenuen dada shëquëquenquiocquid naden chiembique Tantia. Nidtoash nidquin min di buanec nid –capanëdash Esusën dada shëquëquenquiocquid chuiquin. <sup>25</sup> Adoac nidtoshon aton di bedanec Nuquin Papan naboed chuibanequi aton shubuno nidpanëdash.

<sup>26</sup> Adsho isash tantiadempambo yec Nuquin Papan naid chiec onquecuededec tabadpanëdash: –Aden bëdamiaid isenquiochoedëmbi nëbimbobi aid isbempombi –quecuededpanëdash.

*Debi, ëbi tsibanec cho, quequin Esusën chiaid*  
(Mat 9.9-13; Mad 2.13-17)

<sup>27</sup> Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: –Ëmbi chiaid tantianush ëbi tsibanec cho –Esusën cac <sup>28</sup> Debi nidtoanec aton natedi nianec Esus tsibananec nidpanëdash.

<sup>29</sup> Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. <sup>30</sup> Aden adquidobëdtan Esusën pesho isash padiseyobo: –¿Atotsieshun mibi chuiquidbëdtan mibitedishun icsambocquidbëdtan pepeba? –quepanëdash Esusbëd icquido caic.

<sup>31</sup> Aden chuisho tantiash Esus nadpanëdash: –Ëbi bëdamec cho, quenquio bëdambocquid iquec. Daicsambocquidien, Ëbi bëdamec cho, quendac. <sup>32</sup> Adecbidi, Nuquin Papan bëdamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi –quepanëdash Esus padiseyobo caic.

*Buna mëmunaid*  
(Mat 9.14-17; Mad 2.18-22)

<sup>33</sup> Aden Esusën chuibansho tantiashun naden padiseyobon Esus chuipanëdash: –Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna mëmunenquiocquin peshun sicaid actenec –quepanëdash padiseyobo Esus chiec.

<sup>34</sup> Adoquien: –Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec. <sup>35</sup> Yucash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec –quepanëdash Esus padiseyobo caic.

<sup>36</sup> Aden chuibanequi abi Esus onquec: –Dashcute chuca cuëshun dashcute shënbëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. <sup>37</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. <sup>38</sup> Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiabimboen Esusën padiseyobo chuipanëdash. <sup>39</sup> Adashic ambi ënden chiaid tantienquiochoedi nëbi Nuquin Papan chiaid utsi chuibanac tantiaquidquio iquendac –quepanëdash Esus.

## 6

*Chonoadtemaid ushë tantiaquid*  
(Mat 12.1-8; Mad 2.23-28)



<sup>1</sup> Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. <sup>2</sup> Aden pesho isquin padiseyobon: —¿Atotsieshun chonoadtemaid ushën chonoadpeque? Tantiu. Ëbi chui —capanëdash Esusbëd icquido chuiquin.

<sup>3</sup> Adoaquien: —¿Tsusedpa Dabid caidbëd icquidon piasquin pepampid tantiamboda ique? <sup>4</sup> Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: <sup>5</sup> —Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

*Mëuesadaid bëdamiaid  
(Mat 12.9-14; Mad 3.1-6)*

<sup>6</sup> Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. <sup>7</sup> Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. <sup>8</sup> Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

<sup>9</sup> Adsho isashien: —Tantiu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? —quepanëdash Esus.

<sup>10</sup> Aden chuishumbic iccuededquido isbanquin: —Ëbi mëd —cac Esus mëdequi mëuesadaid bëdampanëdash.

<sup>11</sup> Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënquido.

*Esusën, Ëbi chuibeneta, caido  
(Mat 10.1-4; Mad 3.13-19)*

<sup>12</sup> Adashic, ushë utsin macuësh yacno matses nibëdacno Nuquin Papa chiec onquenuc nidash inchëshën ushenquio yec Nuquin Papa chiec Esus onquepanëdash. <sup>13</sup> Badiadshun abëd icquido dadpen chomeshun, Ëbi chuibeneta, quequin 12tedictsëqui chuipanëdash. <sup>14</sup> Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; <sup>15</sup> utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; <sup>16</sup> utsibic, Udas, Acobon mado; utsibic, Udas Isca diote, yuecshun Esus chieshënquido Esus bedmequid. Aidtedi, Esusën, Ëbi chuibeneta, caido icpanëdash.

*Nuquin Papan bëdamboen isaïdo icnuc ambi icsamboen isaïdo  
(Mat 4.23-25; 5.1-12)*

<sup>17</sup> Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus niduntidpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuiban-sho tantianuec cho-choash tabadnubi, Ëbi bëdamepec, quequin tantiec utsibo choash



tabadpanëdash. <sup>18</sup> Adec choquido mayan icsa dapuduedaid icsho isun Esusën dapudue-mepanëdash. <sup>19</sup> Adsho isun nadatiambocquid Esus neque. Mishnu, qeshun mishequi bédancuededpanëdash.

<sup>20</sup> Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bédamboen isaïdo iquec abuc nidan con natedi mitsana nendac.

<sup>21</sup> “Nëuëshquio bundodenesho isun Nuquin Papan bédamboen isaïdo yec abuc ëbëd tabadec bundoesa iquendac.

“Nëuëshquio matses Nuquin Papan chiaïd tantiesä icsho isash unësquio yec shubided-nequid Nuquin Papan bédamboen isaïd yec abuc nidash ëbëd tabadec bédambo iquebi quependac adquido.

<sup>22</sup> “Esus tantiaquid icsho chieshënquin pudued cainquio yaid adembidi mua uaqin chuishunaid Nuquin Papan bédamboen isaïdquio nec.

<sup>23</sup> “Adomboembidi ëmbi ëndenquimbo chuimiaïd aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaïdënsun adoaid iquec Nuquin Papa yacno choacsho ambi bédambo icmiaïd mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

<sup>24</sup> “Padnuen, con na dadpen iquec, quequin tantiec bédamboec tabadebi, qesho Nuquin Papan icsamboen isaïdo mibi nec. Nidaïdënsun mimbi bedteniaïduidi tantiec Nuquin Papa yacno puduedtiapimbocquid mibi iquendac. Nidaïdën bédamboec tabadquin ënden bedondaïdi mibi nec.

<sup>25</sup> “Nidaïdënsun abi bunaidtedi bedquido Nuquin Papan icsamboen isaïdo nec. Abi bunaiduidi tantiaquin Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bédambo iquebi, quec mamë nec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquiendac.

<sup>26</sup> “Bédambocquid nec, quequin mibi dadpenshun chuisho tantienda. Adomboembidi mua uain Nuquin Papan ëndenquimbo chuimiaïdpembon chuipampic. Aidon chiaïd tantiasun tsusedpabon Nuquin Papan chiaïd tantienquio yanampic. Adquido Nuquin Papan icsamboen isaïdo nec —quepanëdash Esus.

*Mibi uimanënquido tantiaquin nabanta, quiaïd*

*(Mat 5.38-48; 7.12)*

<sup>27</sup> Aden chiashic abi Esus onquec: —Ëmbi chiaïd tantiaquidquio nad iqueque. Chuinu. Tantiata. Mibi chieshënquido bédamboen tantiaquin nabanta. <sup>28</sup> Adembidi mibi icsamboen chiquid bédamboen chuita. Adembidi, ëbi icsamboen naquido bédamboen tantiaquin cuidenda, Papa, quequin Nuquin Papa chuita. <sup>29</sup> Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bédamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. <sup>30</sup> Utsibic, aton na nibëdquid, Bec cho, qesho meneta. Adembidi utsin mitsana ampesho isun cuidenquiocquin bédamboen naoata. <sup>31</sup> Adembidi ëbi bédamboen nashuntiaquidi nepec quequin mimbi tantiacpadomboen utsi tantiaquin nashunta.

<sup>32</sup> “Ëbëd tantiananquiduidi tantianu, quec ¿bédamboda mibi icpe? Padenquio. Adem-bidi Esus tantiesan abipadquiocquido tantiec. <sup>33</sup> Adecbidi, Ëbi bédamboen tantiaquin nashunquiduidi tantiaquin nashunoanu quec ¿bédamboda mibi icpe? Padenquio. Esus tantiesan adembidi nashunquidquio nec. <sup>34</sup> Adecbidi, Ëbi menequiduidi menenu, quec ¿bédamboda mibi icpe? Padenquio. Esus tantiesan adenuidi menec. <sup>35</sup> Naden nata, quequin chuinu. Tantiä. Mibi chieshënquid icsho aid tantiaquin bédamboen nabanta.

Adembidi mibi meniantiapimbocquid, Bec cho, quesho, Yucash cuidnanun nanuna, quenquiocquin meneta. Mimbi adosho isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. <sup>36</sup> Nuquin Papan abi chieshēnquido nashundeniacpadomboen mibi chieshēnquido nashundeneta —quepanēdash Esus.

*Icsambocquid nec, quequin chienda, quiaid*  
(Mat 7.1-5)

<sup>37</sup> Aden chuibanashic Esus abi onquec: —Ēmbi tantiacpadomboen naisa icsambocquid nec, quenda. Adesa abi yacno choacsho Bēdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquio yec bēpiscudta. Adquid, Cuidnu, quenquio yec mimbi icsamboen tantiaquin naid Nuquin Papa bēpiscudendac. <sup>38</sup> Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniacpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac —quepanēdash Esus.

<sup>39</sup> Aden chuishumbic utsin tantienquio ictequid abēd icquido naden Esusēn chuipanēdash: —¿Podquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash. <sup>40</sup> Adembidi tantianuequidēn abi tantiamequid dēniactiapimbo iquec. Tantiamiac abi tantiamequidpadquid iquendac —quepanēdash Esus.

<sup>41</sup> Adoshombic adembi tantiamequin naden Esusēn chuipanēdash: —¿Atotsi quiash utsi bētsiadaid pistsēcquid isequi mibi bētsiadaid dapa isadtiapimbo icpec? ¿Mibibi bētsiadaid dapa bēbedadabicquin mitsipadentsi mimbi utsi bētsiadaid pistsēcquid bedshunuen ispe? <sup>42</sup> Adembidi, utsin tantiaid icsa abentsēc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ēnta, quequin utsi chuipe? Mimbi tantiaid icsa nibēdabimboen mimbi chuipeque. Adoenda. Mimbi tantiaid icsa ēnshun utsin tantiaid icsa icsho isun ēmenuequin chui —capanēdash Esusēn.

*Cuēte abipadquid aton bacuē nec, quequin chiaid*  
(Mat 7.17-20; 12.34-35)

<sup>43</sup> Adoshombic, adembidi Esusēn chuipanēdash: —Cuēte bēdan bacuē adquiobidi bacuēc. Cuēte icsan bacuē adquiobidi bacuēoaic. <sup>44</sup> Chetequid isun cuēte dada matsesēn tantiec. Aden tantiec nisanquidēn bacuē isash, Dadain bacuē nec, quenquio matses iquec. Adecbidi, echo bacuē isash, Bata nec, quenquio matses icoaic. <sup>45</sup> Adembidi bēdamboen tantiaquidēn ambi tantiacpadomboen utsi bēdamboen tantiaquin nabanendac. Adecbidi ambi tantiacpadec bēdamboec onquec. Adembidi icsamboen tantiaquidēn ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanēdash Esus.

*Tantiaquidquio icnuc tantiauidquid nec, quequin chiaid*  
(Mat 7.24-27)

<sup>46</sup> Adoshombic: —¿Atotsieshun, Con Icho mibi nec, queshumbi ēmbi chiapadomboen naisa mibi ne? <sup>47</sup> Ēbi yacno choshon ēmbi chuibanasho tantiaquiash nidshun nadomboen naquidquio iqueque. Chuinu. Tantiata. <sup>48</sup> Cunquequid dapan chimeshnushe queshun shubu uaquidēn shēcuē ēqueduc uēdēshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ēbi tantiaquidquio icquin ēmbi chiaid papuduedshun adomboembidi nabanquid nec. Adquidēn tantesa

uainquio iquendac. <sup>49</sup> Utsibic nad iqueque. Tantia. Ëquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquio yec natiamianquid chonoc abi papudueduidtsaid bëpiscudendac. Adquid uquë nësecatequid nendac –quepanëdash Esus.

## 7

### *Sondado chuiquidën tantiaid (Mat 8.5-13)*

<sup>1</sup> Aden iccuededquido chuiquin nainash Capednaun caid yacno Esus nidoapanëdash. <sup>2</sup> Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadtsëcquio icpanëdash. <sup>3</sup> Aton yua unëstiadtsëcquio icnubien, Nënquid bédamequid Esus nëmbobi iquec, quequin utsibon chiac:

–Aidën con yua bédametsiash –quianec isadaidbo tsusiobo yacno nidshun istuidash: –¿Con yua chiec Esus yacno ada mibi nidpatsia? –quepanëdash sondado chuiquid.

<sup>4-5</sup> Adoaquien: –Ai –quianec Esus yacno isadaidbo tsusiobo nidshun chuituidec: –Sondado chuiquidën chuitan caido nebi. Con yua unëstiadtsëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bédametiadquidi mibi nec –quepanëdash isadaidbo tsusiobo Esus caic.

Adoac aidobëdi Esus nidpanëdash. <sup>6</sup> Adec aidobëd Esus nidshobi sondado chuiquidën chomiaid utsibo choquin bëquedtuïdash nadpanëdash: –Sondado chuiquidën chomiaid nebi. Aidën chiaid chuïnuec chopobi. Naden chuïta, caposhi: “Padicnuna, Icho. Icsambocquid nebique. Mibi bédambocquid iquec con shubun puduedenquioctiadquidi mibi nec. <sup>7</sup> Ëbi icsambocquid iquec mibi bëquedec nidenquiocobi. Mibi bédamequid yec con shubun puduedenquiocquin mibi yacnoshombi, Bédanta, mimbi cac con yua bédampec. <sup>8</sup> Ëbien sondado chuiquid nec. Ëmbi nidta cacpadquiequi sondado nidec. Adecbidi, Cho, ëmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuipombi –quepanëdash sondado chuiquidën chuitan caido Esus caic.

<sup>9</sup> Adoaquien: –¿Abimbobida cai? –queshun ambi chiaid tantiamenuequin iccuededquido Esusën bëisbanquin nadopanëdash: –Chuïnu. Tantiata. Sondado chuiquid isadaidpembo ëbi tantiaquidpadquid isadaidbo nibëdec –quepanëdash Esus. <sup>10</sup> Aden chiaquien sondado chuiquidën chuitan caido auchbidi nidoash shubun puduedshun sondado chuiquidën yua bédamiaid istuidpanëdash.

### *Nianten mado uincuen uaid*

<sup>11</sup> Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash.

<sup>12</sup> Adec nidequi Nain tsasi uaid quënë shëcuë anoentsëqui choquimbi unësaid bëquido bëquedtuïdpanëdash. Unësaid epa icnubi ani niantte icpanëdash. Niantebëd Nain yacnoquido dadpen cho-chopanëdash. <sup>13</sup> Adec cho-choec niantte shubisho isash Esus unësquio yec: –Shubienquio yec ënëd –quepanëdash. <sup>14</sup> Adec, Ënëd, quetanec udictsëc nidshun unësaid nanaid Esusën mishnubi abi bëquido nidtuïdpanëdash. Nidtuïdsho isun: –Abuido, uëtsëdtota –cac <sup>15</sup> uëdtsëdtoash tsadec unësboed onquepanëdash. Adsho isash ani caic: –Në, unësboedi min mado uincuenoshe. Abëdi nidec nid –capanëdash Esusën.

<sup>16</sup> Aden unësaid uincuemesho isash cho-choquido: –Adopeshenda uincuemec –queshun Nuquin Papan naid chuïbampanëdash. Aden chuïbanec: –Nuquin Papan matses bédamboen isnuen ambi chomiaidquio nuquibëd icmïosh –quec isquido onquecuededpanëdash.

<sup>17</sup> Aden isash nidshun unësaid uincuemiaid isquidon chuibansho isadaidbon nidaid Udeya caid yacnocquidon tantiabempanëdash. Adembidi chiac dëuequidontsen tantia-panëdash.

*Ëbitedishun cainaid mibi nec, quequin Uanën chiaid*

*(Mat 11.2-19)*

<sup>18</sup> Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash: <sup>19</sup> –Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita –Uanën cac aid daëdi Esus yacno nidpanëdash.

<sup>20</sup> Adec Esus yacno choash: –Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan –quepanëdash Uanën chomiaido Esus caic.

<sup>21</sup> Aden chiaquien icsambocquid bédamequinc, mayan icsa dapuduedaid dapudue-mequinc, bëshuaid bédamequinc caquin Esusën ismëbampanëdash. <sup>22</sup> Aden nabanquin nainashic: –Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta. <sup>23</sup> Ëmbi aden nabansho isun tantesa uainquioc-quin Nuquin Papan bédamboen isaidquido nendac, Esus quiosh quequin Uan chuitanta –quepanëdash Esus Uanën chomiaid daëd chiec.

<sup>24</sup> Adashic, Uanën chomiaido nidambi iccuededquido tantiamëbanuec Uan chiec Esus nadpanëdash: –¿Atotsi isnuec matses nibëdacno nidonda? ¿Cunquequidën ishçunaid isnuecta niddionda? <sup>25</sup> ¿Aid isnuec nidenquido yec atotsi isnuec nidonda? ¿Dashcute ushumbocquid dasiuidquid isnuecta niddionda? Padenquido. Dashcute ushumbocquid dasiuidquido aton na dadpenquido icquido ancanquid dapan shubun tabadquido nec.

<sup>26</sup> Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. <sup>27</sup> Ëbi cain naden Uan Nuquin Papan chuimiampid nec:

“Mibi choec quequin chuibanquidba chomëmbi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

<sup>28</sup> “Adëmbi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquido icpash. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec –quepanëdash Esus.

<sup>29</sup> Aden Esusën chuibansho tantiash: –Nuquin Papan naid bédambo iquec –quepanëdash Uanën mentobanondaido. <sup>30</sup> Utsiboen ambi tantiaid icsa ënenquido icquin Uan Esusën chuisho tantiash, Nuquin Papan naid bédambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamëquido icpanëdash.

<sup>31</sup> Aden Uan chiash Esus: –¿Nuquin Papan chiaid nëbi chuisho tantiesa mitsipadquid nepeque? <sup>32</sup> Adquid chuinu. Tantiata. Ambi tantiacpaden naisa icsho isash bacuëbo



yacimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquo iquec. Adquidën Nuquin Papan chuimiaidën nabansho icsamboen ispec. <sup>33</sup> Nua cubudquin pesa Uan icsho isash, Mayan icsa dapuedaid nec, queposh Uanën chuisho tantiesa. <sup>34</sup> Ęmbi peshun acsho isec, Nua peshun tantienquiocquin acquid nepec. Aidbidi icsambocquidoböd icquid nec, ëbi caposh. <sup>35</sup> Aden tantienquiocquid, Bëdamboen tantianu, queshun bëdamboen tantiaquidënquo chuibansho tantiash abi tantiamequidpadquid iquendac –quepanëdash Esus.

### *Chidon Esus tanoshcaid*

<sup>36</sup> Adashic, Ębi yacno pec cho, padiseyobo abentsëcshun cac aidböd nidash shubun puduedash pete santen cuëshnudash Esus uepanëdash. <sup>37</sup> Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. <sup>38</sup> Aden bëequi Esus yuedacno choash puduedshun abi bëdamequid Esus istuidash, Ębi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachoccabanshun noadte bëdan chidon tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

<sup>39</sup> Chidon adosho isash Esus yuedquid, Simon caid, abibi onquec: “Ęmbi yuedaid Nuquin Papan chuimiaid iquec, Ębi mishquid icsambocquid nec,” quequin chido mishmenquo icpec, quepanëdash Simon.

<sup>40</sup> Adoaquien, tantiaquidquo icquin Esusën: –Mibi tantiamequin chuinu. Tantiata, Simon –capanëdash.

Adoaquien: –Aden chuiban. Tantianu –quepanëdash Simon.

<sup>41</sup> Aden tantiashun Esusën Simon ambi tantiaid icsa tantiamenuen utsi chuiquin nadopanëdash: –Bec cho. Yuecshun menenun nanuna, quepondash daëd. Abentsëcshun dadpen bedshunubi utsin daëdpactsëc bedshumpondash. <sup>42</sup> Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquo icpec? –quepanëdash Esus Simon caic.

<sup>43</sup> Adoaquien: –Ambi dadpen meneshun cuidenda caidien nechitec –quepanëdash Simon.

Aden chiaquien: –Ai, bëdamboen tantiaquin mimbi chioc –quiash <sup>44</sup> Simon ismenuec Esus chido yacmi bidiadshun naden chuipanëdash: –Min shubun puduedacsho mimbi taë pante ëbi menenquioccoc. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. <sup>45</sup> Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. <sup>46</sup> Bëchin manoshcanesa mibi iccoc. Padnueni nëid chidombi noadte bëdan tanoshcaniosh. <sup>47</sup> Adembidi mibi chiembique. Tantiata. Mayan icsa dadpenshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Ęmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumënc –quepanëdash Esus Simon caic.

<sup>48</sup> Aden Simon chiashic chido caic: –Icsaquid nec, quenquiocquin icsainquo yacimboecquid mibi isembi –quepanëdash Esus chido chuioaic.

<sup>49</sup> Adsho tantiash: –Icsainquo yacimboecquid mibi isembi, quec ¿mitsipadquid Esus nepec? –quepanëdash iccuededquido. <sup>50</sup> Aden iccuededquidon tantianubi chido caic



Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquio yec nidta —quepanëdash chido caic.

## 8

### *Chidobo abi nashunquido*

<sup>1</sup> Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yachimboec nidaidën tabadaid chuibenepanëdash. Abi bëdamequid tsibananec chidobo nidpanëdash. <sup>2</sup> Ambi mayan icsa dapuduemiaidobëdtan ambi bëdamiaidon Esus tsibanampanëdash. Madia, Macada yacnoshon tishaid chedon Esus tsibampanëdash. Mayan icsa 7ted dapuduemiaid Madia icpanëdash. <sup>3</sup> Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

### *Pete ëshë sequid*

*(Mat 13.1-23; Mad 4.1-20)*

<sup>4</sup> Aden chuibenias tabadtuidtsëcnubi ambi chuiquin tantiemeboedo cho-choquin tsibanampanëdash. Cho-chosho isun, Mibibimboecnuc chiemi, quenquiocquin Esusën nadopanëdash: <sup>5</sup> —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. <sup>6</sup> Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. <sup>7</sup> Utsibic, nisanquid dëyucacno secac aidbëdi dëyucash caniduidtsacsho nisanquidën bëtinaç unësquid. <sup>8</sup> Utsibic, nidaid bëdan secac dëyucash canias dadpen ëshëendac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

<sup>9</sup> Adoaquien: —¿Mitsipadquid tantiaid mimbi chuiboed icpec? Èbitedi tantiemequin chuiua —capanëdash abëd icquidon.

<sup>10</sup> Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabeneç. Padnuen utsibon tantienquio yaid aid iquec. Aden chiac:

“Ëshë bëdambocquid icquimbi tantiesa icquin ma Nuquin Papa yacno isenquiocpanuna. Adembidi tantiate bëdambocquid icquimbi tantiesa icquin ma abimbo chiaid tantien-

quiocpanuna”

—quepanëdash Esus.

<sup>11</sup> Aden chiashic: —Ëmbi chuiboed nad iqueque. Tanta. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. <sup>12</sup> Podquedën nidaid tsasimbocquidbimboecquid nad iquec. Nuquin Papan chiaid tantias papuduedtiapimbocsho Satansën bëpiscudmiaid adquid nec. <sup>13</sup> Cuënote dadpen samëdacno nidaidbimboecquid nadquid iquendac. Nuquin Papan chiaid tantias, Bëdambo iquebi, quiashic natiamianquieç cametequid icnuc aid tantieç Nuquin Papan chiaid papudueduidquid iquendac. <sup>14</sup> Nisanquid dëyucaid dadpen yacno nidaidbimboecquid nad iquec. Nuquin Papan chiaid tantias abi bunaid, abi nënaid, ambi natequid adquid tantiaquin Nuquin Papan chiaid bëtashacimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac. <sup>15</sup> Nidaid bëdabimboecquidien nad iquec. Nuquin Papan chiaid tantiadoneç bëdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac

Esus tantiaquid utsi dadpen yampec –quepanëdash Esus ambi chuiboed abëd icquido tantiamenuec.

*Tabote nënantan nanac chënquiacbimboecquid*  
(Mad 4.21-25)

<sup>16</sup> Aden chuishumbic naden Esusën chuoapanëdash: –Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. <sup>17</sup> Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac. <sup>18</sup> Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpader tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiembi, queshun papuduedmenquiocquin bëdamboen ismesa nec. Aden ambi tantiauidaid uesadendac –quepanëdash Esus.

*Aton utsibo aton titabëd choaid*  
(Mat 12.46-50; Mad 3.31-35)

<sup>19</sup> Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Ëbi choaid chuita, cac <sup>20</sup> shubun puduedshun: –Titabëd min utsibo choshon umanucshun mibi cainec mibëd onquete bunquin –capanëdash Esus chuiquin.

<sup>21</sup> Adoaquien: –Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi –quepanëdash Esus.

*Acte tëccoasquesho ënëdmiaid*  
(Mat 8.23-27; Mad 4.35-41)

<sup>22</sup> Adashic: –Chian cuëma utsiuc nidnu. Nid –quianec abëd icquidobëd cano antsadtoanec nidpanëdash. <sup>23</sup> Adec nidec cano anuequi Esus ushtopanëdash. Adec ushnuvien cunquequid dapa comapenec cunquenubi acte tëccoasquequidën acte uemiac cano mentoadtsempanëdash. Adsho isash dacuëdec <sup>24</sup> Esus ushacno nidshun tinec abëd icquido: –Nuqui mentoadequie. Isucun, Icbo –quec comapenec cuëdpanëdash abëd icquido. Adsho tantiash isucunash nidtoshon: –Mibi comapenec cunqueque. Ënëd –Esusën cac cunquequid badedquio ënëdpanëdash. Adembidi: –Mibi comapenec tëccoasqueque. Ënëd –Esusën cac badedquio acte tëccoasquequid ënëdoapanëdash. <sup>25</sup> Aden ënëdmetanec: –¿Atotsi quiash ëbi tantienquio yec dacuëdcuedede? –Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduequin bëdamiaid*  
(Mat 8.28-34; Mad 5.1-20)

<sup>26</sup> Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. <sup>27</sup> Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. <sup>28</sup> Aidi Esus bëquedec choash sidquianec Esusën taëno uebudash: –¿Atotsienuec ëbi isec cho? Nuquin Papan madombo mibi cadoque. Ëbi mëyanenda –quec onquenubien <sup>29</sup> mayan icsa chuiquin: –Dapuduenta –capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

<sup>30</sup> Adquid nec, quequin tantiaquin Esusën: –¿Tsutsi cuëmëdquid mibi ne? –capanëdash.

Adoaquien: —Sinco midted dapuduedonaid nebi —quepanëdash mayan icsa dapuduedaid onquec. <sup>31</sup> Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic <sup>32</sup> chanco dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aido dapuduedtan —Esusën cac <sup>33</sup> dapuduenequi chanco mayan icsa dadpen dapuduedash acte quiusudacno chanco comapenec niquec chian pudunpudunec mentoadbudnec nibëdquiec unësbunepanëdash.

<sup>34</sup> Adsho isash chanco pemequin isquido titinquianec shubu dadpen yacno choshon ambi isboed chuituidac <sup>35</sup> anocquido istanu quianec Esus yacno cho-chopanëdash. Adec choshon mayan icsa dapuduemequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. <sup>36</sup> Dacuëdsho isun mayan icsa dapuduemequin bëdamiaid isquidon ambi isboed dacuëdquido chuipanëdash. <sup>37</sup> Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

<sup>38</sup> Adsho isun: —Mibëd nidtiadquio iquebi —quepanëdash ambi mayan icsa dapuduequiequin bëdamiaid Esus chiec.

<sup>39</sup> Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bëdamiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamiaid chuibanoapanëdash.

*Chido intac budaid bëdanaid icnuc champi uincuemiaid  
(Mat 9.18-26; Mad 5.21-43)*

<sup>40</sup> Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. <sup>41</sup> Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: <sup>42</sup> —Con champi abentsëc tishaid unësanequidquio iccosh. Aton seta 12ted icquid niosh. Ëbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. <sup>43</sup> Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. <sup>44</sup> Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

<sup>45</sup> Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otacquo tabadcuëdedpanëdash. Adec tabadnubien: —Matses dadpenshun tsucus-tsucustsëcquiocquin mibi cuëscabededec —capanëdash Petedon.

<sup>46</sup> Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

<sup>47</sup> Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

<sup>48</sup> Adoaquien: —Mimbi tantiacpadquiec mibi bëdanaye. Dacuëdenquio yec bëdamboec tabadec nid, champi —capanëdash Esusën.

<sup>49</sup> Aden Esusën chuinubien Aidon shubun icquid utsibo Esus yacno cho-chopanëdash. Choash: –Min champi unësoshe. Chuibanquin tantiamquid min shubuno nidnunda –capanëdash abi yacnoësh choquidon Aido chuiquin.

<sup>50</sup> Aden chuisho tantias: –Dacuëdenda. Aden tantiequi nid. Mimbi tantiacpadquiec min champi bédaneque –quepanëdash Esus Aido caic.

<sup>51</sup> Aden chianec Aidon shubuno nidash cho-choquidotedi, Èbéd puduedenda, quequin chianec Petedo, Uan, Acobo aided buanec Aido cuëmédquidën champi yacno Esus puduedpanëdash. <sup>52</sup> Ambo puduedshun anocquido unësquio yec shubisho tantias: –Mibi shubieque. Ènëdta. Champi unësquio yec usheque –capanëdash Esusën.

<sup>53</sup> Adsho tantias, Champi unësacsho isombi, quequin Esus tantienquiocquin shubiquidon mamënshumbededpanëdash. <sup>54</sup> Mamënshumbedednubi Esusën Aido cuëmédquidën champin médante mëdinquin: –Nidto, champi –comapenen cac <sup>55</sup> aton tiboedte unësabi yec champi badedquio nidtopanëdash. Champi nidtosh isash: –Peme –quepanëdash Esus. <sup>56</sup> Aton champi nidtosh isash: –Adopenshenda iquec –quepanëdash ani amëbëdi.

Adoaquien: –Mimbi isboed chuibanenda –quepanëdash Esus.

## 9

### *Esusën ëbi chuibeneta, quequin ambi nidmiaido (Mat 10.5-15; 14.1-12; Mad 6.7-29)*

<sup>1</sup> Adashic ambi ëbi chuibeneta caido 12tedtsëqui chometanquin Esusën nadopanëdash: –Èmbi nadatiambocquin nabanacpaden mibitedishun nabanendac. Mayan icsa dapuduemequinc daicsaido bédamequinc cain mibi capucueniacnoshon mimbi ismebenendac. <sup>2</sup> Nëbi mibi nideque. Adec capucuenequin chuibenequimbi bédamebeneta. <sup>3</sup> Nidquin cuate uidën nidte buanenda. Shictoate buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan. <sup>4</sup> Adec nidash mibi yuedquidën shubun puduedshun ëmbi chiacpadomboen nabanec anouidi tabadta. <sup>5</sup> Mibi nidacno mibi yuedquid nibëdsho isun naden nata. Mimbi tantiaid icsa mibibi cuidate nec, quequin nidaid putu tasequequin ismeta –capanëdash Esusën abëd icquido chuiquin.

<sup>6</sup> Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papabëd tabadaid chuibanquimbi daicsaido bédamebenepanëdash.

<sup>7</sup> Adnubien Esusën nabansho isquidon Edodes chuibanpanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantias, ¿Tsudain nepec? Edodesën caquien,

Acten mentoanondaid, Uan cuëmédquid uincuempash icnui, quenubien; <sup>8</sup> Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamquid.

<sup>9</sup> Adoaquien: –Mambi uincuentiapimbocon Uan mapi budtemiondac. ¿Tsudain ëmbi tantiacmaidquio adobanquid icpec? –quiashic Esus iste bumpanëdash Edodes.

### *Matses dadpen pemiaid (Mat 14.13-21; Mad 6.30-44; Uan 6.1-14)*

<sup>10</sup> Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibanansho tantias Esus abëd icquido bëyucanec shubu dadpen icquid Betsaida caid anoentsëqui nidpanëdash. <sup>11</sup> Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bédamepanëdash.

<sup>12</sup> Adashic ushë budtsan Esusbëd icquidombo Esusën dayunquoio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

<sup>13</sup> Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidedtsëqui icsho isunda cho-choquidtedi pemenuequin ëbitedi bedtan, cai? —quecuededpanëdash abëd icquido.

<sup>14</sup> Ambobi tabadsho chido bacuëbobëdtabi tambanenquoio icquimbi dadauidquoio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac <sup>15</sup> ambi chiacpadomboen tabadmepanëdash. <sup>16</sup> Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdambocquid icquin mimbibi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

<sup>17</sup> Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

*Chuiquid dapa abentsëcquiobi iquec, quiaid  
(Mat 16.13-19; Mad 8.27-29)*

<sup>18</sup> Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

<sup>19</sup> Adoaquien: —Acten mentoanondaaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

<sup>20</sup> Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquoio yec Quidistu caid ma mibi neyoc —quepanëdash.

*Abi unëste chiaid  
(Mat 16.20-28; Mad 8.30-9.1)*

<sup>21</sup> Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. <sup>22</sup> Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënkuido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidedi ëbi chieshënkuido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquoio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

<sup>23</sup> Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmene quenquiocquin tantesa uainquiocquid. Ëbi tantiaquidquoio iquendac adquid. Nidaidën tabadaiduidi tantiaquid iquec Nuquin Papa yacno nidenquoio iquendac. <sup>24</sup> Cuesunenu cac unësmene quiash Esus tantiaquid nebi queboedi Esus tantiesa nebi quequid unësash Nuquin Papa yacno tabadenquoio iquendac. Utsibo, Esus tantiaquid nebi, quiashic abi cuesunenuquid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac. <sup>25</sup> ¿Atotsieshun Nuquin Papa yacno tabadaid tantienquoio yec nidaidën bëdamboec tabadnuequin bedted-bedtede? Mimbi bedaidënquoio



Nuquin Papa yacno puduedtiapimbo mibi iquec. <sup>26</sup> Esusbëdtabi ambi chiaid tanti-aquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. <sup>27</sup> Nad iquendac. Tanti-aquiota. Chuinu. Ëbi tantiaquid dadpen yansho ënabicquid utsin-utsinquien isendac – quepanëdash Esus.

*Esus bed-bedquesho istiapimbo yaid*  
(Mat 17.1-8; Mad 9.2-8)

<sup>28</sup> Aden chiashic Esus mëdante utsiuc tauadoec ushash Nuquin Papa chiec onquenuec macuësh yacno nidoapanëdash. Petedo, Uan, Acobo aided buanec macuësh yacno Esus nidpanëdash. <sup>29</sup> Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquoio ushë chënquiacbimboec icpanëdash. <sup>30</sup> Adsho isnubien badedquoio dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. <sup>31</sup> Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecued-edpanëdash. <sup>32</sup> Adnubien Esusbëd chobedo abëd icquido 3ted ushcasmash tabadtu-idquin Esusbëd utsi daëd nac-nacquoioquid dasiuidacimboec bed-bedquesho isbed-edpanëdash. <sup>33</sup> Esusbëd daëd nidtuidsho isash Petedo nadpanëdash: –Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna –quepanëdash Petedo.

<sup>34</sup> Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

<sup>35</sup> Adnubien abu ushunuësh onquec: –Nëidic ëbëd icte bunquidquoio, con madombo, ëmbi bëdamboen isaidquoio neque. Aidën chiaidquoio tantiata –quepanëdash Nuquin Papa Esusbëd icquido tedestedshun isenquiocnobi.

<sup>36</sup> Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

*Mayan icsa dapuedaid madompi*  
(Mat 17.14-21; Mad 9.14-29)

<sup>37</sup> Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. <sup>38-39</sup> Cho-choash abentsëc nadpanëdash: –Con mado abentsëc icquid mayan icsa dapuededash icsambo iccoshe. Isec chota. Aidën bedto-bedtoac badedquoio sidquianesho aidëmbidi bedshun bëcunedeniac con mado ëbcacushaniosh. Dapuduenenquoio icquin con mado aidën uimambo icmedeniosh. <sup>40</sup> Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquoio iccosh –quepanëdash dada abentsëc Esus caic.

<sup>41</sup> Adoaquien ambi nianaido caic Esus nadpanëdash: –Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? –quetanquin: –Min mado bec cho –Esusën cac aton mado aton papan bëpanëdash. <sup>42</sup> Aden bënubi mayan icsan bëcuniac madompi uëdëquiampanëdash.

Adsho isun: –Padi. Chën –capanëdash mayan icsa chuiquin. Aden madompi bëdametanquin aton papa Esusën meneoapanëdash.

<sup>43</sup> Adsho isash: –Nuquin Papan nadatiambocquin naid uinsadpambo iquec –quecuededpanëdash isquido.

*Abi unëste chuioaid*  
(Mat 17.22-23; Mad 9.30-32)

<sup>44</sup> Adoaquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

<sup>45</sup> Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquo tabadcuededpanëdash abëd icquido.

*¿Tsutsi chuiquid dapa icpec? quequin chiaid  
(Mat 18.1-5; Mad 9.33-37)*

<sup>46</sup> Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

<sup>47</sup> Adoaquien Esus tantiaquidquio icquin bacuëmpi chomeshun aton dayunquio tabëcash: <sup>48</sup> —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

*Abimbo tantiaquid ëbëd icquid nec quiaid  
(Mad 9.38-40)*

<sup>49</sup> Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuec nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuiipo? —quepanëdash Uan Esus caic.

<sup>50</sup> Adoaquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

*Esus bunesabo, Samadia yacnocquido*

<sup>51</sup> Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash. <sup>52</sup> Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien <sup>53</sup> Esus isadaidbo nec, quequin yuedenquiocpanëdash Samadia yacnocquidon.

<sup>54</sup> Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icbo? —quepanëdash.

<sup>55</sup> Adoaquien: —Padicnuna. ¿Matses unësmenuectabi chodio? —quianec <sup>56</sup> shubu daëdpactsëc yacno nidoapanëdash abëd icquidobëd.

*Esus tsibante bunquidën natequid  
(Mat 8.19-22)*

<sup>57</sup> Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananc nidendabi —quepanëdash Esus databëdquid abentsëc.

<sup>58</sup> Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

<sup>59</sup> Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icbo —quepanëdash.

<sup>60</sup> Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuquin abi yacno tabadaid tantiaquin mimbi chuibeneta —capanëdash Esusën.

<sup>61</sup> Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

<sup>62</sup> —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

## 10

### *Abi bëyucanec nidquid 72ted icquido* (*Mat 11.20-27; 13.16-17*)

<sup>1</sup> Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. <sup>2</sup> Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. <sup>3</sup> Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. <sup>4</sup> Ëbi chuibenec nidanequin mitsana buanenda. Mitsana bedtequidbëdta shictoadte buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. <sup>5</sup> Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. <sup>6</sup> Aden chiac shubu icbo bëdamboec tabadnuquid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. <sup>7</sup> Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

<sup>8</sup> “Shubu dadpen yacno mibi choacsho yuedshun pete meniac isuidec, Utsitsen bec cho, quenda. <sup>9</sup> Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. <sup>10</sup> Shubu dadpen yacno choshon mibi yuedquid nibëdsho isun aton podquedën nidquin naden chuita: <sup>11</sup> Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. <sup>12</sup> Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnocquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

<sup>13</sup> Aden ambi nidmetequid 72ted icquido chuibanshumbic utsibo isacbimboen Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquio mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësquiocnoc shubiquin abi icsaid ëntsempampic. <sup>14</sup> Aden Tido

yacnocquidobëdtan Sidon yacnocquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. <sup>15</sup> Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe? Padenquio. Ëmbi nadatiambocquin nabansho isun tantiesa yec chian anëdënquiacno mibi nidendac –quepanëdash Esus abi tantiesabo chiacbimboec onquec.

<sup>16</sup> Aden chiashic, ambi nidmenu caido 72ted icquido tantiamenuen chuibudec: –Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquio yash ëbi chomiondaid tantiesambo nendac –quepanëdash Esus. Aden chiac ambi nidmenu caido nidanepanëdash.

<sup>17</sup> Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: –Mimbi chiacpaden nabanombi. Aden nabanquimbic, Esusën nadatiambocquin naidënquio dapuduenta ëmbi caidtedi mayan icsa dapuduempoh, Icbo –quecuededpanëdash ambi nidmiaido 72ted icquido ambi naboed Esus chuibanec.

<sup>18</sup> Adoquien: –Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacbimboecnuc bedquetanacbimboec Satanas abucuësh badedquio paëdsho isec niobi. <sup>19</sup> Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. <sup>20</sup> Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta –capanëdash Esusën ambi nidmiaido chuiquin.

<sup>21</sup> Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: –Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa –quepanëdash Esus Nuquin Papa chiec.

<sup>22</sup> Aden Nuquin Papa chiec onquequin nainec: –Con pa abia yampid icquin abitedi tantiaquidquido nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquido con pa nec. Adecbidi abëd abia yampid icquin con pa bëdamboen tantiaquidquido nebi. Adquid icquin, Con pa nad iquec, quequin ëbi tantiaquido tantiamendambi –quepanëdash Esus abi tantiec choash iccuededquido caic.

<sup>23</sup> Aden iccuededquido chuibanshumbic naden ambi 72ted icquido nidmian choboedouditsëqui Esusën chuoapanëdash: –Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. <sup>24</sup> Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomaid abi yacno puduedmianquid chosho iste bunquin aidon ëbi istiapimbo icoapampic –quepanëdash Esus.

*Utsi tantiaquin bëdamboen naquidquido*



<sup>25</sup> Adashic, ¿Tantiaquidquioda Esus neque? Tantiabono, abibi quequin dada utsin: — ¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

<sup>26</sup> Adoaquien: —Ambi Nuquin Papan naden nata quequin chiaid Moises dada uami-ampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

<sup>27</sup> Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuen adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

<sup>28</sup> Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

<sup>29</sup> Aden Esusën chiac ëbi otacquo icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiaashun Esusën chuimeboed: —¿Mitsicquid con utsi nepec? —quepanëdash.

<sup>30</sup> Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dash-cutebëdtabi chicshun icsa uabudtsëcquien cuestanquin niamposh. <sup>31</sup> Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnü, quenquiocquin uano datamposh. <sup>32</sup> Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnü, quenquiocquin adembidi uano datanoaposh. <sup>33</sup> Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin <sup>34</sup> aton dayun tsadbudshun cuestanquin nianaidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. <sup>35</sup> Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. <sup>36</sup> Aden chuishumbic: —Ëmbi chuiboed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

<sup>37</sup> Adoaquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ëmbi chuiboedbimboecnuc utsibo tantiaquin nashunoata —quepanëdash Esus.

### *Madtan nabanubi Madian tantiaid*

<sup>38</sup> Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash.

<sup>39</sup> Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. <sup>40</sup> Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno chosho: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.



<sup>41</sup> Adoaquien: —Mimbi natiadquio yaid dadpen tantiaquidquio mibi iqueque. <sup>42</sup> Ëbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

## 11

### *Nuquin Papa chiec onquianete* (Mat 6.9-15; 7.7-11)

<sup>1</sup> Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamepanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

<sup>2</sup> Adoaquien: —Nuquin Papabëd onquequin naden chuita:  
“Bëdambocquidquio mibi nec, Papa.

Adquid mibi icsho matsesedishun mibi con icbo capashun, Papa.

Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi matses abitedishunquio napashun, Papa.

<sup>3</sup> Tantiaquidquio, mibi cadoque. Bumianenquiocquin badiadquidën-badiadquidënkien con pete ëbi bedmedene, Papa.

<sup>4</sup> Adecbidi utsin ëbi chieshënsho cuidenquio yec ëbi abi icsaid bëpiscudacpadquiequi ëbi icsasho cuidenquio yec bëpiscudoata, Papa.

Adembidi, Satanasën icsa uanushe qeshun ëbi cudasquin dayun uata, Papa, quequin chuita”

—quepanëdash Esus.

<sup>5</sup> Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimbi bedshumpatsia? <sup>6</sup> Inchëshpotsembo pete bedshunuec mibëd nashunanquid yacno nidash: ‘Ëbi yacno utsi chosho pete nibëdnubi yuedombi. Con pete nibëdsho isash pemenun bedec chobi. Mimbi meniaid cuidquin adquidi mibi meneoaimbi,’ quepatsiac mibi mibëd nashunanquid caic.

<sup>7</sup> “Adoaquien, nuntanuëshi: ‘Padi. Shëcnandombi. Con bacuë ishcunec din ictoshon mibi menetiapimbo iquebi,’ quequin mibëd nashunanquidën mibi chuitsiash.

<sup>8</sup> “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquio. Mimbi nidenquiocquin chuidonesho tantiaashun mimbi chuiboedtedi mibi menepatsiash —quepanëdash Esus.

<sup>9-10</sup> Aden chiec abi onquec: —Adomboembidi Nuquin Papa chuidonesho mimbi bedtiadquio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

<sup>11</sup> “Adembidi chuinu. Tantia. ¿Min mado, Nuëcquid bec cho, qeshoda mimbi nisimbo menedi? <sup>12</sup> Adembidi, ¿Cachinan bacuë bec cho, qeshoda mimbi chichun menedi?

<sup>13</sup> Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, qesho tantiaashun menenquioda mibi ictic? —quepanëdash Esus.

### *Bedtsibun namiaid Esus nec, quequin chiaid* (Mat 12.22-30; Mad 3.19-27)

<sup>14</sup> Adashic, mayan icsa dapudedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcued-edpanëdash. <sup>15</sup> Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënquido.

<sup>16</sup> Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

<sup>17</sup> Aden chuisho tantiash tantiaquidquio yec abi icsamboen chuimenuequido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. <sup>18</sup> Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiatic abëd icquido nibëdenquioda ictic? <sup>19</sup> Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? <sup>20</sup> ¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

<sup>21</sup> Aden chiashic abi onquec: —Mibitedi tantiamenuen utsi chuinu. Bëdamboen tantiatata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. <sup>22</sup> Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

<sup>23</sup> Aden chiashic: —Èbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

*Abibi dapuduemoed mayan icsa dapuedoaid*  
(Mat 12.43-45)

<sup>24</sup> Aden chiashic abi onquec: —Abi dapuedoaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuedebocpadquid istuidenquio icposh. Adquid istuidambo yec, Abibidi dapuedoanu, quianec anobidi nidoaposh. <sup>25</sup> Adec nidshun abi dapuduemoed naden istuidposh. Mayan icsa nidan, Èbibi bëdambo iquec. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemoed choshon aid abentsëccquio <sup>26</sup> istuidashic nidoashun abipadquid chuituidac utsi 7ted abëdi choash abitedi dapuededcuededac dada icsamboshë yamposh —quepanëdash Esus.

<sup>27</sup> Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

<sup>28</sup> Adoaquien: —Aden nasho padenquio. Nuquin Papan chiaid tantiashun nabansho Nuquin Papan bëdamboen isaidquio nec —quepanëdash Esus chido caic.

*Onasën ismiampicpaden ismiaid*  
(Mat 12.38-42; Mad 8.12)

<sup>29</sup> Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac. <sup>30</sup> Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon ëmbededpampic. <sup>31</sup> Utsibic, Nuquin Papan dadpen tantiamiaid, Sadomon iquec qesho tantiash

chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bédabédta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienguiocsho Nuquin Papan mibi isendac. Nuquin Papan bédamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ëmbi chiaid tantiata. <sup>32</sup> Adembidi, matses icsaidbédta ambi bédamboen naid Nuquin Papan chuibante ushë chonoc Ninibe yacnocquidon Onasën chiaid tantiapadomboen Nuquin Papan chiaid abimbo iquec, quequin tantienguiocsho Nuquin Papan mibitedi isendac. Nuquin Papan chuimiác Onasën chuisho Ninibe yacnocquidon tantiabedepampic. Onas Nuquin Papan matses icsaid cuidte chuimiáidquio icpampic. Padnuen mibi icsaid bedshunash abided cuidadtequid nëmbobi iqueque. Ëmbi chiaid tantiata –quepanédash Esus abibi chiadequi.

*Tabote taboshon bêtashenquio yachimboec abi bédamboec tabadaid ismequid*  
(*Mat 5.15; 6.22-23*)

<sup>33</sup> Aden chuishumbic Esusën abi chuibanec: –Tabote taboshon ompoesa. Adembidi matsun bêtashesambo icbo nec. Ma ëmbi yuedaidon isnueshun tabote nënantan nanquid. <sup>34</sup> Adoaidbimboec min tantiate iquec. Min tantiate bédambocquid icquin bédamboec tabadquin ismequid mibi nendac. Bêtashacimboec min tantiate icnuc icsamboen ismequid mibi nendac. <sup>35</sup> Con icbo ëbi bednuec choec queshun bēpiscudenquiocquin isted-istedta. <sup>36</sup> Min tantiate icsaisa icsho Nuquin Papan chiacpadomboen tantiaquidquio aidi nec, quequin utsibon mibi isendac –quepanédash Esus.

*Nuquin Papan icsamboen isaidquio*  
(*Mat 23.1-26; Mad 12.28-40; Duc 20.45-47*)

<sup>37</sup> Aden Esusën chuibanshobien padiseyobo abentsēcshun: –¿Ada ëbi yacno pec nidsia? –capanédash. Adoac aidbēdi nidash pete sanaid cuate dayunquio Esus tsadbudpanédash. <sup>38</sup> Adec Esus tsadsho isash, ¿Adpecshenda iquec. Penush mëpamēdenquio Esus icpec? quec abibi onquequin padiseyobon Esus yuedquidëmbi tantiapanédash.

<sup>39</sup> Adoaquien, tantiaquidquio iquec Esus nadpanédash: –Ëndenquimbo padiseyobon peshun acnun dēshote cachocbédtabi pada-padaid cachoc bédamboen dapanta quequin chuinédacpaden mimbi naoaic. Aden dapanshun mimbi codocaidbédtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bēchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec. <sup>40</sup> Nuquin Papan chiaid tantiesabimboecquid mibitedi nec. Nuquin Papan matses uaquin dadabédtabi tantiate uainquioda icpampic. <sup>41</sup> Ai. Adquid icnuc aton na nibédquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebédta min dada bédamboen isendac –quepanédash Esus.

<sup>42</sup> Aden chiashic padiseyobo caic Esus nadpanédash: –Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsēc Nuquin Papan na nec, quequin aid abentsēc menenuequin mimbi dayun uaic penquiocquin. Aden nabanquin Nuquin Papan ambi matses bédamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsēc menebanshun utsibo bédamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. <sup>43</sup> Adembidi, tsusio dapabimboecsho bédamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsatnec. Adomboembidi tantiec matses iccuededacno nidequi, Ëbi bēquedquidon ëbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. <sup>44</sup> Adembidi, matses unësaid

chococate manenushe queshun ismequin mabiunu, quenquo yacpadomboen ëbi ic-said tantianushe quequin ompoquid mibi nec –quepanëdash Esus padiseyobo chiec.

<sup>45</sup> Adoaquien, Nuquin Papan naden nata quequin chiaid tantiemi, quish ut-sibo tantiamequid abentsëc: –Padiseyobo chuiquin ëbipadquido mimbi chuoapec –quepanëdash.

<sup>46</sup> Adoaquien: –Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aidedt matsesën natiapimbo icpec. Adsho isash, Mimbi natequid dadpen iqueque. Mibi nashunu, qesa icsho Nuquin Papan icsamboen isaid mibi nec.

<sup>47</sup> “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiachimboen mimbi shubumpi uabanec. Ëmbi shubumpi uaido isun utsibon bëdamboen ispashuni, quequin aden mimbi nabanec. <sup>48</sup> Aden naquin tantiec, Nuquin Papan chuimiaido cuesunequin bëdamboen tsusedpabon napampic, quiachimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquid mibi nec. <sup>49</sup> Ëmbi chiacpaden chuibanta, cabicquin naden Nuquin Papan chuipampic. Ëmbi chuimiaid utsi-utsien aton matsesën mëyampec. Utsi-utsien mëyanshun cuesuneppec, quec Nuquin Papa abitedi tantiaquidquid adpampic. <sup>50</sup> Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. <sup>51</sup> Tsusedpan abia abed cuesunepampid icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquiobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nëbi icquid neoaic.

<sup>52</sup> “Nuquin Papan naden nata quequin chiaid tantiemi, queshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic –quepanëdash Esus Nuquin Papan naden nata quequin chiaiduidi tantiaquido chiec.

<sup>53</sup> Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: –Esus icsamboen chuimenu –quiampanëdash. <sup>54</sup> Adquid icquin Esusën chuibanacno nidaneshun chuimeoanuequin naden padiseyobon tantiapänëdash: Ëbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquid iquebi, quequin Esus chiemi, quequin tantiaquin Esus chuimepanëdash padiseyobon.

## 12

### *Natiamiantequidbëdtabi dayacmetequid* (Mat 10.28-31)

<sup>1</sup> Aden padiseyobon: Esus icsamboen chuimeoanemi, quequin tantianubien matses dadpenquioshë Esus yacno cho-choash tsucus-tsucustsëcquid yec tabadpanëdash. Aido tsucus-tsucustsëcquid yec tabadnubien abëd icquido Esusën nadopanëdash: –Sicaid nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata



quequin chuisho, Nuquin Papan naden nata quequin chiaidta nec, quequin Nuquin Papan chiaid bédamboen ista. <sup>2</sup> Matsesën ompoquin naid Nuquin Papan abitedi ismendac. Matsesën ompoquin chienquo yaidbidi abitedi tantiamendac. <sup>3</sup> Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

<sup>4</sup> “Adembidi chuinu. Tantiata. Mibi cunesunenuequid dacuëdënenda. Adquidën mibi cunesunequin mibi nibëdametiapimbo iquendac. <sup>5</sup> Nuquin Papauidtsëqui dacuëdënta. Icsadednequid icsho aidën mibi cunesunemeshun chian anëdënquequid nësecaindac. Adoanquiduidtsëqui dacuëdënta. <sup>6</sup> Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquo ictic. <sup>7</sup> Ai, mibi tantiaquiec. Min manëdaidtedi ambi tambanaid nec. Aid pistëcquidtedi tantiaquin Nuquin Papan mibi tantienquioda ictic? Mibi comapenen tantiec.

*Esus tantiaquid nebi, quequin utsibon tantianubi chiaid  
(Mat 10.32-33; 12.32; 10.19-20)*

<sup>8</sup> “Abi chiembique. Tantiaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. <sup>9</sup> Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bédabo chiendambi. <sup>10</sup> Èbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Èmbi mibi icsamboen chienquo yacnimboec bëpiscudta, Papa, qesho tantiash aidën icsamboen chienquo yacnimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquo iquendac.

<sup>11</sup> “Adembidi chuinu. Tantiaquiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. <sup>12</sup> Nuquin Papan Mayanën mimbi chuibante mibi tantiamequi —quepanëdash Esus abëd icquido caic.

*Aton na dadpen icquidën tantiaid icsa*

<sup>13</sup> Adashic, abi datsidadquid abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

<sup>14</sup> Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. <sup>15</sup> Aden aid chuishumbic utsibo chuiquin nadopanëdash: —Con na dadpen bednu, qesa icta. Mimbi bedaidënquo mibi Nuquin Papa yacno puduedtiapimbo iquendac.

<sup>16</sup> “Aidpadquid chuinu. Bédamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: <sup>17</sup> ‘Con tiedën caniquid bacuë dadpen iqueque. ¿Atotsimbimbi aidtedi dayun uapeba? <sup>18</sup> Naden naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquo con tiedën caniquid bacuëtedi sandoshon dayun uanuna. <sup>19</sup> Aden dayun uashumbic nadopembi: Con na dadpen iquec yuecash naimëdenquo iquec. Ad icnuc nainquo yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.



<sup>20</sup> “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

<sup>21</sup> Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unësash Nuquin Papa yacno tabadtiapimbo iquec —quepanëdash Esus.

*¿Atotsimbi napeba? quesa icta, quequin chiaid*  
(Mat 6.25-34)

<sup>22</sup> Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsibi dasiuidpeba? quec dacuëdenda. <sup>23</sup> Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. <sup>24</sup> ¿Uicchunënda ambibi cuëte ëshë siac bacuëacsho chepadic? Padenquo. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? <sup>25</sup> Adecbidi, ¿mibi unëste ushë abimbo chonoc, Padi, quepecta mibi icti? Padenquo. <sup>26</sup> Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

<sup>27</sup> “Adembidi, cuëtempï chuinu. Tantia. ¿Cuëtempinda aton bacuë ictequid daëdcapec? Padenquo. Adoenquo yaid aton bacuë ictequid bëdaidquo iquec. Cuëtempï bacuë ictequid bëdaidquo yacpadquid chuiquid dapa Sadomonën dashcute adquo ictiapimbo icpampic. <sup>28</sup> Padnuen cuëte bacuë ictequid bëdaidquo icboedi badedquo sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquo ictsiash quequin Nuquin Papa bëdiactsëc tantienda. <sup>29</sup> Aden tantienquo yec ¿Atotsimbi peshun aque? quec dacuëdenda. <sup>30</sup> Nuquin Papa tantiesan abi bunaiduidi tantianubi Nuquin Papa tantiaquidquo icquin pete actequidbëdta ëbi bedmedonec, quequin tantiec tabadta. <sup>31</sup> Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquo yaid mimbi bedendac.

*Abi yacno choacsho meniaid*  
(Mat 6.19-21)

<sup>32</sup> “Nuquin Papan abi yacno mibi chomeque. Dacuëdenda, ëbi tantiaquido caimbi. <sup>33</sup> Ambo nidabi icquin mitsana menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquo iquendac. Capishton petemaidquo aid iquendac. <sup>34</sup> Mimbi tantiaidquo mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

*Chieshenquiocquin caintequid*  
(Mat 24.45-51)

<sup>35-36</sup> Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. <sup>37</sup> Aden abi cainquido aton icbon bëdambo icmequin nadopec: “Èmbimbo mibi pemenu. Nëmbo tabadec cho,” qeshun ambi yuaido icbonquo pemequin bëdambo icmendac. <sup>38</sup> Adembidi, icbo inchëshpotsembo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bëdambo icmiaido iquendac. <sup>39</sup> Adquidpenquo icbo utsi chuinu. Tantia. Aidi abi

cainquid nibëdnubi aton na icnuc isedtanec choshon isac ampequid ënden nidac. Adsho isash, Ampequid choec, quequin tantiaquid yec nidenquio ictsenobi, quependac icbo. <sup>40</sup> Adquiecbidi ampequid choacbimboec Nuquin Icbo choeque. Ad icnuc, Chosho ëmbibi tantienquiocchitomane queshun chieshenquiocquin ëbi caïnta –capanëdash Esusën.

<sup>41</sup> Aden Esusën chuisho tantiaash Petedo: –¿Utsi chuiquin mibëd icquidoudi tantiamenuenda chio? ¿Abitedi tantiamenuenda chio? Tantanu. Ëbi chui –quepanëdash Esus caic.

<sup>42</sup> Adoquien: –¿Icbon chiac mitsipadquiocquin ambi namiaido bëdamboen napeba? Adquid chuinu: Pete tambanshun musucshun ëmbi namiaid utsitedi bëdamboen menebanta, quequin ambi namiaid utsi abentsëc chianec icbo nidac. <sup>43</sup> Adec nidashic choshon ambi chiacpaden ambi namiaidën chieshenquiocquin nabanacsho isun icbon bëdambo icmiaid nendac. Adquid naden chuipec: Ëbi nidan chieshenquiocquin mimbi nabanoque. <sup>44</sup> Ëmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chiendac icbon. <sup>45</sup> Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshënquin cuesbanshun ambentsëqui nua peshun tantienquio yanquin aquec. <sup>46</sup> Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

<sup>47</sup> “Adembidi, ambi chiacpaden nabanesa icsho isun, Comapenen cuesta, icbon cac cuesendac. <sup>48</sup> Aton icbo bunaid tantiabicquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac –quepanëdash Esus.

*Utsibëd bëdamboec tabadnu quesa icquin cuëshëdmequid  
(Mat 10.34-36)*

<sup>49</sup> Aden chiashic abi onquec: –Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bëdamboec tabadtsiandac, quec tsadebi. <sup>50</sup> Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi. <sup>51</sup> ¿Nidaidënshun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi. <sup>52</sup> Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. <sup>53</sup> Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquio yec cuëshëdendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëdendac. Shubu utsin, aton champi ëbi tantiaquid icnuc aton tita padenquio yec cuëshëdendac. Shubu utsin aton chaya ëbi tantiaquid icnuc aton babanën padenquio yec cuëshëdendac. Shubu utsin, aton babanën ëbi tantiaquid icnuc aton chaya padenquio yec cuëshëdendac –quepanëdash Esus. Abi tantiesa cuëshëdtequid chuibanec.

*Nuquin Papan ismiente isun nad iquendac, quequin tantiaid  
(Mat 16.1-4; Mad 8.11-13)*

<sup>54</sup> Aden abëd icquidombo chuishumbic Esusën naden iccuededquido chuioapanëdash: –Inchësh chosho isec, Ue choec, quiacpadec choec. <sup>55</sup> Adecbidi, ushë chënquec chosho isash, Chumbo yampec quiacpadec iquec. <sup>56</sup> Aden isquin mimbi ëmbi nidaidënshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquio ique? –quepanëdash Esus iccuededquido caic.

*Utsibëd chushcananquid*  
(Mat 5.25-26)

<sup>57</sup> Aden chiashic: —Utsibëd chushcananquido mibi nec. Adec tabadec ¿atotsi quiash, Naden natiadquidi nebi, quequin tantiashun mibi icsaid ënenquo ique? <sup>58</sup> Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquo icscho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. <sup>59</sup> Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

## 13

*Utsibo unësmiacpadec unësmemane quequin mibi icsaid ënta caid*

<sup>1</sup> Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

<sup>2</sup> Adoquien: —¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icscho aido cuesunemiasch, quequinda mimbi tantiape? <sup>3</sup> Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe queshun. <sup>4</sup> Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaid uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiape? <sup>5</sup> Mimbi icsamboen tantieque. Utsibo unësacpadec unësmemane quequin mibitedishun mibi icsaid ënta —capanëdash Esusën abi chuimeboedo chuiquin.

<sup>6</sup> Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. <sup>7</sup> Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choudobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

<sup>8</sup> “Adoquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bëdamboen tasiamenta. Adoac bacuëtsiash. <sup>9</sup> Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

*Cashuebudaaid bëdamiaid*

<sup>10</sup> Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien <sup>11</sup> seta dadpen 18tedi matamequin mayan icsan shuabudaaid icpanëdash. <sup>12</sup> Adquid icscho isun Esusën: —Shuabudaaid icboedi nëbi cacueoaid mibi iquendac, chido —cashun <sup>13</sup> mishac cacuiash, Nuquin Papan nadatiambocquin naid nec, quequin chiec chido onquepanëdash.

<sup>14</sup> Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin

nëid ushënquio bëdamenda. Chonoadtequid ushënquio bëdameta —capanëdash iccued-edquido chuiquin.

<sup>15</sup> Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono queshun mimbi yuaid tënëshacchobi acte yacno buanenquioda mimbi icpe? <sup>16</sup> ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

<sup>17</sup> Aden Esusën chuisho tantiash, Adenda, quequin bëdamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

*Cuëte ëshëmpi chiaid*

*(Mat 13.31-32; Mad 4.30-32)*

<sup>18</sup> Adashic: —¿Nuquin Papan shubun icquido mitsipadquidquio icpec? <sup>19</sup> Nadquidquio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabedec. Adquiecbidi, Nuquin Papan chiaid chuisho tantiatsëcquidën tantiabensh bëdambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

*Sicaid nami uaidpadquid*

*(Mat 13.31-33)*

<sup>20</sup> Aden chuishumbic utsitsen chuoiaic: —¿Nuquin Papan shubun icquido mitsipadquidquio icpec? <sup>21</sup> Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

*Pudued-puduedtequid shëcuë pistsëcquio chiaid*

*(Mat 7.13-14, 21-23)*

<sup>22</sup> Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash. <sup>23</sup> Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantiu. Ëbi chui.

Adoaquien Esusën nadopanëdash: <sup>24</sup> —Nuquin Papa yacno pudued-puduedtequid shëcuë pistsëcquio iquendac. Esusquio tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, <sup>25</sup> Nuquin Icbon, Ëbi yacno puduedte ushë naimbudosh, caqui cho-choshon, Ëbi puduedme, quequin comapenen cuëmbededpec.

“Adoaquien: ‘Ëbëd icquidpenquio mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

<sup>26</sup> “Adoaquien: ‘Mibëdtambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

<sup>27</sup> “Adoaquien: ‘Icsaquido mibi neque. Nëmbo puduedenda,’ quepec Icho. <sup>28</sup> Aden chiaqui Abadauan yec Isac yec Acobo yec quec Nuquin Papan chuimiaido aidtedi Nuquin Icho yacno tabadsho isash abi tantiesa adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. <sup>29</sup> Nuquin Papa yacno abi tantiesa puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. <sup>30</sup> Abi yacno



choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac –quepanëdash Esus.

*Edusaden isash anocquido Esus unësquiqtequid*  
(Mat 23.37-39)

<sup>31</sup> Aden Esusën chuibanquin naimbudnubien padiseyobo utsi-utsiec cho-choshon: –Ancanquid Edodes mibi cuesunemete buneque. Nëuëshquio nidec nid –capanëdash Esus chuiquin.

<sup>32</sup> Adoaquien: –Edodes cuesunemenuuebimboec onquequidquio nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi.

<sup>33</sup> Adobanequi nëbi capuebi. Adobanequi badiadash capuoaiibi. Adobanequi abadiadash capuoaiibi. Adobanequi Edusaden yacno capuoaiibi. Adec capuec ¿Edusaden yacno choabidabi unës uapec? quiosh, Esus quequin Edodes chuita –capanëdash Esusën.

<sup>34</sup> Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: –Nuquin Papan chuimiaido cuesunequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshënquid choec, queshun nua shoccotsëcshun aton bacuë cudasquin mabësec aton podon. Adembidi: Mibi chieshënquid choec, queshun mibi cudasquin chuibanombi. Aden chuisho tantiatiapimbo yec mibi tabadpoc. <sup>35</sup> Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshënec cuesunenuquido choabicnuc ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquid nec, quequin tantienquiochoedëmbi tantiendac –quepanëdash Esus Edusaden uano icnuc Edusaden yacnocquido tantiamequin chiacbimboec onquec.

## 14

*Padiseyobon shubun Esus puduedash tabadaid*

<sup>1</sup> Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe queshun isnuequin padiseyobo utsibo tabadquin caimbededpanëdash. <sup>2</sup> Aden caimbedednubien podo nidte chedo bidisquiaid uano tsadsho isun Esusën: <sup>3</sup> –¿Chonoadtemaid ushën daicsambocquid bëdamenquiocte ushë nec, quequina mimbi tantiape? –caquien <sup>4</sup> abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid dada Esusën bedshun bëdameshun: –Nidec nid –cac bëdambo yec nidpanëdash.

<sup>5</sup> Aden aid nidmeshun abi bëdamenushe quequin caimbededquido caic: –¿Chonoadtemaid ushën nua uëdëshcaidën min baca ampaëdacsho isun badedquid bedtanquin indoenquioda mimbi icsia? –quepanëdash Esus. <sup>6</sup> Aden chuisho tantiash adquiobidi otacquo tabadcuededpanëdash.

<sup>7</sup> Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanëdash: <sup>8</sup> –Pec cho, cac choshon tsadte bëtinnenda. Tsadte mimbi bëtinnambien shubu ichon ambi pec cho caid utsi mibi chuiquid tsusio chosho <sup>9</sup> isun: “Chuiquid dapa choeque. Uano tabadad,” ichon cac icsamboen naombi quiash natiaic uano tsadpec mibi. <sup>10</sup> Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu ichon. <sup>11</sup> Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi



Nuquin Papa yacno choacsho chuiquid Nuquin Papan mibi icmendac –quepanëdash Esus abëdta yuedaido caic.

<sup>12</sup> Aden aido chuishumbic abi yuedquid Esus nadpanëdash: –Pemenu, quequin mibëd icquid min utsibo aton na dadpen icquiduidi pec cho cainda. Aido pemiach, mibi pec cho caoac. <sup>13</sup> Pemenu, quequin aton na nibëdqido, daicsaidobëdta bëshuaido pec cho cata. <sup>14</sup> Adquido mibi cuidquin pemetiapimbo iquec. Adquido pemiash, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac –quepanëdash Esus abi yuedquid caic.

### *Nuquin Papa yacnoshon pequido*

<sup>15</sup> Aden Esusën chuisho tantiash abëdtan pec tsadquid abentsëc: –Nuquin Papa yacno nidshun abëdtambi pec bëdambo iquebi –quepanëdash.

<sup>16</sup> Adoaquien aidi tantiamenuen utsi chiacbimboec Esus nadpanëdash: –Yuednu, quequin nadënquio pec chota, quequin ambi yuedtequid dadpen chuiposh. <sup>17</sup> Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. <sup>18</sup> Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaaid abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

<sup>19</sup> “Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquiocquin ambi bedboed nimbameposh.

<sup>20</sup> “Utsibic: ‘Con chido bedombique. Nidenquio iquebi,’ queposh.

<sup>21</sup> “Aden chuisho tantiash nidshun aidon chiacpaden aton yuan icbo chuioaposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdqidbëdta daicsaid, bëshuaid chedo chuitan,’ cac aton yua nidposh.

<sup>22</sup> “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

<sup>23</sup> “Adoaquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. <sup>24</sup> Abia ëmbi pec cho caidon ëbëdtambi petiapimbo iquendac,’ queposh icbo –quepanëdash Esus.

### *Esuspadquio ictequidquio*

<sup>25</sup> Adashic, nidsho matses dadpenshun tsibanac abi choacmi bidiadshun isec Esus nadpanëdash: <sup>26</sup> –Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi, aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. <sup>27</sup> Unësmene quiash mëyanac dayactiapimbocquid ëbipadquio ictiapimbo icoaindac –quepanëdash Esus.

<sup>28</sup> Aden chiec Esus abi onquec: –¿Shubu uanu, qeshun abia shubu uaid isec, Nëidtenquio nanu, qeshun aidtedquiobidi bëshun toccashun shubu uainquioda icpec?

<sup>29</sup> Aden tantienquiocquidën abentse-abentsen bë-bëtsëcquin baded naintiapimbo iquec.

<sup>30</sup> Adsho isun utsibon mamënsHumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabenash adquiobidi icpec. Ëbi tantiauidtsëcquid ëbipadquio ictiapimbo iquec.

<sup>31</sup> “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. <sup>32</sup> Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh. <sup>33</sup> Adembidi ëbipadquio icnuequidon bëdamboen tantiata. ¿Ëbi chuiquid

Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda –quepanëdash Esus abi tsibananquido chiec.

*Sa batapentsëcquiocquid*  
(Mat 5.13; Mad 9.50)

<sup>34</sup> Aden chiashic Esus nadpanëdash: –Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? <sup>35</sup> Padenquio. Secatequid adquid nendac. Adecbidi Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantianu, qeshun tantiacpadomboen nabanta –quepanëdash Esus.

## 15

*Obeca abentsëc bënudtequid*  
(Mat 18.10-14)

<sup>1</sup> Adashic, icsaquid utsibobëd ancanquidën matsesën aton na buansho isun aton na bedtequid nëdtedi bedta caido, Tantianu, quiash Esus datsidadpanëdash. <sup>2</sup> Adsho isash padiseyobo Esus tantiamenquio yec chushquiabimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

<sup>3</sup> Adoaquien, tantiaquidquio iquec Esus: <sup>4</sup> –¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibënc nidenquioda mibi icpe? <sup>5</sup> Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. <sup>6</sup> Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chupec. <sup>7</sup> Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac –quepanëdash Esus.

*Aton na bedtequid bënudtequid*

<sup>8</sup> Aden icbon aton yua bënudaid chuishumbic utsi chiec Esus nadpanëdash: –¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? <sup>9</sup> Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

<sup>10</sup> “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec –quepanëdash Esus.

*Aton mado cuëshëdquid*

<sup>11</sup> Aden chido chiashic utsi chiacbimboec Esus nadpanëdash: –Aton mado daëd icnubi <sup>12</sup> tsyuec tishaid aton papa caic: ‘Tsiusio budquin mimbi chiondacpaden nëbi ëbi aided meneta, papa,’ quepondash. Adoac aton na musucshun aton mado abi daëdi menebampondash.

<sup>13</sup> “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. <sup>14</sup> Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash. <sup>15</sup> Adec bundoquieci abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chanchu pemebanta,’ qeshun aton chanchu yacno tsusion mado nidmepondash. <sup>16</sup> Aden nidmiac nidquin chanchu pemebanequi ambi chanchu pemiaid petiadquio yec tabadshobi anocquidon menenquio icpondash.

<sup>17</sup> “Adec natiambo bunec tabadquin aton papa ambi nianondaibëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi

con na nibëdnuc unëspebi. <sup>18</sup> Nëbi con pa yacno nidshun naden con pa chiembi: Nuquin Papan chiapaden nainquiocquin mibi tantienquo yec nidshun icsamboen nabanombique. <sup>19</sup> Adquid icsho con mado nec, ëbi cainda, papa. Nëbi min yuapadquid ëbi icme,' quequin chiembi, <sup>20</sup> abibi quianec aton papa yacno nidoapondash. Adec nidec ancuenquo yacno aton mado nidondaaid casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash. <sup>21</sup> Adoac ambibi tantiabocpaden aton papa chuiquin: 'Nuquin Papan chiapaden nainquiocquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,' capondash aton madon.

<sup>22</sup> "Aden chiaquien bëdambo yanshun ambi namiaidombo naden aton papan chuipondash: 'Con mado ënden nidondaaid choashe. Dasiuidte bëdaidquo bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. <sup>23</sup> Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. <sup>24</sup> Con mado unësacimboeçoedi nëbi ëbëdi tabadoaic. Aidi bënudacimboeçoedi nëbi istuidacimboec choash iquec,' cac bacan bacuë cuesuneshun codocacsho pebededpondash.

<sup>25</sup> "Adnubien bëyuc tishaid tied nantan icpondash. Auëshquo nidec shubu anoentsëqui choquin tentenate cuëdëmec matses cuëdënsho tantiatuidpondash. <sup>26</sup> Aden tantiatuidashien aton papan namiaid istuidash: '¿Atotsi naic nec?' quepondash bëyuc tishaid.

<sup>27</sup> "Adoquien: 'Min utsi ënden nidondaaid choaposh. Aidi chosho isash unësquiocquin nuquitedi bëdamboec tabadquin pemenuequin aton bacan bacuë nuacquid dapa papan cuesunemiosh,' cac <sup>28</sup> bëyuc tishaid nëishash shubun puduedenquo icpondash.

"Adsho isash, Puduedenquo iccosh, quequin chiac bëyuc tishaid yacno nidshun: 'Min utsibobëd bëdambo icnuec cho, mado,' capondash aton papan. <sup>29</sup> Adoquien: 'Seta dadpen matamequin mimbi chiapadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. <sup>30</sup> Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepacbob,' quequin bëyuc tishaidën aton papa chushcapondash.

<sup>31</sup> "Adoquien: 'Mado, ëbëd icquid mibi nec. Adquid icnuc con natedi mitsana neyoc. <sup>32</sup> Min utsi unësacimboeçoedi nëbi choash tabadoaic. Aidi bënudacimboeçoedi nëbi istuidaaid nec,' quequin aton papan choaedën buchi chuipondash –quepanëdash Esus.

## 16

### *Icbon na icsamboen isquid*

<sup>1</sup> Adshumbic, abëd icquido Esusën naden chuipanëdash: –Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. <sup>2</sup> Adoac, ambi con na ista caid chomiasch icbo nadposh: 'Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,' queposh icbo.

<sup>3</sup> "Aden chiac icbon na isquid otacquo onquec: '¿Icbon na isquid ictiapimbo yec mit-simbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. <sup>4</sup> Naden natsiambi. Con icbon na meniondaaid abitedi cuidmenquo yac ëbi yuedtsiash,' queposh.

<sup>5</sup> "Aden tantiashun ambi icbon na meniondaaid abentse-abentsen chomiac bëyuc choquid chuiquin: '¿Tedtsi ëmbi con icbon na meniaqui mimbi cuidenquiocpaccoc?' caquien:

<sup>6</sup> " 'Bëchi shocosh nuacquid dapan cushtoaid 15tedi bedshun cuidamboccombi,' queposh.

“Adoaquien: ‘Mimbi 15ted bedombi, quequin dada uaid secashun dada uatempì bedshun shocosh dapa bëchi cushtoaid 7ted bedshun cuidembi, quequin dada uata.’

<sup>7</sup> “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquìo mimbi icpo?’ caquien:

“‘Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aited bedombi quequin dada uaid secashun dada uatempì utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

<sup>8-9</sup> “Aden dada uabansho isun dada uatempìtedi bedshun icbo yacno nidshun meniac isbanec icbo tantiaquidquìo iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

<sup>10</sup> Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac.

<sup>11</sup> Adembidi mimbi nidaidënshun bedquin mimbi icsamboen nabansho isun, ¿Ëbi tantiaquid bëdamboen ista, quequina Nuquin Papan mibi chuipeba? Padenquìo iquec.

<sup>12</sup> Adembidi, ¿utsin na isquin bëdamboen nashunenquìo icsho isun abi yacno chosho isun mibi menependa ictic? Padenquìo.

<sup>13</sup> “Adecbidi, chuiquid daëd icnuc aid daëdshun namiaidquìo ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquibidi Nuquin Papa mimbi tantiaidquìo icquimbi mitsana bedtequid mimbi tantiaidquìo ictiapimbo iquec —quepanëdash Esus.

<sup>14</sup> Aden chuibanubi aton na bedtequid ambi tantiaidquìo icnuc chieshec padiseyobo tabadcuededpanëdash. <sup>15</sup> Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

<sup>16</sup> “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquìo yec ambibi tantiacpadec puduedte bunec. <sup>17</sup> Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

### *Aton chido nianquid*

*(Mat 19.1-12; Mad 10.1-12)*

<sup>18</sup> “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

### *Aton na dadpen icquid icnubien aton na nibëdquid*

<sup>19</sup> Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquìo dasiuidquidën badiadquidën-badiadquidënquien nua peshun acposh. <sup>20</sup> Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. <sup>21</sup> Bunquiec ambo tsadec



aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bêtashuntuidposh.

<sup>22</sup> “Adnubien, aton na nibëdquid Dasado unëso isun Nuquin Papan uaido mayan bédabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi <sup>23</sup> chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. <sup>24</sup> Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

<sup>25</sup> “Adoquien: ‘Chuinu. Tantia, abuido. Ënden nidaidën tabadquin mitsana dadpen bedbanec bédambo mibi tabadnubien Dasado comapenec bunquieic tsadposh. Nëbi aidi ënabi bédamboec tabadnubien anchumbo yec mibi tënquebudec. <sup>26</sup> Adboedi, uquëmbo mibi iquec cuëma utsiuc potetemaic icnuc nëuëshquio nidtiapimbo iquec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiposh.

<sup>27</sup> “Adoquien: ‘Ëbi yacno potetemaic icnuc con pan shubu yacno Dasado nidme. <sup>28</sup> Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,’ queposh aton na dadpen icboed.

<sup>29</sup> “Adoquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanën chuiposh.

<sup>30</sup> “Adoquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

<sup>31</sup> “Adoquien: ‘Padicnuna. Nuquin Papa tantiesa icquin uincuemiaidën chiaid min utsibon tantienquio icpatsiash,’ caposh Abadauanën aton na dadpen icboed chuiquin —quepanëdash Esus.

## 17

*Matses icsaid chiaid, ambi Esus tantiaid chiaid, ambi natequid chiaid*  
(*Mat 18.6-7, 21-22; Mad 9.42*)

<sup>1</sup> Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. <sup>2</sup> Adquid ëbi tantiabenabicquid icsa uanabicsho cuënote yuëmbocquid têtanetanquin acte shodomboshë yacno nënepatecnëdan. <sup>3</sup> Aid tantiec aidpadquid icmane quequin bédamboec tabadquin ismedeneta.

“Utsi icsasho isun: ‘Mibi icsaïque. Mibi icsaid ënta,’ mimbi cac: ‘Ai, icsaobique. Ënëdnuna,’ qesho tantiash aidi icsainquio yacbimboec bëpiscudta. <sup>4</sup> Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedecbidi aidi icsambo yenquio yacbimboec bëpiscudoata —capanëdash Esusën abëd icquido chuiquin.

<sup>5</sup> Adoquien: —Nuquin Papa nadatiambocquin nabanquidquio nec, quequin tanti-aquidquio ictiadquio iquebique. Adquid ëbi icme, icbo —capanëdash abëd icquidon Esus chuiquin.

<sup>6</sup> Adoquien: —Cuëtampi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtampi caic, Cuëte mananuc tabadboedi adquiecbidi acte



nantan tabadoata, quequin mimbi chiacpadec acte nantantsen abi tabadacpadechidi tabadoaindac —quepanëdash Esus.

<sup>7</sup> Aden chiashic Esus abi onquec: —¿Min yua mimbi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimbi icpe? <sup>8</sup> Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic. <sup>9</sup> Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “¿Bëdamboen mimbi naoc,” quecta mibi icpe? <sup>10</sup> Padenquio. Ambembi nainquio iccosh. Mimbi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icho caic: “Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac —quepanëdash Esus.

### *Daushumbocquido bëdamiaid*

<sup>11</sup> Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec <sup>12</sup> shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëqueduidpanëdash. <sup>13</sup> Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

<sup>14</sup> Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnëpanëdash.

<sup>15</sup> Adoac bëdamboed abentsëc dëbidiadanec Nuquin Papan naid chiec onquec choaic <sup>16</sup> Esusën taëno tsadbudash: —Mimbi bëdameboc bëdambo iquebi —quepanëdash Esus caic. Aidi Samadia yacnocquid isadaidpëmbo nëpanëdash.

<sup>17</sup> Adoquien: —¿Diestedidambi bëdamepo? —quepanëdash Esus dëbidiadanec choaed caic. <sup>18</sup> Aden chiashic iccuededquidtedi caic: —Nëidi isadaidpëmbo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquio icpec —quepanëdash Esus. <sup>19</sup> Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo icboedi chuiquin.

### *Chuiquid dapabëd bëdamboec tabadte chote ushë* (Mat 24.23-28, 36-41)

<sup>20</sup> Adshumbic: —¿Chuiquid dapa abentsëcbëd bëdamboec tabadte ushë choaid mitsipadënquio nuqui ispeque? Tiantianu. Ëbi chui —capanëdash padiseyobon Esus chuiquin.

Adoquien: —Chuiquid dapabëd bëdamboec tabadte ushë chote ismete nibëdendac. <sup>21</sup> Adechidi, nëmbobi chuiquid dapa abentsëc choeque. Is, quetiapimbo matses icpec. Adechidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

<sup>22</sup> Aden padiseyobo chuishumbic abëd icquido Esusën nadopanëdash: —Yuecash natiamiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquio mimbi iquendac. <sup>23</sup> Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. <sup>24</sup> Nuquin Papa yacno bëdamboec tabadte ushë chonoc abu bedquetaniacimboec uëshëmbo chënquec ëbi chosho abitedishun isbededendac. <sup>25</sup> Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbëdedec —quepanëdash Esus.

<sup>26</sup> Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdacpadomboen ëbi choate ushë icnuc adembidi matsesën tantiadenepec. <sup>27</sup> Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton

champi menepampic. Aden tantiaquin nabanubien Noebäd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic –quepanëdash Esus.

<sup>28</sup> Adec Noe tabadnuc icsamboen tantiec matses tabadaid chiashic, Esus nadpanëdash: –Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iguec abi bunaiduidtsëqui tantiaquid icoapampic. Nidaidën tabadaiduidquid tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. <sup>29</sup> Aden nabanquin Nuquin Papan chiaid tantienquid icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacbimboecquid nëdënquetequid ue sequiacbimboec sequequidën Sodoma yacnocquidtedi Nuquin Papan chiaid tantiesabo unës uabunepampic –quepanëdash Esus.

<sup>30</sup> Aden chiashic: –Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. <sup>31</sup> Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquid yec cuenta. Adecbidi, tied nantan mibi icnuc aid ushë chosho isash shubu yacno mitsana bednuec nidenquid yec badedquid cuenta. <sup>32</sup> Mibi yacnocquidtedi unës uanushe bidadshun isenquid yec cuenta, cac Dod cuenubien aton na tantiec aton chido auchidi bidadsho unës uampidpadquid iquenda. <sup>33</sup> Unësmane queshun ambi tantiacpadec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. <sup>34</sup> Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. <sup>35</sup> Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. <sup>36</sup> Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac –quepanëdash Esus.

<sup>37</sup> Aden chuisho bëdamboen tantienquiocquin abëd icquidon: –¿Mitsimbo budpec, icbo? –capanëdash.

Adoquien: –Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac –quepanëdash Esus abëd icquido caic.

## 18

### *Cadonequidquid chido chiaid*

<sup>1</sup> Adashic, Ëbäd icquido chieshenquid yec Nuquin Papa chiec onquian-onquianquidquid ma icpanu quec aido tantiamenu quec Esus nadpanëdash: <sup>2</sup> – Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. <sup>3</sup> Adnubien uano tabadquid niantie chido icposh. Aidi icsambocquid cuidte chuiquid yacno nidshun: ‘Ëbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

<sup>4</sup> “Aden chuidoniaqui abi icsambocquin naquid cuidte chienquiocboedëmbi chido ënëdenquid yec <sup>5</sup> choded-chodedquin adomboembidi chuioasho tantiashun: ‘Nuquin Papabëdta matses tantiesa nebi, quequimbi niantie ënëdenquid yec chodednesho isun uimabudmane queshun abi icsamboen naquid cuidte chuiquiono,’ queshun cuidte chuiquidën chuiquidposh.

<sup>6</sup> Aden chiashic Esus: —Choded-chodedquin chidon chuiasho tantiash: “Mibi icsamboen naquid cuidte chuinu,” queposh icsambocquid cuidte chuiquid. <sup>7</sup> ¿Adomboembidi ambi cuënaidon, Èbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? <sup>8</sup> Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

*Padiseyobo abentsëc icnuc ancanquidën utsin na bedtequid bedmianiaid chiaid*

<sup>9</sup> Adashic, bëdambocquid nebi, quiash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: <sup>10</sup> —Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. <sup>11</sup> Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidën utsin na bedtequid bedmianiaidpadquidpenquio nebi, Papa. <sup>12</sup> Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

<sup>13</sup> “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquid nabanquid nebique. Èbi tantiaquin pauc, Papa,’ queposh —quepanëdash Esus.

<sup>14</sup> Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yachimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaïndac —quepanëdash Esus.

*Bacuëbo Esus yacno bë-bëaid  
(Mat 19.13-14; Mad 10.13-16)*

<sup>15</sup> Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

<sup>16</sup> Aden chuisho tantiash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec. <sup>17</sup> Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

*Nëbi caniquid chuiquidën chiaid  
(Mat 19.16-30; Mad 10.17-31)*

<sup>18</sup> Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantianu —capanëdash Esus chuiquin.

<sup>19</sup> Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. <sup>20</sup> Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan

chiaid tantiaquin nabanta,” quequin chiampid mimbi tantiapec –capanëdash Esusën nëbi chuiquid caniquid chuiquin.

<sup>21</sup> Adoquien: –Canidotsëcquimbi aden nadeniondambi –quepanëdash nëbi caniquid.

<sup>22</sup> Aden chuisho tantiash: –Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota –quepanëdash Esus.

<sup>23</sup> Aden Esusën chuisho tantiash aton na dadpen tantiec unësquio yanshun Esusën chiacpaden natiapimbo icpanëdash. <sup>24</sup> Adsho isun: –Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac. <sup>25</sup> Adquiecbidi shëcuë pistëcquid puduedte nidaidën capuquid dapan badedquio tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec –quepanëdash Esus.

<sup>26</sup> Aden chuisho tantiash iccuededquido nadpanëdash: –¿Tsutsi Nuquin Papa yacno puduedquid icpec? –quepanëdash Esus caic.

<sup>27</sup> Adoquien: –Mates ambibi tantiacpadec puduedtiapimbocnoc Nuquin Papambien abi yacno yuedanquid mates tantiamendac –quepanëdash Esus.

<sup>28</sup> Adoquien Petedo: –Mibëd icnu, quequin ëbëd icquidbëdta con natedi nianondambi, icbo –quepanëdash Esus caic.

<sup>29</sup> Adoquien: –Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho <sup>30</sup> ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac –quepanëdash Esus Petedo chiec.

*Ëbi unës uaindac, quequin Esusën chiaid  
(Mat 20.17-19; Mad 10.32-34)*

<sup>31</sup> Adashic, abëd icquido uano buanash: –Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabandac. <sup>32</sup> Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamënsumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten dectanquin unës uaindac.

<sup>33</sup> Adoquien daëdec ushtanec uincuenendabi –quepanëdash Esus abëd icquido chiec.

<sup>34</sup> Aden abi unëste Esusën chuisho abëd icquidon bëdamboen tantienquio yec tabadpanëdash.

*Bëshuaid bëdamiaid  
(Mat 20.29-34; Mad 10.46-52)*

<sup>35</sup> Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Mates cuensho tantiash: “Mitsana bedtequid bec cho,” quepanëdash bëshuaid. <sup>36</sup> Adec tsadquimbi mates dadpen cuen-cuensho tantiashun: –¿Atotsi quec cuen-cuene? –capanëdash. <sup>37</sup> Adoquien choquid abentsëc: –Nasaded yacnoësh choquid Esus cuenec nec –quepanëdash.

<sup>38</sup> Adsho tantiashun bëshuaidën: –Dabid, tsusedpan mado mibi icquin ëbi tantiaquin nata –capanëdash Esus cuënquin.

<sup>39</sup> Adshobien: –Adec cuëdenquio yec tsad –capanëdash choquidon.

Adoquien bëdiactsëc cuëmboedëmbi comapenquien: –Tsusedpa Dabidën mado mibi icquin ëbi tantiaquin nashunta –caopanëdash bëshuaidën.



<sup>40</sup> Adoac nidtuidshun Esusën: —Aidi bec cho —cac abi yacno bësho isun: <sup>41</sup> —¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Èbi bëucshune, Icbo —capanëdash.

<sup>42</sup> Adoaquien: —Mimbi tantiacpadomboen padpidemboen is —cac <sup>43</sup> badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquéc nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

## 19

### *Saqueyo, ancanquidën utsin na bedtequid bedmianiaid dapa*

<sup>1</sup> Adec nidequi Edico caid yacno datambidanec Esus nidpanëdash. <sup>2</sup> Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquéc aton na dadpen icquid icpanëdash. <sup>3</sup> Adoaid icquimbi utsi, Esus cuenec, quesho tantiash, ¿Mitsipadquidquio Esus neque? Isnu, abibi quianec nidquimbi mases ènapen icquid dadpen Esus datsidadacsho bushcuçtsëcquid icquin Esus Saqueyon isenquio icpanëdash. <sup>4</sup> Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

<sup>5</sup> Adec tsadnubien aid podquedënquio choec nidtuidshun Saqueyo bushcuçtsëcquid istuidshun Esusën: —Nëbi mibi yacno nuquibi tabadec nidnu. Baded bud —cac <sup>6</sup> Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

<sup>7</sup> Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

<sup>8</sup> Adnubien, aton shubu nuntanuësh nidtoash Saqueyo: —Chuinu. Tantia, Icbo. Nëbi con na mais uaquin aton na nibëdquid menenun nabono. Adoshombic, con mases: “Con na mimbi ampioc,” quesho tantiashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chieç.

<sup>9</sup> Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquéc. <sup>10</sup> Icsambocquid Saqueyo icbocpadquid nibënquin istuidshun nësecanushe queshun mënchicnuec chopobi —quepanëdash Esus Saqueyobëd icquido caic.

### *Aton na bedtequid 10ted icquid meniaid*

<sup>11</sup> Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash. <sup>12</sup> Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ènden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ <sup>13</sup> queshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Èbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

<sup>14</sup> “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe queshun chuiquid dapa yacno chuitanta,’ queshun abëd icquido chuimenuen chuiquid dapa yacno nidmeposh.

<sup>15</sup> “Adoalui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi queshun ambi meneboedo chomeposh.

<sup>16</sup> “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.



17 “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

18 “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

19 “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

20 “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. 21 Mitsana bedtequid mimbi tantiactedimbo daëd uatiapimbo ictsiabi, queshun dayun uaombi. Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,’ queposh.

22 “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedim-bocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? 23 ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquo icco? Aden meniac daëd uashun bedtsenombi,’ queposh abi chuiquid.

24 “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

25 “Adoaquien: ‘Aton na dadpen iqueque. Aid menenda, chuiquid,’ queposh iccued-edquido.

26 “Adoaquien: ‘Chuinu. Tantia. Ëmbi chiapaden nabanquin daëd uacsho isun ëmbi meneboed daëd uaquin menembi. Ëmbi chiapaden chieshquin daëd uainquiocsho isun ëmbi meneboed bedshunembi. 27 Adembidi ëbi chieshë nec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

*Chuiquid dapabimboec yec Edusaden yacno Esus choaid  
(Mat 21.1-11; Mad 11.1-11; Uan 12.12-19)*

28 Aden chuibanashic Esus Edusaden yacmi nidequi anoentsëqui choash nidunt-panëdash. 29 Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec niduntash abëd icquid daëd caic: 30 —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tēchicshun nëmbo bëta. 31 Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita —quepanëdash Esus.

32 Adoac nidshun istuidtanquin 33 cabayobitsecquidëmpi tënëshaid tēchicsho isash: —¿Atotsi canuen aid tēchique? —capanëdash icbon.

34 Adoaquien: —Con Icbo bunaid nec —queshun Esus yacno nimbanquin abi tënëshaidën buampanëdash Esusbëd icquidon.

35 Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capucshun Esus catsad-umpanëdash. 36 Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, queshun aidontsen adopanëdash.

37 Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onqucuededpanëdash:

<sup>38</sup>—Nuquin Papan chomiaid ambi chuiquid dapa icmiaid ambi bēdambo icmiaidquio-bidi nec. Nuquin Papa yacno abēdi bēdamboec tabadequi icsaisatedi iquendac — quepanēdash iccuededquido comapenec cuēdcuededec.

<sup>39</sup> Adec cuēdcuededsho tantiashun padiseyobon: —Adec onquenda, quequin mibēd icquido chuita —capanēdash Esus chuiquin.

<sup>40</sup> Adoaquien: —Ēmbi naid chiec aidtedi cuēdcuededenquiocnoc cuēnote podqued cuēman samēdquido onquianendac —quepanēdash Esus padiseyobo chiec.

<sup>41</sup> Adashic, adanec nidequi Edusaden anoentsēqui choquin anocquido abi tantiesabo tantiec shubiec Esus nadpanēdash: <sup>42</sup> —Ēbi bēdambo icmequid Esus nec, quec nēbi ēbi tantiaquid mibi ictsiandac. Tantiesa icquin mibi chuiquid mimbi nibēnacpadquid mimbi istuidtiapimbo iquendac. <sup>43</sup> Yuecash choquin uimanēmēnquidon mibi cuentiapim-bocnoc tsicatebudcuendac. <sup>44</sup> Aden mibi tsicatebudcuenshun min bacuēbobēdtabi naimbudquin mibi unēs uashun nendac. Min shubutedi nibēdquendac. Nuquin Papan chomiaid ēbi tantiesa icsho cuidtequido mibi nendac —quepanēdash Esus. Edusaden uano icnuc abi tantiesabo tantiec unēsquio icnuc anocquido chiacbimboec adpanēdash.

### *Nuquin Papa tabadte shubu uashunaid yacnoshon cuemiaid*

<sup>45</sup> Adashic, Edusaden yacno choash Nuquin Papa tabadte shubu uashunaidēn puduedshun nuntanshunquio aton na bedtequid bednun menebanquido Esusēn cuemepanēdash. <sup>46</sup> Cuemec: —Nuquin Papan chuipampid nad iqueque. Tantia: “Ēbi tabadte shubu uashunaid ēbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanēdash Esus aidtedi cuemec.

<sup>47</sup> Adoshombic, badiadquidēn-badiadquidēnquiec Nuquin Papa tabadte shubu uashunaidēn puduedtenequin Nuquin Papan chiaid tantiamenuen Esusēn chuibanpanēdash. Anoshon chuibancho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanēdash. <sup>48</sup> Aden caimbededquimbi Esusēn chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedti-apimbo icpanēdash.

## 20

### *¿Tsundan chuibanta caid mibi ne?*

*(Mat 21.23-27; Mad 11.27-33)*

<sup>1</sup> Adashic, Nuquin Papa tabadte shubu uashunaidēn puduedshun, Nuquin Papa yacno yuedanquid iquec, quequin Esusēn chuibanubien isadaidbo tsusiobo cho-chopanēdash.

<sup>2</sup> Cho-choshon: —¿Tsundan chuibanta caid mibi neque? Tantianu. Ēbitedi chui —capanēdash.

<sup>3</sup> Adoaquien: —Ēmbia tantianu. Ēbi chui. <sup>4</sup> ¿Nuquin Papan ēmbi chiaid chuibanshun mentobanta caidta Uan icpondash? Padenquio mibi quenuc, ¿Matsesēn nata caidta nepondash, quequina mimbi tantie? —quepanēdash Esus isadaidbo tsusiobo caic.

<sup>5</sup> Aden chiac isadaidbo tsusiobo onquecuededec nadpanēdash: —Nuquin Papan nata caid Uan pado nepondash, ēbitedi qesho tantiash Esus nadpendac. ¿Atotsieshun Uanēn chuisho mibitedishun tantienquio icponda? <sup>6</sup> Matsesēn nata caid Uan pado niondash, ēbitedi qesho tantiashun iccuededquidon cuēnoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanēdash isadaidbo tsusiobo.

<sup>7</sup> Adec onquecuededdash: —¿Tsuntsin nata caid Uan pado icpondash? quequin tanti-ambo iccombi —quepanēdash tsusiobo.

<sup>8</sup> Adoaquien: —Mimbi chienquio yacpadembi ēmbitsen ēbi chuita caquid mibi chienquio icoaimbi —quepanēdash Esus.

*Neshcashunquidon icsambocquin naid*  
(*Mat 21.33-44; Mad 12.1-11*)

<sup>9</sup> Aden isadaidbo tsusiobo chuishumbic, Utsi chuinu, quiacbimboen Esusën nadopanëdash: –Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: <sup>10</sup> ‘Tiedën caniquid ënden bacuëpash. Ëbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh. <sup>11</sup> Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh. <sup>12</sup> Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpamboenoc cuestanquin tied tsitsuno icbo neshcashunquidon aidi netamposh.

<sup>13</sup> “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

<sup>14</sup> “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. <sup>15</sup> Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh –quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec? <sup>16</sup> Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac –quepanëdash Esus.

Adsho tantiash: –Adoenquio icpashun –quepanëdash iccuededquido. <sup>17</sup> Adoaquien iccuededquido bëisequi Esus nadpanëdash: –¿Nuquin Papan dada uamiaidën naden chienquioda icpampic? Ai, aidën chuipampid nad iquec: “Shubu uanuequidën isuidaïd buintad utsin ambia nitsinaïd icposh.” <sup>18</sup> Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmi-anquid tantiaïdquid Nuquin Papan cuëshëdmiac comapenen cuidte yacno tabadendac –quepanëdash Esus.

<sup>19</sup> Aden Esusën chuisho tantiash: –Nuqui naid chiacbimboen chiec Esus niosh –quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

*Sesadën shocoshëmpi neque. Mene, quequin chiaïd*  
(*Mat 21.45-46; 22.15-22; Mad 12.12-17*)

<sup>20</sup> Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambia ista caido, Bëdambocquid nebi, quequin ismiacbimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash. <sup>21</sup> Aden nidmiac choash Esus ista caid abentsëc: –Mimbi tantiaquid chuibanaid bëdambo iquec, quequin tantiembi, Abitedi Nuquin Papan chiaïd abimbo chuibanquid mibi nec. <sup>22</sup> Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? –quepanëdash isadaidbo tsusiobon ista caid Esus caic.

<sup>23</sup> Aden chuisho tantiashun choboedën icsamboen tantiaïd tantiaquin Esusën nadopanëdash: <sup>24</sup> –Piucquid shocoshëmpi ancanquidën bec cho caid sananquin abuc

cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

<sup>25</sup> Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, quescho meneta. Nuquin Papan naden nata cac adobanta —capanëdash Esusën. <sup>26</sup> Aden chiac, Bëdamboen tantiaquidbimboec on-quec, quequin tantiaquin icsamboen chuimetiapimbo yec tsusiobon chomiaid otacquo tabadcuededpanëdash.

*Uincuen uaid chido bedesa nec, quequin chiaid*  
(*Mat 22.23-33; Mad 12.18-27*)

<sup>27</sup> Adashic, saduseyobo caido yec <sup>28</sup> unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. <sup>29</sup> Aden Moisesën dada uaid icnuc dada 7ted iccuededposh. Aidedada icnuc bëyuc tishaidën aton chido bedshun bacuë tishmiabi yec unësposh. <sup>30</sup> Aton buchi unësan aidën chido bedash adecbidi bacuë tishmiabi yec unësoaposh aton utsi. <sup>31</sup> Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh. <sup>32</sup> Yuecash chidotsen unësoaposh. <sup>33</sup> Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tiantianu —quepanëdash saduseyobo Esus caic.

<sup>34</sup> Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. <sup>35</sup> Uincuen uate ushë choan Nuquin Papan bëdamboen isaïdo abëdi tabadquin chido bedenquoio iquendac. Adembidi, aton champi menenquoio aton papan iquendac. <sup>36</sup> Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquoio iquendac. Nuquin Papan uincuen uatequido aton bacuëbo nendac. <sup>37</sup> Adembidi chuinu. Tantia. Cuëtempi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaïd mibi nec. Adecbidi tsusedpa Isaquën papa cain cuënaïd mibi neoaic. Adecbidi tsusedpa Acobon papa cain cuënaïd mibi nec,” quequin Moisesën chuipampic. <sup>38</sup> Moisesën tsusedpabo ambi chuiboed ënden unësampidën nami chodquiaidën papa cain Nuquin Papa cuëntiapimbo iquec. Aton nami chodquiash abi tantiaquidquo icquin tantiec tsadquidën papa cain Nuquin Papa cuënec —quepanëdash Esus saduseyobo chiec.

<sup>39</sup> Aden Esusën chuisho tantiaash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec. <sup>40</sup> Aden Esusën chuisho tantiaashun Esus chuimetiapimbo utsibo icpanëdash.

*¿Tsuntsin mado Quidistu nepec? quiaid*  
(*Mat 22.41-46; Mad 12.35-37*)

<sup>41</sup> Aden utsibon abi icsamboen chuimetiapimbo icsho isun Esusën nadopanëdash: —Èbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? <sup>42</sup> Dabidën ambibi Sadmo caid dada uaquin naden chuipampic:

“Icbo utsi yec con mado mibi chiembique. Tantia, quequin chiec icbo dapa nadpampic: ‘Èquë con dayun abiucquoio cainec tsadec cho

<sup>43</sup> ma mibi chieshënquidtedi mimbi namiaid ma icpanu,’ ”

quequin Nuquin Papan Esus chiaid Moisesën dada uapampid nec. <sup>44</sup> Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chieshënquido caic.

*Naden nata quequin chiaid tantiamequidpadquid iquenda, quequin chiaid  
(Mat 23.1-36; Mad 12.38-40; Duc 11.37-54)*

<sup>45</sup> Aden chuishun iccuededquidon tantianubi abëd icquido Esusën nadopanëdash: <sup>46</sup> — Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Èbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda. <sup>47</sup> Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bëdamboen nabanacimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

## 21

*Nianten piucquid shocoshëmpi meniaid  
(Mad 12.41-44)*

<sup>1</sup> Adashic, Nuquin Papa tabadte shubu uashunaid yacno tabadtuidash tsadquin Esusën isbampañëdash. Ambi isaïdo Nuquin Papa tabadte shubu nacnemetete cuidnu, quequin menequin aid shubun shocosh tabëcaïdën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi <sup>2</sup> nianten aton na nibëdquidëmbi aton na bedtequid shocosh daëd ictsëcquid sandosho ispanëdash. <sup>3-4</sup> Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

*Abitedi naimbudte ushë choec quequin chuite  
(Mat 24.1-35, 42-44; Mad 13.1-37)*

<sup>5</sup> Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaïdquïo iquec —quepanëdash utsibo.

<sup>6</sup> Adoaquien: —Mimbi nëbi isaïd yuecash nidbëdquiendac. Matses utsibon nëïd shubutedi chic-chicbudendac —quepanëdash Esus.

<sup>7</sup> Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismïante icpeque? Tantiïanu. Chui —quepanëdash utsibo.

<sup>8</sup> Adoaquien: —Cho-choshon muaquin chuïsho tantienquïocta. Adquid chochoash: “Nuquin Papan Chomiaïd Quidistu nebique. Èbëd iquec cho,” quededquededendac. Aden chuiquid tsibanenda. <sup>9</sup> Adecbidi: “Cuesnancuededec,” quesho tantïash dacuëdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquïo choenquïo iquendac —quepanëdash Esus.

<sup>10</sup> Aden chiequi abi onquebudec: —Adecbidi, abi ancaquid dapan nidmiac nidaïd utsin icquidobëd cuesnancuededendac. <sup>11</sup> Adecbidi, nidaïd utsi-utsïec yacno canchednuec ishçud-ishçudendac. Adecbidi, utsi-utsïec yacno bunquïote iquendac. Adecbidi, utsi-utsïec yacno daïcsabudnete iquendac. Adecbidi, mibi dacuëdmetequid iquendac. Adecbidi, mimbi isacmaïd abucuësh natiïambo icsho mimbi isbededendac.

<sup>12</sup> “Aïdtedi choabicnuc ëbi tantiaquid utsi-utsïen bedshun mëyanendac. Adoban-shumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsïen ancanquid yacno buanac <sup>13</sup> aïdotsen tantiaquid yantsïash



queshun ëbi chuibanta. <sup>14</sup> Aden buanaqui, ¿atotsimbi ancanquid cape? quequin tantiec tsadenda. <sup>15</sup> Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënquido iquendac. <sup>16</sup> Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. <sup>17</sup> Èbi tantiaquid chieshënquid dadpen iquendac. <sup>18-19</sup> Aden nabanquin mibi cuesunemenu, cac chieshenquo yec, Esus tantiaquid nebi, quequid icta. Adquid iquec unësash ënëdenquo yec Nuquin Papabëd mibi tabadendac.

<sup>20</sup> “Adecbidi shubu dadpen icquid Edusaden caid yacno cuesanquid dadpen chochoshon tsicatebudsho isash, Edusaden yacno naimbudte ushë choec, quequin mimbi tantiendac. <sup>21</sup> Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquo cuempanuna. Adecbidi, dëuequido Edusaden yacno ma nidenquiocpanuna. <sup>22</sup> Aid ushë icnuc Nuquin Papan chiacpadomboen cuidtequid iquendac. <sup>23</sup> Aid ushë chonoc matses utsibon Edusaden yacno tsicatebudac pete naimbudnuc bacuë usunquidobëd bacuë chishmequido mëyadec natiaquiendac. Edusaden yacnocquido abi tantiesabo icsho Nuquin Papan natiambocquin cuidte iquendac. <sup>24</sup> Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

<sup>25</sup> “Adec Nuquin Papa, Chën, quian badiadën ushë, inchëshën ushë uispa chedo aitedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac. <sup>26</sup> Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. <sup>27</sup> Adnubini Nuquin Papan chomiaid matsesaid ëbi dasiuidaid bëchomauanquiech ushë chënquiabimboec uëshëmbo yec nadatiambocquin nabanquidquo abu ushun ëbi budsho matsestedishun isbededendac. <sup>28</sup> Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdamocquin abuc isteneta –quepanëdash Esus.

<sup>29</sup> Aden chuishumbic ambi chuiboed ushë chote tantiamenuen nadopanëdash: <sup>30</sup> –Cuëtempi bacuëacsho isash, Ènden suc seccuduquiac nëbi seta taëec, quequin matsesën tantiec. <sup>31</sup> Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec. <sup>32</sup> Abimbo chiembique. Tantia. Èmbi chuibamboed naimbudabicnuc con tan matses isadaidbo naimëdbudenquo iquendac. <sup>33</sup> Abubëdta naimbudtequid nidaid nendac. Èmbi chiaid abimbo iquendac.

<sup>34-35</sup> “Adembidi chuinu. Tantiata. Nidaidën capuquidën, Nëbi ëbi sec, quequin tantienquo yec capusho badedquo siac cuentiapimbo iquec. Adembidi, Nati-ate ushë choec, quequin tantienquo yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta. <sup>36</sup> Ènenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquo ëbi icme, Papa. Adembidi natiambocquin cuidte ushë chonoshe quesahun ëbi mënichicta, Papa. Aid ushë chonoc ëbi bedshun mimbi chomiac matsesaidën dayun tsadquidquo ëbi icmeta, Papa, quec onquedeneta –capanëdash Esusën.

<sup>37</sup> Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash.

Adecbidi inchëshquidën-inchëshquidënquiec macuësh Odibos caid yacno nidash tabadtenepanëdash. <sup>38</sup> Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

## 22

### *Esus bedmenu, quequidquio Udas*

*(Mat 26.1-5, 14-16; Mad 14.1-2, 10-11; Uan 11.45-53)*

<sup>1</sup> Adashic, nami uabicquid pete tantiate ushë, Pascuas caid, anoentsëqui yampanëdash. <sup>2</sup> Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. <sup>3</sup> Adnubien Udas cashumbic Iscadiote caid Esusbëd icquid dapuduedshun Satanasën tantiamiac <sup>4</sup> Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. <sup>5</sup> Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin. <sup>6</sup> Adoaquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembu, quequin isted-istedpanëdash Udasën.

### *Ënquin nidaidënshun Esusën pebanaid*

*(Mat 26.17-29; Mad 14.12-25; Uan 13.21-30; 1Cod 11.23-26)*

<sup>7</sup> Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. <sup>8</sup> Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

<sup>9</sup> Adoaquien: —¿Mitsishumbimbi aid nacnempe? —quepanëdash Uambëd Petedo.

<sup>10</sup> Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun <sup>11</sup> shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. <sup>12</sup> Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

<sup>13</sup> Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

<sup>14</sup> Adashic, inchëshën choash abëd icquidobëd pete sante cuate dayun uequi Esus: <sup>15</sup> —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi. <sup>16</sup> Matanampid tantiaquin obeca cuesuneshun nuqui pebocpadomboen mibëdtambi nidaidënshun padpiden penquio iquendambi. Matses icsaquid icsho cuidnushe qeshun obecaded cuesuniaid-padquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

<sup>17</sup> Adoshombic dëshote sananec Nuquin Papa chiec onqeshun actanquin abëd icquido menec: —Në, aniactse-aniactsen acban mibitedishun. <sup>18</sup> Tiedën caniquid ënë nidaidënshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

<sup>19</sup> Adoshombic, pete bedshun Nuquin Papa chiec onqeshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

<sup>20</sup> Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esused cuidadac, quequin tantiatequidquio nendac. <sup>21</sup> Ëbi chieshënquido ëbi bedmenuequin chuiquid pete sante dayun ëbëdi uec. <sup>22</sup> Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

<sup>23</sup> Aden Esusën chuisho tantiash abëd icquido: —¿Midacquidien capec? — quecuededpanëdash.

<sup>24</sup> Adashic: —Doseted nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. <sup>25</sup> Adec chushcanansho tantiash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. <sup>26</sup> Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. <sup>27</sup> Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. <sup>28</sup> Ëbi chieshënquido icnuc ëbi nianesa <sup>29</sup> icsho con Pan ëbi chuiquid icmiacpadquid chuiquid mibitedi icmendambi. <sup>30</sup> Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

*Esus ëmbi isacmaid nec, quequin Petedon chiaid  
(Mat 26.31-35; Mad 14.27-31; Uan 13.36-38)*

<sup>31</sup> Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacimboen mëyanttanquin ëbëd icboedi mibi cuëshëdmetiadquio iquec. <sup>32</sup> Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquio iqueque. Yuadnushe qeshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdtsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

<sup>33</sup> Adoaquien: —Mibi caic, Quënën nauednu, quenuc mibëdi naudedadebi. Adecbidi mibi caic, Unës uanu, quenuc adecbidi mibëdi unës uadebi, Icbo —quepanëdash Petedo Esus caic.

<sup>34</sup> Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

*Buanenda, queboedëmbi, Buanta, quequin chiaid*

<sup>35</sup> Aden Petedo chuishumbic abëd icquidtedi chuiquin: —Mitsana bedtequid buanenquio yec shictoate buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

<sup>36</sup> Adoaquien: —Ënden adquid buanenda, queboedi, Ëbi nibëdnuc mitsana bedtequid shictoadtebëdtabi buanta. Chështe bednu, queshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. <sup>37</sup> Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

<sup>38</sup> Adoquien Esusën chuiboed tantienquoio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

*Macuësh Odibos caid yacnoshon Esusën Nuquin Papa chiaid*

*(Mat 26.36-46; Mad 14.32-42)*

<sup>39</sup> Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. <sup>40</sup> Adec nidequi abi tabadteniacno choshon Esusën: —Chieshëmënnquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin.

<sup>41</sup> Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: <sup>42</sup> —Mëyanquin mibi unës uanu, ëbi chieshënquidon casho tantiash bunenquoio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. <sup>43</sup> Aden Esusën baded-badedquien chuishobi Nuquin Papan uaid mayan bëda choshon Esus chieshtomenquoio icpanëdash. <sup>44</sup> Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

<sup>45</sup> Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: <sup>46</sup> —¿Atotsi quiash ushe? Nid-toshon ëbi chieshënquidën nametiadquoio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

*Esus bedaid*

*(Mat 26.47-56; Mad 14.43-50; Uan 18.2-11)*

<sup>47</sup> Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: <sup>48</sup> —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

<sup>49</sup> Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec <sup>50</sup> onquetanquin abentsëcshun isadaidbo tsusio dapan yuan pabiate opioc pateshunepanëdash.

<sup>51</sup> Adosho isash: —Padi. Chën. Adoenda —quetanquin Esusën tsusio dapan yuan pabiate patiacno mishquin bédamepanëdash.

<sup>52</sup> Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, queshunda utsin-utsinquien chështe sananubi utsin-utsinquien cueste sananec cho-chopec?

<sup>53</sup> Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquoio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

*Ëmbi isacmaid nec, Petedo quiaid*

*(Mat 26.57-58, 69-75; Mad 14.53-54, 66-72; Uan 18.12-18, 25-27)*

<sup>54</sup> Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. <sup>55</sup> Adec choec umanuc cuëte dëtsiadaid cuëc utsibo tabadacno Petedo cuëte cuëc tsadpanëdash.



<sup>56</sup> Ambo Petedo tsadsho isash tsusion yuaid chido anoentsëqui choshon bëdamboen isec: –Nëid bëboedbëd icboedi nec –quepanëdash.

<sup>57</sup> Adoaquien: –Bëboed ëmbi isacmaidquio nec –quepanëdash Petedo.

<sup>58</sup> Adashic, yuecpectsëcshun Petedo isec utsitsen: –Ma mibi bëboedbëd icquid neyoc –quepanëdash.

Adoaquien: –Aidbëd iquenquio iccobi –quepanëdash Petedo.

<sup>59</sup> Adashic yuec-yuecpectsëc ictanec utsitsen: –Nëid Cadidia yacnoshon tishaid iquec. Ma bëboedbëd icquidi neyoc –queoapanëdash.

<sup>60</sup> Adoaquien: –Mimbi chiaidbëd icquidpenquio nebi –quepanëdash Petedo. Aden chuinubien cachina bënë cuëdampanëdash. <sup>61</sup> Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash <sup>62</sup> unësquio yec umanuc nidash Petedo shubiquioapanëdash.

*Esus sondadon mamëshunaid*  
(Mat 26.67-68; Mad 14.65)

<sup>63</sup> Adshumbic Esus cuenushe qeshun abi isquidon, sondadon, Esus mamëshumbededquin cuesbededpanëdash. <sup>64</sup> Adoshombic, dashcute cuëshaidën bëpucshun cuestanquin Esus sondadon nadopanëdash: –Mibi tantiaquidquio icquin ¿midaquidën mibi nëbi cueseque. Tantianu. Chui –capanëdash Esus chuiquin. <sup>65</sup> Aden cuesbededquin Esus icsamboen chuipanëdash.

*Isadaidbo tsusiobo yacno Esus buanaid*  
(Mat 26.59-66; Mad 14.55-64; Uan 18.19-24)

<sup>66</sup> Adshumbic badiadnubi isadaidbo tsusiobo iccuededacno Esus buanshun <sup>67</sup> nënantanquio nidtomesho isash: –Nuquin Papan chomiaid, Quidistu caid, nebi, quecta ique? Tantianu. Chui –quepanëdash isadaidbo tsusiobo Esus caic.

Adoaquien: –Ëmbi abimbo chuisho mibitedishun tantienquio iquendac. <sup>68</sup> Adembidi, ¿Mitsipadquidquio Nuquin Papan chomiaid neque? Tantianu. Ëbi chui, cac ëcbedenquio mimbi iquendac. <sup>69</sup> Nad iqueque. Chuinu. Tanta. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi –quepanëdash Esus isadaidbo tsusiobo tantiemequin chiec.

<sup>70</sup> Adoaquien: –¿Nuquin Papan madombobi nebi, quequina chio? –quepanëdash isadaidbo tsusiobo Esus caic.

Adoaquien: –“Esus Nuquin Papan madombobi nec,” quequin abimbo chuiquid mibi nec –quepanëdash Esus isadaidbo tsusiobo caic.

<sup>71</sup> Adoaquien: –Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquio iquembi utsibo chuiquin. Adquid iquec, quequin nuqui tantiec –quepanëdash isadaidbo tsusiobo.

## 23

*Pidato yacno Esus buanaid*  
(Mat 27.1-2, 11-14; Mad 15.1-5; Uan 18.28-38)

<sup>1</sup> Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi nidtoshon Esus bedshun Pidato yacno buampanëdash. <sup>2</sup> Aden Pidato yacno Esus bëec choash: –Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh –quepanëdash isadaidbo tsusiobo Pidato chiec.

<sup>3</sup> Adoaquien Pidato: –¿Isadaidbo chuiquid dapada ne? –quepanëdash Esus caic.

Adoaquien: –Mimbi chiaidquio abimbo iquec –quepanëdash Esus.



<sup>4</sup> Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

<sup>5</sup> Adoaquien: —Ambi tantiamiaidënquo Cadidia yacnoquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantimeoaposh —quepanëdash isadaidbo tsusiobo Pidato caic.

### *Edodes yacno Esus buanaid*

<sup>6</sup> Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

<sup>7</sup> Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

<sup>8</sup> Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec <sup>9</sup> Esus chuimenu quec Edodes onquepanëdash. Adoaqui Esusën ëcbedenquo icpanëdash. <sup>10</sup> Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. <sup>11</sup> Adoac Edodesbëd sondado Esus icsamboen chuiquin mamënshumbededshumbi chuiquid dapan dashcutebimboecquid abichobicquid Esus dasiuinshun Pidato yacno buameoapanëdash. <sup>12</sup> Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

### *Esus cuesten dectameta quiaid*

*(Mat 27.15-26; Mad 15.6-15; Uan 18.39-19.16)*

<sup>13</sup> Adashic, isadaidbo tsusiobobëdta isadaidbo utsibo chomeshun <sup>14</sup> Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëmianquidta nedic? quendabi. <sup>15</sup> Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquioc-tiadquidi nec. <sup>16</sup> Aden tantiaquin mëyanshun aidi nidmenuna —quepanëdash isadaidbo tsusiobo caic.

<sup>17</sup> Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo naded cuëdcuededquin: <sup>18</sup> —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. <sup>19</sup> Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

<sup>20</sup> Adec isadaidbo cuëdcuededsho tantiash Esus nidmetiadquido iquec: —Esus cuidenquioc-tiadquidi nec —quepanëdash Pidato isadaidbo caic.

<sup>21</sup> Adnubien: —Cuesten dectame —capanëdash isadaidbon yuec comapenec cuëdcuededquin.

<sup>22</sup> Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantanu. Ma unës uainquioc-tiadquidi neyoc. Aden tantiaquin mëyameshun Esus nidmembi —quepanëdash Pidato.

<sup>23</sup> Adoaquien: —Cuesten dectame —quepanëdash cuëdcuededoic isadaidbo Pidato, Ai, camenuc.

<sup>24</sup> Adoac iccuededquidon chiacpaden namenuen <sup>25</sup> Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

*Esus mëyanaid**(Mat 27.32-44; Mad 15.21-32; Uan 19.17-27)*

<sup>26</sup> Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash. <sup>27</sup> Adec Esus nidsho isun matses dadpenshun shubiquin tsibanampanëdash. Adembidi abi tsibanquid chidobo icpanëdash. <sup>28</sup> Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicedta. <sup>29</sup> Yucash mëyantequid ushë choendac. Aid ushë chonoc bacuë tishti-apimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.” <sup>30</sup> Mëyantequid ushë chonoc matses utsibon natiambocquid mëyanaqui naden mimbi Nuquin Papa chiendac: “Natiambocquid. Acte quiusudquid macuësh dapa catashmetabi, Papa, mibi quendac.

Adembidi, Acte quiusudquid macuësh masiametabi, Papa, utsi queoaindac.”

<sup>31</sup> Ëbi buansho isec shubiequi, Ëbi mëyantequid ushë choec, quequin tantiesa mibi icpec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquio nëdënquenquio icpec,” quecta mibi icti? Adembidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio icpec,” queoapecta mibi ique? Ai, quequin tantiatiad —quepanëdash Esus.

<sup>32</sup> Adnubien Esusbëdta icsambocquid dada daëd nidmequimbi <sup>33</sup> macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. <sup>34</sup> Dectanac diadequi Esus Nuquin Papa caic: —Ëbi unës uanuequidon tantienquiocquid unës uainquioctiadquidi cuesten dectanoshibique. Aidon icsamboen nambo yacnimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampanëdash.

<sup>35</sup> Adnubien matses dadpenshun isnubi Isadaidbo tsusiobo isec tabadquin mamënshumbedec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

<sup>36</sup> Adembidi sondadon mamënshumbedequid paëmbocquid mucambocquid sananquin Esus ismequimbi: <sup>37</sup> —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

<sup>38</sup> Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

<sup>39</sup> Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

<sup>40</sup> Adec Esusbëdta dectamboed abentsëc onquesho tantiash aidbëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? <sup>41</sup> Icsamboen nabanacsho cuidaid ëbi daëdi nec. Aidi bëdambocquid nabanquid icsho cuidenquioctiadquidi nec —quepanëdash.

<sup>42</sup> Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

<sup>43</sup> Adoquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

*Esus unësaid**(Mat 27.45-56; Mad 15.33-41; Uan 19.28-30)*

<sup>44</sup> Adec onquenubi ushë cuembo yanuc bëtina**cbimboec** inchëshquio yashic ushë budt-san chënquedoapanëdash. <sup>45</sup> Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. <sup>46</sup> Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

<sup>47</sup> Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh —quepanëdash. <sup>48</sup> Ambo tabadquin isquid utsibo Esus unëso isash unësquio yec aton shubuno nidanepanëdash. <sup>49</sup> Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

### *Esus nauedaid*

(*Mat 27.57-61; Mad 15.42, 47; Uan 19.38-42*)

<sup>50</sup> Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. <sup>51</sup> Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash. <sup>52</sup> Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuippanëdash. <sup>53</sup> Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash. <sup>54</sup> Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

<sup>55</sup> Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. <sup>56</sup> Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiapadec chonoadtemaid ushë nec, quiash Esus nauedacno nidenquio yec tabadpanëdash. Nuquin Papan chiapadec tabadpanëdash.

## 24

### *Esus uincuente*

(*Mat 28.1-10; Mad 16.1-8; Uan 20.1-10*)

<sup>1</sup> Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocono isec chidobo nidpanëdash. <sup>2</sup> Ambo choshon Esus nauedshun bëtashaid cuënote shëcniacsho isashi <sup>3</sup> shëcuën puduedash aton Icho Esusën dada nibëdsho isec tabadpanëdash. <sup>4</sup> Adec tabadnubien dada daëd dashcute dasiuidac**bimboec** dasiuidash chënquec chopanëdash. <sup>5</sup> Aid isash dacuëdcuededequi isenquio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemiaid nibëne? <sup>6</sup> Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? <sup>7</sup> Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoai**bi**,” quequin Esusën chiondash —quepanëdash dada daëd chidobo caic. <sup>8</sup> Aden chiac chidobon Esusën chiaid abi bëpiscuda**id** padpiden tantia**pan**ëdash.

<sup>9</sup> Aden tantiash Esus nauedaid shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampanëdash. <sup>10</sup> Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi

chui beneta caido chuipanëdash. <sup>11</sup> Aden chuisho tantiash: —Mimbi chiaid tantiati-apimbo iquebi —quecuededpanëdash iccuededquido. <sup>12</sup> Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dash-cuteuidi uesho ispanëdash. Aden isanec nidequi: —¿Atodain nechitec? —quepanëdash Petedo tantienquo yec.

*Emaus yacmi nidte*  
(Mad 16.12-13)

<sup>13</sup> Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caid yacno nidpanëdash. <sup>14</sup> Adec nidequi ambi Edusaden yacnoshon isboedbëdta ambi tantiaboed chiec onquepanëdash. <sup>15</sup> Aden chiec onquec nidshobi Esusën aid daëdi chinunash aidobëd nidpanëdash. <sup>16</sup> Aden abi chinuntuidsho isac utsibimboec Esus isadpanëdash.

<sup>17</sup> Adec nidequi Esus: —¿Atotsi chuibanec onquec nide? —quepanëdash. Adsho tantiash unësquo yec mamënenquo yec nidtuidpanëdash.

<sup>18</sup> Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

<sup>19</sup> Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibanaiid ambi nabanaidbidi Nuquin Papabëdtan matses dadpenshun bëdamboen isaid icposh. <sup>20</sup> Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. <sup>21</sup> Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Èmbi caboedi unës uaposh. Aidi unës uan daëdec ushobi. <sup>22</sup> Adec daëdec ushun dacuëdanquiecnuc chidobon naden chuibededpash: “Esusën dada nauedbocno badiadnuc nidshun isac <sup>23</sup> nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. <sup>24</sup> Aden chidobon chuisho tantienquo yec ëbëd icquido Esusën dada nauedbocno nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

<sup>25</sup> Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc. <sup>26</sup> ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus. <sup>27</sup> Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibanpanëdash.

<sup>28</sup> Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun: <sup>29</sup> —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

<sup>30</sup> Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. <sup>31</sup> Aden nasho isun badedi, Esus nec, quequin tantianubi Esus nibëdquio yampanëdash. <sup>32</sup> Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

<sup>33</sup> Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash: <sup>34</sup> —Abimbo iquec. Nuquin Icbo uincuempaccosh. Uincuenanec



choquin aidëmbi Simon ismetuidposh –quepanëdash iccuededquido. <sup>35</sup> Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

*Abëd icboedo yacno Esus chote*

*(Mat 28.16-20; Mad 16.14-18; Uan 20.19-23)*

<sup>36</sup> Adec onquecuedednubi nënantanquio choshon Esusën: –Nuquin Papan bëdamboen isaido yec dacuëdenquio yec tabad –capanëdash.

<sup>37</sup> Adec aid chosho isash: Podo bitsi nec, quec dacuëdequi abëd icquido tabadpanëdash.

<sup>38</sup> Adsho isashien Esus: –¿Atotsi quiash, ¿Esusida nepec? mibitedi quepe? <sup>39</sup> Con mëdantebëdta con taë is. Èbibi nebique. ¿Mëtoccaid taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec –quepanëdash Esus abëd icquido chiec.

<sup>40</sup> Aden chuitanquin abi bëchun shuin mëtoccaid chiuë aton mëdantebëdta aton taë Esusën ismepanëdash. <sup>41</sup> Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: –¿Ada pete iquec? –Esusën caquien <sup>42</sup> nuëcquid shëaid cuëshë menepanëdash. <sup>43</sup> Aden meniac bedshun Esusën pepanëdash abëd icquidon isnubi.

<sup>44</sup> Aden piash: –Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi –quepanëdash abëd icquido tantiamenuc. <sup>45</sup> Aden chuishumbic abëd icquido tantiamequioquin: <sup>46</sup> –Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daëdec ushash uincuenendac. <sup>47</sup> Aid tantiashun mibi icsaid mimbi ënsho isash, Icsaquid nec, quenquio yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoaindac. <sup>48</sup> Mëyanquin unës uaqui ëbi uincuenacsho mibitedishun ispoc. <sup>49</sup> Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” –capanëdash Esusën.

*Esus abuc indote*

*(Mad 16.19-20)*

<sup>50</sup> Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: –Nëidtedi bëdamboen ista, Papa –quepanëdash Esus.

<sup>51</sup> Aden chiacsho abëd capucuenequido niamequin Esus aton Papan abuc indopanëdash.

<sup>52</sup> Aden indosho isash, Èbitedishun icbo nec, quequin ismec shuebudash: –Bëdambo iquebi –quianec Edusaden yacno nidanepanëdash. <sup>53</sup> Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nidted-nidtedquin Nuquin Papan naid chuidenepanëdash.

Padi. Aiteded dada uaombi, Teyopido.



## UANËN DADA UAID

### *Nuquin Papa tantiamanquid chiaid*

<sup>1</sup> Èndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquiobidi yec: —Nadquio Nuquin Papa iquec —quec tantiamanquidquio nec. <sup>2</sup> Aidëmbi Nuquin Papabëd icquin <sup>3</sup> abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. <sup>4</sup> Aidquio Nuquin Papa yacno tabadmianquid nec. Nuquin Papapadquidquiobidi yec: —Nadquio Nuquin Papa iquec —quequin paposhquiabimboecnuc tantiamanquidbidi Esus nec. <sup>5</sup> Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niac-niaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

<sup>6</sup> Aden Esusën chuibeniyabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. <sup>7</sup> —“Nuquin Papa yacnuësh abi tantiamequidquio choendac,” quequin Uanën chuibansho tantiashun ma dadpenshun ambi chuiboed tantianu —quequin Nuquin Papan con shënisio abi chuibanquid icmepanëdash. <sup>8</sup> Nuquin Papa yacnuësh choacmaidëmbi con shënision: —Nuquin Papan chomiaid Esus nec —quequin chuibampondash. <sup>9</sup> Aden ambi chuiboedquio Nuquin Papa tantiamenuec matsespanëdash Esus.

<sup>10</sup> Adash matsesbëd tabadsho ambi matses uaidombi tantienquio icquin chieshëmpondash. <sup>11</sup> Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpenshun Esus tantienquio icpondash. <sup>12</sup> Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash. <sup>13</sup> —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

<sup>14</sup> Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. <sup>15</sup> Aid con shënision chuipondash. —Èmbi chuiboedquio nec. “Èbi icsaquid icnuc bëdamboshë icquidquio choec,” èmbi caboedquio nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ènden icpampic,” èmbi caboedquiobi Esus nec —quepondash con shënisio.

<sup>16</sup> Con shënision chiacpadquidquio icquin abi tantiaquido Nuquin Papan bëdamboen isaïdo icmeshun adenuidi Nuquin Papa nuqui bëdamboen ismec. <sup>17</sup> Èndenquimboshë Nuquin Papan chiaid dada uaqun Moisesën Nuquin Papan matses icsaïdo cuidte tantiamepampic. Padnuen Esuquidistun Nuquin Papan bëdamboen iste tantiamequin: —Nadquio Nuquin Papa iquec —quequin matses bëdamboen tantiamepondash. <sup>18</sup> Ambi isacmaidquio icsho matsesën Nuquin Papa bëdamboen tantiatiapimbo iquec. Padnuen aton Mado abentsëcshunquio aton dayun tsadquidënquiobi matsesun Nuquin Papa bëdamboen tantiamepondash. Aidquio chuinu. Tantia.

*Tsusiobon chuimiac Uan acten mentoanquidën chiaid  
(Mat 3.11-12; Mad 1.7-8; Duc 3.15-17)*

<sup>19</sup> Con shënisio Nuquin Papa tantiabenquid acten mentobenequid niondash. Aden acten mentobenesho isash Moisesën chiampid namequido aid chuimenuc chochopondash. Edusaden yacnocquido isadaidbo tsusiobon: —Chuimetan —cac chochoquin con shënisio chuituidpondash. <sup>20</sup> —¿Tsumtsin chiac nai? ¿Mimbembida nai? “Bëdamboshë icquidquio Nuquin Papan chomendac,” quequin nuquin tsusedpan ¿dada uapampidta ne? —catuidpondash. Adoaquien: —Padenquio. Aidpenquio nebi —quepondash. <sup>21</sup> Adshobien: —¿Tsumintsi ne? ¿“Naden naindambi,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

<sup>22</sup> Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded èbi chui —caquien: <sup>23</sup> —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bëdamboshë icquid chomiabi icnuc aid bëyuec utsiba choendac. Aidën shubu nibëdacno capucuenequin chuibanendac naden.

‘Chuiquid dapambo choeque. Podqued andëdbanshunta,’  
quiacbimboen chuiquin: ‘Nuquin Icbo choeque. Icsaid ënash bëdamboec tabadta,’  
quequin chiendac bëyuc choshon,’  
quequin chuipampid nebi —quepondash con shënisio.

<sup>24</sup> Adnubien con tsusedpabon chiampid namequidon padiseyobo caidontsen aton chuiquid dapan chiapadomboen con shënisio chuituidpondash. <sup>25</sup> —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: <sup>26</sup> —Nuquin Papan chiapadomboen abi tantiabenquido acten mentobenec nebi. Èmbi aden bëdamboen nanuc utsimbien bëdamboenshë naindac. Aidi mibëdi tabadshobi ma mimbi tantienquio icboc. <sup>27</sup> Èmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquio chuiquin Nuquin Papambo tantiamendac. “Aidi bëdamboshë icquid icnuc èbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmioshi?” quec tsadebi —quepondash con shënisio padiseyobo chiec. <sup>28</sup> Acte Odan caid uquë cuëmatsiucueësh shubu dadpen icquid Betania caid yacnuësh adpondash.

### *Abided cuidadtequid nendac, Esus caid*

<sup>29</sup> Badiadshun padpiden con shënision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquio obeca bacuëbimboecquid choeque. Aidi isadaidbon obeca bacuëded cuidquin unës uacbimboec matses icsaid bedshunec abided cuidadec unësendac. <sup>30</sup> Èmbi chianeboedquio nec. “Èbi bëyuc tishaidi tishabi icnubi aidi ënden icpampic,” quiash: “Èbi bëdapabi icnuc bëdamboshë icquidquio choendac,” quepobi. <sup>31</sup> Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidëmbi ëmbibi badedquio tantienquio iccombi. “Nuquin Papan chomiaid nec,” quequin tantienquio iccombi —quepondash con shënisio.

### *Esus mentoaid* *(Mat 3.16-17; Mad 1.9-11; Duc 3.21-22)*

<sup>32</sup> Adashic abi onquec: —Nuquin Papan naden ismiac tantiabenombi. Aton Mayan aton dada nibëdquiec dëbimbimboec budec: “Matsadtoendac,” quebocpadequi Esus matsadtosho ispombi. <sup>33</sup> Adsho isash: “Adquidshenda caposh Nuquin Papan: ‘Acten mentoanquid icta,’ èbi caboedën. ‘Con Mayan dëbimbimboec budec matsadtoboedën abi tantiaquidobëd con Mayan tabadmendac,’ Nuquin Papan caboedshenda nepec,” quiobi Esus caic. Èmbembi tantienquio ictsenombi. <sup>34</sup> Aden ismiac: “Nuquin Papan

Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquo Esus nec,” quequin mibi chiec nebi –quepondash con shënisio.

### *Nëid dada uaquid Uan Esusbëd yanaid*

<sup>35</sup> Adashic badiadash ambi acten mentobambocno con shënisio nidoapondash. Aid tsibanequi nidoapondabi. <sup>36</sup> Adec nidquin isquien Esus cuempec. Cuensho isashien con shënisio: –Is. “Nuquin Papan namiaidquo obeca bacuëbimboecquid nec,” ëmbi caboed cueneque –quepondash.

<sup>37</sup> Adsho tantiatanequini con shënisio bëd iccondaïd utsibëd Esus chinunec nidpondac.

<sup>38</sup> Nidquin chinunac bidiadquin istanequien: –¿Atotsi quec ne? –quepondash Esus. Adshobimbi: –Mibi isec nebi, Dabi. ¿Mitsimbo mibi ushaque? Isnu –capondambi. –Chuiquidquo nec –quequin con onquetembi Dabi caondambi. <sup>39</sup> Adoac: –En isec cho –cac abi ushacno isec nidondabi. Ushë abucquo icnuc puduedash yuec tabadec onquetaniash inchështsëcnubi chondabi.

<sup>40</sup> Èbëdtan Esus chinunondaïd Andedes niondash. Shubu dadpen icquid Betsaida caïd yacnuësh caniquid niondash. Aton buchi Petedo niondash. Petedobidi Simon capondash. <sup>41</sup> Adnubien Andedes aton buchi chiec nidpondash. Adec nidquin Petedo istuidash: –Nuquin tsusedpabon chuipampid Nuquin Papa yacnuësh choquid Mesias caïd istuidombique. En isec cho, buchi –capac caondash. Nuquin Papa yacnuësh choquid Quidistu cashumbic con onqueten Mesias caic.

<sup>42</sup> Aden chiaquien aton buchi Esus isec chopondash. Chosho isash Esus: –Uanën mado mibi nec. Mibi Simon nec. “Nidaïd moco utsi uatiapimbo yac bimboec mibi chieshtoenquo icquid yanendac,” quequin mibi nidaïd moco cuënendambi –quepondash Esus Petedo caic. Con onqueten nidaïd moco cain Sepas capondash Esusën. Quidieco matsesën onqueten Petedo capondash.

### *Esusën Uedipebëdta Natanaid istuidaïd*

<sup>43</sup> Badiadash: –Con nidaïd Cadidia caïd yacno nidnu –quianec nidpondash Esus. Adec nidquimbi Uedipe istuidpondash. Istuidshun: –Nuquibi icnu. Cho –caquien Uedipe chopondash. <sup>44</sup> Betsaida yacnuësh caniquidbidi nepondash aid. <sup>45</sup> Esusbëd icquid yanashic dada utsitsen Natanaid caïd chiec nidpondash Uedipe. Adec nidquin istuidshumbien: –Isec cho. Moisesën chiampicpadomboen chuiquin nuquin tsusedpabo utsibon: “Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caïd yacnuësh caniquid neque. Osen mado nec –quepac caondash. <sup>46</sup> Adsho tantiash: –¿Nasaded yacnuështa dada bëdambo icquid chopatsiash? Auëshquo dada bëdambo icquid chotiapimbo iquendac –quepac caondash Natanaid. Adsho tantiash: –En isquiec cho –quepac caondash Uedipe.

<sup>47</sup> Adoac choshobien Esusën: –Is. Isadaïdbombo neque. Muesambo nec –caquien

<sup>48</sup> Natanaidën: –¿Mitsipaden ëbi tantie? Mabi mimbi isacmaidquo nepayoc –capondash. Adoquien: –Uedipen bedtanabi icnubi mibi cuëte icueda caïd tayun tsadsho tantiombi –capondash Esusën. <sup>49</sup> Adsho tantiashumbien: –Nuquin Papan Madombobien mibi nec. Comapenen tantiaquid yec nuquin matses isadaïdbo chuiquid dapambo mibi nendac –capondash Natanaidën: –Istiapimbo yacno chiosh –quequin tantiashun.

<sup>50</sup> Adoquien Esusën: –“Cuëte icueda caïd tayun tsadsho mibi tantiombi,” ëbi qesho ¿tantiashta: “Nuquin Papan Madombobien nec,” badedquo que? Padpiden comapenen tantiaquin nabansho isun mimbi ëbi tantiaquiotsiandac. <sup>51</sup> Tantia. Mibi chuinu. Isadaïdbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquo iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abëd tabadte tantiamec,” quequin mimbi ëbi tantiendac –quepondash Esus abëd icquido chiec.

## 2

### *Esusën ambembi actequid uaid*

<sup>1</sup> Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaid-bon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobëd Esusën tita puduedpondash. <sup>2</sup> Esustsen puduedpondash. <sup>3</sup> Adec puduedash tabadquin uba chinaid actequid uesquin acbeded-pondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimbi tantiacpadomboen nata, mado —capondash. <sup>4</sup> Adoaquien: —¿Atotsi quequin mimbi ëbi chuipe, tita? Chiata. Con Pan tantiacpadënquio naimbique —quepondash Esus. <sup>5</sup> Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

<sup>6</sup> Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. <sup>7</sup> Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. <sup>8</sup> Cushtobanacsho isun Esusën: —Ueshun buanshun mibi ancaquid acmetan —cac acmetampondash.

<sup>9</sup> Adoac acquin tanaquien actequid bëdamboshë icquid icpac caondash acte icboedi. —Nibëda damboedquio ¿mitsimbo bedpash? —quepac caondash yuabo ancaquid. Adsho tantiasun yuabon: —Esusënquiobien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequid bëpash —qeshun. <sup>10</sup> —Nuquin matsesën actequid bëdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimbi nambo. Bëdambo icquidquio ma mimbi nëbi acmianeyoc —quepondash yuabo ancaquid chido bednuequid chiec. Adnubien yuabon actequid bëdamboshë icquid abitedi acmebampondash.

<sup>11</sup> Aden comapenen tantiaquid icquin ambembi actequid uaquin Esusën tauamboen ismebempondash. —Nuquin Papa yacnuësh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesën chiampid Nuquin Papan chomiaidien nec —quequin tantiabenondambi.

### *Esusën chushcaquin cuemiaid*

*(Mat 21.12-13; Mad 11.15-18; Duc 19.45-46)*

<sup>12</sup> Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpactsec ushec tabadondash. <sup>13</sup> Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacuë pec nëbi tabadeque. Isec nidnu. Nid —quianec nidanepondash. <sup>14</sup> Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpactsëc menequido niondash. <sup>15</sup> Adec tabadsho istanquimbien Esusën cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiabanquin piucquid siabudshumbampondash. <sup>16</sup> Adotanquimbic dëbimbimboecquid yuaquidotsen chushcapondash. —Baded



mitsana buanec nid. ¿Piuçquid bednuen shubu uaidta nedic? Ma con Pa tantiate shubu neyoc –quequin chushcapondash.

<sup>17</sup> Adsho isun naden tantiondambi. –Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquío nendac,” quequin Esusën nate chuiquin dada uapampic –quequin tantiondambi.

<sup>18</sup> Aden nicacsho isumbien con matses chuiquidon: –¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme –caquien <sup>19</sup> ismenquío icquin ompoacbimboen Esusën chuipondash. Abibi cadequi: –Mimbi nëid shubu icsa uabocsho padpiden nacnenoaindambi bédambo icnuc. Daëdec ushquin nacnenquin nainendambi –quepondash Esus. <sup>20</sup> Adsho tantiash Nuquin Papa tabadte shubu uashunaid dapa ca danec: –¿Badedquioda nacnempatsia? Nëid nacnenquin seta dadpenquioshë 46tedquobi matamiac cadenec –quepondash con matses chuiquido.

<sup>21-22</sup> Yuecquío ictaneshun Esusën aden chiaid tantiondambi. Unës uacsho chococac daëdec ushash Esus uincuenaccondash. Uincuenacsho isash: –Abibi cadecshenda Esus nepondash. Abibi cadec: “Daëdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic –quequin tantiondambi.

### *Dadpeshun Esus tantiauidaid*

<sup>23</sup> Nuquin Papa tabadte shubu uashunaid daquënë uacnoshon cuemeshumbic Edu-saden yacnoshontsen comapenen tantiaquin nabanquin Esusën ismepondash. Adsho isun matses dadpeshun: –Nuquin tsusedpabon chiampid Nuquin Papan chomiaidien Esus nechitec –qeshun Esus bëdiactsëc tantiatsëccondash. <sup>24</sup> Aden tantiatsëcsho ambembi tantiash: –Ai, ëbi tantiaquidquío nec –quenquío icquin: –Ëbi bëdiactsëc tantiatsec –quequin tantiapanëdash. <sup>25</sup> Utsin chiambobi ambembi tantianëdash. Aden matses abitedishun otacquío tantiaid ambembi tantiaquidquío Esus niondash.

## 3

### *Esusën Nicodemo caid chiaid*

<sup>1</sup> Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. <sup>2</sup> Inchëshën Esusbëd onquenuec chopondash. Choshombic aidëmbi: –“Nuquin Papan icmiacpadquid chuiquidquío mibi nec,” quequin tantiembi. Mimbi comapenen tantiaquin nabansho isun: “Nuquin Papan namiaidënuidtsëquien adotsiash,” mibi caombi –quepondash.

<sup>3</sup> Adsho tantiashun: –Ai, adquid nebi –quenquío icquin Esusën ompoacbimboen chuipondash naden. –Tantia. Mibi bédamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquío ictsiac <sup>4</sup> –quesho tantiashien: –¿Mitsipaden tsusiobi chuca uapatsiash? Chidon padpiden usundoshon tishiapimboen iquec –quepondash Nicodemo. <sup>5</sup> Adsho tantiashun Esusën: –Nuquin Papan Mayanën tantiamiac: “Nuquin Papa tantiaquin ëbi icsaid ëntiadquío iquebi,” quiash bédamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. <sup>6</sup> Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. <sup>7</sup> “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec. <sup>8</sup> Tantia. Mibi chuinu. Cunquequid isadenquío icquid nec. Isadenquío icquimbi cuncac cuëte ishçudsho isash: “Abi cunquec,” mibi quepec. Adquibidi isadenquío Nuquin Papan Mayan iquec. Isadenquío icquimbi aidën chuca uaid bédamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin



mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

<sup>9</sup> Adsho tantiash: —¿Midapadec? —quepondash Nicodemo. <sup>10</sup> Adoaquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. <sup>11</sup> Ènden ushë utsin mibi chedo chiombi. Èmbi isondaidquo chuiquinc èmbi tantiondaidquo chuiquinc caombi. Adsho tantiash: “Tantiadenquo iquec,” ma mibi queboc. <sup>12</sup> ¿Èmbi chuiboed tantiadenquo icnubi padpiden chuiquin èmbi Nuquin Papan abi yacnoshon naid chuishomenda tantiatsia? <sup>13</sup> Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. <sup>14</sup> ¿Atotsi canuen nuquin tsusedpa Moisesën nisibimboecnuc shocosh nacenaid dectampampic? “Nuquin Papan chiacpadec ma aid isec nisin piaid bëdanu,” quequin cuesten dectampampic. Adomboembidi matses cuidmenquo icnuec cuesten dectamëndendabi ëbided ciudadec unësec. <sup>15</sup> Èbi tantiaquido unësacsho cuidenquo icquin Nuquin Papa yacno ëbëd tabadmenuec adendabi —quepondash Esus Nicodemo chiec.

### *Nuquin Papan matses abitedi tantiaquin naid*

<sup>16</sup> Aden Esusën abided ciudadec unëste chuipondash. Nuquin Papan: —Ma adec abided ciudadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided cuidpanëdash. —Èmbi adoaid con Mado tantiaquid unësacsho icsaido cuidacno nidmenquo icquin ëbëdi tabadmendambi —quequin aton Madoded cuidpanëdash. <sup>17</sup> ¿Matses cuidnuenda Nuquin Papan Esus matsesmeapanëdash? Padenquo. Matses cuidenquo icnuen napanëdash.

<sup>18</sup> Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —queshun. <sup>19</sup> Nuquin Papan matsesmiaidën Esusën abi icsaid chuisho matses icsambo icquidon tantiatiapimbo iquec. Ambi icsamboen naid ëntiapimbo icquin Esus tantiatiapimbo iquec. <sup>20</sup> Adquidon: —Èbi icsaid Esusën utsibo tantiamenushe. “Icsambo iquec,” èbi canushe —queshun Esus chieshëmpec. <sup>21</sup> Nuquin Papan chiacpadec tabadquidombien Esus chieshënenquo iquec. —Nuquin Papan namiacpadec tabadquid nebique. Ma Esusën èmbi bëdamboen naid chuibampanuna —quiash Esus tantiate bumpec.

### *Uan acten mentoanquidën Esus chuioaid*

<sup>22</sup> Adec Nicodemobëd onqueboshien Esus nidpondash. Edusaden yacnuësh nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenquido acten mentobeniondambi. <sup>23</sup> Adnubien adomboembidi con shënisionsen acten mentobeniac caondash. Enon caid yacnoshon Sadin caid anoentsëqui chunquen diadacnoshon matses dadpen acten mentoac caondash con shënision. <sup>24</sup> Chieshëmënkidon quënën nauedabi adoac caondash.

<sup>25</sup> Adnubien con shënsiobëd icquido con matses utsibëd: —Mimbi icsamboen chiec —quec chushcananac caondash. Con shënsiobëd icquido: —Uanën Nuquin Papa tantiabenquido bëdamboen acten mentobamposh —quesho tantiash: —Padenquo. Esusëmbien bëdamboen acten mentobaniosh —quepac caondash. <sup>26</sup> Adshumbien con shënsiobëd icquidon: —Nuqui chuiquid chiec nidnu. Nid —quianec nidquin con shënsio chuituidpac caondash. —Acte Odan caid uquë cuëmatsiucshun ¿mitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquo acten mentobeniac caosh. ¿Ada bëda icpec? —caquien: <sup>27</sup> —“Nuquin Papan chiacpadomboen Esusën nash. Adomboembimbi naic,” quesahun Esus chieshëntiapimbo iquendabi. <sup>28</sup> “Nuquin Papan chomiaidpenquieni nec,” quequin mibi chiondambi.

“Nuquin Papan chomiac bédamboshë icquid choendac,’ quequin bëyuc choshon aid chiec nebi,” quiondabi mibi chiec. <sup>29</sup> “Ëmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh? Padenquo. Bënëbëd nidmiash bédambo yacbimboec Esusbëd nidanesho isash bédambo iquebi. <sup>30</sup> Ëmbibi Nuquin Papan chiacpadomboen Esus tantiamequin ënquin chuibanuc ëmbi acten mentoaido daëdpactsëc yanendac. Ëmbi chuiboedquo Esus tantiaquidoen dadpenquo yanendac. Aidquo bédamboshë iquec –quepac caondash con shënisio abëd icquido chiec.

### *Nuquin Papa yacnuësh choquid chiaid*

<sup>31</sup> Adshumbic con shënision naden chuipac caondash. –Esusquo bédamboshë iquec. Nuquin Papa yacnuësh choquid abipadquid utsi nibëdec. Padnueni matses yec: “Nuquin Papa isondambi. Nadquo iccondash” quequin chuitiapimbo iquebi. Esusëmbien <sup>32</sup> ambi isondaidbëdta ambi tantiondaidquo chuipec. Aden chiaqui matses dadpen: “Abimbo caic,” quenquo icpec. <sup>33</sup> Esus tantiaquidon: “Nuquin Papa mue-sambo nec. Ambi: ‘Bédamboshë icquid choendac,’ quequin dada uamepampidquo Esus nec,” capec. <sup>34</sup> Nuquin Papan chomiaidquo icquin Nuquin Papan chiaidquo Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. <sup>35</sup> Ambi tantiaidquo icsho aton Papan abitedishun Icbombo icmiac. <sup>36</sup> Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquo icnuc. Esus chieshënkuido en Nuquin Papa yacno isenquo yec icsaido cuidquiacno nidendac –quequin con shënision chuipac caondash.

## 4

### *Acte uequid chido Esusën chiaid*

<sup>1</sup> Esusbëd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: –“Uan acten mentoanquidën naid dëniacquin Esusën matses dadpenquo acten mentobanosh,” quiosh –queshun Esus chieshëmpac caondash. <sup>2</sup> Esusën nainquo icnuc ëmbimbo nasho isun chiaqui aden Esus chieshënac caondash. <sup>3</sup> –Mibi adosh –cac: –Con nidaidën nidnu –quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

<sup>4</sup> Aid podquedën nidequi nidaid utsi yacno Samadia caid yacno nidpondash. <sup>5-6</sup> Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: –Ëbi unësan nëid tied: “Con na nec,” cata, mado –quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquiobi: –Tiboquenu –quec Esus tsadtuidpondash. <sup>7-8</sup> Adec tsadtuidnubini: –Pete bedtanu –quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: –Acte beccho. Acnu, champi –caquien: <sup>9</sup> –“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. –Samadia yacnocquidbëd onquesambo isadaidbo nec –quequin tantiec adac caondash.

<sup>10</sup> Adshobien Esusën badedquo cuembo chienquo icquin chuipac caondash. –Nuquin Papan bédamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bédambo icmianquid mibi acmetsiambi –quepac caondash Esus. <sup>11</sup> Adoquien acte uequid chidon actembo ca danquin: –¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte

uquëducquio iquec? ¿Mitsimbo acte bëdambo icmianquid ueshun ëbi acmetsia? <sup>12</sup> Nëid acte nuquin tsusedpa Acobon uëdëshcapampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquico icquin nai? ¿Bëdamboshë icquid icquinda mimbi acte bëdamboshë icquid ëbi acmepatsia? —capondash acte uequid chidon. <sup>13</sup> Adoaquien: —Nëid acash mibi bundoac. <sup>14</sup> Èmbi acmiac mibi bundoenquico ictsiac. Acte bëdambo icmianquid acmiac ënëdenquico yec tabadquid mibi yantsiac —quepac caondash Esus badedi cuembo chienquico yec. —Èbi tantiaquidobëd con Mayan tabadmiac bëdambo yanec unësacsho ëbëdi tabadmendambi —quequin tantiec adac caondash.

<sup>15</sup> Adsho tantiashun padpiden acte ca danquin: —Adquidquico ëbi acme. Bundoenquico yec nëmbo acte uec choenquico ictsiabique —caquien: <sup>16</sup> —Min bënë bedtan —capac caondash Esusën. —Nuquin Papan chomiaidquico yec comapenen tantiaquid mibi nec —camenuen adoac caondash. <sup>17</sup> —Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. <sup>18</sup> Dada mëdante auc abentsëctedquicobi min bënë icpadenec. Aidon mibi niambudnian nëbi mibëd icquid min bënëpenquico nec. Abimbo mimbi caic —quepac caondash Esus.

<sup>19</sup> Adsho tantiash: —Isambobi comapenen tantiaquidien mibi nechitec. Mibi-padquidquico chiec: “Nuquin Papan chomiaidquico nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiapè? <sup>20</sup> Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. <sup>21</sup> Adsho tantiashun Esusën: —Tantia. Mibi bëdamboen chuinu. Nëbi nëid macuësh dapanshunuidtsëqui Nuquin Papa tantienquico icquin Edusaden yacnoshonuidtsëqui tantienquico icquin nidaid utsi-utsiec yacnoshon adembidi Nuquin Papa tantiabedendac. <sup>22</sup> Min matsesën Nuquin Papan chiaid daëdpactsëc tantiatsëcshun Nuquin Papa bëdiactsëc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bëdambo icmianquid nuquin matsesën tishendac,” quequin bëdamboen tantiec. <sup>23</sup> Nëbien utsin-utsinquien muainquico icquin: “Con Icbo nec,” quequin Nuquin Papa tantiendac. Ambi chiacpadec bëdamboec tabadsho isash: “Adquid ëbi tantiaquidquico nec,” quetsiash Nuquin Papa. <sup>24</sup> “Nuquin Papa tantiaquid ictiadquico iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

<sup>25</sup> Adsho tantiash chido: —“Nuquin Papan matses bëdambo icmequid chuquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuquì tantienquico yaidtedi tantiametsiash. Aidbimboecquidien mibi nechitec —caquien: <sup>26</sup> —Mimbi chiaidquicobini nec —quepac caondash Esus chido chiec.

### *Esus Samadia yacnocquido chiec tabadaid*

<sup>27</sup> Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquico onquec. —¿Atotsi chiec chidobëd onquico? —cainquico iccondambi Esus. <sup>28</sup> Adec ëbi chonobi tëchu nianec acte uec choquid chido nidpondash aton matses chiec shubuno nidec. <sup>29</sup> —Isec cho. Èmbi isacmaid dadan ëmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuidac: <sup>30</sup> —En isnu. Nid. Aidien nechitashe. Isnu —quianec matses dadpen cho-chopondash.

<sup>31</sup> Aido choabi icnubi: —Në pete, Icbo —ëmbi caquien: <sup>32</sup> —Padi. Mimbi tantienquico yaid con na utsi iquec —quepondash Esus petepenquico chiequi. <sup>33</sup> Adsho tantiashini

pete ca danec: —¿Utsibonda pete bëshumpash? —quecuededpondac ëbitedi. <sup>34</sup> Adsho tantiash Esus: —Ëbi cuishoncamete utsi iquec. Ëbi chomiondaid Nuquin Papan chiacpadomboen naic bédambo iquebi pete piacbimboec. Ambi chiaidtedi nainuec dayacquiò iquebi —quepondash. <sup>35</sup> Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nëmbo icquidon ëbi tantiabempec? Padenquio. “Nëidon Esus tantiendac,” mimbi cacmaidobi cho-choeque. Is. <sup>36</sup> Acte uequid chido ëmbi chuiboedën chiac matses dadpen cho-choeque. Chuibanuna. Ëbi tantiash Nuquin Papabëd tabadtequid yanendac. Adsho isash nuqui cuishonquendac piucquid bedashbimboec. <sup>37</sup> Tied icbon: “Con na peta,” cac ambi nidtsinacmaid matsesën bedec. <sup>38</sup> Aden ambi nitsinacmaid bedacimboen mimbi naic. Utsibomba Nuquin Papan chiaid chuibanëdaido nëmbo icquido mimbitsen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban —capondash Esusën abëd icquido chuiquin.

<sup>39</sup> Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. <sup>40</sup> Cho-choquimbi badedi: —Ëbi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. <sup>41</sup> Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. <sup>42</sup> Adashic acte uequid chido chiec: —Mimbi chuishouidi tantiaboedëmbi nëmbi aidënquio chuisho bédamboen tantiaquioc. “Nuquin Papa matses bédamboen ismequid nec,” quequin tantiembi —quiampondash Samadia yacnocquido dadpen.

### *Chuiquid dapan mado Esusën bédamiaid*

<sup>43</sup> Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. <sup>44</sup> —Ëmbi chiacpaden abi caniondacnoshon Nuquin Papan chiaid chuibanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. <sup>45</sup> Adsho isun: —Tantiesa nendac —Esusën caboedombi abi bëdiactsëc tantiatsëccondash. —¿Choecta icco? Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

<sup>46</sup> Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash. <sup>47</sup> Adashic: —Esus Udeya yacnuësh choac caoshe. Istanu —quianec chopac caondash unëstiadtsëcquio icquidën papa. Adec Esus yacno choshombien: —Con mado unëstiadtsëcquio iccoshe. Bëdamec cho —caqui <sup>48</sup> nidenquio yec abi datsidadquido chiec: —Ëbimbo mimbi tantienquio iquec. Ëmbi bédameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec —quepondash Esus.

<sup>49</sup> Adec onqueshobien abi niacbidanquin padpiden: —Baded cho. Con mado unëstiadtsëcquio iccoshe —capondash. <sup>50</sup> Adoquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash. <sup>51</sup> Adec nidquimbi abi chuinuec cho-chosho aton yuabo bëquedac caondash. Aden bëquedaqui yuan: —Min mado bédanosh —quesho tantiashun: <sup>52</sup> —¿Mitsimbo ushë icnuc con mado bédanosh? —cac: —Ënden ushë yaquëduidtsëcnubi da una yantsëcnubi bédanosh —quepac caondash aton yuabo. <sup>53</sup> Adsho tantiash: —Adënquioshendabi: “Min mado unësenquio ye. Nidec nid,” caposh Esusën —quepac caondash unëstsemboedën papa. Adshun: —Nuquin



Papan chomiaidquo yec comapenen tantiaquin nabanquidquo Esus nec –quequin aton shubun icquidobëdtambi Esus tantiapac caondash. <sup>54</sup> Adec Udeya yacnuësh choash Cadidia yacnobidi ambi uba chinaid actequid uaqin ismequin tauaondacnobidi tabadquin bédamequintsen Esusën ismepondash.

## 5

### *Esusën dada icsatsaid bédamiaid*

<sup>1</sup> Yuecquo ictanec Esus: –Edusaden yacno cuëdënuec nuquin matses cho-choeque. Nuquitsen nidnu. Nid –quianec nidanepondash. <sup>2</sup> Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. <sup>3</sup> Acte nënantanquo icnuc dacuenadquiec shubumpi tabadquidën matses dadpen tabadpondash daicsaidouidquo. Bëshuaido yec capuenquo icquido yec canite tsasiaido yec quec tabadpondash. <sup>4</sup> –“Nuquin Papan abi yacnoshon uaid mayan bédan tēccuascaid acten abia mentoadquid bédanquid,” quedeneque. Tēccuascaic ma chobono –quiash cainec tabadpondash.

<sup>5</sup> Adnubien Esusën ënden caniaidquo ambobi uesho istuidpondash. Ëndenquimboshë aton dada icsabudash seta dadpen 38tedquiobi matamec capuenquo yec icsabudtsaidquo nepondash. <sup>6</sup> Adsho istuidshun: –Ëdenquo daicsabudaid nec –quequin tantiashun: –¿Bédanteda bune? –catuidpondash Esusën. <sup>7</sup> Adoaquien: –Aï ¿mitsipadequini bédampe? Ëbi bëdiactsëcquo nidnuc utsiba badedquo mentoadteniosh. Ëbi buanquin mentoquid nibëdec –quepondash daicsatsaid. <sup>8</sup> Adshobien Esusën: –Min ushte nacnentanquin buanec nid –cac <sup>9</sup> badedquo aton dada bédantanquin aton ushte buanec nidpondash. Aid ushë chonoadenquo icte ushë niondash.

<sup>10</sup> Aden buanshobien con matses chuiquidon: –¿Chonoadenquo icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc –quequin chushcapac caondash. <sup>11</sup> Adoaquien: –Ëbi bédameboedën: “Buanec nid,” cac mambi naiyoc –quepac caondash Esusën bédameboed. <sup>12</sup> Adsho tantiashun: –¿Tsuntsin naosh? –caquien: <sup>13</sup> –Tsauidi. Ëmbi isacmaid ëmbi isquiambobi badedquo nidaccosh matses dadpen icnuc –quepac caondash bédameboed.

<sup>14</sup> Adshumbic Nuquin Papa tabadte shubu uashunaid daquënë uacno puduedshun ambi bédameboed daicsacboed Esusën istuidshumbien: –Tantia. Mibi chuinu. Ëmbi bédameboedquo mibi neque. Mimbi icsamboen naid ënash bédambo icta. “Nuquin Papan cuidquiac bédanenquo yec daicsabudquiochitomane,” quiash adta –capondash Esusën.

<sup>15</sup> Adoaquien bédameboed abi: “¿Tsuntsin naosh?” caboedo chiec nidpac caondash. Nidshumbic: –Ëbi bédameboed Esus niosh –quequin chuituidpac caondash. <sup>16</sup> Aden chuisho tantiatanequien: –Chonoadenquo icte ushënuidi bédamepac caosh. Icsambo iquec –quequin con matses chuiquidon Esus chieshëmpac caondash. <sup>17</sup> Adnubien: –Mibi adosh –quesho tantiashun abi chieshënuido istuidshun Esusën naden chuipondash. –Mimbi Nuquin Papa caid con Pa ënenquo icquin matses nashunquidquo nec. Adecbidi ënenquo icquin matses nashunquidquo nebi. Chonoadenquo icte ushëmbidi con Pabëdtan adoquid nebi –quepondash Esus. <sup>18</sup> Adsho tantiatanequien: –“Chonoadenquo icte ushën naquid icsambo iquec,” nuqui caboedquo: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquo nebi,” quechitequien nioshe. Cuesunequimbien ictiad –quepac caondash con matses chuiquido.

### *Nuquin Papan Mado nebi, quiaid*



19 Adec abi chieshënquido abi cunesunete bunshobien padpiden istuidshun chuipon-dash Esusën. —¿Ëmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. 20 Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bëdamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. 21 Con Papadquidquio yec unësaid uincuemequidquio nebi. Matses ëmbi tantiaidotedi ëbëdi tabadmenuen uincuemendambi. 22 ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesaba icsambo icscho cuidnuna,” caindambi con Pa. 23 Aidëmbi: “Ëbi tantiacpaden ma con Madotsen bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icscho ëbi tantiatipimbo icquidon ëbi chomiondaid Nuquin Papatsen tantienquio iquec. 24 ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësacsho cuidenquio icquin ëbëdi tabadmendambi. Cuidtequid icboedi ëbi tantiaish ëbëdi tabadtequid yanendac —quepondash Esus.

25 Adashic padpidec onquec: —Tantia. Mibi padpiden chuinu. Unësaidën tantienquio yachimboen ëbi tantienquio icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësacsho uincuemeshun ëbëdi tabadmendambi. 26 Con Pan icmiacpadequi unësaid uincuemequid nebi. Abibi unëstiapimbo icquid icquin unësaid uincuemequidquio con Pa nec. Ambi icmiacpadquiequi abi yacpadquidquio iquebi. 27 Adec unëstiapimbo iccondaidi matsesash icsaisambo icscho Con Pan matses icsaido cuidquid icmiondashi. 28 Ëbi adsho tantiaishun: “¿Abimbobida capeba? Muequien nechitec,” ëbi cainda. ¿Muectabi nedi? Padenquio. Con Pan tantiacpadënquio ëmbi cuënac unësaidotedi uincuenendac. 29 Adec uincuenacsho ëbi tantiaquido ëbëdi tabadmequin ëbi tantiesabo icsaido cuidacno nidmendambi. 30 Ëmbentsëqui nainquio iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquio icquin Con Pa bëdambo icmenuen aidën chiacpadomboen naimbi —quepondash Esus abi chieshënquido chiec.

### *Utsintsen ëbi chiec, quequin Esusën chiaid*

31 Adshumbic Esusën abi chieshënquido chuioapondash. —Nuquin matsesën naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” qesho tantiaishun: “Abimbo mimbi caic,” mimbi ëbi catiapimbo iquec. 32 Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. 33 Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. 34-35 Aden chieshtoenquio icquin bëdamboen chuipadenec. Chuisho tantiaatsash mibi bëdambo icuidtsëccondac. “Ëmbi Uan padon naid chuisho tantiaishun: ‘Abimbo mimbi caic,’ ëbi capashun. Ëbi adosho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiactsëc tantiamequin chuipadenec. ¿Adquid matsesënuidtsëquidabi abimbo chuipec? 36 Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” que-tiadquidi mibi nec. 37 Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin

Papada istio? Padambo mimbi iquec. <sup>38</sup> Adembidi ambi dada uamequin chiampidquio ma mimbi bédamboen tantienquio yoc. Aid bédamboen tantiashumbien Nuquin Papan chomiondaid ëbitsen mimbi tantiatsiac. <sup>39</sup> Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabéd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc. <sup>40</sup> Aden dada uamepampid isbanquidombi mimbi ëbi tantienquio iquec. Ëbi tantiashoembi mibi Nuquin Papa yacno ëbéd tabadmetsiandac. <sup>41</sup> “Ëbi adsho tantiashun ma matsesën ëbi: ‘Bédambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc. <sup>42</sup> Ëbi tantienquio icscho isun: “Nuquin Papa tantiesabo nec,” quequin mibi tantiembi. <sup>43</sup> Ëmbien Nuquin Papan chiacpadomboen naic. Aden nasho mimbi ëbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. <sup>44</sup> Mibibi tantiadec: “Mibi bédambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bédambo iquec,” cametiapimbo iquec –quepondash Esus abi chieshênquido chiec.

<sup>45</sup> Adashic padpidec: –¿Ëmbentsëquidambi: “Ëbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidênquio Moisesëntsen: “Nëido icsambo iquec,” mibi caindac. <sup>46</sup> Aidên chiampid bédamboen tantiaquimbien mimbi ëbi tantiatsiac. Aidên chiampidi mabi neyoc. <sup>47</sup> Aden Moisesën chiampid tantienquio icquin ëmbi chuiboedtsen mimbi tantiatiapimbo iquec –quequin Esusën abi chieshênquido chuipondash: –Moisesën chiampid tantiaquidquio nebi –quequido chuiquin.

## 6

### *Esusën pete uatanquin 5000tedi pemiaid (Mat 14.13-21; Mad 6.30-44; Duc 9.10-17)*

<sup>1</sup> Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabédtoшон potiacpondash. Aid chiambidi matses utsibon Tibedias capondash. <sup>2-3</sup> Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bédamesho isboedo Esus isnuec cho-chopondash. <sup>4</sup> Nuquin Papan isadaidbo unës uainquio icquin matamiampid inchësh tantianuec pec tabadte ushë nëbi yanuc niondash.

<sup>5</sup> Aido cho-chosho istanequien Esus: –Uedipe, piucquid buanshun ¿mitsimbo pete bedtane nëido pemenu? –quepondash Uedipe chiec. <sup>6</sup> –¿Atoda queque? Tantianu –quiash adpondash Esus. –Pete bedabi icnuc ëmbibi pete uanu –quequin otacquo tantiequi adondash. <sup>7</sup> Adoaquien Uedipe: –Ma aidtedquio pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidtedquio pemiaidenquio ictsiash –quepondash Uedipe.

<sup>8</sup> Adnubien Andedesën Petedon utsin: <sup>9</sup> –Ma në madompin panëmpi 5tedtsëc icpayoc, Icbo. Nuëcquidëmpi daëdquiobi ictsec. Matses dadpenquio iquec. Aidtedtsëcquid pemetiapimbo iquec –caquien <sup>10</sup> Esusën: –Padi. Aidi bédambo iquec. Abitedi: “Nëmbo tabad,” caban –cac: –Nëmbo tabad –cabanac sebad-sebadpambo icquidên uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

<sup>11</sup> Adshumbien Esusën madompin pete pamba bedtanquin Nuquin Papa chuipondash. –Pete uaquid yec mibi bédamboshë iquec. Mimbi uaid nëid pete bédambo iquec, Papa –quec onquetanquin: –Meneban –cac abéd icquidon tabadquido abitedi menebampondash. Adotanquimbic nuëcquidëmpitsen bedtanquin adembidi Nuquin

Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. <sup>12</sup> Aden ambi piactembi pebededacshobien Esusën: —Napi uaid secainda. Sandoshon dayun ua —cac <sup>13</sup> tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

<sup>14</sup> Aden pemiaquien pemiaido: —Comapenen tantiaquin Esusën pete dadpenquoio icmiac. Moisesën chuipampidshenda nepec. “Nuquin Papan bédamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquoio yec. <sup>15</sup> Adsho ambembi tantiashien: —Abi chuiquid icmenuen ëbi “Bednu,” caïque. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

*Esus acte bëntse choaid*  
(*Mat 14.22-27; Mad 6.45-52*)

<sup>16</sup> Esus cuembon inchëshbudtsëqui chian budondabi ëbitedi. <sup>17</sup> —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. <sup>18</sup> Adnubien cunquequid dapa cunquetuidpondash. Acte comapenec tēcguasquenuc <sup>19</sup> uncadenquoio yampondash. Ënapen nidabi nëbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. <sup>20</sup> Adshobini: —Ëbi neque. Dacuëndenda —capondash. <sup>21</sup> Adoac: —Esus nec —quetanquin badedi antsadtomiondambi. Aid antsadtometanquin badedquoio potepondambi. Nandoash ambobi ushondabi Capednaun yacno.

*Pemiaidon Esus istuidoaid*

<sup>22</sup> Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aïdbëd nidenquoio icpaboc. ¿Mitsimbo nidpash? —quepac caondash pemiaido. <sup>23</sup> Adnubien shubu dadpen icquid Tibedias caid yacnocquidon cano dadpen bë-bëpac caondash. Pete pemebocno anoentsëqui nando-nandosho isash: <sup>24</sup> —Potequimbien Esusën yashe. Nëid canobi antabëdtoshon potenuna —quetanec antabëdtoshon potiac-potiacpac caondash.

Potiac-potiacash Capednaun yacno pudundoshon <sup>25</sup> Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquoio yec: <sup>26</sup> —Tantia. Mibitedi chuinu. ¿Ëbimbo tantianueta chodio? Padenquoio. Ëmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimbi ëbi nibëneyoc. <sup>27</sup> Peteuidtsëqui tantiaquin pete bednuen naquidquoio ma mibi neyoc. Aidquoio chodquetequid nendac. Chodquetiapimbo icquid tantiaquin bédamboen nata. Aden nash ëmbi icmiacpadquiec Nuquin Papabëd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. <sup>28</sup> Adsho tantiash: —“Nuquin Papan chiacpadomboen nata,” quepequien mibi iquec. Adomboen natiadquoio icquin ¿atotsimbi nape? —caquien: <sup>29</sup> —Nuquin Papan chiacpadomboen natiadquoio icquin ambi chomiondaïdquoio tantiata —quepondash Esus ambi pemiaido chiec.

<sup>30</sup> Adoacquien: —¿Mimbi aden chuishouïdïdambi: “Adquid nec,” quequin tantiape? ¿Atotsi utsi comapenen tantiaquin mimbi ëbi ismepatsia? <sup>31</sup> “Ëndenquimboshë pete nibëdacnoshon Moisesën con tsusedpabo nibëdbëdi sequiaïd pete pemianepampic,” quequin dada uapampid isombique. Adquid nacnenquin ëbi isme —quepondash pemiaido peteuidtsëqui tantiec. <sup>32</sup> Adoacquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaïd petebimboecquid utsien Nuquin Papan mibi tantiametiadquoio iquec. <sup>33</sup> Aid petebimboecquidën matses bédambo icmetsiash pete piachimboecnuc —quepondash Esus abibi cadequi.

<sup>34</sup> Adsho tantiash petembo ca danec: —Ēnenquoio icquin adquid ëbi pemeta — quepondash pemiaido ambi peboeduidtsëqui tantiec. <sup>35</sup> Adshobien Esusën: — “Ēbiuidtsëqui petebimboecquid icquin matses bëdambo icmequid nebi,” caimbi. Ēbi tantiaquid ënenquoio icquin bëdambo icmendambi petebëdi acte bundoenquoio yacimboecnuc. <sup>36</sup> Ēmbi chuibocpadomboen ma mimbi ëbi tantienquoio icboc. Ēmbi comapenen tantiaquin nabansho isumbi ma mimbi ëbi tantienquoio icboc. <sup>37</sup> Utsibombien ëbi tantiendac. Nuquin Papan tantiamiaidtedishun ëbi tantiasho bëdamboen isquin cacumenquoio iquendambi. <sup>38</sup> ¿Ēmbi tantiacpadomboen naquidtabi nedi? Padenquoio. Nuquin Papan chiacpadomboen nanuec mabi abi yacnuësh chondac. <sup>39</sup> Aden aidën chiacpadomboen nanuen ëbi tantiaquido unësacsho uincuemeshun cuidenquoio icquin ëbëdi tabadmendambi. Unësaid abitedi uincuemete ushën adoendambi. <sup>40</sup> Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

<sup>41</sup> Adec: —Nuquin Papa yacnuësh chondaïd yec petebimboecquid nebi —quesho tantiashien con matses chuiquido: <sup>42</sup> —¿Adquidida nepec? Ma icsamboen chuiipayoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmëdquid neyoc. Ma Osen mado neyoc. Anitsen tantiembi. Matsesën tishaid Nuquin Papa yacnuësh choquid ictiapimbo iquec —quecuededpondash.

<sup>43</sup> Adshobien Esusën: —Shoshquetsëcquin ëbi icsamboen chienda. Abimboembi caoc. <sup>44</sup> Ēbi chomiondaïdën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësacsho unësaid uincuemete ushën uincuemendambi. <sup>45</sup> Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bëdamboen iste matses tantiamendac,” quequin chuiapampic. Aden Nuquin Papan tantiamiaido ëbi tantiaquido yantsiash. <sup>46</sup> “Ambi tantiamiaidën matsesën Nuquin Papa isplash,” quenquoio iquebi. Ēmbiuidtsëqui abëd icquin Nuquin Papa isondambi. Aden abëd icquin abi isondaïdi matsesondabi —quepondash Esus: —Matsesi nec —abi caquido chiec.

<sup>47</sup> Adashic padpidec: —Abimbo caombi. Ēbi tantiaquido Nuquin Papa yacnombo ëbëdi tabadmendambi. <sup>48</sup> Petebimboecquid icquin aden tabadmendambi. Adecbidi bëdamboec tabadmianquid nebi. <sup>49</sup> Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. <sup>50</sup> Petebimboecquid utsien Nuquin Papa yacnuësh chondaïd nëmbobi iquec. Aid piash ëmbi chiacpadquiec padpidec unësenquoio yec Nuquin Papabëd tabadtequid yanendac. <sup>51</sup> Adquidquoio nebi. Con nami piash matses unëstiapimbo icquid yanendac. Adquidquoio matses icmenuec ëbided cuidadquin con nami menendambi —quepondash Esus ompoacbimboen chiec. —Ēbi tantiaquido nëbi bëdamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec: —Petebimboecquid icsho ëbi piash matses unëstiapimbo icquid yanendac —quepondash Esus. —Ēbi tantiaquido cuidmenquoio icnuec ëbided cuidadec unësendabi —quequin tantiec: —Con nami menendambi —quepondash Esus.

<sup>52</sup> Adec: —Con nami piash matses unëstiapimbo icquid yanendac —quesho tantiashien namimbo ca danec con matses chuiquido onquecuededpondash. Utsi-utsiec: —¿Mitsipaden Esusën aton nami nuqui pemepatsiash? Aidquio tantiatiapimbo iquebi —quecuedednubi utsi-utsiec: —¿Atotsi chuitiadquoio yec niosh? Chuisho tantianu —quecuededpondash. <sup>53-54</sup> Adsho tantiashun Esusën ambi chiacpadomboembidi chuioapondash. —Tantia. Mibi chuinu. Matses tantiaquidquoio nebi. Aden tantiaquiec ëbided cuidadec unësendabi. Ēbi adec unëso isun con nami pequinc con intac acquinc cash nidaidënuësh bëdamboec tabadquid yanash Nuquin Papabëd tabadtequid



mibi yanendac. Adquid icsho unësaido uincuemete ushënquio uincuemendambi ëbëdi tabadmenuen. Ëmbi chiacpadomboen nainquio yash Nuquin Papabëd tabadtiapimbo mibi iquendac. <sup>55</sup> Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididiquec con nami icsabudec ëbided cuidadec unësaid tantienquio yec mibi bëdamboec tabadtiapimbo iquendac. <sup>56</sup> Aden ëmbi namibëdta intac chuisho bëdamboen tantiashun ëmbi chiacpadomboen matsesën natiadquio yanendac. Adsho isun aidbëd tëshnanenquio icquin bëdamboec tabadquid icmendambi. <sup>57</sup> Nuquin Papa unëstiapimbo icquid yec matses uincuemequidquio nec. Aidën chomiac ambi namiacpadomboenuidi naquin ëbi tantiec tabadquid unësacsho uincuemequin unëstiapimbo icquid icmendambi. <sup>58</sup> Aden ëmbi naid tantiamenuc: “Nuquin Papa yacnuësh chondaid petebimboecquid utsi iquec,” quiobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquio nebi. Adquid pequidî tsusiobudash unëspampic. Ëbi tantiaquidien padpidec unëstiapimbo icquid yanendac <sup>59</sup> —quepondash Esus Nuquin Papan chiaid chuibante shubunuësh Capednaun yacnuësh.

### *Abi tantiauidquidon Esus nianondaid*

<sup>60</sup> Adec: —Con nami pequinc con intac acquinc cash mibi bëdambo ictsiac —Esus quesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquio yec. <sup>61</sup> Adec onquesho ambembi tantiash Esus onqueoapondash. —¿Ëmbi chuiboed tantiash chieshtotiadquioda ique? <sup>62</sup> Nuquin Papan matsesmiaid yequi unësash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec. <sup>63</sup> Namimbo intacquiobëdta ca danequien mibi nec. ¿Namimbo pequinc intacquo acquinc cashta mibi bëdambo icpatsia? Padenquio. Nuquin Papan Mayanën ëmbi chuibobëdta ëbi tantiamequin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec. <sup>64</sup> Adashic padpidec: —Ëmbi aden bëdamboen chiaqui utsin-utsinquien mimbi ëbi tantienquio yanendac —quepondash abi tantiauidquido chiec. Aidô tauamboec abëdi nidnuc: —Nëidën ëbi tantienquio yanendac. Nëid utsin ëbi chieshënquido ëbi bedmendac —quequin ambembi Esusën tantiapanëdash.

<sup>65</sup> Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiaidënquien ëbi tantiatsiash,” quequin chiombi —quepondash Esus. <sup>66</sup> Adsho tantiashun dadpenshun Esus nianondash. <sup>67</sup> Aden nianaquien Esusën abëd icquido 12ted icquid chuipondash. —¿Mimbitsendabi niampe? —caquien <sup>68</sup> Petedo: —Padenquio. ¿Tsudabëd icnuendambi mibi nianuc? Mibipadquid utsi nibëdec. Mimbuidtsëquien: “Ëbi tantiaquid bëdamboen isquin unësacsho uincuemeshun ëbëdi tabadmendambi,” quequin chuipoc. <sup>69</sup> “Abimboen caosh,” quequin mibi tantiembi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. <sup>70</sup> Adoaquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adondaid abentsëc Satanasën nami-aidquio yec icsamboshë iquendac —quepondash Esus. <sup>71</sup> —Simon Iscadioten mado Udasën ëbi chieshënquido ëbi bedmendac —quequin ambembi tantiash adondash Esus.

## 7

### *Aton utsibon Esus tantienquio yaid*



<sup>1</sup> Abi tantiauidquidon nianac Cadidia yacnouidi yuec Esus capucuenepondash. — Nidaid Udeya caid yacnocquido con matses chuiquidon ëbi cuesunetiadquio iquec — quiash Udeya yacno nidenquio icpondash. <sup>2</sup> Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënuéc matses dadpen nidacno Edusaden yacno nidanepondash. Cuëdënuéc Esus nidenquio icpondash. <sup>3</sup> Adec nidenquio icsho isumbien aton utsibon: —Edusaden yacno nidec nid. Mibëd ictiadquio icquid ano icnushe. Comapenen tantiaquin nabanquin aido ismec nid. <sup>4</sup> ¿“Ma matses dadpeshun ëbi tantianu,” quequinda matses daëdpactsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. <sup>5</sup> —Nuquin Papan chomenëdaidquio nec —quequin tantienquio icquimbi adopondash aton utsibon.

<sup>6</sup> Adoaquien Esus: —Matses dadpen nidnuc nidtiadquio yec mibia nidta. Abitedishun isnuc nëbi nidtiapimbo iquebique. <sup>7</sup> Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshënondashibique. <sup>8</sup> “Cuesunenushe,” quiash nëbi nidtiapimbo iquebique. Mibia nidta. Nuquin Papan tantiacpadec nidendabi <sup>9</sup> —quiash anobi Cadidia yacno Esus tabadpondash.

### *Esustsen Edusaden yacnuësh cuëdënuéc nidaid*

<sup>10</sup> Aden aton utsibo nidanemiash yuec-yuecpactsëc ictanec abitsen Esus nidpondash Edusaden yacnuësh cuëdënuéc nidec. Abitedi ismenquio yec tsyuec Esus nidpondash.

<sup>11</sup> Adnubien con matses cuëdëncuededacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash.

<sup>12-13</sup> Adsho tantiash con matses Esus chieshënquido dacuëdënuéc utsibo tantiamenquio yec sho-shoshquetsëcquiec onquepac caondash. Utsi-utsiec: —Esus bëdamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chondaidini nec,” quec ma muequi neyoc —quec onquecuededpac caondash.

<sup>14</sup> Adnubien con matses cuëdënuéc taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. <sup>15</sup> Adsho tantiash: —¿Mitsipaden tantiashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. <sup>16</sup> Adsho tantiash Esus: —Ëmbembi chienquio icquin ëbi chomiondaidën chiaidquio chiec nebi. <sup>17</sup> Nuquin Papan chiapadomboen natiadquio icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquio chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. <sup>18</sup> Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquio ma matsesën tantianu,” quequin ambi chiaidquio chiendac. <sup>19</sup> Mimbien adoenuo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënquido chiec.

<sup>20</sup> —Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuduedash mibi tantiadenquio yec onquepec. ¿Tsuntsin mibi cuesunepatsiash? —capondash. <sup>21</sup> Adoaquien Esus: —Nëidën ëbi cuesunetsiash —quequin chienquio yec: —Chonoadenquio icte ushën comapenen tantiaquin dada bëdamepondambi. Aden bëdamiacsho isash: “Adopenshenda naic. Chonoadenquio icte ushën daicsatsaid bëdamequin Nuquin Papan chiaid niac-niacposh,” ma mibi quepondac. <sup>22</sup> ¿Ëmbentsëquidambi chonoadenquio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi

icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquo ictaneshun adembidi Moisesëntsen adopampic. Nëbi adembidi naic chonoadenquo icte ushëmbi chonoadquimbi ma mimbi shui dëbid dëteshoneyoc. <sup>23</sup> Aden Moisesën chiampid niaquenquo icquin shui nacnenquin mimbi bëdamboen naic. Èmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? <sup>24</sup> Chonoadenquo icte ushën dada bëdamequid icsho: “Icsambo mibi iquec,” mimbi ëbi capec. Aden ëbi bëdamboen tantienquo icquin mimbi icsamboen chiec. Èbi bëdamboen tantiaquioshon ëmbi naboed bëdamboen chui –quepondash Esus abi chieshënquido chiec.

### *Esus bedshun cuesunetiad, cauidaid*

<sup>25</sup> Adec Esus: –Chonoadenquo icte ushën naondambi –quesho tantiashien anocquido Edusaden yacnocquido nadec onquecuededpac caondash. –Nuqui chuiquidon: “Cuesunetiad,” caboedien nëid nechitec. <sup>26</sup> En is. Abi chieshënquidobëdi tabadquin chieque. Chuisho ma chuiquidon chushcainquo icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec –quetanequien <sup>27</sup> aidobidi: –Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquo ictsiash –quepondash ano tabadquido.

<sup>28</sup> Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. –“Èmbi isonaid nec. Aton nidaid Cadidia caid yacnuësh caniquid nec,” ¿quequindabi bëdamboen tantiapadi? Ma mimbi padenquo yoc. Èbembï chonaidpenquo nebi. Èbi chomiondaid abi iquec. Ma mimbi aidquiobi tantienquo yoc. <sup>29</sup> Èmbien aidquo tantiendac. Aidbëd tabadondaaidquo nebi. Adsho aidën: “Nid,” cac chonaid nebi –caquien <sup>30</sup> –“Con pa Nuquin Papambo nec,” quechitequien nec –quesun abi chieshënquidon: –Cuesunemenuembien bedtiad –quetanquin: –Bednu –caqui bedadenquo icpondash. –Nëbi ma Esus unës uainquo icnu –Nuquin Papa quenuc bedmenquo icquin Esusën mëtampanëdash. <sup>31</sup> Esus cuesunetiadquo icnubien utsibon dadpenshun Esus tantiabempondash. –Nëidpadquid utsi nibëdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bëdamebamposh. Nuquin Papa yacnuësh choaid Quidistu caid Esus nec –quequin dadpenshun Esus tantiabempondash.

### *Èbi istuidenquo iquendac, quequin chiaid*

<sup>32</sup> Aden Esus chiec sho-shoshquetsëcquiec onqueshobien Esus chieshënquidon padis-eyo caidon tantiapac caondash. Adshun abëdtan chuiquid utsibo chuipac caondash. –Èmbi chuibocpaden Esusien bedtiad. Icsamboec onquioshe –cac: –Ai, adembien ictiad –quepac caondash. Adshumbic abëd icquido sondado chuiquin: –Baded bedtan –capac caondash. <sup>33</sup> Adoac nidanequin tantiatuidaquien nadec Esus onquepondash. –Yuec-yuecpactsec mibëd icashic ëbi chomiondaidbëdtsen tabadoaic nidendabi. <sup>34</sup> Èbi nibënquin ëbi istuidenquo mimbi iquendac. Èbi nidacno mibi nidtiapimbo iquec –quepondash Esus.

<sup>35</sup> Adsho tantiash abi chieshënquido: –Nuqui istuidmenquo icnuéc ¿mitsimbo nidpanuec nec? Matses utsi yacno tabadnuéc con matses utsi-utsiec nidequi nidaniondacno nidshun ¿anocquidoda chuipatsiash? <sup>36</sup> Tantiadenquo yec onquepec. ¿Atotsi quepec? “Èbi nibënquin mimbi ëbi istuidenquo iquendac. Èbi nidacno mibi nidtiapimbo iquec,” quepequien iccosh. ¿Atotsi quepash niosh? –quepac caondash Esus chieshënquido.

*Aton Mayan abi tantiaquidbëd tabadmete chiaid*

<sup>37</sup> Adnubien cuëdë nec ënëdte ushënquiobi con matses abitedimbo cuëdë nec cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacimboec Nuquin Papa tantiate bunquin ëbi bëdamboen tantiatia. <sup>38</sup> Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi. Adoac mibëd tabadquin mibi bëdamboen tabadmequin utsibotsen Nuquin Papa tantiate bumetsiash —quepondash Esus. <sup>39</sup> —Nuquin Papabëdta ëbi tantiamequidquo Nuquin Papan Mayan nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

*¿Nuquin Papan chomiaidta nepeba? Esus caid*

<sup>40</sup> —Nuquin Papa tantiate bunquin ëbi tantiatia —Esus quesheo tantiasien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien <sup>41</sup> utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? <sup>42</sup> Padenquio. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquio nec —quepac caondash. <sup>43</sup> Adec dadpen: —Bëdambo icquid nec —quenubi aidtedbidi: —Icsambo iquec —quepac caondash. <sup>44</sup> Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

*Isadaidbo chuiquid dapabon Esus chieshënaid*

<sup>45</sup> Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: <sup>46</sup> —Ma bëdamboenshë chuiboc. “Adomboen chuibanquid utsi nibëdec,” qeshun bedtiapimbo iccobi —quesheo <sup>47</sup> tantiasien: —Aid muasho tantiasun: “Abimbo caic,” ¿cainda icco? <sup>48</sup> ¿Adambi Esus muasho tantiadio? ¿Ada tsusiobon tantiadiosh? Padenquio iccosh. <sup>49</sup> Utsibombien tantiasash. Adquidon ëmbi bëdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshë nec.

<sup>50</sup> Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash. <sup>51</sup> —¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiasun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec. <sup>52</sup> Adoquien chuiquido: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquio iquendac,” quequin mimbi tantiatiasiac. Ma Esus muequi neyoc —quepac caondash chuiquido Nicodemo chushcaic. <sup>53</sup> —¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

**8***Bënëpenquio chudmequid cuënoten seshunetsenaid*

<sup>1</sup> Nicodemo chushcabon Esus macuësh dapa Odibos caid yacno ushec nidondash. <sup>2</sup> Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash. <sup>3</sup> Aden chuinubien con matses tsusiobon aton bënëpenquoio chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquoio nitsimpondash. <sup>4</sup> Adshumbien Esus chuipondash. —Aton bënëpenquoio chudmesho istuidshun nëid bëombi. <sup>5</sup> Nuquin Papan chiaid Moisesën naden dada uapampic. “Aton bënëpenquoio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido. <sup>6</sup> —¿Atotsi Esus quepatsiash? Nuquin Papan chiampidquoio chienquoio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëbedenquoio icquin shuebudshun mëdanten nidaid dada uapondash. <sup>7</sup> Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbria cuënoten se —quetanec <sup>8</sup> padpidec shuebudshun mëdanten nidaid dada uaoapondash. <sup>9</sup> Adnubien: —Nuquin Papan chiaid niaquesambo icquin en mimbria cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouidsëqui Esusbëd icnuc. <sup>10</sup> Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: <sup>11</sup> —Ai, nibëdosh —quesho tantiashien: —Ëmbimbo mibi cuënoten senquoio iquembique. Mibi icsaid ënash bëdamboec tabadec nid, champi —capondash Esusën. Adoac chido nidondash.

### *Pabiate cuembo icnuc tantiamequid*

<sup>12</sup> Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuiopondash. —Pabiate cuembo icnuc con Pan bëdamboen iste matses tantiamequidquoio nebi. Ëmbi tantiamic ëbi tantiaquido icsateuidi bunenquoio yanec bëdamboec tabadte buncuenendac. Adec ëbëd tabadtequid yanendac —quepondash Esus.

<sup>13</sup> Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash. <sup>14</sup> Adsho tantiash Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquoio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquoio icboc. <sup>15</sup> Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquoio icnuna,” quequin nëbi chienquoio iquembi. <sup>16</sup> Aden chuiquin abimbo chuitsiambi. Ëmbentsëqui chienquoio icquin ëbi chomiondaid Nuquin Papabëdtambi chuiquin abimboshë chuitsiambi. <sup>17</sup> Nuquin Papan chiaidquoio Moisesën naden dada uapampic. “‘Icsaosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquoio Moisesën dada uapampic. <sup>18</sup> Aden Moisesën dada uampid tantiashun ëmbentsëqui chienquoio iquembi. Ëbi chomiondaid con Pabëdtantsëqui chiembi —quepondash Esus.

<sup>19</sup> Adsho tantiashun abi chieshënquidon: —¿Mitsimbo papa icpec? —capondash. Adoquien: —Con Pa ëbëdta ma mimbi tantienquoio icboc. Ëbi tantiaquimbien mimbi con Patsen tantiatic —quepondash Esus abi chieshënquido chiec. <sup>20</sup> Abi chieshënquido onquecuededec quënë tabadnubi aid quënë cachochtsëqui Nuquin Papa tantiaquin



piucquid menequin nauedte tabëcacoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquio matsesën unës uanu —quenuc Esus bedabi icpondash.

### *Utsibon Esus tantiauidaid*

<sup>21</sup> Adnubien Esusën abi chieshënquido padpiden chuioapondash. —Nidendabi. Ëbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. <sup>22</sup> Adsho tantiash Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? —quepondash abi chieshënquido. <sup>23</sup> Adsho tantiash Esus: —Mibi matses nec. Ëbien con Pa yacnuësh chondaidquio nec. <sup>24</sup> “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

<sup>25</sup> Adsho tantiash abi chieshënquido: —¿Mitsipadquid icquin ëbi aden chie? —quepondash Esus caic. Adoaquien: —Ëmbi chianeboedquiobi mabi neyoc —queoapondash Esus. <sup>26</sup> Adashic padpidec: —Mimbi naid dadpen chuiquin mibi cuidte chiendambi. Ëmbembi chienquio icquin ëbi chomiondaid muesanquio chiaidquio chiendambi. Aidën chiaiduidi matses abitedi chiendambi —quenubien <sup>27</sup> Esus chieshënquidon: —Abi chomiondaid Nuquin Papambo nec —quequin tantienquio icpondash. <sup>28</sup> Aden tantienquio icsho isun Esusën padpiden chuioapondash. —Matsesmiadquio icshobi ëbi cuesten dectanshumbic mimbi ëbi tantiabenendac. “Ambi chiacpadquidshenda nepadenec. Ambembi chiaid chienquio icquin aton Papan chiaidquio chuiquin aidën chiacpadomboenshenda napadenec,” quequin ëbimbo mimbi tantiendac —quepondash Esus. <sup>29</sup> Adashic padpidec: —Nëbi ëbi chomiondaid ëbëd iquec. Aid bëdambo icmenuen ambi chiacpadomboen nasho isun ëbi nianenquio iquec —quepondash Esus.

<sup>30</sup> Adsho tantiashun: —Abimboen Esusën caic. Nuquin Papa yacnuësh choquidien nec —queshun Esus tantiauidtsëccondash dadpenshun.

### *Satanasën yuabo nec, quequin Esusën chiaid*

<sup>31</sup> Adsho isumbien Esusën abi bëdiactsëc tantiauidtsëcboedo chuipondash. —Ëbi tantiaquidën ëmbi chiacpadomboen natiadquio iquendac. <sup>32</sup> Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chieci. <sup>33</sup> Adec Esus: —Yua —quesho tantiashien: —Abadauan yampidën tsyuecquido yec utsin yuacmaido nebi. Tantienquio icquin mimbi icsamboen chieci. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

<sup>34</sup> Adoaquien: —Tantia. Mibi abimbo chuinu. Uidën uachimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. <sup>35</sup> ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. <sup>36</sup> Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

### *Satanasën madobimboecquido chiaid*

<sup>37</sup> Adshumbic Esusën abi chieshënquido chuioapondash. —“Con tsusedpa Abadauan icpampic,” quequin mimbi abimbo chio. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec. <sup>38</sup> “Con



Pabëd tabadquin isondambi,” quequin ëmbi bëdamboen chuisho tantienquo icquin min papabimboecquidën chiacpadomboen mimbi naindac –quepondash Esus abi chieshënquido chiec. <sup>39</sup> –Min papabimboecquidën chiacpadomboen mimbi naindac –queshobien: –Con tsusedpa Abadauanën nacpadomboen mambi napaboc –capondash Esus chieshënquidon. Adoquien Esus: –Ma mimbi adoenuo yoc. Abadauanën nacpadomboen naquin mimbi bëdamboen natsiac. <sup>40</sup> Bëdamboen natiapimbo icquin mimbi ëbi cuesunetiadquo iquec. Nuquin Papan chiaidquo abimbo chuisho mimbi adotiadquo iquec. Nuquin Papan chiaid tantiec ma Abadauan cuesuniantiapimbo icpampiyoc. <sup>41</sup> Min papabimboecquidën namiacpadomboen naquidien mibi nec –capondash Esusën abi chieshënquido chuiquin. Adoquien: –Mambi Nuquin Papauidsëqui tantieyoc. Utsi tantiatiapimbo icquin Nuquin Papauidsëqui con pa caimbi –quepondash Esus chieshënquido.

<sup>42</sup> Adsho tantiashien Esus: –Nuquin Papambo tantiaquimbien mimbi ëbitsen tantiat-siac. Ëbemi choenuo iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiash. <sup>43</sup> ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenuo yec pamumëdabimboec mibi iquec. <sup>44</sup> Min papabimboecquid Sa-tanas nec. Aid bunacpadenuidi mimbi natiadquo iquec. Ëndenquimboshë Nuquin Papan tauamboen matses uanubi min papabimboecquid cuesunianquidquo nepampic. Aton padibi nec. Nuquin Papan chiacpadomboen namenquo yec chieshë nec muaquidquo nec. Aton padibi icquid yec matses muamequidquo nec. Aidën madobimboecquin mimbi ëbi tantiatiapimbo icpec. <sup>45</sup> Ëmbi Nuquin Papan chiaidquo abimbo chuisho mimbi tantiatiapimbo iquec. Icsambo icquidën ambemi chuisho mimbi tantienquo yaquien bëdambo ictsiash. Mabi icsambo icquidpenquo neyoc. <sup>46</sup> ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquo mimbi icpe? <sup>47</sup> Nuquin Papa tantianuequidën Nuquin Papan chiaidquo chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec –quepondash Esus abi chieshënquido chushcaic.

### *Esus chieshënquido cuënoten siantiadpambo yanaid*

<sup>48</sup> –Nuquin Papa tantiesabombo ma mibi neyoc –Esus qesho tantiashien abi chieshënquido: –Ma mibi podobitsi icsa dapuduedash neyoc. Tantiadenquo yec mibi onquec. Samadia yacnocquidobimboec icsamboshë ma mibi iqueyoc –caquien <sup>49</sup> Esus: –Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquo abimbo mimbi chiec,” catiadquidi mimbi ëbi: “Muec nec,” capec. <sup>50</sup> “Mabi: ‘Bëdambo iquec,’ canu,” quenquo iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. <sup>51</sup> Tantia. Mibi bëdamboen chuinu. Ëmbi chiacpadomboen naquidquo unësenquo ictsiash –quepondash Esus ompoacbimboen chiec. –Ëbi tantiaquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc –quequin tantiec adondash.

<sup>52</sup> –Unësenquo ictsiash –qesho tantiash Esus chieshënquido: –Ma mimbi tantiadenquo icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiacpadomboen naquidquo unësenquo ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. <sup>53</sup> ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec –quepondash.

<sup>54</sup> Adoaquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. <sup>55</sup> “Tantiembi,” mimbi caboed Nuquin Papa ma mimbi tantienquoio yoc. Ëmbien Nuquin Papa tantiaquiec. “Aid tantienquoio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. <sup>56</sup> Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmianquidquoio mat-sesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. <sup>57</sup> Adsho tantiashun Esus chieshëncquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien <sup>58</sup> Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquoio nebi —quepondash Esus. <sup>59</sup> Adsho tantiash nëishtanequien: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquoio yec ompodanec cuempondash Esus.

## 9

### *Esusën bëshuaid bëdamiaid*

<sup>1</sup> Yuecquoio ictaniash chonoadenquoio icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash. <sup>2-3</sup> Aid istuidshumbimbi: —En chui, Icho. Tantanu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquoio. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoaquien: —Padenquoio. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. <sup>4</sup> Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoad-esa —quepondash Esus. —“Con Pan tantiaidtedi nainabi unëshmane,” queshun unëshabi icquin con Pan chiaidtedi nainendambi —quequin tantiec: —“Nainabi inchëshmane,” quiash comapenec chonoadnuna —quiondash Esus. <sup>5</sup> Adashic: —Matsesbëd ic-quin Nuquin Papa bëdamboen tantiamequidquoio nebique. Nëidtsen tantiamenu <sup>6</sup> —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

<sup>7</sup> Adotanquimbic: —Acte tiquidimbo icquid Sidoe caidën bëpamëdec nid —cac nidash bëpamëdtanec bëdamboen isec aton shubuno nidpac caondash. Aid acte con onqueten Sidoe quequin buanaid caic. <sup>8</sup> Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piucquid beccho —quedonetsec tsadtsëcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash. <sup>9</sup> Utsi-utsiec: —Ai, aidquiobi nec —quenubi utsibo: —Padenquoio. Aidbimboecquidien nec —quesho tantiash: —Aidi nebi —quepac caondash bëshuacboed. <sup>10</sup> Adsho tantiashun: —¿Mitsipadec bëdano? —caquien: <sup>11</sup> —Esus caidën bëdamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bëdanobi. Nëbi bëdamboen isembi —quepac caondash bëshuacboed. <sup>12</sup> Adsho tantiashun: —Mibi bëdamequid ¿mitsimbo iquec? —cac: —Tsaudi —quepac caondash bëshuacboed.

### *Bëshuaid bëdameboed chuimiaid*

<sup>13</sup> —Bëdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash. <sup>14</sup> Buanacshobien padiseyobon: —Chonoadenquo icte ushën nac caosh —quequin tantiaquin: <sup>15</sup> —¿Mitsipadec bédano? —caquien: —Esusën nidaidbédta uicchun cabiunshun bëbitaccac bëpamëdec bédanshun nëbi bédamboen isembi —quepac caondash bëshuacboed.

<sup>16</sup> —Bëpamëdec bédanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquo ictsiash. Chonoadenquo icte ushën nëid bédamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bédamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquo icquin <sup>17</sup> bëshuacboed chuipac caondash. —Mibi bédamequid ¿tsutsi mimbi cape? —caquien: —Nuquin Papan: “‘Yuecshun naden naindambi,’ quequin chiaidquo chuiquidien nec,” caimbi —quetanec bëshuacboed nidpac caondash.

<sup>18</sup> Aid nidnubien Esus chieshënquido: —Bëshupenquien niash. Muequien niashe. Anibédta amë chuimenun chomenuna —quetanquin <sup>19-20</sup> chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bëshuacshobida tishonda? —capac caondash. Adoaquien: —Ai, bëshuacshobi tishondaid nec —ani queshobien: —Bëshuaid ¿mitsipadec bédanosh? —capac caondash. <sup>21</sup> Adoaquien: —Tsaudi. Bédansho isambo iccombi. ¿Tsundambien bédamechitash? Dada ënden caniaid neque. Aidi chuime —quepac caondash bëshuacboedën tita amëbëdi. <sup>22</sup> —“Nuquin Papa yacnuësh choquid Èsus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuëdec: <sup>23</sup> —Dada ënden caniaid neque. Aidi chuime —quepac caondash.

<sup>24</sup> Adoac padpiden bëshuacboed chomeoapac caondash padiseyobon. Chomiash: —“Nuquin Papan bédamioshi. Nuquin Papa bédambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash. <sup>25</sup> Adsho tantiash bëshuacboed: —Icsamboshë icquidien Esus nechitec. Aden tantienquo iquembi. Mabi bédameboc. Isenquo icboedëmbi mambi nëbi bédamboen iseyoc. Adenuidtsëqui tantiembi —quepac caondash. <sup>26</sup> Adsho tantiashun: —¿Mitsipaden mibi bédamiosh? —caquien: <sup>27</sup> —Mambi mibi chuipaboc. Ma mimbimbobi tantienquo icboc. ¿Atotsi quequin padpiden: “Èbi chui,” cai? ¿Esus tantiatiadquioda icti? —capac caondash bëshuacboedën.

<sup>28</sup> Adsho tantiash nëishtanquin chushcapac caondash. —Mibi Esus tantiaquidquo nec. Mibi icsambo iquec. Èbien nuquin tsusedpa Moises tantiaquidquo nec. <sup>29</sup> “Moisesien Nuquin Papan chuiquin namepampic,” quequin tantiembi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquo neyoc —quepac caondash chuiquido. <sup>30</sup> Adoaquien bëshuacboed: —¿Abida cai? “Dadpenquo tantiembi,” ma mibi quepaboc. Adboedi: “Èmbi tantiacmaidquo nec,” ¿quecta ique? Mimbi tantiacmaidëmbini bédamiosh. Ma bédambo yoc. <sup>31</sup> Abi icsaid ënabi icquidën chianesho Nuquin Papan tantienquo ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. <sup>32</sup> Anin bëshuacshobi tishaid bédamenquo ictenec. Adquid bédamequid nibëdpadenec. <sup>33</sup> Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. <sup>34</sup> Adsho tantiash nëishquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquo icpac caondash.

*Ambi bédameboed istuidoashun Esusën chiaid*

<sup>35</sup> Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiadquo caic: “Nuquin Papa yacnuësh choquid nec,” ¿quequina mimbi tantiape? —capondash Esusën ambi bëshuaid bédameboed chuiquin. <sup>36</sup> Adoaquien: —¿Tsutsi neque? Isnu —cac: <sup>37</sup> —Ëbi nec. Mibi bédameboedi nebi —caquien: <sup>38</sup> —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec —quetanec ismenuec danëshën tinquebudpondash.

<sup>39</sup> Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus. <sup>40</sup> Adsho tantiash nêishtanec: —¿Nuquin Papa tantiesabodabi nedi? —quepondash Padiseyobo. <sup>41</sup> Adsho tantiashien: —Nuquin Papa tantiesambo icsho ëmbi tantiamiac Nuquin Papabêdta ëbi tantiasho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshënquido chiec.

**10***Obecabimboecquido chiaid*

<sup>1-2</sup> Adshumbic abi chieshënquido Esusën padpiden chuioapondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaqin napec? Obeca daquënë uaidën puduedte shëcuënquo obeca icbo puduedquid. Daquënë uaid mayadec puduedquidien ampequid nendac. <sup>3</sup> Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. <sup>4</sup> Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomben cuënec. Con icbo nec,” quequin icbo tsibanquid obecan. <sup>5</sup> Utsibon cuënaquien tsibanenquo yec dacuëdec cuenquid obeca. Icbouidtsëqui tsibanquid obeca nec —Esus quesho tantiashien: <sup>6</sup> —Tantiadenquo yec mibi onquec —quepondash Esus chieshënquido.

<sup>7</sup> Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. <sup>8-10</sup> Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bédamboen dayun uaqin bédamboec tabadquid icmendambi. Aido unësacsho uincumeshun Nuquin Papa yacno ëbëdi tabadmendambi. Adec ëbi bédambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquo iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquo icquimbi ëmbi chiaiduidtsëqui tantiendac —quepondash Esus abi chieshënquido chiec.

*Ëbi tantiaquido dayun uaimbi, quequin chiaid*

<sup>11</sup> Adashic Esus padpidec onqueoapondash. —Obeca icbobimboecquid nebi. Icbo cudasacimboec ëbi tantiaquido cudasnuec ëbided cuidadec unësendabi. <sup>12-13</sup> Utsiboen adenquo ictsiash. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquo nec,” quetanquin batedi obeca nianquid. Obeca nianacsho bëdin acshun siaquid. Aden utsi acsho isash acshun secabi



icquid niqequid obeca. Obeca isquidên icbonpenquoio nianac bimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquoio iqueyoc —quepondash Esus abi chieshênquido chiec.

<sup>14-15</sup> Adashic abi onquec: —Ëmbien matses bédamboen tantiamenquin ëbi tantiaquido dayun uaindac. Nuquin Papabéd ëbi tantiananacpadquiec ëbi tantiaquidobédtsen tantiananquiebi. Aden ëbi tantiaquido tantiec Nuquin Papa cuidmenquoio icnuec ëbided cuidadec unësendabi. <sup>16</sup> ¿Nëid matses isadaidbouditsëqui tantiectabi adec unëspadi? Padenquoio. Matses utsibontsen Nuquin Papan tantiamiaido icquin ëbi tantiendac. Aidobédta nëid matses con matses caquin abitedi bédamboen dayun uaindambi. <sup>17</sup> Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquiec. Unësash ëbemi uincuenendabi. <sup>18</sup> Matsesën ambemi ëbi unës uatiapimbo ictsias. Ëmbi tantiacpadquiequi matsesën unës uadendabi. Adecbidi uincuentiadquio yec ëbemi uincuenendabi. Aden con Pan namiacpadomboen naindambi —quepondash Esus.

<sup>19</sup> Adsho tantias con matses chuiquido nadec onquecuedepac caondash. <sup>20</sup> Esus chieshênquido: —Podobitsi icsa dapudedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi —quenubien <sup>21</sup> utsibo: —Podobitsi icsa dapudedashta ¿adec onquepatsias? Bédamboequien onquiosh. ¿Podobitsi icsa dapudedaidënda aden bëshuaid bédamepatsias? Bédambo icquidëmbien adotsias —quepac caondash.

### *¿Quidistu caidta ne? quequin chiaid*

<sup>22</sup> Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. <sup>23</sup> Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquoio puduedabi quënë cachoqui capupon-dash. Aid quënë cachoc: “Sadomonën nacnenaid nec,” caondash. <sup>24</sup> Ambo Esus capusho isashien con matses chuiquido Esus natia datsidadshun: —En sebadënquoio chui. Tantienuquoio yec tsadtiapimbo iquebique. Mimbi cuembo chuisho tantiatiadquio iquebi. ¿Nuquin Papan chomiaid Quidistu caidta ne? —capondash con matses chuiquidon. <sup>25</sup> Adoquien Esus: —Mambi mibi chuipaboc. Ma mimbimbobi ëbi tantienquoio icboc. Con Pan: “Adota,” cac comapenen tantiaquin nabandeniombi. Mibi bédamboen tantiamenuen adodeniombi. <sup>26</sup> Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantienquoio iccoc. Nuquin Papan tantiamiabi yaido icquin mimbi ëbi tantiatiapimbo iquec. <sup>27</sup> Con Pan tantiamiaidien ëbi tantiaquid yanendac. Adshun obecan aton icbo tsibanac bimboen ëmbi chiacpadomboen natiadquio yanendac. <sup>28</sup> Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” qeshun bédamboen dayun uaindambi. Ëmbi adoacsho bedshunac bimboen icsambo icquidên yuaquin Nuquin Papan cuidtequido icmeoatiapimbo iquendac. <sup>29</sup> Con Pansen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchictiapimbo iquendac. <sup>30</sup> Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi —quepondash Esus.

### *Cuënoten seshunetiadpambo yanoaid*

<sup>31</sup> —Nuquin Papapadquidquio nebi —Esus qesho tantias nëishtanquin cuënote dapa bedshun abi chieshênquidon Esus seshunetiadquio icoapondash. <sup>32</sup> Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. <sup>33</sup> Adoquien: —¿Bédamboen nabanshodambi: “Mibi seshunenu,” cadî? Padenquoio. “Con Papadquidquio nebi,”



quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiashumbimbi mibi seshunec –quepondash abi chieshënquido.

<sup>34</sup> Adshobien Esusën: –Nuquin Papan chiaidquio nuquin tsusedpan naden dada uapampic. “Nuquin Papa nadec onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. <sup>35</sup> Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” qeshun mimbi chushcambo iquec. Nuquin Papa adoambobi ¿ëbida chushcai? <sup>36</sup> Nuquin Papan namiacpadec abi yacnuësh chondaïd nebi. Adquid yec: “Nuquin Papan Madombo nebi,” quiobi. Ëbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. <sup>37</sup> Ëmbi chiaidquio tantiatiapimbo icquimbi ëmbi naidquio tantiata. Ëmbi Nuquin Papan namiacpadomboen comapenen tantiaquin nabanenquio icsho isun mimbi ëbi mua catsiac. <sup>38</sup> Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac –quepondash Esus.

<sup>39</sup> Adsho tantiash padpidec nëishtanquin abi chieshënquidon: –Bedchitono –caqui bedadenquio icpondash. <sup>40</sup> Adashic acte Odan caid potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. <sup>41</sup> Adshumbic Esusën comapenen tantiaquin ismequin ambo icquido chuibampondash. Adsho tantiashun: –Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi –cabededpondash anocquidon. <sup>42</sup> Adshumbic: –Nuquin Papa yacnuësh choquidien Esus nec –quequin Esus tantiabempondash.

## 11

### *Dasado caid unësaid*

<sup>1</sup> Udeya yacnuësh Esus cuembon Dasado Esusën utsibimboecquid unëstiadtsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. <sup>2</sup> Madian aton manëdaïdën ucbanquin Esus tanoshcabi icnuc adec aton utsi unëstiadtsëcquio yanac caondash. <sup>3</sup> Adnubien aton chuchun: –Esus chuitan –cac aton matsesën Esus chuituidpondash. –Mimbi con utsi caidquio unëstiadtsëcquio yanoshe. En isec cho –catuidpondash. <sup>4</sup> Adoaquien Esus: –Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaïd aton Madombotsen bëdambo iquec,’ quenu,” qeshun naindambi –quepondash. <sup>5</sup> Adbosh Dasado aton chuchubëdta tantiaquidquio yequi <sup>6</sup> badedquio nidenquio yec anobi daëdec ushpondash Esus.

<sup>7</sup> Daëdec ushumbic Esusën: –Nuqui icbocno Udeya caidën padpidec nidnu. Nid –capondashi. <sup>8</sup> Adoaquimbi: –Icho, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? –capondambi. <sup>9-10</sup> Adoaquien cuembo chienquio icquimbi: –Badiadën capuec tocoshquetanec uebudesä. Inchëshëmbien tocoshquetanec uebudquid –quequin Esusën chuipondashi. –Nëbi ëbi unës uatiapimbo iquec. Badiadën nidacbimboen con Pan tantiaidtedi nainabi icsho ëbi unës uatiapimbo iquec. Inchëshën uebudacbimboen ambi tantiaidtedi nainshobini ambi tantiacpadënquiobi matsesën ëbi unës uaindac –quequin tantiec adondash Esus.

<sup>11</sup> Adshumbic Esusën padpiden ompoacbimboen chuioapondash. —Ëmbi con utsi caid Dasado ushtoaccoshe. Isucumec nidnu. Nid —quesho <sup>12</sup> tantiashini: —Ma ushnu. Ushash isucunquid —quepondac. <sup>13</sup> Esusën Dasado unësaid chuinubi Dasado ushe dantsëcondambi. <sup>14</sup> Adnubien Esusën sebadënquio chuipondash. —Dasado unësaccosh. <sup>15</sup> “Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid <sup>16</sup> —caquien: —Ai, abëdquiobi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

### *Unësaid uincuemequidquio nebi, quiaid*

<sup>17</sup> Adashic unësacno anoentsëqui Esus chopondash. Choshon: —Unësacsho chococash daëd-daëdquiec ushobi —quetsëcquiec onquecuededsho tantiatuidpondash. <sup>18-19</sup> Esus choabi icnuc con matses chuiquido Dasado unësacnuësh sedenquenuec Edusaden yacnuësh cho-chopac caondash. Unësaid nëbi ictsëcnuc tedes quidometedos tiontsëcquidën badedquio cho-chopac caondash. Cho-choash unësaidën chuchubëd sedenquec tabadpac caondash. <sup>20</sup> Adnubien: —Esus choec —quesho tantiash Madta bëquedec chopondash aton chibi Madia shubuno sedenquec tsadnubi. <sup>21</sup> Choequien Esus bëquedec: —Mibi icnuc con utsi unësenquio ictsenosh, Icbo. Con utsi unësosh. <sup>22</sup> Mimbi chiacpadomboen Nuquin Papan nëbi natsiash —quepondash Madta: —¿Ada con utsi uincuemetsia? —quequin chuitiadquio yequi. <sup>23</sup> Adoquien Esusën: —Min utsi uincuenendac —capondash. <sup>24</sup> Adsho tantiash: —“Ai, yuecash unësaido abitedimbo uincuemete ushën con utsi uincuenendac,” quequin tantiemi —quepondash Madta. <sup>25</sup> Adsho tantiashun Esusën: —Ëbibi matses unësaid uincuemequidquio nebi. Ëmbi tantiacpadënquio uincuenendac. Aden ëbi tantiaquido unësacsho uincuemendambi. <sup>26</sup> Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequina tantie? —capondash Esusën. <sup>27</sup> Adoquien Madta: —Ai, adembi tantiemi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec <sup>28</sup> nidpondash aton chibi chiec. Nidshun: —Nëmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien <sup>29</sup> Esus bëquednuec badedi choquin istuidpondash. <sup>30</sup> Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. <sup>31</sup> Adec Madia nidsho isun chococacnobi sedencaic nide danquin abëd sedenquenuequidon tsibanampac caondash. <sup>32</sup> Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquio iccoc, Icbo. Bëdambo icquid mibi nec. Mibi icnuc con utsi unësenquio ictsenosh —quepondash Madia Esus caic.

<sup>33</sup> Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquio icnuc nec —quiash Esus abitsen shubiantiadtsëcquio icpondash. <sup>34</sup> Adec shubiantiadtsëcquio tsadacnuëshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien <sup>35</sup> shubinidequi nidpondash Esus. <sup>36</sup> Adec shubinidsho isumbien: —Ma Dasado unësquio icnuc shubieyoc —cabampondash con matses chuiquidon. <sup>37</sup> Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquio icposh? —quepondash.

### *Esusën Dasado uincuemiaid*

<sup>38</sup> Nidquimbi chococacno istuidequi Esus shubiantiadtsëcquio yanoapondash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinaacuësh shubiantiadtsëcquio iccondash. <sup>39</sup> Adashien Esus: —Cuënote bidiacquin shëcuë shëcne —quepondash. Adsho tantiash unësaidën chuchu Madta: —Padi.

Ënden pisenashe. Chococash mabi daëd-daëdquiec ushboc –quepondash. <sup>40</sup> Adoaquien Esus: –Dacuëndenda. Mambi mibi chuiboc. Mimbi: “Nuquin Papan Madombobien mibi nec,” ëbi casho: “Ëmbi comapenen tantiaquin nabansho mimbi isendac,” mambi mibi capaboc. En na. Baded bëcune –cac <sup>41</sup> cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. –Papa, ëmbi nëbi chuisho mimbi tantiec. Ëmbi chuibocpadomboen mimbi naindac. Mibi bëdambo iquec, Papa. <sup>42</sup> Ëmbi otacquio chianiaid mimbi tantioc. Ëbi dat-sidadaido tantiamenuen nëbi comapenec onquequin mibi chiemi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiemi, Papa. Padi, aيتدتسëqui mibi chiombi, Papa –quepondash Esus. <sup>43</sup> Adtanquimbien comapenen cuënquin: –Dasado, puduenec cho –capondash. <sup>44</sup> Adoaquien Dasado badedquio puduenanec chopondash abi dashcute dataniacchobi. Unësacsho uesquin dashcuten datanetanquin dashcuten abi bëpucacchobi chopondash. Adec chosho istanquin: –Baded dashcute dachic. Ma nidnu –capondash Esusën.

*Nëbien Esus unës uametiad, quiaid  
(Mat 26.1-5; Mad 14.1-2; Duc 22.1-2)*

<sup>45</sup> Aden Esusën ënden unësaidquiobi uincuemesho isashien Madia tsibanec seden-quec cho-chobedo abentse-abentsec: –Nuquin Papan chomiaidien Esus nec –quiampondash. <sup>46</sup> Adnubien utsin Edusaden yacno nidshun Esus chieshënquido padiseyobo chuituidpac caondash. –Esusën unësaid uincuemiosh –quepondash. <sup>47</sup> Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. –¿Mitsipadotiad? Nuquin matses ismequin comapenen tantiaquin dadpen nabampac caosh. <sup>48</sup> Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? –quepac caondash chieshëmënquido.

<sup>49</sup> Adnubien abëdtan chuiquid chuiquid dapambo aid setan icquin Caipas caidëntsen chuipac caondash. –¿Midapadotsëcquien mimbi chiendac? Tantiadentsëcquio icnuc ma mimbi chuipaboc. <sup>50</sup> Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esused unës uamenuna –quepac caondash chuiquid dapambo abëdtan chuiquid chiec. <sup>51</sup> Aden chuiquin ambemi chiambo Nuquin Papan oncamiac Nuquin Papan chiaidquio aden chuipac caondash. –Nëid setan abëdtan chuiquid chuiquid dapambo nec –qeshun Nuquin Papan aden oncamiacqui Caipas onquepanëdash. –Matses cuidmenquio icnuc con Madoded ciudadec unësendac –qeshun Nuquin Papan Caipas aden oncamepanëdash. <sup>52</sup> Aden Caipasën chuinëdaid tantiaquin ëmbitsen chuinu. Tantia. ¿Isadaidboudtsëqui cuidmenquio icnueta Esus abided ciudadec unëstiondash? Padenquio. –Matses utsitsen abi tantiaquid yansho isun abëdi tabadmenuec Esused ciudadec unëspondash –quequin tantiemi. Nëbi Caipasën chuisho tantiashun tsusiobon chiaid chuinu. <sup>53</sup> Aden Caipasën Esus unës uamete chuisho tantiashien Esus chieshënquido: –Nëbimbobien Esus unës uametiad –quecuededpac caondash.

<sup>54</sup> –Tsusiobon mibi adosh –quesho tantiatanequien chieshëmënquido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. <sup>55</sup> Epadain caid yacno tabadnubien Nuquin Papan con

tsusedpabo unës uainquo icquin matamiampid inchësh tantiec cuëdënuec Edusaden yacno con matses nidanepac caondash. Cuëdëne taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedeneque —quianec nidanepac caondash. <sup>56-57</sup> Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: —Nuqui chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh —quesho tantiashien: —¿Ada Esus chopeba? “Unës uamenushe,” quiash choenquien icchitec —quecuededpac caondash.

## 12

### *Madia Dasadon chuchun Esus tanoshcaid (Mat 26.6-13; Mad 14.3-9)*

<sup>1</sup> Aden mishtemaid mishquidon abi nibënbien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchësh tantiec cuëdëne taënushi niondash. <sup>2</sup> Ambo chosho isash: — Esus bëdambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbëd icquid ëbi chedobi. Nëidic Dasadon chuchu daëd. Aidedi icpondash. Adec penuec tabadsho Madtan pete menebampondash. <sup>3</sup> Adnubien Madian: —Esus bëdamboshë iquec. Ismenu —quetanquin bëdamboshë nuadquidën Esus tanoshcapondash. Tanoshcatanquin aton manëdaidën taupondash. Aden tanoshcaid shubu anuestsëcquiec comapenec nuadpondash. Piucquid dadpenquo menequin bedaid niondash. Sedunten cushtoaid bëdambo nuadquid nado caid niondash. <sup>4</sup> Adsho isun Esus bedmequidën Udasën Madia chushcapondash. <sup>5</sup> —Padi. Mimbi uesquieque. Utsi uain nata. Nëid danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad —capondash Udasën. <sup>6</sup> Adomboen chuisho tantiashun Udas bëdambo icquidquo danondambi. Esusbëd icquido ëbitedishun piucquid bedshun sauedten sauedshun dayun uaquidquiemi danondac. Piucquid bëdamboec dayun uashumënenquo yequi abibi ampeshumënnashi adondash Udas. Aden ambi ampiaid tantiequi: —Piucquid nibëdquidoen menetiad —quequin muaquin Madia chushcapondash. <sup>7</sup> Adshobien Esusën: —Padi. Chushcainda. Ma nanu. Ma nuquin matsesën unësaid bëdambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamicpadomboen ëbi unëso chococate tantiaquin Madian ëbi tanoshcaquin naic. <sup>8</sup> Piucquid nibëdquido dadpen iquec. Nibëdenquo iquendac. Èbien mibëd icboedi nëbi nibëdquido yanendac. Èbi tantiec Madia bëdambo iquec —quepondash Esus Udas chiec aidi: —Abi chieshënquido Esus bedmenu —quepanuda.

### *Dasadotsen cuesunetiadquo yaid*

<sup>9</sup> Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. <sup>10-11</sup> Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquo yec Nuquin Papapadquidquiobidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmënuquiec.



*Chuiquid dapa ismiacimboen Esus ismiaid  
(Mat 21.1-11; Mad 11.1-11; Duc 19.28-40)*

<sup>12</sup> Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënuëc cho-choboedon: —Esus choec —quesho tantiatanquin <sup>13</sup> niste podobieccquid bedbëtsenec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiqui:

“Mibi bëdamboshë iqueque. Èbi bëdamboen ista.

Nuquin Papan chomiaid yec mibi bëdamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. <sup>14</sup> Ambi podquedën choquin bedbëtsemboed cabayobitsecquidëmpi catsadtoanec Esus chosho isash adcuëdedpondash. Adec aid catsadte Nuquin Papan tantiamiacpadomboen con tsusedpan dada uaquin naden chuipampic.

<sup>15</sup> “Edusaden yacnocquido chiec:

‘Dacuëdenda, Edusaden yacnocquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. <sup>16</sup> Adec Esus catsadtoanec chosho isun aden chuipampid tantienquio iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bëdambo iquec,” quequin nuquin matsesën Esus ismebededpondash —quequin tantiabenondambi.

<sup>17</sup> Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanëdash. <sup>18</sup> Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podo uic-uiccaquin ismepondash. <sup>19</sup> —Esus bëdamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

*Matses utsibo: Esus isnu, quiaid*

<sup>20</sup> Edusaden yacno cuëdënecc cho-choboedo matses utsibo isadaidpembotsen icpondash. <sup>21</sup> Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun <sup>22</sup> Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien <sup>23</sup> aid matses utsibo isadaidpembo tantiamenuëc Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Èmbi adoacsho Nuquin Papan: “Mibi bëdambo iquec,” ëbi caindac —quepondash Esus abi unës uate chiequi. <sup>24</sup> Adshumbien ompoacimboen chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac canias bacuëc bëdambo icpaid yoc. Chococabi bëdambo ictiapimbo iquec. Adoacimboen chococabi yac matses bëdambo icmetiapimbo iquendabi. Unësacsho chococac matses bëdambo icmequid nendabi —quepondash Esus. <sup>25</sup> Adashic padpidec: —Ambi naiduidi naquin ëmbi chiaid niacquido Nuquin Papan cuidtequido nendac. Ambi naiduidi nainquio icquin ëmbi chiacpadomboen naquido ëbëdi tabadtequido yanendac. <sup>26</sup> Adquid ëmbi chiacpadomboen natiadquio yec ëbi yacpadec chieshtoenquio ictsiash. Adquidquio unësash uincuenash ëbëdi tabadsho Nuquin Papan: “Nëid con Mado tantiaquid bëdambo iquec,” capendac —quepondash Esus.



*Esusën abi unës uate chiaid*

<sup>27</sup> Adashic abi unës uate tantiec Esus nadpondash. —Unësquioshë yanuc: “Mimbi tanti-acpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus. <sup>28</sup> Adtanequien Nuquin Papa chiec: —Nuqui tantiacpadomboen nëbi nainembi, Papa. Ęmbi aden nainacsho: “Nuquin Papa bēdambo iquec,” matses cameta, Papa —quenubien abucuēshquio Nuquin Papa comapenec onquepondash. —Ai, ěmbi namiaid mibi icsho: “Nuquin Papan namiaid nec. Nuquin Papa bēdambo iquec,” matses camepombi. Nēbi padpiden adomeoaindambi —quepondash Nuquin Papa.

<sup>29</sup> Abucuēsh onquesho bēdamboen tantiabi yec utsibo: —Abu cuēdtoec nec —quenubien utsibo: —Nuquin Papan abi yacnoshon uaid mayan bēdan Esus chuipash —quecuededpondash. <sup>30</sup> Adsho tantiash Esus: —¿Ębi tantiamenuecta onquediosh? Padenquio. Mibi tantiamenuequien niosh. Aden tantiashun ěmbi bēdamboen chuisho tantiata. <sup>31</sup> Nuquin Papa chieshēnquid Satanasēn yuaido matses dadpenquioshē iquec. Nēbi Nuquin Papan tantiacpadomboen aido utsi-utsien Satanas bēdshunendambi: “Chēn. Con na neque,” quequin. <sup>32</sup> Ębi abuc dectanac aden matses ěbi tantiaquid icmendambi —quepondash Esus. <sup>33</sup> —Ębi cuesten dectanquin unës uaindac —quequin tantiec: —Ębi abuc dectanendac —quepondash Esus.

<sup>34</sup> Adsho tantiash abi datsidadquido: —“Ębi dectanendac,” quiosh. “Unēsebi,” quepequien iccosh —quiashien Esus chiec: —“Nuquin Papa yacnuēsh choquid Quidistu caid unēsambo nendac,” quequin Nuquin Papan chiaid nuquin matsesēn chuinubi: “Unēsebi,” ¿quecta icco? “Unēsebi,” quequid Nuquin Papa yacnuēsh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? —quepondash Esus datsidadquido. <sup>35</sup> Adoaquien Esusēn: —Nadquid nebi —quenquio icquin ompoacbimboen naden chuipondash. —Mibi bēdamboen tantiamequid nëbi isadenquio iquendac. Aid nibēdnuc bēdamboen mimbi tantienquio iquendac. Nidabi aidēn chuisho bēdamboen tantiata. <sup>36</sup> Nuquin Papan bēdamboen iste tantiamequid tantiata. Adsho bēdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

*Isadaidbon Esus tantienquio yaid*

<sup>37</sup> Ęmbi dadpen chuiquin dada uabanacpadomboembi Esusēn comapenen tantiaquin dadpen nabansho isun con matses isadaidbon Esus tantiatiadquidi Esus tantienquio icpondash. <sup>38</sup> Aden Esus tantienquio icte con tsusedpa Isayasēn Nuquin Papan tanti-amiacpadomboen chuiquin dada uapampic.

“Nuquin Papa yacnuēsh choash nadec onquendac.

‘Mimbi chiaidquio chuibansho tantiashun: Muequien mibi nec, ěbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuēsh choquidien nec, quetiadquidi adenquio iquendac, Papa,’ quependac,”

quequin Esusēn chuite Isayasēn dada uapampic.

<sup>39</sup> Nuquin Papan pamumēdacobimboecnuc icmiac con matsesēn Esus tantienquio icpondash. Aden chuiquin Isayasēn padpiden dada uapampic.

<sup>40</sup> “Isadaidbon ěbi tantiatiapimbo icsho isun

‘Ma adembi tantienquio icpanuna,’ caimbi.

Ma adequi pabiate shēcuē nibēdacobimboec icchitono.

Ębi tantiasho abi icsaid bēpiscudquin bēdamboen ismane,”

quequin Nuquin Papan ambi con matses caido nēishēnshun chushcaid Isayasēn dada uapampic. <sup>41</sup> Nuquin Papambo Esusbēd uinsadpambo yec tabadsho isondaaid icquin

Isayasēn aden Esus tantienquio icte chuipampic.

<sup>42</sup> Con matses dadpeshun Esus tantienquo icnubi con matses chuiquidon abentsëcshun abentsëcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuëdquin: —Esus tantiaquid nebi —quequin chuitiadquidi utsibo chienquo icpac caondash. <sup>43</sup> — Ma con matsesëmbi ëbi bëdamboen isnu —quequinuidtsëqui tantiaquin aton matses chuitiapimbo icpac caondash. —Ma Nuquin Papan ëbi bëdamboen isnu. Aton Mado tantiaquid nebique —quetiadquidi adenquo yac caondash.

### *Cuidenquo icte chiec nebi, quiaid*

<sup>44</sup> Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —¿Ëbi tantianuequidën ëbiuidtsëquida tantiapadic? Padenquo. Ëbi tantiaquidën ëbi chomiondaidsen tantiatsiash. <sup>45</sup> Adembidi con Papadquiobidi ëbi icsho isun: “Ai, adquiobidien Nuquin Papa iquec,” quequin tantiatsiash. <sup>46</sup> Nuquin Papan matses bëdamboen iste tantiamenuc matsesbëd tabadec chondabi. Adec matsesash: “Ëbi tantiaquido ma Nuquin Papan bëdamboen isquin bëdamboen tabadmenu,” quiash nebi. <sup>47</sup> “Ëmbi aden chuisho tantiatiapimbo icquido nëbi cuidnu,” ¿quectabi icti? Padenquo. Nëbi Nuquin Papan bëdamboen isquin cuidenquo icte chuinuequini nec. <sup>48</sup> Nuquin Papan cuidte ushëmbien ëbi tantiesabon: “Nuquin Papan chiaidshenda chuipadenec. Aid tantienquo yec icsabudquiopobi,” quequin ambibi tantiendac. Adsho Nuquin Papan cuidendac. <sup>49</sup> ¿Ëmbembi chuiquindambi nadi? Padenquo. Ëbi chomiondaid con Pan chiaidquo chiequini nec. <sup>50</sup> “Ëbi tantiaquid ëbëdi tabadendac padpidec unësenquo yec,” queshun Nuquin Papan chiaiduidtsëqui chiequini nec —quepondash Esus.

## 13

### *Esusën abëd icquido tapanaid*

<sup>1-2</sup> Esusën comapenen tantiaquin nabanaid chuiquin aidtedi chiombi. Nëbi abi tantiaquido tantiaquieci abided cuidadec unësaid chuiquin unësash abi uincuenaidtsen chuinu. Tanta. Nuquin Papan con tsusedpabo unës uainquo icquin matamiampid inchësh tantiaquin pec tabadte ushë nëbi yanuc inchëshën Esusbëd pec bëdamboec tabadondabi. Padnuen Udas Simon Iscadioten mado Satanasën tantiamiacpadomboen Esus bedmete tantiec tsadpanëdash. Adnubien Esus: —Nëbi con Pa yacno nidebi nëido nianec. <sup>3</sup> Con Pabëd tabadec ambi tantiacpadec abëdi abitedishun Icbombo iccondaiddi nëbi anobidi nidoash adquiobidi icoaindabi. Adquid icquin nëido bëdamboec tantianante ismenu —quequin tantiaquin <sup>4</sup> yuan nachimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash. <sup>5</sup> Tsibidiquetanquin pada-padaid dapan acte cushtotanquin abëd icquido tapambampondash. Daucudten tauchanquin tapambanondash.

<sup>6</sup> Aden tapambanquimbi: —Mibitsen tapanu —cac Petedon: —¿Icbonda yua tapampaid? Ëbi tapanenda, Icho. Padi —capondash. <sup>7</sup> Adoaquien Esusën: —Ëmbi nasho nëbi mimbi tantienquo iquec. Yuecshun mimbi tantiendac. En tapanu —caquien: <sup>8</sup> —Padi. Mibi bëdamboshë icquid nec. Ëbien icsaquid nec. Yua namiacchimboen mibi tapametiapimbo iquebique. Padi —caoapondash Petedon. Adoaquien: —Ëmbi tapanabi yac con yuambo mibi ictiapimbo ictsiac —capondash Esusën. <sup>9</sup> Adsho tantiashun Petedon: —En na, Icho. Tapantanquimbi mapinobëdtabi ëbi mëpanta —caquien: <sup>10</sup> — Padi. Nesboed mibi nec. Taënouidtsëqui bëchishacsho tapanembi. Ëmbi bëchish ucac mibi bëdambo iquec. Abentsëc icsambo iquec —quepondash Esus. —Bëchish ucacchimboen ëmbi nasho Nuquin Papan mibi bëdamboen isendac icsaid ucudacchimboecnuc —quequin tantiec: —Ëmbi bëchish ucac mibi bëdambo iquec —quepondash Esus. <sup>11</sup> —Udasën ëbi unës

uamenuen bedmendac –quequin tantiec: –Abentsëc icsambo iquec –quepondash Esus.

<sup>12</sup> Aden tapambanash dasiuidash samëdquin pebededquin abëd icquido Esusën chuipondash. –Ëmbi naboed ¿ada tantie? Tantia. Mibi chuinu. <sup>13</sup> “Ëbi chuiquidquo mibi nec,” mimbi ëbi capec. Adembidi: “Con Icbo mibi nec,” mimbi ëbi capec. Bëdamboen mimbi chiec. Adquid nebique. <sup>14</sup> Ëmbi nabocpadomboen mimbitsen nata. “Ëbëd icquid tantiaquiquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiemi. Con buchibimboecnuc nashunu,” quiash nashunanta. <sup>15</sup> Ëmbi nabocpadomboen namenuen adombique. Mimbitsen nata. <sup>16</sup> En chuinu. Tantia. ¿Icbon chiacca chieshpadic? ¿“Nid,” cacta nidenquo icpadic? Icbon chiacpadomboen yuan naquid yendac. Adomboen tantiaquin ëmbi chiacpadomboen nata. <sup>17</sup> Ëmbi aden chuisho tantiashun ëmbi chiacpadomboen naic mibi bëdambo iquendac –quepondash Esus.

<sup>18</sup> Adashic padpidec: –Mibitedi caic: “Bëdambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaido con yuabotedi tantiemi. Abentsëc icsambo iquec. “Aid con yuapenquo nec,” quequin ëmbi tantiaidi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Ëbëdtan planeboedëmbi ëbi unës uamenuen bedmendac,” quequin dada uapampic. <sup>19</sup> “‘Abi unës uametebi chiosi. Nuquin Papapadquidquobi icquimbien naosh,’ quequin ma tantianu,” qeshun mibi chiombi. <sup>20</sup> Mibipadquidën nate mibi chuinu. Tantia. Mibipadquidën ëbi chuibansho tantiash: “Ai, abimbo caic,” qeshun utsibon ëbi tantiatsiash. Adembidi ëbi tantiashun ëbi chomiondaid Nuquin Papatsen tantiatsiash –quepondash Esus.

### *Abi bedmequid Esusën chiaid*

*(Mat 26.20-25; Mad 14.17-21; Duc 22.21-23)*

<sup>21</sup> Adshumbien abi bedmequid Udas tantiac unësquo icnuc Esusën chuipondash. –Tantia. Mibitedi chuinu. Ëbëd icquidëmbi ëbi chieshënquido ëbi bedmendac –quesho <sup>22</sup> tantiash abëd icquidobëd bëisanec: –¿Tsutsi capec? Nëidien cachitec –quecuededpondabi otacquo tantiec.

<sup>23</sup> Ëbi tantiaquidquo yec con cachotsëqui Esus uepondash. <sup>24</sup> Adec Esusën dayuntsëqui ueshobini: –“¿Tsutsi cai?” ca –capondash Petedon mëdquin onquenquo icquin. <sup>25</sup> Adoquimbi cachoc isquin: –¿Tsutsi cai, Icbo? –capondac. <sup>26</sup> Adoquien Esus: –En istac. Pete cuëshën ënë puntanquin menequin mibi ismenu –quetanquin pete cuëshën ënë puntanquin Udas Simon Iscadioten mado menepondash. <sup>27</sup> Adoac penubi Satanasquo Udas dapuedquopanëdash ambi tantiaidquo namenuc. Adshobien Esusën: –Mimbi tantiacpadomboen baded nëbimbobi naic nid, Udas –capondash.

<sup>28</sup> Adsho tantiashini ëbitedi: –Tantiadenquo yec onquepec. ¿Atotsi quiash: “Baded naic nid,” quepec? –quepondac. <sup>29</sup> Utsi: –Udas nuqui piucquid dayun uashunquid nec. “Piucquid buanshun pete bedtan,” quepequien iccosh –quenubien utsi: – “Piucquid nibëdquido piucquid menetan,” quepequien iccosh –quecuededpondash. <sup>30</sup> Pete cuëshëmpi pesho: –Nëbimbobi baded naic nid –caquien Udas nidpondash. Inchëshëmbi nidpondash Esus bedmenuen chiec nidec.

### *Tantiananquiota, quequin chiaid*

<sup>31</sup> Abi bedmenuen chiec Udas nidbombien Esus: –Nuquin Papan matsesmiadquo icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. <sup>32</sup> Èbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac –quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. <sup>33</sup> Adashic ëbi chedo padpiden chiec: –Nëbimbobi nidebique. Chuiquid dapabo ëmbi chiondacadomboen

mibi chuioanu. Tantia, mado. Ĕbi nidacsho mimbi Ĕbi istuidenquo iquendac. Ĕbi nidacno mibi nidtiapimbo iquendac. <sup>34</sup> Aden tantiaquin Nuquin Papan chiaid utsi mibi chuinu. Ĕbi nidan Ĕmbi chiacpadomboen nata. Ĕmbi mibi tantiaquiapadquiec tantiananquiota. <sup>35</sup> Ĕbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash –quepondash Esus.

*Petedo: Ĕmbi isacmaid nec, quete chiaid  
(Mat 26.31-35; Mad 14.27-31; Duc 22.31-34)*

<sup>36</sup> Adec –Nidebi –quesho tantiashun Petedon: –¿Mitsimbo nide, Icbo? –capondash. Adoquien Esus: –Nĕbi mibi nidtiapimbo yacno nidebi. Yuecash ambo mibitsen nidendac –quepondash Esus. <sup>37</sup> Adsho tantiash Petedo: –¿Atotsi quetiadquo yec: “Nĕbi Ĕbĕdi nidtiapimbo mibi iquiec,” quepo mibi? Mibĕd nidec dacuĕdenquo ictsiabi. Mibi chieshĕnquidon: “Unĕs uanu,” mibi casho tantiash: “Ĕbien natiad,” quetsiandabi –quepondash Petedo.

<sup>38</sup> Adsho tantiashien Esus: –“Ĕbien natiad,” ¿quecta icpatsia? Padenquo mibi ictsiac. Cachina bĕnĕ cuĕdanabi icnuc mibi chieshtouidendac. “Ĕmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bĕnĕ cuĕdanabi icnuc mibi adendac –quepondash Esus. Adsho tantiashini Esusbĕd icquido Ĕbitedi dacuĕdcuededpondac.

## 14

*Nuquin Papabĕd tabadmendambi, quiaid*

<sup>1</sup> Ĕbitedi dacuĕdcuededsho isashien Esus: –Dacuĕdenda. “Ĕbi dayun uaquid nec,” quequin mimbi Nuquin Papa tantiapadomboen Ĕbitsen tantiaquiota. <sup>2</sup> Mimbi tantiapadquo Nuquin Papan shubu iquiec. Quĕnĕ dadpenquioshĕ iquiec. Tsucustiapimbo iquiec. Adpenquo icsho mibi aden chienquo ictsiambi. Adquid tantiaquin: “Ĕbi tantiaquido Ĕbĕdi tabadmendambi,” quequin chiombi. <sup>3</sup> “Adquid iquiec,” quish Ĕbia nidshun con Pa chiendambi. “Ĕbi tantiaquido neque. Nuquibĕdi tabadmenuna,” quequin chiendambi. Adashic Ĕbi yacno mibi buanuec choaindabi. <sup>4</sup> Ĕbi nidan Ĕbi nidacno nidte mimbi tantiec –quepondash Esus.

<sup>5</sup> Adsho tantiashun Tomasĕntsen: –¿Mitsimbo nide, Icbo? Tantiambo iccombi. Podqued tantienquo iquembique. Ĕbi chui –caquien <sup>6</sup> Esus: –Nuquin Papa yacno nidte tantiamequidquo nebi. Nuquin Papan chiaiduidtsĕqui chiec muesambo nebi. Adquid icquin Ĕbi tantiaquid Nuquin Papabĕd tabadmendambi. Ĕbi tantiesan Nuquin Papa tantiatiapimbo ictsiash. Ĕbi tantiaquidĕnuidtsĕqui Nuquin Papa tantiatsiash. <sup>7</sup> Ĕbi caic: “Nuquin Papan Mado nec,” quequin mimbi Nuquin Papatsen tantiendac. Nĕbi abipadquid Ĕbi icsho isun Nuquin Papambo isacbimboen mimbi tantiendac –quepondash Esus.

<sup>8</sup> Adshobien Uedipentsen: –Nuquin Papa Ĕbi isme, Icbo. Nuquin Papa iste bunebique. Aid isash bĕdambo ictsiabi –caquien <sup>9</sup> aidtsen Esusĕn: –¿Tantienquioda ique, Uedipe? Yuec mibĕdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Ĕbi adquid icsho isun: “‘Adquidquibidi Nuquin Papa iquiec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa Ĕbi isme,” cai? <sup>10</sup> “Nuquin Papapadquidquo nebi,” Ĕbi quesho tantiash: “Ai, abimbo caic,” ¿quenquioda icco? Ĕmbembi chienquo iccombi. Con Pan chiaidquo chiequini nec. Adembidi Ĕmbembi nabanenquo iccombi. Ĕbĕd tĕshnanenquo icquin con Pan namiaquimbi naoc. Ĕmbembi nainquo iccombi. <sup>11</sup> “Con Papadquidquo nebi,” Ĕbi quesho tantiashun: “Ai, abimbo caic,” cata. Ĕmbi



chiaid tantiatiapimbo icquin ëmbi comapenen tantiaquin dadpen nabamboedquoio tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. <sup>12</sup> Tanta. Mibi chuinu. Ëmbi nacpadomboen ëbi tanti-aquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibi-padquidën ëbi chuibanac dadpenshun ëbi tantiabenendac. <sup>13</sup> Ëmbi chiacpadomboen naquidën: “Ëbi nashunta, Icbo,” qesho tantiashun ambi chiacpadomboen nashunen-dambi. “Nuquin Papa bédamboshë iquec,” camenuen <sup>14</sup> ëbi tantiaquidën chiacpadom-boen nashunendambi –quepondash Esus abëd icquido chiec.

### *Nuquin Papan Mayan tabadte chiaid*

<sup>15</sup> Adashic abëd icquido padpiden chiec Esus: –Ëbi abimbo tantiaquidën ëmbi chiacpadomboen natiadquio iquendac. <sup>16</sup> Adotiadquio icsho isun con Pabëd icquin con Pa chiendambi naden. “Nuqui tantiaquido bédamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. <sup>17</sup> Adoac mibi nianenquio yec mibëdi tëshnanenquio iquendac. Mibëd icquin ëbi chuiquin mibi abimbo tantiamendac. Aid isadenquio icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquio nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibëdi tëshnanenquio yec tabadendac con Mayan. <sup>18</sup> ¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibëd aid icnuc ëbëd yacbimboequi con Mayan tantiadendac. <sup>19</sup> Nëbi ëbi nidacsho ëbi tantiesabon ëbi isenquio icnuc mimbi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. <sup>20</sup> Ëbi uincuenaid ushëmbi mimbi naden tantiendac. “Esusën Nuquin Papa tantiaquiec aidbëd tëshnanenquio icquin aidën chiacpadomboenuidi naindac. Adecbidi Esusbëd tantiananquiec aidbëd tëshnanenquio icquin aidën chiacpadomboen natiadquio yec tabadebi,” quequin mimbi tantiendac. <sup>21</sup> Ëmbi chiacpadomboen naquid ëbi tantiaquidquio nec. Ëbi tantiaquidquio mibi icsho con Pabëdtan mibi tantiaquioquin: “Adquio aton Papabëd Esus iquec,” camequin mibi bédamboen tantiamendambi –quepondash Esus.

<sup>22</sup> Adsho tantiashun Udas utsin abi bedmequidënpenuenquio: –“Nuquin Papa yacnuësh choash con matses chuiquidquio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantiamene, Icbo? –caquien <sup>23</sup> Esus padpidec: –Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aidbëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiadendac. <sup>24</sup> Ëbi tantienquio icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpadic? Mambi Nuquin Papan chiaidquio chuiboc. Aidën chiaidquio adquidën niac-niaquec –quepondash Esus abëd icquido chiec.

<sup>25</sup> Adashic padpidec Esus onquiondash. –Mibi bëdiactsëc tantiamequin mibëd icquin con Pan chiaid chuibanombi. <sup>26</sup> Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bédamboen tantiamendac. <sup>27</sup> Con Pa yacno nidshun con Mayan mibëdi tabadmequin dacuëdenquio icquid mibi icmendambi. Adoac dacuëdenquio yec bédamboec tabadta. Ëbi tantiesabo dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquio yec bédamboec tabadta. <sup>28</sup> “Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiash ëbi tantiaquidombo cuishonquetsiash.



“Esus abi namequid aton Papabëd tabadec nidec,” quiash ëbi tantiec cuishonquetsiash. <sup>29</sup> Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadec ëbi adsho isun ma nëidon: ‘Esusën abimboshenda capondash. Ambi chiondacadquid Nuquin Papan Madombo nec,’ quequin tantianu,” quiash adobi. <sup>30</sup> Nëbi ënquimbi chuinu. Ëbi tantiesabon icbo Satanas ëbi unës uamenuc choec. Ambembi aidën ëbi unës uametiapimbo iquec. <sup>31</sup> Con Pan tantiacpadequini unësendac. Ëbi adec unëso isash: “‘Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiash adebi. Nëbimbobimbi naique. Nidec nidnu. Nid —quepondash Esus.

## 15

### *Shancuinbiecquid uba caid chiaid*

<sup>1</sup> —Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquio shancuinbiecquid uba caid icpec? Mapietsëc ictsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. <sup>2</sup> Uba aton icbon cuidi utsiuc bacuëesa icsho pateshunepaid yoc. Adoacbimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bëdamboen bacuëmenuen dadpen cuidi icquid cuidi dadpen pateshun siaquid. Adomboembidi ëbi tantiaquido bëdamboshë icmenuen Nuquin Papan aidon icsamboen naid ëmetsiash. <sup>3</sup> Ëmbi chiacpadomboen naic mibi bëdambo iquec. Aden ëbi tantiasho Nuquin Papan mibi bëdamboen isec. <sup>4</sup> Ëbi adembidi tantiaquin ëmbi chiacpadomboen nata. Adsho isash mibi bëdamboen tabadmec mibëd iquendabi. Uba cuidi padquëdaid bacuëtiapimbo iquendac. <sup>5</sup> Adecbidi ëbëdi tëshnanash matses bëdambo ictiapimbo iqueque. Ëbëd tëshnanenquio yec bëdamboec tabadta. Bëdamboec tabadquin mimbi utsibo ëbi tantiametsiac. <sup>6</sup> Uba icbon cuidi utsiuc bacuëesa icsho pateshun tsindoshon nëdëncapaid yoc. Adoacbimboen ëbi tantiesabo unësacsho Nuquin Papan ambi icsaido cuidacno nësecaindac —quepondash Esus.

<sup>7</sup> Adshumbic Esusën padpiden chuipondash. —Ëbi tantiaquin ëmbi chiacpadomboen naquidën: “Ëbi nashunta, Papa,” cac ambi chiacpadomboen Nuquin Papan nashuntsiash. <sup>8</sup> Nuquin Papan adoshonac: “Nuquin Papa bëdambo iquec,” mimbi catsiac. Adembidi utsibotsen: “Nuquin Papa bëdambo iquec,” camenuen bëdamboec tabadquin ëbi tantiameta. Mimbi adosho: “Ai, ëbi tantiaquidquio nec,” caindambi. <sup>9</sup> Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquioquin ëmbi chiacpadomboen nata. <sup>10</sup> Abi tantiaquioquin ambi chiacpadomboen nashobini con Pan tantiaquiec. Adembidi ëbi tantiaquidën ëmbi chiacpadomboen nasho ëmbitsen aid tantiaquiendambi. <sup>11</sup> “Ëbi cuishonquiacpadquiecbidi ma ëbi tantiaquiec cuishon-quequiono,” qeshun aden mibi chiembi —quepondash Esus abëd icquido chiec.

### *Tantiananta, quequin Esusën chiaid*

<sup>12</sup> Adashic abëd icquido padpiden chiec Esus: —Ëmbi mibi tantiaquiacpadquiec tantiananta. <sup>13</sup> Nadquiec caimbi. “Min utsi cuesnu,” cashunac: “Ëbien natiad,” quiacbimboec tantiananta. Aden mibi tantiec ëbided cuidadec unësendabi. <sup>14</sup> Ëmbi chiacpadomboen nasho mibi con utsi caimbi. <sup>15</sup> Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bëda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. <sup>16</sup> “Esusbëd iquec nidnu,” ¿quequinda mimbembi tantiadionda? Ëmbien mibi: “Nuquibi icnu. Cho,” caondac. “Utsibo tantiamequin ma

nëidon ëbi chuibenenu. Adoac utsibotsen ëbëd tabadtequid yanendac,” qeshun mibi cho caondambi. Aden ëmbi chiacpadomboen naquidën Nuquin Papa chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimbi cac mimbi chiacpadomboen Nuquin Papan mibi nashuntsiash. <sup>17</sup> Ëbi adsho tantiash ëmbi chiacpadquiec tantiananta –quepondash Esus.

### *Esus tantiaquido chieshënte chiaid*

<sup>18</sup> Adashic padpidec Esus onquepondash. –Ëbi tantienquo icquidon chieshënac: “Aden Esusba chieshë nondash,” quequin tantiata. <sup>19</sup> Ëbi tantiesabo icsho ëbi chieshë nquidon mibi bëdamboen istsiandac. Adquid iccondaïdi ëmbi: “Cho,” cac ëbi tantiaquid mibi yanondac. Adac ëbi tantiaquid icsho mibitsen chieshënoaindac. <sup>20</sup> “Yuan icbon chiacpadomboen napaid yoc,” quequin ëmbi ¿chuiboedta tantie? Aden ëmbi chiacpadomboen nasho ëbi chieshë nquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen ëmbi chiaid tantiaquidën mimbi chiaidtsen tantiendac. <sup>21</sup> Ëbi chieshë nquidombi ëbi chomiondaïdquo tantiaquin ëbi chieshënenquo icsiash. Ma ëbi chomiondaïd Nuquin Papa tantienquo icquin aidon ëbi chieshëmpayoc. Adomboembidi ëbi tantiaquidotsen chieshënoaindac. <sup>22-23</sup> ¿Ëbi chieshë nquidon ëbiuidtsëquida chieshëmpadic? Ma ëbi chieshë nquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshë nquido ëbi chieshë nec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan ëbi chieshë nquido: “Mibi icsamboshë iquec,” caindac. <sup>24</sup> Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash ëbi chieshë nquido: “Icsapenquo iquebi,” quetiapimbo iquendac. Ëmbi nabansho isun ëbi chieshë nquin con Patsen chieshë nec. <sup>25</sup> “Aden matsesën ambembi ëbi chieshë mpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshë nquidon isbanaïdi nec –quepondash Esus.

<sup>26</sup> Adashic padpidec: –Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. <sup>27</sup> Adoac mibitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshë nquidon mibitsen chieshë nendac. Adoac dacuëdenda.

## 16

<sup>1</sup> “Chieshtonoshe,” qeshun mibi aden chiombi. Mibitsen chieshë nac dacuëdenda. Mibëd con Mayan tabadmembique. <sup>2</sup> Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshë nquin utsi-utsien cuesun secash: “Nuquin Papa tantiaquidquo icquin Esus tantiaquido cuesun secaombi,” quependac. <sup>3</sup> Aden Nuquin Papa ëbëdta tantienquo icquidon ëbi tantiaquidotsen chieshë nendac. <sup>4</sup> Mibi chieshë nac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” qeshun nëbi mibi chiembi –quepondash Esus.

### *Nuquin Papan Mayan chote chiaid*

<sup>5</sup> Adashic: —Nëbi ëbi chomiondaibëd tabadec nidendabi —quepondash Esus. Adsho tantiasch padequimbo tabadpondabi. Adec ëbi padequimbo tabadsho isash Esus padpidec onquepondash. —“¿Mitsimbo nide?” ¿quenquioda ique? <sup>6</sup> Ai, ëmbi chuiboed tantiac unësquio icnuen mimbi ëbi chienquio icchitec. <sup>7</sup> Ëbi nibëdnuc mibi bëdambo iquendac. Ëbi nidenquio icnuc con Mayan mibi bëdamboen tantiamenuec choenquio ictsiash. Nidshumbimbi mibëdi tabadmenuen chomendac. <sup>8</sup> Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. <sup>9</sup> Aden Nuquin Papan Mayanën tantiamiac: “Esus tantienquio yec icsambo icchitebi,” quendac matses. <sup>10</sup> Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquio yec con Pa yacno nidan con Mayanën tantiamiac matses adendac. <sup>11</sup> Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquio icquidobëdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

<sup>12</sup> Adashic abëd icquido chiec Esus: —Mibi dadpenquio chuitiadquio icquimbi nëbi dadpen chienquio iquembi. Nëbi ëmbi chuisho mimbi tantiatipimbo iquec. <sup>13</sup> Nuquin Papan Mayan choshombien mibi abimbo chuiquin ëbi tantiamendac. Ambembi chienquio icquin Nuquin Papan chiaiduidi chiendac. “Nadquio iquendac. Adecbidi nadquid choendac,” quequin mibi dadpen tantiamendac. <sup>14</sup> Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac. <sup>15</sup> ¿Ëbiuidtsëqui tantiamenuenda con Mayanën adopec? Padenquio. Ëmbembi chiaid mambi chiambo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi —quepondash Esus abëd icquido chiec.

### *Abi nidte Esusën chiaid*

<sup>16</sup> Adashic padpidec: —Nëbi isadenquio yanebi. Adashic yuecpactsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. <sup>17</sup> Adsho tantiashini ëbitedi: —¿Atotsi quepec? Tantiadenquio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquio yec: “Nëbi isadenquio ictanec yuecpactsëc yash isadcuenendabi,” queposh? <sup>18</sup> ¿Atotsi quepec nec? —quepondabi Esusbëd icquidobëd onquec. Esus tantiamenquio yec sho-shoshquetsëcquiec onquepondabi. <sup>19</sup> Adsho ambembi tantiasch: —Ëbëd icquidon ëbi chuitiadquio iquec —qeshun Esusën: —“¿Atotsi chuitiadquio yec nio?” quequin ëbi chuite mibi buneque. <sup>20</sup> Tanta. Mibi Chuinu. Ëbi unëso isash mibi sedenquenubi ëbi tantienquio icquido cuishonquendac. Adec sedenqueboedobi mibitsen cuishonquianendac. <sup>21</sup> ¿Mitsipadquio bacuë tishec chido icpec? Bacuë cuididiquenuc natiamboshë icboedi bacuë tishash cuishonquepaid yoc. <sup>22</sup> Adecbidi nëbimbobi ëbi unëso isash mibi natiaquiendac. Adboedi yuecpactsëcshun ëbi padpiden isash mibi cuishonquendac ënëdenquio yec. <sup>23</sup> Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. <sup>24</sup> Aden mimbi Nuquin Papa chianenquio iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac —quepondash Esus abëd icquido chiec.

### *Esusën abëd icquido ënquimbi chiaid*

<sup>25</sup> Adashic abëd icquido padpiden chiec: —Ompoachimboen dadpen chuibanombi. Yuecpectsëcshun: “Con Pa nadquio iquec,” quequin mibi sebadënquio chiendambi —quepondash Esus. —Uincuenshun aden chiendambi —quequin tantiec adondash Esus. <sup>26</sup> Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimbibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquio. <sup>27</sup> Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquioquin mibi nashunendac. <sup>28</sup> Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

<sup>29</sup> Adsho tantiashini ëbitedi: —Adquidshenda mibi nepec. Ma nëbi mimbi sebadënquio chieyoc. <sup>30</sup> Mibi: “Nëbi isadenquio yanebi,” quioc. Adashic: “Yuecpectsëc yash isadcuenendabi,” mibi qesho tantiash mibi tantiamenquio yec sho-shoshquetsëcquiec: “¿Atotsi quepec?” quecuededpobi. Mibi chuimetiadquio iccobi. Ëmbi chiambobi ma mimbibi tantiapaboc. Comapenen tantiaquidquio icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. <sup>31</sup> Adsho tantiash Esus: —Ai, nëbi mimbi ëbi tantiaquiec. <sup>32</sup> Aden ëbi tantiaquidquibi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquio iquendac. <sup>33</sup> “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

## 17

### *Esusën Nuquin Papa chiaid*

<sup>1</sup> —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. <sup>2</sup> Ëndenquimboshë mimbi ëbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi ëbi chiondac. Mimbi adondaic icquin mimbi tantiactedi matses nuquibëd tabadtequido icmendambi, Papa. <sup>3</sup> Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaicquio Esus nec,” quequin tantiasho nuquibëd tabadtequido icmendambi, Papa. <sup>4</sup> Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdamboshë iquec,” quependac, Papa. <sup>5</sup> Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

### *Esusën abëd icquido Nuquin Papa chiaid*

<sup>6</sup> Adshumbic Esusën abëd icquido ëbitedi chuiquin aton Papa chuioapondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquio chiac: “Ai, adotiadquio iquebi,” quiosh, Papa. <sup>7</sup> Adembidi aidon: “Nuquin Papan namiaidquio nec. Ambembi nainquio iquec,” quequin ëbi tantiaposh. <sup>8</sup> Mimbi chiaid ëmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi ëbëd icquidon, Papa.



<sup>9</sup> Ĕbi tantienquo icquido mibi chienquo iquemi, Papa. Ĕbi tantiaquiduidtsĕqui mibi chiec nebi. Mibi tantiaquido icsho mimbi tantiamiac ĕbitsen tantiec aidon. <sup>10</sup> Adsho isun: “Nuqui tantiaquido nec,” caimbi, Papa. Aidon: “Mibi bĕdambo iqueque. Con Icbo mibi canu. Mimbi chiacpadec bĕdamboec tabadtiadquo iquebi,” quequin bĕdambo icmioshi, Papa. <sup>11</sup> Mibi bĕdamboshĕ iqueque. Ĕbi mibi yacno nidan ĕbi tantiaquido dayun uata, Papa. Ĕbi chieshĕnquidon chieshtomenushe. Nĕido bĕdamboen dayun uata. Mimbi ĕbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ĕbi tantiaquido tantiananu. Nĕido bĕdamboen dayun uata, Papa. <sup>12</sup> Aidobĕd icquin mimbi chiaidquo bĕdamboen chuibanquin chieshtomiambo iccombi. Aden bĕdamboen dayun uaqun ĕbi tantiaquido cudasĕnquin Satanas yuamiambo iccombi. Udas abentsĕquien Satanasĕn yuatsaccosh. Mimbi chiaid matsesĕn dada uapampicpadomboen ĕbi bedmenuen Satanasĕn Udas yuaccosh. Adoac ĕbi bedmequid yanash mimbi cuidtequid iquendac.

<sup>13</sup> Nĕbi mibi yacno nidendabi, Papa. “Ĕbi nidan dacuĕdec ĕbi tantiaquido chieshtonoshe,” queshun mibi otacquo chienquo iquemi. “Ĕmbi abi dayun uate chuisho tantiash ĕbi yacpadec ma cuishonquenu,” quequin mibi otacquo chienquo iquemi, Papa. <sup>14</sup> Mimbi chiaidquo nĕido chuibanombi. Adoac ĕbi tantiaquido yansho ĕbi chieshĕnquidon nĕidotsen chieshĕmpec. Ĕbi yacpadec mimbi chiaid niac-niacte bunenquo icshobidi nĕido chieshĕnquiec, Papa. <sup>15</sup> Aden tantiash: “Ĕbi tantienquo icquidobĕdi ĕbi tantiaquido tabadmenda,” ĵquectabi ique? Padenquo. “Ĕbi tantiaquido chieshtomenda,” caimbi, Papa. Satanasĕn yuanushe. Bĕdamboen dayun uaqun chieshtomenda, Papa. <sup>16</sup> Ĕbi tantiesabo tabadacpadec tabadenquo icquin ĕmbi nabocpadomboen natiadquo iqueque. <sup>17</sup> Mimbi chiaidquo pausunquiquin bĕdamboen tabadme, Papa. <sup>18</sup> Mimbi ĕbi: “Matses chiec nid,” caondacpadomboen aid: “Ĕbi chuibeneta,” caindambi. Adoac nĕidon ĕbi chuibenendac, Papa. <sup>19</sup> Nĕido tantiaquiec nĕbimbobini mimbi chiacpadec ĕbided ciudadec unĕsendac. “Adomboembidi ĕbi tantiaquidon ma Nuquin Papan chiacpadomboen nanu,” quiash ĕbi tantiaquido min yuabombo icmenuec adebi, Papa –quepondash Esus aton Papa chiec.

### *Esusĕn abi tantiaquid utsibo Nuquin Papa chiaid*

<sup>20</sup> Adashic padpiden Nuquin Papa chiec Esus: –Ĕbĕd icquido mibi chuishumbic nĕbi aidobĕdta ĕbi tantiaquid utsibotsen mibi chuinu, Papa. Ĕmbi chiaidbĕdta ĕmbi naidtedi ĕbĕd icquidon utsibo chuibanac aidotsen ĕbi tantiaquido yanendac. Adec ĕbi tantiaquido dadpenquo yanendac. Ĕbi tantiaquidotedi tantiaquin mibi chiec nebi, Papa. <sup>21</sup> Nuqui tĕshnanenquo yacpadequi nuquibĕd tĕshnanenquo icquid icmeta, Papa. Nuqui tantiananquiacpadec ĕbi tantiaquidotedi shubu abentsĕquĕn tabadacbimboec-nuc tantianameta, Papa. Adsho isash nuqui tantienquo icquido nadtsiash. “Esus tantiec bĕdambo iquec. Aden Nuquin Papanuidtsĕqui bĕdambo icmetsiash. Nuquin Papan chomiaidquien Esus nechitec,” quetsiash. <sup>22</sup> “Mibĕd ĕbi tantiananquiacpadquiec ma ĕbi tantiaquido tantiananquiono. Ma chieshĕnanenquo icnu,” quequin mimbi ĕbi namiacpadomboen ĕbi tantiaquido namiombi, Papa. <sup>23</sup> Nuqui tĕshnanenquo yacpadec aidobĕd tĕshnanenquo iquendabi. “Chieshĕnanenquo yec tantiananquiec ma bĕdamboec tabadnu,” quec aidobĕd tĕshnanenquo iquendabi, Papa. Adec ĕbi tantiaquido bĕdamboec tantianansho isun matsesĕn naden tantiatsiash. “Ambi chiacpadquid Nuquin Papan chomenĕdaid icquin Esusĕn abi tantiaquido aden bĕdamboen tabadmec. Ambi chomenĕdaid aton Mado tantiaquiacpadomboen Nuquin Papan aid tantiaquido tantiaquiec,” quequin matsesĕn tantiatsiash, Papa. <sup>24</sup> Mimbi ĕbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: ‘Ĕmbi tantiaidquo mibi neque. Nuquibi nanuna, Mado,’ cac nuqui bĕdamboshĕ yec tabadtenecpadequi nuqui



tabadsho ma ëbi tantiaquidon isnu,” queshun mibi: “Nuqui yacno tabadmeta, Papa,” caimbi. <sup>25</sup> Icsaisambo mibi icscho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. <sup>26</sup> Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiacpadomboen ma nuqui daëdi tantiaquiash ma tantiananguiono,” queshun con Mayan aidobëd tabadmendambi. Adoac ëbëd icacbimboec con Mayan tantiadendac, Papa –quepondash Esus Nuquin Papa chiec.

## 18

### *Esus bedmiaid*

*(Mat 26.47-56; Mad 14.43-50; Duc 22.47-53)*

<sup>1</sup> Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiash tiedno cuëte odibos caid nitsinacno ëbitedi chiec tabadtenebocnombo chopondash. <sup>2</sup> Ambo tabadnubien Udas: –Ëbi abëd tabadtenebocno tiednoen nidchitash –quianec Esus bedmenuc <sup>3</sup> chopondash. Aden chieshëmënquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdtan padiseyobon namiaido sondado chedo. Nëidic con matses yuaquido Doma yacnocquido sondado dadpen. Nëidic aid sondado chuiquid. Aidedi Udasën bëpondash. Tabotebëdta cüeste sanambededtsëcquiec cho-chopondash. Utsibombic chështe.

<sup>4</sup> Adec cho-chosho isash bëquedbanec nidquin: –Ëbi unës uamec –quequin tantiaquin Esusën: –¿Atotsi quec ne? ¿Tsutsi nibëne? –cac <sup>5</sup> –Nasaded yacnuësh caniquid Esus bednuec nebi –quepondash sondado chuiquid. Adshun isac aibdëd Esus bedmequid Udas icpondash.

<sup>6</sup> Adshobien Esusën: –Në iquebi –capondash. Nuquin Papapadquidquiobi icquin adoac dacuëdec: –Aucbidi cuenu –quec uebudcuededpondash bednuequidotedi.

<sup>7</sup> Adshobien padpiden Esusën: –¿Tsutsi nibëne? –cac: –Nasaded yacnuësh caniquid Esus bednuec nebi –queoasho tantiashun: <sup>8</sup> –“Në iquebi,” caombi. Ëbiuidtsëqui bedta. Ëbëd icquido bedenda –capondash Esusën. <sup>9</sup> –“Mimbi ëbi tantiaquid icmiaido Satanas chieshtomiambo iccombi, Papa,” quequin ëmbi Nuquin Papa chuïbocpadomboen nëido chieshtometiapimbo iquebi –quequin tantiec: –Nëid bedenda –quepondash Esus.

<sup>10</sup> Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash. <sup>11</sup> Adosho isashien Esus: –Padi. Chën. Min chështe naued. Nuquin Papan chiacpadec paëmbo icnuc unësendabi –quepondash Esus.

### *Anasën shubuno Esus buanaid*

*(Mat 26.57-58; Mad 14.53-54; Duc 22.54)*

<sup>12</sup> Adshobien sondado chedon Esus bedpondash. Aden bedshun: –Cuidmenun chuiquid dapa yacno mibi buanu –catanquin catanepondash. <sup>13-14</sup> Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshë nec: –Nuquin matsteddi unës uamenquio icnuen Esused unës uamenuna –queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquio Caipas ismenuen buampondash.

### *Petedon: Ëmbi isacmaid Esus nec, quequin chiaid*

*(Mat 26.69-70; Mad 14.66-68; Duc 22.55-57)*

<sup>15</sup> Esus buansho isun Petedobëdtan chinunondambi. Chinuntuidash nidequi Caipasën shubuno choash daquënë uaidën puduednuesho tantiashun shëcuë isquid chidon puduedmiondashi. Ambi isondaic icsho aden puduedmiondashi. <sup>16</sup> Èbi puduedmequin Petedo ambi isacmaid icsho puduedmenquo icpondash. Adsho istanquin: —Èbëd icquid neque. Shëcneshun. Ma puduednu —capondambi. <sup>17</sup> Adoac puduedmeshun shëcuë isquid chidon: —¿Në bedboed Esusbëd icquidta mibi ne? —capondash Petedo chuiquin. Adoquien Petedo dacuëdec: —Padenquo —quepondash muequi. <sup>18</sup> Adnubien iquendoshon daquënë uacnoshon cuëte dëtsiadoshon sondado chedobëd anocquido yuabo cuëte cuëc tabadpondash. Adsho isashien Petedotsen cuëte cuënuec nidpondash èbi shubunquo puduednuc.

*Caipasën Esus chuimaid*  
(*Mat 26.59-66; Mad 14.55-64; Duc 22.66-71*)

<sup>19</sup> Adec èbi puduednubien Caipasën Esus chuimepondash. —Mibëd icquid ¿tedtsi iquec? ¿Èbëd icquido dëniaquecta icpec? Mibëd icquido ¿mitsipaden chuibano? —capondash. <sup>20</sup> Adoquien Esusën chuipondash. —¿Ompoquindambi chuibandio? Nuquin Papa tabadte shubu uashunaid daquënë uaidën puduedshun mambi chuiban-deneboc. Nuquin Papan chiaid chuibante shubun-shubunquiec puduedcuenequin mambi chuibeneboc. Ompoquin chiambo iccombi. <sup>21</sup> Mimbi: “Icsamboen naosh,” caid èbiuidtsëqui chuimenda. Èbëd icboedotsen chuime. Èmbi chiaid abitedi tantiashun aidombi mibi chuitieshe. Aidotsen chuime —quepondash Esus.

<sup>22</sup> Adsho tantiashun: —¿Chuiquid dapada adopaid? —quetanquin sondado chuiquidën mëdanten bëcuespondash Esus. <sup>23</sup> Adoquien: —¿Icsamboendambi chuidio? ¿Atotsimbi icsa uaoque? En chui. Mambi abimbo chuiboc. ¿Abimbo chuiquidta cuespaid? —quepondash Esus. <sup>24</sup> Adondash Esus Anasën abi cataniacchobi Caipasën shubuno bëac.

*Petedon: Èmbi isacmaid Esus nec, quequin chuioaid*  
(*Mat 26.71-75; Mad 14.69-72; Duc 22.58-62*)

<sup>25</sup> Adnubien Petedo abi cuëte cuëc tsadsho abëdtan cuëte cuëc tabadquidon: —Esusbëd icquidien mibi nechitec —capondash. Adoquien Petedo: —Padenquo. Mabi aidbëd icambo yoc —quepac caondash. <sup>26</sup> Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien <sup>27</sup> padpidec: —Padenquo. Mabi ano nidambo yoc. Èmbi isacmaidquo ma Esus neyoc —quenubien Esusën chuiboedquo cachina bënë cuëdampac caondash.

*Pidato caidën shubuno Esus buanaid*  
(*Mat 27.1-2; Mad 15.1-5; Duc 23.1-5*)

<sup>28</sup> Adnubien Caipas aton chuiquid utsibobëd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbëd pec tabadtiapimbo icchitomane —quiash Pidaton shubun puduedenquo icpondash. <sup>29</sup> Adnubien Pidaton aton shubunuësh puduentanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien <sup>30</sup> —¿Bëdambo icquidtambi mibi ismenuen bëdio? Con matses chuiquid dapa ictiadquo icquin icsamboen naoshe. Cuidquiota —quepondash chieshëmënkuido. <sup>31</sup> Adoquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Èmbi cuidquin unës uacsho isash min matses chieshtonoshe. Min matsesën: “Con matsesënuidtsëqui unës uaquin cuidaquien bëdambo ictsiash,” qeshun èbitedi chieshënushe —quepondash Esus chieshënkuido Pidatombo

Esus unës uametiadquio yec. <sup>32</sup> Ënden abi chieshënquidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuc adpondash.

<sup>33</sup> Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien <sup>34</sup> Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash.

<sup>35</sup> Adoaquien Pidaton: —¿Isadaidbodabi nedi? Padenquio. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien <sup>36</sup> Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

<sup>37</sup> Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiatsiandac —quepondash Esus.

<sup>38</sup> Adsho tantiash Pidato: —¿Tsuntsin matses uaquid quequin abimbo chuiPATSIASH? —quetanec puduenshun Esus chieshënquido chuiOapondash. —¿Icsambo icquidta Esus nedic? Ma icsapenquio icquid neyoc. <sup>39</sup> Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniandambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: <sup>40</sup> —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënquido Esus unës uamete bunquiec.

## 19

### *Esus cueshcaid*

*(Mat 27.27-31; Mad 15.16-20)*

<sup>1</sup> —Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoaquien buanshun sondadon canite cuëshë dëdectanquin nacne- naid cueshcanten Esus comapenen cueshcapac caondash. <sup>2</sup> Cueshcatanquin pinchuc- pinchucpambo icquid mauete nacnenaid Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: <sup>3</sup> —Adec dasiuidquid chuiquid dapambo nec —quequin sondadon Esus mamënshumpac caondash. Aden mamënshunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

### *Esus unës ua, quiaid*

*(Mat 27.15-26; Mad 15.6-15; Duc 23.13-25)*

<sup>4</sup> Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique — quepondash Pidato. Adnubien <sup>5</sup> Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduenshobien Pida- ton: —Is. Mimbi bëboed choeque —cac <sup>6</sup> chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuëdec. Adoaquien Pidaton: —Mimbi cuesten dectanquin unës uatan. Ëmbimbo adotiapimbo iquebi. Icsapenquio icquid icsho Esus unës uatiapimbo iquebi —capondash Pidaton.

<sup>7</sup> Adoaquien Esus chieshënquidon: —Con matsesën: “Nuquin Papa muauaquid unës uaquid yendac,” cacpadomboen natiadquio iquebi. Esusën: “Nuquin Papan Madombo

nebi,” quequin Nuquin Papa muauaoshe. Unës uaquimbien ictiad –quepondash. <sup>8</sup> –“Nuquin Papan Madombo nebi,” quiosh –quesho tantiashien Pidato dacuëdquiec yampac caondash. <sup>9</sup> Adash aton shubun Esusbëdi puduedoashun Pidaton Esus chuiopondash. –¿Tsutsimbo ne? ¿Mitsiuëshquio chonda? –caqui Esusën ëcbedenquio icpondash.

<sup>10</sup> Aden ëcbedenquio yac nëishashien Pidato: –¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiash. Ëmbi: “Cuesten dectanquin unës ua,” cac mibi adotsiashe. En chui –caquien Esus: <sup>11</sup> –¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi ëbi cuesten dectanquin unës uametiapimbo ictsiac. Ëbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec –quepondash Esus.

<sup>12</sup> Adsho tantiashien Pidato: –Esus unës uatiapimbo icchitebi. Cuemetiadquio iquebi –quetanquin padpiden Esus chieshënquido chuitanoapondash. –Esus cuemenu –caquien: –Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaguec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua –quecuededpondash. <sup>13</sup> Adsho tantiashun Esus pudue-meoatanec cuënote nacnenaïd abuc tsadunaïdën cuidte chuïnuec tsadten tsadtopondash Pidato. Aid cuënote nacnenaïd con onqueten Cabata capondash. <sup>14</sup> Nuquin Papan matamiampid inchësh tantiante ushë badiadash icnuc niondash. Aid tsadten tsadtoshon Pidaton: –Në mibi chuiquid dapa iquec –capondash iccuededquido chuiquin.

<sup>15</sup> Adoquien: –Cuesten dectanquin unës ua. Nëbimbobi buanshun cuesten dectanquin unës ua –quecuededpondash Esus chieshënquido. Adoquien: –¿Mibi chuiquid dapadambi cuesten dectanquin unës uape? –Pidaton caquien Esus chieshënquido: –Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua –quecuededpondash Esus chieshënquido. –Nuquin Papa yacnuësh choshon nuqui yuaquido cuemepashun –queboedobi adondash abi yuaquidi chiequi.

<sup>16</sup> Adoquien Esus chieshënquidon chiacpadomboen: –Esus cuesten dectanquin unës uatan –capondash Pidaton aton sondado chuiquin.

*Cuesten dectanquin Esus unës uaid  
(Mat 27.32-56; Mad 15.21-41; Duc 23.26-49)*

<sup>17</sup> Adoac buanquin: –Nëïdën dectanu –queshun sondadon cueste daëd napotiaïd Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. <sup>18</sup> Ambo nidshun aton dashcute dachictanquin bëchun shuïn mëtoccaquinc tatoccaquinc catanquin cueste daëd napotiaïd ambi bëboedëmbi Esus dectampondash. Icsambo icquid daëdpambo cuesten dectanaïd uquë diadbudcuenec diadnuc Esusquio nënantanquio dectampondash.

<sup>19-20</sup> Adnubien Pidaton: –Nasaded yacnuësh caniquid yec Esus isadaïdbo chuiquid dapa nec –quequin cueste pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaïd cuesten dectampac caondash. –Ëmbi dada uaboed isash: “Isadaïdbo chuiquid dapa icsho Esus cuidac,” ma abitedi quenu –queshun Pidaton adopac caondash. Aden dada uashun dectanaïd isashien Esus chieshënquido nëishquiopac caondash. –Shubu dadpen icquid Edusaden caid anoentsëqui Esus dectanaïd icnuc matses utsin onqueten-onquetenquien dada uaid matses dadpenshun isnushe –quiash <sup>21</sup> Pidato chiec nidpac caondash. –Icsamboen chuiquin ma mimbi dada uapacboc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaïdbo matses chuiquid dapa nebi,’ quequid



Esus nec,” quequin cuate cuëshë utsin dada uata –caquien <sup>22</sup> –Padi. Mambi ëmbi tantiaboedquio dada uaboc. Utsi uain dada uaoatiapimbo iquebi –quepac caondash Pidato.

<sup>23</sup> Adnubien Esus dectanquido sondado daëd-daëdquiec icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash.

<sup>24</sup> Adquid icsho isun: –Canchenquio icquin ¿tsundanquio bedequé? Isnuna –queshun abi cuëmëdquidtedi dada uabanshun tëshun sandoshon cadotanequin dada uaidëmpi abia puduemaiid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemaiid isnuen naosh,’ quependac,” quequin dada uapampic.

<sup>25</sup> Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. <sup>26</sup> Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. –Nëid con mado cata, tita. Ma mibi bëdamboen dayun uanu –capondash Esusën. <sup>27</sup> Adshumbic ëbitsen chuiquin: –Con ta tita cata. Adshun bëdamboen ëbi dayun uashunta –cac con shubunobi buanondambi bëdamboen Esus dayun uashunuen.

<sup>28</sup> Adboshien unësquionoshi Esus: –Con Pan chiapadomboen nainembi. Matses tantiec ëbided cuidadec unësebi –quequin tantiec con tsusedpan dada uaqin chuiampicpadec: –Acte bundobi –quepondash Esus. <sup>29</sup> Adsho tantiashun matsun acte mucambo icquid anidquid shapu-shapupactsëcquidën punshun cuate dëdectanshun abuc sananquin ëccuëscadonetsëcquin chishmepondash. <sup>30</sup> Adoac acte mucambo icquid chishtanequin: –Con Pan chiapadomboen nainquiombi –quepondash. Adtanequi tédquëdbudpondash Esus unësequi.

### *Esus uinte masiaid*

<sup>31</sup> Adnubien Esus chieshënquido: –Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu –queshun Pidato chuitampac caondash. –Baded nidte podquënquin unës uame. Inchësheque –cac <sup>32</sup> Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen. <sup>33</sup> Adotanquin isquien Esus ënden unësac. Adshobien nidte podquënenquio icpondash.

<sup>34</sup> Adotanquimbic: –Unësabi icnushe –queshun: –Unës uaqiobono –quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. <sup>35</sup> –Adosho ëmbimbo isondambi –caimbi. –Ëmbi dada uaid isun ma Esus tantianu –queshun abimbo chuiquin dada uaombi nëid dada uaqin.

<sup>36</sup> Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. <sup>37</sup> Adembidi podo ansete dada uapampic. “Ambi podo anseboed isec tabadendac,” quequin dada uapampic.

### *Esus unësacsho chococaid*

*(Mat 27.57-61; Mad 15.42-47; Duc 23.50-56)*

<sup>38</sup> Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: –Esus tantiaquid nebi –quequin utsibo chienquio icboedëmbi Pidato chuitampac caondash. –Esus chococanun buanendambi –cac: –Ai –cac Esus buampondash. <sup>39</sup> Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc

bëac caondash. <sup>40</sup> Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquin. Adshumbic padpiden dabiunoaquin. Adshumbic dataneoquin. Chococanun con matsesën adoquid. <sup>41-42</sup> Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —queshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

## 20

### *Esus uincuenaid*

(*Mat 28.1-10; Mad 16.1-8; Duc 24.1-12*)

<sup>1</sup> Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. <sup>2</sup> Cuënote dapa bëcunepamboen shëcniacsho istanec titinquier nec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

<sup>3</sup> Adoaquini: —Istanu —quianec <sup>4</sup> titinquier nec chococacno Petedobëdi nidpondac. Petedo nianec ëbia nidpondabi. <sup>5</sup> Adshumbimbi puduedenquio icquin shëcuë anshuebudshun anispondac. Adshun isquien dashcute dataniaiduidtsëqui uec. <sup>6</sup> Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. <sup>7</sup> Në dataniaid uenubi udictsëc dashcutempi bëpucaid bëdamboen shëbunaid uiondash. <sup>8</sup> Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec. <sup>9</sup> —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquio icboedi adondabi. <sup>10</sup> Aden istanec ëbi ushboconbidi chiec choapondabi.

### *Esusën Madia Mactada yacnocquid ismiaid*

(*Mad 16.9-11*)

<sup>11</sup> Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien <sup>12</sup> Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. <sup>13</sup> Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec <sup>14</sup> auchbidi nidnuec bidiadshun isquien Esusquio icpec. Utsi dansho <sup>15</sup> Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquibidi chuiquimbi.

<sup>16</sup> Abi adoshobien Esusën: —Èbi nebi, Madia —cac bëisquotanequien: —Esus nec. Èbi chuiquidquio nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho. <sup>17</sup> Aden abi dayumbudshobien Esusën: —Èbi dayunenda. Padpidec nidenquio icte danquin ëbi dayunenda. Èmbi chuibocpadec con Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuibocquid chuitan. “ Nuquin Papa yacno

nidendabi,' quiosh," catan —quepac caondash Esus. <sup>18</sup> Adoaquien ëbi chiec Madia cho-pondash. —Nuquin Icho Esus isombi. Uincuenaccosh. Ambi chuiboed chuinu. Tantia —quequin Esusën abi chiaidquio chuituidpondashi Madian Mactada yacnocquidën.

*Uincuenashun Esusën abëd icquido ismiaid*  
(*Mat 28.16-20; Mad 16.14-18; Duc 24.36-49*)

<sup>19</sup> Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënquido dacuëdënquin umanucuësh utsi puduedtiapimbo icnuc bëdamboen bëtashash tabadnubien shëcuënuësh puduedenquio icboedi nuntanquiobi Esus isadcuempondash. Adtanequien: —Dacuëdenda —quepondash. <sup>20</sup> Adtanquin abi bëchun shuin mëtoccaid abi podo ansiaidbëdta ismiaquini cuishonquiampondac: —Nuquin Icho uincuenac —quiash. <sup>21</sup> Adec cuishonquesho isashien ambi chuibocpadebidi: —Dacuëdenda —quetanec: —Tantia. Mibi chuinu. Con Pan: “Matses chiec nid,” ëbi caondacpadomboembidi: “Ëbi chuibeneta,” mibi caimbi —quepondash Esus. <sup>22</sup> Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. <sup>23</sup> Mibëd icquin Nuquin Papan tantiaidquio tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboembidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquio yanoaondash.

*Esusën Tomas ismiaid*

<sup>24</sup> Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash. <sup>25</sup> Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë mëdanten bëmishquinc podo ansiaid bëmishquinc caquioshombimbi: “Ai, nuquin Icho uincuenac,” quequin tantiatasiac. Padambobi: “Con Icbobien niash,” quetiapimbo iquebi —quepondash Tomas. <sup>26</sup> Tomas adbon 7tedec ushash shubu nuntambidi tabadoaondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queoapondash. <sup>27</sup> Adtanequien: —Is con mëdante, Tomas. Shëcuë bëmishhec cho. Në podo ansiaid iqueque. Aidsen bëmishhec cho. Adshun: “Uincuenabien icchitash,” queboedëmbi: “Uincuenaccosh,” quequin tantiatata —caquien <sup>28</sup> mishenquio yec badedi: —Tso. Con Icbombo ma mibi neyoc. Nuquin Papapadquidquiobidi ma mibi neyoc —quepondash Tomas. <sup>29</sup> Adsho tantiasien Esus: —Ëbi isun: “Nuquin Papapadquidquiobidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquiobidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

<sup>30</sup> Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. <sup>31</sup> Padi, aidtedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantias ma Nuquin Papa yacno abëd tabadtequido icpanu —quequin aidtedi dada uaombi.

## 21

*Chian cuëmanuësh Esus isadoaid*

<sup>1</sup> Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. <sup>2</sup> Esus uincuenash daëdec isadan con nidaid

Cadidia caid yacno nidanepondabi. Nidaniash nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aidtedi icpondabi. <sup>3</sup> Adnubien Petedo: —Ëmbi bedtenecpaden nëshaidën nuëcquid bedtanu — quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

<sup>4</sup> Badiadquionobi acte cuëman masi dapan Esus nidsho istuidpondambi. Utsiembi dampondac. <sup>5</sup> Adshobini Esusën cuëmpondash. —Con utsibo çtedtsi bedo? —cac: — Padambo. Nibëdosh —capondambi. <sup>6</sup> Adsho tantiashun: —Mimbi nëniauc nënenquio icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

<sup>7</sup> Adsho isumbimbi: —Ma Esus neyoc, Petedo. Nuquin Icbo nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. <sup>8</sup> Èbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiontsëc nidondabi. <sup>9</sup> Tsyuec choash pudundoshon isquien pambëdi nuëcquid cuëten shëadtsec. <sup>10</sup> Adnubien Esusën: —Mimbi bedboed daëdpactsëc beccho. Penu —cac <sup>11</sup> Petedo: —Ai, bedtanu —quianec nidash cano anidtoashon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadtsëcquio icnuc indondambi.

<sup>12-13</sup> Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —çTsutsi ne? —quenquio icquin: — Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. <sup>14</sup> Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

### *Esusën Petedo chiaid*

<sup>15</sup> Aden chian dapa cuëmanshun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc çada ëbi tantiaquie? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantiash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacbimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta — quequin tantiec adpondash. <sup>16</sup> Adshumbic padpiden: —çAda ëbi tantiaquie, Petedo? —cac: —Ai, mambi mibi tantieyoc —quesho tantiashien padpidec: —Ëbi tantiaquin con obecabimboecquido ëbi dayun uashunta —queoapondash Esus. <sup>17</sup> Aden daëden chuishumbic padpiden Esusën: —çAda ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icbo nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho tantiash Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

<sup>18</sup> Adashic Petedobidi chuioaic: —Tantia. Utsien chuinu. Cania yec mibibi tsiuidondac. Adanec mibi bunacno mibi nidtedniondac. Tsusiobudtsacshoen tsiuëshun utsibon ëquë mëdimbudcuentsëcshun mibi nidte bunacmanombo mibi buanendac — quepondash Esus. <sup>19</sup> —Aden mimbitsen Nuquin Papan chiapadomboenuidi nabansho



ëbi chieshënquidon mibi unës uaindac –quequin tantiec adpondash Esus. Adashic: –  
 Ënenquio icquin ëbi tantiata –quetanquimbic: –Cho. Nidnu –cac ëbitedi puduanec  
 nidondabi.

<sup>20</sup> Tsyuec nidshobini Petedon bidadquin ispondash. Adshumbic: –Nëid Esusën  
 tantiaidquio nec. Esus bedmiaid inchëshën Esus aton cachoçtsëqui uesho aidën: “¿Tsutsi  
 cao, Icbo?” capondash. <sup>21</sup> ¿Mitsipadec aid unëspatsiash? –queshun: –Ma nëid. ¿Mitsipadec  
 unëspec? –capondash Petedon ëbi unëste Esus chuimequin. <sup>22</sup> Adoaquien Esus: –  
 Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma  
 unësenquio icnu,” ëbi quiacpadec unësenquio ictsiash. Adecbidi: “Ëbi choabi icnuc  
 ma unëspanu,” ëbi quiacpadec unëstsiash. “Nadec unësendac,” quequin mibi chienquio  
 iquembique. Ënenquio icquin ëbi tantiata –quepondash Esus. <sup>23</sup> Adec: –Unësenquio ictsi-  
 ash –Esus qesho tantiash ëbi caic: –Esusën tantiaidquio yec Uan unësenquio iquendac  
 –quecuededpondash Esus tantiaquido. ¿Adenda Esusën chuidiondash? Ma padenquio  
 iccondac. –Ëbi bunacpadequi aidi unësendac. “Ëbi Nuquin Papa yacnuësh choabi  
 yacpadec ma unësenquio icnu,” ëbi quiacpadequien unësenquio ictsiash. “Adecbidi ëbi  
 choabi icnuc ma unësnu,” ëbi quiacpadec unëstsiash –quequien iccondash.

<sup>24</sup> Aden Esusën nabanondaid ënquin chiombi. Ëmbi isondaidquio chuiquin abimbo  
 chuiquin aidtedi dada uaombi. <sup>25</sup> Esusën naidtedimbo chuiquin dada uambo iccombi.  
 Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada  
 uaquin dada uate dadpenquioshë naimbudnetsiambi. Padi. Aidtedi dada uaombi.

## ESUS CHUIBENEQUIDON NAID

### *Esus aton Papan abuc indote*

<sup>1-2</sup> Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. <sup>3</sup> Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. <sup>4</sup> Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. <sup>5</sup> Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

<sup>6</sup> Adshumbic, padpidec Esusbëd icquin abëd icquidon: —Yuen matses utsibon nami-aido nuquin matses nec. ¿Nëbimbobida mibi nuquin matses chuiquid dapa icpeque? Tantaranu. Chui —capanëdash Esus chuiquin. <sup>7</sup> Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. <sup>8</sup> Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

<sup>9</sup> Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

<sup>10</sup> Adec Esusbëd choboedo isec tabadnubien dashcute ushumbocquid dasiuidquid daëd choash tabadec: <sup>11</sup> —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

### *Matias Esus chuibeneta quequin iccuededquidon chiaid*

<sup>12</sup> Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec aidtiontsëqui capunëdash. Aido Edusaden yacno choash abuc quënë yacno abi tabadbocno dectatoash tabadoapanëdash. <sup>13</sup> Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaid-pembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid quënë nuntan tabadnubi <sup>14</sup> utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

<sup>15</sup> Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: <sup>16-17</sup> —Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash. <sup>18</sup> Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquish paëdec aton pucu

tishidpac caondash. <sup>19</sup> Pucu tishidec intac chiuidaaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash. <sup>20</sup> Adembidi ëndenquimboshë Udas pado tishabicnuc chuiquin Nuquin Papan Mayanën tantiamiac-padomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aibidi aton matses nibëdquid shubu icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden tanenquiocquin ma utsin bëdamboen napanuna,”

quequin Dabid padon dada uapampic —quepanëdash Petedo. <sup>21</sup> Aden chiashic abi onquec: —Udas pado nibëdnuc Esus chuibeneta quequin abentsëc nuquidtedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia. <sup>22</sup> Esus Uan padon acten mentosho isash niamëdenquio yec Esusbëd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

<sup>23</sup> Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuipanëdash aidon. Ambì istuidaaid abentsëc Ose cashun Badsabas cashumbic Üstus, quequin cuënaid nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec, qesho tantiaashun: —Nënantanquio tabadec cho —cac abi daëdi choash tabadsho isash <sup>24</sup> Nuquin Papa chiec nadec iccuededquido onquepanëdash: —Nënantanquio chomeboed nëid daëd iqueque. Is, Papa. ¿Mitsicquidimbi Esus chuibeneta, cape? Èbitedi tantiamë, Papa. <sup>25</sup> Udas pado taidtiadpambo chian anëdënquiacno nidboedën nauidaaid namenu, quequin mimbi bëdamboen isaid abentsëc ëbi isme. Papa. Aden mimbi ismiac ma aidëntsen Esus chuibenepanuna —quepanëdash Nuquin Papa chiec. <sup>26</sup> Aden chuitanquimbic aid daëd abi cuëmëdquid abentse-abentsen dada uatempin dada uashumbic tëchun sandoshon cadotaniac dada uatempi abia puduenaid istanquin, Matias cuëmëdquid nec, quequin isbededboshic, Esusën ëbi chuibeneta caido onseted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

## 2

### *Aton Mayan Esus tantiaquidtedi menebanaid*

<sup>1</sup> Adashic isadaidbon ambi aton tiedën caniquid abia ëshëaid bedaid tantiaaid ushë chotsëcnubi Esus tantiaquidtedi shubunuëshi iccuededoapanëdash. <sup>2</sup> Ambo iccuededquimbi badedquio shubu nuntan cunquequid dapa choec natiambo cunquiacbimboecsho abitedishun isbededpanëdash. <sup>3</sup> Aden aid isbedednubi cuëte dëtsisidacimbocquid budec mais-maisec Nuquin Papan Mayan matsadtocuededpanëdash abi isquidtedi. <sup>4</sup> Nuquin Papan ma aidobëd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanëdash ambi matsadtomiaidotedi.

<sup>5</sup> Aden Nuquin Papan aton Mayan menenubien isadaidbo utsibo Edusaden yacno cho-choash dadpen tabadpanëdash. Aido Esus tantiesabo yequi aton tsusedpabon chiampicpaden nanuec nidaaid utsi-utsiec yacnoësh Edusaden yacno cho-chopanëdash.

<sup>6</sup> Ambo cho-choash tabadnubi Nuquin Papan aton Mayan meniaid-meniaidquiec nëmbobi choquidon onqueten-onquetenquiec onquesho tantiaash nëbi cho-choboedo utsi-utsiec: <sup>7</sup> —¡Padtec! Dacuëdanquiopaic. Èbipadquiecshenda onquepec. ¿Onquequidotedi nidaaid Cadidia yacnocquidoda nepec? <sup>8</sup> ¿Mitsipaden con onquete bedash onquecuededpec nec? <sup>9</sup> Èbitedi nidaaid utsi-utsiec yacnoësh cho-choquido nebi. Padtia yacnoësh

choquido; utsibic, Media yacnoësh choquido; utsibic, Edan yacnoësh choquido; utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh choquido; utsibic, Ponto yacnoësh choquido; utsibic, Asia yacnoësh choquido; 10-11 utsibic, Pidiquia yacnoësh choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene udictsëcuësh choquido; utsibic, shubu dadpen icquid Doma caid yacnoësh choquido; utsibic, acte nënantan nidaid nacnëdquid Quideta caid yacnoësh choquido; utsibic, Adabia caid yacnoësh choquido. Isadaidbobëd isadaidbopadquio icnuequido Edusaden caid yacno tsusedpabon chi-ampicpaden nanuec cho-choboedo ëbitedi nebi. Ëbibimboec onquequidtedishun Nuquin Papan naid chuibansho tantiembi. <sup>12</sup> ¿Mitsipaden tantiaquin oncamiaquien adec onquepec? –quepanëdash Edusaden yacno cho-choquid.

<sup>13</sup> Adnubien: –¿Bëdamboec onquepequida onquec? Paëmbocquid cubudquin acshun tantienquiocquido nepanui –queoapanëdash utsibo.

### *Iccuededquido Petedon chuibanaid*

<sup>14</sup> Adec onquesho tantiashun Esusën ëbi chuibeneta caido cho-choquin Petedon nidtoshon tantiamenu quequin naden cho-choboedo comapenec onquequin chuipanëdash: –Mimbi icsamboen tantiaid chiembique. Tantiata. <sup>15</sup> Ushë abuc-totsëcnubi ëbitedishun paëmbocquid acamboccombi. <sup>16</sup> Utsin-utsinquec onqueten onquesho mimbi tantiaid Nuquin Papan ëndenquimboshë chiampicpadec onquec nebi. Tsusedpa Oedëmbi Nuquin Papan ma matsesbëd tabadnueshun aton Mayan menenun chiaid naden aidën dada uampic:

<sup>17</sup> ‘Nëid nidaid naimbudnubi

Con Mayan matses utsi-utsien menendambi.

Aidon madobobëdtan aidon champibontsen ëmbi yuecquio icshun nanun chiaid chuibanendac.

Adembidi caniabontsen ushquin ëmbi chiacpaden isendac.

Adembidi tsusiobontsen ushquin ëmbi chiacpaden isendac.

<sup>18</sup> Aden con Mayan meniac ambi tantiacpadomboembidi ëmbi chuiquin namiaidon dadan chidobëdtan

ëmbi yuecquio icshun nanun chiaidquiobidi chuibanaindac.

<sup>19</sup> Adembidi, con Mayanën tantiamiac ëmbi yuecquio icshun nanun chiaid matsesën chuibanubien abucüësh uinsadpamboctequid icnubi

nidaidënsnun ismete intacimboectequidbëdtabi nëdënquetequid cuëte pushudquidbimboectequid abembi pushudquidbëdta adquidtedi mibi ismendambi.

<sup>20</sup> Adquid icnuc badiadën ushë chënquenquiocnoc

inchëshacimboectequid inchëshën ushë piu-piupambo yec intacimboecsho mimbi isbedendac.

Ëmbi ismiaidtedi icambi matses cuidte ushë choendac.

<sup>21</sup> Ismequimbi con Icbombo nec ëbi caquidquio mënchiquendambi,

quequin Nuquin Papan chuimiapaden Oedën dada uapampic.

<sup>22</sup> ‘Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. <sup>23</sup> Aidi Nuquin Papan tantiampicpaden Esus bedshun mimbi isadaidpembo chuiquid menequin, Unës uata, cac cuesten dectanquin Esus unës uapanëdash. <sup>24</sup> Aden mimbi nac unësacsho icsaisa chococacno yuec ictiapimbo iquec,

qeshun Nuquin Papan Esus uincuemapanëdash. <sup>25</sup> Adembidi ëndenquimboshë tsusedpa Dabid padon Esus chuibanquin naden dada uapampic:

‘Con Icho abuc nidec bëyucanquid ëbëd tsadacimboecsho isec nebi.

Aidi con dayun tsadquid icsho isquin natiaic cametequid dacuëdënenquio iquendambi.



26-27 Aid unēsash uincuenta tantiec ëbitsen uincuenendabi, Papa, quec cuëdēnec bēdambo iquebi.

28 Nuquin Papa yacno tabadacpadec nidaidën tabadquin ismiac mibi yacno nidash mibēdi tabadec bēdamboshē iquebi mimbi camiaid iquendabi, quequin Esus tantiaquin Dabid padon dada uapampic.

29 “Adomboen tantiaquin dada uash Dabid unēsacsho chococapampid nēbi shēcuë iquec. 30 Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ëndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. 31 Aden Nuquin Papan nanun chiaid tantiaquin Esus uincuenta isacbimboen dada uaqin, Nuquin Papan Chomiaid unēsacsho chococaqui aton nami chodquenquio yec uincuenendac, quequin chuiampic Dabid padon. 32 Ai, Dabid padon chiampicpadembi Nuquin Papan Esus uincuemepanēdash. Aid uincuemiacsho isondaic icquin mibitedi chuibanec nebi. 33 Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Mayan ma aidbēd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquiec onquesho nēbi mibitedishun tantiec. 34 Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icho Dapa icquin abipadquid icbo cain: Nēbi ëbēdi tsadec cho.

35 Mibi chieshēnquido dēniacquidquio mibi icmenun nabono. Chiata, quequin Nuquin Papan nanun chiaid Dabid padon dada uapampic.

36 “Aden tantiaquin Dabid padon chuiampic Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ëmbi chiaid abimbo iqueque. Esus tantiaquidquio icta, isadaidbo – quepanēdash Petedo.

37 Aden Petedon chuisho tantiash iccuededquido abi icsaid tantiec unēsquio yec: – Esus tantianuequin ¿atotsi nuqui nape? – quepanēdash utsi-utsiec Petedobēdta Esusën ëbi chuibeneta caid utsibo chiec.

38 Adoquien Petedo: –Mibi icsaid ënshun, Esus con Icbombo nec, quequin abimbo tantiaquin acten mentometa ma ëbi icsaid Nuquin Papa bēpiscudnu queshun. Adoacsho aton Mayan mibi menendac. 39 Adembidi tantiasho isun min tsyuecquidtsen menendac. Adembidi nidaidtedi yacnocquidën tantiasho isun aton Mayan meneoaindac ambi chiampicpaden – quepanēdash Petedo Esus isquidquio.

40 Aden chuibanequi: –Mimbi icsamboen tantiaid ënta. Aden ënash Esus tantiaquidquio icta – quequin chuibudquin Petedon ëmpañēdash.

41 Aden chuisho tantiash, Tantiaquiembi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampanēdash.

### *Esus tantiaquido iccuededaid*

42 Adashic, Esus tantiembi, queboedo tantiabenabi iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepañēdash. 43 Adec tabadcuededsho isash: –¡Padtembo! Dacuëdampambo iquec – quec utsibo tabadpañēdash. Adnubien Esusën ëbi chuibeneta caidon nadatiambocquin nabampanēdash. 44 Adnubien Nuquin Papan aton Mayan meniaidtedi tabadcuenequi, Con

na nec, quenquiocquin aton na cudasenquiocpanēdash. <sup>45</sup> Aton na menequin piucquid bedshun utsin na nibēdsho isun menepanēdash. <sup>46</sup> Adecbidi badiadquidēnbadiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utsiec yacno nidash iccuededquin Esus unēsaid tantiaquin panēmpi cuēsh-cuēshun peded-pededpanēdash. Adembidi bundoshon pebededoapanēdash. Adobanequi ēbi icsaid bedshunash Esus cuidadaid tantiec bēdambo iquebi, quec <sup>47</sup> Nuquin Papan naid chiec cuēdēncuededpanēdash. Adec tabadsho isash, Bēdambocquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

### 3

#### *Caputiapimbo icquid bēdamiaid*

<sup>1</sup> Adnubien abi nidteniacpadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash. <sup>2</sup> Ambo nidnubien caputiapimbocquid aid shubu shēcuē Bēdaidquio caid yacno utsibon buampanēdash. Anin tishacchobi yec caputiapimbocquid icpanēdash. Aidi badiadquidēnbadiadquidēnquien buandenequin aid shēcuē cuēmano nanded-nandedac uequimbi cho-chosho isun: —¿Adabi piucquid menetsia? —cabampanēdash. <sup>3</sup> Ambo Petedobēd Uan chosho isquin: —¿Adabi piucquid menetsia? —capanēdash caputiapimbocquidēn uequin.

<sup>4</sup> Adoaquien Uambēd nidtuidash nidquin Petedon: —Ēbi daēdi is —capanēdash caputiapimbocquid bēisquin. <sup>5</sup> Adoaquien, Ēbi menepashun, quequin abi daēdi isobien, <sup>6</sup> Petedon: —Piucquid con na nibēdec. Ēmbi tantiaidēn ēbi tantiamebocpaden naimbique. Nasaded yacno iccondaidēn Esusēn bēdamiacpadec bēdanash nidtoash nidec nid —capanēdash. <sup>7</sup> Aden chuiquin caputiapimbocquidēn mēdante abiucquio bedtanquin Petedon nidtomiac badedquio nidtopanēdash caputiapimbochoedi. <sup>8</sup> Bēdambo yec nidtoash capupanēdash. Adec bēdanash Petedobēd Uan chedobēd capuashic Nuquin Papa tabadte shubu uashunaidēn puduedash, Nuquin Papan bēdamioshi, quec pudundotanpudundotanec: —Cuishon —quepanēdash. <sup>9</sup> Adec capusho isquidon nadobededpanēdash: <sup>10</sup> —Nuquin Papa tabadte shubu uashunaid shēcuē, Bēdaidquio caid yacno uetsequi, Piucquid ēbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanēdash.

<sup>11</sup> Adec capuequi Petedobēdta Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash. <sup>12</sup> Adec tabadsho isun Petedon naden chuibampanēdash: —¿Atotsi quiash padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdambocquid icquindambi nadio? Padenquio. Nuquin tsusedpabon Papa caidēn bēdamiaid nec. <sup>13</sup> Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. <sup>14</sup> Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. <sup>15</sup> Abia uincuentequid mibi chuiquid dapa mimbi unēs uacshobien Nuquin Papan aidi uincuemepondash. Aid uincuenacsho ēbitedishun isondambi. <sup>16</sup> Esusēn ēbi bēdamepec, quequin tantiash nēid taē icsacboedēn Esus tantiash capusho mibitedishun isec.

<sup>17</sup> “Utsibo, Nuquin Papan chomiaid nec, quequin tantienquiocquin mibi chuiquidobēdtan mimbi Esus unēs uamiondac. <sup>18</sup> Ēmbi matses chuiquid dapa icmenu caid matsesēn mēyanaid iquendac, quequin ambi chuimiaidtedi Nuquin Papan dada

uamiampicpaden mimbi naondac. <sup>19</sup> Nēbi mimbi icsamboen tantiaid ēnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; <sup>20</sup> adecbidi ma ambi chuiquid dapa icmiaid Esus mibi bedmenuen chomepanuna. <sup>21</sup> Nuquin Papan abitedi icsaisa icmete ushē choabicnuc ambi chiampicpadequi nēbi Esus abuc aton Papabēd tabadec. <sup>22</sup> Adembidi chuiquin Moisesēn dada uampid nad iqueque. Tantiata:

‘Chuiquid Dapa ēbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

<sup>23</sup> Ambi chiaid tantiesa Nuquin Papan nēsecaindac, quequin Moisesēn dada uampic.

<sup>24</sup> “Adomboembidi Samuedēn chuibampampic. Adomboembidi Nuquin Papan chuimiaid utsibon chuibanoampic. <sup>25</sup> Nuquin Papan chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ēndenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ <sup>26</sup> Nuquin Papan Abadauan chiampicpadec aton tsyuecquid choacsho mimbi unēs uapondac. Aidi Nuquin Papan uincuemiatic ma isadaidbomba abi icsaid ēnsho ma ambi bēdambo icmiaid icpanuna —quepanēdash Petedobēd Uan.

## 4

### *Ambi naid Petedobēdta Uan isadaidbo tsusiobon chuibamiaid*

<sup>1</sup> Aden Petedobēdtan Uanēn chuibanubien isadaidbo tsusiobo cho-chopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. <sup>2</sup> Esus unēs uacsho Nuquin Papan uincuemiaticpadembi matsesten unēsacsho uincuemeoaindac, quequin Esus chuibenequidon chuibanubi chopanēdash aid. <sup>3</sup> Choshon Petedo Uambēdta bedash: —Inchēsheque. Badiadshun nēidēn chiaid tantianush nidnu. Nid —quianec puduanquimbi Petedobēdta Uan quēnēn nauedmepanēdash isadaidbo tsusiobon. <sup>4</sup> Aid daēdi bedabicnuc Petedobēdtan Uanēn chuibansho tantiaquido Esus tantiaquid dada dadpen sinco midted yampanēdash.

<sup>5</sup> Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoēsh iccuededpanēdash. <sup>6</sup> Nēidtedi icpanēdash: ancanquid dapa daēd Anasbēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aidtedi cho-choash iccuededpanēdash. <sup>7</sup> Iccuededshumbic Petedobēdta Uan bēmeshun nēnantanquio nidtomesun: —¿Tsutsi chuiquin caputiapimbocquid bēdamio? —capanēdash tsusiobon.

<sup>8</sup> Adoquien Petedo Nuquin Papan Mayanēn comapenen tantiamiac nadpanēdash: <sup>9</sup> —Caputiapimbocquid tantiaquin bēdamiaid isec ¿mitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata. <sup>10</sup> Caputiapimbocquid Esuquidistu Nasaded yacno iccondaidēn bēdamiaid niosh. Mimbi unēs uacsho Nuquin Papan uincuemiaidēn nac nēid caputiapimbocboedi nēbi nidtoash capusho mimbi isec. <sup>11</sup> Aid bēdamequid mimbi tantienquio yaid Nuquin Papa yacno yuedanquidquio nec. <sup>12</sup> Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

<sup>13</sup> Adec Petedobēd Uan dacuēdenquio yec comapenec onquesho tantiash tsusiobo: —Aid daēdi tsusiopenquio iquequi adecbidi Nuquin Papan chiampid tantiabenabicquid iquequi Esusbēd icquid aid daēd icquin ¿mitsipadomboen caputiapimbocquid bēdamepashba? —quec tantiadempambo yec tsusiobo tabadpanēdash. <sup>14</sup> Aden ambi

bédameboed aidbēdi icsho isash, Icsamboen mimbi naoc, quetiapimbo tsusiobo tabadpanēdash. <sup>15</sup> Adshun Petedo Uambēdta nidmiash, Tantaranu, quec onquecuededec tsusiobo: <sup>16</sup> —¿Mitsipadomboen aid daēd nuqui napeba? Nadatiambocquin nasho Edu-saden yacnocquidtedishun isbededposh. Ad icnuc, Caputiapimbocquid bēdanambo iquec, ēbitedi quetiapimbo iquebi. <sup>17</sup> Dadpeshun tantianushe queshun, Esus padpiden chuibanoainda, quequin aid daēdi chuinuna —quecuededpanēdash tsusiobo. <sup>18</sup> Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

<sup>19</sup> Adoquien: —¿Mitsicquidēn chiaid ēmbi natequid icpec? ¿Nuquin Papan chiaid niacquindambi mimbi chiapaden nadi? <sup>20</sup> Nuqui isboed nuqui tantiaboedbidi chuitequidquio iquendac —quepanēdash Petedo.

<sup>21-22</sup> Adoquien: —Ēmbi chiapaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocsho bēdamepanēdash. Aid Nuquin Papan bēdamiacsho isash utsibo cuēdēncuededpanēdash. Adsho tantiash Petedobēdta Uan mēyantiadquiocboedi adoti-apimbo yec tabadpanēdash tsusiobo.

### *Isadaidbo tsusiobon chiaid Esus tantiaquidon chuioaid Nuquin Papa chiaid*

<sup>23</sup> Tsusiobon nidmiac nidash iccuededbocnombo choash puduedshun tsusiobon chui-boed Petedobēdta Uanēn chuioapanēdash. <sup>24</sup> Adoac abentsēc onquiacbimboen naden Nuquin Papa chuipapanēdash: —Con Icbombo mibi nec. Abubēdta nidaid acte chedo uashun aidēnquio icquidtedimbo mimbi uabampampic. <sup>25</sup> Adembidi ēndenquimboshē mimbi tantiapaden min Mayanēn tantiamiac mimbi chuimiaid, Dabid padon naden dada uapampic:

“¿Atotsieshumbini ēbi dēniactiapimbo icquidombi isadaidpembo comapenec nēishash ēbi dēniacte buncuededpec? Adquiecbidi ¿Atotsi quiash ēmbi chomiaid icsamboen nanushbimboec isadaidbo onqueuidoapec?”

<sup>26</sup> Ancanquidobēd chuiquid utsibo ēmbi chomiaid aton Icbobi mēyanuec iccuededec.”

<sup>27</sup> Ai, mimbi Dabid pado dada uamiampicpadembi ēnabi Edusaden yacno isadaidpembo ancaquid daēd Edodesbēd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash. <sup>28</sup> Mimbi tantiampicpadembi unēs uapondash, Papa. <sup>29</sup> Adquidēn Petedobēdta Uan chushcasha mimbi tantioc. Cuesambocquid ēbitedi icmequin mimbi chiaid ēbi chuibame, Papa. <sup>30</sup> Icsaisan Esusēn bēdamiapaden nadatiambocquin naban, Icho —quepanēdash Esus tantiaquido Nuquin Papa caic.

<sup>31</sup> Adoac abi iccuededacno ishcutpanēdash. Adec ishcutnuc ambocquid Nuquin Papan Mayanēn comapenen pausunac dacuēdenquiocquin Nuquin Papan chiaid chuibapanēdash.

### *Abentsēc yachimboec tabadaid*

<sup>32</sup> Aden chuibanequi abentsēc onquiacbimboec tabadec Esus tantiaquido, Con na nec, quenquio yec, Nuquin Papan na nec, quec tabadcueneapanēdash.

<sup>33</sup> Adequi tabadcuenequimbi dacuēdenquiocquin, Esuquidistu uincuenacsho isombi, quequin chuibenapanēdash. Adec Esus tantiaquido tabadsho utsibon bēdamboen isbededquin aidēn chuibansho bēdamboen tantiapanēdash. <sup>34-35</sup> Adembidi nidaid icbo utsin-utsinquien aton nidaid menequin piucquid bedshun Esus chuibenequido menapanēdash. Adembidi, shubu icbo utsin-utsinquien aton shubu menequin piucquid bedshun meneoapanēdash. Aden meniac aton na nibēdquid icsho isun Esus chuibenequidon menebanac bunenquio tabadpanēdash. <sup>36</sup> Adecbidi ambo acte nēnantanquio nidaid nacrēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta,



quedenesho Bednabe cuëmpanëdash. <sup>37</sup> Aidëmbi aton nidaid menequin piucquid ambi bedaidtedimbo Esus chuibenequido meneopanëdash.

## 5

### *Aniasbëd aton chido Sapida muaid*

<sup>1</sup> Adnubien dada utsi Anias cuëmëdquid aton chido Sapidabëdtan aton nidaid menequin piucquid bedpanëdash. <sup>2</sup> Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniabcimboen menepanëdash Aniasën. <sup>3</sup> Adnubien, Piucquid abitedi meniabcimboen Aniasën mua uaposh, quequin Nuquin Papan Mayanën tantiamiac naden Petedon Anias chuipanëdash: —Satanasën tantiamiaid icquin ¿mitsipaden tantiaquin Nuquin Papan Mayanën isnubi mua uaqin ëbi menio? <sup>4</sup> ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidtedi mitsana niosh. ¿Mitsipaden tantiaquin piucquid abitedi meniabcimboen meniano? Aden bëquin abimbo chienquiocquin Nuquin Papambobi mimbi mua uaboc <sup>5</sup> —Petedo qesho tantianec Anias unësequi uebudpanëdash. Adsho isash Esus tantiaquidtedi dacuëdpanëdash. <sup>6</sup> Unësacsho isun dashcute cuëshën dataneshun buanshun caniabon chococatampanëdash.

<sup>7</sup> Bënë chococambic ushë abuctoan unësboedën chido aton bëne unësaid tantienquio yec choapanëdash. <sup>8</sup> Choasho isumbien: —¿Ada min nidaid menequin nëidtedi piucquid bedo? —Petedo qesho tantiashien:

—Ai, aidtedi bedombi —quepanëdash Sapida.

<sup>9</sup> Adoaquien Petedo: —¿Nuquin Papan Mayanën ëbi muasho tantiapec, quequin tantienquiocquina min bënebëdtambi min piucquid abitedi meniabcimboen meniano? Nëbi min bëne chococaboedon mibitsen buanendac —Petedo quenubic <sup>10</sup> Petedon tayumbi uebudec Sapida unëspanëdash. Aidtsen unësacsho buanshun aton bënebëdtabi chococatampanëdash. <sup>11</sup> Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

### *Bë-bëaidtedi bëdanaid*

<sup>12</sup> Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadatiambocquin nabampanëdash. <sup>13</sup> Adomboen nabansho isash Esus tantiesabo dacuëdec tacpan yacno chotiapimbo yequi: —Esus tantiaquido bëdamboshë iquéc —quecuededpanëdash. <sup>14</sup> Adec tabadequi utsi-utsiec dadpen dadabëdi chido Esus tantiaquido yampanëdash. <sup>15</sup> Adec Esus tantiaquid yanshun, Daicsaido Petedon bëdamepec, quequin tantiaquin daicsaido bë-bëshun Petedo capuacno nambededpanëdash. <sup>16</sup> Adembidi dëuequidon Edusaden yacno daicsaid bë-bënubi mayan icsan mëyanaido bë-bëopanëdash. Aden bë-bëaidtedi bëdampanëdash.

### *Esus chuibenequido tsusiobon quënë navedmiaid*

<sup>17</sup> Adnubien isadaidbo ancaquidbëd tsusio dapa utsibo saduseyobo caid isec otacquio tabadboedi matses dadpen Esus chuibenequido yacno cho-chosho isash nëishcuededpanëdash. <sup>18</sup> Adec nëishcuededshun Esus chuibenequido bedmeshun quënë navedmepanëdash. <sup>19</sup> Aid inchëshëmbi Nuquin Papan uaid mayan bëda choshon quënë shëcuë bëtashaid bëcadoquin abitedi puduemec: <sup>20</sup> —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

<sup>21</sup> Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aidtedi. Chuibanubien isadaidbo



tsusio dapan abëd icquidobëdtambi tsusio utsibotedi cho-chomeshun: —Esus chuibanquido bedtan —cac <sup>22</sup> quënën nauedaid puduenushe quequin isquido chuiquid nidshun isquien Esus chuibenequido nibëdec. <sup>23</sup> Adsho isash choaquin: —Quënë shëcuë bëdamboen bëtashquin quënën nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënën nauedaid puduenushe quequin isquido chuiquid. <sup>24</sup> Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. <sup>25</sup> Adnubien dada utsi choshon: —Mimbi quënën nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. <sup>26</sup> Adoaquien quënën nauedaid puduenushe quequin isquido chuiquid capitán caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëoapanëdash.

<sup>27</sup> Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: <sup>28</sup> —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. <sup>29</sup> Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi. <sup>30</sup> Mimbi cuesten dectanquin unës uaondaaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. <sup>31</sup> Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna. <sup>32</sup> Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

<sup>33</sup> Aden Petedon chuisho tantiash tsusiobo: —Icsambo iquec —quiash Esus chuibenequido cuesunete bumpanëdash. <sup>34</sup> Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac <sup>35</sup> buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushe chiata. <sup>36</sup> Ëndenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. <sup>37</sup> Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udastsen cuesuniac abëd icnëdaidtedi padpidec choenquio yec adecbidi udimbo nidanepanëdash. <sup>38</sup> Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac. <sup>39</sup> Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

<sup>40</sup> Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanoainquio yec nidtan —qeshun puduemepanëdash. <sup>41</sup> Puduemiac Esus mëyanaid tantiec nidequi abi chuibanasho mëyanaid yec bëdambo iquebi, quec tabadpanëdash. <sup>42</sup> Adshumbic badiadquidën-badiadquidënkien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibanpanëdash aidon. Shubu utsi-utsiec yacno nidshun adomboembidi chuibenepanëdash.

## 6

*Niante chidobo pete menebanquid icta caid*

<sup>1</sup> Adashic badiadquidën-badiadquidënquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanëdash. <sup>2</sup> Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique. <sup>3</sup> Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bëdamboec tabadsho mimbi bëdamboen isaidquio istuidta. Adquid 7ted istuidshun, Niante chidobo pete menebanquid icta, cata. <sup>4</sup> Aidedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanëdash Esus chuibenequido.

<sup>5</sup> Adoaquien: —Mimbi bëdamboen chioc —quepanëdash Esuquidistu tantiaquid utsibo. Aidën chuibocpadembi aidedi istuidpanëdash. Nëidic, Nuquin Papan Mayanën pausunaid, ambi chiacpadomboen Nuquin Papan naindac, quequin tantiaquidquio Esteban cuëmëdquid; utsibic, Uedipe; utsibic, Pëdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuëmëdquid. <sup>6</sup> Aidedi istuidshun Esuquidistu tantiaquid utsibon aido bëdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nëidted bëdamboen nameta, Papa, quequin Esus chuibenequidon chuipanëdash.

<sup>7</sup> Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanëdash. Adecbidi isadaidbo tsusiobo dadpen bëdamboen tantiash Esuquidistu tantiaquido yampanëdash.

*Esteban bedaid*

<sup>8</sup> Adnubien Nuquin Papan Mayan meniaidënquio. ambi comapenen tantiamiaidënquio, Estebanën nadatiambocquin ismëbampanëdash. <sup>9</sup> Aden nadatiambocquin ismenuc bëdamboen tantienquio yec utsibo comapenec onquecuededpanëdash. Nëidic, Sidene yacnoësh choquido; utsibic, Adecandedia caid yacnoësh choquido; utsibic, Sidisia caid yacnoësh choquido; utsibic, nidaid Asia caid yacnoësh choquido aidedi Edusaden yacno cho-choash tabadec Estebambëd comapenec onquepanëdash. <sup>10</sup> Comapenec onquequin Esteban Nuquin Papan aton Mayan meniaid icsho aidën comapenen tantiamiac onquesho dëniacquec utsibo onquetiapimbo icpanëdash. <sup>11</sup> Onquequin dëniactiapimbo icquin utsibo naden aidon chuipanëdash: —Tsusiobo naden chiec nidtan: Estebanën nuquin tsusedpa Moises caidën dada uampidbëdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanëdash. <sup>12</sup> Aden chiac tsusiobobëd Moisesën dada uapampid paquiacquidobëd isadaidbo utsibotedi nëishcuededshun Esteban bedshun tsusiobo iccuededacno buanquin yuedshun ismëpanëdash. <sup>13</sup> Ambo abi dëniactiapimbocquidon Esteban muaquin chuita caboedon naden chuibededpanëdash: —Nëid dada Nuquin Papa tabadte shubu uashunaidbëdta Nuquin Papan Moises dada uamepampid ënenquiocquin muaquin chuibanec. <sup>14</sup> Naden Estebanën chioshe. Tantia: Nasaded yacno iccondaidën, Esuquidistu caidën Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidën dada uampid naden nata quequin chiaid natiapimboctequid nec, quequin Estebanën chuibanosh, quequin muaquin chuipanëdash Esteban dëniactiapimbocquidon chomiaidon. <sup>15</sup> Aden Estebanën chiaid muaquin chuiquin naimbudquimbi tsusiobobëdtambi comapenen Esteban bëisquin Estebanën bëtantiatie ushëbimboec ushumbo yec chënquesho isbededpanëdash.

## 7

*Estebanën chuibanaid*

<sup>1</sup> Adec Estebanën bêtantiate ushëbimboec chënquesho isec tsusio dapambo Esteban chuiquin: —¿Abimboda mimbi naid chuiposh? <sup>2</sup> —caquien yuecquio onquequin Estebanën naden chuipanëdash: —Chiembique. Tantiakiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniaid matsesën istemaid bëchomaoanquieic icquid Abadauan ismepampic. <sup>3</sup> Aden ismec nadece onquepampic: “Min utsitedi nianec nidaid utsi yacno mibi ëmbi ismenu caid yacno nidta.” <sup>4</sup> Adsho tantiash Candeyabon nidaid yacnoësh nidashic nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. <sup>5</sup> Aden chomeshun Nuquin Papan naden Abadauan chuipampic: “Nëid nidaidën mibi capuacno mitsanapenquio nec. Yuecshun mibi menenun nanuna. Mimbi tishmiambochoedi min chidon tishaid abentsëc min madombo nëid nidaid menendambi. <sup>6</sup> Nëid nidaid bedabi yec mimbi tishmiadën tishmiaid caidaido matses utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac. <sup>7</sup> Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi mëyanacnoësh nidashic nëid macuësh yacno choshon ëmbi chiacpadomboen nabanendac.” <sup>8</sup> Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bëdamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadatedi aidëmbidi shui dëbid dëtemeoapampic. Adoshombic yuecquio icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adembidi Isaquën aton mado tishacsho Acobo cuënquin aidtedecbidi ushun Isaquëntsen Acobon shui dëbid dëtemeoapampic. Adoshombic, canishun Acobon tishmiaido 12ted icpampic. Abentseabentsen tishmeshun aidtedecbidi ushun aton madon shui dëbid dëtemeoapampic. Adoquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

<sup>9</sup> Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquio icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid Ose me-neoapampic. <sup>10</sup> Adoac, Yuanu, qeshun natiamiaid Ose icsho isun Nuquin Papan aid dayun uaqin dacuëdenquio icmequin comapenen tantiacidquio bëdamboen chuiquidquio Ose Nuquin Papan icmepampic. Adquidquio icsho isun Equipito yacnocquido ancaquidën Padaon caidën Equipito yacnocquido chuiquidquio Ose icmepampic.

<sup>11</sup> “Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquieic yampampic. <sup>12</sup> Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacpadec pete bedec nidaneapampic. <sup>13</sup> Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose

quesho tantienquiochoedëmbi Padaonën tantiabempampic. <sup>14</sup> Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. <sup>15</sup> Adashic, Equipito yacno yuec tabadashi tsusio budashi Acobo unëspampic. Auëshquiobidi nuquin tsusedpabo Acobon madotedi adecbidi unësoapampic. Unësaçsho Equipito yacno chococapampic. <sup>16</sup> Adashic, yuecquio yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

<sup>17</sup> Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuiampid ushë chote anoentsëc yanuc nuquin tsusedpabo dadpen yanec caidpampic. <sup>18</sup> Dadpen caidsho isun Equipito yacnocquido ancaquid utsin Ose pado tantienquio icpampic. <sup>19</sup> Aidëmbi mua uaquin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. <sup>20</sup> Adnubien dada bacuë Moises tishacsho Nuquin Papan, Aid bëdaidquio iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. <sup>21</sup> Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesc budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. <sup>22</sup> Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

<sup>23</sup> “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesën istuidpampic. <sup>24</sup> Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneoapampic. <sup>25</sup> Embi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquio icpampic. <sup>26</sup> Badiadash aton matses yacno padpidec nidquin aton matses daëd cuesnansho istuidshun, Èmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. <sup>27</sup> Adoaquien Moises cuëscatanec: ‘¿Èmbi nasho cuidquin ëbi chuiquid tsuntsin mibi icmioshe? Chui. Tantaranu,’ quetanequi: <sup>28</sup> ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. <sup>29</sup> Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

<sup>30</sup> “Adashic, seta dadpen 40tedbidi matamec nidaid Madian caidën tabadec cuëtempiuidquio yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiacbimboecquid nënantanquio Nuquin Icbon Chomiaid tabadsho Moisesën ispampic. <sup>31</sup> Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuiampic: <sup>32</sup> ‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec istiapimbo yec Moises nidtuidpampic. <sup>33</sup> Nidtuisho isec Nuquin Içbo Moises chiec nadpampic: ‘Nëmbi ëbi icsapenquio icquid icnuc caputemaid nidaid iqueque. Min tapucudte chicshun tantiata. <sup>34</sup> Min matses ëbi cudasaido Equipito yacnocquidon mëyanac uëshquec shubiquisho



tantiashun aido Equipito yacnoshon buanta mibi canuec chobi. Nēbi Equipito yacno mibi nidmeoaimbi,' quepampic Nuquin Icbo Moises chiec.

<sup>35</sup> “Aden cuētempi nēdēnquiacbimboecquid nēnantanquio icboedēn Nuquin Papan Chomiaidēn isadaidbo bēyucanquin buanquid icta cac: ‘¿Ēmbi naid icsho cuidquin ēbi chuiquid tsuntsin mibi icmioshe? Chui. Tantianu,’ abi caondaido bēyucanquin buanquid Moises icpampic. <sup>36</sup> Adquid Nuquin Papan icmiac Equipito yacnoshon aton matses bēyucanquin buanun Moisesēn nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibēdquiec yacno seta dadpen 40tedbidi matamec abi tabadcueniachnoshontsen nadatiambocquin nabanquin isadaidbo Moisesēn ismeoapampic. <sup>37</sup> Aidēmbi naden chuipampic: ‘Yuecquio icshun ēbipadquid mimbi tishmiaidēn tishmiaidon caidaid Nuquin Papan chuiquidquo icmendac,’ quequin Moisesēn chuipampic. <sup>38</sup> Isadaidbo bēyucanquin chuiquid Moises matses nibēdacno isadaidbobēd macuēsh dapa Sinai caid yacno choash Nuquin Papan chomiaidobēd Moises tabadpampic. Ashunquio Nuquin Papan abēdi tabadte tantiamenuquin cuēnote pada-padambocquidēn ambi naden nata quequin dada uaid Moises menepampic. <sup>39</sup> Aden aid dada uaid bedshun bēyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. <sup>40</sup> Adashic, Moises macuēsh yacno yuecquio tabadnubi Moisesēn utsimbo Adon cuēmēdquid aton matses utsibon naden chuibededpampic: ‘¿Moises nuqui Equipito yacnoshon bēyucanquin bēboed mitsi nidpash nec? Nibēdpequien iquec. ¿Atotsi quec nidpash? Nuquin Papan uacpadquiocnoc nacentā. Nacnenash bēyucanquin chuiquid aid iquendac,’ tsusedpabon cac <sup>41</sup> bacan bacuēbimboecnuc Adonēn nacnempampic. Ambi nacnenaaid tantiaquin isadaidbon nidaidēn capuquid yua cuesuneshun cuēdēnēmbededpampic. <sup>42</sup> Adquid cuēdēnēnsho tantiash isadaidbobēd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ēndenquimbo tantiaquin naden chuipampic: ‘Adomboen mimbi nacnenaaid tantiec tabad.’ Adem-bidi Nuquin Papan yuecquio icshun nanun chiaid isadaidbo chuiquin naden dada uamepampic:

‘¿Matses utsi nibēdquio yacnoshon seta dadpen 40ted matamequin ēbi tantiaquina nidaidēn capuquid yua cuesuneshun pambid taudenio? Padenquio.

<sup>43</sup> Ēmbi uaid badiadēn ushē, ēbitedishun bēyucamembi, qeshun aidpadquid nacneshun Modoc cuēnquin aton shubumpi nuntan namposh.

Aidbēdtabi uispa dapatsen ēbitedishun bēyucamembi, qeshun aidpadquidbidi nacneshun Dempan cuēnec danēshēn sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ēmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquio icquidobi Nuquin Papan chuipampic—quepanēdash Esteban isadaidbo chiec.

<sup>44</sup> Aden chiec yuec onquebudec: —Matses utsi nibēdacnombo nidanequin tsusedpabon Nuquin Papa tabadte chicbanshun buampampic. Aidēmbi Moises ismiacpadembi isadaidbon Nuquin Papa tabadte shubu uashumpampic. <sup>45</sup> Adashic, tsusedpabo aid shubu uaquidotedi unēsān ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bēshun bēyucanquid Osue cuēmēdquidbēdtan nuquin tsusedpabon aid nidaid nēnantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. <sup>46</sup> Aidi Nuquin Papan bēdamboen isaidquio aid nidaidēn tabadquin Nuquin Papa tabadte buantiapimbocquid shubu uashuntiadquiocquin shubu uate bē-bēmepampic. <sup>47</sup> Aid shubu uabi Dabid unēsāmbic ambi tishmiaidēn, Sadomon



cuëmédquidën, Nuquin Papa tabadte nainquin shubu uashumpampic. <sup>48</sup> Aden matsesën shubu uaidën Nuquin Papa tabadenquio iquec. Adembidi Nuquin Papan chuimiani-aidën naden chuipampic:

<sup>49</sup> “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

<sup>50</sup> ¿Tuaquiquimbi abitedi uambodambi ictionda?”

quequin Nuquin Papan chuimiai-aidën dada uapampic —quequin chiashic Esteban abi onquec: <sup>51</sup> —Pacuënédac bimboen Nuquin Papan chiaid tantiash icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. <sup>52</sup> ¿Nuquin Papan ambi yuecquio icshun naden nanuna quequin chiaid ambi chuimiai-aidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. <sup>53</sup> Nuquin Papan chiaid ambi uaidon mayan bédabon meniaqui Nuquin Papa chieshënquido mibi nec —quepanédash Esteban isadaidbo chuiquin ënec.

### *Esteban se-siaid*

<sup>54</sup> Adec Esteban onquesho tantiashun nëishënshun Esteban iccuededquidon chushcapanédash. <sup>55</sup> Adoaquien Nuquin Papan Mayan meniaidquio icquin Estebanën abuc isquin Nuquin Papa uëshëmbo yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabéd tancandaédquiec Esuquidistu nidtu-idsho ispanédash. <sup>56</sup> Aden isequi: —Abuc shëcuë uaid shëcniaye. Is. Umbo Esuquidistu, matsesondaid, Nuquin Papabéd tancandaédquiec tsadsho isembi —quepanédash Esteban.

<sup>57</sup> Adsho tantiash tsusiobo comapenec sidquianec pamumédanec titinquequin Esteban bedshun <sup>58</sup> cuënoten se-senuen shubu nibédacno udi buampanédash. Aden Esteban buanshun aton dashcute Saudo cuëmédquidën taëno sampanédash Esteban se-senuequidon. <sup>59</sup> Sanshun se-siaquic Estebanën Esuquidistu cuënquin naden chuipanédash: —Ëbi yued, Icbo —quiashic, <sup>60</sup> danëshën sebudash comapenec nader onquec: —Ëbi se-sequido icsaid cuidenquio yec bëpiscudta, Icbo —quepanédash. Adec onquetanec Esteban unëspanédash.

## 8

### *Saudon Esus tantiaquido mëyanaid*

<sup>1</sup> Esteban se-senu caquien, Ai, adota, quiash isec uano Saudo tsadpanédash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopanédash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanédash. <sup>2</sup> Adnubien Nuquin Papan chiacpadomboen naquin Esteban chococaic comapenec sedenquec shubipanédash. <sup>3</sup> Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanédash.

### *Samadia yacnoshon Esus chuibanaid*

<sup>4</sup> Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanédash. <sup>5</sup> Adembidi niante chidobo aton na nibédsho menequid, Uedipe cuëmédquid nidaid Samadia caid yacno choshon adembidi Esus chuibanoapanédash. <sup>6</sup> Aidën nadatiambocquin nabanquin Esus chuibanasho ambocquido iccuededquin bédamboen tantiapanédash. <sup>7</sup> Aidëmbi nadatiambocquin

nabanac mayan icsa dapuduedaid icboedi mayan icsa sidquianec cuempanēdash. Adecbidi canite icsaidbēdta caputiapimbocquid dadpen bēdampanēdash. <sup>8</sup> Adsho isash Samadia yacnocquido, Bēdambo iquebi, quec tabadpanēdash.

<sup>9</sup> Adnubien Samadia yacno ēnden chonaid, Nadatiambocquin nabanquid dapa nebi, quequin mayan icsan tantiamiapaden Simon cuēmēdquidēn nabampanēdash.

<sup>10</sup> Adosho isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapenen tantiapanēdash. <sup>11</sup> Aden yuen Simonēn ismiac, Isnuequid dadpen badiadquidēn-badiadquidēnquiec abi yacno choash iccuededpanēdash. <sup>12</sup> Adnubien, Nuquin Papa yacno puduedmianquid Esus nec, quequin Uedipen chuibanasho tantiaquid yampanēdash dadabēdi chido chedo. Adsho aidtedi acten mentomepanēdash.

<sup>13</sup> Simontsen: —Esus tantiaquid nebi —quesho acten mentoagui Simon Uedipebēd capuquimbi Uedipen nadatiambocquin nabansho isun, Adopenshenda nabanec, quequin ispanēdash Simonēn.

<sup>14</sup> Adashic yuecash Samadia yacnocquido Edusaden yacno nidash nadpanēdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiashun Uambēdta Petedo Edusaden caid yacnoēsh nidaid Samadia caid yacnoshon nidmepanēdash. <sup>15-16</sup> Adec aid daēd nidaneshun: —Esus tantiaquid acten mentoaidouidi nēidtedi nec —anocquido quesho tantiashun: —Nēidtedi min Mayan mene, Papa —quec onquequin <sup>17</sup> Petedobēdtan Uanēn mēdanten Esus tantiaquido mamishbampānēdash. Aden mamishbanubi aidtedi Nuquin Papan aton Mayan menepanēdash.

<sup>18</sup> Aden Petedon nasho isash Simon: —Ma adquiec mēquiadneshun mibi piucquid menenu. <sup>19</sup> Mimbi matses mamishacpadembi ēmbi mamishaidtedi ma Nuquin Papan Mayan meniaid icpanuna —quepanēdash.

<sup>20</sup> Adoquien Petedo: —¿Piucquid menecta mibi mēquiadpe? Adoquin mimbi tantianuc tauiantiadpambo chian anēdēnquiacno ma mibēdi min piucquid icpanu. <sup>21</sup> Mimbi Nuquin Papan chiaid icsamboen tantiaquin ēmbi nacpadomboen natiapimbo mibi iquendac. <sup>22</sup> Mimbi icsamboen tantiaid ēnta. Aden icsaid ēnsho isash Nuquin Papa mibi icsaid bēpiscudendac. <sup>23</sup> Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

<sup>24</sup> Adoquien: —Ēbi tauiantiadpambo chian anēdēnquequid nēnenushe quiash mibi Uambēd Nuquin Papa chiec bēdamboec onquebudneta —quepanēdash Simon.

<sup>25</sup> Adec Samadia yacno tabadquin Petedobēdtan Uanēn: Esus ispondambi, quededquedquid Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuioapanēdash aidēmbidi.

### *Uedipe Etiopia caid yacnocquidbēd icaid*

<sup>26</sup> Adoshombic, Samadia yacno Uedipe icsho Nuquin Papan uaid mayan bēdan nadopanēdash: —Nēuēshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibēdacno podquedēn nidash nidtuidtanec chotan.

<sup>27</sup> Adoac nidtoanec nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēquedtuipānēdash. Ancanquid chido Candase cuēmēdquid aton na dayun uashunquid aid dada nepanēdash. Aidi Edusaden yacno nidash tabadquin Nuquin Papa chianec <sup>28</sup> padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanēdash. <sup>29</sup> Adnubien Nuquin Papan Mayanēn: —Nidaid cano chinunta —cac <sup>30</sup> Uedipen titinquequin chinumpanēdash.

Aden Etiopia yacnoēsh choquid dada uaid isec onquesho isash: —¿Isbanec onquequina tantiaquie? —quepanēdash Uedipe.

<sup>31</sup> Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtopenëdash.

<sup>32</sup> Aïdbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.

<sup>33</sup> Aïdi Icsaisa icsho mëyansho isec, Icsambocquidta neque. Isnu, quenquiocposh aton matses.

Aïdi chido inesa yec ambi tishmiaid nibëdnuc ¿Tsuntsin ambi naid chuipadic?”

<sup>34</sup> Aïdtedtsëqui abi isec onqueboed Uedipe ismeshun Etiopia yacnoësh choquidën: —Èbi isec onqueboed ¿mitsicquid chiequini onquepo? ¿Abibi chiadaïdtabi isec onquepo? ¿Utsida chuibanegue? Èbi chui. Tantanu —capanëdash Etiopia yacnoësh choquidën Uedipe chuiquin.

<sup>35</sup> Adoaquien, Matsestedi icsaid bedshunash abided cuidadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuïbampanëdash Uedipen.

<sup>36</sup> Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

<sup>37</sup> Adoaquien Uedipe: —Esus tantiaquidquio nebi, quesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: <sup>38</sup> —Nidtuïd —cac nïdaïd cano nidmequidën cabayo nidtuïdmian acte budshun Etiopia yacnoësh choquid Uedipen mentopanëdash.

<sup>39</sup> Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Ètiopia yacno nidoapanëdash.

<sup>40</sup> Adnubien Uedipe Nuquin Papan Mayanën nïdaïd utsi Asoto caïd yacno buampanëdash. Ambo capucuenequin shubu dadpen icquid yacno-yacnomboen Esus chuïbëec onquec choequi shubu dadpen icquid Sesadeya caïd yacnotsen choapanëdash.

## 9

### *Saudon tantiate paucaïd*

<sup>1</sup> Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaïdbo chuïquid dapabo yacno Saudo choash <sup>2</sup>shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caïd yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuïquid adota queoatsiash, quequin Edusaden yacnoshon Isadaïdbo chuïquido chuïpanëdash Saudon.

<sup>3</sup> Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. <sup>4</sup> Aden dëcatiac Saudo paëdash uesho isun nadeç abucuësh onquec: —Saudo, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aïdo mëyanec —quepanëdash.

<sup>5</sup> Adoaquien: —Icbo, ¿Tsutsi mibi ne?

<sup>6</sup> Adoaquien: —Mimbi mëyanaid Esus nebi. Èmbi chiaïd chieshë nec mibi tabadeque. Nïdtoash Damasco yacno nïdtan. Anoshon ëmbi nata cacpadomboen anocquid mibi chuïmembique. Nïdtan.

<sup>7</sup> Adec abucuësh onquenubi Saudobëd cho-choquido nidtuidshun tantiequi onquequid isenquio yec tabadtuidpanëdash. <sup>8</sup> Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash. <sup>9</sup> Adequi Damasco yacno choash 3tedec ushec isenquio yec buna mëmunquiec Saudo tsadpanëdash.

<sup>10</sup> Adashic, Saudo puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: –Chuinu. Tantia –caquien:

–¿Atoda? Nëbi uebi, Icbo –quepanëdash Ananias.

<sup>11</sup> Adoaquien: –Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiec onquec tsadsho mimbi istuidendac. <sup>12</sup> Adec aid ushachimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan –capanëdash Esusën.

<sup>13</sup> Adoaquien: –Con matses dadpenshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. <sup>14</sup> Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tanemenuec aidi chopac caosh –quepanëdash Ananias Esus chiec.

<sup>15</sup> Adoaquien: –Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpëmbo abi chuiquidobëdtabidi ëbi chuiben-chuibenec capuendac. <sup>16</sup> Èbi chuibenesho mibi mëyantequid iquendac, quequin Saudo tantiamembi –quepanëdash Esus.

<sup>17</sup> Adsho tantianec Ananias nidash Udasën shubun puduedshun Saudo mamishec: –Con utsi, mibi podquedën chosho chuiquidën Nuquin Icbonquio, Esusën mibi padpiden ismenuen Nuquin Papan Mayan mibi menenuembidi chomiaid nebi –quepanëdash Ananias Saudo chiec.

<sup>18</sup> Aden Ananiasën chuinubi nuëcquid bitsibimboecquid ëshënuësh paëdnubi bëshuacboedëmbi, Saudon, bëdamboen ispanëdash. Aden isec capusho isun acten mentopanëdash. <sup>19</sup> Adecbidi Saudo penquio yec padishacboedi piash padpidec uidëncuenoapanëdash.

### *Damasco yacnoshon Saudon Esus chiaid*

<sup>20</sup> Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: –Esuquidistu Nuquin Papan madombo nec –quequin chuipanëdash Saudon. <sup>21</sup> Aden chuisho tantiash tantiadempambo yec tabadec: –¿Edusaden yacnoshon Esus tantiaquido mëyameboedida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? –quepanëdash Damasco yacnocquido.

<sup>22</sup> Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanëdash.

### *Isadaidbo Esus tantiesa abi cuesunete bunsho isash Saudo cuenaid*

<sup>23</sup> Adembidi yuec ushquin Saudon ënenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantiapanëdash. <sup>24</sup> Adnubien Saudo cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshënuquidon caimpanëdash Saudo pduensho bednu quequin. <sup>25</sup> Aden cainsho isun Saudo cuesunenushe queshun chiac inchëshëmbi onquenquiocquin tsitsan dapan Saudo antsaduntanquin tsicatiaid quënë cachoc Saudo budmepanëdash.

<sup>26</sup> Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaqin ëbi bednushe quiash dacuëdcuededpanëdash aido. <sup>27</sup> Adnubien,



Saudobëd Esus tantiaquid utsitedi yacno choshon Bednaben yuedpanëdash. Aden yuedshun: —Saudon Damasco yacno nidquin Nuquin Icbo ispac caosh. Nuquin Icbo Saudobëd onquepac caosh. Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibampanëdash. <sup>28</sup> Aden Bednaben chuibanac Esus tantiaquido Saudo dacuëdenquiocnobi aidobëdi capuquin Saudon anoshombidi Esus chuibanoapanëdash. <sup>29</sup> Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuquin aidontsen cainoapanëdash. <sup>30</sup> Aden Saudo cuesunenuen, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsëqui nidmepanëdash.

<sup>31</sup> Adashic Saudo nidmian cuesunenushe quenquo yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquo yec tabadpanëdash. Adec tabadquin, Nuquin Papan chiaid tantiabenu, qesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquo yampanëdash.

### *Petedon Ananias Dodcastsen bëdamiaid*

<sup>32</sup> Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanëdash. <sup>33</sup> Ambo choshon dada, Eneyas cuëmëdquid, seta dadpen 8ted matamec canite tsasiaid Petedon istuidshun: <sup>34</sup> —Esusën mibi bëdamiaque. Nid-toshon min uete buanun nacnenta, Eneyas —Petedon cac Eneyas badedquo nidtoash capupanëdash. <sup>35</sup> Eneyas capusho isash Dida yacnocquidobëdi nidaid Sadon caid yacnocquido Esus tantiaquid yampanëdash.

<sup>36</sup> Adnubien Dida uditsëc shubu dadpen icquid Ope caid yacnocquid, Esus tantiaquid utsi, chido, Tabita cuënshumbi quidiecon onqueten Dodcas cain cuënaid tabadpanëdash. Aidi bëdambocquid icquin badiadquidën-badiadquidënenquien pete nibëdquido menedenepanëdash. Adembidi aton na nibëdquido Dodcasën menedenepanëdash. <sup>37</sup> Aidi Petedo Dida yacno icnubi icsabudec unëso isun abëd icquidon dapanshun shubu abuc quënë icquidën nampanëdash. <sup>38</sup> Aden nanshun, Petedo Dida yacno tabadec, qesho tantiashun aid chomenuquin dada daëd Petedo tabadacno nidmiac aid daëdi Petedo tabadacno choshon Dodcas unësboed chuishun: —Nidtuidentquo yec badedquo ëbëdi cho —cac <sup>39</sup> abëdi badedquo Ope yacno Petedo nidpanëdash. Adec nidec Ope yacno chosho isun abuc quënë icquidën puduedmepanëdash. Ambo puduedsho isun shubiquimbi niantebon Dodcasën tuscaboed dashcute dadpen Petedo ismepanëdash.

<sup>40</sup> Adosho isun abitedi puduemias danëshën sebudash Nuquin Papa chiec onquetanec nidtoshon unësboed isquin: —Nidto, Dodcas —Petedon cac uincuenequi Petedo isec Dodcas badedi uëtsëdtopanëdash. <sup>41</sup> Uëtsëdtocho isun mëdinquin nidtomesun niantebobëdta Esus tantiaquid utsibo cuënquin cho-chomeshun uincuenboed ismepanëdash.

<sup>42</sup> Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanëdash. <sup>43</sup> Adnubien Petedo Ope yacnocquid nidaidën capuquid bitsi uashun chodcashun nacnenquid Simombëd yuec Petedo tabadpanëdash.

## 10

### *Petedo Codnedion chomiaid*

<sup>1</sup> Adnubien shubu dadpen icquid Sesadeya caid yacno Codnedio cuëmëdquid isadaidpembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash. <sup>2</sup> Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adechidi Nuquin Papa chiec onquianedenepanëdash. <sup>3</sup> Adquid yec ushë

budtsambi tedes yanuc Nuquin Papa chiec onquequimbi ushac bimboecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

<sup>4</sup> Adsho tantiash dacuëdquin comapenen isec: —¿Atotsibi name, Icho? —quepanëdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. <sup>5</sup> Nëbi Simon cuënshumbic Petedo cuënoaid ma bednu mimbi namiaido Ope yacno nidmetan. <sup>6</sup> Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

<sup>7</sup> Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun <sup>8</sup> Nuquin Papan uaid mayan bëdan chuiboc-paden Petedo bedmuenen ambi namiaido Codnedion nidmepanëdash.

### *Petodon ushac bimboec tsadquin isaid*

<sup>9</sup> Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuec shubu macano pada-padapambocquid yacno dectatopanëdash. <sup>10</sup> Adec dectatoash shubu icbon codocanubi Petedo bundoec ushac bimboec tsadquimbic <sup>11</sup> abu posonianec abi yacmi dabidiete dapabiecquid bucun dënëshbudcuenaaid budsho Petedon ispanëdash. <sup>12</sup> Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. <sup>13</sup> Adnubien: —Nidtochon cuesuneshun pe, Petedo —capanëdash abucuësh onquequin.

<sup>14</sup> Adoaquien: —¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icho —quepanëdash Petedo.

<sup>15</sup> Adoaquien padpidec abucuësh onquec: —Nuquin Papan bëdambo icmiaid icsambo iquec cainda —quepanëdash. <sup>16</sup> Adotanquimbic antabëdquid abuc buanshun adom-boembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeopanëdash.

<sup>17</sup> Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. <sup>18</sup> Choec nidtuidash: —¿Nëmboda Simon Petedo tabadec? —quetuidpanëdash.

<sup>19</sup> Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. <sup>20</sup> Ëmbi chomiaido neque. Budash cacuidenquio yec aidobëdi nidtan —capanëdash.

<sup>21</sup> Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

<sup>22</sup> Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdambocquidquio nec. Adquid icquin Nuquin Papan chiacpaden nabansho isun isadaidbon bëdamboen isaidquio nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaido Petedo chiec.

<sup>23</sup> Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash. <sup>24</sup> Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiashun Codnedion aton shubun icquido abi isedquid chedo Petedon chuibansho tantiamuenen aton shubu nuntan iccuededmepanëdash. <sup>25</sup> Aden iccuededmiac tabadnubi utsibobëd

choec Petedo chedo puduedsho isash, Mibi bēdamboquid icnubi adesa nebi, quequin Petedo ismec danēshēn sebudec shuebudash Petedo bēisenquo yec Codnedio uepanēdash.

<sup>26</sup> Adec uestho isash Petedo: —Mibipadquid nebi que. Nid tota —quepanēdash Codnedio caic.

<sup>27</sup> Adtanec Codnediobēd onquetanec quēnē utsin puduedshun isadaidpembo dadpen Petedon istuidpanēdash. <sup>28</sup> Aden aido isec: —Isadaidbo nebi. Adquid yec isadaidpembobēd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ēmbi bēdamboen isaid icsambo iquec cainda, quequin ismequin ēbi tantiamiac <sup>29</sup> mimbi ēbi bedmiaido choacsho isash, Mibēd capuesa nebi, quenquo yec chobi. Adecbidi nēmbō choash isadaidpembon shubu nec. Nēmbō puduedtiapimbo iquebi, quenquo yec puduedobi. Nēbi Tantuanu. Chui. ¿Atotsieshun ēbi chomio? —quepanēdash Petedo Codnedio chiec.

<sup>30</sup> Adoaquien Codnedio: —Abentsēc choec ushanec ushē budec tedes yanubi Nuquin Papa tantiec buna mēmunc con shubu nuntanuēsh Nuquin Papa chiec onquec tsadobi. Adnubien dashcute shocosh bed-bedquiachimboec dasiuidquid ēbi yacmī Nuquin Papan budmiac onquec: <sup>31</sup> “Codnedio, mibi Nuquin Papa chiec onquesho Nuquin Papan tantiec. Adembidi aton na nibēdquido mimbi menebansho aidēmbi bēpiscudenquo icquin tantiec. <sup>32</sup> Nuquin Papa bēdamboen tantianuen Simon cashumbic Petedo caid Ope yacnocquidbēd tabadquid ma chono queshun mimbi namiaido nidmeta. Aidi Simon cuēmēdquid utsi nidaidēn capuquid bitsi uashun chodcashun nacnenquidbēd tabadec. Aidēn shubu acte cuēmambi iquec,” quec Nuquin Papan uaid mayan bēda onqueposh. <sup>33</sup> Aden chiac: “Petedo bedtan,” quequin ēmbi namiaido nidmiombi. Adoac bēdamboquid yec cacuidanenquo yec badedquo mibi choc. Adec mibi choacsho isash bēdambo iquebi. Nuquin Papan nuqui isnubi ambi mibi tantiamiacpaden chuibancho tantiec tabadnuna —quepanēdash Codnedio Petedo chiec.

### *Codnedion shubu nuntanshun Petedon chuibanaid*

<sup>34</sup> Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiēmbi. <sup>35</sup> Nuquin Papan chiaid tantiashun matses utsin-utsinquien chieshēnenquiocquin bēdamboen nabansho isun, Aidedi Nuquin Papan abi yacno yuedendac, quequin tantiēmbi. <sup>36</sup> Ēndenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuiquid icnubi utsibēd bēdamboec tabadendac. <sup>37</sup> Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. <sup>38</sup> Ma abēd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasadēd yacnoshon tishaid yec capuquin bēdamboen nabanquin abi chieshēnquidēn Satanas caidēn mēyanaido Esuquidistun bēdamebampondash. Adosho mibitedishun isbampondac. <sup>39</sup> Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuēsten dectanquin isadaidbon unēs uaqū <sup>40</sup> uincuenash, Uincuenobi, quequin Esuquidistun ismebempōdash. <sup>41</sup> Aidi uincuenshun matsestedi ismenquiocquin aidbēdtan peshun acquidotedictsēqui Esuquidistun ismepondashi. <sup>42</sup> Abēdi icshobi, Ēbi chuibanquin matses icsaid cuidte chuibante ushē choec quequin chui, cac nebi. <sup>43</sup> Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash abi icsaid Nuquin Papa bēpiscudendac. Esuquidistu chuiquin aden dada uapampic —quepanēdash Petedo Codnedion shubun iccuededquido tantiamequin chiec.

### *Isadaidpembo Nuquin Papan aton Mayan meniaid*

<sup>44</sup> Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash. <sup>45-46</sup> Aden meniac isadaidpembo nëbi Esuquidistu tantiaquido yanshun abi onquiacmaidënquio utsin onqueten onquequin Nuquin Papa chiec cuëdëmpañëdash. Adsho tantiash Petedobëd cho-choboedo isadaidbo aton tsusedpabon nacpaden shui dëbid dëtemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanëdash isadaidbo Petedobëd cho-choboedo.

<sup>47</sup> Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? <sup>48</sup> Aid, acten mentometa —capanëdash Petedon.

Aden acten mentoaqui: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanëdash.

## 11

### *Isadaidbo Petedon ambi naid chiaid*

<sup>1</sup> Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bëdamboen tantiash Esuquidistu tantiaquido yanosh, quequin chuipanëdash. Anoshon chuibëtsenec Edusaden yacnotsen choshon adomboembidi chuiopanëdash. <sup>2</sup> Aden chuisho anocquidon Esuquidistu tantiaquid utsibon tantiash tsusedpabon chiacpadomboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimpanëdash. Aden cainubic Petedo choacsho isash <sup>3</sup> comapenec onquecuedec: —Isadaidpembo shui dëbid dëtemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantianu —quepanëdash Edusaden yacno tabadquido.

<sup>4</sup> Adoaquien Petedon nadopanëdash: —Aidobëd ëbi tabadboed chuibanu. Tantiata. <sup>5</sup> Ope yacnoësh Nuquin Papa chiec onquequin ushacbimboen naden ispombi. Abuc posonianec ëbi yacmi dabidiete dapabiecquid dënëshbudcuenaid budposh. <sup>6</sup> Aidënquio nidaidën capuquid tacbidën capuquidbëd podochoquid chedo antabëdsho ispombi. Aidën antabëdquid nuqui petequidbëd nuqui petemaid icposh. <sup>7</sup> Adquid icsho isnubi: ‘Nidtochon cuesuneshun pe,’ caposhi. <sup>8</sup> Adsho tantiashun: ‘Aidtedi ëmbi petemaid tauiquin mibi shëdmetemaidquio nec. Adquid pesambo nebi, Icbo,’ capombi. <sup>9</sup> Adoaquien abucuësh padpidec onquequin: ‘Nuquin Papan bëdambo icmiaid icsambo iquec caïnda,’ caposhi. <sup>10</sup> Adomboembidi abentsëc chotsëcnuc tabëcaido abuc buanshun padpiden budmeshun adembidi chuishun buanshun abitedi abuc puduedmeoposh. <sup>11</sup> Abuc buanoabombic dada abentsëc chotsec Sesadeya caid yacnoësh choquido shubu shëcuë cuëmano nidtuidash nidpac caosh. <sup>12</sup> Aidtedi icnubi Nuquin Papan Mayan: ‘Aidobëdi cacuidenquio yec nidtan,’ qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. <sup>13</sup> Puduedacsho isash Codnedio: ‘Nuquin Papan chomiaidën ambi uaid mayan bëdan naden chuiposhi: Simon cuënshumbic Petedo caid Ope yacno tabadeque. Aid bedmuenen mimbi namiaido nidmeta. <sup>14</sup> Aidëmbi mibëd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bëdan chuiposhi,’ quequin Codnedion chuioposhi.

<sup>15</sup> “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoposh. <sup>16</sup> Aden meniacsho isun Nuquin Icbo Esuquidistun chiondaid ëmbembi tantiatsëcquiec tsadpobi. Nad icpondash: Uan padon



acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun. <sup>17</sup> ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindami icti? —quepanédash Petedo shui dëbid dëtemequid utsibo chiec.

<sup>18</sup> Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpambo abi icsaid ënsho isun Nuquin Papan aidotsen abëd icquid icmeoapac —quepanédash Nuquin Papan naid chiec.

*Antioquiya yacnoshomba Esus tantiaquido iccuededaid*

<sup>19</sup> Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidaneapanédash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacnëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanpanédash. <sup>20</sup> Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpambo Esuquidistu tantiamenuen chuibanpanédash. <sup>21</sup> Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Ëbi icsaid ënu, quequin ënash Esuquidistu tantiaquid dadpen yampanédash.

<sup>22</sup> Adec isadaidpambo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanédash. <sup>23</sup> Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiashun chieshenquiocquin Esuquidistu tantiata —quepanédash Bednabe. <sup>24</sup> Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquido icquin Esuquidistu chuibanac Esuquidistu tantiaquid utsi-utsiec dadpen yampanédash.

<sup>25</sup> Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon <sup>26</sup> Saudo istuidash Antioquiya yacno aidbëdi Bednabe choapanédash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanédash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpanédash.

<sup>27</sup> Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquio icshun nanun chiaid chuiquido cho-chopanédash.

<sup>28</sup> Cho-choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpactsëc yash nidaidtedi yacnocquidon pete nibëdendac —quepanédash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanédash. <sup>29</sup> Adnubic, Udeya yacnocquidon pete nibëdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanédash.

<sup>30</sup> Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëdta Saudo menequin Edusaden yacno buamepanédash Antioquiya yacno tabadquin Esus tantiaquidon.

## 12

*Acobo cuesuniaidbëdta Petedo quënën nauedaid Nuquin Papan puduemaiad*

<sup>1</sup> Adnubien Edusaden caid yacno tabadquid domanobo ancaquid Edodes cuëmédquidëmbi Esuquidistu tantieccuededquido utsi-utsien comapenen mëyanuequin bedmeshun quënën nauedmepanëdash. <sup>2</sup> Aido quënën nauedmeshun Esuquidistun ëbi chuibeneta caid abëd capucueboed Acobo cuëmédquid chështen cuesunemepanëdash. Acobon utsimbo Esuquidistun ëbi chuibeneta caid abëd capucueboed utsi Uan nepanëdash. <sup>3</sup> Adoac, Acobo cuesuniosh, qesho tantiasch isadaidbo utsibo, Esuquidistu tantiesabo: —Bëdamboen Edodesën naosh —quepanëdash aido. Adec onqesho tantiasch Edodes: Isadaidbon pan bidisquesa tantiaid ushë choec, quequin Esuquidistun ëbi chuibeneta caid utsi, Petedo cuëmédquid, bedmeshun quënën nauedmepanëdash. <sup>4</sup> Aden quënën nauedmeshun Petedo cuenushe qeshun sondado 4ted quënë nuntan tabadmehun pan nami uambocquid petequid tantiaid ushëtedi naimëdambi ambi naid icsa Petedo chuimenuquin Edodesën caimpanëdash. Adnubien quënë nuntanshun Petedobëdta mëtaniaid sondado daëd uenubi utsi daëdshun shëcuë ëctabëdquin Petedo isec tabadpanëdash. Aid isquidotedi badiadnuc puduedshun isanec ushë abuctotsan nidnubi utsibotsen 4tedbidi choshon isanec ushë cuembocnoc nidoanubi utsibotsen 4tedbidi choshon isanec ushë budtsan nidnubi utsibotsen 4tedbidi choshon isanec inchështëcnubi badiadnuc isboedo choapanëdash. Adechidi isboed utsibo inchëshëmbi padpiden isec choapanëdash. <sup>5</sup> Adnubien Esuquidistu tantiaquido iccuededash Nuquin Papa Petedo quënën nauedaid chiecc yuec onquepanëdash.

<sup>6</sup> Adshumbic, Badiadshun Petedo bëmëmbi, quequin Edodesën tantianubi aid inchëshëmbi Petedo bucun mëtaniacchobi ushñubi <sup>7</sup> Nuquin Icbon chomiaid, ambi uaid mayan bëda, nibëdquiocboedi Petedon dayun choan quënë nuntan comapenec chënquepanëdash. Aidën Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mëtaniaid mëchiquidpanëdash. <sup>8</sup> Adtanquimbien Nuquin Papan uaid mayan bëdan: —Chinëshëdtanec tapucudta —cac Petedo chinëshëdtanec tapucudpanëdash.

Adsho isash: —Min dashcute bëntsecquid dasiuidshun ëbi tsiban —quianec nidsho <sup>9</sup> Nuquin Papan uaid mayan bëda nidsho isachimboecquin abimbo tantienquiocquin Petedon tsibanampanëdash. <sup>10</sup> Adec nidquimbi sondado abëdta mëtaniaidën tantienquio icnubi datanshun shëcuë isquid daëdshumbidi tantienquio icnubi aidotsen datanoashumbic umanuc puduenenubi shocosh shëcuë abëmbi shëcniadpanëdash. Adsho isash puduenash podqued abentsëcquidën nidquimbic Nuquin Papan uaid mayan bëda abëd icboedi badedquio nidquin Petedo niampanëdash. <sup>11</sup> Abëd icboed nibëdnubien Petedo padpiden tantiaquiecc: —Edodesbëd isadaidbo, Esuquidistu tantiesabo, ëbi cuesunete bunsho isun Nuquin Papan ëbi puduemenuen ambi uaid mayan bëda chomiosh. Abimbo iccosh —quianec Petedo nidpanëdash. <sup>12</sup> Adec nidequi Nuquin Papan abi puduemeboed tantiequi Uan cashumbic Madcos caidën titan shubu yacno Petedo chopanëdash. Aidën tita Madia cuëmédquid icpanëdash. Ambobi Esuquidistu tantiaquid dadpen iccuededec Nuquin Papa chiecc onquepanëdash. <sup>13</sup> Adnubien choshon Petedon shëcuë tosh-toshcasha tantiasch chido yua Doda cuëmédquid isnucc nidtopanëdash. <sup>14</sup> Aid shubu shëcuë yacno choshon Petedon cuënsho tantiasch bëdamboshë iquequi shëcnenquio yec auchbidi titinquecc: —Petedo shëcuë yacno choash nidecc —quequin iccuededquido chuituidpanëdash.

<sup>15</sup> Adsho Nuquin Papa chiecc iccuededquidon abimbo tantienquiocquin: —Muequi mibi nec. Aidida isdash neba —quepanëdash iccuededquido.

Adoquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bëda ischitashien nec —quepanëdash tantiesä.

<sup>16</sup> Adnubi padpiden Petedon tosh-toshcasha shëcnequin isash: —¡Tso! Abimbo caic —quecuededpanëdash.

<sup>17</sup> Adnubien mēdante uic-uiccaic Petedo: —Onquenquo yec tabadquin tantiata. Ēbi nashunquin Nuquin Icbon naboed chuibanu —quepanēdash Petedo abi quēnēn nauedacnoshon Nuquin Papan puduemaiid chuibanec. Aden chias: —Ēbi puduemaiid Esuquidistun utsi, Acobobēdta Esus tantiaquid utsibo chuitanta —quianec puduenanec utsi yacno Petedo nidpanēdash.

<sup>18</sup> Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēdta mētaneboed icpec? Nibēdeque. Is —quec dacuēdpanēdash.

Adashic, Petedo nibēdec, quequin sondadon chiac <sup>19</sup> Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

### *Edodes unēsaid*

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanēdash. <sup>20</sup> Sesadeya caid yacno anoentsēcbidi shubu dadpen icquid Tido caid icnubi aid yacnoēsh anoentsēqui shubu dadpen icquid utsi Sidon caid icpanēdash. Tido caid yacnocquidbēd Sidon caid yacnocquido Edodesbēd chushcananquido icboedi padenquo yanec tabadpanēdash. Adec chushcananenquo yec tabadquin, Sesadeya yacno Edodes choash tabadosh, qesho tantiash Edodesēn yua Bēdasto cuēmēdquidbēd onquenuec cho-chopanēdash. Cho-choshon, Ēmbi pete nibēdsho isun Edodesēn menioshi. Nēbi aid chushcainquo iquembi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuioapanēdash. <sup>21</sup> Aden adomboembidi Bēdaston chuioasho tantiashun Edodesēn: —Ēmbi chiacpadēn cho-choata, quiosh Edodes, quequin chuita —cac cho-choquido Bēdaston chuioapanēdash. Aden chiac Edodes onquesho tantianuec ambi chiacstedec ushash dashcute nac-nacquiocquid dasiuidash abembi onquenuec tsadten abuc tsadtoash onquec taēpanēdash. <sup>22</sup> Aid onquesho tantiash: —Nidaidēnshun tishaid onquiaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanēdash. <sup>23</sup> Aden chuisho tantiash, Mimbi Nuquin Papa caidpenquo nebique. Aidi abia yampid abentsēcquiobi iqueque. Aiduidi tantiata, quequin chuitiadquidēmbi chienquo icsho tantiashun Nuquin Papan chomaiidēn ambi uaid mayan bēdan daicsa uac chichan dadpen yanec Edodes badedi unēsapanēdash.

<sup>24</sup> Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanēdash.

<sup>25</sup> Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebēdta Saudo meniac buanec Edusaden yacno choshon anocquido Esuquidistu tantiaquido menetanashic auēshquo puduanec Antioquiya yacno nidoapanēdash. Aidobēdi Uan cashumbic Madcos caid nidpanēdash.

## 13

### *Saudobēdtabi Bednabe nidmiaid*

<sup>1</sup> Adashic, Esuquidistu tantiaquid utsi-utsiec Nuquin Papan yuecquo icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanēdash. Nēidic, Bednabe; utsibic, Simon, Dada Chēshē caid; utsibic, Sidene yacnoēsh choquid, Dusio cuēmēdquid; utsibic, Cadidia yacnoēsh choquid, tsusio dapa, Edodesēn shubun icquid icboedi, Manain cuēmēdquid; utsibic, Saudo cuēmēdquid.

<sup>2</sup> Aitedishun Esuquidistuidi tantianuen buna mēmunsho Nuquin Papan Mayanēn: —Saudobēdtan Bednaben aid daēdshun ēmbi chuibocpaden ma napanuna —capanēdash.

<sup>3</sup> Adoquien, buna mēmunquin nainash Nuquin Papa chiec onqueshun abēd icquid utsibon mēdanten Saudo Bednabebēdta mamishquin nadopanēdash: —Nidaid utsi-utsiec

yacno nidshun Nuquin Papan chiacpaden Esuquidistu chuibenetan –capanēdash abēd icquidon.

*Chipide yacnoshon Esuquidistu chuibanaid*

<sup>4-5</sup> Esus tantiaquidon mamishquin chiaquien Nuquin Papan Mayanēn nidmiac Saudobēd Bednabe Antioquiya yacnoēsh puduanec nidpanēdash. Aid daēd nidsho isash Uan cashumbic Madcos cain cuēnaid nidpanēdash dada uate buanshunec. Aidtedi nidanec acte cuēman shubu dadpen icquid Sedusia caid yacno choash cano antabēdtoanec acte nēnantanquio nidaid nacdēdquid Chipide caid yacno nidtampanēdash. Chipide yacno choash nidequi shubu dadpen icquid Sadamina caid yacno choapanēdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebēdtan chuibanpanēdash. <sup>6</sup> Adoshombic, Sadamina yacnoēsh nidquin chuibidanec Chipide cuēma utsiuc shubu dadpen icquid Pabos caid yacnotsen choash tabadoapanēdash. Ambo tabadquin isadaidbo Badesus istuidpanēdash Pabadobēd icquidon. Satanasēn tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquo nebi, quequin muaquin chuipanēdash Badesusēn. <sup>7</sup> Aidi Pabos yacnocquido tsusion shubun tabadpanēdash. Anocquido tsusio cobednadod caid Sedquio Paudo cuēmēdquid icpanēdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobēdta Bednabe chomeshun tsusion yuedpanēdash. <sup>8</sup> Yuedac Pabadon Esuquidistu chuibanpanēdash. Saudo quequin isadaidbon cuēnubi Pabado quequin isadaidpembon cuēmpanēdash. Aden Pabadon Esuquidistu chuibancho tantiec tsusio tsadsho isun Badesusēn tantiamenquiocnuen utsi uain chuiapanēdash. Ambi ompoaid ismianesa Badesus icsho Edimus cuēmpanēdash. <sup>9</sup> Aden utsi uain chuisho tantiasun Nuquin Papan Mayanēn tantiamiac Edimus bëisequi Pabado: <sup>10</sup> –Satanasēn bacuē yec bēdamboen naidbēdta bēdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaqun muaquin mimbi adenuidi chuibanegue. Tantia. <sup>11</sup> Nēbi con Icbon mibi mëyanquin bëshu uaindac. Ushē chēnquesho mimbi yuen isenquio iquendac –quepanēdash Pabado Edimus chiec.

Aden chuibon Edimusēn ēshē cuen-cuempambo yec inchēshbudacimboc yanash: –¿Tsuntsimbini mëdinshun buampeba? –quequin nibēdacno mishquin uēmbampanēdash. <sup>12</sup> Aden Edimus bëshu uacsho isec: –Nuquin Icbon chiaid abimbo iquec –quiash tsusio Sedquio Paudo cuēmēdquid Esuquidistu tantiaquid yampanēdash.

*Nidaid utsi, Pisidia caidēn shubu dadpen icquid Antioquiya caid utsi yacno Bednabe Pabadobēdi choash tabadoaid*

<sup>13</sup> Adashic, Chipide yacnoēsh puduanec nidaid Pampidia caid yacno Pabadobēd icquido canon potepanēdash. Aden potiash nidaid Pampidia caid yacno choash Pabadobēd Bednabe pudundonobi Uan cashumbic Madcos caidbidi Edusaden yacno nidoaic cuēshēdpanēdash. Adec Pabadobēd Bednabe pudundoanec nidquin shubu dadpen icquid Pedque caid <sup>14</sup> isbidanec nidaid Pisidia caid yacno shubu dadpen icquid Antioquiya yacno chopanēdash. <sup>15</sup> Ambobi tabadequi chonoadtemaid ushēn Nuquin Papan chiaid chuibante shubun puduedash tabadpanēdash. Ambo tabadnubien Nuquin Papan Moises dada uamiampid isec onquequin chuibanashumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: –Isedquido iqueque. Aid daēdi tabadacno nidshun, ¿Ēbitedi bēdambo icmenuen chuibanquin tantiametiadquo ada mibi icpe? cata –tsusion cac ambi namiaid nidshun tsusion chiacpaden Pabadobēdta Bednabe chuituidpanēdash.

<sup>16</sup> Adoquien abi tsadacnoēshi nidtoashi Pabado: –Nuquin Papan naid mibi chiebique. Tantiaquiota. <sup>17</sup> Nidaid Equipito caid yacno nuquin tsusedpabo tabadshobi



Nuquin Papan bēdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidēnquo bēyucanquin tsusedpabon tishmiaidēn tishmiaid caidaido Equipito yacnoshon buanubi <sup>18</sup> tsusedpabon Nuquin Papan chiaid chieshēmpampic. Adoaquien matses nibēdacno seta dadpen 40ted matamec tabadquin, Nuquin Papan tsusedpabon ēbi chieshēnaid cuidnu, quenquiocquin buampampic. <sup>19</sup> Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsēcquieci 7tedi icquido naimbudmeshun aidon nidaidtedi nuquin tsusedpabo menebampampic. <sup>20</sup> Aden menebudquin dadpenquioshē seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquo icshun nanun chianiaid chuiquid Samued cuēmēdquid tsusedpabo chuiquid icmepampic. <sup>21</sup> Aidi isadaidbo chuiquid icnubic, Matses utsibo ancaquidpadquid bunebi, quequin tantiaishun seta dadpen 40ted matamec tabadquin Nuquin Papan Sis padon mado, Benaminēn tsyuecquid Saudo cuēmēdquid, isadaidbo ancaquid icmepampic. <sup>22</sup> Adashic, yuecash Saudo, con shēnisio, Nuquin Papan chiaid tantesa uasho isun utsitsen Dabid cuēmēdquid tsusedpabo ancaquid icmeoapampic. Aidi Nuquin Papan chiacpadomboen nabanquidquo icsho isash Nuquin Papa: ‘Dabid, Isain mado, ēbi bēdamboshē icmequid, ēbi bunacpaden nabanquidquo mibi nec,’ quepampic Nuquin Papa –quepanēdash Pabado aton matses Antioquiya yacnocquido tantiamenuen chiec.

<sup>23</sup> Aden chiec abi onquec: –Dabidēn tishmiaidēn tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanēdash. <sup>24</sup> Aidēn nadatiambocquin nabanquin ambi nabanaid tauabicnuc Uan padon, acten mentoanquidēn: ‘Mimbi tantiaid icsa ēnshun acten mentome,’ capanēdash. <sup>25</sup> Adec onquetanequic matses acten mentobudquin nainec: ‘¿Mitsipaden ēbi isquin cuēmpatsia? Nuquin Papan Chomiaid mimbi cainaidpen nebi. Mimbi cainaidquo choendac. Aidi chosho isun: ¿Ēbi icsambocquid icsho atotsieshun mibi choec? quequin chuiquidquo Nuquin Papan icmioshi, caindambi,’ quepanēdash Uan acten mentoanquid –quepanēdash Pabado.

<sup>26</sup> Aden Uan padon chiacpaden chuibanashic: –Abadauanēn tishmiaidēn tishmiaid caidaido nuqui icsho nuquitedi icsaid bedshunash abided cuidadec Esuquidistu unēsapanēdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanēdash. <sup>27</sup> Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobēd aton tsusio dapabo, Icsambocquid neque. Unēs ua, quequin chuipanēdash. Aden chuiquin utsibēd iccuededte ushēn-ushēnquien abi isec onquiaid Nuquin Papan dada uamiampicpadembi aidon napanēdash. <sup>28</sup> Esuquidistu icsaid nibēdquidquo caiqui, Icsambocquid neque. Aid unēs uatiadquidi mibi nec, quepanēdash Isadaidbo Pidato caic. <sup>29</sup> Adoaquien Nuquin Papan dada uamiampicpaden nabanambien Esuquidistu cuesten dectanquin unēs uacsho chicshun, Ēbi unēsacsho nēidēn ēbi nauedec, quequin ambi shēcuē uain nacnenaid chucanquo Osen Esus nauedpanēdash. <sup>30</sup> Adoacsho Nuquin Papan Esuquidistu uincuemiac <sup>31</sup> capusho Cadidia yacnoēsh Edusaden yacno abēd capucueboedon aidi isbempanēdash. Aden isun aidombi Esuquidistu chuibededec. Adembidi aid isboedobēdtambi abimbo chuibanquidquo nebi –quepanēdash Pabado.

<sup>32</sup> Aden chiashic: –Abi chiembique. Tantia. Nuquin Papan chometequid ambi chuipampid tsusedpabon isenquiocnobi <sup>33</sup> Nuquin Papan uincuemiacsho nuqui isondaaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nēbi ěmbi uincuemiacqui ěmbi chiacdedi mimbi naimbudoc.

Adosho isun ëbipadquiocnoc chuiquid dapa mibi icmembi.’

Aden ëndenquimboshë aton mado tantiaquin Nuquin Papan chiampic. <sup>34</sup> Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bëdamboen isaid mibi nec, mado,’ quequin Nuquin Papan dada uamepampic. <sup>35</sup> Ambi dada uamiampid utsi nad iquec: ‘Icsaisa icsho aton nami chodquesa icmenuna,’ quequin Nuquin Papan chiampic.

<sup>36</sup> “¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacno Dabid chococac aidën namitsen chodquepampic. <sup>37</sup> Nuquin Papan uincuemetequidën namien chodquesa icpanëdash. <sup>38</sup> Aidi icsainquiocquid yec ëbitedi icsaid bedshunash abided cuidadpanëdash. <sup>39</sup> Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi matsesën natiapimbo iquec. Aden ambi chiacpaden natiapimbo yec, Nuquin Papan bëdamboen isaid nebi, quetiapimbo icboedëmbi, Matses icsaquid icsho cuidnushe quiash abided cuidadec Esus unësapanëdash, quequin tantiasho, Esuspadquid icsaisa Nuquin Papan nuqui isec. <sup>40</sup> Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

<sup>41</sup> ‘Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamënshumënquid ëbëdi tabadtiapimbo iquendac.

Adquid icmane qeshun tantiaquiota’

—quepanëdash Pabado iccuededquido chiec.

<sup>42</sup> Aden chuibudashic Pabado Nuquin Papan chiaid chuibante shubu yacnoësh abëd choedobëd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanëdash iccuededquid utsibo Pabado chiec. <sup>43</sup> Aden chianec Pabadobëd Bednabe nidsho isun isadaidbo utsin-utsinquiembëdtan isadaidpembo isadaidbopadquid icnuequid utsin-utsinquiensibanampanëdash. Aden abi tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabebëd.

<sup>44</sup> Adashic, chonoattemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. <sup>45</sup> Dadpen iccuededsho isash isadaidbo tsusiobo: Ëmbi chuibanansho tantianuec aidtedi choenquio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

<sup>46</sup> Adoquien, dacuëdenquio yec Pabadobëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquembi. Mibi tantiesa yec Nuquin Papabëd tabadte bunesabidi icnuc isadaidpembo Esuquidistu chuibanendambi. <sup>47</sup> Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembi

ma nidaidtedi yacno ëbi tantiaquido ëbi yacno puduedquid ma icpanuna,”

quequin chioshi —quepanëdash Pabado abi chieshënquido isadaidbo Nuquin Papan dada uamiampicpaden chiec.

<sup>48</sup> Adsho tantiasho isadaidpembo: —¡Padtec! Nuquin Papan chiaid bëdamboshë iquec —quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

<sup>49</sup> Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash. <sup>50</sup> Adosho tantias, Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadobëdta Bednabe mëyantanguin ashunquio nidmepanëdash. <sup>51</sup> Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash. <sup>52</sup> Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aitedi aton Mayan Nuquin Papan menepanëdash.

## 14

### *Iconio yacno*

<sup>1</sup> Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. <sup>2</sup> Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nëishmepanëdash. <sup>3</sup> Aido nëishmiambi Iconio yacno yuec tabadquin Pabadon Bednabebëdta dachuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëdta Bednabe icmepanëdash. <sup>4</sup> Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanëdash. <sup>5</sup> Aden chuishumbic, Pabadobëdta Bednabe cuestanguin cuënoten se-senuequin Esus tantiesabo isadaidpembon aton tsusio dapabobëdta cainubi adembidi isadaidbon aton tsusio dapabobëdta cainoapanëdash. <sup>6-7</sup> Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdta Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanëdash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanëdash.

### *Disteda yacno*

<sup>8</sup> Disteda yacno tabadnubien anocquid taicsaidi anin tishaid caputiapimbo icpanëdash. <sup>9</sup> Aidi Pabadon Esuquidistu chuibansho tantiec, Esuquidistun ëbi bëdamepatsiash, quec otacquo tsadpanëdash. Aden caputiapimbocquidën tantiacpadomboen Nuquin Papan Pabadoatsen tantiamiac <sup>10</sup> caputiapimbocquid comapenen bëisquin: —Nidto —Pabadon cac badedi nidtoash taicsaid bëdanash capupanëdash.

<sup>11</sup> Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. <sup>12</sup> Adtanequi Bednabe otacquo tsadquid icsho isash ambi tantiaid abentsëc Upited icnuc Upited cain Bednabe cuënquimbi Pabado chuiquidquo icsho isun ambi tantiaid utsi Medcudio icnuc Medcudio cain Pabado cuëmpanëdash Disteda yacnocquidon. <sup>13</sup> Aden cuënsho tantiasun baca bënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaaid Upited caid dayun uaquido baca cuesunenu, quepanëdash.

<sup>14</sup> Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantanguio nidash Pabadobëd Bednabe

comapenec nadpanēdash: <sup>15</sup> —Ēbi daēdi mibipadquid matsesquio nebi. Mimbi tantiacmaid nebique. Baca cuesunenda. Chiaid bēda mibitedi naden chuinuec chobi. Nuquin Papa caid abentsēcquiobi iquec. Aidēmbi abubēdta nidaid uashumbic aidēnquiocquidtedi uabanampidquio neque. Aiduidtsēqui tantiaquin ambi uaidbimboecnuc matsesēn nacnenaaid tantiesa icta. <sup>16</sup> Ēndenquimbo Nuquin Papan, Adoenda, cainquiocnoc matsesēn ambi tantiacpaden nabampampic. <sup>17</sup> Aden, Adoenda, cainquiocquimbi, Abitedishun icbo icquin bēdamboquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabadobēd Bednabe Disteda yacnocquido chiec. <sup>18</sup> Aden chuido-chuidoquai baca cuesunenquio icpanēdash Disteda yacnocquidon.

<sup>19</sup> Adnubien Antioquiya caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nēishcuededpanēdash. Adec nēishcuededshun Pabado cuēnoten se-siash, Unēsosh, queshun nimbanquin buanshun shubu nibēdacno Pabado netampanēdash. <sup>20</sup> Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabadobēd Bednabe nidoapanēdash.

### *Nidaid Sidia caid shubu dadpen icquid Antioquiya yacno choaid*

<sup>21</sup> Adec Dedbe yacno choash tabadquimbi Pabadobēdtan Bednaben chuibanac Esuquidistu tantiaquid dadpen yampanēdash. Auēshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibanpanēdash. <sup>22-24</sup> Aden chuibanshumbic: —Natiamianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquio yec tabad —capanēdash Pabadon. Adotanquin ambia Esus tantiaquid utsi-utsien Pabadobēdtan Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmūnquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidī Iconio yacno choashun adomboembidī chuibanapanēdash. Adecbidī Antioquiya yacno choashun adomboembidī chuibanapanēdash. Antioquiya yacnoēsh puduanec nidec nidaid Pisia caid datambētsenec nidaid Pampidia caid yacno choash nidec <sup>25</sup> shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. <sup>26</sup> Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. <sup>27</sup> Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobēdtan Bednaben chuibanpanēdash. Isadaidpembo dadpen Esuquidistu tantiaquid yamposh, quequin chuipanēdash. <sup>28</sup> Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

## 15

### *Edusaden yacnocquido iccuededec tantianu quiaid*

<sup>1</sup> Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid



dëtemesa abi yacno Esuquidistun yuedtemaid nendac, quequin chuipanëdash. <sup>2</sup> Adnubic Pabadobëd Bednabe Antioquiya yacno choash tabadquin aidon chiaid tantiash: — Nuquin Papan aden chiambo iqueque. Aden chienda — quepanëdash.

Adsho comapenec cuëdquin chushcapanëdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobëdta Bednabe chuishumbic Esuquidistu tantiaquid utsibo chuioaquin aido nidmepanëdash. <sup>3</sup> Adoac Antioquiya yacnoësh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanëdash. Adsho tantiash: — Aid tantiec bëdambo iquebi — quepanëdash anocquid Esuquidistu tantiaquido. Adtanec auëshquio nidequi nidaid Samadia caid yacno choash tabadquin adomboembidi chiac adqueiebidi, Bëdambo iquebi, quepanëdash anocquido. <sup>4</sup> Auëshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobëdtan Bednaben chuibanapanëdash. <sup>5</sup> Aden chiac Esuquidistu tantiaquido, Nuquin Papan naden nata quequin chiaid tantiamequido: — Nuquin Papan naden nata quequin chiacpaden isadaidpembotsen shui dëbid dëtemetiadquidi nec. Nuquin Papan naden nata quequin Moises dada uamiampid nabantiadquid neoaic — quepanëdash.

<sup>6</sup> Adoquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuededpanëdash. <sup>7</sup> Adec yuec onquecuededash nidtoash Petedo nader onquepanëdash: — Chuinu. Tantiata. Ënden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ëmbi chuioasho mibitedishun tantiondac. <sup>8</sup> Ëmbi isadaidpembo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniampadembi isadaidpembo meneoapondash. <sup>9</sup> Utsibo nec, quenquiocquin aidotsen tantiamequin paucoapondash. <sup>10</sup> Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? <sup>11</sup> Padenquio icnuna. Matsestedi icsaquid icsho cuidnushe quiash abided cuidadac, quequin tantiaquiec unësash abëdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec — quepanëdash Petedo.

<sup>12</sup> Aden Petedon chuiquin ënambic Pabadotsen Nuquin Papan tantiamiac ambi natiambocquin naquin isadaidpembo ismebanaid chuipanëdash. Adembidi Bednaben chuioapanëdash. <sup>13</sup> Aid daëdshun chuibanquin nainan Esusën utsi Acobo, Esus tantiaquido tsusio dapa, nadpanëdash: — Ëmbitsen chuinu. Tantiata. <sup>14</sup> Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibëdta aton matses icmiac. <sup>15</sup> Adomboembidi Nuquin Papan chuimiaidën dada uampid nad iqueque. Tantia. Chuinu:

<sup>16</sup> “Isadaidbobëd yuec tabadenquiocboedi padpidec choash aidobëd icoaindabi.

Dabid padon tsyuecquido isadenquiocboedi isadcuenendac

<sup>17</sup> ma aton Icbo matsestedishun istuidpanuna;

ma adembidi isadaidpembon ëmbi cuënaidon aidbidi istuidpanuna,

<sup>18</sup> quec Nuquin Icbo ambi ënden tantiampicpadomboen chiaid nec”

— quiashic abi Acobo onquec: <sup>19</sup> — Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad.

<sup>20</sup> Nëiduidtsëqui dada uaquin isadaidpembo chuibanuna nuquibi: Nuquin Papan uaidbimboecnuc nacnenaaid tantiaquin pete sanaid penda; adembidi, min chiduidtsëqui chudta; adembidi, min bënëuidtsëqui chudmeta; adembidi, Nëish tëtaniaid intacchobi codocaid penda, quequin isadaidpembo chuibanuna. <sup>21</sup> Adec Moisesën dada uaid

iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

<sup>22</sup> Adashic Esuquidistu tantiaquido iccuededec onquec enēdshun embi dada uaid Antioquiya yacno buanuec Edusaden yacnocquid daēd nidta, quequin Pabadobēdta Bednabe nidmepanēdash. Abentsēc Udas cashumbic Badsabas cuēnaid; utsibic, Sidas cuēmēdquid. Aid daēdi Nuquin Papan chiaid comapenen tantiaquidquio icpanēdash. <sup>23</sup> Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ēbi chuibeneta caidobēdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobēdta nidaid Sidia yacno tabadquido, nidaid utsi Sidia yacno tabadquido chedo mibitedi chuiquin dada uaombique. Isec onqueta.

<sup>24</sup> Ēbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. <sup>25</sup> Aden chuisho tantiashun nēmbocquidobēd iccuededec onquequin abentsēcshun tantiachimboen dada uaombi. Aidi nēmbocquid daēdi Pabado Bednabebēdta buantan, quequin chiembi. <sup>26</sup> Unēsmane, quenquio yec capucuenequin Esuquidistu chuibanquido Pabadobēd Bednabe nec. <sup>27</sup> Adquid aid daēd icsho isun aid chedobēdta Udas Sidas chedo mibi yacno nidmembi. Adoac embi dada uacpaden ma mibitedi chuiopanuna abimbo iquec camenuen. <sup>28</sup> Nuquin Papan Mayanēn ēbitedi tantiamiacpaden isadaidbon naden nata quequin chiacpaden nata mibi caisa nebi. <sup>29</sup> Nēidtedtsēqui ēbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidouidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac embi chiacpaden nabanec mibi bēdambo icpec. Padi aiddtsēqui chiembi.”

<sup>30</sup> Aden dada uaquin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanēdash. <sup>31</sup> Aden meniac isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

<sup>32</sup> Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamepanēdash. Adomboembidi chuibanquin Sidasēn tantiameoapanēdash. <sup>33</sup> Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. <sup>34</sup> Adec aido Edusaden yacno nidnubien <sup>35</sup> Pabadon Bednabe chedobēdtan Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibanpanēdash.

### *Pabadobēd Bednabe cuēshēdaid*

<sup>36</sup> Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

<sup>37</sup> Adoquien: —Ma Madcosbidi nidoanu. Chuita —quepanēdash Bednabe.

<sup>38</sup> Adoquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

<sup>39</sup> Adoquien Bednabe aden tantienquio yec Pabadobēd comapenec onquiash Madcosbēd cano antabēdtoanec Chipide yacno nidoapanēdash. <sup>40</sup> Adnubien Pabado Sidas abēd Edusaden yacnoēsh choaed caic: —Nuquibi nidnuna —quepanēdash.

Adec aid daēd nidnuesho isash anocquid Esuquidistu tantiaquido: —Ma Nuquin Papan mibi daēd bēdamboen nidmequin ma mibi bēdamboen namepanuna —cac Pabadobēd

Sidas nidpanēdash. <sup>41</sup> Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibampanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinquiec iccuededacnomboec puduedcuenequin Pabadon chuibanoapanēdash.

## 16

### *Pabadobēd Timoteyo nidaid*

<sup>1</sup> Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. <sup>2</sup> Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuioapanēdash. <sup>3</sup> Aden dadpeshun chuisho tantias Timoteyo buante bumpanēdash Pabado. Adec, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dēbid dētemepanēdash. <sup>4</sup> Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabadon chuioapanēdash. <sup>5</sup> Adembidi Nuquin Papan chiaid chiac ēnden Esuquidistu tantiaquidon tantiabenquiocnobi utsi dadpen Esus tantiaquid yanoapanēdash.

### *Ushquin Masedonia yacnocquid Pabadon isaid*

<sup>6</sup> Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec <sup>7</sup> nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. <sup>8</sup> Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. <sup>9</sup> Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiapondash. <sup>10</sup> Aden tantias: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ēbitsen Pabadobēd nidpondabi.

### *Didia cuēmēdquid Esuquidistu tantiaquid yanaid*

<sup>11</sup> Adanec Todoas yacnoēsh puduanec cano antabēdtoanec cuebi nidequi acte nēnantanquio nidaid nacnēdquid Samotodasia caid yacno choash Pabadobēd icquido tabadtuidpondash. Badiadash auēshquio puduanec cano antabēdtoanec nidquimbi potebidanec nidaid Masedonia caid yacno ēbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec <sup>12</sup> nidequi shubu dadpenquio icquid Pidipos caid yacno domanobo dadpenquioshē tabadacno yuec ushec tabadpondash.

<sup>13</sup> Pidipos yacno tabadashic isadaidbo iccuededte badiadēn Nuquin Papa chiec utsibo onquedeniacno istuidnuec puduanec shubu nibēdacno nidequi acte utsi cuēmambi choapondash. Ambo choshon iccuededquido chidobo istuidshun Esuquidistu Pabadon chuibampondash. <sup>14</sup> Pabadon chuibanacno chido Didia cuēmēdquid shubu dadpen icquid Tiatida caid yacnoēsh choquid icpondash. Aidēn piucquid bednuen dashcute

cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. <sup>15</sup> Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: –Esuquidistu tantiaquid mibipadquid nebique. Con shubuno ushec cho –cac nidash Didian shubun puduedash Pabadobëd icquido tabadpondash.

*Pabadobëdta Sidas quënën nauedaid*

<sup>16</sup> Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquetuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash. <sup>17</sup> Pabadobëd icquido bëquetuidshun tsibambëec choec aid chido: –Nëid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nëid dadatedi nec –quec <sup>18</sup> badiadquidën-badiadquidënquiec comapenec cuëdpondash.

Adec cuëdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: –Esuquidistun nadatiambocquin naidënquio dapuduenta –cac badedquio mayan icsa dapuduempondash. <sup>19</sup> Aden dapuduemiac chido bëdanacsho isun abi yuaquidon: –Nëbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantias nëishun Pabadobëdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bëshun utsibon sambanaid anoentsëqui abi chuiquido icsho isun chido yuaquidon Pabadobëdta Sidas ambo buampondash. <sup>20-21</sup> Aden abi chuiquid tsadacno bëash: –Nëid dada daëd isadaidbo nec. Nëmbo choshon abi chuiquidon naden nata quequin chiaid chuibanec. Èbitedi domanobo icquin ambi chiaid ëbitedishun natemaid icnuc matsestedi chushquecuededosh –quepondash chido yuaquido abi chuiquido chiec. <sup>22</sup> Aden chuisho tantiaquidon chiac dadpen cho-choash iccuededquin Pabado bëquidon chiacpadomben aidontsen chuioac abi chuiquido: –Bëboedon dashcute chicshun cueshcaten cuesta –cac sondadon cuespondash. <sup>23</sup> Aden comapenen cuesmeshun buameshun quënën nauedmeshun ambi quënën nauedaid ista caid chuiquin Pidipos yacnocquido chuiquidon: –Puduenanec cuenushe queshun nëid daëdi bëdamboen isquiota –capondash. <sup>24</sup> Adsho tantiasnun ambi ista caidën Pabadobëdta Sidas nënantanquio quënën nauedquin tsadunshun cuate shëcuë uaidën tausunash puduentanquin quënë bëdamboen bëdashpanëdash.

<sup>25</sup> Aden bëtashash aton shubu dayunquiocquidën puduedambic inchëshpotsembo Pabadobëd Sidas Nuquin Papa chiec onquepanëdash. Adecbidi Nuquin Papan naid chiec cuëdëmpañëdash. Adec cuëdënsho utsibon tantianubi <sup>26</sup> comapenec nidaid ishcnububi mëtanaiatdedi mëchiquidpanëdash. <sup>27</sup> Adnubien ista caid isec tsadboedi ushtanec isucunquin isac shëcuë bëtashaid ënden shëcniac. Adsho isash ista caid: –Quënën nauedaïdo puduen-puduempacnui –quetanec: –Chuiquid dapabon ëbi cuesunemet-siash –queshun siadnuequin chështe abi tsiusudaïd chicsho <sup>28</sup> istanquin Pabadon: –Quënën nauedaïdtedi nëmbo iquebique. Seshuniadenda –quequin comapenen cuëmpañëdash.

<sup>29</sup> Adoquien, seshuniadtsemboedën: –Tabote bec cho –cac ambi namiaidën tabote bedtanquin meniac tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpanëdash. Mibi daëdi bëdambocquid icnubi adquidpenquio nebi, quequin tantiaquin ismepañëdash. <sup>30</sup> Adsho isun Pabadon nidtomiaqui seshuniadtsemboed bëyucanec nidquin aton shubun Pabadobëdta Sidas yuedash: –¿Nuquin Icho yacno puduednush mitsipadequibi ëbi icsaid cuidadpeque? Chui. Tantanu –quepanëdash seshuniadtsemboed.



<sup>31</sup> Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unësash Esuquidistu aton Papa yacno puduedash abi tantiaquido yuedquid neque. Mibi icsaid ënash, Esuquidistu con Icho nec, quequin abimbo tantiata <sup>32</sup> —queshumbic seshuniadtsemboedbëd icquido Esus tantiamenuen Nuquin Icbon chiaid Pabadon chuipanëdash.

<sup>33</sup> Adoaqui Pabadobëdta Sidas cuesaid chiuë acten bëpanshunquin nainacsho aton shubun icquido Esuquidistu tantiaquido yansho isun aitedi Pabadobëdtan Sidasën acten mentobampanëdash. <sup>34</sup> Aden mentobanaqui aton shubun yuedshun pemepanëdash. Adashic, Nuquin Papan chiaid abimbo tantiaquid yec ambi bëdambo icmiaido seshuniadtsemboedbëd icquido icpanëdash.

<sup>35</sup> Adashic, badiadash Pidipos yacnoquido chuiquidon: —Nauedaïd shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caïd adomboembidi chuiopanëdash. <sup>36</sup> Aden chiac ista caïdën: —Quënën nauedboed daëd pudueme, quequin chuiquid dapabon chiosh, quequin aidon chomïaidën chioshibique. Dacuëdenquïo yec nid —capanëdash Pabadobëdta Sidas chuiquin.

<sup>37</sup> Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquïo caïmbi. Ëbi daëdi puduemenuec ma chuiquid dapabo abibi chopanuna —quepanëdash.

<sup>38</sup> Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuïsho tantïash chuiquid dapabo comapenec dacuëdcuededpanëdash. <sup>39</sup> Adec dacuëdec nidequi nauedaïd shubuno choash: —Domanobo nec, quequin tantienquiocquin mibi quënën nauedmiombi —queshun puduemetanec: —Pidipos yacnoësh nidtan —capanëdash Pabadobëdta Sidas chuiquin. <sup>40</sup> Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabadon chuïbampanëdash. Aïdo chuïbidanec Pabadobëd icquido nïdoapanëdash.

## 17

### *Tesadonica caïd yacnoquido isadaïdbo nëïshcuededaïd*

<sup>1</sup> Pidipos yacnoësh puduanec nidequi Pabadobëd icquido shubu dadpen icquid Ampipodis caïd datambidanec shubu dadpen icquid Apodonia caïdtsen datambidanec shubu dadpen icquid Tesadonica caïd yacno choash, Nuquin Papan chiaid chuïbante shubu iquec, qesho tantïash Tesadonica caïd yacno Pabadobëd icquido tabadpanëdash.

<sup>2-3</sup> Ambo tabadec isadaïdbo iccuededte badiadën abi nidteniacpadec Nuquin Papan chiaïd chuïbante shubu yacno choshon Pabadon Esus tantiamenuen Nuquin Papan ënden chiampid chuïbampanëdash. Nuqui icsaid bedshunash abided cuidadec Esuquidistu unësaid ambi uincuemetequid Nuquin Papan Chomïaidquïo nec. Aïdi nuqui Quidistu caïd neoaic, quequin chuïpanëdash Pabadon. Sabado 3ted matamequin adomboen chuïbampanëdash. <sup>4</sup> Aden chuïbanaqui Esus tantiaquid utsi-utiec yampanëdash. Nëdic, isadaïdbo utsi-utsiec; utsibic, Nuquin Papa tantiaquido quïdieco matses dadpen; utsibic, anocquido chuiquid dapabon chïdo utsi-utsiec aïdo Esus tantiaquid yampanëdash.

<sup>5</sup> Aden Pabadon chuïbanac Esus tantiaquid dadpen yansho isash isadaïdbo utsibo nëïshun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëïshmiac natia chushquecuededpanëdash. Adec chushquec nidequi Pabadobëdta Sidas bednuec Ason cuëmëdquïdën shubuno puduedec nidpanëdash. <sup>6</sup> Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chïeshënuquidon buanec abi chuiquid dapabo yacno choash: —Nïdaïd utsi-utsiec yacno capucuenequin chuitemaïd chuïbanquïdo nëmbo <sup>7</sup> choacsho Asonën

aid daëd yuedaccosh. Nuqui ancaquid Sesadën chiaid niacquin ancanquid utsi Esus cuëmëdquid iquec, quequin chuibanec –quepanëdash Pabado chieshënquido abi chuiquido chiec.

<sup>8</sup> Aden, Ancanquid utsi iquec, quequin Pabadobëdtan Sidasën chiec, qesho tantiash chuiquid dapabo iccuededquidobëd comapenec chushquecuededpanëdash. <sup>9</sup> Adtanec abi chuiquid Asombëd icquido caic: –Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yucshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene –capanëdash Tesadonica yacnocquido chuiquid dapabon Asombëd icquido chuiquin. Adoaquien piucquid meniac bedshun: –Min shubuno nidtan –cac nidanepanëdash Asombëd icquido.

### *Bedeya yacnotsen tabadaid*

<sup>10</sup> Adshumbic bednushe queshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanëdash. <sup>11</sup> Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabaton chuibanoasho tantiashun bëdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanëdash Bedeya yacnocquidon. <sup>12</sup> Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

<sup>13</sup> Adnubien, Bedeya yacnoshontsen Pabaton chuibanec, qesho tantiash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushquecuededpanëdash. <sup>14</sup> Adsho tantiashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidasbëd Timoteyo nidenquio yec Bedeya yacno tabadnubien <sup>15</sup> Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: –Ëbi chobocnobidi Bedeya yacno nidoaibi –qesho tantiashun Pabaton: –Mibi yacno choash, Badedquio Atenas yacno chota, quiosh Pabado, quequin Sidasbëdta Timoteyo chuita –capanëdash. Aden Pabaton chiaquien Bedeya yacnocquido abi yacno nidoapanëdash.

### *Atenas yacnotsen Pabado tabadaid*

<sup>16</sup> Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, queshun cainec capuquimbi Atenas yacnocquidon nacenaid isbampanëdash. Aidon Nuquin Papan uaidbimboecnuc nacenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesa Atenas yacnocquido nec, quequin tantiec Pabado unësquio yampanëdash. <sup>17</sup> Adec unësquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabaton chuibampanëdash. Adembidi anocquidon piucquid bednuen aton na sambanshun ismiacno nidshun adomboembidi Pabaton chuibanoapanëdash. Isadaidbobëd onquequin Esuquidistu Pabaton chuipanëdash. Adembidi isadaidpembobëd onquequin Esuquidistu chuiopanëdash. <sup>18</sup> Anoshon chuibansho tantiash epicudeyo cuëmëdquidën chuinëdacpaden tantiaquido Pabadobëd onquepanëdash. Adembidi tantiash estoico cuëmëdquidën chuinëdacpaden tantiaquido Pabadobëd onquepanëdash. Aido Pabadobëd onquequin Pabaton Esus chuisho tantienquio yec: –¿Atodain comapenec onquequin nëid dadan

chuiplash? –quepanēdash. Adnubien utsi: –Matses utsibon papa cain cuēnaid chuibanec nepanui –quepanēdash. Pabadon Esuquidistu unēsash uincuenaid chuisho tantiaish adpanēdash. <sup>19-20</sup> Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: –Mimbi chiaid ëmbi tantiacmaid nec. ¿Midapadquidquio mimbi chuibaneque? Tantianu. Chuiban –quepanēdash abi bëquido caic. <sup>21</sup> Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën-badiadquidënquiec utsin-utsinquien ambi tantiacpaden chuibansho tantianuec iccuededpanēdash.

<sup>22</sup> Aden mimbi tantiacpaden chuibanta caquien nënantanquio nidtoshon naden Pabadon chuibanpanēdash: –Chuibanu. Tantiata. Mimbi papa cain cuēnaid mimbi tantiaid iquec, quequin tantiemi. <sup>23</sup> Capucuenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabëcaid icnubi mimbi cuēnacmaid abentsëc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsëqui iccosh. Mimbi cuēnacmaid mimbi tantiacmaid mibi chuibanu. Tantiata.

<sup>24</sup> “Ëmbi Nuquin Papa cain cuēnaid nidaidbëdtabi abu uashumbic aidënquiocquidtedi uaquidquio nec. Abitedi uaquidquio yec abitedishun icbombo aidi nec. Aidi tabadmenuequin matsesën shubu uashunaidën tabadesa nec. <sup>25</sup> Aidi abitedishun Icbo icnuc abitedi aton na nec. Adquid icsho, Con na mibi menenu, matsesën aid catiapimbo iquec. Aidën tantiacpadec ëbitedi nëmbobi tabadebi. Aidën tantiacpadec ëbitedi tiboquebi. Aidën tantiacpaden ëbitedishun bedbanoaimbi. <sup>26</sup> Aidëmbi bëyuc dada uampidën tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inchështanec badiadoaic. Adecbidi, ushë nidash choaic. <sup>27</sup> Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nepec? queshun ëbi tantiaquin Icbo ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. <sup>28</sup> Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantiata. Chuinu: Nuquin Papan bacuëbo ëbitedi nebi, quequin min mëdimbon chuipanēdash.

<sup>29</sup> “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquioctiadquidi matses nec. <sup>30</sup> Enden matsesën ambi nacnenaid aden cuënsho tantiaish Nuquin Papa, Chën. Adoenda, quenquiochoedi nëbi, Mimbi icsamboen tantiaid ënta, quequin chiec. <sup>31</sup> Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuidbanendac. Ambi abipadquid matses icmiaid, Nuquin Papan matsesën naid chuibanquid icmenu caid unēsacsho isun ambi chiampicpaden nanuequin Nuquin Papan uincuemepondash –quepanēdash Pabado Adeyopaco yacno iccuededquido Esus tantiamenuc.

<sup>32</sup> Adec aidi unēsacsho Nuquin Papan uincuemepondash, quequin Pabadon chuisho tantiaish utsi-utsiec mamënshumënubi utsi-utsiec: –Aidën chuiboed padpiden tantianuna –quepanēdash. <sup>33</sup> Adoaquien, Pabado Adeyopaco caid yacnoësh nidpanēdash. <sup>34</sup> Adec nidshun yuec ushquin chuisho tantianu quec Pabadobëd iccuededquid utsin-utsinquien padpiden-padpidemboen tantiabededpanēdash. Aden Pabadon chuibanac utsi-utsiec Esuquidistu tantiaquid yampanēdash: Nëidic, Dionisio cuëmëdquid Adeyopaco caid yacno iccuededquido chuiquid nepanēdash. Utsibic, chido Damadis cuëmëdquid adecbidi Esuquidistu tantiaquid yampanēdash. Aidobëd utsi-utsiec Esus tantiaquid yampanēdash.

## 18

### *Codinto yacno Pabado tabadaid*

<sup>1</sup> Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash. <sup>2</sup> Ambo isadaidbo Aquida cuëmëdquid nidaid Ponto caid yacnoshon tishaid Pabaton istuidpanëdash. Isadaidbotedi nidaid Itadia yacnoësh nidtan, ancanquidën cac aton chido Pidisida cuëmëdquidbëd Codinto yacno choash Aquida icpanëdash. <sup>3</sup> Nidaidën capuquid yua bitsi shubumpi nacnenquid abipadquid Aquidabëd aton chido icsho isun aidobëd tabadquin Pabaton shubumpi nacnemanpanëdash. <sup>4</sup> Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabaton chuibanpanëdash.

<sup>5</sup> Ambo tabadnubi Sidasbëd Timoteyo nidaid Masedonia yacnoësh choambic shubumpi nacnenenquiocquin isadaidbo Esuquidistu tantiamenuen Pabaton chuibanpanëdash. <sup>6</sup> Adsho, Aid tantiatiapi, quequin isadaidbon Esuquidistu icsamboen chuisho tantiash abi daëd dasiuidaid bëntsecquid chicshun ishacunec Pabado: —Esuquidistu mibitedi chiombi. Aid tantiesa yec unësash Nuquin Papa yacno puduedenquio mibitedi iquendac. Adquid Nuquin Papan cuidquin nësecatequid nendac. Nëbi padpiden mibi chienquio iquembi. Isadaidpembon tantiatsiash, quequin aido chuibanembi —quepanëdash Pabado isadaidbo tantiesa chiec.

<sup>7</sup> Aden chiashic Nuquin Papan chiaid chuibante shubu yacnoësh puduenanec aid dayuntsëqui shubu icquidën Pabado puduedpanëdash. Aid shubu icbo Usto cuëmëdquid Nuquin Papa tantiaquid icpanëdash. <sup>8</sup> Uston shubunoshon Esuquidistu Pabaton chuibanac Quidispo cuëmëdquid Esuquidistu tantiaquid yampanëdash. Aidi Nuquin Papan chiaid chuibante shubun iccuededquido chuiquid dapa icpanëdash. Aidbëd aton shubun icquidtedi Esuquidistu tantiaquid yampanëdash. Adecbidi Codinto yacnocquid dadpen Esuquidistu tantiaquid yampanëdash. Adsho adquidtedi acten mentobampanëdash.

<sup>9-10</sup> Adashic, yuecash inchëshën Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ëmbi chiac dacuëdenquiocquin comapenen chuideneta. Mibi dayun uaquidquio nebi. Aden dayun uasho ëbi tantiesabon mibi natiametiapimbo iquendac —quepanëdash Pabado caic. <sup>11</sup> Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabaton chuidonepanëdash.

<sup>12</sup> Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. <sup>13</sup> Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh —quepanëdash Pabado chieshënquido Cadion caic.

<sup>14</sup> Adoquien Pabado onquetsenubi Cadiomba onquedopanëdash: —Tantiata, isadaidbo. Mibi chuinu. Nëidën icsamboen nabanaid mibitedishun ëbi chuisho tantiatsiambi. <sup>15</sup> Aden chienquio yec, Nëidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquio nëid dada nec, mibi queoapec. Aden mimbi chuisho tantiashun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. <sup>16</sup> Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaidon puduemepanëdash. <sup>17</sup> Adoac pduenshumbic Nuquin Papan chiaid chuibante shubun iccuededquido chuiquid utsi



Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquio yec otacquo tsadpanëdash.

<sup>18</sup> Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabaton matasmepanëdash. <sup>19</sup> Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabaton. <sup>20</sup> Aden chuibanasho tantiashun: —Adomboembidi chuibanuec ¿ada ëbëd yuec tabadtsia? —iccuededquidon caquien: —Nëbi padenquio iquebi. <sup>21</sup> Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquio puduanec nidequi cano antabëdtopanëdash Pabado.

<sup>22</sup> Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash. <sup>23</sup> Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanopanëdash Pabaton.

<sup>24</sup> Adnubien isadaidbo Apodos cuëmëdquid shubu dadpen icquid Adecandedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. <sup>25</sup> Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. <sup>26</sup> Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibampanëdash. Aden chuisho tantiash, Ëbi yacno isec cho, qeshun Aquidan aton shubu yacno buan-shun Esuquidistu choaid ambi nadatiambocquin naidbëdtabi abi unësash uincuenaid chuibampanëdash Aquidabëdtan aton chidon Apodos tantiamequin.

<sup>27</sup> Aden Esuquidistu bëdamboen tantiash Epeso yacno yuec tabadquin Esuquidistu Apodosën chuibampanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiashun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Ëmbi isaid neque. Yuedta, quequin dada uashun, Apodos Epeso yacnocquidon menepanëdash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bëdamboen tantiamenuen chuibampanëdash. <sup>28</sup> Aden chuibanquimbic isadaidbo Esuquidistu tantiesabo icsho isun abëd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibampanëdash.

## 19

### *Epeso yacno Pabado abëd icquido tabadaid*

<sup>1</sup> Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanëdash. Ambo choshon Esuquidistu tantiaquido istuidshun: <sup>2</sup> — ¿Esuquidistu tantiaquido icshoda Nuquin Papan aton Mayan mibitedi menepanëdash? — capanëdash Pabaton.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

<sup>3</sup> Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiec.

<sup>4</sup> Adoaquien: —Mibi icsaid ěnta, qeshun abimbo tantiaquidtedi acten mentobanquin, ěbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquido chiec. <sup>5</sup> Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanēdash. <sup>6-7</sup> Aden aidtedi acten mentoacsho mēdanten Pabadon mamishbanac aid doseted Nuquin Papan aton Mayan menepanēdash. Aden meniac abi onquiacmaidēnquio onquec Nuquin Papa chiec cuēdēmpañēdash Epeso yacnocquido.

<sup>8</sup> Adashic Nuquin Papan chiaid chuibante shubun puduedshun Pabadon Nuquin Papabēd tabadaid chuibanpañēdash. Cuembo tantiamenuquin ushē choaid 3ted nidmequin badiadquidēn-badiadquidēnquien dacuēdenquiocquin Nuquin Papan chiaid Pabadon chuibanpañēdash. <sup>9</sup> Aden chuisho tantiash pamumēdacbimboec tabadquin, Tantiatiapibi, quequin utsin-utsinquien chieshēmēnquioquin Esuquidistu icsamboen chuipanēdash. Aden chiac Esuquidistu tantiaquidobēd Pabado, Nidnu, quianec Nuquin Papan chiaid chuibante shubu yacnoēsh puduanec nidec Tidano cuēmēdquidēn chuibante shubu yacno choshon adomboembidi tantiamenuen matsesbēd onquequin Nuquin Papan chiaid chuibanpañēdash. <sup>10</sup> Seta daēd matamequin adomboembi chuibanpañēdash Pabadon. Aden chuibansho tantiash nidaneshun chiac nidaid Asia caid yacnocquidon tantiapanēdash. Adoac isadaidbobēd isadaidpembo Esus tantiaquido yampanēdash. <sup>11</sup> Epeso yacno Pabado tabadsho Nuquin Papan nadatiambocquid icmiacsho <sup>12</sup> Pabadon dada cuēscashun dashcute cuēshē buanshun daicsaid mishbanac bēdampañēdash. Adembidi Pabadon dada cuēscabanaidēn nēnquid mishac bēdampañēdash. Adembidi pashuaidtsen pamishac bēdanoapanēdash. Adembidi mishac mayan icsa dapuduempañēdash.

<sup>13</sup> Adnubien mayan icsa dapuduemenuen Pabadon chiacpaden tanquin isadaidbo ut-sibon: —Esus Pabadon chuiboedēnquio dapuduen —capanēdash. <sup>14</sup> Pabado tanuequido isadaidbo chuiquid Esqueba cuēmēdquidēn mado 7ted icpañēdash. <sup>15</sup> Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tantuanu. Chui <sup>16</sup> —qeshun nebudquin dashcute ched-chedcapamboen mayan icsan cuesactaniaqui shubu nuntanuēsh puduenanec cuempañēdash Esqueban mado. <sup>17</sup> Adec cuensho isquidon chiac Epeso yacnocquid isadaidbobēd isadaidpembo dacuēdcuededpañēdash. Adec dacuēdquin, Dacuēdampambo iquec. Esuquidistu bēdambocquid nec, quequin tantiabededpañēdash. <sup>18</sup> Esuquidistu tantiesa icboedi Esuquidistu tantiaquid yanec dacuēdenquio yec Esuquidistu tantiaquido iccuededacno nidshun abi icsaid chuibanpañēdash. <sup>19</sup> Adquid dadpenshun icsamenuen ambi ompoquin naid ismenquiochoedombi, Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanēdash. Aden tauiboed menequin piucquid dadpen bedtsiandac, quepanēdash. <sup>20</sup> Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

<sup>21</sup> Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanēdash Pabado. <sup>22</sup> Aden chiash Asia caid yacno abi tabadquin Masedonia caid yacno abia Timoteyobēdta Edasto nidmepañēdash Pabadon.

<sup>23</sup> Aid daëdi nidan Epeso yacno tabadquin Esuquidistu Pabadon chuibanaquien tantiesabo nëishpanëdash. <sup>24</sup> Adquid Demetedio cuëmëdquid Diana caidbimboecnuc nacnemequid icpanëdash. Aidëmbi ambi nacnemaiid menequin piucquid dadpen bedbampänëdash. <sup>25</sup> Aden Esuquidistu tantianu quesa icquin ambi Dianabimboecnuc nacentata caidobëdta abipadquid Diana nacnemequid utsibo iccuededmeshun Demetediön nadopanëdash: —Nuqui tantiaid Dianabimboecnuc nacnenshun menequin piucquid dadpen nuqui bedbanec. <sup>26</sup> Aden nanubi nidaid utsi yacnoësh Pabado cuëmëdquid nëmbo choshon utsi comapenen chuibanac Epeso yacnocquid dadpembëdta nidaid Asia caid yacnocquid dadpenshun tantiec. Dianabimboecnuc nacnenaid tiboquesa iquec. Adquid matsesën tantiaid abimbo ictiapimbo iquec, quequin Pabadon chiec. <sup>27</sup> Aden chiac matses dadpenshun tantiash Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaiddëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaidd tiboquesa icsho matsesën tantienquio ictiadquidi nec, queoapec Pabado. Aden chiac nidaid Asia yacnocquidon dadpenshun Diana tantiaboedombi padenquio yampec. Aidëmbi tantienquio yanshun aidbimboecnuc nuqui nacnenaidd bedenquio iquendac — quepanëdash Demetedio.

<sup>28</sup> Aden chiac ambi chomeboedtedi, Piucquid ëbi menequin ëmbi nacnenaidd matsesën padpiden bedenquio ictsiash, quec nëishash: —Epeso yacnocquidon tantiaid Diana bëdambo iquec —quec comapenec cuëdcuededpanëdash. <sup>29</sup> Adec comapenec cuëdcuededsho tantiash Epeso yacnocquid utsibo aidobëd cuëdcuededpanëdash. Adec cuëdcuededquin nidaid Masedonia caid yacnoësh Pabado bëd choboed Cayobëdta Adistadico bedshun iccuededte shubu yacno cuëdcuededquidon buampänëdash. <sup>30</sup> Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanëdash Esuquidistu tantiaquidon. <sup>31</sup> Adembidi, anocquido chuiquid utsin-utsinquien Pabado chuioapanëdash.

<sup>32</sup> Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin tantienquio yec tabadpanëdash. <sup>33</sup> Adnubien, Nuqui tantiacpadomböen chuitan, quequin isadaidbon Adecanededo cuëmëdquid nënantanquio tsicunepänëdash. Aden tsicunequien nidtoash: —Tantia. Chuinu —quequin <sup>34</sup> daëdpactsëc chiec onquesho tantiash onqueboedi ënëdash tabadnubi: —Isadaidbo aid nec —quesho tantiash: —Epeso yacnocquidon Diana cain ambi tantiaiddbimboecnuc nacnenaidd bëdambo iquec —quec baded-badedquiecuëdcuededpanëdash.

<sup>35</sup> Adec cuëdcuededshobien Epeso yacnocquidon naden nata quequin chiaidd dada uaquidën ënëdmenuequin nadopanëdash: —Epeso yacnocquidon tantiaata. Chuinu. Diana caidbimboecquid abucuësh pädaiddbimboecnuc nacnenaidd nuqui comapenen tantiaiddbëdta abi tabadte isquido nuqui nec. Adquid Epeso yacnocquido nec, quequin nidaidd utsi yacnocquidon tantiec. <sup>36</sup> Aden utsibon tantiec, quequin tantiaquin icsamboen nainda. <sup>37</sup> Dada daëd mimbi nëmbo bëboed Diana caidën shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. <sup>38</sup> Adenquio icnuc Demetediobëd icquido abi chushquiaidd chuinuec Epeso yacnocquidon naden nata quequin chiaidd tantiaquid yacno nidshun <sup>39</sup> mimbi tantiacpaden chuita cuëdcuededenquiocquin. <sup>40</sup> Comapenec cuëdcuededec qesho tantiash ancanquid dapan Epeso yacnocquido bëdamboen tabadmeta caid yacno nidshun chiac, Ancanquid dapan chiapadec Epeso yacnocquido tabadenquio iqueque. Cuëdcuededquido chome, nuqui catsiash. Aden chomiacc ¿atotsi nuqui chuipe? <sup>41</sup> Aidën nuqui chomensushe quiash min shubuno nidaneta —capanëdash Epeso yacnocquidon naden nata quequin chiaidd dada uaquidën. Aden chiac Demetediobëd iccuededquido nidanepänëdash.

## 20

### *Masedonia yacnocquido isbidanec nidequi Quedesia yacnocquido isbidanec nidaid*

<sup>1</sup> Natia cuëdcuededboedo nidanian Esuquidistu tantiaquido chomiash Pabado: — Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. <sup>2</sup> Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. <sup>3</sup> Ambo choash ushë abentsëc chotsëcnuic nidmec tabadash: —Nidaid Sidia caid yacno nidnu —quepondash. Adsho tantiaashun: —Ambo nidacsho mibi cuesunenuquin isadaidbon cainec —cac nidaid Masedonia caid yacno Pabado nidoapondash. <sup>4</sup> Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic Tedopimo cuëmëdquid. Aidedi icpondash. <sup>5</sup> Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. <sup>6</sup> Aidedi nidand pan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

### *Eyutico unësacsho uincuemiaid*

<sup>7</sup> Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquieic. <sup>8</sup> Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. <sup>9</sup> Pabado onquenubi nëbi caniaid, Eyutico cuëmëdquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash budbudshun unësacsho isbedednubien <sup>10</sup> Pabadotsen budquin dayumbudec: —Unësboedi abi tiboquianeque. Shubicuededenda —quepondash. <sup>11</sup> Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquieic. Adec badiadbudbon Pabadobëd icquido shubu nuntanuësh puduem-puduenubien <sup>12</sup> paëdboed aton shubuno utsibobëd nidpondash bëdambo yec.

### *Todoas yacnoësh puduanec Mideto yacno chote*

<sup>13</sup> Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi. <sup>14</sup> Adec nidequi Ason yacno choshon istuidac Pabado ëbëdi cano antabëdtoanquin potiaash shubu dadpen icquid Mitidene caid yacno choapondash. <sup>15</sup> Auëshquio puduanec nidec badiadash acte nënantan nidaid nacrëdquid Quio caid datambidanec nidash badiadash acte nënantan nidaid nacrëdquid utsi Samos caid datambidanec shubu dadpen icquid Mideto caid yacno choapondash. <sup>16</sup> Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

### *Epeso yacnocquido tsusiobo Pabadon chuibanaid*



<sup>17</sup> Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. <sup>18</sup> Aden chomeshun naden aido chuipondash: —Chiembique. Tantiata. Èbi ènden nidaid Asia caid yacno choash mibèd yuec tabadquin nabanaid mibitedishun istenepondac. <sup>19</sup> Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon èbi chuibeneta cacpaden èbi bunaid tantienquiocquin ambi chiaid mibitedi chuibanondambi. Tantiesa icscho isash shubiquiondabi. <sup>20</sup> Esuquidistu mibitedi bédamboen tantiamenuen matses dadpen iccuededacnoshon chuibanondambi. Adembidi shubu utsin-utsinquec puduedcuenequin chuibanondambi. <sup>21</sup> Nuquin Papan chiaid abimbo tantiaquin mibi icsaid ènshun aton Mado Esuquidistu tantiaquid icta, quequin isadaidbobèdta isadaidpembo chuibanondambi.

<sup>22</sup> “Aden chuibanshobi Nuquin Icbon Mayanèn: Edusaden yacno nidta, quequin chuioposhi. Aden aidèn chuibocpadequi nidebi. ¿Atotsi èbi capatsiash Edusaden yacnocquidon? quec dacuèdenquoio yec nidebi. <sup>23</sup> Shubu dadpen yacnoshon-yacnoshonquien Nuquin Papan Mayanèn èbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quènè iquendac, quequin chioishi. <sup>24</sup> Aden Nuquin Papan Mayanèn chuisho tantiaishi, Èbi cuesunepanundac, quenquoio yec Edusaden yacno nidoaibi. Esuquidistun èbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabèd tabadte iquec, quequin chuibanembi.

<sup>25</sup> “Nèshunquoio Nuquin Papan chiaid èmbi chuibansho mibitedishun tantiabonondaidon nèuèshquoio èbi nidacsho mimbi isoainquoio iquendac. <sup>26</sup> Èmbi nèshunquoio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac. <sup>27</sup> Tantienquioctsiash, quenquiocquin Nuquin Papan tantiacpaden chuibanombi. <sup>28</sup> Aden chuibanash nèbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bédamboen isban icsamboen nabanec tabadnushe qeshun. Nuquin Papan Mayanèn aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unèspanèdash. <sup>29</sup> Èbi nidan abimbo chiacbimboen chuiquid Esuquidistu tantiaquido chuiquid icnuec choendac. <sup>30</sup> Adembidi mibèdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquoio icnuequin adoendac. <sup>31</sup> Adquid Esuquidistu tantiec iccuededquido cuèshèdmequid neque. Ista. Adquid iquendac, quequin mibèdi tabadquin ènenquiocquin chuibanondambi. Adquid choec, quequin mibitedi chiec shubiondabi.

<sup>32</sup> “Bédamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bédambo icmeshun abèdi tabadmendac. <sup>33</sup> Mibèd tabadec, Min piucquid bec cho, qesa niondabi. Adecbidi, Min dashcute bec cho, qesa niondabi. <sup>34</sup> Èmbibi shubumpi nacenashun menequin piucquid bedshun con na bedondambi. Adembidi nacenashun bedshun èbèd capuquido menabanondambi. <sup>35</sup> Adembidi chonoadshun aton na bedshun natiapimbocquid meneta, quequin mibitedi ismenabanondambi. Nuquin Icho Esuquidistu nidaidèn tabadec nadpanèdash: ‘Utsin natiapimbocsho menequid Nuquin Papan bédambo iquebi camiaid nendac. Nabanenquoio yec bedshumènquidquoio icscho Nuquin Papan bédambo iquebi camenquoio iquendac,’ — quequin Esuquidistun chiacpaden Epeso yacnocquido tsusiobo chuipondash Pabadon.

<sup>36</sup> Aden chiashic Pabado Nuquin Papa chuinuec utsibobèd danèshèn seabudcuededash onquecuededpondash. <sup>37</sup> Aden Nuquin Papa chiec onqueshumbic nidtocuededshun

abitedishun Pabado chuiboed tantiaquin Pabado dayumbededquin shubi uabed-edpondash. <sup>38</sup> Èbi padpiden mimbi isoainquio iquendac, Pabado qesho tantiash shubicuededpondash. Adec shubiquin dayumbudash unësquio yec Epeso yacnocquido tsusiobo Pabodobèd cano yacno nidanepondash.

## 21

### *Edusaden yacno Pabado nidoaid*

<sup>1</sup> Epeso yacnocquido tsusiobo acte cuëman tabadnubi cano antabèdtoanec Pabodobèd capuquido nidquimbi cuebi potiaash acte nënantan nidaid nactnèdquid Cos caid yacno choapondash. Badiadnuc auëshquio puduanec nidec acte nënantan nidaid nactnèdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. <sup>2</sup> Ambo choashic nidaid Penisia caid yacno cano dapa utsin nidnuequid istuidash antabèdtoanec Pabodobèd capuquido nidoapondash. <sup>3</sup> Adec nidquimbi acte nënantan nidaid nactnèdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bèaid icbo yacno buamepondash. <sup>4</sup> Aden buanububi Esuquidistu tantiaquido yacno nidaneponduedash 7tedec ushec Pabodobèd capuquido tabadpondash. Ambo tabadnubi, Edusaden yacno Pabado cuesunenuquid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. <sup>5</sup> Aden chiaqui cano icbo nidnuesho isash padpidec cano antabèdtoanec, Nidnu, quepondash Pabado. Aid nidnuesho isash Esuquidistu tantiaquido bènèbèdi aton chido aton bacuëbo chedo Pabodobèd acte cuëmano choash Nuquin Papa chiec onquecuededpondash. <sup>6</sup> Adec Nuquin Papa chiec onqeshun, Nidec nid, cac Pabodobèd icquido cano antabèdtoanubien Tido yacnoësh acte cuëmano chobedo aton shubuno nidaneopondash.

<sup>7</sup> Adec cano antabèdtoanec auëshquio nidec shubu dadpen icquid Todemaida yacno choash Pabodobèd capuquido tabadtuidpondash. <sup>8</sup> Adec anocquidobèd tabadec badiadash cano antabèdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niente meneta caid utsi 6tedibèd Uedipe icpondash. <sup>9</sup> Aidën champibo 4tedi aton bènën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

<sup>10</sup> Adec Uedipebèd yec tabadnubi Nuquin Papan naden nanun chiaid chuiquid utsi Accabo cuëmèdquid nidaid Udeya yacnoësh chopondash. <sup>11</sup> Adec choshon Pabado tsiute bedash tataniadash mètaniadash Accabo nadpondash: —Nuquin Papan Mayanën naden èbi chioshe. Tantiata. Chuinu. Èmbi nabocpadomboen isadaidbon Edusaden yacno tabadquidon nèid tsiute icbo bedshun tataneshun mètaneshun buanshun, Unës uata, quequin isadaidpembo menendac —quepondash Accabo Pabado chiec.

<sup>12</sup> Aden Accabon chuisho tantiash shubiquin Pabodobèd chobedo Uedipen shubun icquidobèdtan, Edusaden yacno nidenda, quequin Pabado chuioapondash. <sup>13</sup> Adoquien: —¿Atotsi canuen shubiquin èbi icsambo icme? Edusaden yacno nidshun Nuquin Icbo Esuquidistu chuibansho èbi taneshun unës uatsiash, quequin tantiaquin abi Esuquidistu chuibanuna —quepondash Pabado. <sup>14</sup> Adoquien, Nidenda, caqui niacbidanec, Edusaden yacno nidebi, queopondash Pabado.

Adec, Nidebi, qesho tantiashun: —Ma Nuquin Icbo bunacpadecec nidpanuna —capondash.

<sup>15</sup> Aden chiashic Sesadeya yacnoësh puduanec Edusaden yacno Pabodobèd capuquido nidoapondash. <sup>16</sup> Adec nidsho isash Sesadeya yacnocquid Esuquidistu tantiaquid utsi-utsiec Pabodobèd nidquin Menason cuëmèdquidèn shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

*Pabadon Acobo isaid*

<sup>17</sup> Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. <sup>18</sup> Aden yuedac tabadash badiadash Acobo isec nidoapon-dash. Acobobëd Esuquidistu tantiaquido tsusiobotedi icpondash. <sup>19</sup> Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

<sup>20</sup> Aden chuibanac Nuquin Papan naid bëdambo iquec, quiash Pabado caic nadpon-dash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. <sup>21</sup> Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantias, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. <sup>22</sup> Aden chiec tabadquin mibi nëmbo choaid tantias mibi cuesunete buntsias. Mibi cuesunete bumenquio icmenuequin ¿Atotsi nuqui napeba? <sup>23</sup> Naden nac bëdambo ictsiashe. Tantia. Chuinu, Pabado. Nëmbo ëbëd icquido Nuquin Papauidi tantiec tabadnuequid daëd-daëdquiec iquec. <sup>24</sup> Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Ëbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnuequid piucquid menembi,” quepondac. Nëbimbobi Edusaden yacno mibi choac. Nëid dadatedibëd Nuquin Papa tabadte shubu uashunaid yacno nidshun mimbi ënden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquio Pabado nec, quequin tantiatsias. <sup>25</sup> Ëmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nëidtedictsëqui mimbi natequid nendac. Nëidic, Nuquin Papan uaidbimboecnuc nacnenaaid tantiaquidon pete sanaid penda; adembidi, min chiduidtsëqui chudta; adembidi chidon min bënëuidi chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi — quepondash Acobo Pabado chiec.

<sup>26</sup> Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin Papan chiacsted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

*Pabado bedaid*

<sup>27</sup> Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaid-bon ispondash. Aden isash Pabado bedmete bunec, Isadaidbo utsibo nëishmenu, quec: <sup>28</sup> —Isadaidbodedishun tantiata. Nëidëmbi Nuquin Papa tabadte shubu uashunaidën puduedtemaid isadaidpembo yuedquin nëid shubu bëda icsa uameboed neque. Bednu. Uidën uaic cho —quequin abimbo chiacbimboec onquecuededpondash. <sup>29</sup> Epeso yacnoësh choquid isadaidpembo Tëdopimo Pabadobëd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

<sup>30</sup> Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shëcuë bëtashpondash. <sup>31</sup> Aden Pabado buanec, Cuesunenu, quec cuëdcuededsho tantiasshun chui-tanac <sup>32</sup> abi chuiquidbëd sondado cho-chosho isun Pabado cuesbededquin isadaidbon ëmpondash.

<sup>33</sup> Adec choshon sondado chuiquidën bedtan cac Pabado bedshun shocosh bucun mëtanemepondash. Aden mëtanemiash: —¿Tsutsi nëid nepec? ¿Atotsi icsamboen naosh? —quepondash sondado chuiquid. <sup>34</sup> Adoquien iccuededquid utsi-utsitsëcquien chiec

onquecuedednubi utsi-utsitsëccquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec. <sup>35</sup> Aden Pabado buanec nidec nauedte shubun dectatonobi cuëdcuededquidon tsucuscuededtsëccquien Pabado bednuesho isun Pabado abuc cadoanquin sondadon buampondash. <sup>36</sup> Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

### *Ambi nabanaid iccuededquido Pabadon chiaid*

<sup>37</sup> Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoquien: —¿Quidieco matsesën onqueten onquequidta mibi ne? <sup>38</sup> Chuiquid dapa icnuequin Equipito yacnocquid matses dadpen cuète nibëdacno buanaccondaidien nechitec, qeshun mibi bedombi. <sup>39</sup> Adoquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

<sup>40</sup> Adoquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquo tabad, quequin ismequin Pabadon mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec nadece Pabado onquedopondash:

## 22

<sup>1</sup> —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

<sup>2</sup> Adec aton onqueten Pabado onquesho tantiash isadaidbo otacquo tantiec tabadpondash.

<sup>3</sup> Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. <sup>4</sup> Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi. <sup>5</sup> Ëmbi adobanquin naonaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

<sup>6</sup> “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiabimboec chënquequin dëcatepondashi. <sup>7</sup> Adec chënquequin dëcatiac nidaidën paëdshun nadece abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantanu,’ capondashi.

<sup>8</sup> “Adoquimbi: ‘¿Con Icbomboda mibi ne?’ capondac.

“Adoquien: ‘Nasaded yacno iccondaid mimbi mëyanaid Esus nebi,’ capondashi.

<sup>9</sup> “Adnubic ëbëd icquidon shocosh bed-bedquiabimboec chënquesho isequi con Icbon chuisho tantienquo yec tabadpondash.

<sup>10</sup> “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. <sup>11</sup> Adoquini nidtoquin shocosh bed-bedquiabimboec chënquequidën bëshuacsho isun ëbëd icquidon mëdinanquin Damasco yacno buampondashi.



12 “Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bëdamboen isaidquio icpondash. 13 Èbi yacno choshon aidën: ‘Saudo, abuc is,’ cac cuedoquimbi Ananias ispondambi.

14 “Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomaid, Icsa Nibëdquid mibi ismendac. Aidën chuisho mimbi tantiendac. 15 Aden aid isquin tantiahsun utsi-utsien dadpen mimbi isaïdbëdta mimbi tantiaid mimbi chuibenendac,’ quequin 16 chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacimboen utsibo ismenuen acten mentometa,’ capondashi Ananiasën.

17 “Ado aqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboec tsadpondabi. 18 Adec tsadquimbi Nuquin Icbo ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio nidtan, quequin Nuquin Icbon chuipondashi.

19 “Ado aquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. 20 Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adon-dacshobi cuesunependabi iquec?’ quepondabi Nuquin Icbo chiec.

21 “Ado aquini Nuquin Icbon: ‘Isadaidpembo yacno mibi nidmembique. Nidtan,’ capondash –quepondash Pabado ambi nabanaid iccuededquido chiec.

### *Pabado cuestsenaid*

22 Pabadon ambi nabanaid chuibansho tantiec iccuededquido otacquio tabadboed, Isadaidpembo, quec Pabado onquesho tantiahs: –Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata –quec cuëdcuededpondash iccuededquido.

23 Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin. 24 Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash. 25 Ado aquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: –¿Atotsi canumbini shoyonquin nai? ¿Domanobon nidaidënshun tishaid icsho ëmbi naid chuimiabida ëbi cuese? –quepondash Pabado sondado chuiquid chiec.

26 Adsho tantiahs sondado chuiquid puduanec nidec abi chuiquid comandante caid yacno choash: –¿Atotsi natseno? Bëboed: “Domanobon nidaidënshun tishaid nebi,” quiosh –quepondash sondado chuiquid comandante chiec.

27 Ado aquien Pabado yacno nidshun comandanten: –¿Domanobon nidaidënshun tishaidta mibi nepe? –capondash Pabado chuiquin.

Ado aquien: –Ai, domanobon nidaidënshun tishaidquio nebi –quepondash Pabado.

28 Ado aquien: –Domanobon nidaidënshun tishaidpenquio ëbi icsho, ¿ada adquid ëbi icmetsia? quequin piucquid meniondambi –quepondash comandante Pabado chiec.

Ado aquien: –Con tan tishaid yec domanobo nebi –quepondash Pabado comandante chiec.

<sup>29</sup> Aden Pabadon chuisho tantiash ambi naid chuimenuen cwestsemboedo nidanepondash. Aden chuisho tantiash Domanobobi Pabado shocosh bucun mētanemechitombi, quequin tantiec comandante dacuēdpondash.

*Isadaidbo tsusiobo iccuededacno Pabado buanaid*

<sup>30</sup> Adshumbic, badiadshun ambi mētanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nēid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nēnantanquio Pabado nidtomepondash.

## 23

<sup>1</sup> Aden nidtomiaquien isadaidbo tsusiouidi comapenen isec: —Utsibo, ěmbi naid chuibanu. Tantiata. Nuquin Papan isnubi ambi naden nata quequin chiaid nabanquidquo icteniobi —quepondash Pabado.

<sup>2</sup> Aden chuisho tantiashun: —Muaquin chieque. Ęccues —Isadaidbo tsusio dapan Ananiasēn cac Pabadon dayunquio icquidēn Pabado ěccuespondash.

<sup>3</sup> Aden ěccuesaquien Pabado: —Mibi icsaid nibēdacbimboec mibibi tsadsho Nuquin Papan mibi ěccuesmendac. Nuquin Papan naden nata quequin chiaid tantiemi, quequimbi ěbi ěccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

<sup>4</sup> Aden Pabadon chuisho tantiash aton dayunquiocquidquo: —¿Aden Nuquin Papan isadaidbo tsusio dapa icta caid chiash dacuēdenquioda ique? —quepondash.

<sup>5</sup> Adoquien: —Ěmbi chuiboed Nuquin Papan isadaidbo tsusio dapa icta caid nec, quequin tantiamboocombi. Aidi Nuquin Papan isadaidbo tsusio dapa icta caidquo icsho ěmbi chuibocpaden chienquo ictsenombi. Mimbi abimbo chioc. Ěmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

<sup>6</sup> Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ěbibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ěbi mimbi chiec —quepondash Pabado iccuededquido caic. <sup>7</sup> Aden Pabadon chiaquien saduseyobo, Uincuenta nibēdendac, quequin ěmbi tantiacpaden Pabadon tantienquo iquec, quec comapenec onquecuedednubi padiseyobo, Uincuenta iquendac, quequin ěmbi tantiacpaden Pabadon tantiec, quec comapenec onquecuededpondash. <sup>8</sup> Unēsash uincuentequid nibēdec, quec saduseyobo. Adecbidi, Nuquin Papan uaid mayan bēdabēd ambi uaid utsi mayan nibēdec, queoaic saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bēda, ambi uaid utsi mayambidi iquec, queoaic.

<sup>9</sup> Aden ambi tantiacpaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi padiseyobo, Nēid dada bēdambocquid nec. ¿Mayanēn chioshi, qeshodambi muc nec capadi? Adecbidi, ¿Nuquin Papan uaid mayan bēdan chioshi, qeshodambi muc nec caopadi? Padenquo iquembi. Pabadon chuiboed abimbo iquec, quepondash padiseyobo saduseyobo caic.

<sup>10</sup> Adec comapenec onquec natiambo chushcanansho tantiashun comandanten: —Podon shoyonquin canite dēchicnushe qeshun mēnchicshun shubu nuntan bēoata —cac sondadon Pabado mēnchicpondash.

<sup>11</sup> Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ushnubi Nuquin Icho chopondash: —Mimbi Edusaden yacnoshon ěbi chuibanacpaden shubu dadpen icquid Doma caid yacnoshontsen mibi chuibamembique. Dacuēdenquo yec dayacquo icta —capondash Nuquin Icbon Pabado chuiquin.

*Pabado cuesunenu quequin ompoquin cainaid*

<sup>12-13</sup> Adec Pabadobëd Nuquin Icbo onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiembi, quepondash. <sup>14</sup> Aden nanu quiash isadaidbo tsusiobo yacno nidash: —Pabado cuesuniabi icquin buna mëmunembi, quequin muenquiocquin chuibanombi. <sup>15</sup> Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabadon naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuquido isadaidbo tsusiobo caic.

<sup>16</sup> Aden aidon chuishobien Pabadon piaquën tantiashun Pabado yacno nidshun chuioapondash aton piaquën.

<sup>17</sup> Adoquien Pabadon sondado 100ted chuiquid cho, cata cac nidshun aton piacquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabadon cac <sup>18</sup> buampondash.

Aden Pabadon piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

<sup>19</sup> Aden chiaquien Pabadon piac mëdinanquin udictsëc buanash comandante: —¿Atotsi ëbi chuinuec cho? —quepondash comandante.

<sup>20</sup> Adoquien Pabadon piac: —Badiadshun isadaidbon ambi namiaid mibi yacno chomec. Aden chomiac nëmbo choshon naden chiec: “¿Ada isadaidbo tsusiobo iccuededte shubuno Pabado mimbi bëoapatsia? Aidën naid chuibansho bëdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. <sup>21</sup> Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiash, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabadon piac comandante chiec.

<sup>22</sup> Adoquien comandanten: —Isadaidbon chiaid mimbi chuiboed utsi chienquio yec nidec nid —capondash Pabadon piac chuiquin. <sup>23</sup> Aden Pabadon piac nidmeshun sondado 100ted icquido chuiquid daëd chomiashe comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuioata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuioata. <sup>24</sup> Adembidi Pabadobëd icquido cobednadod Pediques yacno buanun cabayo nacnenta —capondash comandanten sondado 100ted chuiquid daëd chuiquin.

<sup>25</sup> Aden chuishumbic naden comandanten dada uapondash Pediques cobednadod caid chuiquin: <sup>26</sup> “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Èmbi dada uaid isec onqueta. <sup>27</sup> Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiapaden tantiashun sondado dadpembëd choquin mënichiccombi. <sup>28</sup> Aden mënichishumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. <sup>29</sup> Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho

tantiasun quënën nauedenquioctiadquidi nauedmepondash, quequin tantiasumbi quënën nauedmeopombi. <sup>30</sup> Aden Pabado quënën nauedmeoashumbic, Podqued cuëmanshun Pabado cunesunuequin isadaidbon cainec, quesheo tantiasun badedquio mibi yacno buamiombi. Adembidi, Pabado icsambocquid nec, quequin aid cunesunuequido mibi yacno nidmembi. Adoac ma ambibi Pabado naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: — Pabado bēdta nēid cobednadod Pediques menenuen buanta — capondash comandanten.

<sup>31</sup> Aden comandanten dada uashun meniac aidēn chiacpaden Pabado buanec sondado aid inchēshēmbi shubu dadpen icquid Antipatidis caid yacno chopondash. <sup>32</sup> Ambo choash badiadshun sondado cabayo catsadquidonuidquio Pabado buanec nidnubi sondado utsitedi aucbidi nidaneopondash. <sup>33</sup> Adec Pabado buanec nidequi Sesadeya yacno choshon abi chuiquid comandanten Quēdaudio Disiasēn dada uaid bēdta Pabado Pediques menepondash cabayo catsadquidon. <sup>34</sup> Aden meniaquien dada uaid isbanash: — ¿Mitsicquid nidaidēn icquid mibi ne? — capondash Pediquesēn Pabado chuimenuen.

Adoquien Pabado: — Nidaid Sidisia caid yacnoshon tishaid nebi — quepondash.

<sup>35</sup> Adoquien: — Mibi icsambocquid nec, quequin chuiquido isadaidbo choacsho mimbi nabanaid chuimembi — quepondash Pediques Pabado chiec. Aden chiec onqueshumbic ēnden chuiquid dapa Edodes cuēmēdquidēn, utsibo abi chushquiaid chuimiondaid shubuno Pediquesēn buamiac ashunquio Pabado nauedsho isun: — Puduenanec cuenushe ista — capondash sondado chuiquin.

## 24

### *Pediquesēn tantianubi Pabado ambi naid chiaid*

<sup>1</sup> Adashic, 5tedec ushash isadaidbo tsusio dapa Ananiasbēd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuēmēdquid bēquin. <sup>2</sup> Aido chosho isun Pediquesēn Pabado chomiacsho isun isadaidbo tsusiobon tantiacpaden chuinuequidēn Tedtudon naden Pediques chuipondash: — Mibi chuinu. Tantia. Chuiquid bēdambocquid icquin mimbi bēdamboen nabanac isadaidbo bēdamboec tabadec. <sup>3</sup> Mimbi aden nabansho isun, Bēdambocquid mibi nec, quequin mibi chiembi. <sup>4</sup> Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

<sup>5</sup> “Nēid mimbi bēmeboed Pabado caid bēd ictiapimbo iquebi. Nēid Nasaded yacno iccondaid tantiaquido tsusio nec. Aidēmbi nidaidtedi yacno nidshun ambi tantiaid chuibanquin isadaidbo comapenen chushcamequin cuēdcuededmiac cuēshēd-cuēshēdposh. <sup>6</sup> Aidēmbi Nuquin Papa tabadte shubu uashunaidēn puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. <sup>7</sup> Aden cuidnu quenubien comandante Disias cuēmēdquid choshon Pabado mēnchicanquin buamposh. <sup>8</sup> Pabado ambi naid chuisho mimbi tantiasun, Isadaidbo tsusiobon abimbo chiosh. Icsambocquid nec, quequin mimbi chuoapatsiac — quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

<sup>9</sup> Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

<sup>10</sup> Adsho tantiasun, Onqueta, quequin mēdante uiccaquin Pediquesēn ismiac Pabado nadec onquepondash: — Chuiquid dapan tantiaata. Ēmbitsen chuinu. Dadpen seta matamequin con matses isadaidbo abi chushquiaid tantiasun mimbi bēdamboen tantiacpaden namedenioc. Adquid mibi nec, quequin tantiaquin, Ēmbi naid chuibanec bēdambo iquebi, quec dacuēdenquio yec onquebique. Tantiata. <sup>11</sup> Edusaden yacno



choash ambobi 12tedec ushobi. Ēbi anoshon isboedon, Abimbo iquec, quequin nēmo choshon mibi chuitsiash. Edusaden yacno choash Nuquin Papa shubu uashunaidēn puduedec Nuquin Papa tantianuec choapobi. <sup>12</sup> Ambo puduedash utsibēd chushcananenuo yec tabadsho istuidash, Icsambocquid nec, queposh. Adembidi chuibanquin utsibo nēishmequin chushcamenquo iccombi. Pabado icsambocquid nec, quequido Pabaton chiaid abimbo iquec, quetiadquidi nec. <sup>13</sup> Ēmbi naid Tedtudon chuibaamboed, Abimbo iquec, quetiapimbo iquec tsusiobo. <sup>14</sup> Nēiduidtsēqui abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquo nebi. <sup>15</sup> Adembidi, matses unēsacsho Nuquin Papan uincuemiab abi tantiaquid abēdi tabadnubi abi tantiesa chian anēdēnquequid nēsecaindac, quequin tantiembi isadaidbo tsusiobon tantiacpadembi. <sup>16</sup> Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matstedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

<sup>17</sup> “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bēdamboen dayun uabenioshi, quequin piucquid menenuc choapobi. <sup>18</sup> Aden menenuc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. <sup>19</sup> Ēbi capusho istuidquido isadaidbo nidaid Asia caid yacnoēsh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. <sup>20</sup> Adembidi isadaidbo tsusiobon: ‘Padiseyobo yec bēdamboecquid nec,’ quequin ēbi anoshon chiacpadembidi nēshuntsen adomboembidi chuioatiadquidi nechitec. <sup>21</sup> Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ēbi mibi chiec caimbi –quepondash Pabado Pediques chiec.

<sup>22</sup> Aden Pabaton chuisho tantiash Pediques tantiauidquid iquec: –Nēbi mimbi aidtedquo chuibansho tantiembi. Comandante Disias nēmo choan mibi padpiden chuimembi –quepondash Pediques Pabado chiec. <sup>23</sup> Aden chuishumbic naden Pediquesēn sondado chuipondash: –Shubuno Pabado buanshun puduednushe qeshun ista. Abi menenucquid abi isnuequid chedo chosho isun yuedta –quepondash Pediques ambi Pabado ista caid chiec.

<sup>24</sup> Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabaton chuibanac Pediquesēn tantiauidpondash. <sup>25</sup> Aden chuibanquin Pediques Pabaton nadopondash: Utsin abi utsibēd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuioapondash Pabaton. Adembidi, Esuquidistu tantienquo icsho chian anēdēnquequid Nuquin Papan nēsecanushe quequin Esuquidistu tantiaata, quequin Pabaton chuioapondash. Aden Pabaton chuisho tantiash: –Padi. Ēmbi naid nibēdsho isun padpiden chuimenuen mibi bēmeoaimbique. Nēbi nidec nid –cac Pabado nidpondash. <sup>26</sup> Adshumbic, adembidi abi yacno Pabado Pediquesēn bēmeded-bēmededpondash. Nidtiadquo icquin piucquid Pabaton ēbi menetsiash, quequin tantiaquin Pabado bēmiash aidbēd Pediques onquepondash.

<sup>27</sup> Adashic, seta daēd matamiash Podsio Pesto cuēmēdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesēn Pabado shubu nuntan niampondash naden tantiaquin: Pabado shubun nauedshun ēmbi ni-

ansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

## 25

### *Pabadon ambi naid Peston chuimiai*

<sup>1</sup> Pesto cobednadod yanash Sesadeya yacno choash 3tedec ushanec Edusaden yacno nidpondash. <sup>2</sup> Adec Pesto Edusaden yacno choash tabadsho isadaidbo tsusiobo, Pabado chushcaquido: <sup>3</sup> —¿Ëbitedi bëdambo icmenuequin Pabado Edusaden yacno ada bëmeoatsia? —quepondash Pesto chiec. Pabado bësho cuesunenuquidon cainshun cuesunepec, quequin tantiaquin isadaidbo tsusiobon aden Pesto chuipondash.

<sup>4</sup> Aden chuisho tantiaash Pesto: —Sesadeya yacnoshon nauedaid Pabado iquec. Ambo nidebi. <sup>5</sup> Pabadon icsamboen naosh, quec utsi-utsiec ëbëdi nidshun anoshon Pabadon naid icsa ëbi chuita —quepondash isadaidbo tsusiobo caic.

<sup>6</sup> Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bëmepondash isadaidbo tabadnubi. <sup>7</sup> Aden bëmiacsho isash Pabado dëcatec isadaidbo Edusaden yacnoësh choboedo Pabadon naid chiec abimbo chiacbimboec onquecuededpondash.

<sup>8</sup> Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

<sup>9</sup> Adoaquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. <sup>10</sup> Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbi tantiec. <sup>11</sup> Icsambocquidquio iquec Pabado unës uame, qesho tantiaash, Adoanenda, quenquioctsiabi. Isadaidbon abimbo chiacbimboen chuisho tantiaash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindambi —quepondash Pabado Pesto chiec.

<sup>12</sup> Aden Pabadon chuisho tantiaash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

### *¿Atotsimbi Pabado napatsia? quequin Peston Aquidipa caid*

<sup>13</sup> Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. <sup>14</sup> Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. <sup>15</sup> Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

<sup>16</sup> “Adoaquien, Mibi abëdi chushquiaid Pabadontsen chiamboen unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. <sup>17</sup> Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. <sup>18</sup> Aden Pabado

bëmiacsho ëmbi tantiacpaden abi chushcaquidon Pabadon naid chienquiocposh. <sup>19</sup> Ëmbi tantiaidpenquo Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon. <sup>20</sup> Aden ambi tantiaidquo bëdamboen tantienquo yec nadpobi Pabado caic. Min matsesën naden nata quequin chiaid tantienquo iquembique. Edusaden yacno buamiac mimbi naid anoshon chiac bëdambo ictsiash, quequin chiombi. <sup>21</sup> Adoaquien: ‘Empedadod, Sesad yacno nidshun ëmbi naid chuitiadquo iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbobi Pabado quënën tabadec –quepondash Pesto Pabado chiec Aquidipa tantiamenuquin.

<sup>22</sup> Adoaquien Aquidipa: –Ëbi aidën chuibansho tantiate bunebi –quepondash.

Adoaquien Pesto: –Badiadshun aidëmbi chuisho mimbi tantiendac –quepondash.

### *Aquidipa ambi naid Pabadon chiaid*

<sup>23</sup> Aden Peston chiaquien badiadash bëdaidquo dasiuidash Aquidipabëd aton chuchu choash iccuededte quënën puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash. <sup>24</sup> Bëmiac Pabado nënantanquo nidtonobi Pesto nadpondash: –Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioaposhi. <sup>25</sup> Aden chuisho tantiashun nëid ambi naid chuimeoapombi. Aden Pabadon chiaidtsen tantiashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna. <sup>26</sup> Aden buamenuen jatotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. <sup>27</sup> Ambi icsamboen naid nibëdnuc Doma yacno buametiapimbo iquebi –quepondash Pesto ancanquid Aquidipabëd iccuededquido chiec.

## 26

<sup>1</sup> Aden Peston chiaquien: –Mibibi onquequin mimbi naid chui. Tantianu –quepondash Aquidipa Pabado caic.

<sup>2</sup> Adoaquien Pabado nadpondash: –Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. <sup>3</sup> Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

<sup>4</sup> “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. <sup>5</sup> Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. <sup>6</sup> Unësash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo. <sup>7</sup> Nuquin tsusedpa Acobo isadaid caidën madobon tsyuecquidon, Unësacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. <sup>8</sup> Nuquin Papan nadatiambocquin uincuemete chiaid mimbi tantienquo icpe.

<sup>9</sup> “Ënden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, qeshun adobampondambi. <sup>10</sup> Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdambocquid icsho bedshun quënën nauedmepondambi. Unës uanu, qesho tantiash, Ai, unës uatiadquio iqueque. Adota, quepondabi. <sup>11</sup> Nuquin Papan chiaid chuibante shubu utsi-utsiec yacno nidtednidtedondabi aido mëyamenuec. Esus, Nuquin Papan madopenquio nec, aido camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

<sup>12</sup> “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. <sup>13</sup> Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. <sup>14</sup> Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebedeyon onqueten abucuësh onquesho naden tantiondambi: Saudo, ¿atotsieshun ëbi tantiaquido mimbi mëyampe? Ëbitsen mëyantiadpambocquin mimbi aido mëyanec, quec onquequin chiondashi.

<sup>15</sup> “Adoaquimbi: ‘¿Tsutsi mibi ne, Icbo?’ caondac.

“Adoaquien, Mimbi mëyanaid Esus nebi. <sup>16</sup> Ëmbi namiaid mibi icmenuc chobi. Esus isombi, quequin ¿ëbi chuibeneta caid nëbi mibi yanec? Ëbi chuibenequin mimbi isaidbëdta ëmbi yuecshun ismetequid chuibeneta. <sup>17</sup> Aden ëbi chuisho mibi cuesunete bunquid isadaidbobëd Isadaidpembo icsho mibi mënchiquendambi. Adquid chuibanta, quequin mibi nidmembi. <sup>18</sup> Aden chuibanac utsin-utsinquien pashuacbimboeboedëmbi tantiendac. Icsambocquid nebi, quequin tantienquiochoedi, Icsaobique. Ëbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid ëbi tantiaquid utsibëd iquendac, quequin Esusën chuipondashi.

<sup>19</sup> “Aid abucuësh onquesho tantiashun chieshenquiocquin chuibeniombi caimbi, mibi chuiquin Aquidipa. <sup>20</sup> Damasco yacnoshomba chuibanondambi. Anoshomba chuibanshumbic Edusaden yacnoshontsen chuibananoandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiäcpaden nabanta, quequin chiombi. <sup>21</sup> Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. <sup>22</sup> Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac nëid ushënquio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tanta. <sup>23</sup> Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado iccuededquido chiec.

<sup>24</sup> Adec Pabado onquesho tantiash: —Min tantiate icsabudash mibi onquec. Mimbi tantiaid dadpen iquec tantienquio yec onquechitequien mibi nec —quepondash Pesto Pabado caic.

<sup>25</sup> Adoaquien Pabado: —Bëdamboen tantiec onquebi. Ëmbi chiaid abimbo iquec, caimbi mibi ancaquid Pesto. <sup>26</sup> Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiembi. Ëmbi chuibamboed ompoenquiocquin isquidon chuisho aidëmbi tantiapondash. <sup>27</sup> Nuquin



Papan ambi naden nanun chiaid dada uamiampidon chiaid chuisho mimbi tantioc – capondash Pabadon Aquidipa chuiquin.

<sup>28</sup> Adoaquien Aquidipa: –¿Mimbi chuiboedtedtsëqui tantiashtabi Esuquidistu tanti-aquid yampe? –quepondash Aquidipa Pabado chiec.

<sup>29</sup> Adoaquien Pabado: –Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquo daëdpactsëc chiombi. Aidedtedtsëqui chiac tantiatiapimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna – quepondash Pabado.

<sup>30</sup> Aden Pabadon chuibanaquien ancanquid Aquidipa nidtopondash. Nidtosho isash Pestobëd Bedenise iccuededquid utsibo chedo nidtocuededpondash. <sup>31</sup> Adec nid-tocuededash puduenash onquecuededec: –Chuibamboed icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan –quepondash ancanquido.

<sup>32</sup> Aden chiash: –Empedadod chuite bunebi Pabado quiambocsho quënën nauedac-noshon aidi mimbi nidmetsenosh –quepondash Aquidipa Pesto chiec.

## 27

### *Doma yacno Pabado buanaid*

<sup>1</sup> Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Üdio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash. <sup>2</sup> Aden buanta cac Pabadobëdta utsibo bedshun acte cuëmëmano buanshun cano dapa Adadamitio cain cuënaid istuidpondash. Aid cano dapa istuidashien, Icbo, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantias Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

<sup>3</sup> Adec cano antabëdtoanec nidquin shubu dadpen icquid Sidon caid yacno buampon-dash. Ambo choash, Mitsana nibëdeque. Mibi yuedquid yacno nid. Aidon mibi menet-siash, quequin Pabado bëdamboen tantiaquin sondado chuiquidën, Udion, chuipon-dash. <sup>4</sup> Adshumbic Sidon caid yacnoësh puduanec nidquin potesho cunquequidën bëquedtuidac ushë choacmi cuenadtanquin acte nënantan nidaid nacnëdquid Chipide caid datampondash. <sup>5</sup> Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. <sup>6</sup> Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuid-pondash. Aden aid istuidshun Pabadobëd icquido aid canontsen antabëdtomepondash. <sup>7</sup> Adec Mida yacnoësh puduanash nidquin potec dadpen ushacsho cunquequidën cano bëquedtuidpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nacnëdquid Quideta caid yacno buanoapondash. Uquë cuëma utsiuc Sadmon caid icpondash. <sup>8</sup> Ushë choacmi Quideta yauc cuenadtanec choquin shubu dadpen icquid Buenos Puetos caid yacno buampon-dash. Udictsëc shubu dadpen icquid Dasia caid iccondash.

<sup>9</sup> Cunquequidën bëquedac yuenquo potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: <sup>10</sup> – Chuinu. Tantiata. Nëuëshquo puduanquin potesho cunquequid dapan bëquedshun cano

chic-chictsiash. Acten mentoadmane quequin potenquio iquembi, quequin chuita — capondash Pabadon sondado chuiquid chuiquin. <sup>11</sup> Aden Pabadon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. <sup>12</sup> Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

*Acte dapa potesho cunquequid dapanquio cano bëquedte*

<sup>13</sup> Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. <sup>14</sup> Adec nidequi udictsëc yanshobi ushë chochoaid ëquëctsëcshun Quideta caid nidaid mananucuësh cunquequid dapa choquin bëquedtuquid <sup>15</sup> icbon cano nidmetiapimbocnobi cano buampondash. <sup>16</sup> Aden cunquequidën buanaqui acte nënantan nidaid nactnedquid utsimpi Quëdauda caid ëquëbictsëc cuenadquimbi canompi cano dapan nëshun buanaid buanushe qeshun anandopondash. <sup>17</sup> Aden canompi anandoshon cano dapa canchednushe qeshun uidën uaquin datanebanshumbic cano buante dashcute abi dectante cuestebëdtabi imbudshun dashcute chicacsho cunquequidën cano comapenen buampondash. <sup>18</sup> Aden cano cunquequid dapan buanubi badiadnuc acte natiambo tëccoasquesho isun ambi ansandoshon bëboed acte nësiapondash. <sup>19</sup> Adshumbic 3tedec ushun bucu dënëshun cano dashcute indotetedi nësiaoapondash. <sup>20</sup> Aden nësecanec nidquimbi inchëshën ushëbëdta uispa abu chëshën bëtinacsho isenquio iccondambi. Adembidi badiadën ushë isenquio iccondambi. Dadpen ushquin aitedi isenquioccondambi. Aited isenquiocnobi acte comapenen tëccoascapondash. Ad icsho isash, Bënudchitequien nuqui iquec, abitedimbo quequededpondash.

<sup>21</sup> Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienquio yec mibi puduampoc. Embi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquio nuqui ictsiandac. <sup>22</sup> Padnuen acte tëccoasquenubi nuquitedi unësenquio iqueque. Dacuëdenquio yec dayacquio icta. Canouidi canched-canchedendac. <sup>23</sup> Nuquin Papan namiaidquio nebi. Adquid icsho inchëshën ambi uaidën mayan bëdan ambi chomiaidën naden chioishi: <sup>24</sup> “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënchiquembique. Dacuëdenquio yec tabad,” caposhi Nuquin Papan uaid mayan bëdan. <sup>25</sup> Aden aidën chiac dayacquio icta. Nuquin Papa ambi chiacpaden nabanquid nec, quequin tantiembi. <sup>26</sup> Adembidi, acte tëccoasquequidën nuqui acte nënantan nidaid nactnedquid cuëmano buanshun cano cancheshunendac, quequin tantiombi — quepondash Pabado canon antabëdtoaido chiec.

*Cano canched-canchedaid*

<sup>27</sup> Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tëccoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash. <sup>28</sup> Aden tantiaquin, ¿Tionda iqueque? Tanu, qeshun yuëmbocquid shocosh bucu dëdectanshun pumbudquin tampondash. Aden tanshun, Aidtiompenquio iquec, quequin chuipondash. <sup>29</sup> Nidaid cuënote dapa cunquequidën buanquin cano semenushe qeshun cano uidën uate dapa yuëmbocquid tsitsumi tsidectanshun acte nënequin uidën uash ma badiadbono quiash tabadpondash. <sup>30</sup> Adec tabadnubi cano nidmequido cueneshun dëbiate yacnoshontsen cano uidën uate yuëmbocquid

dēdectanuequin abimbo chiacimboen canompi anandoboed nēnetsempondash. Cano dapa mentoadtsiash, qeshun cuenequin adopondash. <sup>31</sup> Adec aidō nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. <sup>32</sup> Aden Pabado chiaquien abi dectante bucutedi sēnac canompi nēpaēdpondash cuenequido nidtiapimbo yec.

<sup>33</sup> Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piamboccoc. <sup>34</sup> Mibi mentoadenquio iqueque. Min manēdaid abentsēc paēdenquio iqueque. Penquiocboedi unēschiomane quenquiocquin peta —quepondash Pabado. <sup>35</sup> Aden chuishumbic ut-sitedi ismequin pan bedshun Nuquin Papa chuishun pan cuēshun Pabado pepondash. <sup>36</sup> Aden Pabado pesho isun, Nuquitsen penuna, qeshun abitedishun pebededpondash. <sup>37</sup> Cano antabēdtoquido 276ted icpondash. <sup>38</sup> Aidtedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmbo iquec, qeshun.

<sup>39</sup> Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsō isun ambo cano nidmenueshun <sup>40</sup> uidēn uaid tebanac acte nēpaēdpondash. Adembidi, cano dēbidiadmete bucutedi seccudoashun cano dēbiateno buanquin dashcute shoyontanquimbi cadoapondash, Cunquequidēn acte daēd nac-cuēscananacno buampashuni, quequin. <sup>41</sup> Aden cano nidmenubi cano dēbiaten masi setuidec dēchiquidtiapimbo yec cano dapa dētocquepondash. Adec dēchiadash acte tēccoasquequidēn cano dapa canche-canchequin tauapondash.

<sup>42</sup> Adsho isash sondado, Mētaniaidtedi cuentsiashe. Cuesunenu, qesho <sup>43</sup> tantiash Pabado cuesunenushe qeshun: —iChēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi <sup>44</sup> tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquiec nidanec mentoadenquio yec abitedi nidaid yacno choash dectatocuededpondash abitedi.

## 28

### *Madta caid yacno Pabado bēd icquido choaid*

<sup>1</sup> Adec nidaid yacno choash dectatoneshun, Nēid acte nēnantan nidaid nācnēdquid Madta caid nec, qesho tantiabededpondash. <sup>2</sup> Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēc cho, quequin chuipondash. <sup>3</sup> Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. <sup>4</sup> Aden mēpiash ēchiquidenquio yec mēdiadsho isashien anocquido: —Nisin piaid cuesunianquid nepanui. Mentoadenquio yec actenuēsh dectatoacsho nisin piac unēschiéquien iquec. Abi icsaid cuidtequidien nechitec.

<sup>5</sup> Adec onquecuedednubien Pabado comapenen uicac nisi cuēte dētsiadaidēn nēpaēdpondash. Adnubien Pabado abi bēdambo icpondash. <sup>6</sup> Aden Pabado uicac nisi paēdsho isun Pabado mēdante mēbidisquetsiashe. Isnu, quequin isbededpondash. Aden tantiaquin yuen cainquin mēbidisquenquiocsho isash, Nisin mēpeboed utsibon papa cain cuēnaid nepanui, quecuededpondash Madta caid yacnocquido.

<sup>7</sup> Madta caid yacnocquido tsusio dapan shubu anoentsēqui icpondash. Tsusio dapa Pudio cuēmēdquid icpondash. Aidēmbi aton shubu yacno canon choaedotedi yuedshun abentsēc chotsēc nuc ushquin ēbitedi bēdambo icmepondash. <sup>8</sup> Adnubien Pudion papa chumbo yec pienecc aton madon shubu nuntan uepondash. Adec Pudion papa uec

quesho tantiash Pabado aid isec nidshun ashunquiobi Nuquin Papa chuishumbic Pudion papa damishquin bédamepondash Pabado. <sup>9</sup> Pudion papa bédanacsho isash Madta caid yacnocquido nēnquidbēd daicsaid chedo cho-chopondash. Ēbitsen bédametsiash, quiash cho-chosho aidotsen bédamepondash Pabado. <sup>10</sup> Adosho isun canon choquido bédamboen tabadmepondash anocquidon. Nidnuesho tantiashun menebampondash mitsana nibēdec quequin.

### *Doma yacno Pabado choash tabadaid*

<sup>11</sup> Adashic ushē 3ted nidmiash Madta caid yacnoēsh puduampondash. Madta caid yacno choash cano icbo, Iquenoampamboec icnuc nēmo tabadnuna, quiash tabadash: —Nidnu. Nid —quianec aton cano antabēdtosho isun Pabado bēd icquido sondado chuiquidēn antabēdtomepondash. Aid cano shubu dadpen icquid Adecandedia caid yacnoēsh chopondash. Cano icbon papa cain cuēnaid daēd ambi tantiaidbimboecnuc cano dēdectanquin nacnenaid icpondash. Ambi papa cain cuēnaid abentsēc Castod icnuc utsi Podus icpondash. Adembidi aton cano cuēmpondash icbon. <sup>12</sup> Aidēn puduanec nidequi acte nēnantan nidaid nacnēdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. <sup>13</sup> Ambo tabadash puduanquin aid acte nēnantan nidaid nacnēdquid cuēma anoentsēqui potequi nidaid Itadia caid cuēmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidēn buanac badiad utsin shubu dadpen icquid Puteyodi caid yacno chopondash. <sup>14</sup> Ambo choshon Pabado bēd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquid bēd tabadashic auēshquio puduanec podquedēn nidequi shubu dadpenquio icquid Doma caid yacno chopondash Pabado bēd icquido. <sup>15</sup> Podqued Apio caidēn choec, quequin chuituidac Esuquidistu tantiaquid Doma yacnocquid utsi-utsiec Pabado bēquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsēc chotsec quequin cuēnaid yacnocquido Pabado bēquedoaic nidaneopondash. Aido cho-chosho isashien, Ēbi dayacquio icmenuen nēidtedi mimbi chomioc, Papa, quec dayacquio iquebi, quiampondash Pabado. <sup>16</sup> Adec aido bēquedec choash auchidi nidec Pabado bēd Doma yacno choapondash. Doma yacno choacshobien Pabado quēnēn nauedenquiocquin shubun tabadmepondash sondado abentsēcshun abēd tabadquin isnubi.

### *Doma yacnoshon Pabado Esuquidistu chuibante*

<sup>17</sup> Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiacsho isun Pabado nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesēn bedshun domanobo chuiquid meniondashi. <sup>18</sup> Aden meniac domanobo chuiquidēn, Mimbi naid chuiban, cac chuibanondambi. Aden chuibancho tantiash, Unēs uainquioctiadquidi mimbi naic, quepondash domanobo chuiquid ēbi caic. <sup>19</sup> Aden domanobo chuiquidēn tantianubi nuquin matses tsusiobon, Unēs uatiad, quequin chiac, Empedadod, Sesad yacno nidshun ēmbi naid chuite bunebi, quequin chuipondambi, Con matses icsambo iquec, quenquiocquin. <sup>20</sup> Ēmbi chuiboed mibi chuinuequin mibitedi chomiombi. Unēsash uincuenta nec, quequin tantiaquin nuquin matsesēn cainacpaden cainquid icsho mētaniaid nebi —quepondash Pabado isadaidbo tsusiobo chiec.

<sup>21</sup> Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoēsh choquido, Pabado icsambocquid nec,



quequin chienquioccosh. <sup>22</sup> Padnueni mimbi tantiaid chuisho tantiante bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

<sup>23</sup> Aden Pabadon tantiaid tantianuec, Nēidted ushash padpidec choaindabi, quianec nidanepondash tsusiobo. Adec nidaniash ambi chiacstedec ushash Pabado tabadacno choapondash isadaidbo tsusiobobēd utsibo dadpen. Adec cho-choash tabadsho isun: —Matses icsaquid icscho Nuquin Papan cuidnushe quiash abided cuidadec Esuquidistu unēspaneḍdash. Aid tantiaquid yec Nuquin Papabēd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbēdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambī dada uamiampidēn chiaid Nuquin Papan madombo Esuquidistu nec, quequin badiadnubi chuiquin tauashun inchēshbudtsēqui chuiquin ēmpondash Pabadon. <sup>24</sup> Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. <sup>25</sup> Aden abentsēc tantiacimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanēn Isayas dada uamequin nuquin tsusedpabo naden chuipampic:

<sup>26</sup> “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ēmbi nadatiambocquin nabanaid isted-istedquimbi abimbo isenquo iquendac.

<sup>27</sup> Bēdamboen tantiaboedobi nēbi min matses pamumēdacimboec tabadec; pashuacimboen tantiec tabadoaic; ushacimboecbidi tabadoaic.

Adec tabadenquiocquin ěmbi nabansho mimbi istsiac. Adembidi ěmbi chiaid mimbi tantiatsiac. Aden tantiashun mibi icsaid mimbi ěntsiac.

Adquiduidi ěmbi bēdambo icmiaid nendac.”

<sup>28</sup> Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado <sup>29</sup> Nuquin Papan dada uamiampicpaden chuiquin isadaidbo Doma yacnocquido tantiamenuec. Aden chuisho tantiash isadaidbo nidanepondash.

<sup>30</sup> Adembidi seta daēd matamec tabadquin Pabadon Esuquidistu chuibampondash. Aton shubun tabadquin abi isedec choquidtedi Pabadon yuedpondash. <sup>31</sup> Utsi, Chēn, quenquiocnobi dacuēdenquiocquin, Nuquin Papabēd tabadte iquec, quequin huibampondash. Adembidi Esuquidistu tantiamenuen chuibampondash Pabadon.

Padi. Esuquidistun, Ēbi chuibeneta, caidon naid chuibanquin aidtedi dada uaombi, Teyopido.

## DOMA YACNOCQUIDON ISTE

### *Tauamboen chiaid*

<sup>1</sup> Esuquidistun yuambo Pabado nebi. Aidën: —Ëbi chuibeneta —caidquio nebi. Adem-bidi Nuquin Papantsen: —Con Mado chuibeneta —caidquio nebi. <sup>2</sup> Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. <sup>3</sup> Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. <sup>4</sup> Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. <sup>5</sup> Aidën: —Pabado chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. <sup>6</sup> Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. <sup>7</sup> Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

### *Doma yacnocquido iste Pabado bunaid*

<sup>8</sup> Tanta. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “ ‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. <sup>9</sup> Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabado abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. <sup>10</sup> Nadembidi Nuquin Papa chianembi. —Doma yacnocquido instantiadquio iquebi. Mimbi nidmiac nëbi nidtsiabi, Papa —quequin chianembi. <sup>11</sup> Aden mibi instantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. <sup>12</sup> —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

<sup>13</sup> Tanta, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpenshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. <sup>14</sup> Esuquidistun chiacpadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi. <sup>15</sup> Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

<sup>16</sup> Esusën naid chuibenec bëdambo iquebi naden tantiash. —Nuquin Papan tantiacpadec matses cuidmenquio icnuec Esus abided cuidadec unësac caondash. Aid tantiasho Nuquin Papan matses cuidenquio iquec. Abia chiaidon isadaidbon Esus tantiasho cuidenquio icquin isadaidpembo matses utsibontsen Esus tantiasho Nuquin Papan cuidenquio iquendac —quiash Esusën naid chuibenec bëdambo iquebi. <sup>17</sup> Esusën naid chuisho tantiash nuqui naden tantiec. —Nuquin Papan chiaid niacniacboedombi Esus tantiasho Nuquin Papan nuqui bëdamboen isbenec ambi chiaid

niac-niacacmaidbimboecnuc –quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquid Nuquin Papan bēdamboen isec,” quequin dada uamepampic.

*Matses utsibo icsamboec tabadaid*

<sup>18</sup> –Abi tantiesa cuidquid Nuquin Papa nec –quequintsen nuqui tantiec. Ambi chidaid niac-niaquec icsamboecuidi tabadte bunquin matses dadpenshun Nuquin Papan cuidte tantiatiapimbo iquec. <sup>19</sup> Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. –Adquidshenda Nuquin Papa nepec –matses camenuen Nuquin Papan abitedi uapampic. <sup>20</sup> Nidaid uaquinc cuēte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: –Nēid uaquidien nadquo icchitec. Nibēdantiapimbo icquidien nechitec. Abipadquid utsi nibēdnuc comapenen tantiaquin nabanquidquo yec abitedishun Ichoen nechitec –quetiadquidi adenquo matses iquec. Adquid Nuquin Papan cuidendac.

<sup>21</sup> Ambi uaid isash: –Nēid uaquid bēdambo iquec. Aidēmbien ēbi nashunchitec –quetiadquidi pamumēdacbimboecquin Nuquin Papa tantiatiapimbo matses iquec. <sup>22</sup> –Dadpen bēdamboen tantiembi –quequimbi tantienquo matsesēn iquec. <sup>23</sup> Aden unēstiapimbo icquid Nuquin Papambo tantiatiapimbo icquimbi unēsquid-uidquo tantiaquin aidbimboecnuc nacenashun papa quequin chianec. Utsibon matsesbimboecnuc nacenashun: –Ēbi bēdamboen ista, papa –quequin ambi nacenaid chiec. Utsibombic aben icquid nidaidēn capuquidbimboecnuc nacenashun adembidi chiec. Utsibombic uicchun podochoquidbimboecnuc nacenashun adembidi chiec. Utsibombic aben icquid tacbidēn siuidquidbimboecnuc nacenashun adembidi ambi nacenaid chiec. Ēnden adquo matses yampicpadomboembidi nēbi adomboembidi matsesēn naic.

<sup>24</sup> Adsho isash Nuquin Papa: –Ma bēdamboec tabadnu –queuidboedi icsamboecuidi matses tabadsho isash: –Ma ambi tantiacpadequi icsamboec tabadpanu –quiampampic. Adnēdambic nēbi abi bunacpadeq icsamboec tabadec utsin chido chudteuidi bunquieq dada. Adecbidi aton bēnēpenquo chudmeteuidi bunquieq chido. <sup>25</sup> –Abitedi uaquidquo Nuquin Papa nec –quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. –Nuquin Papambobien bēdamboshē iquec –quequin ēnenquo icquin chuitiadquidi aidon padenquo icpec.

<sup>26</sup> Adsho isash: –Ma abi bunacpadeq icsamboec tabadpanu –quiampampic Nuquin Papa. Adnēdambic nēbi icsabudquieq dada bunenquo yequi chido daēdi dachudnanec. <sup>27</sup> Adecbidi chido bunenquo yequi dada daēdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

<sup>28</sup> Adec abi tantiate bunenquo icscho isash: –Ma bēdamboec tabadnu –queuidboedi Nuquin Papa: –Ma abi icsate bunacpadequi tabadpanu –quiampampic. Adnēdambic nēbi pabiate shēcuē nibēdacbimboecquin Nuquin Papan chiaid niac-niaquec icsamboec tabadpec bēdambo ictiadquidobi. <sup>29</sup> Nadquido icsamboec tabadquido nec. Nēidic aton chidopenquo chudquido. Nēidic aton bēnēpenquo chudmequido. Nēidic icsamboshē icquido. Nēidic aton na dadpen bedteuidi bunquido. Nēidic chieshquido. Nēidic matses utsibobimboec icte bunec chieshēmēnquido. Nēidic cuesunianquido. Nēidic chieshēmēnquido. Nēidic muaquido. Nēidic icsa uate bunquido. Nēidic utsibo icsaiduidi chuquido. <sup>30</sup> Nēidic ambenquobi chuishunquin chieshēnquin muauaquido. Nēidic Nuquin Papa chieshēnquido. Nēidic mamēnshumēnquido. Nēidic utsibo nashunenquo icquin aton nauidi naquido. Nēidic: –Ēbiuidtsēqui bēdambo iquebi –quequido. Nēidic: –¿Icsaquin atotsimbi utsi nape? –quec icsate bunquido. Nēidic anibēdtan amēn chidaid niac-niacquido. <sup>31</sup> Nēidic piushbimboecquin Nuquin Papan chiaid tantienquo

icquido. Nèidic aton matses tantienquo icquido. Nèidic nèishash baded nèish bédanenquo icquido. Nèidic utsibo bédamboen istiapimbo icquido. Adquidtedi Nuquin Papan chiaid niac-niacquiec icsamboec tabadquid nendac. <sup>32</sup>—Abi icsaid èntiapimbo icquido Nuquin Papan cuidquin chian anèdènquiacno nèsecaindac—quequin tantiegui ènèdenquo yec icsaded-icsadedquiec. Utsibotsen icsasho isash cuishonquec. —Bédambo iquec. Èbipadquidquo nec—quepec.

## 2

### *Matsesèn naid Nuquin Papan abimbo chuite*

<sup>1</sup> Aden icsamboec tabadaid èmbi chuisho tantiash: —Adquid icsamboshè iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquo nebi —quec mibi muaic. <sup>2</sup> Nuquin Papambien matsesèn naidtedi tantiaquid icquin: —Nèido icsambo iqueque. Icsano nidmenu —quequin abimbo chiendac. <sup>3</sup>—Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquo iquec —¿quecta ique? Mibitsen Nuquin Papan cuidendac. <sup>4</sup> Ambi uaido matses abitedi icsambo icsasho isash unèsquo icquin matses bédamboen iste bunquin icsaidobi Nuquin Papan baded cuidenquo iquec. —“Icsaboedi nèbi Nuquin Papan chiacpadec bédamboec tabadtiaquid iquebi,” quequin ma matsesèn èbi tantianu —queshun Nuquin Papan matses baded cuidenquo iquec. Abi icsaid ènenquo icsasho isun cuidendac. ¿Adsho tantiashta mibi nadpe? —Mua. Nuquin Papan èbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

<sup>5</sup> —Nuquin Papan chiaid niacboedèmbi ènta —caqui: —Padi. Èmbi naiduidi naic bédambo iquebi —quequin ènenquo icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papan cuidmendac. Nuquin Papan matsesèn naidtedi chuite ushèmbi mimbi icsamboen naidtedi chuishun Nuquin Papan mibi cuidendac. <sup>6</sup> Matsesèn naidtedi tantiaquin matses cuidendac. Bédambo icquido abèdi tabadmequin icsaido icsano nidmendac Nuquin Papan. <sup>7</sup> Abi tantiec bédambo icquido: —“Mibi bédambo iquec,” mabi Nuquin Papan canu —quiash abèd tabadte bunec Nuquin Papan chiacpadec bédamboec tabadec nec. Aido unèsacsho Nuquin Papan abèdi tabadmendac padpidec unèstiapimbo icnuc. <sup>8</sup> Icsaquidoen Nuquin Papan chiaid chiaqui tantiate bunenquo icquin aton nauidi naic icsamboecuidi tabadsho Nuquin Papan comapenen cuidendac. <sup>9</sup> Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantianpidi icsasho cuidquin matses utsibotsen icsasho Nuquin Papan cuidendac. <sup>10</sup> Abi tantiec bédamboec tabadquido unèsacsho abi yacno tabadmeshun: —Nèid bédamboec tabadquid niondash —quequin utsibo tantiamequin Nuquin Papan bédambo icmendac. Ambia Nuquin Papan chiaid tantiondaido Isadaidbo abi tantiaquid icsasho abèdi tabadmequimbi matses utsibotsen abi tantiaquid icsasho Nuquin Papan abèdi tabadmendac. <sup>11</sup> Icsamboec tabadquido icsano nidmequin bédamboec tabadquido abèdi tabadmendac. —Isadaidboudtsèqui bédamboen isembi —quenquo icquin adoendac.

<sup>12</sup> Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidèn chiaid niac-niaquec icsamboec tabadsho adembidi cuidendac. <sup>13</sup> Ambi: —Naden nata —quequin chiaid tantiashumbic adomboen naisa bédamboen istiapimbo icquin ambi chiacpadec tabadquid Nuquin Papan bédamboen istsiash. <sup>14</sup> ¿Ada Nuquin Papan chiaid tantiacmaidon matses utsibon bédamboec tabadte tantienquo iccuededpec? Ma bédamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bédamboen naic Nuquin Papan chiaid tantiashumbimboen. <sup>15</sup> Adec bédamboec tabadec: —Bédambo iquebi —quequin ambembi



tantiec. Icsamboec tabadec: —Icsachitobi —quequin adembidi ambembi tantiec. <sup>16</sup> —Adec matses abitedi bēdamboec tabadte tantiequi adqueic tabadenquo iquec —qeshun Nuquin Papan chiapadēn Esuquidistun matses cuidendac. Matsesēn otacquo tanti-aidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

### *Isadaidbon Nuquin Papan chiaid niac-niacaid*

<sup>17</sup> Tanta, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papa tantienquo icnubi Nuquin Papambo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic. <sup>18</sup> Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiapadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquo icpec. <sup>19</sup> Adechidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhquiabimboecnuc tantiamequidquo nebi —mibi quepec. Adboedi aidēn chiaid niaquec mibi icsaic. <sup>20</sup> —Chuisho tantiabi icquido nēbi tantiabentsēcquidobēdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec. <sup>21</sup> Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbitsen ampepec. <sup>22</sup> —Utsin chido chudenda —queboedēmbi utsin chido mimbitsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquo yec nēid nacnenquid icsambo iquec —queboedēmbi aidēn nacnenaid tantiate shubun puduedshun mimbi ampepec. <sup>23</sup> —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsēqui Nuquin Papa tantiec —queboedēmbi ambi chiaid niac-niaquec mibi icsamboec tabadec. <sup>24</sup> Adec mibi icsamboec tabadte chuquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadqueic mibi icsamboec tabadsho isun matses utsibon Nuquin Papa bēdamboen tantienquo iquec.

### *Nuquin Papa tantiaquidquo icte chiaid*

<sup>25</sup> —Nuquin Papan matses nebi —quequin Isadaidbon Nuquin Papan aton tsusedpa chiampicpadombon aton bacuēbo shui dēbid dēteshun secaic. Adonēdaid ambi chiaid niac-niaquenquo yec bēdamboec tabadsho Nuquin Papan bēdamboen istsiash. Isadaidbo utsibon ambi chiaid niac-niacsho Nuquin Papan bēdamboen istiapimbo iquec ambi con matses cacmaidobimboecnuc. <sup>26</sup> Nuquin Papan con matses cainquo icpampido matses utsibon ambi chiapadec bēdamboec tabadsho Nuquin Papan bēdamboen istsiash ambi: —Con matses nec —caidobimboecnuc. <sup>27</sup> Adec matses utsibo Nuquin Papan chiapadec bēdamboec tabadsho isash isadaidbo nadec chiadpec. —Matses utsibo bēdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. <sup>28</sup> ¿Shui dēbid dēteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismenuen Nuquin Papan chiapadombon nashumbic ompoquin icsamboen naquido Nuquin Papa tantiaquidquioda nedic? Padenquo. <sup>29</sup> ¿Ambi Moises dada uamepampiduidi ēmbimbo nanuequid Nuquin Papa tantiaquidquioda nedic? Padenquo. Nuquin Papa tantiaquidquien aton Mayanēn tantiamiacpadec bēdamboec tabadec. Adquid: —Mibi bēdambo iquec. Con matses mibi canu —capec Nuquin Papan matsesēn adoenuquo icnubi.

## 3

*Nuquin Papan isadaidbo tantiec, quequin chiaid*

<sup>1</sup> Aden: —Abi tantiec bēdamboec tabadquid Nuquin Papan con matses catsiash —quequin ěmbi chuisho tantiash: —¿Isadaidbo yecta icsambo icpec? —¿quecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿quecta ique? <sup>2</sup> Ai, aido nashunquiac. —Ěmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. <sup>3</sup> Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpatsiash? <sup>4</sup> Padenquio. Ma ambi chiacpadomboen naquidquio Nuquin Papa neyoc. Muesambo nec. Matses abitedimbo muaquidquio icnuc Nuquin Papan abimbo chuiquidquio nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquio nec.

‘Nēid bēdambo iquec. Nēid icsambo iquec, quequin Nuquin Papan abimbo chuibanendac, quequin ma matsesēn tantianu,’ quequin

Nuquin Papan: ‘Mibi icsaoc,’ quequin ěbi chuiboed chiombi,”  
quequin dada uapampic.

<sup>5</sup> Ěbi adsho bēdamboen tantiata. Icsamboen tantienda. —Nuquin Papan chiaid niac-niaquec ěbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ěmbi con matses Nuquin Papa bēdambo icte tantiameshobi Nuquin Papan ěbi cuidac icsambo ictsiash —quequin icsamboen tantienda. <sup>6</sup> Matsesēn naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bēdambo iquec. Mibi cuidenquio iquembi —quetiapimbo Nuquin Papa iquec. Muesambo nec. <sup>7</sup> Nadembidi icsamboen tantienda. —Ěbi muaquidquio icnubi: “Adquidpenquio Nuquin Papa nec. Bēdamboshē iquec. Muesambo nec,” quetsiash con matses. Adec muaquimbi Nuquin Papa muainquio icte con matses tantiametsiambi. Aden ěmbi abi tantiameshobi Nuquin Papan ěbi cuidac icsambo ictsiash —quequin icsamboen tantienda. <sup>8</sup> Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquio. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ěbi muauaquido Nuquin Papan cuidchitoshon.

*Matses abitedi icsaquido nec, quiaid*

<sup>9</sup> Tanta, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibēdec. Matses utsibo con matses isadaidbobēd abembi bēdamboec tabadtiapimbo iquec. Abitedimbo icsamboec tabadquido nec. Aden mibi chiombi. <sup>10</sup> Aden chuiquin Nuquin Papan dada uamepampic naden.

“Nuquin Papan chiaid niaquesambo nibēdec.

Abitedimbo icsaquido nec.

<sup>11</sup> Nuquin Papa tantiaquin ambi chiacpadomboenuidi naquidquio nibēdec.

Nuquin Papa tantiate bunquidquio nibēdec.

<sup>12</sup> Bēnudshun podqued tantienquio yacimboen Nuquin Papa tantienquio icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibēdec.

Abitedimbo icsapec.

<sup>13</sup> Nadquio iquec. Nèid icsamboec chuishumënquido. Unësaid ënden chococacno shëdec: 'Pisenac,' quequin tantiacbimboen adquido onquesho tantiash: 'Icsambo icquido nec,' quequin matsesën tantiec.

Nèidic muaquido.

Nèidic nisin pequin icsa uacbimboen icsa uate bunec icsamboec onquequido.

<sup>14</sup> Nèidic nëishash chieshëmë nec: 'Unëschitoshon,' quequin icsamboenuidi chuiquido.

<sup>15</sup> Nèidic intac mëyamec badedquio cuesunianquido.

<sup>16</sup> Nèidic abëd icquido natiamec chieshëmënquido.

<sup>17</sup> Adquidtedi cuesnante bunec bëdamboec tabadtiapimbo iquec.

<sup>18</sup> 'Nuquin Papan cuidnushe,' quenquio icquid Nuquin Papa tantiesabo nec,' quequin dada uamepampic.

<sup>19</sup> Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquio nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibëdtabi isadaidbotsen chiac: —Abimbo chiec —quiash dacuëdec ëcbedanenquio tabadendac matses abitedi. <sup>20</sup> Aden ambi chiaid niaquesambo nibëdnuc: —Ambi chiaid niaquesa icsho Nuquin Papan nuqui bëdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

### *Nuquin Papa matses bëdamboen ismete chiaid*

<sup>21</sup> Aden ambi chiacdedi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëdta tsusedpabo utsibo dada uamepampic ëndenquimbo. Aden ambi dada uamepampicpadomboen nëbi Nuquin Papan abi matses bëdamboen ismequid matsesmepac caondash. <sup>22</sup> Adoac Nuquin Papa abi tantiaquido bëdamboen ismenuc Esuquidistu abided ciudadec unëspac caondash. Nèbi aidquio tantiasho Nuquin Papan matses bëdamboen isec. Isadaidbobëdtambi matses utsibontsen Esus tantiasho adoendac. <sup>23</sup> Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibëdec. <sup>24</sup> Adquid bëdamboen istiapimbo icquin matses bëdamboen iste bunquin aton Mado Esuquidistu abided unës uamequin Nuquin Papan cuidpac caondash. Nèbi abided cuidadaid Esus tantiasho nuqui bëdamboen isec icsaisabimboecnuc. <sup>25</sup> —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unës uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin. <sup>26</sup> Nèbi adecbidi: —Icsaido cuidquid nebi —quequimbi Nuquin Papan ambi chiapadec nuqui icsaid bedshunec abided cuidadaid Esus tantiasho adembidi nuqui bëdamboen isquin cuidenquio iquendac.

<sup>27</sup> Embi aden chuisho tantiash: —Ambi chiapadomboenuidi nasho Nuquin Papan bëdamboen isebe —quequin mimbi abimbo chuitiapimbo iquec. Matsesën Nuquin Papan chiapadomboenuidi natiapimbo icsho bëdamboen istiapimbo icboedi nëbi Esus tantiasho Nuquin Papan nuqui bëdamboen isec. <sup>28</sup> Aden matsesën ambembi naquin Nuquin Papa bëdamboen ismetiapimbo iquec. Padnuen utsin: —Matsesash ëbi icsaid bedshunec abided cuidadaid tantiasho Nuquin Papan ëbi bëdamboen isec —quequin Esus tantiasho Nuquin Papan bëdamboen isec. <sup>29</sup> ¿Isadaidboudida Nuquin Papan bëdamboen ispatsiash? Padenquio. Matses utsibo isadaidpembobi Nuquin Papan bëdamboen istsiash. <sup>30</sup> Matses abitedi uaquid icquin ambi chiapadomboen isadaidbon Esus tantiasho Nuquin Papan bëdamboen isec. Adembidi matses utsibon Esus tantiasho Nuquin Papan bëdamboen isec. <sup>31</sup> Adoaido: —Nuquin Papan chiaid niac-niaquec icsamboec tabadnuna —¿quecta icpec?

Padenquio. Esus tantiaquido icquin Nuquin Papan chiacpadomboen natiadquio nuqui yanec.

## 4

### *Nuquin Papan Abadauan bēdamboen isaid*

<sup>1</sup> Tantia. Aden Nuquin Papan bēdamboen iste chuiquin isadaidbo tsusedpa Abadauan caid ēnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic? <sup>2</sup> Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembi —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquio icpampic Nuquin Papa. <sup>3</sup> Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuiampic. <sup>4</sup> Matsesien adenquio iquec. —Ambi chiacpadomboen nasho icbon yua bēdamboen isquid —nuqui quepec. <sup>5</sup> Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc. <sup>6</sup> Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

<sup>7</sup> “ ‘Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ēbi bēdamboen isec ēbi icsaid bēpiscudacimboen. Icsaisabimboecnuc ēbi bēdamboen isquin ēbi cuidenquio iquendac,’ quiash matses bēdambo yec cuishonquec.

<sup>8</sup> ‘Abi tantiaquid icsho isash ēbi icsaid bēpiscudash:

Ēmbi chiaid mimbi niac-niaccoque. Mibi cuidnu, Nuquin Papan ēbi cainquio iquendac,’ quiash matses bēdambo iquec,”

quequin Dabidēn chuiampic ēndenquimbo.

<sup>9</sup> ¿Shui dēbid dēteshun secaido isadaidboudida Nuquin Papan bēdamboen ispec? Padenquio. Matses utsibotsen bēdamboen istsiash. Tantia. Ēmbi chuiboedbidi chuioanu. Abi tantiaquid icsho Nuquin Papan Abadauan bēdamboen isbempampic ambi chiaid niac-niacacmaidbimboecnuc. <sup>10</sup> ¿Ambi chiacpadomboen shui dēbid dēteshun secacshoda Nuquin Papan Abadauan bēdamboen isbempampic? Padenquio. Shui dēbid dēteshun secabi icsho Nuquin Papan Abadauan bēdamboen isbempampic. <sup>11</sup> Bēdamboen isbenshumbic: —Abadauan, ēmbi chiacpadomboen nabenta. “Nuquin Papan bēdamboen isaido nebi. Aid bēshunchitomane,” qeshun min matsestedī shui dēbid dēteshun secabanta —capampic Nuquin Papan. Adoac Abadauanēn nabempampic. Aden shui dēbid dētiacmaid icquin Abadauanēn Nuquin Papa tantiacpadomboen nēbi shui dēbid dētiacmaidon Esus tantiasho Nuquin Papan bēdamboen isendac ambi chiaid niac-niacacmaidbimboecnuc. <sup>12</sup> Abadauanēn tsyuecquido isadaidbo Abadauambimboecquido Nuquin Papa tantiaquido abi iquec. —Shui dēbid dētemenēdaid icsho Nuquin Papan bēdamboen isebi —quenquio icquin Nuquin Papabēdta Esus tantiasho isadaidbo Nuquin Papan bēdamboen isaido abi iquec.

### *Nuquin Papan Abadauan chiaid*

<sup>13</sup> Ēndenquimboshē Nuquin Papan Abadauan naden chuiampic. —Abadauan, mibi nibēdanan yuecshun min tsyuecquid abentsēcshun utsibo bēdambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsēqui tantiasho matses bēdamboen isendambi —quequin otacquio tantiaquin



Nuquin Papan adopampic. ¿Ambi chiacpadomboenuidi Abadauanën nashoda Nuquin Papan aden chuipampic? Padenquio. Nuquin Papan chiac: —Ai, abimbo caic —queshoen Abadauan bēdamboen isbenshun Nuquin Papan adopampic. <sup>14</sup> ¿Nēbi: —Moisesën chiaid niaquesa icsho Nuquin Papan bēdamboen isebe —quec muaquidoda Nuquin Papan bēdamboen ispadic? Padenquio. Adec muaquidobi bēdamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanën tsyuecquid tantiaquidoen bēdamboen isec. <sup>15</sup> —Moisesën chiaid niaquesambo nebi —queboedombi aidēn chiaid niac-niacsho isun Nuquin Papan cuidendac. Ambi chiaid niaquesambo nibēdec. Nuquin Papan: —Bēdamboec tabadta —quequin chiaid nibēdnuc ambi aden chiaid matsesën niactiapimbo ictsiash. Ambi: —Bēdamboec tabadta —quequin chiaid abi iquec. Aid niaquesambo nibēdec.

<sup>16</sup> Nuquin Papan naden Abadauan chuipampic. —Abadauan, ěmbi chuisho tantiash: “Mimbi abimbo caic,” quesho mibi bēdamboen isquin min tsyuecquido bēdambo icmendambi —quequin chuipampic. Nēbi ambi chuipampicpadomboen naquin Esus tantiaquido Nuquin Papan bēdamboen isec. Nuquin Papan ambi chiaid dada uamepampidēn Moisesën tsyuecquido isadaidbon Esus tantiasho Nuquin Papan bēdamboen isec. Abadauanën Nuquin Papa tantiacpadomboen matses utsibontsen Esus tantiasho adem-bidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. <sup>17</sup> Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsan yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoaquien: —Abimbo mimbi caic —quequin Nuquin Papa Abadauanën tantiapampic. —Comapenen tantiaquin unēsaid uincuemequidquio icquin ambi chiacpadomboen ěbi bacuē tishmendac —quequin Abadauanën Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

<sup>18</sup> Nuquin Papan: —Min tsyuecquido dadpenquio iquendac —cac: —¿Mitsipadoac aidtedi con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibēdnubi. Adshun tsusioctšēcquio icquimbi aton mado tishmepampic. Nēbi aton tsyuecquido dadpenquio iquec Nuquin Papan chiampicpadequi. <sup>19</sup> —Con seta dadpenquio 100tedi icnuc tsusioctšēcshun ěmbimbo bacuē tishmetiapimbo iquebi. Con chido ěndenquio machobudtsēccondaid icquin bacuē usundotiapictšēcquio iquec —quequin tantiequi: —Nuquin Papan abimboen caosh —quepampic. <sup>20-21</sup> —Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatsēcboedēmbi aid tantiaquiopampic. Adshun: —Mibi bēdamboshē iquec, Papa —quequin Nuquin Papa chuipampic. <sup>22</sup> Adsho tantiashun Nuquin Papan bēdamboen isbempampic icsaisabimboecnuc.

<sup>23</sup> Aden Nuquin Papan ambi Abadauan bēdamboen isaaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic? <sup>24</sup> Padenquio. Nuquitsen Nuquin Papan ambi bēdamboen iste tantiamenuen aden dada uamepampic. Nuquin Icho Esusbēdta abi uincuemequid Nuquin Papa tantiasho nuquitsen bēdamboen isec. <sup>25</sup> Nuquin Papan tantiacpadec nuqui cuidmenquio icnuec nuqui icsaid bedshunec abided cuidadec Esus unēsapanēdash. Aden Nuquin Papa abi tantiaquido bēdamboen ismenuec unēsash uincuempanēdash Esus.

## 5

*Esus tantiaquido Nuquin Papan bēdamboen isaaid*

<sup>1</sup> Aden Esus tantiasho Nuquin Papan bēdamboen isaido yec abi cuidte dacuēdēnenquoio yec abēdi nuqui bēdamboec tantiananec. <sup>2</sup> Ēmbi chuibocpaden abi tantiaquido nuqui cuidmenquoio icnuec abided unēsquin Esusēn Nuquin Papa nuqui bēdamboen ismepec. Adoac nuqui nadpec. —Nuqui bēdamboen isquin unēsacsho nuqui abipadquid ic-saisa icmequin Nuquin Papan abēdi nuqui tabadmendac —quec nuqui cuishonquec. <sup>3</sup> Nadectsen nuqui cuishonquec. —Esus tantiaquid icsho utsibon chieshēnaqui Esus tantiatsēchoedi chieshtoenquoio icquin Esus tantiaquidquoio yanebi —quectsen nuqui cuishonquec. <sup>4</sup> Aden chieshtoenquoio icquin Esus tantiasho Nuquin Papan nuqui bēdambo capec. Adoac: —Esus tantiaquid icsho Nuquin Papan ēbi bēdambo icmec. Unēsacsho abi yacno ēbi tabadmendac ambi chiacpadomboen —quepec nuqui. <sup>5</sup> Adec: —Abi yacno ēbi tabadmendac —quequin Esus tantiaquid ¿ada Nuquin Papan cacumepec? Padenquoio. Aton Mayan nuquibēd icmiac paposhquiabimboen nuqui naden tantiec. —Nuquin Papan ēbi bēdamboen tantiaquin abi yacno ēbi puduedmendac —quequin nuqui tantiec.

<sup>6</sup> Aden matses tantiaquiec Nuquin Papan tantiacpadec Esus nadpanēdash. Matses abitedi abembi bēdamboec tabadtiapimbo icsho isun Nuquin Papan uesquin cuidt-senubi abi tantiaquido cuidmenquoio icnuec abided ciudadec Esus unēsapanēdash. <sup>7</sup> ¿Ada adquid matses icpadic? Padenquoio. ¿Cuesanquidēn matses bēdambo icquid caic: —Cuesnu —quesho tantiashunda dadpeshun: —Aid cuesenda. Ēbiquien cuesta —capatsiash? Padenquoio. Bēdamboshē icquid cuesmenquoio icnuen: —Nēid cuesenda. Ēbiquien cuesta —cachitembien ictsiash abentsēcshun. Icsambo icquid icshoen aden chienquoio ictsi-ash. <sup>8</sup> Padnuen matses abitedi icsamboecuidi tabadnuc nuqui cuidmenquoio icnuec Esuquidistu abided ciudadec unēsapanēdash. —Nuquin Papan ēbi tantiaquiec —matses camenuen Nuquin Papan aden Esus namepanēdash.

<sup>9</sup> Nēbi abided cuidadaidquoio Esus tantiasho Nuquin Papan nuqui bēdamboen isec icsaisabimboecnuc. Aden bēdamboen isquin Nuquin Papan nuqui cuidtiapimbo iquen-dac. <sup>10</sup> Matsesēn abi chieshēnsho isun aido cuidte bunenquoio icquin Nuquin Papan aton Madoded cuidpanēdash. Aden aton Madoded cuidash nēish bēdanshun Nuquin Papan aton Mado tantiaquid bēdamboen isec. Nēbi Nuquin Papan uincuemēdaid icquin Esusēn nuqui bēdamboen tabadmec. <sup>11</sup> Adembidi aidēn tantiamiacpadomboen nuqui: —Ēbi cuidenquoio icnuen aton Madoded cuidquid bēdamboshē iquec —quequin Nuquin Papa tantiec nuqui cuishonquec.

### *Adanēn naidbēdta Esusēn naid chiaid*

<sup>12</sup> Nuqui bēdamboen ismequid Esus tishabi icnuc abia matses uaidēn Adanēmba Nuquin Papan chiaid niac-niaquec icsasho cuidquin aidba Nuquin Papan unēsquid icmepampic. Adembidi Adanēn tsyuecquido matses abitedi Adan icsacpadecebidi icsate tantiaquimbi Nuquin Papan unēsquidoidquoio matses icmepampic. <sup>13</sup> Nuquin Papan: —Adec icsaında —quequin ambi chiaid Moises dada uamiabi icnubi matses abitedi icsapampic. —Ēmbi Moises chuimiaid mimbi niac-niaquec —Nuquin Papa quetiapimbo icnubi matses icsapampic. <sup>14</sup> Nuquin Papan chuiboedquiobi niaquec Adamba ic-sasho Nuquin Papan cuidac unēsac taēpampic. Adan unēsambic aidēn nacpadomboen nabi icsa utsi naiqui matses abitedi icsasho adembidi unēsquidoidquoio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidēn chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquoio Esuquidistu nec.

<sup>15</sup> Matses abentsēcshun Adanēmba Nuquin Papan chiaid niacsho cuidquin aidba unēsquid icmeshun aton tsyuecquido matses unēsquidoidquoio Nuquin Papan icmepampic. Adecebidi Nuquin Papa matses bēdamboen ismequid abentsēc iquec. Esusuidtsēqui abi tantiaquidotedi cuidmenquoio icnuec abided ciudadec unēsac

caondash. Nēbi aid tantiasho Nuquin Papan nuqui bēdamboen isec. <sup>16</sup> Adanēn nachimboen Nuquin Papa matses bēdamboen ismequidēn nambo. Adan abentsēqui icsaquin Nuquin Papa cuidmiac abi unēsacpadquiec matses abitedi unēsquidombo yanac. Nuquin Papa bēdamboen ismequidēmbien matses icsaid bedshunec abided cuidadquin Nuquin Papa abi tantiaquidotedi bēdamboen ismec icsaisabimboecnuc. <sup>17</sup> Ambi chuiboedi niacquin Adanēn Nuquin Papa cuidmiash unēsquid yanacpadec matses unēsquidoudquio iquec. Esuquidistunuidtsēqui nac Nuquin Papan matses bēdamboen isendac. Nēbi aid tantiasho Nuquin Papan nuqui bēdamboen isquin bēdamboec tabadquid icmendac. Adec bēdamboec tabadec unēsash Esusbēdtan Nuquin Papan namiacno bēdamboshē yacnombo nuqui tabadendac.

<sup>18</sup> Adec matses abentsēqui icsasho aidbēdta aton tsyuecquido matses abitedimbo cuidquin Nuquin Papan unēsquidoudquio icmepampic. Padnuen Nuquin Papan chi-acpadec abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac. <sup>19</sup> Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoudquio yanac. Padnuen Nuquin Papan chiaid niaquesambo icquin Esusēn Nuquin Papa nuqui bēdamboen ismec. <sup>20</sup> ¿Matses bēdamboen isnuenda Nuquin Papan ambi: —Bēdamboec tabadta — quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi — quequin tantiaquin abided cuidadaid tantiasho Nuquin Papan matses bēdamboen isec. <sup>21</sup> Taēc matses icsasho cuidac unēsquidoudquio yanac. Adsho isun matses bēdamboen isnuen Nuquin Papan ambi chiaid niaquesambo Esused cuidac. Nēbi Nuquin Icho Esuquidistu tantiasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

## 6

### *Esus tantiaquid bēdamboec tabadquid, quiaid*

<sup>1</sup> Nuquin Papan bēdamboen iste ěmbi chuisho tantiashun naden tantienda. —Icsaido cuidmenquio icnuec abided Esus cuidadec unēsapanēdash. Aid tantiasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda. <sup>2</sup> Esus tantiaquido adesambo nec. Esus tantiec icsateuidi nuqui bunenquio yanec. <sup>3</sup> ¿Tantienquioda ique? Naden chuiquin mimbi acten mentomiac. — Ěbi cuidmenquio icnuec abided cuidadec unēsaid Esus tantiaquid nebique. Ambi chi-acpadec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec. <sup>4</sup> Aden Esus abided cuidadec unēsaid tantiasho Nuquin Papan utsiac bimboecnuc nuqui icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiac bimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuene.

<sup>5</sup> Adec abided cuidadec unēsaid tantiec icsate bunenquio yanquid yec Esus uincuemi-acbimboen comapenen tantiaquin Nuquin Papan utsiac bimboecnuc icmiaidtsen nuqui nec. <sup>6-7</sup> Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yac bimboec matses abembi icsaic ěnēdtiapimbo iquec. Adboedi Esus tantiec nuqui icsate bunenquio yanec.

<sup>8</sup> Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. <sup>9</sup> Nuquin Papan uincuemiac Esus padpidec unēstiapimbo iquendac. Aton dada unēsquid icboedi unēstiapimbo icquid yanac. <sup>10</sup> Matses

icsaido cuidmenquio icnuec abided abentsequi ciudadec Esus unēsac caondash padpidec unēsenuio yec. Adsho uincuemiac Nuquin Papan chiacpadomboen nabanec aidbēd tēshnanenquio yec tabadec.

<sup>11</sup> Ēbi adsho tantiash nadta. —Ēbi cuidmenquio icnuec abided ciudadec unēsacsho uincuemiaid Esus ēbēdi iquec. Aid tantiec icsainquio yanebi. Ambi nacpadec tabadtiadquio iquebi —queta. <sup>12</sup> Icsamboec tabadenquio icnuna. Nuqui icsate bunaid nainquio icnuna. <sup>13</sup> —Icsaquionona —quesho tantiash: —Padi —quenuna. Unēsac bimboen Nuquin Papa tantienquio ictenedēmbi uincuenac bimboen Nuquin Papa nuqui tantiabenonduque. Ambi chiacpadec bēdamboequien tabadtiad. <sup>14</sup> —Nuquin Papan ambi: “Bēdamboec tabadta,” quequin chiaid Moises dada uamiactedi naquin ēmbimbo Nuquin Papa bēdamboen ismembi —quenquio icquin Esus tantiasho Nuquin Papan nuqui bēdamboen isec. Ambi bēdamboen isaido yec nuqui icsate bunenquio nuqui yanegue. Bēdamboec tabadnuna.

*¿Tsuntsin yuabo Esus tantiaquido icpec? quequin chiaid*

<sup>15</sup> —Aden Nuquin Papan nuqui bēdamboen isec —quequin ēmbi chuisho tantiashun naden icsamboen tantienda. —Nēbi abided cuidadaid Esus tantiasho ēbi bēdamboen isec. Ēbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. <sup>16</sup> ¿Tantienquioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ēntiapimbo yec unēsash icsano nidendac. Nuquin Papan yuain ambi chiacpadec bēdamboec tabadcuenendac. <sup>17</sup> Mibi adec tabadsho isun: —Esus chuibanac icsaid ēntiapimbo icboedi Esus tantiabenash Doma yacnocquido bēdamboec tabadcuenac. Aden namec mibi bēdambo iquec, Papa —quequin Nuquin Papa chiombi. <sup>18</sup> Satanasēn yua icquin mimbimbo mibi icsaid ēntiapimbo icsho Nuquin Papan nac ambi chiacpadquiec mibi bēdamboec tabadcuenac.

<sup>19</sup> —Mates icquin: “Nuquin Papan chiaid tantiadenquio iquec,” canushe —quequin bēdamboen tantiamenuen mimbi tantiaid yuan naid mibi chiombi. Satanasēn yua yec icsateuidi bunquiec mibi icsaded-icsadedondac. Adec icsamboshē iccondaidi nēbi Nuquin Papan chiacpadequien bēdamboec tabadtiad. <sup>20</sup> Satanasēn yua yec icsaquiec Nuquin Papan chiacpadec bēdamboec tabadtiapimbo mibi iccondac. <sup>21</sup> ¿Ada bēdamboec tabadonda? Ma mibi chieshēmēnquiec tabadteneyoc. —Ēbi chieshēmēnquiec tabadondaid tantiashun: “Mibi icsambo iquec,” ēbi canushe —queshun mimbi naondaaid ma mimbi chienquio iccondac. Icsaid ēnabi yec unēsash icsano mibi nidtsenac. Adecbidi icsaid ēnenquio icquido unēsash icsano nidendac. <sup>22</sup> Nēbi nuqui Esus tantiasho Nuquin Papan aton yuabo nuqui icmiac. Adoac icsaid ēntiapimbo icboedi nēbi nuqui bēdamboec tabadcuenec. Adquid unēsacsho Nuquin Papan abēdi tabadmendac. <sup>23</sup> Icsaido cuidquin Nuquin Papan icsano nidmendac. Abided ciudadec unēsaid Esuquidistu Nuquin Icho tantiasho Nuquin Papan nuqui bēdamboen isquin unēsacsho abēdi tabadmendac.

## 7

*Bēdamboec tabadte chuinen chido bēnēchoquid Pabadon chiaid*

<sup>1</sup> Con utsibobimboecquido mibi neque. Tantia. Padpiden mibi chuinu. Naden chiaid mimbi tantianēdac. —Nuquin Papan dada uamiac Moisesēn chiampicpadomboen matesēn naquid. Unēsun aidēn chiaid natiapimbo iquec —quequin mimbi tantianēdac.

<sup>2</sup> Nuquin Papan chiacpadomboen inaidēn aton bēnē nianesa. Dada utsi chudmesa chidon. Bēnē unēsambien niante dada utsin bedadquid. <sup>3</sup> Bēnē unēsabi icnubi aton bēnē nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquio ictsiash.



<sup>4</sup> Adecbidi ambi chiaid niac-niacsho Nuquin Papan cuidtsenaido nuqui iccondac. Adondaiddi abided ciudadec unësaid Esus tantiasho Nuquin Papan: —Mibi cuidnu — nuqui cainquio iquendac. Aden Nuquin Papan uincuemenedaidën Esusën aton yua nuqui icmequin bëdamboec tabadquid icmenuen nuqui icsaid bedshumpanëdash. <sup>5</sup> Esus tantiabi yec nuqui bunacpadecuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unësacsho icsano nidmequin Nuquin Papan nuqui cuidtsenëdash. <sup>6</sup> Esus tantiabi yec nuqui nadondac. —Moisesën chiacpadec bëdamboec tabadsho Nuquin Papan nuqui bëdamboen istsiash. Ambi chiaid niac-niacsho nuqui cuidendac —quiondaiddi nëbi Esus tantiec nuqui adenquio iquec. Nëbi Nuquin Papan Mayanën tantiamiacpadec nuqui bëdamboec tabadec.

*Icsaquid nebi, quequin Pabadon chiaid*

<sup>7</sup> —Nuquin Papan ambi chiaid Moises dada uamepampid icsambo iquec —¿quectabi ique? Icsapenquio iquec. Nuquin Papan ambi chiaid Moises dada uamiaid isun: — Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibëdec,’ quec chieshëmënenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchitondac. <sup>8</sup> Utsin na isash: —Adquid con na nibëdec —quiash chieshëmëntsëcboedi Nuquin Papan: —Adenda —quequin chiaid tantiashi icsaquid yec utsin na comapenec bunquiec chieshëmënquiondabi. Nuquin Papan chiaid nibëdnuc: — Adec icsachitobi —quequin tantienquio ictsenondambi. <sup>9</sup> Nuquin Papan chiaid tantiabi yec Nuquin Papan cuidte dacuëdënenquio yec: —Bëdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. <sup>10</sup> Adquid Nuquin Papan cuidendac —nuqui quianondac. —Ma bëdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bëdamboec tabadenquio iccobi. Icsachitobi. Adquid Nuquin Papan cuidendac —nuqui quianondac. <sup>11</sup> —Ambi chiacpadomboenuidi nashobini Nuquin Papan bëdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. <sup>12</sup> Aden nuqui abimbo tantiamequid Nuquin Papan chiaid bëdambo iquec. Icsaisambo icquin Nuquin Papan bëdamboen chuipampic.

<sup>13</sup> ¿Nuquin Papan chiaid isbanashta matses Nuquin Papan cuidtequido yanactic? Padenquio. Matses Nuquin Papan cuidtequido yanambic Nuquin Papan ambi chiaid dada uamepampic. —Nëid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bëdamboen istiapimboen icchitec. Èbien cuidchitec —nuqui quianondac. <sup>14</sup> Nuquin Papan Mayanën tantiamiacpadomboen con tsusedpan Nuquin Papan chiaid dada uapampic. Adembidi aton Mayanën namiac Nuquin Papan chiacpadec nuqui bëdamboec tabadtsiac. Aidën namiabi mëtaniaid abibi mënchiquidtiapimbo yacimboen icsaquido icquin Nuquin Papan chiacpadomboen natiapimbo nuqui iquec. <sup>15</sup> —Nuquin Papan chiacpadomboen nanu —queboedombi natiapimbo nuqui iquec. Adecbidi: — Utsibo icsacpadec icsainquio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. <sup>16</sup> —Nuquin Papan chiaid bëdamboen icchitec. Aidën chiaid niacte bunenquio iquebi —queboedëmbi aidën chiaid niac-niaquec: —Bëdamboen chiaidimbi niac-niacchitec —quebi. <sup>17</sup> Bëdamboecuidi tabadtiadquidini icsaquid yec ëbembic icsadenechitec. <sup>18</sup> —Bëdamboec tabadnu —queboedi icsaquid yec ëbembic bëdamboec tabadtiapimbo iquebi. Icsaquidini nec. <sup>19</sup> —Bëdambo

icte bunebi —queboedi ëbemi bëdamboec tabadtiapimbo iquebi. —Icsate bunenquoio iquebi —queboedi ëbenquiobi icsaded-icsadedebi. <sup>20</sup> Icsate bunenquoio icboedi icsaquid yec ëbemi bëdamboec tabadtiapimbo iquebi.

<sup>21</sup> —Adquid nebi. Nuquin Papan chiacpadec bëdamboec tabadtiadquidi bad-edquoio icsaded-icsadedebi —quequin tantiemi. <sup>22</sup> —Nuquin Papan chiaid bëdambo iqueque. Ambi chiacpadec ëbemi bëdamboec tabadnu —queboedi <sup>23</sup> icsaquid yec ëbemi bëdamboec tabadtiapimbo iquebi. Mëtaniaid abemi mënchiquidtiapimbo yacximboen ëmbi naid ëntiapimbo iquebi. —Nuquin Papan chiacpadec bëdamboec tabadnu —queboedi bëdamboec tabadtiapimboeni icchitec. <sup>24-25</sup> Adquid yec shubitiadquoio icchitebi. Icsaquid yec: —¿Mitsipadequini bëdamboec tabadpeba? —queboedi: —Abi tantiasho Esuquidistumbini bëdamboen tabadmec —quianondabi. Adshun Nuquin Papa naden chiemi. —Ëbi bëdamboen tabadmequid Esus mimbi ëbi tantiamiac. Mibi bëdambo iquec, Papa —quequin Nuquin Papa chiemi.

## 8

### *Nuquin Papan Mayanën namiaid*

<sup>1</sup> Aden matses bëdamboen tabadmequid Esuquidistu tantiasho: —Mibi icsambo iqueque. Cuidnu —cainquoio iquendac Nuquin Papan. <sup>2</sup> Icsaquido yec bëdamboec tabadtiapimbo icscho Nuquin Papan cuidtequido icboedëmbi Esus tantiasho Nuquin Papan aton Mayan meniac aidën tantiamiacpadec nuqui bëdamboec tabadanendac. <sup>3</sup> —Moisesën chiacpadec bëdamboec tabadec unësash Nuquin Papa yacno tabadebi —queboedi icsaquido yec abemi bëdamboec tabadtiapimbo matses iquec. Adsho isun matses bëdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unëspanëdash. <sup>4</sup> —Abided cuidadaid con Mado Esus tantiasho bëdamboen isquin con Mayan matses menendambi. Adoac aidën tantiamiac ëmbi Moises chuimiampicpadec bëdamboec tabadendac. Matses abi icsate bunacpadec icsainquoio yec bëdamboec tabadendac —qeshun Nuquin Papan Esused cuidpac caondash.

<sup>5</sup> Adec Nuquin Papan Mayanën tantiamiaid Esus tantiaquid Nuquin Papan tantiacpadec bëdamboec tabadte bunec. Padnuen icsaquid: —Ëbi bunaid nanu —quequin ambibi tantiacpadec icsaic. <sup>6</sup> Aden abi bunaidquoio naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquoio yec bëdambo yec unësash Nuquin Papa yacno tabadendac. <sup>7</sup> —Icsate bunquidën ëbi chieshënec. Ambi naiduidtsëqui naquin ëmbi chiacpadomboen natiapimbo iquec —qeshun Nuquin Papan cuidendac. <sup>8</sup> Adquido chuiquin: —Mibi bëdambo iquec —catiapimbo Nuquin Papa iquec.

<sup>9</sup> Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bëdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusën Mayambidi nec. <sup>10</sup> Abided cuidadaid Esus tantiasho bëdamboen isquin Nuquin Papan aton Mayan meniaid yec abëd tabadtequido nuqui nec. Icsaquido yec matses abitedi unësquidombo icnubi Esus tantiaquid unësacsho Nuquin Papan abëdi tabadmendac. <sup>11</sup> Esus uincuemequidën Nuquin Papan ambi aton Mayan meniaido unësacsho nuqui uincuemequin nuquin dada utsi uaindac. Aton Mayan nuquibëd tabadsho isun nuqui adoendac.

<sup>12</sup> ¿Ëbi adsho tantiasho Esus tantiaquid abi bunacpadequi icsapec? Padenquoio. Bëdamboec tabadte bunec. <sup>13</sup> Utsiboen abi bunacpadec icsamboecuidi tabadec unësacsho cuidquin Nuquin Papan icsano nidmendac. Nuquin Papan Mayanën tantiamiacpadec tabadquin nuqui icsaid nuqui ënec. Adash unësash Nuquin Papa yacno nuqui tabadendac.

<sup>14</sup> Aden aton Mayanën bēdamboec tabadmiaido Nuquin Papan: —Con mado nec. Con champi nec —capendac. <sup>15</sup> ¿Icbo icsambo icquidēn yua dacuēdmiac bimboenda Nuquin Papan Mayanën nuqui dacuēdmec? Padenguio. Nuqui bēdambo icmec. Aidēn tantiamiacpadomboen Nuquin Papauidtsēqui papa nuqui capec. <sup>16</sup> Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. <sup>17</sup> —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenquo yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenquo icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

### *Nuquin Papan bēdamboshē icmete chiaid*

<sup>18</sup> Adec Nuquin Papa yacno nuqui bēdamboshē icte tantiaquin nuqui nidaidēn natiac tabadaiduidi ma nuqui tantiatiapimbo iqueyoc. <sup>19</sup> Aden Nuquin Papan nuqui bēdamboshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec. <sup>20</sup> Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquo icmepampic aidon: —Padi —catiapimbo icnuc. <sup>21</sup> —Yuecshun ěmbi Esus tantiaquido uincuemequin aton dada utsi uacpadēn ěmbi uaido utsi nidaidēn icquidtedi chodquete icboedi utsi uain bēdamboshē icmendambi —quequin tantiaquimbi unēsquiduidquo icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. <sup>22</sup> Unēstiapimbo icte bunec unēsquid yec: —¿Tedecksicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquo tishmepashuni —quiac bimboec adpec. <sup>23</sup> Nuquin Papan meniaidēn aton Mayanën tantiamiacpaden nuquitsen naden chiec. —Con dada utsi uaqun unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaqun Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. <sup>24-25</sup> —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaqun nuqui adenquo iquendac.

<sup>26</sup> —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibēd icquin bēdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquo icsho isun Nuquin Papan Mayanën abi chiec. Unēsquo icnuc onquenquo icquin chiec: —Mimbi tantiacpadomboen aid matses bēdambo icmeta, Papa —quequin Nuquin Papan Mayanën nuqui comapenen chuided-chuidedec. <sup>27</sup> Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanën onquenquo icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

### *Nuquin Papan nuqui bēdambo icmiaid*

<sup>28</sup> Aden tantiahsun nuqui naden tantiec. Ambi tantiamiacpadomboen abi tantiaquido bēdambo icmete bunquin Nuquin Papan bēdamboen nashunec. Unēsquo yec tabadsho aden naic. Natiambo icsho adembidi naic. Cuishonquesho adembidi naic. <sup>29</sup> Ęndenquimboshē nidaid uabi yequi Nuquin Papa nadpampic. —Ęmbi tantiactedi ěbēdta con Mado tantiaquid icmequin Esuspadquo icnuc bēdambo icquid icmendambi. Aden

abi tantiaquido aton utsibobimboecnuc icmendabi —quequin ambi tantiampicpadquio icnuc bēdambo icmenuen Nuquin Papan naic. <sup>30</sup> Ēndenquimboshē nidaid uabi yec: —Yuecshun naindami —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuec abided cuidadaid Esus tantiasho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

<sup>31</sup> ¿Embi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidēn: “Cuid,” cac Nuquin Papan ēbi cuidenquio ictsiash —quec nuqui dacuēdenquio iquec. <sup>32</sup> Nuquin Papan nuqui tantiaquiec. Aton Madombo cudasenquio icquimbi nuqui cuidenquio icnuen aton Madoded cuidquin unēs uamepanēdash. Adshumbic Esus tantiasho ēnenquio icquin bēdamboen isquin nēbi bēdambo icmequin unēsacsho abēdi tabadmequin nuqui bēdamboeshē icmendac. <sup>33</sup> ¿Nuquin Papan nuqui bēdamboen isquidēmbida nuqui cuidpec? Padenquio. ¿Utsibo nuqui caic: —Icsambo iquec —qeshobida Nuquin Papan nuqui cuidpec? Padenquio. <sup>34</sup> ¿Esusēmbida nuqui cuidpec? Abi tantiaquido cuidmenquio icnuec abided cuidadec Esus unēsac caondash. Unēsacsho Nuquin Papan uincuemiāc Nuquin Papa yacnoshon aidēmbi abi tantiaquido chianec. —Ēbi tantiaquido bēdamboen isquin cuidenda, Papa —quequin Nuquin Papa chianec tabadec. ¿Adquidēnquibida nuqui icsano nidmequin cuidpec? Padenquio. <sup>35</sup> Nuqui bēdamboen isquin ēnenquio icquin Esusēn nuqui tantiaquiec. ¿Shubisho isunda Esusēn nuqui tantienquio icpec? Padenquio. ¿Dacuēdshoda Esusēn nuqui tantienquio icpec? Padenquio. Adembidi nuqui tantiaquiec. Utsibon chieshēnsho bēdamboen isquinc pete natia bunsho bēdamboen isquinc nuquin dashcute nibēdsho bēdamboen isquinc nuqui Esusēn caindac. —Ēbi acshunendac —qesho bēdamboen isquinc chieshēmēnquidon: —Cuesunenu —casha bēdamboen isquinc nuqui caindac Esusēn ēnenquio icquin. <sup>36</sup> Aden utsibon Esus tantiaquido chieshēnte chuīquin Nuquin Papan dada uamepampic naden. “Mibi tantiasho ēbi: ‘Cuesunenu,’ caded-cadedec uimanēmēnquidon. Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

<sup>37</sup> Aden utsibon nuqui chieshēnsho Esuquidistun nuqui bēdamboen tantiaquiec. Shubisho abi nuqui tantiamec. Adoac Esus tantiatsec shubiquimbi chieshtoenquio icquin nuqui Esus tantiaquiec yanendac. <sup>38-39</sup> Nuquin Papantsen ēnenquio icquin nuqui tantiaquiec. Nuquin Icho Esus tantiasho Nuquin Papan nuqui bēdamboen isec. Unēsacsho nuqui bēdamboen tantiatsiash. Unēsabi icsho nuqui bēdamboen isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquio yampatsiash? Padenquio. Adembidi nuqui tantiaquiotsiash. ¿Podobitsi icsabon icho Satanasēn: —Aid tantienda —cacta Nuquin Papan nuqui chieshēmpatsiash? Padenquio. Adembidi nuqui tantiaquiotsiash. Nēbi nuqui bēdamboen tantiec. Yuecshun adembidi nuqui bēdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bēdamboen tantiatsiash. Nidaid uquēducquio nidacsho adembidi nuqui bēdamboen tantiatsiash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatsiash ēnenquio icquin.

## 9

### *Pabadon aton matses isadaidbo chiaid*

<sup>1-2</sup> Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquio iquec —quiash shubitiadquio iquebi. Muainquio iquebi. Esus tantiaquid icsho Nuquin Papan Mayanēn tantiamiaid icquin abimbo



chiembique. Tantiata. <sup>3</sup> Con matses isadaidbo tantiec unësquoio yec tsadebi. Nuquin Papan: —Min matses abitedi cuidenquoio icnuen mibiuidtsëqui Esusbëd tabadmenquoio icquin icsano nidmequin cuidnu —capatecnëdani. Adoac: —Ai, con matses cuidenquoio icnuen ëbided cuid —quetsenondabi. <sup>4</sup> Con matses tsusedpa Acobo caid Nuquin Papan Isadaid caidën tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibëdi tabadebique. Mibi ismenu —quequin con matses tabadacno abu ushu bëchamauanquieccquid chomequin ismepampic. Adashic nadpampic. —Ëmbi chiacpadec bëdamboec tabadsho mibi bëdamboen isquin bëdambo icmendambi. Mibi nianenquoio iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquoio ictequid chuiquin: —Mibi bëdambo icmendambi —quequin Nuquin Papan con matses chuiampic ëndenquimboshë. <sup>5</sup> Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquibi yec abitedishun Icho yec matsesac caondashe. Esus chuiquin: —Nuquin Papa padquibi yec mibi bëdamboshë iquec —canuna ënenquoio icquin.

<sup>6</sup> Ëmbi chiacpaden Esus tantienquoio icscho Nuquin Papan con matses dadpen bëdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquoio icquin con matses bëdamboen istiapimbo iquec —¿quectabi ique? Padenquoio. Nuquin Papan abimbo chuiampic. Isadaidbo dadpen-shun Nuquin Papa bëdamboen tantienquoio iquec. Ambi tantiactedishun abi tantiasho ambi chiacpadomboen Nuquin Papan bëdamboen isec. <sup>7</sup> Ëndenquimboshë con tsusedpa Abadauanën mëdaidtedi adembidi Nuquin Papan bëdamboen isambo. Abadauanën mado abentsëqui Isac caic: —Aidën tsyuecquido ëmbi mibi cuënacpadomboen con matses caindambi —quequin Nuquin Papan chuiampic. <sup>8</sup> ¿Abadauanën bacuëbotedishun tsyuecquidotedida Nuquin Papan con matses caido nepec? Padenquoio. Ambi chiacpadomboen Isaquën tsyuecquido Nuquin Papan con matses caido nec. <sup>9</sup> Naden Nuquin Papan Isac tishte chuiampic. “Ëmbi tantiacpadën choashun ëmbi namiac Sadan min chidon dada bacuë tishendac,” quepampic Nuquin Papa Abadauan chiec.

<sup>10</sup> Aden ambi: —Adoendambi —quequin chiacpadomboen naquidquoio Nuquin Papa nec. Aden Nuquin Papan Isaquën bacuë abi ushëmbi daëd tishte chuiampic. Adnubien con tsusedpa Isaquën aton chido Debeca caid bedshun chudquin dada bacuë daëd usundomepampic Nuquin Papan chiacpadomboen. <sup>11-12</sup> Aid dada bacuë daëd tishabi icshobi Nuquin Papan ani naden chuiampic. “Ëmbi tantiacpadquid min madon utsimpi bëyucquidbimboecquid nendac,” quepampic. Aid daëd tishabi bëdamboec tabadtiapimbo icnubi: —Tishacsho ëmbi tantiacpadembi tsyuec tishtsaidëmpi abentsëqui bëdamboen isendambi —quequin tantiec adpampic Nuquin Papa. <sup>13</sup> Adembidi Isaquën mado chuiquin Nuquin Papan ambi chiaid dada uamepampic. “ ‘Acobouidtsëqui tantiaquoioquin aton buchimpi Esau bëdiactsëc tantiatsendambi,’ quepampic Nuquin Papa,” quequin dada uamepampic.

<sup>14</sup> ¿Ëmbi aden chuisho tantiashtabi: —Nuquin Papa icsambo iquec —quecta mibi ique? Ma Nuquin Papa icsapenquoio icquid neyoc. Icsaquido yec matses abitedi ambi cuidtequido icscho Nuquin Papan ambi tantiactedi bëdamboen isec. <sup>15</sup> Aden Nuquin Papan con tsusedpa Moises chuiampic.

“Embi tantiactedi matses bëdamboen isendambi. Aidtedi cuidenquoio iquendambi,”

quequin chuiampic. <sup>16</sup> ¿—Ëmbembi nasho Nuquin Papan bëdamboen istiashtabi —quec matses bunacpadenda Nuquin Papan matses bëdamboen ispec? Padenquoio. Ambi

tantiactedishun abi tantiasho Nuquin Papan bēdamboen isendac. <sup>17</sup> Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuipampic. “Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquio nec, ma ēbi canu,’ quequin mibi chuiquid dapa icmiondambi. Mibi icsasho pacuēnēdadbimboecnuc mibi icmembi,” quequin Nuquin Papan padaon chiaid Moisesēn dada uapampic. <sup>18</sup> Aden ambi tantiacpadomboen utsi-utsien icsaido pacuēnēdadbimboecnuc icmequin abi tantiamenquio iquec. Adembidi utsi-utsien bēdamboen isquin abi tantiamec.

<sup>19</sup> ¿Ēbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesēn nainquio icpadic? —¿quecta ique? <sup>20</sup> ¿Matses icquinda mīmibi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ēbipadquid matses uao, Papa? —¿capenda nuqui ique? <sup>21</sup> ¿Ada abi nacnenquid matsun chushcapadic? Padenquio. Matsu nacnenquidēn ambi tantiacpadomboen nacnenendac. —Nēid nidaid tēshē tēchu bēdambo icquid acte uetequid nacnenu. Nēid nidaid tēshē matsumpi icsactsēcquid opa acmete nacnenu — quequin matsu nacnenquid. Aden ambi tantiacpadomboen nidaid tēshun nacnenquid.

<sup>22</sup> Adembidi nuqui uaquid Nuquin Papan ambi tantiacpadomboen naindac. — Abitedishun Icbombo yec comapenen tantiaquidquio nebi. Adquid icquin icsaido cuidquid nebique. Ismenu —queboedēmbi ambi cuidtequido baded cuidenquio iquec. Ambi ēndenquimboshē tantiacpadomboen aido icsano nidmendac. <sup>23</sup> —Ma ēmbi bēdamboen isaidon naden tantianu. “Icsaisambo icquin matses bēdamboen iste bunquin Nuquin Papan icsaido badedi cuidenquio iquec,” quequin ma tantianu — queshun icsaido badedi cuidenquio iquec. Ambi ēndenquimboshē tantiacpadomboen ambi bēdamboen isaido abēdi tabadmendac.

<sup>24</sup> Aden ambi tantiacpadomboen Esus tantiasho Nuquin Papan nuqui bēdamboen isec. Isadaidbon abi tantiasho bēdamboen isquinc isadaidpembo matses utsibon abi tantiasho bēdamboen isquinc nuqui caindac. <sup>25</sup> Ambi matses utsibotsen aden bēdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ēmbi con matses cacmaidobi con matses cabenendambi.

Adembidi ēmbi bēdamboen tantiacmaidobi matses utsibo bēdamboen isbenendambi,” quequin Nuquin Papan chiaid dada uashun <sup>26</sup> nadentsen dada uapampic.

“Matses utsibo ambi con matses cacmaidobi ambi tantiacpadēn aido abentse-abentsen Nuquin Papan bēdamboen isendac.

Bēdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bēdamboen iste chuiquin dada uapampic.

<sup>27</sup> Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasēn naden dada uapampic. “Masitedi dadpenquio caidnēdaido isadaidbo daēdpactsēcshun abi tantiasho bēdamboen isquin aidtedtsēqui Nuquin Papan cuidenquio iquendac. <sup>28</sup> Ambi chiacpadomboen ambi tantiacpadēn matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasēn dada uapampic. <sup>29</sup> Nuquin Papan chiaid padpiden dada uaquin isadaidbo cuidte Isayasēn chuipampic naden.

“Shubu dadpen icquid Sodoma caid yacnocquidobēdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibēdquieq iquendac.

Adembidi con matses Nuquin Papan uesquin cuidtsempanēdash.

Abitedishun Icho icquin con matses nibēdquiecnuc cuidtsempanēdash. Dadpen cuidquin daēdpactsēc cuidabi icpanēdash,”

quequin dada uapampic Isayasēn.

*Isadaidbo bēdamboen istiapimbo icte chiaid*

<sup>30</sup> Aden Isadaidbo dadpeshun abi tantienquo icsho Nuquin Papan bēdamboen istiapimbo iquec. Padnuen matses utsibo: —Mabi Nuquin Papan bēdamboen isnu. Ambi chiapadec bēdamboec tabadnu —quesabobi: —Ēbi cuidmenquo icnuec abided cuidadec unēsaid Esus bēdamboeshē iquec —quesho Nuquin Papan bēdamboen isec icsaisabimboecnuc. <sup>31</sup> Isadaidboen: —Moisesēn chiampiduidi ěmbembi nasho Nuquin Papan bēdamboen isebe —queboedombi nainquo icsho Nuquin Papan bēdamboen istiapimbo iquec. <sup>32</sup> ¿Atotsieshun Nuquin Papan isadaidbo bēdamboen istiapimbo icpec? —Ambi chiapadomboenuidi ěmbembi naquin Nuquin Papa bēdamboen ismembi —queboedombi adotiapimbo icquin Nuquin Papa bēdamboen ismequidquo Esus chieshēnec. Adsho Nuquin Papan bēdamboen istiapimbo iquec. <sup>33</sup> Esus tishabi icnuc isadaidbon Esus chieshēnte chuiquin Nuquin Papan con tsusedpa naden dada uamepampic. “Buintad bēdambo icquid istuidash: ‘Nēidquo shubu uanun nitsinemi,’ quiacimboen Edusaden yacno ěbi bēdamboen ismequidquo isadaidbobēd tabadmendambi. Adec tabadsho anocquidon chieshēnendac. Aid chieshēnquid nadquo iquendac. ‘Cuēte mabud iquec,’ quequin tantienquo yec nidec tocoshquetanec uebudacimboec ěbi bēdamboen ismequid tantienquo yec unēsash icsano nidendac. Aid tantiaquido: ‘Nēid tantiasho Nuquin Papan abi yacno nuqui tabadmendac,’ quequid unēsacsho ěbi yacno tabadmendambi,” quequin Nuquin Papan ambi chiaid dada uamepampic.

## 10

<sup>1</sup> Con matses isadaidbo tantiac unēsquo icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bēdamboen ista, Papa —quequin Nuquin Papa chianiombi. <sup>2</sup> Esus tantiabi ěmbi chuidenecpadomboen chiec: —Nuquin Papan chiapadomboenuidi naquin Nuquin Papa bēdamboen ismembi —quetsēchoedombi con matsesēn Nuquin Papa bēdamboen ismete tantienquo iquec. <sup>3</sup> —Abided cuidadaid Esus tantiasho Nuquin Papan bēdamboen isebe —quetiadquidi icsamboen tantiec. —Nuquin Papan: “Bēdamboec tabadta,” quequin chiaid Moisesēn dada uactedi naquin Nuquin Papa bēdamboen ismembi —quequin icsamboen tantiaquin Nuquin Papan tantiacpadomboen nainquo icquin Esus tantienquo iquec. <sup>4</sup> Esusuidtsēqui Nuquin Papan: —Bēdamboec tabadta —quequin chiaid Moisesēn dada uactedi naquidquo nec. Adec icsaisa yec matses icsaid bedshunuec abided cuidadec unēsac caondash. Nēbi Esus tantiasho Nuquin Papan matses bēdamboen isec icsaisabimboecnuc.

<sup>5</sup> Nuquin Papan chiaid dada uaquin Moisesēn chuipampic naden. “Ambi chiapadomboenuidi naquid Nuquin Papan bēdamboen isquin abēdi tabadmetsiash,” quequin Nuquin Papan chiaid Moisesēn dada uapampic. <sup>6</sup> Aden ambi chiapadomboenuidi natiadquidombi natiapimbo icsho Nuquin Papan matses bēdamboen istiapimbo icpanēdash. Nēbi abided cuidadaid Esus tantiasho nuqui bēdamboen isec. Adoac Esus tantiaquido nadenquo iquec. —Nuquin Papa yacno nidshun ¿tsuntsin Nuquin Papa nuqui bēdamboen ismepatsiashba? —quenquo nuqui iquec. —Esusquo Nuquin Papa bēdamboen ismequidquo nec —quequin nuqui tantiec. <sup>7</sup> Aden tantiec: —¿Tsuntsin Nuquin Papa bēdamboen ismequidquo uincuemepatsiashba? —quenquo nuqui iquec. —Abided cuidadec unēsacsho Esus uincuemiad caondash —quequintsen nuqui tantiec. <sup>8</sup> Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiembi,’ quesho Nuquin Papan matses bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenquid nebi. <sup>9</sup> —Nuquin Papan uincuemiaid Esus abitedishun Icho neque. Con

Icbo Esus canu —quequin chuisho Nuquin Papan nuqui bēdamboen isquin cuidenquo iquendac. <sup>10</sup> —Ēbi cuidmenquo icnuec abided cuidadaid Esus tantiambi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquo iquendac.

<sup>11</sup> Ambi chiaid Nuquin Papan dada uamiacpaden:

“Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

<sup>12</sup> Isadaidbo yec matses utsibo yec quequido Esus tantiaquidtedi adoendac. Aden abitedishun Icbo icquin abi tantiaquidtedi Esusēn bēdambo icmendac. <sup>13</sup> Aden Esusēn nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebique. Ēbi bēdamboen ista, Icbo,’ qesho bēdamboen isquin cuidenquo iquendac,” quequin dada uapampic.

<sup>14</sup> ¿Mitsipaden matsesēn Esus tantiabempec? ¿Esusēn naid chiabi yacta matsesēn tantiappec? Padenquo. Esusēn naidquo chuibanaquien tantiendac. ¿Esusēn naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiembique. Ēbi bēdamboen ista, Papa —quequidien Esus tantiaquid nec. <sup>15</sup> ¿Mitsipadoaidēn Esusēn naid chuibampec? ¿—Chuita —cacmaidēnda chuibampec? Padenquo. Nuquin Papan: —Con Mado chuibeneta —caidien Esusēn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bēdamboen iste chuibanquid chosho isash: ‘Bēdambo iquec,’ quec matses cuishonquendac,” quequin dada uamepampic.

### *Isadaidbo dadpenschun Esus tantienquo yaid*

<sup>16</sup> Adquidēn Esusēn naid chuibanac isadaidbo dadpenschun Esus tantienquo iquec. Daēdpactsēcshun tantiec. Abi tishabi icnuc aden abi tantiesabo Esusēn chuite Nuquin Papan con tsusedpa Isayas caid dada uamepampic naden. “Mimbi chiaidquo ěmibi chuibansho ¿tsuntsin tantiappec, Papa? Daēdpactsēcshun: ‘Abimbo mimbi chiec. Mibi tantiaquin mimbi chiacpadomboen naimbi,’ ēbi caindac, Papa,” quequin Esusēn aton Papa chuite Isayasēn dada uapampic. <sup>17</sup> Aden Esusēn naid chuibansho tantiashun: —Abimbo caic —qeshun utsibon Esus tantiec.

<sup>18</sup> ¿Esusēn naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidēn naid chuibanquidēn chuibanendac.” Aden chuibansho ma con matsesēn tantiapaboc. <sup>19</sup> Aden Nuquin Papan chiaid chuisho tantiash: —Tantiadenquo yec onquec —¿quepecta icnēdash con matses? Padenquo. Tantiashi abi bēdamboen tantiate bunenquo icsho isun matses utsibo bēdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden. “Isadaidboudi ěmibi bēdamboen iste mimbi danubi ěmibi con matses cacmaidobi matses utsibo bēdamboen isbenendambi.

Ēmibi matses utsibo bēdamboen iso isash: ‘¿Atotsieshun Nuquin Papan matses utsibo bēdamboen ispec?

Icsambo iquec,’ quec mibi chushquendac.

Matses utsibobi ēbi tantiabi icquido ēbi tantiamendambi.

Aido bēdamboen isquin mibi nēishēmendambi,”

quequin Nuquin Papan Moises dada uamepampic. <sup>20</sup> Adembidi dacuēdenquo icquin Isayasēn Nuquin Papan matses utsibo bēdamboen iste dada uapampic.

“ ‘Nuquin Papa tantiatiadquo iquebi,’ quenquo icquidombi ēbi tantiabenosh.

‘¿Mitsipadembimbi Nuquin Papa bēdamboen ismepeba?’ quesabobi ěmibi bēdamboen iste tantiamiombi,”

quequin Isayasēn Nuquin Papan chiaid dada uapampic. <sup>21</sup> Isadaidbotsen chuiquin Nuquin Papan chiaidquibidi Isayasēn naden dada uapampic. “ ‘Mibi tantiac unēsquo



iqueque. Ēbi bēdamboen tantiata,’ cadeniaqui: ‘Padi, mibi tantiatiapimbo iquebi,’ quequin ēnenquo icquin ěmbi chiaid mimbi niac-niacpec,” quequin Nuquin Papan chiaid Isayasēn dada uapampic.

## 11

### *Ambi chiactedi isadaidbo Nuquin Papan bēdamboen isaid*

<sup>1</sup> ĤAmbi chiaid niac-niacsho isadaidbotedida Nuquin Papan chieshēmpēc? —Con matses catiapimbo iquebi —ĥquecta iquec? Padenquo. Isadaidbombo nebi. Ēndenquimboshē con tsusedpa Abadauan campidēn baban tishmiaid Benaminēn tsyuecquidon tsyuecquid yec isadaidbombo nebi. Adquid icsho Nuquin Papan chieshēnenquo iquebi.

<sup>2</sup> Ēndenquimboshē nidaid uabi icquimbi Nuquin Papan: —Con matses caindami —quequin con matses isadaidbo tantiapampic. Adshun abitedi chieshēnenquo iquec. ĤEdiasēn chiampid tantienquioda ique? Aton matses isadaidbo nēishēnshun Nuquin Papa naden chuipampic. <sup>3</sup> “Mimbi con matses caidotedi icsamboshē icquec, Papa. Mimbi chiaid chuibanquidobi cuesun secac. Papa quequin mibi menequin ismete

cuēnote nacnenaid uesquin chic-chicpac, Papa. Icsamboshē iquec. Ēbiuidtsēqui bēdambo iquec. Mimbi chiaid chuibansho tantiashun ěbi cunesunetiadquo iquec, Papa,” quequin Ediasēn Nuquin Papa chuipampic. <sup>4</sup> Adoac ĥmitsipadomboen Nuquin Papan chuipampic? “Ēbi tantiaquido abi iquec. Ēmbi namiacpadomboen isadaidbo dadpenshun 7000tedishun ěbi tantiec. Ēbi tantiesabon papa quequin nacnenaid Bad caid tantienquo icquin ěbi tantiec,” quequin Nuquin Papan Edias chuipampic. <sup>5</sup> Adembidi nēbi con matses isadaidbon ambi tantiactedishun Esus tantiasho Nuquin Papan bēdamboen isec.

<sup>6</sup> ĤAmbembida con matsesēn Nuquin Papa bēdamboen ismepec? Padenquo. —Ēmbi chiacpadomboenuidi nasho matses bēdamboen isembi —ĥquecta icpec Nuquin Papa? Padenquo. Aden naquid nibēdsho bēdamboen istiapimbo icboedēmbi ambi tantiactedishun icsaboedon Esus tantiasho Nuquin Papan bēdamboen isendac.

<sup>7</sup> Isadaidbon ambi tantiactedishun Esus tantiasho Nuquin Papan bēdamboen isec. Isadaidbo utsiboen bēdamboen istiapimbo iquec. Aido: —Nuquin Papa bēdamboen ismete bunquin ambi chiacpadomboenuidi ěmbimbo nanu —queboedombi nainquo icsho Nuquin Papan bēdamboen istiapimbo iquec. Abi bēdamboen ismequidquo Esus chieshēnsho Nuquin Papan pacuēnēdadbimboecnuc isadaidbo icmepanēdash. <sup>8</sup> Aden ambi isadaidbo pacuēnēdadbimboecnuc icmete chuiquin Nuquin Papan dada uamepampic naden.

“Nuquin Papan pacuēnēdadbimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic. <sup>9</sup> Adembidi ambi isadaidbo pacuēnēdadbimboecnuc icmete chuiquin Nuquin Papan con tsusedpa Dabid naden dada uamepampic ěndenquimboshē. “ ‘Ēbi bunaiduidi naic ěbibi bēdambo iquebi,’ quequidēmbi Nuquin Papa bēdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Ēmbembi naic bēdambo iquebi,’ quendac.

Adec abi tantienquo yec icsasho Nuquin Papan cuidpashun.

<sup>10</sup> Pacuēnēdadbimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaid Dabidēn dada uapampic.

### *Nuquin Papan matses utsibo bēdamboen isbenaid*

<sup>11</sup> ĤAden pacuēnēdadbimboecnuc icmiac Esus tantiatiapimbo icsho isadaidbo padpiden bēdamboen tantiametiapimboda Nuquin Papa icpec? Ambi tantiacpadomboen

bëdamboen tantiamendac. Nëbi isadaidbo dadpen bëdamboen istiapimbo icquimbi matses bëdamboen iste bunquin Nuquin Papan matses utsibo Esus tantiamequin bëdamboen isbenec. —Ëmbi adosho isash isadaidbotsen ma nadnu. “Nuquin Papa bëdamboen ismete bunquiebique. Ëmbitsen Esus tantianu,” ma quenu —queshun Nuquin Papan aden matses utsibo ambi bëdamboen iste tantiamiac. <sup>12</sup> Ambi chomiaid Esus tantienquo icsho isadaidbo dadpen bëdamboen istiapimbo icquimbi matses utsibon Esus tantiasho ambi con matses caido isadaidbobimboecnuc Nuquin Papan bëdamboen isbenec. Ambi tantiacpadën ambi tantiamiacpadomboen isadaidbo dadpeshun Esus tantiabensho Nuquin Papan bëdamboen isendac. Adshumbic matses utsibobëdta isadaidbo Nuquin Papan bëdamboshë icmendac.

<sup>13</sup> Tanta, matses utsibo. Mibitsen chuinu. Nuquin Papan icmiacpadomboen matses utsibo Esusën naid chuibenequidquo nebi. Ëmbi chuibeneboed con matses isadaidbo chuibanombi naden. —Esusën naid ëmbi chuibeniac matses utsibon Esus tantiabenosh. Adsho Nuquin Papan aido bëdamboen isbenosh —quequin con matses chiombi. <sup>14</sup> —Aden Nuquin Papan matses utsibo bëdamboen isaid ëmbi chuisho tantiash Nuquin Papa bëdamboen ismete bunquin Esus tantiatsiash. Adsho Nuquin Papan bëdamboen istsiash —queshun con matses aden chiombi. <sup>15</sup> Aden isadaidbon Esus chieshënsho isun Nuquin Papan matses utsibo Esus tantiamequin bëdamboen isbenac. Ambi tantiacpadëmbi isadaidbontsen Esus tantiasho Nuquin Papan bëdamboen isbenendac. Isadaidbontsen Esus tantiabededsho isumbic Nuquin Papan matses unësaidotedi uincuemendac. <sup>16</sup> Con tsusedpa Abadauan abi tantiaquidquo icsho Nuquin Papan bëdamboen isquin: —Con matses mibi caimbi. Adembidi min tsyuecquidotsen ëmbi chiacledi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuëte caniacsho: —Tapunuidtsëqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adembidi Nuquin Papan isadaidbotedi con matses caic. Caniec taëquid cuëte tapumbimboecquid abia con matses caid Abadauan nec. Cuëte cuidibimboecquido Nuquin Papan con matses caidobidi Abadauanën tsyuecquido isadaidbo nec.

<sup>17</sup> Aden ambi con matses caidombi ambi chomiaid chieshënsho cuëte cuidi utsi pobinun pateshuniacimboen Nuquin Papan isadaidbo dadpen bëdamboen istiapimbo iquec. Matses utsibo Esus tantiamequin cuëte dada utsi pobiacimboen aton matses icmequin ëbipadquid isadaidbo ambia Esus tantiaquidobëdta Nuquin Papan mibi bëdamboen isec. <sup>18</sup> Adoac icsamboec onquenda. —Isadaidbo dadpen bëdamboen isenquo icquin Nuquin Papan ëbien bëdamboen isec. Isadaidbo icsambo iquec. Èbien bëdambo iquec —quequin icsamboen chienda. Aden icsamboen chuitiadquo icquimbi nëid chiaidtsen tantiata. Cuëte tapunabi icnuc dada yec podo yec quec cuëte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquo ictsempanëdash. Ëmbi aden chiac isadaidbo chiec icsamboec onquenda.

<sup>19</sup> ¿Ëbi adsho tantiashta mibi nadpe? —Ambi con matses caido chieshëmënsho isun cuëte cuidi pateshuniacimboen nëbi isadaidbo dadpen Nuquin Papan bëdamboen isenquo iquec. Èbipadquid matses utsiboen bëdamboen isbenac —¿quecta iquec? <sup>20</sup> Abimbo mimbi caic. ¿Atotsieshun Nuquin Papan isadaidbo bëdamboen istiapimbo icpec? Ambi chomiaid Esus tantienquo icsho Nuquin Papan aido bëdamboen istiapimbo iquec. Padnuen Esus tantiasho mibi bëdamboen isec. Adoac: —Ëbi bëdambo icnubi isadaidbo icsambo iquec —quenda. —Esus tantienquo icsho isadaidbo cuidacpadomboen ëbitsen Nuquin Papan cuidpanundac —quequin Nuquin Papa Esusbëdta tantiaquiota. <sup>21</sup> Ambi con matses caidon Esus tantienquo icsho Nuquin Papan bëdamboen istiapimbo iqueque. Adembidi matses utsibon Esus tantienquo icsho Nuquin Papan mibi bëdamboen istiapimbo iqueque. Esus tantiaquiota.

<sup>22</sup> Aden Esus tantiash nadec onqueta. —Esus tantiasho bēdamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuēte cuidi pateshuniacimboen cuidquin isadaidbo bēdamboen isenquo iqueque. —Esus tantienquo yansho adembidi ēbitsen cuidpanundac —queshun chieshtoenquo icquin Esus tantianuna. <sup>23</sup> —Padi, aid tantiatiapimbo iquebi —queboedombi isadaidbon Esus tantiabensho abēdi tabadmenuen Nuquin Papan bēdamboen isendac. Ambi cuēte cuidi pateshuneboedi abibidi pobioacimboen padpiden bēdamboen isendac. <sup>24</sup> Min matses abitedi Nuquin Papa tantiesabo icnēdash. Nēbien cuēte icsan cuidi pateshuniaid pobiacimboen Esus tantiamequin Nuquin Papan mibi bēdamboen isec. Adoac Esusbēdta Nuquin Papa mimbi bēdiactsēc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ēnden dada uapampic. Ambi tantiacpadēn ambi cuēte bēda cuidi peteshuniaid abibidi pobioacimboembī Esus tantiamequin Nuquin Papan con matses isadaidbo bēdamboen isendac. Adoac cuēshēd-uidboedombi Nuquin Papabēdta Esus bēdamboen tantiaquiendac.

*Ambi chiacpadēn Nuquin Papan isadaidbotsen bēdamboen isoaid*

<sup>25</sup> Tantia. —“Isadaidbo icsambo iquec,” quequin chuinushe —queshun mimbi tantiacmaid Nuquin Papan chiaid mibi chuinu. Nuquin Papan pacuēnēdaccimboecnuc icmiac con matses dadpen Esus tantiate bunenquo iquec. Daēdpactsēcshun Esus tantiec. Nuquin Papan tantiatedishun matses utsibo dadpenshumba Esus tantiambic <sup>26</sup> paposhquiachimboen con matses isadaidbo dadpenshun Esus tantiendac. Aden tantiasho Nuquin Papan con matses bēdamboen isendac. Aden ambi isadaidbo bēdamboen iste chuiquin Nuquin Papan naden dada uamepampic.

“Icsambo icquidobi cuidmenquo icnuec Nuquin Papa yacnuēsh choquid isadaidbon chidon tishaid iquendac.

Aidēmbi isadaidbo Nuquin Papa tantiaquid padpiden icmendac.

<sup>27</sup> ‘Aden ēmbi chiacpadomboen ēmbi chomiaid tantiasho abi icsaid bēpiscudquin isadaidbo bēdamboen isendambi,’ quependac Nuquin Papa,” quequin ambi chiaid Nuquin Papan dada uamepampic.

<sup>28</sup> Nēbi Esus chieshēnsho isadaidbo bēdamboen istiapimbo icquin Nuquin Papan matses utsibo mibi Esus tantiamiac. Ambi nēbi bēdamboen istiapimbo yaido isadaidbo unēsquo icnuc Nuquin Papan tantiaquiec. —Ēmbi aton tsusedpabo chiampicpaden aido con matses caimbi —queshun adoec. <sup>29</sup> Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. <sup>30</sup> Min matsesēn isadaidpembon Nuquin Papa tantienquo yacimboen nēbi isadaidbon Nuquin Papa tantiamequid Esus tantienquo iquec. Aden Esus tantiatiapimbo icsho isun Nuquin Papan Esus tantiamequin matses utsibo bēdamboen isbenac. <sup>31</sup> Con matsesēmbien abided cuidadaid Esus chieshēnquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bēdamboen isendac. <sup>32</sup> Aden matses abitedishun ambi chiaid niac-niacsho isun: —Abitedimbo icsaquiec —quequin matses bēdamboen istiapimbo icboedēmbi nēbi Esus tantiasho Nuquin Papan bēdamboen isendac isadaidbo yec matses utsibo abitedi yec quenuc.

<sup>33</sup> Aden Nuquin Papan bēdamboen iste chuisho tantiash nadnuna. Nuquin Papa bēdamboshē iquec. Abipadquid utsi nibēdec. Matsesēn naidtedi tantiaquidquo nec. Abitedimbo tantiaquid icquin ambi natiapimbo ictequid nibēdnuc bēdamboen naquidquo nec. ¿Ada adquid icsho Nuquin Papan naidtedi matsesēn tantiapadic? Padenquo. Ambi naidtedi matsesēn tantienquo iquec. <sup>34</sup> “¿Nuquin Papan otacquo tantiaidtedida matsesēn tantiapadic? Padenquo. ‘¿Mimbi tantienquo iquec. Ēmbi chiacpadomboen nata,’ quequina matsesēn Nuquin Papa chuipadic? Padenquo.

Ambi tantiacpadomboembien Nuquin Papan naindac.”<sup>35</sup> “¿Ada matsesën Nuquin Papa menepadic? Padenquio. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquio. Matsesën: ‘Con na nec,’ caidtedi Nuquin Papan na nendac.”<sup>36</sup> Abitedimbo uaquidquo yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquo nec. Aton na abitedi nec. Adec abitedishun Icbombo icsho: —Nuquin Papa bëdamboshë iquec —canuna ënenquio icquin.

## 12

### *Esus con Icbo cain ambi chiacpadomboen naid*

<sup>1</sup> Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bëdamboen isequé. Nuquin Papa bëdamboen tantiatiadquo icquin nadonona. —Ëbi bunaid nainquio yec mibi bëdambo icmenuéc mimbi chiacpadec bëdamboec tabadtiadquo iquebique. Min yuambo ëbi icme, Papa —quequin Nuquin Papa chuinuna. <sup>2</sup> Esus tantiesabon nacpadomboen nainquio icquin Nuquin Papan Mayanën pausunacpadomboen Esus tantiaquin nuqui icsate bunaid ënuna. Aden nuqui icsate bunaid ënquin Nuquin Papa bunacpadec bëdamboec tabadquin nuqui tantiendac. Aden naic nuqui bëdambo iquendac.

<sup>3</sup> Tantia. Nuquin Papan tantiamiacpadomboen mibi chuinu. Nadenda. —Ëbiuidtsëqui bëdambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datantiadec: —Adquid nebi —quequin abimbo chuita. <sup>4</sup> Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquido abitedi chuiquid dapa yampatsiash? Padenquio. ¿Mitsipadquo min dada icpec? ¿Abichobida bedantequid icpec? Padenquio. Mëdanteuidtsëquien bedantequid iquec. ¿Abichobida istequid icpec? Padenquio. Ëshëuidtsëquien istequid iquec. ¿Abichobida shëdtequid icpec? Padenquio. Dëbiateuidtsëquien shëdtequid iquec. <sup>5</sup> Min dada yacimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bëdamboec tantiananquin nashunanquido yanec. <sup>6</sup> —Ma utsibo nashunu —queshun Nuquin Papan Mayanën namiaid nec Esus tantiaquido. ¿Atotsi naquid Nuquin Papan Mayanën mibi icmiac? Nuquin Papan ambi tantiaidquo oncamiaid iquendac. Adquid icquin Nuquin Papan Mayanën tantiamiaiduidi chuibanta. <sup>7</sup> Utsibic: —Utsibo nashunquid icta —caid iquendac. Adquid icquin bëdamboen nashumbanta. Utsibic Nuquin Papan: —Ëmbi chiaid bëdamboen tantiashun chuibanta —caid iquendac. Adquid icquin Nuquin Papan chiaid tantiatsecquido bëdamboen tantiameta. <sup>8</sup> Utsibic: —Chieshtoenquo icquin Esus tantiec bëdamboec tabadnuna —quequin bëdamboec tabadquin ismequid iquendac. Adquid Nuquin Papan icmiaid icquin Esus tantiaquido bëdamboec tabadte tantiameta. Utsibic aton na nibëdquido aton na menequid Nuquin Papan icmiaid iquendac. Adquid icquin cudasenquo icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusën namiacpadomboen Esus tantiaquido bëdamboen nameta chieshenquo icquin. Utsibic dada icsaido yec isedanquido yec aton shubu nibëdquido yec aton pete nibëdquido yec macho yec tsusioctsec yec quesho bëdamboen nashunquid iquendac. Adquid icquin Esusën chiacpadomboen chieshtoenquo icquin nashumbanta.

### *Esus tantiaquidon nadoquid, quiaid*



<sup>9</sup>—Mibi tantiac unësquio iquec —quequin utsibo chuiquin abimbo chuinuna. Muainquio icquin utsibo tantiaquionona. Chieshëmënenquio yec bëdamboec tabadnuna. Utsibon: —Icsanuna —caqui: —Padi —quiash icsainquio yec bëdamboec tabadnuna. <sup>10</sup> —Ëbëdtan Esus tantiaquido con utsibobimboecquido nec —quiash bëdamboec tantiananuna. —Nëid con buchibimboecquid bëdambo iquec. Aidën chuisho bëdamboen tantianuna —canuna nuquibëdtan Esus tantiaquido chuiquin. <sup>11</sup> Nuquin Papan chiacpadomboen naic chieshtoenda. Nuquin Papan Mayanën tantiamiacpadec Esus tantiec chieshtoenquio yec bëdamboec tabadnuna. <sup>12</sup> —Unësacsho abi yacno Nuquin Papan ëbi tabadmendac —quec cuishonquenuna. Esus tantiaquido icscho utsibon chieshënaqui chieshtoenquio icquin Esus tantianuna. ¿Atotsi natiamiante utsi icpec? Adquid tantiec shubiquimbi chieshtoenquio icquin Esus tantianuna. Baded-badedquien Nuquin Papa chian-chianuna. <sup>13</sup> Nuquibëdtan Esus tantiaquido aton na nibëdsho isun nuquin nabi menenuna. Isedanquido bëdamboen isnuna. Pemequinc nuquin shubun ushmequinc canuna. <sup>14</sup> Esus tantiaquido yec nuqui chieshënquidobëdi chieshënanenquio icnuna. Chieshënanenquio icquin Nuquin Papa naden chuinuna. —Ëbi chieshënquido bëdamboen tantiameta. Chiesh bëdameta, Papa —quequin Nuquin Papa chuinuna. <sup>15</sup> Utsi bëdambo yec cuishonquesho isash aidbëdi cuishonquenuna. Utsi unësquio icnuc shubisho isash aidbëdi shubinuna. <sup>16</sup> Cuesnanenquio yec chieshëmënenquio yec bëdamboec tabadnuna. —Con nauidtsëqui naimbi —quenquio icquin utsibobëdtan bëdamboen nanuna. —Ëbiuidtsëqui bëdambo iquebi. Ëmbi tantiacpadomboenuidi naimbi. Utsibon chiaid natiapimbo iquebi —quenquio yec bëdamboec tabadnuna. —Chuiquid dapabëduidtsëqui onquequid nebi —quenquio yec matses abitedibëd onquec bëdamboec tabadnuna.

<sup>17</sup> Chieshënaqui cuidnanenda. —Ma utsibo: “Bëdamboec tabadquido nec,” quenu —quiash bëdamboecuidi tabadnuna. <sup>18</sup> Uimanëmënquido icsasho isun aid chuiquin: —Bëdamboequien tabadtiad —canuna. Adquidobëd chieshënanenda. <sup>19</sup> Ëmbi tantiaido mibi neque. Tantia. Chuinu. Nuqui chieshënquidobëdi cuidnanenquio icnuna Nuquin Papan naden chiaid tantiaish. “Matses cuidnanac icsambo iquec. Ëbentsëcquiobini icsaido cuidquid nec,” quequin Nuquin Papan chiaid dada uapampic. <sup>20</sup> Nuqui chieshënquidobëdi cuidnanenquio icquin bëdamboen isnuna. “Pete bunsho pemequinc acte bunsho acmequinc canuna. Nuqui chieshënquido: ‘Bëdambo icquidi chieshë nec icsachitobi,’ quiash ma nëish bëdanu,” quiash <sup>21</sup> adec cuidnanenquio icquin nuqui chieshënquido bëdamboen isnuna.

## 13

### *Chuiquid dapan chiacpadomboen Esus tantiaquidën naquid*

<sup>1</sup> Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec —queshun aidon chiacpadomboen naquid Esus tantiaquidën. <sup>2</sup> Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. <sup>3</sup> Bëdamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bëdamboec tabadta. Adsho isun: —Mibi bëdamboec tabadec —catsiash chuiquid dapabon. <sup>4</sup> —Ma matses bëdamboec tabadnu —quequin Nuquin Papan chuiquid dapa icmiaidën mibi bëdamboen tabadmetiadquio iquec. Nuquin Papan icmiac icsambo

icquido cuidquid nec. Adquid icnuc: —Icsasho chuiquid dapan ëbi cuidpanundac — quiash icsaquid dacuëndendac. <sup>5</sup> Ëbi adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

<sup>6</sup> Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. <sup>7</sup> Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquio icquin.

### *Utsibo tantiaquionona, quiaid*

<sup>8</sup> —Ëmbi nashumbocpadomboen ëbi cuidquin nashunenquio iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac. <sup>9</sup> “Ambi naiduidtsëqui nainquio yec abibi datantiadac bimboec ma matses bëdamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bënëpenquio chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadac bimboen utsibotsen tantiaquionona. <sup>10</sup> Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantiasho Nuquin Papan: —Aden naic ëmbi Moises chiacpadec bëdamboec tabadec —caindac.

<sup>11</sup> —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushac bimboen nainquio ichoedi nëbi ushash isucunac bimboec dayacquio yec chieshtoenquio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: <sup>12</sup> —Nëbien Esus chochitec —quedonetsëcquiec bëdamboec tabadnuna. —Satanasën yuanushe —qeshun Esus tantiaquin nuqui icsaid ënshun bëdamboen nanuna. <sup>13</sup> Icsainquio yec: —Bëdambo iquebique. Ma isnu —quiash bëdamboec tabadnuna. Tantiadenuen actequid paëmbo icquid aquenquio icquinc utsin chido chudenquio icquinc utsin bënë chudmenquio icquinc chido utsi mëismenquio icquinc canuna. Adecbidi utsin na isash: —Con na adquid nibëdec —quiash chieshëmë nec tabadenquio icnuna. Adembidi utsin mibi bunaid nasho isash: —Aden ëbi namenquio icpec —quec chieshëmënenquio icnuna. Icsainquio yec bëdamboec tabadnuna. <sup>14</sup> —Icsate bunchitebi. ¿Mitsipaden naiquini icsape? —quenquio yec Esus tantiaquiec abi tabadacpadquiec bëdamboec tabadnuna. Nuqui icsate bunaid ënquionona.

## 14

### *Esus tantiaquido utsibo bëdamboen isaid*

<sup>1</sup> Nuquibëdtan Esus tantiatsëcquidon nuqui nacpadomboen nainquio icsho bëdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bëdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibëdtan Esus tantiatsëcquido: —Ëmbi natemaid nec —qeshobi: —Icsamboen chiec —cainquio icnuna. <sup>2</sup> Esus tantiaquidquio: —Pete abitedi pambidbëdta pesho Nuquin Papan nëishënenquio iquec —quenubien Esus tantiatsëcquid: —Padi. Pambid pesho isun Nuquin Papan nëishënushe. Esus tantiaquidën nitsinaid pequid. Pambid isuidquid —quepec. <sup>3</sup> Pambid pequidobëdtan pambid isuidquidombi Esus tantiasho Nuquin Papan aid daëdi bëdamboen isec. Padnuen pambidbëdta pete utsi abitedi pequidën pambid isuidquid mamënsunac icsambo ictsiash. Adembidi pambid isuidquidën: —Pambid pequid icsambo iquec —cac icsambo ictsiash. <sup>4</sup> ¿Icbonpenquioda: —Yua icsambo iquec —capadic? Icbombien adoquid.

Adembidi: —Mibi bēdambo iquec —caquid icbon. Nuquibēdtan Esus tantiaquid Nuquin Icbon yua icsho: —Ēmbi nacpadomboen nainquo yec mibi icsambo iquec —cainquo icnuna. —Nēid icsambo iquec. Nēid bēdambo iquec —quequin Nuquin Icho Esusēn ambentsēqui abi tantiaquido chiendac. Aidēn namiacpadomboen abi tantiaquidon bēdamboen naindac.

<sup>5</sup> Esus tantiaquido utsi-utsiec: —Aid badiadquidēnuidtsēqui Esus tantiec cuēdēnac bēdambo ictsiash —quenubien utsibo: —Badiadquidēn badiadquidēnquiec Nuquin Papa Esusbēdta tantiec cuēdēnēbi —quecuededpec. Adquid daēd icsho Nuquin Papan nēishēnenquo iquec. Esus tantiaquid ambi tantiacpadēnquiobi cuēdēnac bēdambo ictsiash. <sup>6</sup> Aden Esus tantiaquin nac bēdambo ictsiash. Adembidi Esus tantiaquin: —Mimbi pete uaid bēdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bēdambo iqueque. Aid penu —qeshun utsi pequimbi pambid isuidquid iquendac.

<sup>7</sup> ¿Esus tantiaquid ambi naid-uidi naquidta nedic? Padenquo. ¿Ambi tantiacpadēn unēsquidta nedic? Padenquo. <sup>8</sup> Nuquin Icho Esusēn chiacpadomboen natiadquo yec nuqui tabadec. Ambi tantiacpadēn nuqui unēsēndac. Unēsabi yec tabadec Esusēn yuambo icboedi unēsash adecbidi aton yuambo nuqui iquendac. <sup>9</sup> Adec Nuquin Icho icnuec abided ciudadec unēsash Esus uincuemanpēdash. Unēsabi yec nuqui tabadnuc Nuquin Icbombo icboedi nuqui unēsān adecbidi Nuquin Icbombo iquendac.

<sup>10</sup> —Adquid Nuquin Icho iquec —quesho ¿tantiashunda nuquibēdtan Esus tantiaquid mamēnshuntiad? Padenquo. ¿Nuquin Papan chiacmaid chiec: —Ēmbi nacpadomboenuidi nainquo yec icsambo iquec —quequina chushcatiad? Padenquo. Nuquin Icho Esusbēdtan Nuquin Papanuidtsēqui matsesēn naidtedi chiendac. —Nēid bēdambo iquec. Utsi icsambo iquec —quequin chiendac matses abitedishun tantianubi. <sup>11</sup> Adote chuiquin Nuquin Papan ambi chiaid naden dada uamepampic.

“Tantia. Abimbo caimbique.

Naden matses abitedishun ēbi chiendac.

‘Abitedishun Icbombo mibi nec.

Bēdamboshē icquidquo mibi nec.

Abitedishun naid tantiaquid icquin mimbiuidtsēqui: Nēid icsambo iquec. Nēidien bēdambo iquec, quequin abimbo chiendac,’ quequin matses abitedishun ēbi chiendac,”

quequin Nuquin Papan dada uamepampic. <sup>12</sup> Aden ambi cuidte ushēn Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

### *Utsibo icsamenquo icnuna, quiaid*

<sup>13</sup> Ēbi adsho tantiashun Nuquin Papan: —Adoenda —quequin chiacmaid nuqui tantiaid chienquo icnuna. —Ēmbimbo natemaid naic aido icsambo iquec —nuquibēdtan Esus tantiaquido cainquo icnuna. Adenquo icquin nadonona. —Ēmbi ambi natemaid nasho isash chieshtoshon Esus tantienquo yanushe. Ambi natemaid naquin ismenquo iquembi —qeshun Esus tantiaquidtedi bēdamboen isnuna. <sup>14</sup> Nuquin Icho Esuquidistu tantiaquidquo icquin ěmbien naden tantiec. —Nēbi Nuquin Papan: “Petemaid nec,” caid nibēdec —quequin tantiembi. Ēbi adnubi utsibo: —Petemaidquo nec. Aid pec icsamane. Aid petiapimbo iquebi —qeshumbi adquid pec: —Icsachitobi —quetsiash. <sup>15</sup> Adsho tantiashun aido bēdamboen tantiaquin ambi petemaid nuqui pemenuo ictsiac. Ambi petemaid pemequin mimbi aido tantienquo iquec. —Ēmbi petemaid piash icsachitobi —quequin Esus tantienquo yanushe. Ambi petemaid pemenda. —Nēid petemaid nec —quequido aidotsen tantiaquin cuidmenquo icnuec abided ciudadec Esus unēsaque. Aido tantiata. <sup>16</sup> —Nuquin Papan chiaid niaquenquo icquin Esus tantiaquido utsibon: “Aden naic icsatsiash,” caid naimbi. Ēmbi tantiacpadomboen naimbi —qeshun mimbi

tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ęmbi natemaid naigue —camenda. <sup>17</sup> ȷ—Nadquid petemaid nec. Nadquid actemaid nec —quequin petebēdta acteuiddi tantiecta Nuquin Papan chiacpadec Ęsus tantiaquido bēdamboec tabadpatsiash? Padenquo. Aton Mayan nuquibēdi tabadmiac chieshēmēnenquo yec cuishonquec Esus tantiaquido bēdamboec tabadendac. <sup>18</sup> Adec Esuquidistun chiacpadec tabadsho isun Nuquin Papan: —Bēdambo iquec —caindac. Matsēsētsen: —Aido bēdambo iquec —caindac.

<sup>19</sup> Ęmbi chiacpadec chieshēmēnenquo yec bēdamboec isnanuna. —Esus tantiec chieshtoenquo yec bēdamboec tabadnuna —quec chuinanuna. <sup>20</sup> —Nuquin Papan bēdamboen isaidon Nuquin Papa Esusbēdta tantienuo yanushe —qeshun utsibon petemaid pequin aido chieshtomenda. Nuquin Papan: —Matsēsēn petemaid nec —caid nēbi nibēdnubi Esus tantiatsēcquidēn petemaid pequin aid chieshtomec mibi icsatsiac. <sup>21</sup> —Ębēdta Esus tantiaquido icsamemane —qeshun ambi petemaid pambid penquo icquinc ambi actemaid acte paēmbo icquid aquenquo icquinc ambi natemaid utsi nainquo icquinc cac bēdambo ictsias. <sup>22</sup> Nuquin Papan: —Matsēsēn natemaid nec —cacmaid tantiaquin: —Ęmbimbo petequid nec. Ęmbimbo actequid nec. Ęmbimbo natequid nec. Aden nasho Nuquin Papan ēbi cuidenquo iquec —quequin mimbi tantiaid caic: —Natemaid nec —quequido naden chienda. —Ęmbi nacpadomboen nainquo yec mibi icsambo iquec —cainda. Adembidi aidon: —Ęmbi natemaid nec —caboed naquin ismenda. Chieshtonoshe. <sup>23</sup> Adquid ambi: —Aid pesho Nuquin Papan nēishēnchitembini ictsias —caboed piash —Icsachitobi —quetsias. Adsho Nuquin Papantsen: —Ai, adec icsaic —catsias. —Aden naic icsachitequini ictsias —nuqui caidtedi naic nuqui icsatsiac.

## 15

### *Nuqui bunaiduidi nainquo icnuna, quiaid*

<sup>1</sup> Esus tantiaquidēnquo Esus tantiatsēcquid chieshēnenquo icquid. —Natemaid nec —quequin Nuquin Papan chiabi icnubi Esus tantiatsēcquid: —Esus tantiaquin Ęmbimbo natemaid nec —qesho tantiashun ambi natemaid naquin ismequin chieshtomenda. Aid tantiaquin ambi natemaid nainquo icquin nuqui bunaiduidi nainquo icnuna. <sup>2</sup> —Esus tantiatsēcboedēmbi ma Esus bēdamboen tantiabenquiono —quequin nuquibēdta Esus tantiatsēcquidēn natemaid nainquo icnuna. —Aden naic mibi bēdambo iquec —camenuen ambi natemaid nainquo icnuna. <sup>3</sup> Esuquidistun ambi naiduidi nainquo icquin Nuquin Papan chiacpadomboenuidi naic abi chieshēnquido yacnobi chopanēdash. Esus tishabi icnuc Esusēn chuite chuiquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ēbi icsamboen chuishunec, Papa,” quequin Esusēn abi chuite Nuquin Papan dada uamepampic. <sup>4</sup> Aden con matses isadaidbobēdta matses utsibo abitedi bēdamboen tantiamenuen Nuquin Papan ambi chiaid dada uamedenepampic. —Nēid isban-isbanquin ēbēdta Esus ēnenquo icquin tantiec ma matses bēdamboec tabadnu. Adec bēdamboec tabadec: “Unēsash Esusbēdi Nuquin Papa yacno tabadendabi,” ma matses quenu —qeshun ambi chiaid dada uamepampic. <sup>5</sup> Aden matses chieshtoenquo icnuc bēdamboen tabadmequid Nuquin Papa mibi chianembi. —Chieshtoenquo icquin Esus tantiaquid icmequin dayacquio yacimboecnuc matses bēdamboen tabadmequid mibi nec, Papa. Adquid icquin Doma yacnocquidon Esus tantiasho bēdamboec isnanquid icmeta, Papa. <sup>6</sup> Mimbi adoac: “Nuquin Papa chuina,” cac aidon abitedishun: “Ai, adonona,” qeshun mibi naden chuitsias, Papa. “Con Icbo Esuquidistun Papa mibi nec. Mibi bēdamboshē iquec,” quequin mibi chuitsias, Papa —quequin Nuquin Papa mibi chianembi.

### *Nuquin Papan matses utsibo Esus tantiamiaid*



<sup>7</sup> Tantia. Padpiden mibi chuinu. —Nuquin Papa bēdambo iquec —nuqui camenuen Esuquidistun nuqui bēdamboen iseque. Bēdamboec isnanuna. Isadaidbo yec isadaidpembo yec quec bēdamboec isnanuna. <sup>8</sup> Esuquidistu matses abitedi bēdambo icmenuc matsesbēd tabadpanēdash. Esus chote chuiquin Nuquin Papan dada uamepampic-padec isadaidbobēdi tabadquin Esusēn aido nashumpanēdash. —Nuquin Papan abimbo chuiampic —quequin tantiamenuen adopanēdash. <sup>9</sup> —“Icsaboedombi Esus tantiasho Nuquin Papan bēdamboen isquin cuidenquoio iquec. Nuquin Papa bēdambo iquec,” ma isadaidpembo matses utsibo quenu —quecbidi Esus matsespanēdash. Aidēn abi chuite chuiquin Nuquin Papan naden dada uamepampic.

“Isadaidpembo matses utsibobēdtan mibi naden chiendambi.

‘Nuquin Papa bēdambo iquec,’ caindambi mibi.

Adecbidi mibi bēdamboen tantiec cuēdēnendabi,”

quequin Esusēn abi chuite Nuquin Papan dada uamepampic. <sup>10</sup> Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobēdi cuishonqueta.

‘Nuquin Papa bēdambo iquec,’ quec cuishonqueta,”

quequin Nuquin Papan chiaid dada uapampic. <sup>11</sup> Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bēdambo iquec,’ cata.

‘Nuquin Papa bēdambo iquec,’ quec cuēdēncuededec tabadta,”

quequin dada uapampic. <sup>12</sup> Adembidi isadaidpembon matses utsibon Nuquin Papabēdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidēn papa Isai caid ēnden unēsampidēn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bēdamboen namendac.

Aid caic: ‘Nēidēn nuqui cuidmenquoio iquendac,’ quependac isadaidpembo matses utsibo,”

quequin dada uapampic.

<sup>13</sup> Aden chiampid mibi nec. Nuquin Papa Esusbēdta tantiaquido icsho mibi Nuquin Papa chianembi. —Mibēdi matses tabadmequidquoio mibi neque. Mibi tantiamequin Doma yacnocquido cuishoncameta, Papa. Adembidi dacuēdenquoio icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

### *Matses utsibo Esus chuibanquid nebi, quiaid*

<sup>14</sup> Con utsibo mibi caimbique. Tantia. Mibi chuinu. —Nuquin Papan Mayanēn tantiamiacpadec bēdamboec isnanec bēdamboec tabadtiadquoio icquidien nec. Aidēn tantiamiacpadomboen Nuquin Papan chiaid bēdamboen tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi. <sup>15</sup> Aden tantiash: —Nēishēnushe —quenquoio icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbi ēnden tantiaidbidi Esusēn naidquoio bēdamboen mibi tantiamenuen dada uaimbi. <sup>16</sup> Nuquin Papan icmiacpadquid Esusēn naid chuibenequidquoio nebi. Adquid icquin isadaidpembon matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

<sup>17</sup> Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi. <sup>18-19</sup> Esuquidistun ēbi namiaiduidtsēqui mibi chiec nendabi. Aidēmbi

namiac matses utsibo Esusbëdtan Nuquin Papan naid chuibenequimbi Nuquin Papan Mayanën tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. <sup>20</sup> Esusën naid chiacmanouidquo Esusën naid chuibenetiadquo iquebi. Utsibon Esusën naid chuibanacno nidtiapimbo iquebi. Esusën naid chuisho tantiacmaido Esus chuite bunquiebi. <sup>21</sup> Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidën naid chuisho tantiacmaidon tantiabenendac.

Adshun paposhquiacbimboen bëdamboen tantiendac,”

quequin dada uamepampic. <sup>22</sup> —Aden Esusën naid chambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusën naid tantiash —quiash mibi yacno nidabi iccobi. Nëbi mibi yacno nidtiadquo iquebi.

### *Mibi yacno nidtiadquo iquebi, quiaid*

<sup>23</sup> —Nëbi Ididico yacno Esusën naid uesquin chuibeniac —quiash mibi yacnotsen nidtiadquo iquebi. Ëndenquimbo taëec mibi yacno nidte bunondaidi seta dadpen matamiashic adi nëbi mibi iste bunquiebi. <sup>24</sup> Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquo iquebi. <sup>25</sup> Nëbini Edusaden yacnoba nidendac. Anocquido Esus tantiaquido utsibon meniaid menenuc nidendabi. <sup>26</sup> —Edusaden yacnocquido Esus tantiaquido utsi-utsiec aton piucquid nibëdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobëdtambi Masedonia yacnocquidon: —Con na buanshun meneta —caposhi. <sup>27</sup> Aden ambi tantiacpaden nasho: —Bëdambo iquec —caombi. Edusaden yacnoshon Esusën chiac isadaidbomba Esus tantiapanëdash. Adshumbic aidon chuibeniac matses utsibontsen Esus tantiapanëdash. Aden abi nashunquin chuiquido Edusaden yacnocquido caic: —“Piucquid nibëdec,” quiac caoshe. Menenuna —quesho: —Bëdambo iquec —caombi. <sup>28</sup> Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. <sup>29</sup> Mibëdi tabadquin ëmbi Esus tantiamequin chuisho Esusën nuqui bëdambo icmendac.

<sup>30</sup> Ëmbi tantiaidombo mibi neque. Tantia. Chuinu. Nuquin Icbo Esuquidistun aton Mayambëdtan tantiamiacpadec nuqui bëdamboec tantiananec. Ëbi tantiaquin Nuquin Papa chianeta. —Ënenquo icquin Esus tantiamequin mimbi chiacpadomboen Pabado name, Papa. <sup>31</sup> Udeya yacno nidsho Esus chieshënquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bëdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquo icnushe. Bëdamboen bedmeta, Papa —quequin Nuquin Papa chianeta. <sup>32</sup> Aden Nuquin Papan tantiamiacpadomboen naquín anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec. <sup>33</sup> Aden mibi tantiaquin: —Nuqui dacuëdenquo icnuc bëdambo icmequid Nuquin Papa mibëd icpashun —caimbi.

## 16

### *Mibi unësquo iquec, quequin chiaid*

<sup>1</sup> Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bëdamboen ista. Shubu dadpen icquid Senquedeya caid yacnoshon utsibo bëdamboen nashunquidquio nioshe. <sup>2</sup> Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —queshun bëdamboen isquin aidën: —Ëbi nashunta —cacpadomboen aid nashunta.

<sup>3</sup> Aquida caidbëdta aton chido Pidisida caid chuiquin: —Mibi caic: “Unësquio iquec,” quiosh Pabado —cata. Aidon ëbëdtan Esusën naid chuibeniondashe. <sup>4</sup> Aden Esusën naid chuibenesho: —Cueschitomane. Aden chienda —Esus chieshënquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chiondaidon isadaidpembon chiondash. <sup>5</sup> Aquidan shubuno Esus tantiec cuëdë nec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabonndaïd ëmbi tantiaidquio Epeneto caidtsen adembidi chuita. <sup>6</sup> Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquio. <sup>7</sup> Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoenuio icquin Esus chuibenequido nec.

<sup>8</sup> Nëidteditsen chuiquin: —“Mibi unësquio iquec,” quiosh —cata. Nëidic Esus tantiaquid utsi Ampidias caid ëmbi tantiaidquio. <sup>9</sup> Nëidic Esusën naid chuiquid utsi Udbano caid. Nëidic ëmbi tantiaidquio utsi Estaquis caid. <sup>10</sup> Nëidic Apedes caidtsen. Utsibon chieshënaqui chieshtoenuio icquin Esus tantiaquidquio nec. Nëidic Adistobudo caidën shubun icquidotedi. Aidtedi: —Mibi caic: “Unësquio iquec,” quiosh Pabado —cabanta. <sup>11</sup> Nëidotsen adembidi chuita. Nëidic con matses utsi Edodion caid. Nëidic Nadsiso caidën shubun icquido Esus tantiaquidtedi. <sup>12</sup> Nëidic chido Tidipena chedo Tidiposa caidbëdi. Aido Esus tantiec dayacquio icquin ambi chiacpadomboen nabanquido nec. Nëidic chido utsi Pedsida caid con chu icbobimboecquidquio. Aidtsen Esus tantiec dayacquio icquin ambi chiacpadomboen naquidquio nec. <sup>13</sup> Nëidic Dupo caid Nuquin Papan Esus tantiamiaidquio. Nëidic aton tita con tabimboecquidquio. <sup>14</sup> Nëidic Asinquidito caid. Nëidic Pedeconte caid. Nëidic Edmes caid. Nëidic Patëdobas caid. Nëidic Edmas caid. Nëidic abëd icquido Esus tantiaquido. <sup>15</sup> Nëidic Pidodoco caid aton chido Udiabëdi. Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidtedi chuiquin: —Mibi caic: “Unësquio iquec,” quiosh Pabado —cabanta.

<sup>16</sup> Esus tantiaquido yec bëdamboec isnanta. —Mibi tantiembi —cananta. Nëmbo icquido Esus tantiaquidtedi mibi caic: —Unësquio iquec —quiosh. <sup>17</sup> Ëmbi tantiaido mibi neque. Tantia. Mibi chuinu. ¿Ada mibëdtan Esus tantiaquido chieshëmequin cuëshëdmequido icpec? ¿Ada Nuquin Papan chiaid mimbi tantiaid chienquio yec mibi icsamenuc muaquido icpec? Adquidobëd onquec tabadenda. <sup>18</sup> Nuquin Icho Esuquidistun chiacpadomboen nainquio icquin ambi petequid-uidtsëqui aidon chieque. Aidon: —Mibi bëdambo iqueque. Ëmbi chiaid tantiata —quequin ambi chiacpadomboen namequin Esus tantiatsëcquid icsamec. <sup>19</sup> —Doma yacnocquido abi tantiec Esusën chiacpadec bëdamboec tabadosh —quequin mimbi naid chuibenesho dadpenshun tantiac caosh. Adsho tantiash bëdambo iquebi. Adecbidi Nuquin Papan chiaid tantiec bëdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbëdi icsainquio icta. <sup>20</sup> Nuqui bëdamboen tabadmequid Nuquin Papa nec. Aidëmbi matses icsamequidquio Satanas chedo comapenen cuidendac. Nëbi Satanasën mibi icsametiadquio icsho tantiashun: —Satanas yuamenquio icnuen Nuquin Icho Esusën abibi tantiamequiopashun —mibi caimbi.

<sup>21</sup> Nëmbo icquidtedishun mibi tantiec. Mibi caic: —Unësquio iquec —quiosh Timoteyo

ëbëdtan Esusën naid chuibenequidquio. Adembidi con matsesën chiosh. Dusio caid yec Ason caid yec Sosipated caid yec quec adosh.

<sup>22</sup> Pabadon –Naden na –cac nëid dada uaquidquio Tesio caid nebi. Esus tantiaquid icquin ëmbitsen mibi tantiemi. Padi. Aidedtedtsëqui ëmbimbo tantiaquin chuishun Pabadon chiaidbidi dada uaoaimbi.

<sup>23</sup> Nëidteditsen mibi caic: –Unësquio iquec –quiosh. Nëidic Cayo caid. Aidën shubun ushobi. Adnuc Esus tantiaquido iccuedednuec aton shubun pudued-puduedosh. Nëidic Edasto caid. Aid nëmbocquidon bedtequid bedbeneshun dayun uaquid nec. Nëidic nuquin utsibimboecquid Cuadto caid. Aideddishun mibi aden tantiosh. <sup>24</sup> Doma yacnocquido mibi tantiaquin: –Nuquin Icho Esuquidistun bëdamboen isquin mibi bëdamboen tabadmepashun –caimbi.

<sup>25</sup> –Nuquin Papa bëdambo iquec –canuna. Esuquidistu chuibanquin ëmbi: –Aid tantiasho Nuquin Papan mibi bëdambo icmendac –quequin chiacpadomboen Esus tantiamequin Nuquin Papan mibi bëdamboen tabadmetiadquio iquec. Èndenquimboshë Esus tishabi icnuc matsesën Esus chote bëdamboen tantiambo icpampic. <sup>26</sup> Adnubien Nuquin Papan unësesambo icquin con tsusedpabo utsi-utsien Esus chote chuiquin dada uamepampic. Nëbi: –Esusën naid chuisho tantiaquin ma nidaid utsi-utsiec yacno tabadquidon Esusën chiacpadomboen nanu –qeshun Nuquin Papan Esusën naid chuibenequido icmiac. <sup>27</sup> Aden namec Nuquin Papa bëdambo iquec. Abipadquid utsi nibëdec. Ambi natiapimbo ictequid nibëdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiasho Nuquin Papan nuqui bëdamboen isequé. –Nuquin Papa bëdambo iquec –canuna ënenquio icquin. Padi. Aidedi chuiquin dada uaombi.



## CODINTO YACNOCQUIDON ISTE 1

### *Pabadon Codinto yacnocquidon iste dada uaid*

<sup>1</sup> Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. <sup>2</sup> Aïdbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided ciudadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

<sup>3</sup> Matses icsaquid icsho cuidnushe quiash abided ciudadec Esuquidistu unëspanëdash, quequin abimbo tantiasho isun Nuquin Papan bëdamboen isaidquïo nuqui nec. Adquido yec utsibobëd bëdamboec ma tabadpanuna.

### *Mibi tantiaquin Nuquin Papa chuided-chuidedaïd*

<sup>4</sup> Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided ciudadec Esuquidistu unësaid chuibanac abi tantiaquido Codinto yacnocquido yanacsho bëdambocquidbimboecnuc mimbi isec, quec bëdambo iquebi, Papa, quequin chuided-chuidedembi. <sup>5</sup> Aden Nuquin Papan bëdamboen isaïdo icquin ambi bëdamboen tantiamiaïdobidi mibitedi nec. Matses icsaquid icsho cuidnushe quiash abided ciudadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

<sup>6</sup> Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec.

<sup>7</sup> Adquido yec Esuquidistu choate caimbudec Nuquin Papan abi bëdamboec tabadaïd tantiamiaïbi iccoshï quetiapimbo mibitedi iquec. <sup>8</sup> Aden abi bëdamboec tabadaïd tantiamequin Nuquin Papan mibitedi chieshenquïo icmec ma Esuquidistupadquid icnu quequin mimbi caimbudacpadquïo icpanuna aid padpidec choanuc. <sup>9</sup> Adquid mibitedi icmequin ambi Esuquidistubëd icquïdo icta caido ambi cuëmbanaido Nuquin Papan mibitedi icmiac. Adoshon mibi badedquïo Esuquidistupadquid yanenquïocsho isun chieshebi, quesa Nuquin Papa icquin abi mibitedi bëdambocquid icmebanec.

### *Esuquidistu tantiaquid cuëshëdabimboec chushcananquido*

<sup>10</sup> Adembidi chuïnu. Tantiata. Esuquidistu tantiaquid nebi quec Nuquin Papan bëdambo icmiaïd ënacbimboec tabadenda. Adec tabadec Esuquidistu tantiaquid ut-sidedi tantiananec ma cuëshëdabimboec chushcananesa yampanuna. <sup>11</sup> Esuquidistu tantiaquido Codinto yacnocquido chushcananec quec. Chido, Quëdoen shubunoësh choquïdo nëmbo ëbi isec choshon aden chiec. <sup>12</sup> Mibi onquiaïd chuïnu. Tanti. Pabadon tantiamiaïd nebi, quec chushquiabimboec utsi-utsiec tabadnubien; Apodosën tantiamiaïd nebi, quec chushquiabimboec utsi-utsiec tabadnubien; Petedon tantiamiaïd nebi, quec chushquiabimboec utsi-utsiec tabadnubien; Esuquidistun tantiamiaïd nebi, quec chushquiabimboec utsi-utsiec tabadec.

<sup>13</sup> ¿Esuquidistu tantiaquido cuëshëdmenuenda ëbipadquïdon chuïbandiondash? Padenquïo. Naden chuïnu. Tanti. ¿Matses icsaquid icsho cuidnushe quiash ëbida ciudadec unëspanëda? Padenquïo. Adembidi ¿Esuquidistu tantiaquid nebi quequin ëbi mimbi chuïshodambi mibitedi acten mentobandionda? Padenquïo. <sup>14</sup> Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi. <sup>15</sup> Utsi padenquïo iccondambi ma Pabadon ëbi acten mentondacsho aid tantiaquid nebi,

quetiapimbo ma mibitedi icpanuna. <sup>16</sup> Ai, Estepanasën shubun icquidobidi acten mentondambi. ¿Utsidambi acten mentoponda? Padenquo iccondambi. <sup>17</sup> Èbi tanti-aquido acten mentoban, Esuquidistun cainquo yaqui Matses icsaid bedshunec abided cuidadec Esuquidistu cuستن dectanac unëspanëdash quequin chuibeneta, Nuquin Papan cac aden chuibenec nebi. Èmbibi tantiaid chienquiocquin ma matses icsaquid icsho cuidnushe quiash abided cuidadec Esuquidistu cuستن dectanac unëspanëdash quequin ma utsibontsen tantiapanu qeshun chuibenec nebi.

*Esuquidistu abitedi tantiaquidquo nadatiambocquin nabanquidquibidi*

<sup>18</sup> Nuquin Papabëd icquido icmenuec matses icsaquid icsho cuidnushe quiash abided cuidadec Esuquidistu unëspanëdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icsho cuidnushe quiash abided cuidadec Esuquidistu unëspanëdash quequin tantiec.

<sup>19</sup> Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi.

Adquidon tantiatiapimbo yacpadembi natiamequin nabanendambi,”

quequin Nuquin Papan dada uamiampid aidëmbi nëbi naid nec.

<sup>20</sup> Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaid abubëd aidën icquidtedimbo mitsipadquidquo icpec? quequin isbanquin, Nadquo icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadic? Padenquo iquec.

<sup>21</sup> Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Èmbi tantiaidpenquo tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac.

<sup>22</sup> Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Èbi ënden tantiec papuduedaid daëd uanu queboedëmbi Nuquin Papan chiaid tantiauidoaic.

<sup>23</sup> Adec tabadnubi matses icsaquid icsho cuidnushe quiash abided cuidadec Esuquidistu cuستن dectanac unëspanëdash, quequin ëbi yacpadquidon chuibanoaic. Adoquien, Nuquin Papan chomiaid nec, quequin isadaidbon cuستن dectanenquioctsenëdash, quequin tantienquo yec tabadec. Isadaidpembo, Esuquidistu mimbi chuiboed ëmbi tantiacpadpenquo iquec. Adoac mimbi Èsus chuibanaid ëmbi ënden tantiaidbëdta daëd uatiapimbo iquebi quec tabadec.

<sup>24</sup> Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuستن dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec.

<sup>25</sup> Abitedi tantiaquidquo icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

<sup>26</sup> Utsibo, ¿mitsipadquidquo mibi icponda? Nadquid mibi icpondaque. Chuinu. Tandia. Daëdpactsëc tantiatsëcquido mibi icpondac. Namequidpenquo mibi icpondac. Chuiquid dapan bacuëpenquo mibi dadpen icpondac. Adquid icsho Nuquin Papan

mibitedi tantiaquin, Con bacuë caid nec, quequin mibi cuëmbanondash. <sup>27</sup> Ai, daëdpactsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna. <sup>28</sup> Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc <sup>29</sup> ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. <sup>30</sup> Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoaindac. <sup>31</sup> Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaid nebi, Icbo, quequin ëmbi naid chienquiocquin Esusën naidquio chuibanuna nuquitedi.

## 2

<sup>1</sup> Adembidi chuinu. Tantia. Mibi yacno nidshun dadpen tantiembi quenquiocquin daëdpactsëqui cuembo chuibanondambi. <sup>2</sup> Esuquidistubëdta abi cuesten dectanaid chuinu quequin auidi mibitedi chuibanondambi. <sup>3</sup> Codinto yacnocquido dacuëdampambo iquec quequin uëdëequimbi mibi chuibanondambi. <sup>4</sup> Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi nadatiambocquin mibitedi tantiamiondash <sup>5</sup> ma Pabaton tantiamiacpadomboen tantiamioshi, quetiapimbo mibitedi icpanuna.

### *Nuquin Papan Mayanën tantiamiaid*

<sup>6</sup> Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabenec papuduedquidon bëdamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. <sup>7</sup> Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bëdambo icmequid con mado nendac, quequin Nuquin Papan tantiapampic. <sup>8</sup> Esuquidistu nuqui bëdambo icmetequid Nuquin Papan chomiacsho adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenëdash. <sup>9</sup> Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaid bëda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

<sup>10</sup> Adnubien Nuquin Papan Mayanën Nuquin Papan abi yacnoshon bëdamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamioaic. <sup>11</sup> Matsesën ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocon matsesën tantiatiapimbo iquec. Abipadquid aton Mayanënuidquio tantiec. <sup>12</sup> Con mayan ëbipadquidquio menenu quetiapimbo matses iquec. Nuquin Papambien abipadquid aton Mayan nuqui menec

ma aidënquoio abi yacno bēdamboec tabadaid nuqui tantiamapanuna. <sup>13</sup> Aden aidënquoio tantiamiac adomboembidi ēbi yacpadquidon chuibananoaic. Ēmbibi tantiacpadpenquiocquin Nuquin Papan Mayanēn tantiamiacpadomboen chuibanembi. Adomboembidi ēbi yacpadquidon chuibananoaic. Aden Nuquin Papan chiaid chuibanac Nuquin Papan aton Mayan menaidon tantiaquiec. <sup>14</sup> Nuquin Papan abipadquid meniacmaidon aidën chiaid tantiatiapimbo iquec. Aden Nuquin Papan Mayanēn chiaid tantiatiapimbo icquin Nuquin Papan matses bēdambo icmenu queshun Esuquidistu chomiac matses icsaquid icsho cuidnushe quiash abided cuidadec cuesten dectanac unēsplanēdash quequin aidon tantiatiapimbo icoaic. Ēmbi tantiacpadomboen Nuquin Papan chienquoio iquec, quen-dac Nuquin Papan abipadquid meniacmaido. <sup>15</sup> Nuquin Papan Mayanēn tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanēn tantiamiacpadec tabadquidquoio nec, quequin nuqui tantiec. Adembidi utsi icsamboec tabadsho isun, Nuquin Papan Mayanēn tantiamiacmaid nec, quequin nuqui tantiec. Nuquin Papan Mayanēn Nuquin Papan chiaid tantiamiacmaidon nuqui naic tabadaid isash Nuquin Papan chiacpadquiec tabadquid nec quetiapimbo iquec adquid. Adecbidi Nuquin Papan chiacpadpenquoio yec tabadquid nec quetiapimbo Nuquin Papan Mayanēn tantiamiacmaido iquec. <sup>16</sup> Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquoio nec.

¿Adquid Nuquin Papa icsho abi chuiquin ismequid mitsicquid icpec? Adquid nibēdec.”

Nuquin Papan tantiacpadomboen aton Mayanēn tantiamiaido icquin Esuquidistun tantiacpadomboen nuqui tantianec.

### 3

#### *¿Esuquidistu tantiaquid utsi icsambo iquec, quecta ique?*

<sup>1</sup> Adembidi chuinu. Adembi tantiaata. Mibi yacno tabadquin Nuquin Papan chiaid tantiabenicquid mibitedi icsho daēdpactsēc chuibanondambi. Codinto yacnocquido bacuē uidēnabi yacnimboecquido nec queshun Nuquin Papan chiaid daēdpactsēc mibitedi chuibanondambi. <sup>2</sup> ¿Nēbi tishaidēnda pambid pepec? Padenquoio. Mibitedi adquidbimboecsho tantienquoio icnushe queshun Nuquin Papan chiaid daēdpactsēc chuibanondambi. Ēnden iccondacpadquiobi mibitedi adquiobidi icoapec. <sup>3</sup> Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanēn tantiamiacmaidpadquid yec nēishec chushcananec mibi. <sup>4</sup> Pabadon tantiamiaid nebi, quec utsi-utsiec chushquenubien; Apodosēn tantiamiaid nebi, quec chushqueoaic utsi. Adec chushquec Nuquin Papan Mayanēn tantiamiaibi yacnimboecquido mibitedi nec.

<sup>5</sup> ¿Mitsipadosho mimbi ēbi isponda? Adembidi, ¿Mitsipadosho mimbi Apodos isoaponda? ¿Ēmbembidambi mibi chuibanponda? ¿Ambembida Apodosēntsen chuibanpanēdash? Padenquoio. Tantia. Chuinu. Nuquin Papan chiacpadomboen Esuquidistu chuibenecquid ēbi daēdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiape? Ai, ēmbi adobanubi Nuquin Papan Esuquidistu mibitedi tantiamiondash. <sup>6</sup> Tiedēn caniquid ēshē siabi yac dēyuctiapimbo yacnimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodosten mibi yacno chopanēdash. Adec choshon tiedēn caniquid dēyuctsash tanunquiocnoc canitiapimbo yacnimboecquido Codinto yacnocquido icnushe queshun Apodosēn chuibanapanēdash. <sup>7</sup> Tied nitsinshun taneshcain tiedēn caniquid canimesa icbo nec. Adquiobidi Nuquin Papan chiaid chuibanquid matses tantiamesa nec.



Nuquin Papambien tantiamec. <sup>8</sup> Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. <sup>9</sup> Nuquin Papan chiapaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

<sup>10</sup> Nuquin Papa tabadte shubu uashunun buintad teshun abia tabëcacbimboen Esuquidistuba chuibanondambi ma matsesën tantianueshun. Buintad tabëcacbimboen Esuquidistu ëmbi chuibanan utsibon adomboembidi aidbidi chuibeneoaic. Bëdamboen chuibenenuequin ¿Nuquin Papan tantiapadomboendambi chuibaneque? Tantianu, queshun Nuquin Papan chiaid isted-istedtiad ambi chuibeneta caidon. <sup>11</sup> Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu queshun buintad tabëcacbimboen Esuquidistu ëmbi chuibanan adquid nec, quequin utsi chuibantiapimbo utsibon iquec. <sup>12</sup> Buintad tabëcaid tabadacimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. <sup>13</sup> Adashien yuecash Esuquidistu choanuc ¿Ëbi chuibanquidën ëmbi chiapadomboenda naoshe? Nëdëncadoquin tanu, quependac. <sup>14</sup> Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taidacmaid nidacimboec abi nidendac. Adsho isun abi bëdamboen chuibanquido Nuquin Papan menetequid nendac. <sup>15</sup> Adomboembidi utsibon abipenquio icnuc chuibanac Esuquidistu tantiatipimbocquido taidaid bescashun secacimboen secatequid nendac. Adnubi abipenquio icnuc chuibanquido taidtsenacimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

<sup>16</sup> Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatipimboda mibitedi icpe? <sup>17</sup> Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

<sup>18</sup> Adec abi tabadte yequi Esuquidistu tantiesan tantiapadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuc Esuquidistu tantiesan tantiapadec tabadenquiocquin Nuquin Papan tantiapadomboen tantiaquiota. <sup>19</sup> Esuquidistu tantiesan tantiapadquiec tsadquidën ëbi yacno tabadte tantiatipimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.” <sup>20</sup> Adecbidi: “Adquidën tantiaidbidi ënëdtequid nec,” quequin Nuquin Papan tantiec. <sup>21</sup> Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. <sup>22</sup> Aidën bacuëbo icquin mibitedishun con utsi ëbi caic. Adembidi Apodotsen mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. <sup>23</sup> Mibitedishun icbo Esuquidistu nec. Esuquidistun icbo, Edoen, aton Papa nec.

## 4

*Esuquidistu chuishunquido*

<sup>1</sup> Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ĕnden Abia Yampidĕn Nuquin Papan Esuquidistu chuibeneta, quenquiocpampidĕmbi nĕbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. <sup>2</sup> Nuquin Papan, Esuquidistu chuibeneta, cacpadomboen niaquenquiocquin ĕbipadquidon chuibenetiad. <sup>3</sup> Nuquin Icbon, Ĕbi chuibeneta, caid ĕbi icnuc ĵPabadon bĕdamboenda chuipec? quequin tantianuna, ĵmimbi cactabi dacuĕdpe? Padenquio. Adembidi, Nuquin Papan chiacpadomboen chiombi, quetiapimbo iquebi. <sup>4</sup> Ambi chiacpaden niaquenquio iccombi, quetiapimbocnobi abitedi isquidquo abitedi tantiaquidquo Nuquin Icbo icquin ĕbi chuibanec bĕdamboec tabadsho isun aidĕn chiendac. Adembidi ĕbi chuibanec icsamboec tabadsho isun chiendac. <sup>5</sup> Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidĕmbi choashun matses icsamboen ismec tabadaid abi ompoec tabadaidbĕdta chuibanashun cuidendac. Adembidi, matsesĕn ĕquĕducshun tantiaid chuibanquin cuidendac. Adembidi, utsibo bĕdamboec tabadaid chuibanquin chuioaindac, Bĕdamboen mimbi naoc, quequin.

<sup>6</sup> Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibĕdec, quesa ma icpanuna. Adecbidi, Apodospadquid utsi nibĕdec, quesa ma utsibotsen icpanuna. Nuquin Icbopadquid utsi nibĕdec, quequin tantiec tabad. Adecbidi, Codinto yacnocquidopadquid utsi nibĕdec, quenda. <sup>7</sup> ĵMitsicquidĕn adquid mibi icmebampashba? ĵAbembida mibi adquid icpeba? Nuquin Icbon tantiamiac nabanash, ĵatotsi quiash, ĕmbi tantiacpaden naombi, quepe mibi?

<sup>8</sup> Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nĕbi mibitedishun tantiauidpec. ĵAdpecta Nuquin Papan bĕdambo icmiaido tabadpadic? Nuquin Papa yacno ĕnden puduedac bimboec yash chuiquid dapa nebi, quiac bimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibĕd ĕbi yacpadquido ĕbi chedo ĕnden chuiquid dapa yacpadquido icmiondac, Cuishon, quetsiabi. <sup>9</sup> Adecbidi, Bĕdambo iquebi, quec mibi tabadnubi naden tantiec tsadebique. Tantia. Chuinu. Ĕmbi chuibeneta caido unĕseque. Is, Nuquin Papa quiac bimboecnuc ambi abi yacnoshon uaido mayan bĕdabobĕdtan matsestedishun isbededac bimboecquid nebi, quequin ĕmbibi tantiec tsadebi aden isbededec aido tabadenquiocnobi. <sup>10</sup> Esuquidistu chuibenequidon chuibanasho tantiauidash, Pabiate icsachitashien nec, quequin mamĕnshumbededashic Codinto yacnocquidon ambibi tantiaquin chuibanasho tantiaquidquo nec, quepec Esus tantiesabo. Adecbidi, utsibo dacuĕdampambo iquec, quiash uĕdĕequin Esuquidistu chuibenequidon Nuquin Papan chiaid chuibanubi cuesambo yac bimboen mibitedishun chuibanpec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. <sup>11</sup> Esuquidistu chuibenequid yequi pistsĕc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsĕcquid dasiuidquid nebi. Adquiecbidi Esuquidistu chuibenequid utsibo iquec. Utsin mĕyanded-mĕyandedaid nebi. Quenenash iquenquio icquin capucuenequin Esuquidistu chuibenec nebi. <sup>12</sup> Con pete bednuequin shubumpi nacnenquidquo iquec chonoadsho isquin utsibon mamĕnshunaid nebi. Aden mamĕnshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bĕdamboen ista, Papa, quequin aido chiombi. Utsin mĕyanaqui dayacquo yec cacuidanesa nebi. Adquidbidi Esuquidistu chuibenequid utsibo nec. <sup>13</sup> Adembidi, utsin ĕbi mua uaquin chiaqui cuidnanenquiocquin bĕdamboen chiombi. Adembidi ĕmbi Esuquidistu chuibeniaqui icsactsĕcquid nec, quequin ambi secanu caid bimboecnuc

ëbi ispec. <sup>14</sup> Adechidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquio yampec, quenquiocquin ëbi tabadaid mibitedi tantiamenuen dada uaombi. Pabadon chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquio iquec. <sup>15</sup> Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. <sup>16</sup> Ëmbi nacpadomboen naic tabadta quequin mibitedi chiembi. <sup>17</sup> Mibi ëmbi nacpadquiec tabadte tantiamenuquin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquio icquin utsi-utsiec yacnoshon ëmbi chuibeniacpadomboen chuibanuquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aidbidi nec.

<sup>18</sup> Mibi utsi-utsiec Pabado choainquio iquec quequin abimbo tantiacbimboen chuibanec. <sup>19</sup> Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. <sup>20</sup> Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. <sup>21</sup> ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

## 5

### *Esuquidistu tantiaquid ambi chudtemaid chudquid cacumeta caid*

<sup>1</sup> Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. <sup>2</sup> Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbï aidi cacumepatecnëdan. <sup>3</sup> Mibëd ictiapimbo yequi mibëd yacbimboecquin dada uaqin icsaquid cacumetiadquidi mibi nenëdac quequin chuibanombi. <sup>4</sup> Esuquidistu tantiaquid nuquitedi nec, quec mibitedi iccuededec Nuquin Icbo Esuquidistun tantiamiacpadomboen Pabadon naden natsiash quequin <sup>5</sup> icsaquid nidme ma Satanasën mëyanac icsa bunesa yanacsho Nuquin Icbo Esuquidistu choashun ma abi yacno yuedpanuna.

<sup>6</sup> Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisacbimboec mibitedi adquibidi ictsiac. <sup>7</sup> Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided ciudadec Esuquidistu unësspanëdash, quiash aid icsaisa yacpadquiec tabadta. <sup>8</sup> Aden ambi naid tantiec icsaondacpadpenquio yec ma tabadpanuna. Aidquio tantiembi, quec abimbo tantiadonec ma tabadtenepanuna.

<sup>9</sup> Ambi chudtemaid chudquidbëd iccuededenda, quequin ënden dada uaondambi. <sup>10</sup> Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesadaidpëd iquec. Adechidi, utsin na bunquin mua uain bedquid dadpen iquec. Adechidi, matsesën Nuquin Papan uaidbimboecnuc nacnenaid

tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibēdec. Nuquin Papa yacno nidash icsaquid isenquoio yec mibi tabadendac. <sup>11</sup> Esuquidistu tantiaquid nebi, quequid icsadenesho isash adquidbēd iccuededenda caimbi. Esuquidistu tantiaquid nebi, qeshun ambi chudtemaid chudquin ēnesabēd iccuededenda. Adecbidi, muaquin bedbanquidbēd iccuededenda. Adecbidi, Esuquidistu tantiaquid nebi, qeshun matsesēn Nuquin Papan uaidbimboecnuc nacnenaid tantiaquin ēnesabēd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidēn chuisho mamēnshumēnquin ēnesabēd iccuededenda. Adecbidi, Esuquidistu tantiaquid nebi, qeshun cuesanquin ampequin ēnesabēd iccuededenda. Adecbidi, Esuquidistu tantiaquid nebi, quiash ēmbi chuibocpadquid icsaquidbēd iccuededenda. Adembidi aidobēdtan penda.

<sup>12</sup> ¿Esuquidistu tantiesa abi icsaid chuiquin cacumeta, quequindambi chuipe? Padenquoio. Esuquidistu tantiaquid mibēd icquid icsadenequin ēnenquiocsho isun Nuquin Papan chiaid comapenen tantiaquin mibi icsaid ēnta, quequin chui. <sup>13</sup> Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

## 6

### *Ēbi chushcananaid tantiashun mimbi tantiacpaden chui caid*

<sup>1</sup> Esuquidistu tantiaquid daēd nēishash chushcananec, queoaic. Adquid chuinu. Tanta. Nēishash chushcananash Esuquidistu tantiesa yacno nidshun, Ēbi chushquiaid chuisho tantiashun ¿midapaden mimbi chieque? Ēbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape? <sup>2</sup> Yuecshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiembi, qeshun ¿Atotsieshun Esuquidistu tantiaquidbēd chushcananash tantiesa yacno nidshun mimbi chuibampe? <sup>3</sup> Yuecshun, ¿Ēmbi uaido mayanēn naid midapaden mimbi chieque? Tantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? <sup>4</sup> Adquidon naid ēmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daēd nēishash chushcanansho tantiashun, Esuquidistu tantiesa yacno nidshun, Ēbi chushquiaid chiacsho mimbi tantiacpaden ēbi chui, mimbi capec? <sup>5</sup> ¿Esuquidistu tantiaquid utsibo nibēdpecta ictic? ¿Esuquidistu tantiaquidēn icsamboen chuinushe qeshunda Esuquidistu tantiesa yacno nidshun, Ēbi chushquiaid chiacsho mimbi tantiacpaden chui, mimbi capec? ¿Bēdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? <sup>6</sup> Mibipadquid Esuquidistu tantiaquid utsibo yacno nidenquoio yec mibipadquidpenquoio Esuquidistu tantiesa yacno nidshun utsibēd chushcananaid mimbi chieque. Adenda.

<sup>7</sup> Ēbi chushcananaid ēbi daēdshun chiacsho tantiashun mimbi tantiacpaden chui. Tantanu, quequid mibēd icnuc Nuquin Papan bēdamboequid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nēishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nēishash chushcanampe? <sup>8</sup> Cuidnante bunec mibi adpec. Naden natiad. Ēbēd chushcananquid Esuquidistu tantiaquid nec, quec abi cuidte bunenquoio yec abi yacno nidshun abi icsaboed tantiamequin Nuquin Papan chiaid chuiban.

<sup>9</sup> ¿Icsadenequin ēnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquieci tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ēnesa Nuquin



Papa yacno yuedtemaid nendac. Adembidi, Nuquin Papan uaidbimboecnuc nacnenaïd tantiaquin ënesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bënëpen chudmequin ënesa, adecbidi dada daëd chichudnanquin ënesa, adecbidi chido daëd dachudnanquin ënesa Nuquin Papa yacno yuedtemaido nendac. <sup>10</sup> Adembidi, ampequin ënesa Nuquin Papa yacno yuedtemaid nendac. Adembidi, muaquin utsin na bedquin ënesa, adembidi, ambi tantiacpadpenquiocquidën chuïsho mamënshunquin ënesa, adembidi, cuesunianquin ampequin ënesa. Adquido Nuquin Papan ambi abucshun nacnenaïdën tabadtemaido nendac. <sup>11</sup> Ënden mibi adquïo iccondaïdi nëbi utsi-utsiec padenquïo icsho isash Nuquin Papa mibi cuidenquïo yec mibi icsaïd bëpiscudac. Adembidi, Nuquin Papan mibitedi bëdambo icmebanuequin abipadquid aton Mayan mibitedi meniac. Aïdi meneshun Esuquidistu icsapenquiocquid isacpaden Nuquin Papan mibitedi isoaic.

### *Ëmbi chudtemaid chudmane qeshun adquid isuidteneta quiaïd*

<sup>12</sup> Ëmbi natemaid naden nata caïd nibëdec qeshun naic bëdambocquid ictiapimbo iquebi, quiash padenquïo yec tsadebi. Aden nabanquin ëntiapimbo icmane quiash padenquïo iquec tsadebi. <sup>13</sup> Matsesën chebudaid pucu yacno budash dada bëdambo icmianquid nec. Yuecash matsesën dada chodquetequid nendac. Padnuen, ëbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbëd Nuquin Papa iquec. Ad icnuc mimbi chudtemaid chudquid icta, quenquïo Nuquin Papa icpampic. Ambï chudtemaid chudquid Nuquin Papa tabadte ictiapimbo iquec. Aden naquid chian anëdënquequid nësecatequid nendac. <sup>14</sup> Nadatiambocquin Esuquidistu Nuquin Icho Nuquin Papan uincuemepanëdash. Aïdëmbi nuquitsen abi tantiaquid icsho uincuemendac. <sup>15</sup> ¿Abi tantiaquid icquin, Esuquidistubëd daëdash tabadquid nebi, quequin tantienquïoda mimbi icpe? Ai, aïdbëdi daëdtequid nuqui nec. ¿Adquidbëd daëdashabi icsaquidbëd daëdoape? Padenquïo iquebi. <sup>16</sup> ¿Dadpen chudmequid chudash daëdabimboecquid nec, quequin mibitedishun tantienquïoda icpe? Aïd daëdi dada abentsëc yacbimboecquid nec, quequin Nuquin Papan dada uamiampid nec. <sup>17</sup> Nuquin Icbobëd daëdaïdien Icbon tantiacpadquiec tabadquid nec.

<sup>18</sup> Ëmbi inacmaid chudmane qeshun chido utsi isuidteneta. Padenquïo yec icsaquidbëd daëdquid mibi iquendac. Ambï chudtemaid chudquid aton namibëd ëquëducuësh daëdaïd nec. Nami umanucuësh icsaïd namibëd daëdtiapimbo iquec. <sup>19</sup> Nuquin Papan Mayan tabadtequid Esuquidistu tantiaquido nec. ¿Nuquin Papan ëbëd tabadmiaïd abipadquid nec, quequin tantienquïoda mibitedishun icpe? Èbibi nuquin icho nec, quetiapimbo matses iquec. Adecbidi, Con icho nibëdec. Ëmbi tantiacpaden naimbi, quetiapimbo mibi iquec. <sup>20</sup> Nuquin Icho cuesten dectanac matses icsaquid icsho cuidnushe quiash abided cuidadec unësquid Nuquin Papan icmiac abi tantiaquid yec aïdën na mibitedi nec. Adoaidi ambi chiacpaden ismec bëdamboec tabadteneta.

## 7

### *Dada chidobëdi daëdaïd*

<sup>1</sup> Nëbi mimbi dada uaboed isombi. Aïd isun ëmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bedenquïo iquembi, qesho chido inta caïnda caïmbi mibi. <sup>2</sup> Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aïdpadquid icmane quiash chido abentsëc inquid dada ictiad. Adecbidi dada abentsëcshun inaid chido ictiad. <sup>3</sup> Con chido ëmbi inaid nec, quequin aïduidi chudquid icta. Adecbidi con bënë ëbi inquid nec, quequin aïduidi chudmequid chido nec. <sup>4</sup> Chidon dada daëdash aton bënënen dadabidi nec. Adecbidi dadan dada chidon dadabidi nec. <sup>5</sup> Aïd daëdi

daëdabi yac bimboec, Padi, quenda. Adboedi, Nuquin Papa chuinuec nëidtedi ushquin padenquo nuqui iquec, queshun ënta. Aidtedec ushquin padenquiocshon, Ëmbi yuen ëntiapimbocsho isun Satanasën icsamenushe queshun padpiden nata. <sup>6</sup> Ënta quenquo iquebi. Nëidtedi ushquin padenquo iquemi quiash mibi daëdi aidtedecuidi ushec ënëdta caimbi. <sup>7</sup> Padnuen, chido inesa ëbi yacpadec dadatedi icpashun. Dada utsi-utsiec Nuquin Papan icmiacpaden chido inquid icnubi utsi-utsiec chido inesa iquec.

<sup>8</sup> Chido inesa ëbi tabadacpadec dada utsitedi tabadec bëdambo ictsiash. Adecbidi dadan inaidpen bëdambo ictsiash chido. Dada bënua adecbidi bëdambo ictsiash. <sup>9</sup> Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

<sup>10</sup> Daëdash niamënenda. Ëmbibi chienquiocquin Nuquin Icbon aden chuinëdacpadembi chiembique. Tantia. <sup>11</sup> Min bënë nianash utsin inaid iquenda. Dadan inaid icnu quec mimbi niamboedën inaid icoata. Adembidi chido inquid min chido bunenquiocquin abi icsaid dada uashun ismequin nidmenda.

<sup>12</sup> Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuioaimbique. Tantia. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquo yec, Con bënë nianu, quenquo ictsiash. Adquid icsho isash. Con chido icsambocquid nec, quenquo yec abëdi tabadquid bënë. <sup>13</sup> Adecbidi chido utsi aton bënëbëd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantiash, Con bënë icsambocquid nec, quenquo yec bënë nianec nidesa chido. <sup>14</sup> Esuquidistu tantiabi yec daëdacpadec aton chido Esuquidistu tantiaquid yanash aidbëd abentsëc yac bimboec tabadec bënë. Adec bëdamboec tabadsho isun Nuquin Papan chido bëdamboen tabadmequin bënëtsen bëdambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, utsibo quenushe quiash bënëbëd abentsëc yac bimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yac bimboec tabadsho isun, Bëdambocquidën bacuëbo nec, quequin utsibon ispec.

<sup>15</sup> Utsimbic ambi bedboedën aton chidon Esuquidistu tantiasho isun aton chido nidta catsiash. Adoaquien, Mibëd tabadte bunebique. Ëbi nidmenda, quetsiash chido bënë caic. Adoaqui, Nidec nid, cac cacuidenquo yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoaquien, Mibi unësquo iquec, quetsiash bënë. <sup>16</sup> Adnubien dadan nidta caid aton chido Esuquidistu tantiaquid yec bëdambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bëdambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

<sup>17</sup> Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi. <sup>18</sup> Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaidbimboecnuc nacnemeny quenquo yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemeny quenda. <sup>19</sup> Shui dëbid dëteshunaidta nec, quenquo yec Nuquin Papa tsadec. Adecbidi, Shui dëbid dëteshunacmaidta nec, quenquo yec Nuquin Papa tsadec. Adquid nec quenquo yec, Ëmbi chiacpadomboen nadenequidta nec, quec Nuquin Papa tantiec tsadec. <sup>20-21</sup> Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi, utsin yuapenquo yec utsin yua

icnu quenquo yec tabadoa. <sup>22</sup> Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquo nendac. <sup>23</sup> Matses icsaquid icsho cuidnushe quiash abided ciudadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda. <sup>24</sup> Adembidi chuinu. Tantiata. Nuquin Papan mibi cuë nuc matses yec Esuquidistu tantiaquid yanash, Ëbëd tabadquid con Icbon nec, quec matses yec bëdamboec tabadta.

<sup>25</sup> Chido inesabëdta dadan inacmaid chuita quequin mimbi dada uaid isun aidotsen chiembi. Aido tantiaquin naden chuita Nuquin Icbon cainquo yaqui Nuquin Icbon ëbi chuibeneta caid icquin naden mibitedi chiembique. Tantia. <sup>26</sup> Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. <sup>27</sup> Chido inquit yec chido inesa icnu quenda. Adecbidi, chido inesa yec chido inu quenda. <sup>28</sup> Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobëdta con bacuëbo bëdambo icmepeba? quec chido inquit tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiembi ma natiamianquiec quenquo yec ma mibi tabadnueshun.

<sup>29</sup> Ëmbi chuiboed mibi bëdamboen tantiamembique. Tantia. Nidaidën yuec tabadnu, quetiapimbo nuqui iquec. Nuquin Papa chieshënte ushë chonoc abi tantiaquid dadpen mëyansho isash Esuquidistu chote anoentsëqui yaneque. Abi yacno utsibo puduedtiapimbo icnushe queshun min chido icnubi Nuquin Papa bunacpadomboen nabanec tabadta. <sup>30</sup> Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bëdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. <sup>31</sup> Yuecshun ëmbi nidaidëns hun bedaid Nuquin Papan ëmendac, quequin tantiaquin ambi chiacpadomboen nabanec tabadta.

<sup>32</sup> Natiatequid nibëdpashun, queshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu queshun aden nabanec tabadpec. <sup>33</sup> Chido inquidien, Nuquin Papan tantiacpadenuidi nanu quiash, ¿mitsipadentsimbi con chidobëdta con bacuëbo bëdambo iquebi camepeba? quec tabadec. <sup>34</sup> Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bënën bëdamboen istsiashi, quec tabadec. <sup>35</sup> Aden mibi chuibanquimbi chido inesa chido bednu quesho, Chën, caisa nebi. Nuquin Papan chiacpadomboen nabamboedëmbi utsi uain tantianushe queshun ëmbi tantiaid chuibanec nebi. Nuquin Papan tantiacpadomboen bëdamboen tabadmenuequin aden tantiaquin chuibanec nebi.

<sup>36</sup> Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapiambo yantsiash, quiash, Con champi inec cho, quiash icsatiapimbo adquid icoaic. <sup>37</sup> Adecbidi, min champi inu queboedi, Bedenquo iquembi, quesho tantias hun menenda. Aden bedmenquo yec mibi bëdambo icpec. <sup>38</sup> Con champi bedec cho, queshun bedmiash, Bëdambo iquebi, quenubi, Con champi dadan inacmaid iquec quec bëdamboshë utsi icpec.

<sup>39</sup> Dadan inaid icquin min bënë nianenda. Min bënë unësan utsin inaid icnu quiash adta. Esuquidistu tantiesan inaid iquenda. <sup>40</sup> Bënuia utsin inacmaid icnu quiash

bëdamboshë iquec aid. Ëmbi tantiacpaden ëmbi chuiboed Nuquin Papan Mayanën tantiamiacpaden chiaid nec.

## 8

### *Nuquin Papan uaidbimboecnuc nacnenaid tantiaquin pambid dasanaid*

<sup>1</sup> Nëbi Nuquin Papan uaidbimboecnuc nacnenaid tantiaquin pambid dasanaid chuinun naden chiembique. Tantiata. ¿Matsesën nacnenaidta nuqui tantiaid ictic? Padenquo. Aden tantiaquin ëmbi tantiacpadpenquo icquid utsibo nec quequin mamënshumpec. Aden tantiaquin mamënshunquin utsi tantienquo iquec. Utsien, Naden nabanquindambi utsibo bëdamboen tabadmepeba, quequin tantiaquidquo nec.

<sup>2</sup> Ëmbibi tantiemi quequid tantiabenabictsëcquid nec. <sup>3</sup> Nuquin Papa tantiaquidien Nuquin Papan tantiaidquo nendac.

<sup>4</sup> Aden chuishun ¿Nuquin Papan uaidbimboecnuc matsesën nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesën nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibëdquiec. <sup>5</sup> Nidaidën samëdquid papa cain utsin cuënaid dadpen iquec. Adembidi abuc samëdquid Papa cain utsin cuënaid dadpen iquec. <sup>6</sup> Papa cain nuquin cuënaidien Abia Yampidquo nec. Adquid utsi Nuquin Papa cainquo nuqui iquec. Aidi abitedimbo uabampampidquo nec. Aidquo tantiec nuqui tabadec. Adembidi Nuquin Icho cain cuënaidquo Esuquidistu nec. Aidëmbi aton Papabëdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuëmbanaido yec ambi tantiaido nuqui nec.

<sup>7</sup> Adembidi aid abentsëqui nuqui tantiaidquo icnubi Nuquin Papan uaidbimboecnuc matsesën nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedëmbi Esuquidistu tantiaquid yanshun nacnenaid tantiaquin pambid dasanaid ëmbi pesho isun, Icsaosh, Nuquin Papan canushe, qeshun adquid petiapimbo yanebi. <sup>8</sup> Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaid tantiaquin pambid dasanaid penquiocsho isash, Aid bëdambocquid nec, quenquo Nuquin Papa iquec. Adecbidi, nacnenaid tantiaquidën dasanaid pesho isash, Aid bëdambocquid nec, quenquo icoaic Nuquin Papa.

<sup>9</sup> Padnuen Nuquin Papan uaidbimboecnuc matsesën nacnenaid tantiaquin pambid dasanaid ëmbi bedshun pesho isash, Esuquidistu comapenen tantiaquidën tantiaid nacnenaid nec, Esuquidistu tantiabenabictsëcquid quenushe qeshun padenquo iquemi. <sup>10</sup> Aid pesho isash, Nacnenaid papa cain cuënaid nepec, qeshun, Aid tantiaquin ëmbitsen pambid dasanaid penu, quetsiash Esuquidistu tantiabenabictsëcquid. <sup>11</sup> Padnuen ëmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsëcquidën Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidën dasanaid ëbi icsainquo ictequid nec quequin pequin Esuquidistu tantiabenabictsëcquido mimbi icsameyoc. Mimbi icsamaido tantiec Esuquidistu unëspanëdash. <sup>12</sup> Ad icnuc Esuquidistu tantiabenabictsëcquid mimbi icsamequin Nuquin Icbon chiacpadomboen niacquid mibi neyoc. <sup>13</sup> Padnuen Esuquidistu tantiaquid utsibon icsamboen tantiaquin penushe qeshun padpiden penquo iquemi ma icsainquo icpanu qeshun.

## 9

### *Esuquidistu tantiaquidon natequid*



<sup>1</sup> Esuquidistu chuibeneta cacmaid Pabado nec quequidotsen chuinu. Tantia. ¿Matsesën nata caidtabi nedi? Padenquio. Esuquidistun ëbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda? <sup>2</sup> Ai, ëmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ëmbi chuibanacmaid icnubi, Ëmbi chuibanaido mibitedi nec, quequin tantiemi. Ëmbi chuibanac Esuquidistu tantiaquid mibitedi yanshun, Esuquidistun ëbi chuibeneta caidquio nebi, quequin Pabado chïaid abimbo iquec, quequin bëdamboen tantiaquidquio mibi nepec tantesa uainquiocquin.

<sup>3</sup> Aden ëmbi Esuquidistu chuibanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabado Bednabebëdtan chuibanasho pemenuoctiad, quequin chiec. Aden chiec onquequid ëmbibi tantiaquin naden aido chiembique. Tantia. <sup>4</sup> ¿Esuquidistu chuibanec bundoenquiodabi icpe? <sup>5</sup> Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? <sup>6</sup> Adembidi, ¿Mibi pemembique. Penuequin nabanenda, capenda Esuquidistu chuibenecquid utsibo mimbi ique? Bednabebëdta ëbi chiec, ¿Penun daëdshun shubumpi nacnentiad, quepecta mibi ique?

<sup>7</sup> Ad yenquio utsibo iqueque. Tantia. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedën caniquid pmesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. <sup>8</sup> ¿Aden chuiquin ëmbibi tantiaidtabi chuipo? Padenquio. Nuquin Papan Moises dada uamiampid ëmbi chiaid nec. <sup>9</sup> Nad iqueque. Tantia. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquio. <sup>10</sup> Matsesbëdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec. <sup>11</sup> Adembidi, ¿Nuquin Papan chiaid mibi paquiacquid yec pete bec cho quenquotiadquidtabi nedi? <sup>12</sup> Mibi chuibanquid utsibo menebanquimbi ëbia mibi chuiquidquio icsho menetidquidi menianenquio mibi icpoc. Aden ëbi menenquio yaqui ëmbi chiaid tantienquio icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. <sup>13</sup> Nuquin Papa tabadte shubu uashunaid yacnoshon nashunquidën ashunquio peshun aquec. Adembidi ashunquio nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? <sup>14</sup> Adomboembidi Esuquidistu chuibanasho abi tantiaquidon yuedec, quequin Nuquin Papan chiaid nec.

<sup>15</sup> Ëbi yuedtiadquidi nec, quequin tantiequi ¿adabi pemenu yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquio iccombi. Bunquiec unësbudec mibi caic, Bec cho, quenquio iquendabi. <sup>16</sup> Ëmbi Esuquidistu chuibenenu quenquioccobi. Ambi ëbi chuibeneta cac Esuquidistu chuibenec nebi. Abi chiesha yanash unësquio ictsiabi. <sup>17</sup> Ëmbi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquio nebi. <sup>18</sup> Esuquidistu chuidenesho isash, ¿atotsi Pabado bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esu chuibanac abi tantiaquid yansho isash bëdambo iquebi.

<sup>19</sup> Bec cho, quesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aidbëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. <sup>20</sup> Adecbidi, isadaidbo Esuquidistu chuibanuec aidobëd tabadquin mimbi natemaid ëmbi natemaidpenquo nec, quenquiocquin ambi natemaid nainquo iquembi. Adquieci tabadquin ëmbi chuibanac ma isadaidbotsen Esuquidistu tantiaquido yampanuna. <sup>21</sup> Adecbidi, isadaidpembo chuibanuec aido tabadacpadec abëdi tabadquin Esuquidistun chiacpadec niaquenquo yec tabadec nebi. Ëmbi adoac isadaidpembotsen ma Esuquidistu tantiaquido yampanuna. <sup>22</sup> Adecbidi, Esuquidistu tantiabenabictsëcquido chuibanuec ëmbi tantiabenabi iccondacpaden bëyuc tauain chiacquido tantiamenuen chuibanec nebi. Ëmbi adoac ma aidotsen Esuquidistu tantiabenquidquo yampanuna. Adequi tabadquin Esuquidistu chuibanec nebi. Ëmbi adoac utsibo ma Esuquidistu tantiaquidquo yampanuna. <sup>23</sup> Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

<sup>24</sup> Titinguecuededquido icnuc bëyuc abia titinguec choquid iquendac. Adquid icsho isun, Mibi badedquo titinguic, quequin titingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomben nabanta, caimbi mibi. <sup>25</sup> Badedquo titinguenuequid bedte bunaid chodquetequid icnuc, Aid bednu, qeshun abi bëdiactsëc titincamete pete icsa actequid icsabëdta isuidec titinguenuequid iquec. Nuquien chodquetemaid bednuequin icsaid isuidec. <sup>26</sup> Utsien, Bednu, quenquo yec titinguec. Adembidi, Bednu, quenquo yec utsibëd mëdanten senanu quequin nibëdacnoshombi mëdanten seded-sededec. Aden tantiaquin naisa nebi. <sup>27</sup> Utsibon ma tantianu qeshun Esuquidistu chuibenias unësacsho Nuquin Papan menete bëda bedtiapimbo icmane quiash icsaid mëmunec tsadebi.

## 10

### *Isadaidbon chieshampicpadec tabadenda quiaid*

<sup>1-2</sup> Abi yacno abi tantiesa chosho puduedmenquo icchitoshe quiash Nuquin Papan chiaid chieshënenquo yec bëdamboec tabad, quequin tantiamenuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mënchicaidobëd Moises puuanec Nuquin Papan bëyucamiaid abu ushu tédion nidanequin tsusedpabon Acte Piu potepampic. <sup>3</sup> Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. <sup>4</sup> Adembidi acte bundoacsho isun cuënote cuesquin acte chomiaid acash, Ëbi bëdambo icmequin Nuquin Papan ambi yuecshun chometequid Quidistubëdtan nadatiambocquin naid nec, quequin tsusedpabon utsin-utsinquien tantiabempampic. <sup>5</sup> Aden tantiabenubien abëd icquid utsibon padenquo icpampic. Aden tantiesa Nuquin Papan nidaid Canan caid menenu caid yacno niduidequi unësbudnepampic adquitedi.

<sup>6</sup> Tsusedpabo chieshampicpadquid icnushe qeshun Nuquin Papan aido chuiquin dada uamepampic. <sup>7</sup> Ad icnuc tsusedpabon Nuquin Papan uaidbimboecnuc nacneshun papa cain tantiampicpaden tantienda. Naden Nuquin Papan aido chuipampic. Bacabimboecnuc ambibi nacnenaid tantiaquin peshun acash baidacuededpampicpaden tantiaquin nainda. <sup>8</sup> Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. <sup>9</sup> Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbudnepampic. <sup>10</sup> Adecbidi, Equipito yacnoshon mënchicaido abi mënchicquid chieshec nadpampic.

Equipito yacno iquec bēdambo iccondaiddi nēambo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bēdabo Nuquin Papan budmiaidēn aidtedi cuesunepampic.

<sup>11</sup> Abi tsibanquido tantiamenuquin tsusedpabo tabadnēdaiddi icsa Nuquin Papan chuiquin dada uamepampid ēmbi chuiboed nec. <sup>12</sup> Tsusedpabo Nuquin Papa chieshēnec icsapampicpadec icsamane quequin mibi tabadte tantiata. <sup>13</sup> Ēnden tsusedpabo chieshēmete icpampid abi iquec. Adaid natiatequid icnuc chieshēnushe queshun Nuquin Papan mibi tantiaquin uidēn uac mibi icsainquio yec chieshtoenquio yec dayacquio iquendac.

*Nuquin Icho Esuquidistu unēsaid tantiaquin acshumbic mayan icsa tantiaquin mimbi actiapimbo iquec quiaid*

<sup>14</sup> Nuquin Papan chiaid niacmane quiash, Nuquin Papan uaidbimboecnuc matsesēn nacnenaid tantianu, quenda. Dacuēdec cuenacbimboec aid nanacno nidenda. <sup>15</sup> Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquio yec Esuquidistu chuibansho tantiec iccuededteneta. <sup>16</sup> ¿Iccuededquin sicaid acnun Nuquin Papa chiec onqueshun acted-actedquin matses icsaquid icsho cuidnushe quiash abided ciudadec Esuquidistun intac chididiquiaid tantien icquinda nuqui acti? ¿Adembidi, pete cuēsh-cuēshun Nuquin Papa chiec onqueshun aton dada mēyanaid tantien icquinda nuqui pedi? <sup>17</sup> Esuquidistubēd abentsēc yachimboecquido nebi, quequin tantiaquin pete cuēsh-cuēshun meniac abentsēcshun piacbimboen abi tantiec iccuededquidon pebededec.

<sup>18</sup> Aden nuqui pebededacbimboen isadaidbo icsaid cuidnuen nidaidēn capuquid-ded cuesuniaid pambid tauiquin Nuquin Papan shēdtequid pambid bedshun cuesunquidbēdtan nidaidēn capuquid icbon pepanēdash. <sup>19</sup> Aden ēmbi chiac ¿atotsi Pabado ēbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesēn nacnenaid tiboepecta iquec? Padenquio. <sup>20</sup> Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesēn nacnenaid yacnoshon pambid dasanec. Aden aid pambid penu, queshun mayan icsabēd yachimboecquid nebi, quequin pec. Adquidbēdtan penda. <sup>21</sup> Nuquin Icho Esuquidistu unēsaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unēsaid tantiaquin pete peshun mayan icsa tantiaquin pambid petiapimbo iquec. <sup>22</sup> ¿Aid tantiaquin acshun pequin Nuquin Papa nēishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

*Ēmbi natemaid naden nata caid nibēdec, quiash nanueboedi Esuquidistu tantiaquid utsi icsamemane quiash nainquiocte chiaid*

<sup>23</sup> Nēid mishtemaid nec. Nēid petemaid nec. Nēid actemaid nec, quequin ēmbi chuitequid nibēdec, quiash Esuquidistu tantiaquid utsi icsamemane quiash nainquio yec tsadebi. Matsesēn ambi nacnenaid tantiaquin pambid dasanaid ēmbi tantiacmaid nec, quiash pambid dasanaid petiadquio iquequi Esuquidistu tantiabenabictsēcquidēn, Nēid nacnenaid nuquin papa caid nec, quequin penushe quiash penquio yec tsadebi. <sup>24</sup> Utsi tantienquiocquin nacnenaid pambid dasanaid piash bēdambo iquebi, quenda. Naden natiad. Matsesēn nacnenaid pambid dasanaid ēmbi pesho isun utsibon icsamboen tantiatsiash, quequin penda.

<sup>25</sup> Aton na sambededacno nidshun pambid bednuequin, ¿Nuquin Papan uaidbimboecnuc matsesēn nacnenaid pambid dasanaid bedaidta nec? quenquiocquin bedta. <sup>26</sup> Abu nidaidbēdta uashun aidēnquio icquidtedi Nuquin Papan uampidquio nec. Aidtedimbo aton na nec. Nacnenaid yacnoshon pambid sambededaid aton na nec. Aidēn bacuēbo iquec aid pambid pequido mibi nec. <sup>27</sup> Aden tantiec Esuquidistu tantiesan, Pec cho,

cac, Ai, quianec nidec puduedshun, Mimbi codocaid matsesën nacnenaid tantiaquin pambid dasanaid bedaidta nec, quenda. <sup>28</sup> Adnubien mibi puduedacno isedquid utsi Esuquidistu tantiabenabictsëcquid tsadquin, Matsesën nacnenaid papa cain cuënaid tantiaquin dasanaid nëid pambid nec, cac aid pambid penda. <sup>29</sup> Ęm̄bi papa cain cuënaid nec, quequin utsin tantianushe qeshun aid pambid penda. Matsesën nacnenaid con pa nec, quequin cuënaid tantiesa icquin ¿atotsieshumbimbi matsesën nacnenaid tantiaquin pambid dasanaid penquo iqueque? Chuinu. Tantia. <sup>30</sup> Nuquin Papa Ęm̄bi tantiaidquio icnuc penun aidi chuisho isash ¿atotsieshun matsesën nacnenaid papa cain tantiaquin pepec utsibo quepec? <sup>31</sup> Edoen utsibo tantiamenuen bēdamboen nabanec tabadteneta. <sup>32</sup> Aden naic, Esuquidistu tantiaquid isadaidbo isadaidpembobēdta Esuquidistu bēdamboen tantiabemequiono, quec bēdamboec tabadta. <sup>33</sup> Naden naic Ębibi bēdambo iquebi, quenda. Naden Ęm̄bi nabanuc Ębēdi utsi bēdambo ictsias, quequin tantia ma Nuquin Papa yacno puduedtequid utsibo yanu qeshun.

## 11

<sup>1</sup> Ambia tantiaquidēn Esuquidistun icmiacpadquiec tabadec nebi. Adecbidi Ęm̄bi chuiquin ismiacpadquiec tabadteneta mibitedi.

### *Nuquin Papa tantiaquin iccuededquin naid*

<sup>2</sup> Mimbia tantianēdaidquio mibi nec, quequin mimbi chiaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabenēdaidon chuibanaid mimbi chiacpadomboen tabadec, quequin mimbi dada uaid bēmiaidon chuibancho tantiash bēdambo iquebi.

<sup>3</sup> Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. <sup>4</sup> Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ębi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. <sup>5</sup> Chidoen, Ębi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. <sup>6</sup> Ębi chuiquid nibēdec, quiacbimboec tabadsho matasmetiad. Matasmiash ma mapucudpanu chido. <sup>7</sup> Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ębi chuiquid Abia Yampid nec, quequin ismenuet aid chiec onquec mauete mauesa dada nec. <sup>8-9</sup> Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. <sup>10</sup> Adquid icmiac dada Ębi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquo yec Icbon chiacpadquiec tabadec. <sup>11</sup> Nëid chido nec. Nëid utsi dada nec, quenubi nashunanquid abi daēdi nec. <sup>12</sup> Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. <sup>13</sup> ¿Nuquin Papa chuinuec Ębi chuiquid nibēdeque. Matasadnu quiash chido bēdamboda icpadic? <sup>14</sup> Chido isadacpadec isadnu quec icsambo dada ictsias. <sup>15</sup> Chido isadacpadec dada icsho isash, Chido nec, quetsias. Dada isadacpadec chido isadenquo iquec. <sup>16</sup> Ęm̄bi chuiboed tantiash, Icsamboen chiosh, quetsias. Adquid naden chuinu. Tantia. ¿Ęmbentsēquidambi aden chie? Padenquo. Ębipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabedec.



*Nuquin Icbo unēsash uincuenaid tantiaded-tantiadedta quiaid*

<sup>17</sup> Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquio yec mibi iccuededec. <sup>18</sup> Abentsēc yacbimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. <sup>19</sup> Nēidtedi ěmbi bēdamboen isaido nec. Utsitedi ěmbi icsamboen isaido nec, quiash cuēshēdacbimboec mibi tabadcuededec. ĴAdec tabadshoda Nuquin Papan mibi bēdamboen ispec? Padenquio. <sup>20</sup> Adec tabadquin Esuquidistu unēste tantienquiocquin utsin-utsinquien peshun acted-actedec. <sup>21</sup> Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquio yec tabadec. <sup>22</sup> ĴMin nuntan pete nibēdpecta iquec? Mitsana iquec. Adec mitsana min shubuno icnuc ĴEsuquidistu unēste tantiec utsibobēd iccuedednu, quenquiocquina mibia choshon pebededpe? ĴNatiamianquiec pete nibēdchitec pete nibēdquid camenuenda mimbria pebedede? Aden pebededquido Ĵatotsimbi chuipe? ĴBēdamboen mimbi nabanec quepectabi ique? Padenquio. Aden naquin Esuquidistu unēsaid tantienquiocquin mimbi pec.

<sup>23</sup> Nuquin Icbon chiacpadomboen mibitedi chuibanondambique. Tantiata. Chuinu. Nēid inchēshēmbi ěbi chieshēnquido ěbēd icquidēn ěbi bedmendac, quequin Esuquidistun abi unēste tantiaquin nadopanēdash. Pete bedshun <sup>24</sup> Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiash ěbided cuidadec unēste tantiaquin pebededta,” quepanēdash Esuquidistu. <sup>25</sup> Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ěbi chian anēdēnquiacno nēsecatequid icsho mēnchictequid Esuquidistu iquec, quequin tantiaquin sicaid acbededta. Sicaid acquin ěbi mēnchictequid iquec quequin tantiaquin acban.” <sup>26</sup> Aden Esuquidistun ismenēdacpadomboen pete cuēshēmpi pebededshumbic sicaid acbededta. Nuquin Icbo unēsaid tantiaded-tantiadedquin aid padpidec choabicnuc adobanta. <sup>27</sup> Abi unēste tantienquiocquin pete cuēshun peshun acquin Esuquidistun chiaid niacquid nec. <sup>28</sup> ĴPete cuēshēmpi penun Esuquidistubēd tabadacpadquiectabi tabadpe? quequin mibi utsibēd tabadte tantiata. <sup>29</sup> Esuquidistu unēsaid tantienquiocquin peshun acquid Nuquin Papan cuidendac. <sup>30</sup> Aden adquidon peshun acac utsi-utsiec padishec; utsi-utiec daicsambo yanec; utsi dadpen ěnden unēsac. <sup>31</sup> ĴAdabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unēsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. <sup>32</sup> Adesa icsho Nuquin Papan natiaic camiaid mibi iquendac. Abi tantiesabēdta chian anēdēnquequid nēsecadenquio mibi icmenuen Nuquin Papan mibi natiaic camec ma ěmbi chiacpadomboen nabamenuequin. <sup>33</sup> Adembidi Esuquidistu unēsaid tantianuec iccuededquin utsibo choabi iquec quequin aido cainta. <sup>34</sup> Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ěmbi chuiboed daēd uain chiendambi.

**12***Nuquin Papan Mayanēn tantiamiaid*

<sup>1</sup> Nuquin Papan Mayanēn tantiametequid chuinu. Tantiata. <sup>2</sup> Ęnden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesēn ismec, Nēid papa cain cuēnaid nec, qesho tantiaquido mibitedi iccondac. <sup>3</sup> Adquid iccondaidi Esuquidistu tantiaquid mibi yanacsho naden chiambique. Tantia. Nuquin Papan Mayanēn tantiamiaido: Esus Nuquin Icbopenquio, Nuquin Papan Chomiacmaid

nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icbo nec, quetiapimbo icoaic.

<sup>4</sup> Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec. <sup>5</sup> Adecbidi, utsi nashunquido Esuquidistu tantiaquido icnubi utsi nashunquidon Icbo abentsëcquiobi Esuquidistu nec. <sup>6</sup> Adecbidi, nadatiambocquin nabanquid utsi-utsiec icnubi Nadatiambocquin nami-anequid abentsëcquiobi Nuquin Papa iquec.

<sup>7</sup> Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. <sup>8</sup> Nuquin Papan Mayanën tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. <sup>9</sup> Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bédamequid utsi-utsiec iquec. <sup>10</sup> Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquio utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. <sup>11</sup> Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamec.

### *Dada abentsëc yacpadquieq Esuquidistu tantiaquidtedi iquec*

<sup>12</sup> Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. <sup>13</sup> Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

<sup>14</sup> Matsesën dada abentsëqui icnubi uidënaid dadpen iquec. <sup>15</sup> ¿Mëdantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. <sup>16</sup> Adecbidi, ¿ëshëpadquidpenquio yec matsesën dada dëccuësquiacmaidta dëbiate icpec? Padenquio. Dëbiate dëccuësquequid iquec. <sup>17</sup> Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? <sup>18</sup> Nuquin Papan tantiampicpadquiequi matsesën dada uidënaid nec. <sup>19</sup> Dëccuësquequid abentsëc icnuc dada nec quetiapimbo iquec. <sup>20</sup> Uidënaid dadpembëd dëccuësquequid dadpen icnuc matsesën nami abentsëqui iquec.

<sup>21</sup> Matsesën dada ad icnuc, ¿Mëdante bédambo icnubi ëshë padenquio iquec, quepecta mibi ique? Padenquio. <sup>22</sup> ¿Isadesa uidënaid uquëducquid nibëdnuc matsesën dada bédamboda icpatsiash? <sup>23</sup> Uidënaid uquëducquid ismenquiocquin ompoaidquio utsi nec. <sup>24</sup> Nami isaidquio ompodesa nec. Nuquin Papan tantiampicpadquiequi ompoaid nibëdnuc matses cuëdenquio yec unësec. <sup>25</sup> Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bédambo yec nashunanquid aidtedi nec. <sup>26</sup> Abentsëc paëmbo iquec matsesën dada bédambo iquenquio iquec. Adquidtedi bédambo iquec matsesën dada abichobi paëpenquio iquec. Adecbidi, Esuquidistu tantiaquido abentsëc yacbimboec iquec abentsëc icsacsho isash abitedi unësqüo iquec. Abentsëc, Bédambo iquebi, quenuc aidbëd abitedi bédambo iquec.

<sup>27</sup> Adquidtedi matsesën dada abentsëc yacpadquieç Esuquidistu tantiaquidtedi aidën dada abentsëc yacximboecquid nuqui nec. Abi tabadtequid iquec. <sup>28</sup> Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icscho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yacximboec nuqui tabadec. <sup>29</sup> ¿Esuquidistu tantiaquidtedida ambi ëbi chuibeneta caid icpadic? Padenquio. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquio. ¿Esuquidistu tantiaquidtedida, Nadec tabad, quequin ismequid icpadic? Padenquio. <sup>30</sup> Adecbidi, ¿Esuquidistu tantiaquidtedida bëdamequid icpadic? Padenquio. ¿Esuquidistu tantiaquidtedida abi onquiacmaidën onquequid icpadic? Padenquio. ¿Utsi onquiacmaidën onquesho tantiaquidën tantienquiocsho isun aidon onqueten onquequin chuibanquidtedida icpadic? Padenquio. <sup>31</sup> Nuquin Papan Mayanën tantiamete utsi-utsieç icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuquin ëmbi abia chuibambocpadquid icte bunquiota.

### *Utsi tantiaquidquio*

Ëmbi chuiboedtedi Esuquidistu tantiaquido Nuquin Papan Mayanën tantiamete bëdambo iquec. Padnuen ambi tantiamequin bëdamboshë icmetequid iqueque. Aid tantiauidquidba chuiboshombic aid tantiaquidquio chuinu. Tantiata.

## 13

<sup>1</sup> Matses utsi-utsieçquid onquiacpadquieç anquiadquid, adecbidi Nuquin Papan abi yacnoshon uaid, mayan bëda onquiacpadquieç onquequid icquimbi utsi tantiesa icquin chuibansho abipenquio chuisho utsibon tantiendac. <sup>2</sup> Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquio nec, quequin tantiaquin, Mananuc macuësh dapa icboedi acte nantan nënitsinoa, Papa, cacpadomboen nënitsinoac nidquid isquid icquimbi utsi tantiesa icsho, Bëdambocquid mibi nec, Nuquin Papan catiapimbo iquec. <sup>3</sup> Utsibic, aton na nibëdsho menequidquio niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bëdamboen mimbi naoc, Nuquin Papan catiapimbo iquec. <sup>4</sup> Padnuen Nuquin Papan Mayanën bëdamboshë ictequid tantiamiaid nadquio iqueque. Chuinu. Tantia. Utsi tantiaquidquio utsi tantiamequionuec chushcanesa nec. Utsi tantiaquidquio nashundenquid nec. Utsi tantiaquidquio utsin na isash adquidquio con na bëpashun quesa nec. Utsi tantiaquidquio dëniacanquidquio yec dëniacanquidquio nebi abibi quesa nec. Utsi tantiaquidquio ëbentsëqui tantiaquidquio nebi quiachimboen nabanesa nec. <sup>5</sup> Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëmbentsëqui tantiacpadomboenuidi utsitedishun nabantiad, quesa nec. Utsi tantiaquidquio badedquio nëshesa nec. Utsi tantiaquidquio abi icsamboen nasho cuidesa nec. <sup>6</sup> Utsi tantiaquidquio utsi icsambocsho isash, Unësquio iquebi, quec tsadquid nec. Adecbidi, utsi bëdambocsho isash, Bëdambo iquebi quec tsadquid neoaic. <sup>7</sup> Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibëdsho isash ampiash badedquio quenquio yec ¿mitsimboembi nampoba? quec onquequid nec. Utsi tantiaquidënquio utsi icsadenesho isun, Tantiamiac Nuquin Papan chiacpadomboen natsiash, quequin chuibanendac. Aden chuishun bëdamboen nasho isnuen cainquid nec. Mëyanaquí chieshenquio yec dayacquio yec tabadtenequid utsi tantiaquidquio nec.

<sup>8</sup> Utsi bēdamboen tantiaid ēnēdtiapimboctequid nec. Nuquin Papan chiaid chuibant-saidien ēnēdendac. Adecbidi, matses onquiaidtedi ēnēdendac. Adecbidi Nuquin Papan ambi uaidtedi ēmiac matsesēn isquin tantiaid ēnēdoaic. <sup>9</sup> Nabanaidtedi tantiabenabictsēcquidquio nuqui nec. Adecbidi Nuquin Papan chiampidtedi tantiabenabictsēcquidquio nuqui neoaic. <sup>10</sup> Nidaidēn tabadquin aidtedi tantiabenabictsēcquidquio nuqui icboedi Nuquin Papa yacno puduedash abitedi tantiaquidquio nuqui iquendac. <sup>11</sup> Bacuē yec bacuēmpi onquiacpadec onquepadenebi. Adembidi, bacuēmpin tantiabenabi yacpaden antiapadenembi. Adquid icquin caniaidēn antiacpadpenquiocquin antiapadenembi. Adquid icboedi caniaish bacuēmpin antiacpadpenquiocquin tantiabenondambi. <sup>12</sup> Nēbi isnanten bēisadquin Nuquin Papabimboecquid nuqui isec. Yucshun abi yacno puduedshun aidquiobi Edoen Nuquin Papa nuqui bēistuidendac. Nēbi Nuquin Papa isenquiocquimbi ambi chiaid tantiatsembi. Ambi antiacpaden yucshun bēisquin nuqui tantiabenendac aid.

<sup>13</sup> Nidaid ēnēdnuc nēidtedi ēnēdtemaid iqueque. Chuinu. Tantia. Ambi chiacpaden nabanquidquio Nuquin Papa nec, quequin tantiaid ēnēdtemaid nec. Adecbidi Nuquin Papa yacnoēsh abipadquid bēdambocquidquio iquendabi, quequin cainquin tantiaid ēnēdtemaidquio nendac. Adecbidi, utsi tantiaid ēnēdtemaidquio neoaindac. Aidtedi ēnēdtemaid icnuc nidaidēn tabadquin, Utsi tantiembi, quequin ismiac utsi dadpen Esuquidistu tantiaquid yanash mibēdi Nuquin Papa yacno tabadendac. Adquid bēdamboshēcquid nec.

## 14

### *Mimbi chiaid chuibanquid ēbi icme, Papa, quaid*

<sup>1</sup> Utsi tantiaquid icta. Nuquin Papan Mayanēn adquid icmioshi, quequin ambi tantiamete utsi bunquiebique. Adec bunsho mimbi chiaid comapenen bēdamboen chuibanquid ēbi icme, Papa, quequin chuiban. <sup>2</sup> Aden tantiamiac tantiamenu queshun tantianuequidēn onqueten chuiban. Aton onqueten onquenquiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidēn icquid onquiacmaidēnquio Nuquin Papan Mayanēn tantiamiacpadec onquequin Nuquin Papa chiec onqueta. <sup>3</sup> Ma Esuquidistu utsibon tantiabenu, queshun Nuquin Papan chiaid chuibanec. Adembidi matses ma bēdamboec tabadnu queshun chuibanec. <sup>4</sup> Nuquin Papan Mayanēn tantiamiac nidaidēn icquid onquiacmaidēn onquequin onquequiduidtsēqui tantiabenquid yanec. Padnuen Nuquin Papan chiaid Nuquin Papan Mayanēn tantiamiac Esuquidistu tantiaquido ma Nuquin Papan chiaid tantiabenu queshun chuibanec. <sup>5</sup> Nuquin Papan Mayanēn tantiamiac nidaidēn icquid onquiacmaidēn Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidēn icquid onquiacmaidēn chuibanac tantianuequidēn tantienquio iquendac. Aden tantienquiocsho isun abi daēdi onquiaid tantiaquin chuibanquid nibēdnuc nidaidēn icquid onquiacmaidēn chuibanenda caimbi.

<sup>6</sup> Adembidi chuinu. Utsibon tantia. ¿Mibi yacno choash puduedshun nidaidēn icquid onquiacpadec onquenquiocquin ēmbi chuibansho tantienquio yec, Bēdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ēmbi chuibansho mimbi tantiampec. Min onqueten chuibanenquio yec ēbibi onquiacbimboecsho mimbi tantienquio ictsiandac. <sup>7</sup> Shoncatempi abibi shoncadtiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuēdēmesan tentencate cuēdēmesho tantiash, Adomboen cuēdēmenquio iccosh, quec. <sup>8</sup> Adembidi, utsibo yacno ma cuesnanu queshun chomenuequin sondadon tantiabocpadpenquiocnoc shoncac choenquio iquec. <sup>9</sup> Adecbidi, utsi onquiacmaidēn



onquequin chuisho ¿mitsipaden tantiapatsiash? Utsibon tantienquo iquec. Aden chuibanec nibëdacno onquiacbimboec onquepec. <sup>10</sup> Onquete utsi-utsiec dadpen iquec. Aton onqueten onquequin chuibansho matsesën tantiec. <sup>11</sup> Utsin onqueten chiac tantiatiapimbo yec, Onquequin chuibanquid con matsespenquo nec, quequin tantiec. <sup>12</sup> Ad icnuc, Nuquin Papan Mayanën ëbi tantiemepec, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquo ëbi icme, Papa, quequin Nuquin Papa chuita.

<sup>13</sup> Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquo ëmbi chuiboed chuioaquid icme, Papa, ma tantiapanu, quequin Nuquin Papa chuita. <sup>14</sup> Nuquin Papa chiec ëbi onquiacmaidën onquesho utsibon tantienquo iquendac. <sup>15</sup> Aden abi onquiacmaidën onquequin utsibon tantienquo icsho ¿mitsipadentsimbi tantiemepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidën Nuquin Papan naid chiec cuëdënnashic tantiamenuc iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquo iquembi. Adecbidi abi onquiacmaidën cuëdënenquo iquebi. <sup>16</sup> Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. <sup>17</sup> Abi onquiacmaidën onquequin Nuquin Papan naboed chuibanac Esuquidistu tantiadonequidquo mibëd iccuededquido yantiapimbo iquec.

<sup>18</sup> Èbibi utsin-utsinquiec onqueten onquequidquo icnubi mibitedi adesa nec. Padnueni adec onquec bëdambo iquec, Papa, quequin chuided-chuidedembi. <sup>19</sup> Padnuen chuinec Esuquidistu tantiaquido iccuededacno puduedash ma tantianu quiash aton onquete daëdpactsëc tantiash anquiadquid icquin aitedictsëqui chiendambi aido onquiacmaidën onquenquiocquimbi.

<sup>20</sup> Adembidi chuinu. Utsibon tantia. Bacuëbo tantiabenabictsëcquid yacpadquiec icsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. <sup>21</sup> Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquo icoaposh,” quequin Nuquin Papan dada uamiampid nec.

<sup>22</sup> Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. <sup>23</sup> Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuededsho tantiash, Aidon tantiate icsabudpash, quepec. <sup>24</sup> Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. <sup>25</sup> Nëbi ëbi bëdambo icmequid Esuquidistu tantiate bunebi, qeshun abi icsaid ambi chienquiochoed Nuquin Papa chiashic, Nëmbo iccuededquidobëd mibi iquec, Papa, quequin chuibanpec Esuquidistu tantiaquid yanshun.

*Abentsëcshun-abentsëcshunquien chuiban, quequin chiaid*

<sup>26</sup> Adembidi chuinu. Adembi tantiata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiemequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënquo onquequin chuinu, utsi quenubien; mibi onquiacmaidën chuisho tantiombique. Min

onqueten chuinu, utsi quetsiash. <sup>27</sup> Aided, Chuinu, qesho ¿mitsicquid chuita nuqui cape? qeshun naden chiac bēdambo ictsiash. Chuinu. Tantia. Mibi onquiacmaidēn onquequin chuinuequid daēd icnuc bēdambo ictsiash. Abentsēc chotsēc nuc adecbidi bēdambo ictsiash. Aided icquin abentsēcshun-abentsēcshunquien onquequin chuiban, cata. Aden abentsēcshun onquequin chuisho abi onquiaid tantiaquidēn iccuededquidon onqueten chuibanta, cata. <sup>28</sup> Padnuen abi onquiaid tantiaquin chuibanuequid nibēdnuc, Tsadquin Nuquin Papauidi otacquiocquin chuita, cata.

<sup>29</sup> Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daēd icnuc bēdambo ictsiash. Abentsēc chotsēc nuc adecbidi bēdambo ictsiash. Aided icquin abentsēcshun chuibanubi, ¿Nuquin Papan Mayanēn tantiamiacpadomboenda chuibanegue? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. <sup>30</sup> Abentsēcshun chuibanubi Nuquin Papan Mayanēn tantiamiac utsi: Ēmbitsen chuibanu, qesho tantiashun ma aidēn chuibanu quiash ambia chuibanquid ēnēd. <sup>31</sup> Adquidēn iccuededquidtedi tantiamenuequin abentsēcshun-abentsēcshunquien chuibanta. Aden chuibansho tantiash ma chieshenquo yec bēdambo icpanu. <sup>32</sup> Nuquin Papan Mayanēn tantiamiaid utsibēd bēdamboec tabadquid nec. <sup>33</sup> Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

<sup>34</sup> Esuquidistu tantiaquido iccuededacno otacquo tabadquid chido. Chuibanacnoēsh onquenu, quenda chido. Nuquin Papan chiapadec ēbi chuiquid dada nec, quec chido. <sup>35</sup> Anoshon chiaid tantienquo yec tsadquin cainec shubuno nidash, Tantienquo iccombique. Nuqui tantiaboed ēbi chui, qesho tantiashun chiec aton bēnēn. Tantienquiocquin cainenquo iquec chido icsambo iquec. <sup>36</sup> ¿Mimbia Nuquin Papan chiaid chuibanquidoda ne? Padenquo. ¿Chuibanac Esuquidistu tantiaquido mibitedictsēquida yanondac? Padenquo. <sup>37</sup> Nuquin Papan chiaid chuibanquidquo nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. <sup>38</sup> Aden mimbi tantianubi, Pabadon dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

<sup>39</sup> Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidēn onquequin chuinesho, Ai, cata. <sup>40</sup> Adecbidi, Nuquin Papan Mayanēn tantiamiac chuibanuequid dadpen icnuc utsibo bēdamboen tantiamenuequin abentsēcshun-abentsēcshunquien chuibanta.

## 15

### *Esuquidistu uincuenaid*

<sup>1</sup> Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unēsaid ēmbi chuibansho tantiash, Ai, abimbo iquec. Aid tantiemi, mibi quiampondac. Aden tantiadonec chieshenquo yec mibitedi tabadec. <sup>2</sup> Aden, Aid tantiabenu, qesho Nuquin Papan mibitedi bēdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bēdambo icmabanacmaid nec. Adecbidi, ambi yuednu cacmaidquo adquid nec.

<sup>3</sup> Utsin ēbi tantiamiacpaden mibi chuibanondambi. Adembidi chuinu. Tantia. Nuquin Papan chiapadomboen matses icsaquid icsho cuidnushe quiash abided cuidadec Esuquidistu unēsapanēdash. <sup>4</sup> Unēsacsho shēcuē nacnenaidēn nauedshun

bētashacsho daēdec ushtanquin ambi chiampicpaden Nuquin Papan uincuen uapanēdash. <sup>5</sup> Aden uincuemiach choquin, Uincuenobi, quequin Petedo Esuquidistun ismepanēdash. Adshumbic adembidi abēd 12ted icquido ismeoapanēdash. <sup>6</sup> Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacsho isquido dadpen abi tabadnubi utsi-utsiec padenquo iquec. <sup>7</sup> Aden aitedi ismeshumbic aton utsi Santiacotsen Esuquidistun ismeoapanēdash. Adshumbic, ambi ēbi chuibeneta caidtedi ismeoapanēdash. <sup>8</sup> Aden aido ismequin nainshun yuecshun ēbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. <sup>9</sup> Abi tantiaquid mēyanquin cuesunemequidquo ichoedi abi tantiaquid yanacsho Esuquidistun, Ēbi chuibeneta, cainquioctiadquidēmbi adquid icta caid nebi. <sup>10</sup> Esuquidistu tantiaquid yansho isun ēbi chieshaid cuidenquo yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpen-shun Esuquidistu tantianu quequin chuibenembi utsibon aden chuibenenquiocnobi. ¿Ēmbentsēquidambi chuibenedio? Aton Mayan Nuquin Papan meniac aibēd icquin chuibeniombi. <sup>11</sup> Adembidi, ēbi yacpadquidon Esuquidistu chuibanac utsitsen abi tantiaquido yampondash.

### *Matses unēsash uincuenaid*

<sup>12</sup> Adec Esuquidistu unēsash uincuenondash, quequin chuinubi ¿mitsipaden tantiec uincuenta nibēdec quec utsi-utsiec onquepec? <sup>13</sup> Uincuenta nibēdnuc Esuquidistu uincuenenquo ictsempanēdash. <sup>14</sup> Esuquidistu uincuentequid icmiamboconoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. <sup>15</sup> Nuquin Papan naid chuibanquidtedi muaquidquo icoatsiandac. Aden tantienquiocquin ēbi yacpadquidon chuibanendac. Unēsash uincuentequid nibēdnuc ēbitedishun Nuquin Papan Esuquidistu uincuen uapanēdash quequin chiaid abipenquo ictsiandac. Unēsash uincuenta nibēdnuc Nuquin Papan uincuemaid nibēdtsiandac. <sup>16</sup> Unēsash uincuenta nibēdnuc Esuquidistu uincuentiapimbo ictsempanēdash. <sup>17</sup> Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquo mimbi ictsiandac. Matses icsaquid icsho cuidnushe quiash cuidadquid nibēdtsiandac. <sup>18</sup> Aid uincuenamboconoc abia tantiaquido tsusedpabo Nuquin Papa yacno puduedtiapimbo ictsempanēdash. <sup>19</sup> Nidaidēnuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquo ictsiandac.

<sup>20</sup> Ēmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemaid abi yacno puduedmequin ambi uincuemetequid dadpen iquendac, quequin chiaid abimbo iquec. <sup>21</sup> Unēstequid bēyuc dada yanampicpadec matsestedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquibidi iquendac. <sup>22</sup> Bēyuc dada Adan caidēn tsyuecquidtedi adecbidi unēstequido nec. Esuquidistun bēdambo icmiaid uincuentequido neoaic. <sup>23</sup> Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. <sup>24</sup> Aden bedoanquin abi tantiaquidtedi bēyucanec choquin Nuquin Papa Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimbocnoc. Aido ambi nebudachimboecquido iquendac. <sup>25</sup> Abi chieshēnquido utsitedibēd chuiquid icquin abi chieshēntiapimbocquid aido Esuquidistun icmebanendac. <sup>26</sup> Adoshombic ēnquimbi unēstequid nibēdquidquo Esuquidistun icmeoaindac. <sup>27</sup> Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec. <sup>28</sup> Aden Esuquidistun namiaidombo abitedi icmeshumbic

aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac.

<sup>29</sup> Unësash uincuentequid nibëdnuc, ¿atotsieshun, Ënden unësaid uincuenendac, quequin tantiambi quequin utsibon acten ambibi mentomepec? <sup>30</sup> Adecbidi unësash uincuentequid nibëdnuc ëbi unës uate utsibo comapenec buncuededsho isun ¿atotsieshun, Uincuentequid iquec, quequin ëbi yacpadquidon chuibampec? <sup>31</sup> Unësash uincuentequid iquec, quequin tantiambi. Aden tantiaquin Esuquidistu, Nuquin Icbo, ëmbi chuibanac Esuquidistu tantiaquido mibitedi yampondac, quequin tantiambi. Aden tantiaquin unësmane quenquiocquin Esuquidistu unësash uinciente iquec, quequin chuibenec nebi. Aden badiadquidën-badiadquidënnquien chuibanubi ëbi unës uate utsibo bunec. <sup>32</sup> Uincuentequid nibëdnuc, ¿atotsi quenequini Epeso yacnoshon, Uinciente iquec, quequin chuibansho mëyanaqui chieshenquo yec dayacquio tsadpe? quetsiabi. Adecbidi uinciente nibëdnuc: “Unësash nibëdquiec iquebi, quequin nua peshun aque-mbi,” quetsiabi. <sup>33</sup> Aden tantienquo iquemi. Adembidi tantienda. “Uinciente nibëdec quequidbëd capuenda aidën tantiacpadec icmane quiash.” <sup>34</sup> Adquidpadquid icquin mimbi icsamboen tantiaid ënquin Nuquin Papan chiaidquo tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquo nec, quequin tantiesa nec. ¿Adquid mibëdi icnuc Nuquin Papan bëdambo icmiaido mibitedida icpe? Padenquo.

### *Uincuemequin dada chuca meniaid*

<sup>35</sup> ¿Mitsipadec unësaid uincuempec? utsi quepec. Adecbidi, ¿mitsipadquid uincuentequidën dada icpec? utsi queopec. <sup>36</sup> Adquidën icsamboen tantieque. Chuinu. Tanta. Mimbi tiedën chococaid tauibëd ëshë chococatequid napi dëyuctequidpadpenquo iquec. <sup>37</sup> Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. <sup>38</sup> Nuquin Papan tantiampicpadec aton dada yanec. <sup>39</sup> Abipadquidpenquo ambi uaidtedi iquec. Abipadquidquo matsestedi iquec. Abipadquidquo nidaidën capuquidtedi iquec. Abipadquidquo podochoquidtedi icoaic. Abipadquidquo acten icquidtedi icoaic. <sup>40</sup> Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec. <sup>41</sup> Badiadën ushë comapenquiec chënquenubi inchëshën ushë daebudquo chënquiec. Aid daëdi nua isadnubi uispa pistsëc isadoaic. Uispa utsi-utsiec iquec. Abi bedquiec chënquetequid utsi-utsiecbidi iquec.

<sup>42</sup> Aidtedi ënëdendac. Adecbidi tishac matses unësacsho chococac nami chodquiec. Adec nami chodquian Nuquin Papan tantiacpadec uincuentequidën dada chuca chodquesa nendac. <sup>43</sup> Tishac icsaquid matses iquec. Adsho uincuemequin ambi icsaisa icmiaid nendac. Nidaidënsnun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac. <sup>44</sup> Nidaidënsnun tishac daicsambo yanash unësacsho uincuemequin dada chuca icmetequid nendac. Nidaidënsnun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidënsnun tishac matsesën tantiacpadquid icboedi abuc buanac anocquidën tantiacpadquid iquendac. <sup>45</sup> Adembidi Nuquin Papan chuiquin dada uamiampid nad iquec: “Bëyuc matses Adan caid nacnenshun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. <sup>46</sup> Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. <sup>47</sup> Bëyuc matses uanu, queshun nidaid putu bedshun nacnenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. <sup>48</sup> Nidaid putu bedshun bëyuc matses nacnenshun nidaidën tabadquid icnepampic.



Adquiecbidi abipadquid matsestedu yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. <sup>49</sup> Adecbidi bëyuc matses isadac bimboecquid nidaidën tabadquidtedi nec. Nuquin Papan abucshun chomiaid isadac bimboecquid abëd icquido iquendac.

<sup>50</sup> Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

<sup>51</sup> Nuquin Papan chienquiocpampid chuinu. Tantia. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. <sup>52</sup> Ambi namiaidën abucshun shoncanubi ëshë badedquio bëbedquiac bimboecnuc badedquio unësesambo Nuquin Papan abi tantiaquido icmendac. <sup>53</sup> Chodquetequid icboedi chodquesa yanendac. Unëstequid icboedi unësesa yanendac. <sup>54</sup> “Adquid icmiac unëstequid nibëdquidendac.

<sup>55</sup> Ad icnuc ¿mitsishunquio unëstequid istuidpec? Adembidi, ¿mitsishunquio unësmetequid istuidpec?”

<sup>56</sup> Icsaquid unëstequid nec. Nuquin Papan nadomboen nata quequin chiaid niacquid icash unëstequid matses yanac. <sup>57</sup> Adquid nuqui icsho isun Nuquin Papan Nuquin Icbo Esuquidistu chomeshun nuqui cuidenquiocquin aidi icsaisa cuidquin nuqui bëdambo icmebanec. Adoac abi yacnoësh icsaisa unësesambo nuqui iquendac. Aden Nuquin Papan naindac, quequin, Bëdambocquid mibi nec, Papa, quequin nuqui chuidedchuidedendac.

<sup>58</sup> Adembidi chuinu. Tantiata. Adenuidi tantiaquin utsi uaqin utsin chuisho tantienquio yec tabad. Adec tabadquin Nuquin Papan chiapadomboen naban Esuquidistupadquid Nuquin Papan ëbi icmendac, quequin tantiaquin.

## 16

### *Utsibo menenun piucquid bedbanaid*

<sup>1</sup> Nuquin Papan bëdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuedeta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbitsen nabanta. Naden Cadasia yacnocquido chiombi. <sup>2</sup> Abentsëcshun-abentsëcshunquien mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquio mibitedi iquendac. <sup>3</sup> Èbi choshombic utsibo bëdamboen tantiaquin piucquid dayun uaidtedi mimbi menenun buantan caido isun, Èmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsibo ismetuidpec. <sup>4</sup> Adecbidi ambo nidtiadquio iquebi, ëbi quenuc mimbi menenun buantan caido ëbëdi nidendac.

### *Utsi-utsien chuibanaid*

<sup>5</sup> Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi. <sup>6</sup> Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, qesho, adabi utsi yacno mimbi nidmepatsia? <sup>7</sup> Nëbi mibëdi yuec tabadtiapimbo iquebi, quiash mibi yacno nidenquio iquebi. Yuecash mibëdi yuec tabadnuec mibi yacno nidebi. Nuquin Papa bunuc adendabi. <sup>8</sup> Nëbi padenquio iquebi. Epeso yacnocquidobëd iquebi. Nuquin Papan abipadquid aton Mayan matses meniaid ushë tantiate choan nëuëshquio nidebi. <sup>9</sup> Nëmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiauidash utsibo ëbi chieshënquido nëmbo iquec.

<sup>10</sup> Mibi yacno ëbi nidenquio icnubi Timoteyo mibi yacno nideque. Aid bëdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. <sup>11</sup> Nuquin Papan namiaidquiobidi Timoteyo icsho, Èbëd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unësquio iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

<sup>12</sup> Nëbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobëdtan istanta, quequin Apodos comapenen chiombi. Adoac, Nëbi Codinto yacno nidte bunenquio iquebi, quiosh aid. Yuecash Codinto yacno nidec bëdambo ictsiash, quiaish yuecash aidi mibi yacno nidendac.

<sup>13</sup> Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatiquid icnuc chieshtoenquio yec dayacquio yec tabadteneta. <sup>14</sup> Adec tabadquin utsi bëdamboen tantiaquin nabanta.

<sup>15</sup> Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. <sup>16</sup> Aidon namiaido icta. Adembidi, comapenen nashumbanquidtedishun namiaido icta. <sup>17</sup> Codinto yacno Esuquidistu tantiec iccuededquidtedi ëbëdi ictiapimbocnobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi.

<sup>18</sup> Mibitedi chuibanquin aidon unësquiocquidi bëdambo icmioshi. Mibi yacno padpidec nidash puduedshun chuibanquin adembidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

### *Esuquidistu tantiaquidon mibitedi tantiaquin chuibanaid*

<sup>19</sup> Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisidabëdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. <sup>20</sup> Aden utsibon chiaid chuishumbic, Esuquidistu tantiaquid utsibotedibëd bëdamboec tabadta, caimbi.

<sup>21</sup> Èmbi chuibanac ëmbi chiaid utsin dada uashumboed nec. Nëshun bedanquin dënainquin dada uaimbique. Tantia.

<sup>22</sup> Nuquin Icho tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

<sup>23</sup> Èbi icsaquid icsho cuidenquiocquin Nuquin Icho Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

<sup>24</sup> Esuquidistun shubun icquido nuquibi icsho ëmbi bëdamboen isaido mibitedi nec. Padi aïdted dada uaombique. Isec onquecuededta.

## CODINTO YACNOCQUIDON ISTE 2

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ęmbi dada uaid mibitedishun isbanshun utsibo meneta ma isnueshun.

<sup>2</sup> Matses icsaquid icsho cuidnushe quiash abided ciudadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

### *Bědambo icmianquidquio Nuquin Papa*

<sup>3</sup> Nuquin Papa nad iqueque. Tantia. Chuinu. Ębi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. <sup>4</sup> Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. <sup>5</sup> Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. <sup>6</sup> Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta. <sup>7</sup> Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ębi měyanacpaden mibi měnyansho isun Nuquin Papan bědambo icmiaid mibi iquendac.

<sup>8</sup> Nidaid Asia caid yacnoshon ěbi natameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi. <sup>9</sup> Uněs uatiad, utsibo qesho tantiash, Ębibi měnchiquidtiapimbocquimbi matses uněsacsho uincumequiděn ěbi měnchictsiash, quequin tantiec tsadobi. <sup>10</sup> Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. <sup>11</sup> Ębi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiashun mimbi Pabado měnchiccoc. Mibi bědambocquid nec, Papa, quequin ma dadpenshun ambi naid chuipanuna.

### *Něbi mibi yacno nidenquio iquebi, quiaid*

<sup>12</sup> Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquio yec tabadobi. <sup>13</sup> Ma tantiamenueshun abimbo chuiquin mibi dada uashunec nebi. Ęmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. <sup>14</sup> Ęběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin utsibon chuisho tantiash bědambo iquebi. Esuquidistu choanuc adquiequi Codinto yacnocquido tabadpashun, quec tsadebi.

<sup>15</sup> Aden ěbi bědamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bědambo iquebi, quepashun, caimbi mibi. <sup>16</sup> Mibi isbidanec nidaid Masedonia caid yacno nidashic padpiden mibi isbětsenec choaibi. Aden isbětsenembi, qesho tantiashun nidaid Udeya caid yacno mimbi ěbi

nidmetsiac, quequin mibi chiombi. <sup>17</sup> ¿Uquëducshun, Nidenquo iquebi, quequin muaquindambi chuidio? Adenquiocquin chiombi.

<sup>18</sup> Ambi chiacpadomboen nabanquidquo Nuquin Papa nec. Aid chuinu. Tanta. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. <sup>19</sup> Ambi chiacpadomboen nabanquidquo Nuquin Papan Madombo, ëmbi chuibenaid, Esuquidistu nec. Aidi Sidasën chuibenaidbidi nec. Aidi Timoteyon chuibenaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec. <sup>20</sup> Con Madon naden naindac, quequin Nuquin Papan chiacpadomboen Esuquidistun ënden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ëbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. <sup>21</sup> Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. <sup>22</sup> Adembidi aton bacuë icmiaid nuqui nec. Adembidi aton Mayan Nuquin Papan meniaid nuqui nec. Èbëd tabadquid aido nendac, quequin tantiamenuen Nuquin Papan aton Mayan meniac ma aidëmbi nuqui bëdambo icmepanueshun.

<sup>23</sup> Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquo iccobi. <sup>24</sup> Èmbi Esuquidistu chuibanac abi tantiaquid dadpen iquec. Aidon icbopenquo nebi. Aidon icbopenquiobidi Esuquidistu chuibanquid utsibo nec. Esuquidistu tantiec bëdambo iquebi ma quenu, quequin chuibenequidquo nebi. Esuquidistu tantiaquid nebi, abimbo quequin aid tantesa uainquo mimbi iquendac.

## 2

<sup>1</sup> Aden tantiaquin comapenen chuiquin unësquo icmenushe quec mibi yacno nidenquo iquebi caombi. <sup>2</sup> Mibi unësquo ëmbi icmiac ¿tsuntsin ëbi bëdambo icmepatsiash? ¿Èmbi icsambo icmeboedënda ëbi bëdambo icmepadic? Padenquo. <sup>3</sup> Aden tantiaquin mimbi iste dada uaombi ma ëbi bëdambo icmequid unësquo icmetiapimbo iquebi, queshun. Bëdambo iquebi, quequin ëbi tantiec adquiobidi mibi icoatsiac, quequin tantiombi. <sup>4</sup> Unësquo yec shubiquimbi mibi dada uashun, Meneta, caondambi. Unësquo icmenu, quenquiocquin mibi comapenen tantiaquin dada uaondambi.

### *Abi icsaboed bëpiscudnueshun yued quiaid*

<sup>5</sup> Anocquidën ëbi unësquo icmedenequimbi adembidi comapenquiec unësquo mibi icmeoaosh. Aidi mibi chiondambi. <sup>6</sup> Aidi mibi dadpenshun cacumiac abi icsaid ënosh quec. <sup>7</sup> Adoacsho abi icsaid bëpiscudshun aidi yuedoquin bëdambo icme. Yuedenquo yac natiamianquiec unëstiadquo yantsiash. <sup>8</sup> Nuquibi iccuedednuna, quequin aid tantiaquin yued caimbi. <sup>9</sup> ¿Èmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. <sup>10</sup> Aden ëmbi dada uacpaden mimbi cacumiac abi icsaid ënsho isun abi icsaid nibëdabimboec bëpiscudshun yued. Adsho tantiashun adomboembidi naimbi. Aidbëdi abentsëc yabimboecquido yanosh, qesho tantiash abi icsaid bëpiscudebi Esuquidistun tantianubi. <sup>11</sup> Nuqui chieshënquidën Satanasën aidi icsamenushe queshun abi icsaid ëmboed yuedta. Yuedenda, Satanasën quequin tantiamiac onquesho tantienda.

### *Nuquin Papan con Mayan meniaid adquid ëbëdi tabadtequid nec, quiaid*

<sup>12</sup> Esuquidistu chuibanuec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash. <sup>13</sup> Adquid dadpen icnubi ëmbi con



utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

<sup>14</sup> Bëdambocquid mibi nec, Papa. Mimbi Esuquidistu tantiaquid ëbi yacpadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoec tabadquidon shëdec. Adembidi, Esuquidistu ëbi yacpadquidon chuibenesho uano-uanoec tabadquidon tantiec. <sup>15-16</sup> Esuquidistu chuibanac noadte bëdan danoshquiaid shëdabimboen utsibon tantiec. Adembidi, Esuquidistun ëbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquio yec abëd icquido aidtedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi <sup>17</sup> piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

### 3

<sup>1</sup> ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabadon chuibanosh, quequin dada uata, ëmbi cac mimbi dada uaidtambi buampe? Padenquio. <sup>2</sup> Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiabimboecnuc paucudtiapimboenoc Nuquin Icbon tantiamioshi. Adembidi icsamboec tabadboedi nëbi bëdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabedec utsibon. <sup>3</sup> ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Esuquidistu tantiasho isun unëstiapimboquid aton Mayan abipadquidquio mibitedi meniondash.

<sup>4</sup> Nuquin Papan tantiapadomboen Esuquidistun, Ëbi chuibeneta, cac chuibanac Esuquidistu tantiaquid mibitedi yanacsho tantiec ëmbi chuibanaido aidtedi nec, quequin tantiambi. <sup>5</sup> Ëmbibi tantiapaden chuibanesa nebi. Nuquin Papan tantiamiacpaden chuibanquid nebi, quequin tantiambi. <sup>6</sup> Ëmbibi Esuquidistu chuitiapimbo icsho Nuquin Papan Mayanën tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi natiapimbo yec aibdëdi matses tabadtiapimbo iquec. Aton Mayan meniaidbëd tabadtequid nec.

#### *Abi tantiaquido bëdambo icmetequid aton Mayan*

<sup>7</sup> Nuquin Papan nadomboen nata quequin chiaid cuënoten dada uacpaden nainquio yec matses abi yacno tabadtiapimbo iquec, quequin dada uampid meniac abi chënquiacpadeç Moisesën bëtantiate comapenec bëchomauanquieç chënqueboedi macuësh budec bëdiambo chënquesho isadaidbon bëstiapimbo icpampic. <sup>8</sup> Nëbi Esuquidistu tantiaquid bëdambo icmequid aton Mayan abipadquid meniaid ënëdenquiocquidquio nec. <sup>9</sup> Ëmbi nadomboen nata quequin chiaid niacquid ëbëdi tabadtiapimbo iquec, quequin dada uaid Nuquin Papan meniac buanshun Moisesën aton matses ënëdenquiocnoc tabadmetiapimbo icambien matses icsaid bedshunash icsaisa abided cuidadec unësash uincuenquidën abi tantiaquido ënëdtiapimboenoc tabadmendac. <sup>10</sup> Nëbi Esuquidistu unësaid tantiaquid ënëdtiapimboquid nec, quequin chiac ambi dada uaid meniapid ënëdabimboecquid nendac. <sup>11</sup> Ai, nadomboen nata quequin chiaid Moisesën bedshun

meniaid ënëdtequid icnubi bëdambo icmiantequid Nuquin Papan chomiaid icsaisa ënëdtiapimbo iquec.

<sup>12</sup> Aden tantiaquin, Esuquidistu nuqui tantiaid icsaisa yec ënëdtiapimbocquid nec, quequin chuibenequid nebi. <sup>13</sup> Moises Nuquin Papabëd onquec bëchomauanquiechoedi auëshquio nidec ushma-ushmactsëcquio yanash matses ismenquiocnuec bëpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. <sup>14</sup> Nuquin Papan dada uaid Moisesën bëaid tantiate bunesa abëd icquido icpampic. Adquibidi pamumëdabimboec isadaidbo abi tabadec. Nuquin Papan cuënoten dada uacpadquid isec onquec nëbi adquibidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. <sup>15</sup> Nadomboen nata quequin dada uaid Moises menepampid isec onquec pamumëdabimboecquid isadaidbo utsi-utsiec iquec. <sup>16</sup> Esuquidistu tantiaquid icsho Nuquin Papan Mayanën paucquin tantiamiaid nendac. <sup>17</sup> Nuquin Icbo icsaisa icquin ënden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. <sup>18</sup> Paucac, Ëbi icsaid bedshunash Esuquidistuded ciudadpanëdash, quequin nuqui tantiec. Aidënquiobi icsaisa icquin abipadquid nuqui meniac aton Mayanën adquid nuqui icmebanec.

## 4

### *Nuquin Papan nadatiambocquin nadenequin Esuquidistu chuibenemiaid*

<sup>1</sup> Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. <sup>2</sup> Icsash ompodquid icboedi nëbi muesa icquin Nuquin Papan chiaid utsi uainquio yec nuqui bëdamboec tabadec. Nuquin Papan isec, quec adequi nuqui tabadec. Adec tabadec ëbipadquid utsi yansho isash Nuquin Papan chiaid tantiate utsibo bunquiopec. <sup>3</sup> Esuquidistu chuibansho utsin-utsinquien bëdamboen tantiatiapimbo iquec. Adquid Nuquin Papabëd tabadtiapimbocquid nec. <sup>4</sup> Nuquin Papapadquid Esuquidistu tantiaquid icnushe qeshun icsamianuequidën Satanasën pamunacbimboen utsi-utsien tantiamenquio iquec. <sup>5</sup> Ëmbibi naid chiesa nebi. Matsesën Icbo Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. <sup>6</sup> Abitedi uanuna, qeshun, “Inchëshquio icboedi uëshëmbo yanquiota,” capampic Nuquin Papan. Adomboembidi Nuquin Papan chiaid pamumëdabimboen tantienquiochoedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

<sup>7</sup> Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. <sup>8</sup> Aden chuibansho mëyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? qesho Nuquin Papan dayacquio icmedenebi. <sup>9</sup> Ëbi chieshënquid dadpen icnubi ëbi bëdambo icmequid aidi iquec. Comapenen cuestanec, Unësec, qeshun nianaqui abi Esuquidistu chuibenembi. <sup>10</sup> Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedenioshi. Adoacsho uincuenaidën dayacquio icmedeniaid nec, quequin utsibon isbededebi. <sup>11</sup> Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi. <sup>12</sup> Aden tantiaquin aid chuibanac abi tantiaquid yanash aidbëdi tabadec unësesa mibitedi yanendac. <sup>13</sup> Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. <sup>14</sup> Aden tantiaquin Nuquin Papan Esuquidistu uincuemiapaden aidbëdi tabadmenuen mibitedibëdtabi ëbëd icquidtedi uincuemendac, quequin chiembi. <sup>15</sup> Aid tantiaquid ma mibi icpanueshun chuibansho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibenec nebi.

Aden chiac abi tantiaquid icscho isun, Mimbi naidtedi bēdambo iquec, Papa, quequin ma Nuquin Papa utsibon chuipanuna.

<sup>16</sup> Aden tantiec dayactiapibi quenquo iquebi. Tsusio budquimbi badiadquidēn-badiadquidēnquien Esuquidistu tantiadonequidquo yanebi. <sup>17</sup> Natiamiantequid ēnēdendac. Natiamiaid yashic Nuquin Papa yacno tabadec bēdamboshē iquendabi. Esuquidistupadquid icsaisa yec unēsesa yanash ēnēdtiapimbo iquendabi. <sup>18</sup> Aden tantiec, Ēbi natiamiaid iquec, quiashic, Nuquin Papabēd tabadendabi, quequin comapenen tantiec tsadebi. Ēmbi isaidtedi ēnēdendac. Nuquin Papa yacnocquid Ēmbi isacmaidtedibēd ēnēdtemaid iquendabi.

## 5

### *Nuquin Papabēd tabadte iquendac quiaid*

<sup>1</sup> Con nami shēnibudash unēsash nibēdnuc Nuquin Papabēd tabadec nami chuca uaid iquendabi. Nami chuca uaid ēnēdtemaid matsesēn nacnenacmaid nec, quequin tantiembi. <sup>2</sup> U abucquo nidabi yec uēshquequid nebi. Adquiocsho nami chuca uaid ēnden meniondac, Cuishon, quetsiabi. <sup>3</sup> Aden meniac ēbibimboec isadsho isendac, quec tsadebi. <sup>4</sup> Nami chodquequid icnuc uēshquec nuqui tabadec. Nami chuca uaid chodquesa menepashuni mabi unēsesa icpanu quec nuqui tabadec. <sup>5</sup> Con Mado Esuquidistu tantiaquid ēbēd abuc tabadmenuen ēbipadquid unēsesa icmenu, quequin Nuquin Papan aton Mayan menetequid nuqui nec.

<sup>6</sup> Aton Mayan meniaid iquec nami chodquetequid abi iquequi chieshenquo yec dayacquo yec nuqui tabadec. Adec tabadash abuc Nuquin Icbobēd tabadendabi, quequin nuqui tantiec. <sup>7</sup> Aton Mayan meniac nuqui isacmaid Esuquidistu cainec nuqui tabadec. Ēmbi isaid ēmbi caintemaid nec. <sup>8</sup> Aden aid cainsho nami chodquesa badedquo menepashuni. Aden meniac Nuquin Icbobēd iquendabi, quequin nuqui tantiec. <sup>9</sup> Aden tantiec nidaidēn tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi. <sup>10</sup> Adembidi abi tantiaquidtedishun naid ambi chuibante ushē chonoc Nuquin Icbon chuibanendac, quequin tantiembi. Utsi-utsien, Mimbi bēdamboen nabanoc, quequin chuibanendac abitedishun naid cuidquin.

### *Ma utsibotsen abi tantiaquid icpanu quequin chuibanaid*

<sup>11</sup> Aden ambi tantiapaden nabansho, Bēdamboen mimbi nabanoc, Nuquin Icbon ēbi caindac, quequin tantiaquin ma utsibotsen Esuquidistu tantiapanesun mibi chuibenec nebi. Aid tantiaquin nabanec bēdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. <sup>12</sup> Aden tantiaquin, Mibi bēdambo iquec, ēbi camenuen mibi dada uashunenquo iquembi. Ēbi chienquiocquin, Bēdamboec tabadquin ismiacbimboecquidēn ēbi icsamboen chuisho aido chuita, quequin mibi dada uashunembi. <sup>13</sup> Aido, Pabaton tantiate icsabudosh quec. Adembidi, Nuquin Papan chiapadomboen ēmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu queshun aid chuibenec nebi utsibon chuibenenuiocnobi. <sup>14</sup> Chian anēdēnquequid icsambocquid nēsianushe quiash matses icsaid bedshunash abided cuidadec icsaisa Esuquidistu unēsapanēdash, quequin ma utsibon tantiapanesun chuibenec nebi. <sup>15</sup> Ma ēmbi naid chiac ēbi tantiaquido ma ēbēdi icpanu, quiash unēsash uincuempanēdash Esuquidistu.

<sup>16</sup> Adec unēsash Esuquidistu uincuempanēdash, quequin matses unēsash uincuenta iquec, quequin abi tantiaquidon tantiec. Ēnden, matsesquo Esus nec, quiondaidi

nëbi, Nuquin Papan Chomiaid yec matses tantiec unësash uincuempanëdash, quequin tantiembi. <sup>17</sup> Abi tantiaquid ambi tantiamiaid nec. Ënden matsesën tantiacpadquieic icboedi Esuquidistun tantiacpadquieic bëdamboec tabadec abi tantiaquidquio. <sup>18-19</sup> Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unësapanëdash, quequin tantiaquin ma aidquio utsibon tantiapanu qeshun ambi naid nuqui chuibenec. <sup>20</sup> Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ëbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. <sup>21</sup> Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

## 6

<sup>1</sup> Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta. <sup>2</sup> Nuquin Papan chiampid chuinu. Tantia. “Mibi bëdambo icmete ushë chonoc cuënsho tantiombi. Tantiesa icboedi nëid ushënquio mibi tantiamiombi.” Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquio ambi aton bacuë icmete ushë nendac.

### *Pabado natiamiaid*

<sup>3</sup> Icsamboec tabadquimbi Pabadon Esuquidistu chuibansho, Tantiatiapibi, utsibo quetiapimbocon bëdamboec tabadec nebi. <sup>4</sup> Nuquin Papan chuimiaid yec nadec tabadebi: Chieshenquio yec dayacquiocquin ambi chiaid chuibenec bëdamboec tabadec nebi. Natiamiaid yec adequi tabadebi. <sup>5</sup> Utsin cuesaqui adequi bëdamboec tabadebi. Quënën nauedaqui adequi bëdamboec tabadebi. Nuquin Papan chiaid ëmbi chuibanac cuesnanubi padenquio yec bëdamboec tabadebi. Natia chonoadbudequi adequi bëdamboec tabadebi. Utsi tantiaquin nabanec natia ushcasequi adequi bëdamboec tabadebi. Bunquieic bëdamboec tabadebi. <sup>6</sup> Icsainquio yec bëdamboec tabadebi. Nuquin Papan chiaid tantesa uainquio yec bëdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanën tantiamiaid yec bëdamboec tabadebi. Muainquocquin utsi abimbo tantiec adecbidi tabadebi. <sup>7</sup> Abimbo chuibanec tabadebi. Nuquin Papan nadatiambocquin nac adequi bëdamboec tabadebi. Nuquin Papan chiacpadomboen nabanec nebi ma utsibon abi icsaid ëmpanueshun. <sup>8</sup> Ëbi chiec: Pabado bëdambo iquec, quenubi adequi tabadebi. Utsin ëbi chuioaic: Pabado icsambo iquec, quenubi adequi bëdamboec tabadebi. Ëbi icsamboen chuinubi adequi bëdamboec tabadebi. Ëbi bëdamboen chuinubi adequi bëdamboec tabadebi. Muaquid nec, quenubi abimbo chuiquid nebi. <sup>9</sup> Ëbi isquidëmbi, Ëmbi isacmaid Pabado nec, caqui ëmbi chuibansho tantiaboedo nec caimbi. Ëbi unës uate bunubi abi chuibanec capucuenebi. Mëyanaqui unësabi yec nidebi. <sup>10</sup> Unësquio icmiaqui Esuquidistu tantiec bëdambo iquebi. Con na nibëdsho isun adembidi Esuquidistu chuibanec nebi ma Esuquidistu tantiec utsibo bëdambo icpanueshun. Con na nibëdsho isash Nuquin Papan bacuë yec aton natedi con na nec, quequin tantiec tsadebi.

<sup>11</sup> Chuitiapibi, quenquiocquin ëbi natiaboedtedi mibi chuibanombi. Mibi comapenen tantiaquin ëmbi nabanaid mibi chuibanombi. <sup>12</sup> Mibi tantiaquioquin chuibanquid ëbi icnubi ëbi tantiaquin chienquio mimbi iquec. <sup>13</sup> Pabadon con bacuëbo caido nebi, quequin mimbi naid mimbi tantiaidbëdta ompoenquiocquin ëbi chuiban, caimbi mibi.

### *Esuquidistu tantiesabëdtambi icsain nainda quiaid*



<sup>14</sup> Esuquidistu tantiesabëdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bëdambo icmiaidënda ambi chiaid niacquidbëdtan nabampadic? ¿Nuquin Papan Mayanën tantiamiaidënda Icbo chieshënquidbëdtambi chieshëmpadic? <sup>15</sup> ¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo. <sup>16</sup> ¿Nuquin Papan ambi uaidbimboecnuc matsesën nacnenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dada uanu. Ista.

“Ëbëd icquidbëd iquendabi;

Aidbëdi capuebi;

Aton papa nebi;

Con matses adquido nec,

<sup>17</sup> Con matses icquin ëbi tantiesan ëmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquo yec tabad.

Adquid ëbëd iquec cho caindambi.

<sup>18</sup> Adquidon papa iquendabi;

Adquid ëmbi con madobëd con champi caid iquendac, quec Nuquin Papa.” Abi tanti-  
aquido nadatiambocquidën aden chiec.

## 7

<sup>1</sup> Naden nanuna, quequin Nuquin Papan chiac nuqui naid icsatedibëdtabi nuqui tantiaid icsatedi ënu, quequin Nuquin Papan chiacpadomboen nabanec tabadtenenuna.

### *Unësquio icboedi mimbi naid tantiash bëdamboshë iquebi quiaid*

<sup>2</sup> Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. <sup>3</sup> Pabado tantienquo yec icsaobi mibi camenuen nëid chuiquin dada uainquo iccombi. Mibitedi tantiec tsadebi, quequin padpiden chiemi. Abimbo caimbi. Unësequi mibi bëshuntiapimbo iquendabi.

<sup>4</sup> Mimbi chiacpadpenquiochoedëmbi naosh, quequin choquidën chioshi. Aden chuisho tantiashun, Nuquin Papan chiacpaden nabanquidquo nec, quequin mibi chiec nebi. Unësquio icboedi mimbi naid tantiash bëdamboshë iquebi. Utsin natiamiaid icshobi bëdambo iquebi, mimbi ëbi camioc.

<sup>5</sup> Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenenquo iccobi. <sup>6</sup> Unësquio icsho ëbi tantiaquin Nuquin Papan Tito padpiden chomiosh ëbi bëdambo icmeoanuen. <sup>7</sup> Choashun mimbi aid tantiaquin nabanaid Titon chioshi. Adembidi, ëbi iste mibi bunaid chioshi. Mimbi dada uaid isash unësquio icquin, Codinto yacnocquidon mimbi chiacpaden nabanosh, quequin Titon chioshi. Aden chiac bëdamboshë yanobi ad yenquo icboedi.

<sup>8</sup> Mimbi dada uaid isash Codinto yacnocquido unësquio iccosh, quesho tantiash, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unësquio yacpadequi unësquio iccobi. Yuec mibi ad yenquo iccoc. <sup>9</sup> Adecbidi nëbi bëdambo iquebi. Ëmbi mibi unësquio icmiac mibi icsaid ënquin Nuquin Papan chiacpaden nabanec, quec utsibo. Aden chuisho tantiaquin mibi unësquio icmequin mibi icsabudmiambo iccombi. Unësquio icmiaqui mibi bëdambo yanoc. <sup>10</sup> Unësquio icmiac, Nuquin Papan chiaid niaccombi, quiaish unësquio icquin mibi icsaid mimbi ënac. Adsho isun Nuquin Papan ënëdtiapimboecnoc aidbëd mibi icmendac. Aden unësquio icmiaqui, Bëdambo iquebi, mibi quendac. Adecbidi mibi icsacpadec icsainquo mibi icpendac. Padnuen Nuquin Papan chiacpaden niacquin ënesa abi natiamiaiduidi

tantiec Nuquin Papa yacno puduedtiapimbo iquendac. <sup>11</sup> Padnuen mibi unësquio icmiac nëbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ënoc. Adembidi, Ëbi padpiden bëdamboen is, quequin Nuquin Papa mimbi chioc. Icsashun chienquiocboedëmbi nëbi cuembo bëdamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi. <sup>12</sup> Icsaquid ambi icsa uanaidbëdtabi chuinen mibitedi dada uainquio iccombi. Abentsëc icsash abitedi unësquio iquec. Adquiecbidi ëbi unësquio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin <sup>13</sup> ëmbi tantiacpaden naquin mimbi bëdambo iquebi camiaid nebi.

Adembidi Tito yuedquin mimbi bëdambo iquebi camiaidbidi niosh. Ëbi yuedenquioctsiash queboedi niosh. Yuedoshi, Tito qesho tantiaash bëdamboshë iquebi. <sup>14</sup> Mibi nidmembi, Tito, qeshun, Ëbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuibocpadomboen mimbi nashunac. Aden tantiaash, Abimbo chiombi, quepobi. Ëmbi mibi muainquiocquin chuibanacpadec adquiobidi mibi nabanec tabadaid abimbo iccosh. Adomboembidi Titon mibi isbanosh. <sup>15</sup> Ëbitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. <sup>16</sup> Adoaidi ambia tantiaquid icquin ëmbi chiac mibitedishun nabanendac, quequin tantiembi. Aden tantiec bëdambo yec tsadebi.

## 8

### *Aton na nibëdquid icsho aton na dadpen icquid menequid*

<sup>1</sup> Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nëbi bëdamboen nabanec tabadaid chuinu. Tanta. <sup>2</sup> Natiamiaqui bëdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuequin aton na daëdpactsëc musucshun dayun uaosh. <sup>3</sup> Ëmbi, Meneta, cainquiocnobi aton na bedtequid naimbudtsëcquien menenuequin bedbanosh. <sup>4</sup> Esuquidistu tantiaquid utsibo, nidaid Udeya caid yacnocquido, aton na nibëdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. <sup>5</sup> Mitsana daëdpactsëc icnuc utsibo mimbi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. <sup>6</sup> Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiacteda bedbanoshe? Isnu, qeshun istanta, quequin Tito chiombi. <sup>7</sup> Naden naquid Codinto yacnocquido nec, quequin mibi tantiembi. Nuquin Papan Mayanën tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ëmbi chiacpadomboen badedquio comapenen naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

<sup>8</sup> Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. <sup>9</sup> Nuquin Icho Esuquidistu abuc tabadec abitedishun Icho icboedi nuquitsen abuc abëdi tabadmenuec matsesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

<sup>10</sup> Ĕmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. <sup>11</sup> ¿Aden nanuna, qeshun mimbi chiac ted ěnquinda bedshun dayun uao? Padenquiocquin adota. <sup>12</sup> Mitsana daĕdpactsĕc icnuc daĕdpactsĕc musucshun menesho isash, Dadpen meneta, quenquo Nuquin Papa iquec.

<sup>13</sup> Aton na nibĕdquid icsho, Natiacquin meneta, quenquo iquebi. Aton na nibĕdquid icsho aton na dadpen icquidĕn menec. <sup>14</sup> Mitsana dadpen icquid mimbi musucshun meniac aton na nibĕdquid bĕdambo iquebi, quepec. Aden meniac mibĕdi aton na nibĕdquid bĕdambo iquendac. <sup>15</sup> Nuquin Papan dada uamiampid nad iquec. Chuinu. Tantia. Petequidĕmpi Nuquin Papan mana caid meniaid chuiquin: “Shubun tabadquid dadpenshun aited-aidtedquien bedbanshun peshun napi uaid nibĕdosh. Adecbidi, aton shubun daĕdpactsĕc tabadquidon aited bedbanshun peshun napi uaid nibĕdosh.” Ade Nuquin Papan meniaidtedi bĕdambo yampicpadec aton na dadpen icquidbĕdi ambi meniaido bĕdambo yampec.

### *Tito Codinto yacno nidte*

<sup>16</sup> Nĕbi Tito mibi chuinu. Tantia. Ĕbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bĕdambo iquec, Papa, quec tsadebi. <sup>17</sup> ¿Codinto yacno tsutsi nidpatsiash? quequin ĕmbi chiac, Ĕbibi nidebi, quiosh Tito. <sup>18</sup> Tito mibi yacno nidnuesho tantiashun nuqui con utsi caid utsi Titobĕdi nidta caombi. Aidi Esuquidistu chuibanquid nec, quequin utsibon chiec. Bĕdambocquid nec. <sup>19</sup> Nidaid Masedonia caid yacnocquidon, Esuquidistu tantiec iccuededquidon ĕmbi dayun uaid Pabadobĕdtan buanec nid caidbidi Titobĕd nidquid nec. <sup>20</sup> Aid daĕd ĕbĕdi nidsho isash, Nuqui na buanquin ampetsiash, quetiapimbo utsibo iquec. <sup>21</sup> Nuquin Papan tantiamiacpaden aidobĕdtambi bĕdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobĕdtambi buanshunembi.

<sup>22</sup> Tsyuec nidebi, quequin utsibobĕdta Tido mibi yacno nidmembi. Ĕmbi nata cac bĕdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. <sup>23</sup> Mibi nashunquin ĕbĕdtambi Esuquidistu chuibanquid Tito nec. Aidbĕdi Esuquidistu tantiaquid utsi nidec. Esuquidistu tantiec iccuededquidon nĕuĕshquo puduanec Codinto yacno nidta caboedi Titobĕd nidec. <sup>24</sup> Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ĕmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

## 9

<sup>1</sup> Ĕnden Esuquidistu tantiaquid utsibo tantiaquin nashunta quequin ĕmbi chiac, <sup>2</sup> Adonona, qeshun mitsana bedbanquin mimbi tauaondac. Adsho isun nidaid Masedonia yacnoĕsh Esuquidistu tantiec iccuededquido mimbi menenuequin chuibocpadomboen chiombi. Abentsĕcshun-abentsĕcshunquien menebanquin dayun uanuna, quequin seta utsin mimbi chuibocpadomboen ĕmbi chiac Masedonia yacnocquidotsen, Adomboembidi nabanembi, queoaposh. <sup>3</sup> Aden aidon chuisho tantiashun nuqui con utsi caido mibi yacno nidmembi mimbi chiondacpaden bedbanambo icnushe qeshun. <sup>4</sup> Nidaid Masedonia caid yacnoĕsh Esuquidistu tantiec iccuededquido ĕbĕdien tsyuec mibi yacno nidchitec. Aidobĕdi mibi yacno choshon ĕmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bĕpiutsiabi. Adquiecbidi mibi icoaic. <sup>5</sup> Adquo icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismet-siac, Abimbo chiombi, quequin. Aido chonoc mimbi chiac ted bedbanquin dayun

uambochoedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unësquo icquin menetsiash. Aden tantiaquin menenda.

*Nuquin Papan na dadpen bedmiadën aton na nibëdquid menequid*

<sup>6</sup> Nuquin Papan chiaid chuinu. Adembi tantiata. Tied icbon daëdpactsëc nitsinac caniash ëshëacsho aiddtedtsëcbidi bedpec; dadpen ambi nitsinac caniash ëshëacsho dadpen bedpec. <sup>7</sup> Adquibidi aton na icquid iqueque. Tanta. Chuinu. Nëidted menenuequin ambi chiacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiacted meniash, Bëdambo iquebi, quetiapimbocquin menec. <sup>8</sup> Mitsana menete bunquin mimbi chiacted menesho isun Nuquin Papan uesadmenquiocquin mimbi bedmec ma utsi-utsien menebampanueshun. <sup>9</sup> Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

<sup>10</sup> Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec. <sup>11</sup> Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

<sup>12</sup> Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac. <sup>13</sup> Meniacsho isash, Esuquidistu tantiaquid nebi, quequin abimbo chuiquidquo aid nec, quequin mimbi meniaidbëdtambi utsibon mibi chuibanendac. <sup>14</sup> Adquidquo nec, quequin utsibon mibi chiec. Mimbi tantiamiacpadomboen nabanquidquo Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. <sup>15</sup> Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuc ëbi icsaid bedshunash abided cuidadec unësash uincuempanëdash. Aidpadquid utsi nibëdec, Papa, quequin nuqui chiec.

## 10

*Ëmbi dada uacpaden mibi yacno choshon adomboembidi nabanembi quiaid*

<sup>1</sup> Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chiec, quec. Nuquibëd tabadquin dacuëdabimboecquin comapenen Pabadon chushcainquo iquec. Utsi yacno nidshun dada uaquin comapenen chushcaic, quiosh. Mibi chiec adosh. <sup>2</sup> Adsho tantiash mibi yacno choash tabadquin chushcante bunenquo icquimbi, Ambibi tantiacpaden nabanquid Pabado nec, quequido bëdamboen chuibanembi. <sup>3</sup> Esuquidistu tantiaquid yanshun icsaquidën tantiacpaden nabanesa nebi. <sup>4</sup> Mibi yacno choshon matsesën tantiacpadpenquiocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. <sup>5</sup> Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, queshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen



tantiec pamumëdabimboe yaid ëmenu quequin Nuquin Papan chiaid ëmbi chuibanubi abi pamumëdabimboe yaid padpidec pausudtiapimboconoc paucbanshun ambi tantiacpaden Nuquin Papan pausunendac ma ambi chiacpadomboen namenuequin. <sup>6</sup> Aden chuibanashun Nuquin Papan chiacpadomboen utsin-utsinquien abi icsaid ënabicsho isun comapenen cuidendambi.

<sup>7</sup> Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi quesho tantiash, Muec nec, quetiapimbo iquec. <sup>8</sup> Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. <sup>9</sup> Adquid nebi, quequin, Dacuëdampambocquid Pabado nec camenuen dada uainquio iquembi. <sup>10</sup> Mibi aden dacuëdmenu, quenquio icnubi ëmbi dada uaondaaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabadon dada uaic. Nëmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimboconoc chuibanondash, quequin aidon ëbi chiec. <sup>11</sup> Aden ëbi chiec onquequidën bëdamboen tantiaata. Chuinu. Ëmbi dada uacpaden mibi yacno choshon adomboembidi nabanembi caimbi.

<sup>12</sup> ¿Esuquidistun, Ëbi chuibeneta, caid nebi, quepecta ëbi chieshënquido iquec? ¿Adenda Esuquidistun, Ëbi chuibeneta, caidënquio utsi icsamboen chuipec? ¿Esuquidistun, Ëbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. <sup>13</sup> Ëbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi. <sup>14</sup> Codinto yacno nidshun anoidi tabadquin Esuquidistu chuiban, Nuquin Papan cac mibëd tabadquin chuibanondambi. <sup>15</sup> Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi. <sup>16</sup> Esuquidistu ëmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibanoaic nidendabi caombi. <sup>17</sup> Aden Esuquidistu chuibanac, Ëbibi bëdambo ictiapimbocquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. <sup>18</sup> Bëdamboen nabanombi, abibi quesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquio nec.

## 11

### *Pabado muesa icnubi muaquido*

<sup>1</sup> Nëbi ëmbi dada uaid isash, tantiesa onquiacbimboen mamëmenuequin Pabadon chiec, quenquiocpashun caimbi mibi. Aden tantiatsiash, quequin abi dada uaimbi. Nëid bedash ëmbi abia dada uaondaaid isec mibi onquiacpadec nëbi nëid mimbi iste dada uaid isec onqueta. <sup>2</sup> Nuquin Papan tantiamiacpadec mibitedi cudasquidquio nebi.

Adec cudasquin aton champi utsin, Bednu, cashunac utsin, Bednu, cac Bedadenda, quequin amèn aton champi chiacbimboen, Esuquidistun bednu caid yec icsamenuequidèn, Bednu, cac, Bedadenda, caimbi. Esuquidistu ëmbi chuibanaido mibitedi bedec choeque. <sup>3</sup> Ëmbi chuibanac Esuquidistu tantiauidquimbi nisi bédambo isadacimboecquidèn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. <sup>4</sup> Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquio tantiec aidon. Adembidi, Mayan utsi iquec, qesho tantiash, Ëbi mene, quec mibi. Adembidi, Mibi bédambo icmequid Esus utsi iqueque. Aid tantiata, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, qesho tantiash Esuquidistu tantesa uatsiash, quec tsadebi. <sup>5</sup> Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bédamboenshë utsibon chuibanacpaden Pabado chuibanenguio iquec, qesho tantiash, Icsamboen chiombi, quetiapimbo iquebi. <sup>6</sup> Utsibon bédamboenshë chiacpadec Pabado onquenguio iquec, mibi quenuc Esuquidistun, Ëbi chuibeneta, quequin ambia tantiaquidèn tantiamiacpadomboen mibitedi chuibanombi bédamboen tantiaquin.

<sup>7</sup> ¿Codinto yacnocquido ma Esuquidistun bédambo icmepanueshun chuibanequi, Bec cho, quenquio yectabi icsape? <sup>8</sup> Mibi Esuquidistu chuibanu quiash Esuquidistu tantiec iccuededquid utsibon na ampiacimboec tabadobi. Aidon aton na meniaqui aido nashunenguio yec mibi yacno nidash tabadquin mibi nashunquin Esuquidistu chuibanondambi. <sup>9</sup> Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoësh choquidëmbini meniondash. Aden ënden, Bec cho, mibi cainquio iccondacpadec nëbi adquecbidi tsadebi. <sup>10</sup> Esuquidistun chuimiai quio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimbocnoc. <sup>11</sup> ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabado tantiaid nec, quequin Nuquin Papan tantiec. <sup>12</sup> Aden mibi tantiaquin, Bec cho, cainquiocquin Esuquidistu chuibenec nebi mimbi bédamboenshë chuibanquid caid: Pabado nabanec tabadacpadec tabadebi, quetiapimbo icnubi.

<sup>13</sup> Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. <sup>14</sup> Aido tantiamequin ismequid Satanas nec. Nuquin Papan abi yacnoshon uaid mayan bëda aidbëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac <sup>15</sup> adquecbidi ambi nami-aidtedi bédambocquidbimboec capucuededec. Cuidte ushë chonoc aido icsaid Nuquin Papan comapenen cuidquin chiendac.

### *Pabado abi mëyanaid chuibanaid*

<sup>16</sup> Adembidi chuinu. Tantia. ¿Mamëmenuequin tantiesa onquiabimboendambi ëbi icaid chuibandio? ¿Utsin aden chuibansho tantianu, quepecta mibi ictsia? Aden chuibanenquiocquin ëbi icaid chuibanuna, <sup>17</sup> Chuita, Nuquin Icbon cainquiocnobi. <sup>18</sup> Abi icaid utsin-utsinquien chuibanec, quequin tantiaquin adomboembidi ëbi icaid chuibanuna. <sup>19</sup> Bédamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. <sup>20</sup> Ambembi chiacbimboec, Yuanu, qesho tantiash icsamboen tantiaquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenguio yec tabadec mibi. Aden mitsana ambembi isash, Mibi chuiquid nebi, qesho tantiash, ¿Tsuntsin mibi adquid icmiosh? quenquiocquin

aidën chiacpaden nabanec mimbi. Aton yuabimboecnuc mibi mëyanaqui, Min yuapenquio nebi, quenquio iquec mibi. <sup>21</sup> Nuquin Papan yua icta cac, Padi, quetsiash, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsiash, quequin tantiaquin ëbi icaid chuibanu. Tantia. <sup>22</sup> ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Ëbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Ëbi Abadauanën tsyuecquid nebi, caimbi. <sup>23</sup> ¿Esuquidistu chuibanquid nebi, quepecta aido iquec? Ëbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamënshumenuequindambi aden chuipadi? Padenquio. ¿Ëbi yacpadquid utsida iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaaid utsi icnubi quënën nauedteniaid nebi. Adecbidi utsi bëdiactsëc cuesaid icnuc yuen cuesto-cuestoaid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. <sup>24</sup> Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquio cacuestonioshi. <sup>25</sup> Adembidi cuesten cuesoshi. Yuecshun padpiden. Yuecshun padpiden. Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. <sup>26</sup> Adecbidi quenenenquio yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquio yec capucueniobi. <sup>27</sup> Con na bednuec chonoadec uëshquiobi. Padpiden-padpidemboen ushenquio icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquio yaqui adembidi chuibudombi. <sup>28</sup> Ëmbi chuiboed Esuquidistu tantiabenicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushë queshun mibitedi chuiquin dada uaombi. <sup>29</sup> Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, quesho tantiaash unësquio yec, Nëbimbobi icsamianquid comapenen cuidta, Papa, quec tsadebi.

<sup>30</sup> Aidted ëbi icaid icnuc chieshenquio yec ëbi dayacquio yaid chuibanombi. Nëbi ëbi cuenondaaid chuinu. Tantia. <sup>31</sup> Abia Yampidën, Nuquin Icho Esuquidistun Papan nabanaid ënenquiocquin chuitequidquio iquec. Aidën nabanaid chuibanec muesa Pabado nec, quequin ëbi cuenondaaid Nuquin Papan tantiec. <sup>32</sup> Ëbi cuenondaaid nad icpondashe. Chuinu. Tantiata. Damasco yacnocquido ancanquidën Adetas cuëmëdquidën Pabado Damasco yacnoësh puduësho bedta quequin shubu dadpen daquënë uaid dapa shëcuëtedi sondado ëctabëdmepondash. <sup>33</sup> Adec daquënë uaid shëcuë cuëmanquio sondado tabadnubi bednushë queshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadtiapimbo yec cuempondabi.

## 12

<sup>1</sup> Ëbi icaid chuibanquin ëmbi dada uaid isbanash, Esuquidistun ëbi chuibeneta caidquio Pabado nec, quequin Codinto yacnocquidon tantiatsiash, quequin adobamboedtedi chuibanquin dada uaombi. Ëbi icaid chuibanquin ëmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adembidi Nuquin Papan ëbentsëqui ismiondaid chuinu. Tantia. Nad iccondashe. <sup>2</sup> Ëndenquimbo seta 14ted matamequin Nuquin Papan bédamboshë yacno indopondashi. Intacchobi abuc indopondashi, quetiapimbo iquebi. Tantienguio iquembi. Adecbidi ëmbi tantiateuidi indoac, quetiapimbo icoaibi. Tsaudi, tantienguio iquembi. Nuquin Papambien tantiec. <sup>3</sup> Abuc bédamboshë yacno indopondashi, quequin abimbo chiembi. <sup>4</sup> Abucshun utsi chuitemaidquio tantiapondambi. Ëmbi tantiondaid chuitiapimbo icpebi. ¿Mitsipadentsimbi ëmbi abucshun tantiaboed con onqueten chuipatsiaba? <sup>5</sup> Bédambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bédambocquid nebi, quetiapimbo iquebi. <sup>6</sup> Abuc nidshun ëmbi isondaaid chuibanquin dada uaid isash, Bédambocquid Pabado nec, quequin tantianushe queshun padenguio iquembi. Ëbi bédamboec tabadsho isash, Pabado bédamboec tabadec, quesho tantiash bédambo ictsiabi. Adecbidi chuibansho tantiash, Abimbo chuiquidquio Pabado nec, quesho tantiash adecbidi bédambo ictsiabi.

### *Satanasën natiamiaid*

<sup>7</sup> Bédambocquid yansho Nuquin Papan abuc indoshon ismiondashi, quequin Pabado chuinushe queshun Satanasën chomiaidën ëbi natiameded-natiamededsho isash, Chën, quenquio Nuquin Papa iquec. Satanasën chomiaidën natiamiac pinchuquën siadaid namin nidaëdaid chictiapimbo yacnimboec con dada bédanenguio iquec. <sup>8</sup> Adec con dada bédantiapimbo icnubi, Ëbi natiamequid cueme, Icbo, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. <sup>9</sup> Adoaquien, Padi. Bédambocquid icmenuequin naid nec. Mibi dayacquio icmequid con Mayan mibëdi iquec, quequin Nuquin Icbon chiondashi. Adoaqui, Bédanambo icsho Nuquin Icbon ëbi dayacquio icmec quequin tantiec bédambo iquebi, quec tsadebi. <sup>10</sup> Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamënshunaqui adecbidi Esuquidistu chuibenec capuebi. Utsin natiamiaqui adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquio icmiac tsadtiapimbocquin chuibenec capuebi.

### *Esuquidistu tantiabemenuen chuibanombi quiaid*

<sup>11</sup> Ëbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaid tantiatequidquio iquec, queshun mibëd icquidon ëbi icsamboen chiosh quesho tantiashun Pabado Esuquidistu chuibenequid nec, quenquio utsibo iccosh, quesho tantiashun ëbi icaid chuibanquin dada uaombi. Bédamboen tantiacnimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenequidquio nebi. <sup>12</sup> Natiamiaqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquio Pabado nec, quequin chuitiadquidëmbi padenguio mimbi icpondac. <sup>13</sup> ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquio iccondabi. ¿Bec cho, queshoda ëbi bédamboen mimbi tantiatsemponda? <sup>14</sup> Ënden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantiaquidquio ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied



uaic adembidi shubu uaic bacuëmpibon nabantiapimbo icnubi. <sup>15</sup> Adquiobidi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquoio yampe? <sup>16</sup> Bec, cho, quenquoio yec mibëdi tabadondabi. Adsho isash, ¿Piuquid bedenquoio icpecta Pabado tabadash? Muaquin chuiquin bedpash icnui, quec mibi. <sup>17</sup> ¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bedpash? Padenquoio. <sup>18</sup> Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquoio icboc. Aidbëdi abentsëc yachimboen tantiaquidquoio nebi. Aduidequi tabadquid ëbi daëdi nebi. <sup>19</sup> ¿Pabado ampesa nec mibi camenuendambi dada uaqin chuibampo? Padenquoio. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec. <sup>20</sup> Mibi yacno choash ëbëdi abentsëc yachimboen tantienquoio icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquoio chuisho tantiamane qeshun adembidi dada uaimbi. Bëdambo icquid ëbi icnubi utsi padenquoio iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuëdcuededsho tantiamane qeshun adembidi dada uaimbi. <sup>21</sup> Ai, mibi yacno choashun adquid icsho isun, Ëmbi Esuquidistu chuibanaido nec, quequin Nuquin Papa chuitiapimbo yec natiaic bëpiuacximboec tsadmane qeshun dada uaimbi. Icsadenequidën abi icsaid ënabi icsho isash aido unësacximboecquid nec, quiash unësquoio icmane qeshun dada uaimbi. Aidon naid utsin istemaidquoio nec. Ambibi ambi chudtemaid chudted-chudtedec icsambo yequi, Bëdambocquid nebi, quec muacuededec.

## 13

### *Icsaid ënesa chuiquin cuidendambi quiaid*

<sup>1</sup> Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantiendambi. Abentsëcshun: Icsaquid iquec, quequin chuisho tantiatiapimbo iquendabi. <sup>2</sup> Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi. <sup>3</sup> Esuquidistun tantiamiacpaden Pabado dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantiacquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. <sup>4</sup> Aidi matsesash nadatiapenquoio icquidximboecsho isun cuesten dectampanëdash. Adoacsho Nuquin Papan uincuemiac unësesa yanquiopanëdash. Aid tantiaquidquoio icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

<sup>5</sup> Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquoio mimbi iquendac. <sup>6</sup> Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabado abimbo chiosh, capashuni mimbi.

<sup>7</sup> Aden tantiaquin Codinto yacnocquido bēdamboen tabadmeta, Papa, quequin chuided-chuidedembi. ¿Mibi bēdamboec tabadsho isash, Pabadon chuibanaiido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquio. Esuquidistun ēbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquio Codinto yacnocquido nec, quequin utsibon chuisho tantiatiadquio iquebi. <sup>8</sup> Nuquin Papan chiaid abimbo iquec, quequin ambi chiaidquio chuibanquidquiobidi nebi. Ambi chiaid utsi uain chiesā nebi. <sup>9</sup> Mibi bēdamboec tabadsho isash bēdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. <sup>10</sup> Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibēdsho isun comapenen chienquio icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. <sup>11</sup> Nēbi ēnquin dada uaimbi. Icsaisa icnu quec Nuquin Papan chiacpadec bēdamboec tabadta. Ēmbi dada uain chiaid isquin adobanta. Abentsēc yacbimboen tantiaquin nabanec tabadteneta. Adec tabadsho isash tantianquidquio utsibēd bēdamboec tabadquidquio Nuquin Papa mibēdi iquendac. Aidēnquio mibi adquidquiobidi icmendac. <sup>12</sup> Ēbi isec cho cananta. <sup>13</sup> Mibi tantiec tabadebi, quec nēmbo tabadquido Nuquin Papan bēdambo icmebanaido. <sup>14</sup> Nuquin Icbo Esuquidistun bēdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ēbēd iquec, quequin tantiaquiota. Padi. Aidtedi dada uaimbi.

## CADASIA YACNOCQUIDON ISTE

### *Pabadon tauamboen chiaid*

<sup>1</sup> Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. <sup>2</sup> Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. <sup>3</sup> Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. <sup>4</sup> Matses bëdambo icmequid Esus nec. —Ëbi tantiesabo tabadac bimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided ciudadec Esus unëspac caondash. <sup>5</sup> Aidën Papa tantiaquin: —Nuquin Papa bëdamboshë iquec —canuna ënenquo icquin.

### *Esusuidi tantienquo yanaid*

<sup>6</sup> —Esus tantienquo yanosh —quequin mimbi naid chuisho tantias shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided ciudadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. <sup>7</sup> ¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiasun: —Abimboen cachitec —quesun mimbi Esus tantienquo yampac. <sup>8</sup> —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiasun aidtsen: —Nuquin Papan cuidpashun —catsiambi. Utsibontsen muaquin chuisho tantiasun aidtsen: —Cuidpashun —quiobi. <sup>9</sup> Tanta. Adembidi mibi chuinu. Ëmbi chuibanac mimbi Esus tantiabendon-dac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. <sup>10</sup> —¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiacpadomboen mambi natiadquo yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

### *Esusën chiaidquo chiec nebi, quiaid*

<sup>11</sup> Tanta, con utsibo. Mibitedi chuinu. —Esus tantiasho Nuquin Papan matses bëdamboen isbentsias —quequin ëmbi chuiboed amben chiaidpenquo nec. <sup>12</sup> Matsesën chiabi Esuquidistun tantiamiac ambi chiaidquo chuibanombi.

<sup>13</sup> Tanta. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tantiaquido comapenen chieshënquin cuesun secatiadquo icpadenebi. Ëmbi adodened ëmbi chuisho mimbi tantiondac. <sup>14</sup> Nuquin Papa tantiatiadquo icquin con matsesën chiaid abitedimbo natiadquo ictenebi. Èbëdta tishaidon caniabon bëdiactsëc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshëndenembi. <sup>15</sup> Adshobini Nuquin Papan aton Mado Esus tantiamiondash. Ëbi tishabi icnubi ëbi caic: —Con Mado Esus tantiameshun bëdamboen isquin

<sup>16</sup> Pabado: “Matses utsibo isadaidpembo con Mado Esus chuibeneta,” caindambi — quequin ambi chiacpadomboen Esus tantiamiondashi. Adoac: —Esusën chiaid ëbi chui —quequin matses chiambo iccondambi. <sup>17</sup> Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquo yec nidaid utsi Adabia caid yacno matses nibëdacno badedquo nidtanondabi. Adashic yuec-yuecpambo ictanec auëshquo choec shubu dadpen icquid Damasco caid yacnobidi choaondabi.

<sup>18</sup> Adashic ambo nidash seta abentsëc chotsecnuc matametane Edusaden yacno Petedo isec nidtanondabi. Adec nidash 15tedec ushec aïdbëd tabadondabi. <sup>19</sup> Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo. <sup>20</sup> Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic —quec Nuquin Papa.

<sup>21</sup> Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquo nidshun nidaid utsi Sidisia caid yacno istanondambi.

<sup>22</sup> Nidaid utsi Udeya caid yacno Esusbëd icnëdaido yacno yuec tabadambo iccondabi. Adsho anocquidon Esus tantiaquidon isabi iccondashi. <sup>23</sup> Ëmbi naid chuishouidi tantiapac caondash. —Nuquipadquid Esus tantiaquido cuesun secatiadquo icnëdaïdëmbi Esus tantiabenshun Esusquo chuibeniosh —quequin ëmbi naid chuishouidi tantiapac caondash. <sup>24</sup> Aden ëmbi naid chuisho tantiash: —Nuquin Papan nac Pabado bëdambo iquec. Adomboen Pabado tantiamec Nuquin Papa bëdamboshë iquec —quepac caondash Udeya yacnocquido.

## 2

### *Edusaden yacno nidoaid*

<sup>1</sup> Yuecash seta 14ted matamiash Edusaden yacnobidi nidoapondabi. Ëbëdi Bednabe caid nidpondash. Titotsen buanondambi. <sup>2</sup> Adec Nuquin Papan tantiamiacpadece ambo nidshun Esus tantiaquido chuiquid dapabo caïdoidtsëqui cho-chomeshun ëmbi naboed chuibanondambi. —Ëmbi chiabi yac aidon: “Muequi neque. Pabadon chuisho tantienda,” canushe —queshun naden chiondambi. —Nuquin matsespenquo isadaidpembo matses utsibo Esusquo chuibeniombi. “Esusuidi tantiasho Nuquin Papan nuqui bëdamboen istsiash,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ëmbi adoac: —Ai, adembidi tantiembi —quepondash aïdo. <sup>3</sup> Ëbëd icquid Tito caid isadaidpembo icshobi: —Shui dëbid dëteshune —cainquo iccondash chuiquid dapabon abi utsibon: —Adotiad —canubi. <sup>4</sup> Adec: —Shui dëbidien dëteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsëqui tantiasho Nuquin Papan nuqui bëdamboen isec,” quequin con tsusedpan chiaid niacsho tantianu —quiash ëbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesën chiampidtedi nasho Nuquin Papan bëdamboen istsiash —quepondash. <sup>5</sup> Adec aïdo: —Nuquin tsusedpan chiampicpadomboenuidien nametiad —quesho: —Padi. Mimbi icsamboen chiec —quequin aïdën chiacpadomboen nainquo iccondambi. —Ma matses utsibon: “Esusënuïdtsëqui Nuquin Papa ëbi bëdamboen ismec,” quequin ma Esusquo tantianu —queshun nainquo iccondambi.

<sup>6</sup> Aden Esus tantiaquido chuiquid dapa caïdon Esus tantiaquidën natequid utsi chienquo iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquo iccondashi. ¿Esusbëd icnëdaïdën: —Moisesën chiaïdtsen nameta —cactambi nametsemponda? Padenquo ictsenondambi. ¿Atotsi Nuquin Papan aïdo capec? —Esusbëd iccondaidquo neque. Bëdamboen isnu —¿capenda iquec? Padenquo. <sup>7</sup> Naden Petedo chedon chiondashi. —Nuquin Papan chiacpadomboen mimbi



matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bēdamboen nac –capondashi. <sup>8</sup>—Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbisen matses utsibo dadpen Esus tantiamiac <sup>9</sup>—qeshun bēdamboen ispondashi. —Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquio mibi nec —qeshun chuiquid dapabon Bednabebēdta mēdimbampondashi. Nēidic Petedo. Nēidic Acobo. Nēidic Uan. Aidedishun chuiquid dapabo icquin adondashi. <sup>10</sup>Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

### *Antioquiya yacnoshon Petedo chushcaid*

<sup>11</sup> Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquio icsashobimbi bēisquioquin chushcapondac. <sup>12</sup> Abēdtan Esus tantiaquido matses utsibon codocaid pec bēdamboec tabadboedi aton pete isuidanec aidobēd cuēshēdec Petedo icsapondash. Ambo choash Esus tantiaquido con matsesēmpenquio codocaid pec bēdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aido cho-chosho isash: —Moisesën chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash. <sup>13</sup> Adsho isash anocquido isadaidbotsen abēdtan Esus tantiaquido matses utsibobēd tabadenquio yec cuēshēdpondash. Adsho isash ebēd icquid Bednabetsen adecbidi cuēshēdec icsapondash. <sup>14</sup> Adec icsaquin Esusën chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aidbēdi mibi bēdamboec tabadoc. Aidon piaid pec bēdamboec tabadboedi nēbi aidbēd mibi cuēshēdoc. Adsho isash mimbi nianaído: “Petedon matses isadaidbo tabadac bimboec tabadshouidien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiameque. Tantia. ¿Atotsiequin mimbi naoque? —capondambi Petedo chushcain.

### *Nuquin Papan bēdamboen iste chiaid*

<sup>15</sup> Naden con matses Petedo chiondambi. —“Moisesën chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaído nec. <sup>16</sup> Adquid icquin: “Moisesën chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesën chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

<sup>17</sup> Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” qeshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio. <sup>18</sup> “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi

naquin Nuquin Papa bēdamboen ismembi,” qeshun abi bēdamboen ismequidquo Esus tantienquo yequini icsambo icchitotsiac. <sup>19</sup> Con tsusedpa Moisesēn chiactedi natiadquo ictenebi. Adquid bēdamboen iste danquin abitedi natiadquo icquimbi abitedi nainquo iccondambi. Adshun: “Moisesēn chiactedi ambembi matsesēn natiapimbo iquec,” qeshun ěmbimbo naid ěnondami. Nēbini Esus tantiec Nuquin Papan chiacpadec tabadec. <sup>20</sup> “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquo yanondabi. Nēbi ěmbi tantiaidquo nainquo yec Esuquidistubēdi cuēshēdenquo yec bēdamboec tabadebi. “Ěbi tantiec ěbi cuidmenquo icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. <sup>21</sup> “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquo icnuec ěbided cuidadec unēsnu,” queboedi Esus padenquo ictsempañdash –capondambi Petedo chuiquin.

### 3

#### *Nuquin Papan aton Mayan tabadmiaid*

<sup>1</sup> Tanta. –Cadasia yacnocquido piushbimboecquin tantienquo yanosh –quequin chuisho tantiashun mibitedi chuinu. ¿Tsuntsin: –Tantienda –cac Esus tantienquo yano? –“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquo iquec –quequin mibi chuibanondambi. ¿Esus tantiatiapimboda ique? <sup>2</sup> Mimbi tantiaid ěbi chui. Tantanu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquo. Ěmbi chiondaid Esusquo mimbi tantiabensho isashien mibēd tabadanondash. <sup>3</sup> ¿Pabiate shēcuē choquidida mibi nendac? Tanta. ¿Atotsieshun tantienquo ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquo yanecta mibi bēdamboec tabadpatsia? Mibembi bēdamboec tabadtiapimboen mibi iquec. <sup>4</sup> ¿Aden Nuquin Papan aton Mayan mibēdi tabadmiaid icquimbida Esus tantienquo yano? <sup>5</sup> Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquo. Ěmbi chiondaidquo Esusquo tantiasho Nuquin Papan aton Mayan mibēdi tabadmec.

#### *Nuquin Papa tantiaquidquo Abadauan chiaid*

<sup>6</sup> ¿Tsutsi Nuquin Papa tantiaquidquo icpampic? Abadauan nepampic. Nuquin Papan chiac Abadauan: –Abimbo mimbi caic –qesho: –Adquid bēdamboen isembi –qeshun Nuquin Papan bēdamboen isbempampic. <sup>7</sup> Adec Abadauan: –Nuquin Papan abimbo caic –quequin tantiapampicpadomboen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen. <sup>8</sup> –Esus tantiaquido iquendac –quequin naden Nuquin Papan Abadauan chuipampic ěndenquimbo. “Abadauan, mibi unēsān yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic. <sup>9</sup> Abi tantiaquidquo icsho ambi Abadauan bēdamboen isampicpadomboen nēbi aton Mado Esus tantiasho Nuquin Papan nuquitsen bēdamboen isec.

<sup>10</sup> Utsiboen Nuquin Papan cuidtequido nendac. —Moisesën chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquo icsho Nuquin Papan cuidendac. Aden ěnden Nuquin Papan chiaid dada uapampic. “Ambi chiacledi nainquo icsho Nuquin Papan cuidendac,” quepampic. <sup>11</sup> —Ambembi Moisesën chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquo. Ambi chiaid niacquidoidquo icsho bēdamboen istiapimbo icquin Nuquin Papan naden chuiquin dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquidien Nuquin Papan bēdamboen isec,” quequin dada uamepampic. <sup>12</sup> ¿Ěmbembi Moisesën chiacledimbo nanuequidta Nuquin Papambo tantiec tabadpec? Padenquo. “Moisesën chiacledi naquid Nuquin Papabēd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bēdamboen istiapimbo iquec.

<sup>13</sup> Aden Nuquin Papan matses abitedimbo bēdamboen istiapimbo icnuc Esuquidistu: —Ěbided cuidshun ěbi tantiaquido ma con Pan cuidenquo icnu —quiash abided ciudadec unēspac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquo nec,” quequin Nuquin Papan chiaid dada uapampic. <sup>14</sup> Adec matses utsi-utsien abi tantiaquido cuidmenquo icnuec abided ciudadec Esus unēspac caondash. Ěndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēspac caondash.

### *Abadauamba chuishun Moisesen Nuquin Papan chiaid*

<sup>15</sup> Tanta, con utsibo. Mibitedi chuinu. Min matsesën nadoquid. —Naden naindambi —quequin dada uashun: —“Abimbo chiaidquo nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid utsi uatiapimbo icquid icquin <sup>16</sup> Nuquin Papan: —Nadomboen naindambi —quequin Abadauan chuipampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. <sup>17</sup> ¿Ada tantie? Ěndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquid ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic. <sup>18</sup> ¿—Ěmbi chiaid ěmbi Moises dada uamiacpadomboen nashouidi mibi bēdamboen isembi —queshunda Nuquin Papan Abadauan bēdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ěndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

<sup>19</sup> ¿Atotsieshun Nuquin Papan ambi chiaid Moises dada uamepampic? —Ěmbi chiaid isash: “Icsamboequien nuqui tabadchitec,” quequin ma matsesën tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiauampampic. Adoac Moisesën aton matses Nuquin Papan chiaid chuibampampic. <sup>20</sup> Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

*Matses abi icsaid tantiamete chiaid*

<sup>21</sup> Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquina Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —qeshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. <sup>22</sup> —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yacimboec abembi bēdambo ic-tiapimboen icchitec,” quequin ma matsesēn tantianu —qeshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquiduidtsēqui Nuquin Papan bēdamboen isec.

<sup>23</sup> Esus choabi icnuc nadquo matses icpanēdash. Moisesēn chiapadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yacimboec aidēn chiapadec bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. <sup>24</sup> Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bēdamboen isec icsaisabimboecnuc —nuqui quendac. <sup>25</sup> Aden tantiec: —Isaidbo tsusedpan chiatedi nashouidi Nuquin Papan matses bēdamboen istiasho —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantiec.

*Nuquin Papan con mado con champi caido*

<sup>26</sup> Aden Esus tantiasho Nuquin Papan: —Con mado mibi nec. Con champi mibi nec —nuqui capec. <sup>27</sup> Adec: —Esus tantiaquid nebi —quesho acten mentoaid yec Esuspadquo ictiadquo nuqui iquec. <sup>28</sup> Aden Esus tantiasho Nuquin Papan nuqui bēdamboen isec. Isaidbo yec isaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. <sup>29</sup> Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquido-bimboecquido nuqui nec.

**4***Yuabimboecquid isaidbo yaid*

<sup>1</sup> Tanta, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsān con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsān caniabi yec utsibon yuabimboec aton mado iquec. <sup>2</sup> Caniabi icquin utsibon chiapadomboen naindac aton madon. Adashic aton papan chiapadec canishun aton papan na bedash yuabimboecboedi adquidpenquo yanendac. <sup>3</sup> Adquo yuabimboecquido con matses isaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash. —Tsusedpabon chiapadomboen Nuquin Papan: “Naden nata,” quequin chiaiduidi nanu —quiashi abembi bēdamboec



tabadtiapimbo icpanēdash. <sup>4</sup> Adnubien ambi ëndenquimbo tantiampicpadën Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanēdash. <sup>5</sup> Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquio icnuec abided cuidadec Esus unēsac caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

<sup>6</sup> Adec: —Con bacuēbo nec —qeshun Nuquin Papan nuquibēdi Esusēn Mayan tabad-mec. Adoac bacuēn amē: —Ēbi, papa —cacbimboen Nuquin Papa nuqui chianec. <sup>7</sup> Esus tantiabi Moisesēn dada uapampiduidi namenuequido yuabimboecquido icboedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

### *¿Utsin yuameteda bumpe? quiaid*

<sup>8</sup> Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianēdaidēn yuabo yec mētaniacimboecquido mibi icpanēdac. <sup>9</sup> Nēbi Nuquin Papa mimbi tantiabenondac. ¿Mimbembida adonda? Padenquio. Aidēmbi mibi tantiamepanēdash. Aidēn tantiamiaidombo icquin ¿atotsiequin aid tantienquio yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquio. Adquid mētaniacimboecquid nec. ¿Mētaniacimboecquid icoatiadquioda ique? <sup>10</sup> Aden Nuquin Papa tantienquio icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec. <sup>11</sup> Mibi caic: —Adosh —quesho tantiash shubitiadquio iquebi. —¿Ēmbi chiondaidonda Esus tantienquio yampash? —quequin tantiac mibi unēsquio iquec.

<sup>12</sup> Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesēn chiampiduidi nanu —quenquio yacimboec yanondabi. —Ēmbembi Moisesēn chiampid naquin Nuquin Papa bēdamboen ismembī —quedenedi ënēdondabi. Nēbi Esusuidi tantiaquid nebi. Adembidi Esusuidi tantiata.

Ēbi adsho tantiash chieshenda. Tauamboen ěmbi Esus chuisho mimbi ěbi chieshēnenquio iccondac. <sup>13</sup> Mibi yacno tauamboec choshon daicsabudtsēcshumbi mibi Esusēn naid chuibanondambi. <sup>14</sup> Istiapicpambo yec daicsabudacshobi mimbi ěbi cacumenquio iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac. <sup>15</sup> —Min ěshē chicshun ěbi mene —ěmbi cac mimbi ěbi menetsenondac. Aden ěbi mimbi tantiaquiondac. Adondaiddi ¿atotsi quiash chieshcueno? <sup>16</sup> ¿Nēid abimbo chuiquindambi mibi chieshēmpē? Padenquio iquembi. ¿Aden chuisho mimbidabi chieshēmpē?

<sup>17</sup> Ista. Esus chienquio icquidon ambi chiacpadomboen mibi nametiadquio iqueque. ¿Mibi tantiaquioquin bēdamboen namenuenda mibi chuipec? Padenquio. Ēbi chieshēmenuembien ambi chiacpadomboen mibi nametiadquio icchitec. Mibi abibi tantiamenuen naic. <sup>18</sup> Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ěmbi chiaidquio tantiabenondac. Ēbēd icquimbi Esus bēdamboen tantiaboedombi ěbi nidtsēcñubi mimbi badedi utsi tantiac. <sup>19</sup> Aden mimbi naid tantiac mibi unēsquio iquec. Anin bacuē tantiacimboen mibi tantiaquiembi. —Esusbimboec icpashun. Aid tantiec ambi chiacpadec bēdamboec tabadpashun —quequin mibi tantiembi. <sup>20</sup> Mibēd icquin bēisquioquin mibi chuitsiambi.

Mibëd iquenquo icquimbi mibi bëisquioquin chiacbimboen dada uaquin mibi naden chiemi. —¿Atotsieshun Esus tantienquo yanoao? —caimbi.

*Abadauanën mado daëd chiaid*

<sup>21</sup> ¿—Moisesën chiacpadomboenuidi naquin Nuquin Papa bëdamboen ismembi — quequido icquinda mimbi Moisesën chiampid bëdamboen tantieque? Tantia. Mibi chuinu. <sup>22</sup> Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquo aton chidon tishaid abentsëcbidi icpampic. <sup>23</sup> Abadauanën chudac badedquo bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquo icmiac aton mado tishpampic. <sup>24-25</sup> Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquo yec Moisesën chaiduidi tantiate bunquiec. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. <sup>26</sup> Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. <sup>27</sup> Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu.

Bacuë tishiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”

quequin ambi chiaid Nuquin Papan dada uamepampic.

<sup>28</sup> Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. <sup>29</sup> Ènden Nuquin Papan naidopenquo icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshënendac. <sup>30</sup> Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquo caidmequin bëdamboen tabadmembibi. Yuaidën madoembi padenquo iquendac,” quequin Nuquin Papan Abadauan chiaid dada uapampic Moisesën. <sup>31</sup> Sada caidën mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquo tantiaquid yec: —Èmbembi Moisesën chiactedi naquin Nuquin Papa bëdamboen ismembi —quenquo icnuna.

## 5

*Esus tantiasho Nuquin Papan bëdamboen iste chiaid*

<sup>1</sup> Aden: —Esusënuidtsëqui Nuquin Papa ëbi bëdamboen ismec —matses camenuc abided cuidadec Esus unëspac caondashe. Aidquo tantia. Muaquidën: —Moisesën chiampicpaden nasho Nuquin Papan nuqui bëdamboen istsiashe. Aidën chiacpaden

nanuna –quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

<sup>2</sup> Mimbi isondaid Pabado nebique. Tantia. Mibitedi chuinu. Moisesën chiactedi naquid Nuquin Papan bēdamboen iste danquin Esus tantienquo yanec muaquidēn chiacpadec shui dēbid dēteshuniadacsho isun Esusēn Nuquin Papa mibi bēdamboen ismetiapimbo ictsiyashe. Adenda. <sup>3</sup> Aden Moisesën chiaid abentsēc natsēcshun aidēn chiaid utsitedi nainquo icsho Nuquin Papan mibi bēdamboen istiapimbo ictsiyashe. Moisesēn dada uapampiduidi namenuquido tanenda. <sup>4</sup> Aido Esus tantiesabo nec. Aden abi bēdamboec ismianquid Esus tantienquo icsho Nuquin Papan aido bēdamboen istiapimbo iquec. <sup>5</sup> Esus tantiaquidoen Nuquin Papan Mayanēn tantiamiacpaden naden tantiec. – Esus tantiahouidi ambi chiaid niac-niacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac –quequin nuqui tantiec. <sup>6</sup> Shui dēbid dēteshuniaidēn Esus tantiaho Nuquin Papan bēdamboen isec. Adembidi shui dēbid dētiacmaidontsen Esus tantiaho Nuquin Papan bēdamboen isoaic. Aden Esus tantiabēnash: –Ambi chiacpadomboen Nuquin Papan matses tantiaquid ēbi icmendac –quequin aden utsibo tantiaho isun Nuquin Papan: –Adquid con Mado tantiaquid nec –caindac.

<sup>7</sup> –Bednu –quequin nadancacbimboen aiduidtsēqui tantiaquin mimbi Esusquo tantiondac. ¿Tsuntsin muaquin chiac Esus tantienquo mimbi yanoape? ¿Atotsiequin abimbo chiaid niacpe? <sup>8</sup> ¿Nuquin Papan nacta Esus tantienquo yano? Padenquo. Ma aidēmbi mibi Esus tantiametiadquo yoc. <sup>9</sup> Muaquido tantienda. Nadquo aid iquec. Tosho bedquid abentsēcshun bedmebanac abitedi toshoquecuededec. Adembidi muaquid abentsēcshun chiac matses dadpenshun abimbo tantienquo yantsiashe. Muaid tantienda. <sup>10</sup> –Nuquin Icho Esusēn tantiamiac ēmbi chiacpadomboen Cadasia yacnocquidon tantiatsiash –quequin mibi chiec nebi. Mibi muaquin chuiquid Nuquin Papan cuidendac.

<sup>11</sup> –“Con tsusedpan chiacpaden shui dēbid dēteshuniaiduidtsēqui Nuquin Papan bēdamboen istsiash,” queposh Pabado –quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquidon chieshēnenquo ictsenoshi. Esus chienquo icsho ēbi chieshēnenquo ictsenosh. Abi tantiaquid cuidmenquo icnuec abided cuidadec unēsaid Esusuidi chuisho mabi chieshēmpaboc. <sup>12</sup> Mibi muaquin chuiquido Moisesēn dada uapampiduidi namenuquido caic: –Auēshquo cuemepashun –caimbi.

### *Esus tantiaquido bēdamboec tabadte chiaid*

<sup>13</sup> –Ēbi cuidmenquo icnuec abided cuidadec unēsaid Esusquo tantiaho Nuquin Papan ēbi bēdamboen isec –camenuen Nuquin Papan mibi Esus tantiamiac. Adoac: –Esus tantiaho Nuquin Papan cuidtiapimbo iquebique. Ēbi icsate bunaid nanu –quenda. Nēbi Esus tantiaquin mibi icsate bunaid ēnquin mēmunta. Esus tantiaquido yec tantiananquiec nashunanta. <sup>14</sup> Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacbimboen utsibotsen bēdamboen tantiaquiota,” quequin Nuquin Papan ambi chiaid Moises dada uamepampic. <sup>15</sup> –Opa penantiadpambo yacimboec nēishnanash chushcananosh –quiosh mibi caic. Aden naic mibi icsacuededeque. Esus tantienquo mimbi yaneque. Bēdamboec tabadta.

### *Nuquin Papan Mayanēn bēdamboen tabadmete*

<sup>16</sup> Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimbi nainquo ictsiac. <sup>17</sup> Nuqui icsate bunaid naiqui Nuquin Papan Mayanēn tantiamiacpadec bēdamboec tabadtiapimbo nuqui ictsiac. Nuquin Papan Mayanēn tantiamiacpadomboen tantiaquin nuqui icsate bunaid ēnquin

nuqui mëmuntsiac. <sup>18</sup> Nuquin Papan Mayanën tantiamiacpadomboen tantiec: — Esusënuidtsëqui Nuquin Papa ëbi bëdamboen ismec —queshun: —Moisesën chiacstedimbo naquin ëmbimbo Nuquin Papa bëdamboen ismembimbi —quequin tantienquo nuqui iquec.

<sup>19</sup> Nadquo icsateuidi bunquid matses iqueque. Tanta. Chuinu. Nëidic aton chidopenquo chudquido. Nëidic aton bënëpenquo chudmequido. Nëidic dada daëd chichudnänquido. Nëidic opabimboec chudnante bunquin matses ismequin adoquido. Nëidic tsienbëdta shui chuibudquin icsamete bunquido. <sup>20</sup> Nëidic Nuquin Papan chiaid niac-niacquin ambi matsesbimboecnuc nacnenaïdi papa caquido. Nëidic nënëchoquido. Nëidic dauë icsa bedash icsa uanquido. Nëidic chieshëmënquido. Nëidic chieshëmë nec chushcanänquido. Nëidic cudasquido. Nëidic nëishëmënquido. Nëidic ambi naïduïdi naquido. Nëidic abitedi cuësh-cuëshëdmianquido. Nëidic: —Utsin chiaid tantiatipimbo iquebi. Èmbentsëqui bëdamboen chiembi —quequido. <sup>21</sup> Nëidic utsin na natiambo bunec chieshëmënquido. Nëidic tantiadenuen paëmbo icquid acquido. Inchëshën ushenquo icquin adoquido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabadtiapimbo iquec. Aden mibi chuibanondambi ënden.

<sup>22</sup> Padnuen Nuquin Papan Mayanën namiaïd yec nadquiec tabadquid. Nuquin Papabëdta matses tantiaquiec tabadquid. Esus tantiec cuishonquec tabadquid. — Nuquin Papan ëbi bëdamboen isec —quec bëdambo yec dacuëdenquo yec tabadquid. Utsibon chieshënaqui chieshëmënenquo yec tabadquid. Nëishëmënenquo yec tabadquid. Bëdamboen isquin utsibo nashunec tabadquid. Muainquo yec tabadquid Nuquin Papan namiaïd. <sup>23</sup> —Con nauidi naimbi. Èbiuidtsëqui bëdambo iquec —quenquo icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquo yec Nuquin Papan Mayanën namiaïdo Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquo. —Icsamboec tabadenda —quequin icsamboec tabadquid chuipampic. Nuquin Papan Mayanën tantiamiacpadec tabadquin aden chuipampid nuqui niaquenquo iquec. <sup>24</sup> Adoenquo icquin cuesten dectanac abided cuidadec unësaid Esus tantiaquin nuqui icsate bunaid ënquin nuqui mëmuntsiac. <sup>25</sup> Aden icsamboen nainquo yec bëdambo icnuna. Nuquin Papan Mayanën Esus tantiamiaïd icquin aidën tantiamiacpadomboen nanuna.

<sup>26</sup> —Èbiuidtsëqui bëdambo iquec —quenda. Adenquo yec nuqui chuiquid dëniacte bunenquo yec bëdamboec tabadnuna. —Èbi bunacpaden ëbi namianenquien icchitec. Utsien namechitec —quec chieshëmë nec tabadenda. Nëishnanenquo yec bëdamboec tabadnuna.

## 6

### *Esus tantiaquido bëdamboec isnante chiaïd*

<sup>1</sup> ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishec ëbitsen icsamane —queshun nëishenquo icquin aden chuiquid yendac. Abibi datantiadec: —Icsaquid nebi. Esus bëdamboen tantienquo yec adecbidi icsatsiabi —quequin tantiec: —Bëdamboec tabadta —quequid yendac. <sup>2</sup> Adec bëdamboec isnanec: —Bëdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

<sup>3</sup> Utsien: —Utsibëd onquetiapimbo iquebi. Èbiuidtsëqui bëdambo iquebi —quec abibi muauadquid icsambo iquec. <sup>4</sup> Adenquo yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Utsitedi icsambo icnubi èbiuidtsëqui bëdambo iquebi —quenda. <sup>5</sup> ¿Mimbi utsibon naïd chuibanshoda Nuquin



Papan: —Mibi bēdambo iquec —capatsiash? Padenquo. Mimbi bēdamboen naid isun: —Mibi bēdambo iquec —catsiash.

<sup>6</sup> Esus tantiaquidon nadoquid yendac. Nuquin Papan chiaid abi chuibanquid nashunquid yendac. <sup>7</sup> Piacbo sequidbimboec matses iquec. Tantienguio icquidēn icbompin uestsaidi siac canienquo ictsash. Padnuen tantiaquidēn ēshē bēdaidquo siac bēdamboec canitsiash. Tantienguio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenquo ictsash —quec muaic tabadenda. Ambi chiacpadomboen mibi cuidendac. <sup>8</sup> Ambi chiaid niac-niaquec abi icsate bunaiduidi naquid cuidendac. Nuquin Papan Mayanēn tantiamiacpadomboen naquidien bēdamboec tabadec unēsash Nuquin Papa yacno tabadendac. <sup>9</sup> Ēmbi aden chuisho tantiash bēdamboec tabadta. Bēdamboec tabadec chieshtoenquo icsho isun ambi tantiacpadēn Nuquin Papan abēdi nuqui tabadmendac. <sup>10</sup> Adec bēdamboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquiec nashunanquionona. —Shubu abentsēquēn tabadquidobimboec Esus tantiaquido iquec —queshun adonona.

### *Pabadon ēnquimbi chiaid*

<sup>11</sup> Is. Nua-nua icnuc dada uaquin ěmbimbo ēnquimbi dada uanu. <sup>12</sup> Muaquin chuiquidon mibi con tsusedpan chiacpadomboenuidi nametiadquo iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquo iqueque. —Esusuidi chuisho con matsesēn chieshēnquin cuidnushe. Moisesēn chiacpadomboen namenu —quequin mibi shui dēbid dēteshunemetiadquo icchitec. Aido muasho tantienda. <sup>13</sup> Aden mibi: —Adota —caquidombi Moisesēn chiactedi nainquien icchitec. Adquid yec: —Is. Bēdambo iquebique. Ēmbi chiacpadomboen nēidon naosh —quenuembien mibi shui dēbid dēteshunemetiadquo icchitec. Aidon chiacpadomboen nainda. <sup>14</sup> Ēbien adtiapimbo iquec. Esus tantiesabimboec: —Ēbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquo icnuec abided ciudadec unēspac caondash cuesten dectanac. —Aidquo tantiec bēdambo iquebi —caimbi. Aden Esus tantiec: —Ēmbimbo Moisesēn chiactedi naquin Nuquin Papa bēdamboen ismembi —quec ēnēdondabi. Adecbidi Esus tantiec ēbi bunaid ēnash icsate bunenquo iquebi. <sup>15</sup> —Moisesēn chiactedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshuniaidēmbi Esus tantienquo icsho Nuquin Papan cuidtsiash. Adembidi shui dēbid dētiacmaidēn Esus tantienquo icshobidi cuidtsiash. Nuquin Papan Mayanēn chuca uaidien Esus tantiaquid Nuquin Papan bēdamboen isquin bēdamboen tabadmec. <sup>16</sup> Ēmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matsesquo nec —caindac.

<sup>17</sup> —Abimbo chienquien icchitec —ēbi cainda. Esusēn chiaidquo chiombi. Aidquo tantiaquin ambi chiacpadomboen nabanta. Ēmbi Esusēn chiacpadomboen nasho isun chieshēnquin cuesaniondashi. Cuesonaid bish abi iquec. <sup>18</sup> Tanta, con utsibo. Mibi Nuquin Papa chianembi naden. —Mimbi nabocpadomboen con Icho Esuquidistubēdtan Cadasia yacnocquido bēdamboen ista, Papa —quequin Nuquin Papa chianembi. Padi. Aidtedi chuiquin dada uaombi.

## EPESO YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboecquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedeta.

<sup>2</sup> Aden Nuquin Papan bēdamboecquid icmenu caidombo icquin ma Nuquin Papan Nuquin Icho Esuquidistubēdtan ēnenquiocquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

### *Nuquin Papan abēd abuc bēdamboec tabadacpadquiocnoc icmiaid*

<sup>3</sup> Edoen, Nuquin Papa, Nuquin Icho Esuquidistun Papa bēdamboecquid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboecquid nec, Papa, quequin chiec nuquitedi onquedenec. <sup>4</sup> Nidaid abubēdta uabicquin aidēnquiocquidtedi uabicquin, Nēidtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin <sup>5</sup> abi bunacpadomboen Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec. <sup>6</sup> Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmebanec. Adoac, Bēdamboecquid mibi nec, Papa, quequin Nuquin Papa nuqui chuidenec. <sup>7</sup> Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. <sup>8</sup> Naden nanuna, quequin ambi tantiampicpadomboen aton bacuē icmebanac abēd icquido nuqui nec. <sup>9</sup> Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi matses tantiamenquio icpampid nēbi ambi cuēmbanaido Nuquin Papan tantiamebanec. <sup>10</sup> Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiampicpadquibi adquidquio icmenu caidquio Esuquidistu iquendac.

<sup>11</sup> Esuquidistu tantiaquid icsho isun ambi tantiampicpadomboen, Con bacuē icmi-aido nec, quequin Nuquin Papan cuēmbanaido <sup>12</sup> abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma utsibo cuēdēmpanuna. <sup>13</sup> Mibi icsaid bedshunash abided cuidadec Esuquidistu unēsspanēdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. <sup>14</sup> Aidēmbi mibi bēdambo icmiac Nuquin Papabēd tabadendac. Mibitedi bēdamboec tabadsho isash Nuquin Papa bēdambo iquec, quequin chiec ma utsibo cuēdēmpanuna.

### *Nuquin Papa chiec onquianiaid*

<sup>15</sup> ¿Bēdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abēd icte bunanec iccuededec, quequin chuisho tantiapombi. <sup>16</sup> Aden tantiashun mibitedi bēpiscudenquiocquin badiadquidēn-badiadquidēnquien naden Nuquin Papa chian-chianembi. <sup>17</sup> Esuquidistun Papa, icsaisambo, tantiaquidquio mibi cadoque. Mibi bēdamboen tantiaquid yacpadquiocnoc min bacuēbo Epeso yacnocquido min mayan icmeban, Papa. Adquido min Mayanēn icmiac mibi tantiadonequidombo

ma icpanuna. <sup>18</sup> Adecbidi, Abuc ëbëdi mibi iquendac, quequin mimbi chiacpaden tantiamequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bëdamboec tabadendabi, quequin Epeso yacnocquidon ma tantiapanuna, Papa. <sup>19</sup> Aden tantiamiac Nuquin Papan nadatiambocquin nabanquin Esus unësacsho uincuemenëdacpaden ëbi uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bëdambocquid icmebanec, quequin ma Epeso yacnocquidon tantiaquiopanuna, Papa. <sup>20</sup> Esuquidistu unës uacsho uincuemeshun mibi yacno aidi indoshon min dayunquio mimbi tsadumpanëdac, quequin tantiec Nuquin Papan nadatiambocquin naidquio nec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. <sup>21</sup> Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid nebi, chuiquid utsi quetiapimbocnoc. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna. <sup>22</sup> Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. <sup>23</sup> Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yacbimboec abëdi nuqui tabadendac.

## 2

### *Nuquin Papan Esuquidistubëd icmiaido*

<sup>1</sup> Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. <sup>2</sup> Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënquid dapan Satanashën yuaido mibi iccondac. Aidën Nuquin Papan chiaid niacacpadomboen mibitedishun niacbededpondac. <sup>3</sup> Adquiduidquio yec nuqui tantiacpadec icsadenec nuqui tabadpadenec. Adëc tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. <sup>4</sup> Adëc cuidnu queboedëmbi nuqui tantiec unësquiocquin Nuquin Papan comapenen nuquitedi tantiamepondash. <sup>5</sup> Ambi cuidnu caido icsaquido yec abëd ictiapimbo nuqui tabadpondac. Adëc tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. <sup>6</sup> Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoacimbocquido icsho Nuquin Papan nuqui bëdamboen isec. Adecbidi abuc Esuquidistubëd icquid nendabi, quequin tantiec nuqui tabadec. <sup>7</sup> Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna. <sup>8</sup> Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiembi, quetiapimbo nuqui icnubi, Mibi tantiamiosh. Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec. <sup>9</sup> Icsaquido icquin bëdamboen naic nuqui icsaid cuidadiapimbo nuqui iquec. Bëdamboen naic cuidadpebi, quiash abi icsaquid yequi, Bëdambocquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanëdash. <sup>10</sup> Nuquin Papan uaido nuqui nec. Aidëmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

*Esuquidistubëd abentsëc yacimboecquido*

<sup>11</sup> Nuquin Papan, Cuidnu, quenquiocquin comapenen tantiamiaidquio mibitedi icquin mibi ënden tabadaid tantiata. Shui dëbid dëtemesa isadaidpembo nec, quequin isadaidbon shui dëbid dëtemequidon mibi cuë nondash. Nuquin Papan matsesquio nebi, quequin shui dëbid dëtemequidquio isadaidbo nec. <sup>12</sup> Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Èbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abëdi ënëdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. <sup>13</sup> Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unëspanëdash, quequin tantiaquid icsho aidënquio abi yacno yuedendac. Nëbi aid tantiaquid yec abi tantiaquid utsibobëd abëdi tabadacimboecsho Nuquin Papan nuqui bëdamboen isec.

<sup>14</sup> Isadaidpembo isash isadaidbo, Èbëd icquidpenquio nec, quequin tantiec datamëncuenepondash. Adecbidi isadaidbo isash adquiecbidi isadaidpembo datamëncuenepondash. Adquido icboedi ëbi icsaid bedshunash Esuquidistu unëspanëdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamëncuenequio yec matses abentsëc yacimboecquido yanac. <sup>15</sup> Esuquidistu matsesash nidaidën tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanëdash icsainquiocquin. Adec tabadquin naimbudsho icsaquidbimboecnuc unës uapanëdash. Aden unësmesho isec Nuquin Papa, Padi. Chën, quenquio icpanëdash. Èbi yacno isadaidbo isadaidpembobëdtabi con madon yuedendac, quish chën quenquio icpanëdash. Datamëncueneboedi aido Esuquidistu tantiaquid yanash datamënenquio yanac. <sup>16</sup> Naden nata, quequin chiaidtedi nuqui natiapimboconoc nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic. <sup>17</sup> Matsestedi bëdamboen iste Nuquin Papa bunec quequin ambi chuibeniacpadec abided matses icsaid bedshunash unësquin isadaidbo isadaidpembobëdta Nuquin Papan bëdamboen isaïdo icmepanëdash. <sup>18</sup> Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedenec.

<sup>19</sup> Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaïdobëd tabadtequid mibitedi iquec. <sup>20</sup> Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantia. Esuquidistu abia yampid abi yacno yuedanquidquio yec abia nitsinaid cuate nidquidbimboecquid nec. Nuquin Papan chiaid chuibampampidobëd Esuquidistun ëbi chuibeneta caïdo shubu nitsinaïdbimboecquid neoaic. <sup>21</sup> Aidted abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. <sup>22</sup> Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.



### *Isadaidpembo Esuquidistu chuibenequid Pabado*

<sup>1</sup> Isadaidpembobëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboen mibi chuibanquidquio nebi. <sup>2</sup> Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. <sup>3</sup> Èbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. <sup>4</sup> Èmbi dada uaondaaid bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. <sup>5</sup> Èndenquio Nuquin Papan Esuquidistu nidmimbi, quequin chienquiocpampidëmbi nëbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac. <sup>6</sup> Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquio yec tabadtequido nendac.

<sup>7</sup> Nuquin Papan, Cuidnu, quenquiocquin nadatiambocquin ëbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. <sup>8</sup> Esuquidistu tantiabicquid utsi bëdiactsëc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaidquio tantiamequiopondashi. Adembidi ambi, Esuquidistu chuibeneta, caidquio nebi. Adquid icquimbi Esuquidistun matses bëdamboen tabadmenu, quequin tantiaid dadpen icnuc aidtedi uesquin chuitiapimbo iquebi. Aidtedi matsesën bëdamboen tantiatiapimbo icoapec. <sup>9</sup> Èbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiochoedi nëbi matses tantiamenuen Esuquidistu chuibeneta caidquio nebi. <sup>10</sup> Aden ëbipadquidon Esuquidistu chuibeniac icsaquid icboedi Esuquidistu tantiaquid dadpen yanac. Adsho isun aidtedi Nuquin Papan Esuquidistubëd abentsëc yacbimboecquid abipadquid ambi tantiampicpadomboen icmebanec. Aden icmebansho isun abi yacno tabadquin namequidon tantienquiochoedëmbi nëbi tantierendac. Nuquin Papan, Yuecshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. <sup>11</sup> Matses bëdambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icbo icmepanëdash. <sup>12</sup> Aton mado Esuquidistu ëbi icsaid bedshunash unësash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec. <sup>13</sup> Adecbidi, Esuquidistu chuibenesho bedshun Pabado quënën nauedac, quequin tantiec chieshenquiocquin Esuquidistu tantiaata, Epeso yacnocquido mibi caimbi. Èmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdambocquid icmenu, caid mibitedi neque. Chieshenda. Adembidi Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

### *Epeso yacnocquido tantiec Nuquin Papa chiec Pabado onquiaid*

<sup>14-15</sup> Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. <sup>16</sup> Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesa yanenquiocpanuna. <sup>17</sup> Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquio yec utsibëd tantiananec tabadquid ma Epeso yacnocquido icpanuna. <sup>18</sup> Aden pausunac, Èbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid

ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. <sup>19</sup> Aden tantiaquidquio yec Esuquidistu unësnëdash, quequin tantiec papudedash Esuquidistun matses tantiacpadquidquio Nuquin Papan ma mibitedi icmebampanuna.

<sup>20</sup> Nadquid Nuquin Papan ëbi icmetsiash, quequin nuqui tantiatiapimbocnobi nada-tiambocquin nabanquin ambi tantiacpadomboen abi yacpadquidquio nuqui icmebanendac. <sup>21</sup> Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuioapanuna. Ma nuquin tsyuecquidon tsyuecquidontsen adembidi chuioapanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

## 4

### *Abentsëc yacimboecquido Esuquidistu tantiaquido*

<sup>1</sup> Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembique. Tanta. Esuquidistu tantiaquido aton shubun icquido yec icbo bëdamboec tabadacpadquiec tabadteneta. <sup>2</sup> Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. <sup>3</sup> Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. <sup>4</sup> Esuquidistu tantiaquidtedi abentsëc yacimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. <sup>5</sup> Abentsëcquiobi mibitedishun con Icbo caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yacimboecquid nec. <sup>6</sup> Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

<sup>7</sup> Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. <sup>8</sup> Ëndenquio chiampicpadembi nëbi pausumbanec. Naden ënden chiampid neque. Tanta. Chuinu.

“Nuquin Papan abucquio indoac, Ëbi tantiaquidtedi ëbëdi tabadendac, quequin Esuquidistun bedbanshun buanacimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ënden chiampid nec. <sup>9</sup> “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tanta. Esuquidistu abia yampid yec abucquio tabadboedi, Matses icsaid bedshunash ëbided ciudadnu, quianacsho nidaidënsnun chidon tishpanëdash. <sup>10</sup> Aid nidaidënsnun tishacsho unës uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec. <sup>11</sup> Aden aid menebanac aidënsnun Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abëd iccuededquido isbanquin

chuiquin tantiamequid icmebanoaic. <sup>12</sup> Bëdamboec tabadtenequido ëbi tantiaquidtedi icmeta, cac aidën tantiacpadomboen adquido icmebanac <sup>13</sup> ma shubu dapan icquid dadpen yanec abentsëc yacimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

<sup>14</sup> Ambi pausunaidquio icquin abimbo chiacimboen utsibon chuisho tantiaben-abicquidën badedquio tantiacpaden tantienquio nuqui iquendac. <sup>15</sup> Tantaranec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yacimboecquid nuqui yanendac. <sup>16</sup> Ëbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yacimboecquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantiananquiec abi tantiaquidtedi Esuquidistupadquidquio abëdi abentsëc yacimboecquid yanendac.

### *Esuquidistun nua pausunacpadquiec tabadteniaid*

<sup>17</sup> Esuquidistubëd abentsëc yacimboecquid abi tantiaquidtedi iquendac, quiash, aidpadquid icnu, quec ënden icsamboec tabadnëdacadquiec tabadenda caimbi mibi. Esuquidistun ëbi chuibeneta caidquio icquin dada uaqun mibitedi aden chiemi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec. <sup>18</sup> Pashuacimboen tantienquio iquec. Nuquin Papabëd tabadte iquec, utsibo qesho tantiesa yec, Tantiatiapibi, quepec aido. <sup>19</sup> Icsaquid nebi, quequin badedquio chienquio aidon iquec. Adquid icsamianquidën yuaid yec, Icsanu, quiacpadec tabadec. Adec icsasho utsin istemaid nec. <sup>20</sup> Adpenquio Esuquidistun tantiamequin pausunaid iquec. <sup>21</sup> Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiasun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. <sup>22</sup> Adoac mimbi tantianëdacadec tabadoainda. Mibi ënden icsamboec tabadacadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. <sup>23</sup> Mibi icsate bunaid ënta. <sup>24</sup> Adsho isun ma Esuquidistun tantiacpadomboen tantiapanu qeshun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. <sup>25</sup> Adquid icnuec Esuquidistun shubun icquido nebi, quec muainquio yec Esuquidistu tantiaquid utsibobëd abimbo chuinanquidombo icta. <sup>26</sup> Nëishac icsainda. Nëishash abi ushëmbi bëdanta. <sup>27</sup> Satanasën yuanushe quiash badedquio bëdanta. <sup>28</sup> Ampequid icboedi Esuquidistu tantiaquid yanshun ampenda. Adquid icboedi chonoadquin mitsana bedshun utsin na nibëdsho isun menequid icta.

<sup>29</sup> Icsaquid onquiacimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. <sup>30</sup> Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. <sup>31</sup> Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. <sup>32</sup> Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacadquiec utsi icsaid bëpiscudoata.

## 5

<sup>1</sup> Nuquin Papan bacuëbo yec <sup>2</sup> tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquo icsho isun Nuquin Papan bëdamboen isaidquo Esuquidistu icpanëdash.

<sup>3</sup> Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda.

<sup>4</sup> Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta. <sup>5</sup> Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. <sup>6</sup> Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. <sup>7</sup> Adquidbëd icsainda.

<sup>8</sup> Ènden Esuquidistu tantiesa icquin inchëshquiocnoc isacbimboen tantienquo icboedi nëbi Esuquidistu tantiaquid mibitedi yansho ambi tantiamebaniaido icquin badiadnuc isucunacimboen tantiaquiota. Aden tantiec Nuquin Papan bacuëbo yec Nuquin Papan tantiamiacpadquiec bëdamboec tabadteneta. <sup>9</sup> Esuquidistun ambi tantiacpadomboen pausunac abi yacpadquiec nuqui bëdamboec tabadtenendac. Adembidi aid yacpadomboen abimbo chuidenequid icta. <sup>10</sup> ¿Nadec tabadshodabi Nuquin Papan bëdamboen istsiashe? Tanu, quequin adomboen nabanec tabadteneta. <sup>11</sup> Utsibëd icsainda. Utsi icsadenenubi mibi bëdamboec tabadtenesho isun abi icsaid utsin ëmpec. <sup>12</sup> Icsaquidën ompoquin naid chuitemaid nec. <sup>13</sup> Adquidën Esuquidistu tantiaquid bëdamboec tabadtenesho isun, Icsambocquid nebi, qeshun Esuquidistu tantiabempec. <sup>14</sup> Bëdamboec tabadquin ismedeniac icsambochoedëmbi bëdamboen tantiabentsiash. Esuquidistu tantiaquido chuiquin dada uaid nad iqueque. Tantia. Chuinu.

“Unësabimboen tantienquiocboedi isucunshun tantiabenacimboec bëdamboec tabadta.

Adquid icsho Esuquidistun mibi nua pausunendac.”

<sup>15</sup> Adec bëdamboec tabadnuec Esuquidistun tantiamiacmaid tabadacpadec tabadenquo yec Esuquidistun tantiamiacpadquiec tabadteneta. <sup>16</sup> Icsaquid dadpen iqueque. Aidpadquid iquenda. Esuquidistun pausunaid mibitedi bëdamboec tabadtenesho isec ma Esuquidistu tantiesa icboedi abi tantiaquid yampanuna. <sup>17</sup> Mimbi icsamboen tantiacpaden nabanenda. ¿Atotsi mimbi ëbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. <sup>18</sup> Icsachitomane quequin nua paëmbocquid aquenda. Aden aquec icsaindac. Icsate bunenquiocquin Nuquin Papan Mayanën tantiamiacpadomboen nua pausunaid icquin bëdamboen nabanta.

<sup>19</sup> Adec icsate bunenquiocquin Esuquidistu tantiaquid utsibobëdtan Nuquin Papan chiaid chuiquinc, chuiquid dapa Dabidën dada uampid sadmo caid utsi-utsien chuiquinc, cuëdënte utsi chuiquinc cain chiec cuëdënteneta. Adec cuëdënquin Nuquin Icbon naid chuideneta. <sup>20</sup> Esuquidistu tantiaquid icsho Edoenën Nuquin Papan bëdambo icmiaidtedi yec aidën naid chiec onquedeneta.

*Utsi tantiaquin nashunta quiaid*

<sup>21</sup> Esuquidistu con icbo nec, quequin ambi chiaid niacmane qeshun utsi tantiaquin nashunta.

<sup>22</sup> Adembidi Esuquidistun chiacpadomboen dadan inaidën min bënën chiacpadomboen nabanta. <sup>23</sup> Adembidi abi tantiaquidtedi chuiquidquo Esuquidistu nec. Abi



yacno indoshon ënëdenquio yec icsainquiocnoc tabadmendac. Adembidi aton chido chuiquidbidi aton bënë nec. <sup>24</sup> Esuquidistun chiapadomboen abi tantiaquidon nabanacpadomboen aton bënë chiaid naquidquio aton chido neoaic.

<sup>25</sup> Esuquidistu abuc tabadboedi abi abuc bëdamboec tabadtequid tantienquio yec unës uanushe quenquio yec matses tantiec nidaidënsun tishaid yec matses icsaid bedshunash abided ciudadec unëspanëdash. Abuc ëbëdi abentsëc yacimboecnuc tabadmenu, quec unëspanëdash. <sup>26</sup> Adecbidi, Ëbi tantiaquido icsaisa icmenu, quiash abided ciudadec unëspanëdash. <sup>27</sup> Adecbidi, icsaid nibëdquid bëdaidquio abi tantiaquido icmeshun Nuquin Papa yacno yuedshun, Ëmbi yuedboed min shubun ictequid nendac, quequin ismembi, quec Esus unëspanëdash. <sup>28</sup> Adomboembidi chido inquidën abibi tantiadacpadomboen ma con chido tantiaquin, Bëdambocquid icmenu, quequin nashundeniash ma aidbëdi bëdambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbëdi abentsëc yacimboecquid neoaic. <sup>29</sup> Abibi chieshëmëdesa dada nec. Bunquioquin peshun aquec. Adembidi iquenquin cuëte cuëc. Esuquidistun abi tantiaquido abëd icquido icsho aido tantiaquin nabanacimboen <sup>30</sup> dadan abëd icquid aton chido icsho aidi tantiaquin nashunquid. Dadaba uashun aidën shictodobi chicshun chido uapampic. Adoshon dadan nami aton canitebëdta chido uashun daëd uac abentsëc yacimboec aid daëdi yanac. <sup>31</sup> Nuquin Papan ënden dada uampid nad iqueque. Tanta. Chuinu. “Aidbëd icnu, qeshun bedash aton papa aton titabëdta nianacimboec daëdash aton chidobëdi abentsëc yacimboec tabadtenec.” <sup>32</sup> Adec dada aton chidobëd daëdash abentsëc yacimboecnuc ambi icmiampicpadec Esuquidistu tantiaquido aton shubun icquido abentsëc yacimboec tabadendac, quequin chiec. <sup>33</sup> Nëbi adomboembidi chido inquid ambi inaidbëdta chuioaimbique. Tantiata. Mibibi tantiadacpadomboen min chido bëdamboen tantiata dadan. Con bënë ëbi chuiquid nec, quequin aidën chiaid tantiata chidon.

## 6

### *Bacuëbobëdta bacuëchoquid tantiamequin chuibanaid*

<sup>1</sup> Bacuëbon Esuquidistu tantiaquid icquin papan chiapadomboen chieshenquiocquin nabanta. Titan chiapadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. <sup>2</sup> Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tanta. Chuinu: “Ëbi chuiquid nec, quequin tantiaquin papan chiapadomboen nabanta. Adembidi tantiaquin titan chiapadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: <sup>3</sup> “Amën anibëdtan chiapadomboen naquid Nuquin Papan bëdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

<sup>4</sup> Amën anibëdtan con bacuëbo chieshmemane qeshun bëdamboen chuiquin tantiamequin isme. Adembidi, aido pemeshun acme. Adembidi, Ëmbi chiapadomboen ma nabampanueshun Nuquin Icbon chiaid tantiamenu, quequin adobanta.

### *Utsin yuaido yuaquidobidi tantiamequin chuibanaid*

<sup>5</sup> Yuan mimbi Esuquidistun chiapadomboen nabanacpadomboembidi mibi yuaquidën chiapadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiapadomboen nabanta. <sup>6</sup> Min icbon chuishun isnuc ambi chiapadomboen bëdamboen mimbi nabanacpadomboembidi min icbon isenquiocnoc nabanoata. Esuquidistu con Icbo nec, quequin aidën chiapadomboen nanuna, quequin nidaidënsun min icbon chiapadomboen nabanta. Aden nabanquin Nuquin Papa bunacpadomboen mimbi nabanendac. <sup>7</sup> Min Icbo Esuquidistun aton Papan chiapadomboen chieshenquiocquin nacpadomboen nidaidënsun min

icbon chiacpadomboen chieshenquiocquin nabanta. <sup>8</sup> Bëdamboen nabanquido yuacmaidbëdta yuabo Nuquin Papan bëdamboen cuidquin menendac, quequin tantiaquin bëdamboen nabanta.

<sup>9</sup> Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Icho abucquio tabadquid min yuabon Icbobidi nec. Aidën abitedi isec: Nëidic yua icsho daëdpactsëc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

### *Satanas cuemetequid dasiuidaid*

<sup>10</sup> Nuquin Icho nadatiambocquin nabanquid iquec, quiash aidënquio nua pausunaid icta. <sup>11</sup> Satanacacumetequid dasiuiu, quiash, Nuquin Papa mibi nua pausunesho, Ai, cata Satanasën mua uaquin bedchitoshe queshun. <sup>12</sup> Matses isadacpadpenquio nami intacbëd isadesa Satanasbëd icquido nec. Aidtedi Nuquin Papan abi tabadaid tédion tabadmec. Aido icsamianquido nec. Matses yuanuequid Satanacacumetequid nec. Nuquin Papan uaid tantiash bëdambo mibi iquendac, quequin muaquin aidon chiec. <sup>13</sup> Aden muaquin chuiquid aidtedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatetequid ushë chonoc Satanacacumetequid mibi icsamenuc choacsho bëcuniacbimboen cacumec abi mibi nidtoash Esuquidistu tantiaquid yec nidendac. <sup>14</sup> Aid cacumec abi nidquid icnuc Nuquin Papan abimbo chiaidquio nacnëshëdabimboec tabadteneta. Adembidi, Nuquin Papan abi bëdamboec tabadtequid shictoncachimboec tabadteneoata. Adec tabadec abi nidtoash mibi nidendac. <sup>15</sup> Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudachimboen adomboembidi chuibenequin Satanacacumec nidacachimboec abi mibi nidendac. <sup>16</sup> Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquio dëcatemënquiash abi mibi nidendac. Aden Nuquin Papan tantiamequin pausunaidënquio dëcatemënquiash Satanacacumetequid abi tantiamenuc pian sedo-sedoachimboen pausuntemaid yec abi mibi nidendac. <sup>17</sup> Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauachimboec tantiec tabadteneta. Aden pausunac tabadquin Satanacacumetequid, Esuquidistu mibi bedec choenquio iquendac, quesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquio icquin mimbi chuisho tantiash Satanacacumetequid nendac. <sup>18</sup> Adecbidi, Nuquin Papan chiaid aton Mayanën tantiamiaid icquin utsibo tantiaquin baded-badedquiec Nuquin Papa chiec onqueta. Satanacacumetequid icsamenuc quiash Esuquidistu tantiaquid utsibo Nuquin Papa chiec onquedeneta.

<sup>19</sup> Èbitsen tantiaquin Nuquin Papa chuioata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin ëbitsen chuioa. <sup>20</sup> Esuquidistun chuibeneta caid icquin abi chuibenesho mëtaneshun quënën nauedaid nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

### *Ënquin chiaid*

<sup>21</sup> Nëbi ëbëd icquid chiembique. Tanta. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimiaidquio aidi nec. <sup>22</sup> Mibi yacno puduedshun ëmbi naidtedi ëbi tabadaidbëdta mibi chuibanendac. Èbi mimbi chuisho tantiash, Bëdambo iquebi, quependac Epeso yacnocquido, quequin Tiquico mibi yacno nidmembi.

<sup>23</sup> Mibëd icquido Esuquidistu tantiaquid utsibobëd ma bëdamboec tabadpanuna caimbi mibitedi. Esuquidistun Nuquin Papabëdtan abi tantiamiantequidbëdta utsi

tantiatequid pausunaid ma icpanuna caimbi mibitedi. <sup>24</sup> Ęnenquiocquin Nuquin Icho  
tantiaquidtedi ma abipadquid icpanuna.

## PIDIPOS YACNOCQUIDON ISTE

### *Pabadon tauamboen chiaid*

<sup>1</sup> Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. <sup>2</sup> —Con Icho Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

### *Pabadon Nuquin Papa chianiaid*

<sup>3</sup> Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. <sup>4</sup> Aden mibi tantiaquin Nuquin Papa chiec bëdambo yec cuis-honquebi. <sup>5</sup> Ènden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. <sup>6</sup> Nuquin Papan tantiamiac mimbi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. <sup>7</sup> —Èbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuide-niondambi. Aden chiac puduemenquio icquin abi quënën tsadunebi. Adquid icsho chieshënenquio icquin mimbi ëbi bëdamboen tantiec. Nuquin Papan ëbi icmiacpadquid chieshtoenuio icquid icquin mimbi ëbi adoec. Adsho mibitsen tantiembi. <sup>8</sup> Esusën matses tantiacpadomboen mibi tantiac unësquio iquec. Mibi istiadquio iquebi. Èbi adsho tantiaash Nuquin Papatsen: —Abimbo caic —quendac. <sup>9</sup> Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequio, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. <sup>10</sup> Aden tantiamiac: “Nadec tabadec bëdambo ictsiabi. Adec tabadenquio yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenuio icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. <sup>11</sup> Adec con Icho Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

### *Utsibon Esus chuibeniaid*

<sup>12</sup> Quënën nauedac ëmbi Esus chuibenetiapimbo icnubi utsibon chuibeniac utsin-utsinquien Esus tantiabenac caosh. <sup>13</sup> Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanasho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec. <sup>14</sup> Quënën nauedaqui dacuëdenquio iquebi. Èbi adquio icnuc: —Pabadon nacpadomboen dacuëdenquio icquin Esusën naid chuibanembi —quepac caosh Esus tantiaquido dadpen. Adshun dacuëdboedombi dacuëdenquio yanquin Nuquin Papan chiaidquio chuibeniac caosh.

<sup>15-16</sup> Aidon ëbi bëdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bëdamboen tantiaquin Esusën naid chuibeniac caosh. Utsibombien ëbi chieshënquimbi Esusën naid chuibeniac caosh. —Quënën tsadunac ma Pabado



mëyadbudchitono. <sup>17</sup> Aidën chuibantiapimbo icnuc ëmbiquien nanu. Aden ëmbentsëqui chuibanac dadpenshun tantiashun: “Mibi bëdambo iquec,” ëbi catsiash –quequin Esusquo tantienquo icquimbi Esusën naid chuibenec. <sup>18</sup> –Ëbi chieshë nec –¿quiashtabi nëishpe? Padenquo. –Ëbi chieshënquidon ëbi bëdamboen tantiaquidobëdtambi Esusën naid chuibanac matses utsibo utsi-utsiec Esus tantiaquido yanec –quiash bëdambo yec cuishonquebi. Adecbidi cuishonquebi: <sup>19</sup> –Pidipos yacnocquidon Nuquin Papa ëbi chianiac caosh –quiash. –Mëyadsho Pabado chieshtomenda, Papa. Abi quënën nauedquidon puduemequin nidmeta, Papa –quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquo iquendabi. Adembidi aidën nac quënën tsadenquo iquendabi. <sup>20</sup> Ëmbi naondacpadomboen dacuëdenquo icquin Esusën naid chuibantiadquo iquebi. Chieshtotiapimbo iquebi. –Ma utsibon: “Esuquidistu bëdambo iquec,” canu –quiash aduidequi iquebi unësabi yec. Utsin: –Cuesunechitono –caqui adecbidi chieshtoenquo ictsiabi.

<sup>21</sup> Unësabi Esuquidistu tantiec bëdambo iquebi. Unësash Esusbëd tabadequic bëdamboshë ictsiabi. <sup>22</sup> ¿Mitsipadtebi bumpeba? ¿Unëstedabi bumpeba? ¿Unësenquo yec tsadtedabi bumpe? Unësabi icquin ëmbi Esusën naid chuibanac utsibon Esus tantiabentsiash. <sup>23</sup> Nuquin Papa yacno nidash Esus isec bëdamboshë ictsiabi. Esus iste bunquiebi. <sup>24</sup> Aden tantiequi: –Unësabi yec Pidipos yacnocquido Esus tantiaquido Esus bëdamboen tantiamec ano nidtsiabi –quequin tantiec unëstiapimbo icoaibi. <sup>25</sup> Unësabi yec mibi yacno nidoatsiabi. Aden tantiec: –Nuquin Papan nëbi ëbi unës uamenquo iquec –queoaibi. Mibëd tabadquin Esusën naid bëdamboen chuibantsiambi. Adoac bëdiactsëc Esus tantiatsëchoedombi Esus tantiaquiec mibi bëdambo ictsiac. <sup>26</sup> Ëbi choacsho isash: –Pabado padpidec chomequid Esus bëdamboshë iquec –mibi quetsiac. Adec mibi cuishonquetsiac.

### *Chieshtoenda, quequin Pabado chiaid*

<sup>27</sup> Ëbi ano nidtiapimbo icnuc Esusën chiacpadec chieshtoenquo yec bëdamboec tabadta. Quënën ëbi nauedboedën puduemiac mibi yacno nidshun mibi bëdamboec tabadsho isash: –Pidipos yacnocquidon ëmbi chiacpaden naic –quetsiandabi. Nëbi mibi yacno nidtiapimbo iquebi. Adnuc mibi istanquidon: –Chieshtoenquo icquin Esus tantiec cuëshëdenquo yec Pidipos yacnocquido bëdamboec tabadosh. <sup>28</sup> Esus chieshënquidon: “Esusën naid chienda. Cueschitomane,” caqui dacuëdenquo icquin Esusën naid adembi chuibanosh –quequin mimbi naid chuisho tantiash bëdambo ictsiabi. Adec cuesambo yec nuqui: –Nuquin Papan icmiacpadec dacuëdenquo iquebi. Ëbi dacuëdenquo icmequidën ambi chiacpadomboen ëbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac –quequin nuqui tantiatsiac. <sup>29</sup> –Con Mado Esus tantiasho utsibon chieshëntsiandac –quequin Nuquin Papan tantiacpadomboen utsibon mibi chieshënendac. <sup>30</sup> Ëbi nacpadomboen mibi chieshënoaic. Mimbi isnuc ëbi chieshë nondash. Adembidi ëbi chieshënoaic nëbi. Nëid dada uaid isquin: –Pabado padpiden chieshënoaic –quequin mimbi tantiendac.

## 2

### *Utsi tantiec tabadta, quiaid*

<sup>1</sup> Tanta, con utsibo. Mibitedi chuinu. ¿Mitsipadquo Esus tantiaquido icpec? Esuquidistu tantiaquiec dayacquio yachimboec iquec. Adecbidi Esusën tantiaido yec bëdambo icquido nec. Adecbidi Nuquin Papan aton Mayan abëd icmequin bëdamboec tabadquid icmiaidobidi nendac. Adoaido matses tantiaquidombo nec. <sup>2</sup> –Adquidbidi nebi –quec adquiecbidi bëdamboec tantianancuedeta. Ëbi cuishoncamenuc adta. Abitedi: –Esusën chiacpadomboen nanuna –quecuededec chieshënanenquo yec

bëdamboec tabadta. <sup>3</sup> Nadec onquec tabadenda. —Ëbiuidtsëqui bëdamboshë iquec. Con nauidtsëqui nanu. Con nauidtsëqui bednu —quec mibiuidtsëqui tantiadec tabadenda. —Ëbi bëdapabi icnuc utsibo bëdamboshë iquec. Aido nashuntiadquio iquebi —quec bëdamboec tabadta. <sup>4</sup> Mimbi tantiacpadomboenuidi nainquio icquin utsin tantiacpadomboentsen nata. Mitsanauidi tantienquio icquin utsibo nashuntetsen tantiata.

<sup>5</sup> Esuquidistun nacpadomboen naic mibi bëdamboshë ictsiac. Aidën chieshtoenquio icquin Nuquin Papan chiacpadomboenuidi napanëdash.

<sup>6</sup> Aton Papa Nuquin Papapadquidquio yec Esus abitedishun Icbombo nepanëdash. Aton Papabëd yec bëdamboshë icboedi: —Padi icnuna. Nuquibi namec bëdambo iquebi —quenquio yec Nuquin Papan chiacpadomboen naic auëshquio chopanëdash.

<sup>7</sup> Adec aton Papan yuabimboecquid yanash ambi chiacpadec matsespanëdash chidon tishac.

<sup>8</sup> Adashic matses yec aton Papan chiacpadequi abided ciudadec unëspac caondash. Matses icsamboshë icquido cuidacimboen cuesten dectanquin icsaisambobi Esus unës uapac caondash.

<sup>9</sup> Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abëdi Esus tabadmepanëdash.

Aden abitedishun Icbombo icmeoapanëdash.

<sup>10-11</sup> —“Nuquin Icbombo Esuquidistu bëdamboshë iquec,” ma abitedi quenu —queshun aden Nuquin Papan abitedishun Icbombo Esus icmeoapanëdash.

—Ëmbi ëbi yacnoshon uaido mayan bëdabo yec nidaidën tabadquido matses yec unësacsho uincuemiaido yec quequido: “Nuquin Icbo Esuquidistu bëdamboshë iquec. Abi abitedishun Icbo icmeoaquid Nuquin Papatsen bëdamboshë iquec,” ma quenu —queshun adopanëdash.

### *Utsibo Esus tantiamete chiaid*

<sup>12</sup> Mibi tantiaquiembique. Tantia, con utsibo. Mibitedi chuinu. Esusën nacpadomboen mimbitsen bëdamboen nata. Ëbi mibëd icnuc mimbi nadeniondacadpadomboen ëbi nibëdnuc adembidi bëdamboen nata. —Nuquin Papa dacuëdampambo icquidën chiaid niacmane —quiash ambi chiacpadomboen naic aidbëdi tabadnush bëdamboec tabadta.

<sup>13</sup> —Ma bëdamboec tabadnu —quequin Nuquin Papan ambi chiacpadec tabadte bumequin nuqui bëdamboen tabadmeque. Bëdamboec tabadta.

<sup>14</sup> Adec bëdamboec tabadec chushcananenda. Adecbidi: —Bëdamboen nanuna —cac chieshec tabadenda. <sup>15</sup> —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bëdamboec tabad. Matses dadpenquio icsamboshë icnubi adequi bëdamboec tabad. Adec bëdamboec tabadquin icsambo icquido mimbi Esus bëdamboen tantiametsiac paposhquiacimboecnuc. <sup>16</sup> Mimbi adoac utsin: —Esus tantiasho Nuquin Papan ëbi bëdamboen isec. Nëbi bëdambo yanec unësashini aidbëd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidën padpidec chote ushën bëdambo ictsiabi. —Ëmbi chuibanondaido Pidipos yacnocquido ambi Esus tantiamiaidobëd choeque. Is —quec bëdambo ictsiabi. <sup>17</sup> —“Bëdambo mibi iquec,” Nuquin Papan mabi canu —queshun Esus tantiaquin mimbi bëdamboen nac. Utsibo nashunquin Esusën naid chieshtoenquio icquin mimbi chuibanac. Mimbi adoaid chuisho tantiashun: —Mibi unës uanu —caquini bëdambo ictsiac. —Aido bëdambo iquec —queshun mibi tantiec bëdambo yec cuishonquetsiabi. <sup>18</sup> Ëbi unës uaid chuisho tantiash adecbidi bëdambo icta. —Esus tantiec chieshtotiapimbo icsho Pabado unës uac —quiash bëdambo icta.

### *Pabadon Timoteyo chiaid*

19 Con madobimboecquid ëbëd icquid Timoteyo mibi yacno nidmetsiambi. — ¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bëdambo ictsiabi. 20 Timoteyopadquid utsi nibëdec. Aid abentsëcshumbi ëmbi nacpadomboen mibi tantiaquiec. 21 Utsibombien aton nauidsëqui tantiaquin Esuquidistun chiacpadomboen natiapimbo iquec. 22 —Timoteyon bëdamboen naondash —quequin mimbi tantiec. Mimbi tantianubi ëbëdtan Esusën naid chuibanondash con mado icbobimboecquin. Aid bëdambo iquec. 23 Adquid icsho mibi yacno: —Istan —catiadquio iquebi. Ëbi quënën nauedquido ëbi caic: —Unës uanu —quesho tantiabono. Tantiashun: —Ëbi quënën nauedquidon chiaid Pidipos yacnocquido chuitan, Timoteyo —catsiandambi. 24 Ëbitsen nëbi mibi yacno nidtiadquio iquebi. Ëbi caic Nuquin Icho: —Ma nidnu —quenuc anobi nidtsiabi.

### *Epapadodito chiaid*

25 Epapadodito con buchibimboecquid mimbi: —Pabado nashuntan —cac Pidipos yacnuësh chonëdaid nëmbo iquec. Utsibon chieshënubi dacuëdenquio icquin ëbëdtan Esusën naid chuibanondash. Adondaiddi nëbi: —Mibi iccondacno tabadec nid, buchi —caombi. 26 Aid mibi tantiec unësquio yec tsadposh. —Ëbi unëstsemboed con mat-ses chuinuec Pidipos yacno nidaccosh —quiash mibi ismete bunquiec shubiantiadtsëcquio tsadposh. Adsho isun: —Min shubuno nidec nid —caombi. 27 Adec unëstsenquiondash. Adshobien Nuquin Papan bëdamboen isquin bëdamepondash. Ëbitsen bëdambo icmenuen Nuquin Papan adopondash. Epapadodito unësquio icnuc ëbi shubiec tsadsho isash: —Aid unësan unësquio icnuc Pabado mëyadnushe —queshun Nuquin Papan Epapadodito bëdamepondash. 28 Adoacsho mibi yacno aid badedquio nidmetiadquio iquebi. Aidbëd iquec mibi bëdambo ictsiac. Mibi yacno nidsho isash ëbitsen bëdambo ictsiabi. 29 Epapadodito nidacsho bëdamboen ista cuishonquequin. —Nuquin Icho mibi bëdamiac. Aid bëdambo iquec. Mibitsen bëdambo iquec —quequin chuita mat-ses dadpen tantiamenuen. Adquid Esus chuibanquido utsibo mibi yacno nidacsho adembidi bëdamboen ista. 30 Esuquidistun chiacpadomboen naic ëbëdi tabadec Epapadodito chondash. Chieshëmënquido dadpen icnubi ëbi nashunec tabadec daicsabudash unëstsenondash. Chotiapimbo icquin mimbi: —Pabado nashuntan —cac choash nibëdantsenondashe. Mibi yacno nidacsho bëdamboen ista.

## 3

### *Esusuidtsëqui tantiasho Nuquin Papan bëdamboen isaid*

1 Nuquin Icho Esus tantiec cuishonquenuna. Aduidequi icac bëdambo ictsiash. Tantia, con utsibo. —Tantienguio yanushe —quequin ëmbi chiondaid dada uaqin padpiden mibi chuioanu. 2 Muaquidon chuisho tantienda. Aidon: —Shui dëbid dëteshun secaidouidi Nuquin Papan bëdamboen istsiash —quequin chuisho tantienda. Aden chiec icsa uanquidombo neque. Uimanëmënquidoen nechitec. 3 —Shui dëbid dëteshun secaid nec —¿queshunda Nuquin Papan nuqui bëdamboen ispec? Padenquio. Aidon Esus tantienguio icsho bëdamboen isenguio icquin aton Mado Esus tantiaquidoen Nuquin Papan bëdamboen isec. Aton Mayanën tantiamiac: —Nuquin Icho Esuquidistu bëdamboshë iquec. Abided cuidadec unësaid tantiasho Nuquin Papan nuqui bëdamboen isec. Ëmbembi naquin Nuquin Papa bëdamboen ismetiapimbo iquebi —quequin nuqui tantiec. 4 Matsesën tsusedpan chiaiduidi tantiasho Nuquin Papan bëdamboen iste icnuc nadtsiabi. —Tsusedpan chiaid utsibon daëdpactsëc nanuc ëmbimbo naquin dadpenquio nabanombi. Aden ëmbimbo dadpenquio nasho Nuquin Papan ëbi bëdamboen isec. Adembidi isadaidbombo icsho ëbi bëdamboen isoaic —quetsiabi. Nëbi adtiapimbo iquebi. 5 Isadaidbo nebi. Isadaidbon chidon tishacsho sietetedec ushun Moisesën

chiampicpadomboen shui dëbid dëteshunenëdaidquio nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidën onqueten onquequid nebi. Moisesën chiampid namequidquio padiseyobo caid niondabi. <sup>6</sup> Adquid icquin icsambo icquido danquin Esus tantiaquido cuesun secatiadquio iccondabi. Nuquin Papan chiacpadomboen natiadquio iquequi adondabi. Moisesën chiampiduidi nate bunquiondabi.

<sup>7</sup> Adquid icquin Esus tantiabi: —Ëmbimbo naic bédamboshë iquebi —quequin icsamboen tantiapondambi. Adondaiddi Esus tantiabenash: —Ëmbimbo naiquini icsambo iccoc. <sup>8</sup> Nëbi con Icbombo Esuquidistu tantiec bédambo iquebi —quequin tantiabenondambi. Aiduidtsëqui tantiatiadquio icquin icsa secacimboen ëmbimbo naid ënondambi. <sup>9</sup> Esus tantiate bunquiebi. Adquid yec: —Moisesën chiampicpadomboen ëmbimbo naiquini bédambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bédamboen isquin ëbi bédamboen tabadmec —quequin tantiabenondambi. <sup>10</sup> Aden tantiabenshun Esusuidtsëqui comapenen tantiatiadquio iquebi. —Comapenen tantiaquin Nuquin Papan uincuemaid icquin Esusën bédamboen tabadmetsiashi —quec Esus tantiate bunquiebi. —Nuquin Papan chiacpadomboenuidi nasho mëyanac Esus unësac caondash. Adembidi Nuquin Papan namiacpadomboen nasho mëyanac chieshtotiapimbo ictsiabi. <sup>11</sup> Unësambo icsho Esusën bédamboen tabadmetsiashi. Unësacsho Nuquin Papan uincuemetsiashi —quec adec Esus tantiate bunquiebi.

#### *Nuquin Papan chiacpadomboenuidi nate bunaid*

<sup>12</sup> Tanta, con utsibo. Mibitedi chuinu. —Nuquin Papan chiaid niaquesambo nebi —¿quectabi ique? Padenquio. Adquio ictiadquidi adquio yenquieni icchitec. —Bédamboshë icmenuen Esuquidistun yuapondashi —quequin tantiec bédamboshë icte bunquiebi.

<sup>13</sup> Adec bédambo yanabi yec: —Ëmbi naboed naic bédamboshë iquebi —quenquio icquin Esusquio tantiaquin ambi chiacpadomboen natiadquio iquebi. <sup>14</sup> —Bednu —quequin bedteuidtsëqui tantiec titinquiacimboen Esusquio tantiaquieci ambi chiacpadquieci bédambo ictiadquio iquebi. —Adec tabadec unësacsho Nuquin Papan abi yacno ëbi tabadmec —quec bédambo icte bunquiebi.

<sup>15</sup> Nuquin Papan chiacpadomboen natiadquio icquin ëmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquio icquin abentseabentsen naindambi —quesho Nuquin Papan ambi tantiaid bédamboen tantiametsiash.

<sup>16</sup> Nëbi nuqui icbocpadquieci tantiananquieci bédamboec tabadnuna.

<sup>17</sup> Ëbi yacpadquieci bédamboec tabadta. Ëmbi chiacpadomboen utsibon nasho isun adomboembidi bédamboen nata. <sup>18</sup> Ëmbi chuideniondacadpadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided cuidadec cuesten dectamëdaid Esus tantiaquid nebi —quetsëchoedi icsamboec tabadec. Adquido Esus tantiaquidpenquio nec. <sup>19</sup> Peteuidtsëqui tantiec icsambo yequi: —Bédambo iquebi —quec tabadec. Nuquin Papa tantienquio icquin nidaidën icquiduidtsëqui tantiec.

Unësash Nuquin Papa yacno nidtiapimbo yec icsambo icquido cuidacno nidendac. <sup>20</sup> Padnuen Nuquin Papan bédamboen isaido yec aidbëd tabadtequido nuqui nec. Abi yacno buanuec abucuësh Nuquin Icho Esuquidistu chosho isnuec nuqui tabadec.

<sup>21</sup> Choshon aidëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquio nuqui iquendac. Abitedishun Icbombo icquin ambi chiacpadomboen abitedi namequidquio icquin aden nuquin dada chuca uaindac.

## 4

### *Esus tantiec cuishonquiaid*



<sup>1</sup> Ęmbi aden chuisho tantiash Nuquin Icbon chiaid niaquenquo yec bēdamboec tabadta. Mibi tantiaquin mibi istiadquo iquebi. Mibi caic: –Ęmbi chuibanondaiddo Esus tantiabenash bēdambo ictiadquo iccondash –quec bēdambo iquebique. Adquiec chieshtoenquo icquin Esus tantiec bēdamboec tabadta.

<sup>2</sup> Tantia. Nēbi chido daēd Ebodia caid Sintique caidbēdtatsen chuinu. Amicananenda. Esus tantiaquido yec: –Ai, Nuquin Icho Esusēn tantiacpadomboembien natiad –quec tabadta. <sup>3</sup> Tantia, buchi. Ębēdtan Esus chuibanondaiddo icsho mibitsen chuinu. Aid chido daēd chuiquin: –Bēdamboec isnanta –cata. Utsibon chieshēnubi ēbēdtan aid daēdshun Esusēn naid chuibeniondashe. Adembidi Quedemente caidētsen ēbēdtan chuibanondash. Adembidi utsibontsen. Adquidotedi Nuquin Papan: –Esusbēdta ēbi tantiaquido mibi neque. Ębēd tabadec cho –caindac.

<sup>4</sup> –Nuquin Icho Esus tantiaquiec bēdambo yec cuishonquenuna –caimbi. Esus tantiaquiec cuishonquenuna. <sup>5</sup> –Ma utsibo: “Esus tantiaquido chieshēmēnenquo yec bēdambo iquec,” ma quenu –quiash bēdamboec tabadnuna. Nēbi Nuquin Icho Esus choeque.

<sup>6</sup> Adecbidi chishpiquec tabadenda. –¿Atotsimbi napeba? ¿Atotsimbi pepeba? ¿Nēbida con matses unēspeba? –quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinuna. –Ębi nashunquin utsibotsen nashunta, Papa. Aden nashunec mibi bēdambo iquec, Papa –quequin Nuquin Papa chuinuna. <sup>7</sup> Aden nuqui chiac aidēmbi nuqui bēdambo icmec dacuēdenquo icnuc. Adoac bēdambo icnuc utsibo: –¿Mitsipadec dacuēdenquo yampash? –quetsiash. Nuquitsen: –¿Mitsipadequini bēdambo yampo? –quetsiac. Adec: –Nuquin Papan ēbi nashunquidquo nec –quequin Nuquin Papa chianequin Esus tantiaquiec nuqui dacuēdenquo yec bēdamboec tabadtsiac.

### *Bēdamboshē iquec, caiduidi tantiata, quiaid*

<sup>8</sup> Tantia, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Tsutsi bēdamboec tabadquid icpec? Adquidtsen tantiata. Aden: –Bēdambo iquec –caidtedi tantiata. <sup>9</sup> Adembidi Ęmbi chuisho mimbi tantiondac. Aden Ęmbi chiondaiddo tantiaquin Ęmbi naondacpadomboen nata. Adsho isash mibi dacuēdenquo icmequid Nuquin Papa mibēd iquendac.

### *Pidipos yacnocquidon bēmiaid*

<sup>10</sup> Nēbi mimbi bēmiaid bedash bēdambo iquebi. Ęnden mimbi aden menianiondashumbic yuectaneshun nēbi ēbi tantiaquin mimbi meneoaid bēacsho bedombi. –Nuquin Icbon tantiacpadomboen padpiden Pidipos yacnocquidon ēbi ma menenuequin piucquid bēmiac –quiash bēdambo iquebi. ¿Ębi tantienquioda mimbi ictionda? Ębi tantiaquin Ęnden bēmetiadquidi tsundan bētiambo icnuc mibi nepanēdac. <sup>11</sup> –Con na nibēdeque. Beccho –¿quectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. <sup>12</sup> Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. <sup>13</sup> ¿Ębenquiodabi adti? Padenquo. Esusēn namiaquini adquo iquec. Aidēmbi namiac ambi chiacpadomboen naimbi. <sup>14</sup> Adnuc: –“Mēyadec,” quiosh –queshun mimbi ēbi ma menenuequin bēmiaid bēdambo iquec.

<sup>15</sup> Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquo iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac. <sup>16</sup> Adoquini shubu dadpen icquid utsi Tesadonica caid yacno nidondac. Ambo yuec tabadnubien: –“Pabado aton na nibēdec,” quiosh –queshun mimbi piucquid bēmiaccondac. Yuectaneshun adembidi.

Adshumbic padpiden. <sup>17</sup>—Mimbi bëmiaid bëdambo iqueque. Utsi beccho —¿quequindambi aden chuipe? Padenquio. —Pidipos yacnocquido Esus tantiaquido bëdambo iquec —Nuquin Papa camete bunquin: —Mimbi bëmiaid bëdambo iccosh —caimbi. <sup>18</sup> Utsi-utsien bedshumbeneshun mimbi bëmiaid Epapadoditon bëacsho bedondambi. Mimbi bëmiaidbëd daëdash ëbi bunaid dëniaquec con na dadpenquio yanac. —Mibi bëdambo iquec —Nuquin Papa camenuen mimbi bëmenëdac. Adsho isash Nuquin Papa: —Adquido bëdambo iquec —quependac. <sup>19</sup> Abitedishunquio Icbo Nuquin Papa nec. Comapenen tantiaquin Esuquidistu tantiaquido bëdamboen isquin nashunquidquio nec. ¿Ada mitsana nibëdnuc mëyadac bimboec tabadpe? Adec mëyadsho isun Nuquin Papan mitsana icmendac. Unësquio icsho aidëmbi mibi bëdambo icmendac. Adecbidi: —Chieshtotiadquio icchitebi —quesho Nuquin Papan nac mibi chieshtoenquio iquendac. —Aid nibëdnuc unësebi —mimbi caid Nuquin Papan icmendac. <sup>20</sup> Èbi adsho tantishun: —Bëdamboshë mibi iquec, Papa —quequin Nuquin Papa chuinuna ënenquio icquin.

*Pabadon ënquimbi chiaid*

<sup>21</sup> Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. <sup>22</sup> Adembidi nëmbo Doma yacnoshon Esus tantiaquido abitedishun mibi tantiec. Chuiquid dapa Sesad caidën shubun icquido Esus tantiaquido icquin adembidi mibi tantiec. <sup>23</sup> Mibi tantiaquin: —Con Icbo Esuquidistubëdtan Pidipos yacnocquido bëdamboen isquin bëdambo icmeta, Papa —quequin Nuquin Papa chianembi. Padi. Aidedi chuiquin dada uaombi.

## CODOSAS YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. <sup>2</sup> Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

### *Nuquin Papa chuidoniaid*

<sup>3-4</sup> Nuquin Papa, Nuquin Icho Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. <sup>5</sup> Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. <sup>6</sup> Ëbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembidi ismebanoaic. Adoac nidaid utsin-utsinquiec tabadquidon Esuquidistu tantiashun adomboembidi ismebanoaic. <sup>7</sup> Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. <sup>8</sup> Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

<sup>9</sup> Aden Epapadasën chiac mibi tantiec baded-badedquiec Nuquin Papa chiec onquianonquianebe. Mimbi tantiacpadomboen min Mayanën pausunacsho Codosas yacnocquido bëdamboen tantiamé, Papa, quequin chian-chianembi. <sup>10</sup> Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa. <sup>11</sup> Adembidi mimbi dayacquio icmenu caid Codosas yacnocquido iquec natiatéquid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. <sup>12</sup> Mimbi bëdambocquid icmebanac icsaquid nibëdacno mibi tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

<sup>13</sup> Ënden adquidpenquio yec Satanasën yuaido yec, Nuquin Papa tantianu, quesa nuqui iccondac. Aidën yuaido icsho Nuquin Papan nuqui mënchicpondash. Aden nuqui mënchicquin abi cudasaidquio aton Madombo Esuquidistu icsaisapadquid nuqui icmenuequin aidi Nuquin Papan nuqui tantiamépondash. <sup>14</sup> Abipadquid icmenuc

matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquio yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

*Abia yampidquio iquec abitedishun icbombo Esuquidistu nec quiaid*

<sup>15</sup> Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec.

<sup>16</sup> Nidaid abubëdtabi uashun aidënquiocquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec.

<sup>17</sup> Esuquidistu abia yampidquio iquec. Aidëmbi, Ëmbi uabanaido namebanu, quequin ambi chiacpadomboen namebanec.

<sup>18</sup> Nidaid utsi-utsiec yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash.

<sup>19</sup> Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquio con mado nec, quiash, Bëdambo iquebi, quec Nuquin Papa tsadec.

<sup>20</sup> Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided cuidadec unëspebi, abi quiampicpaden matsesën cuesten dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aidtedi Nuquin Papan bëdamboen isec.

<sup>21</sup> Ënden Nuquin Papan matsespenquio mibitedi iccondac. Icsamboen tantiec icsaquid yec Nuquin Papa chieshënquido mibitedi iccondac.

<sup>22</sup> Adquid icboedi, Ëbi yacno yuednu qeshun Esuquidistu tantiaquidotedi cuidenquio yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec.

<sup>23</sup> Ënenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ënenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

*Esuquidistu tantiadoneta, quequin Pabadon chuibanaid*

<sup>24</sup> Ëbi tantiaquid Nuquin Papan bëdamboen isendac. Aden isac, Ëbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoacsho, Cuishon, quebi. Ënden abi tantiaquid yanacsho isun, Ëbi chuibeneta, quequin chuishumbic, Ëbi chuibansho mibi mëyante dadpen iquendac, quequin Esuquidistun chuioapondashi. Aden aidën chiondacpaden mëyanaid nebi. Ma abi tantiaquid dadpen yanu quequin chuibenembi ambi tantia-

actededi mëyante yanuc. <sup>25</sup> Ai, Nuquin Papan, Esuquidistu ambi naidbëdta chuibeneta, caidquio nebi. Abi chuiquidquio nebi. <sup>26</sup> Nuquin Papan ambi tantiampicpaden chienquiochoed nëbi aid tantiamiac Esuquidistu tantiaquido yanec. <sup>27</sup> Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

<sup>28</sup> Aden ëbëdtan ëbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu



queshun. <sup>29</sup> Badiadquidën-badiadquidënquien aton Mayanën nadatiambocquin nac nati-atequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

## 2

<sup>1</sup> Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi. <sup>2-3</sup> Esuquidistu tantiadonequido ma yampanueshun dayacquiocquin chuibenec nebi. Abentsëc yachimboec tantiananquidquo ma yampanueshun dayacquiocquin chuibenec nebi. Adquidquo yanshun utsin abimbo chuisho tantiash, Abimbo chuiquid nec, quequin ma bëdamboen tantiapanuna. Adembidi, abimbo chiacbimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. <sup>4</sup> Comapenen tantiaquid icquin, Utsi tantiata, quequin Esuquidistupenquo chuisho ma tantienquo mibitedishun icpanu, quequin aden mibi tantiaquin chiec nebi. <sup>5</sup> Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquo yec iccuededquin aiduidtsëqui tantiadonec, quequin mibi yacnoësh choquidon chuisho tantiash bëdambo iquebi.

*Esuquidistu tantiaquid iquec utsin chiacpaden naic abuc nidendabi, quequin tantienda.*

<sup>6</sup> Adecbidi Esuquidistu tantiaquid yec abëd icquido iquec, Aidi con Icbo nec, quec ambi chiacpadquiec tabadteneta. <sup>7</sup> Adec tabadquin cuëte tapun uquëducquiocquidën cuëte uidënash canidoacbimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bëdambo iquebi, quequin baded-badedquien Esuquidistu chuidoneta. <sup>8</sup> Adembidi aid tantiadonequid icquin aid tantiesan ëndenquo ambembi chiec onquiampicpaden nëbi icquidën adomboembidi chuisho Nuquin Papan chiacpadomboen chïesa nec, quequin tantiaquiota.

<sup>9</sup> Matsesash Nuquin Papapadquidquibidi Esuquidistu icpanëdash. <sup>10</sup> Esuquidistubëd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibëd icquid Esuquidistu nec. <sup>11</sup> Aidën, Eëbëd icquid nec, quequin mimbi tantiaid icsa cuëte cuidi pateshuniacbimboen mibi ëmebanec. Chështen tiacbimboen nainquiocquin bëdamboen tantiamequin aton Mayanën mibi icsaid ëmendac. <sup>12</sup> Adembidi Esuquidistu unësacsho chococacbimboecnuc abi tantiaquid paucnu quiacbimboen acten mibitedi mentobanondash. Adembidi Nuquin Papan Esuquidistu uincuemenedacimbocnuc icsaisa icmenu, quequin acten mentotanquin mibitedi cadobampondash.

<sup>13</sup> Eënden Nuquin Papan matsespenquo icquin mimbi tantiaid icsa icnuc unësacimboc ec icquin Nuquin Papan ënden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobëd icquido nec, quec Nuquin Papa nuqui icsaidtedi bëpiscudac. <sup>14</sup> Eënden, Matses icsaid bëpiscudnu, quenquiocquin, ëmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanëdash. Adquid icshobi icsaquidbimboecnuc matsesën unës uaquin cuesten dectanac matses icsaidtedi bedshunash abibi ciudadec unëspanëdash. Aid unëso isun, Matses icsaid cuidosh, quequin abi tantiaquidquo icsaid ambi naden nata quequin dada uamiaid ucacbimboen tantiec bëpiscudtenec Nuquin Papa. <sup>15</sup> Esuquidistuidi Nuquin Papan naden nata quequin chiaid niaquesa yec matses icsaid bedshunash abided ciudadec

unēsash uincuenquin Nuquin Papan chiaid niacquido mayan icsabo dēniacquec Esuquidistu abitedi chuiquid yampanēdash. Aden dēniacshun, Nēidtedi ēbi tantiaquido chuiquid ictiapimbo iquec, quequin bedshun mētaneshun buanacximboen Nuquin Papa Esuquidistun ismepanēdash.

<sup>16</sup> Aden chuiquid utsitedi dēniacquid Esuquidistu nec, quequin tantias, Nadquid peshun nadquid utsi acsho Nuquin Papan ēbi bēdamboen isec, quenda. Adembidi, Nēid ushēmbi abi tantiec iccuededsho isun Nuquin Papan ēbi bēdamboen isec, quenda. Adembidi, ushē chuca choaid usudsho isec cuēdēsho Nuquin Papan ēbi bēdamboen isendac, quequin tantienda. Esuquidistuidi tantiaquidquio icsho Nuquin Papan ēbi bēdamboen isec, quequin tantiata. <sup>17</sup> Matses icsaquid yec ambi naidēnquio abembi bēdantiapimbo iquec, quequin tantiamenuquin Nuquin Papan ambi, Naden nata, quequin chiaid Moises menepampic. Ēmbi bēdamboen isaidquio matses bēdambo icmequid choendac, quequin tantiaquin ambi naden nata quequin chiaidba Moises menepampic. <sup>18</sup> Esuquidistun bēdambo icmiaid nebi, qeshun utsi icsamboen chiec onquesho tantienda. Ambibi chiec onquesho tantiasshun Esuquidistu tantesa uaindac. Adquidbēd Esuquidistu ictiapimbo iquendac. Adquidēn, Mibi chuiquidpenquio nebi, qeshumbic ambia tantiaquidximboecquin ambi tantiaid Nuquin Papan uaid mayan bēda mibi tantiamenuquin chuibanasho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onquesho tantienda. <sup>19</sup> Adquidēn Esuquidistu abi tantiaquidon icbombo nec, quequin tantienquio iquec. Adecbidi Nuquin Papan tantiapadquiec Esuquidistu tantiaquid dadpen yanash aton utsibobēd tantiananec nashunanec aton icbopadquid yanec, quequin tantiesa adquid nendac.

<sup>20</sup> Tantianu. Ēbi chui. ¿Atotsi quiash Esuquidistu tantiaquid yanash ēbi icsaid cuidnuec Esuquidistuded unēsash uincuenacximboec bēdamboec tabadebi, qeshumbic, <sup>21</sup> Nēid bedtemaid nec. Aid bedsho mayanēn mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unēsacsho chococabi yacximboen, Nēid petemaid nec. Aid pesho mibi cuidendac, qesho mimbi tantiape? Aden Esuquidistu tantienquio icquidēmbimboen, Nēid mishtemaid nec. Aid misho mibi cuidendac, qesho mimbi tantiapec. <sup>22</sup> Nadquid petemaid nec. Nadquid mishtemaid nec, quequin matsesēn ambibi chuiquin tantiamete nec. Ambi petemaidbēdi ambi mishtemaid ēnēdendac. <sup>23</sup> Matsesēn bēdamboen tantiacximboen chiaid aidtedi nec. Nēid ēmbi tantiaid nec, qeshun aid bēdamboen ismenuen naden nanuna, quequin matsesēn chiec. Aden ambibi tantiasshun, Naden nata, quequin mibi chuitiapimbo iquebi, qeshumbic namenuquin comapenen adquidēn chuibanec. Adecbidi, Damēyamēdasho ēmbi tantiaidēn ēbi bēdamboen istias, quequin ambibi tantias damēyamēdec. Adec damēyamē-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

### 3

#### *Bēdamboec tabadaid chiaid*

<sup>1</sup> Esuquidistu tantiaquid yec abia uincuenenēdac abuc nidash Nuquin Papa yacno icsate bunquid nibēdacno tabadacpadquiec tabadteneta. Adec tabadec, Nuquin Papan dayunquio Esuquidistu tsadec bēdambo iquec, quequin abēd icte bunquin Esuquidistu tantiadonec tabadta. <sup>2</sup> Abuc abēdi ēbi icnuc aton na con na iquendac, quequin tantiaquin nidaidēnshun bednu, quequinuidi tantienda. <sup>3</sup> Esuquidistu unēsaid tantiaquin aidbēdtabi mibi icsaid chococashunacximboec icsatiapimbo yec nidaidēn tabadta. Adecbidi Esuquidistu uincuenash abuc Nuquin Papa yacno nidash, Ēbi tantiaquidtedi bēdaidquio iquec. Aido ēbi cudasaidquio nec, quequin aidēn dayun uaid nuqui nec.

<sup>4</sup> Aidën padpidec choshon abi yacno buanac abipadquidquo bēdaidquio nuqui iquendac.

<sup>5</sup> Adec abi yacnoësh abēdi bēdaidquio iquendabi, quequin mibi icsaidtedi cuesun secacimboen ěmbanta. ěmbi inacmaid chudnu, quenquiocquin ěnta dadan. Adembidi, ěbi inesa chudmenu, quenquiocquin ěnta chidon. Adembidi, Chudnu, quequinuidi tantiaid ěnta dadan. Adembidi, Chudmenu, quequinuidi tantiaid ěnta chidon. Adembidi mibi bunaid icsatedi ěnta. Adembidi aton na daēdpactsēc icquiděmba ma bednu, quenquiocquin, ěmbia bednu, quequin tantiaid ěnta. Aden ěnshun, aton na daēdpactsēc icquiděmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesěn ambibi nacnenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. <sup>6</sup> Abi bunaid icsabēdta ambi tantiaid icsa ěnesa icscho matsesěn naid chuibante ushě choan adquidtedi Nuquin Papan comapenen cuidendac. <sup>7</sup> Adquid icboedi <sup>8</sup> něbi adenquiocquin ěnash bēdamboec tabadteneta. Adecbidi comapenec něishboedi adenda. Adecbidi, cuesantiadquio yec něishboedi adenda. Adembidi, utsi icsambo icmeboeděmbi adoenda. Adecbidi, utsi icsamboen chuiboedi adoenda. Adecbidi, tsienbēdta shui chedo chiec icsamboen tantiec onqueboedi adenda. <sup>9</sup> Adecbidi, mua uanamboedi ěnēdta. Adquid icboeděmbi icsactsēcquid niacbimboen mibi icsaid ěnta. <sup>10</sup> Min tantiate chuca uacbimboecnuc abi tantiadonequidquio icnuequin mibi tantiamequid tantiadad-tantiadadta. <sup>11</sup> Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Něid isadaidbo nec. Něidic isadaidpembo nec, quequin tantiesa mibi iquendac. Adecbidi, něid shui děbid dětemequid nec. Něid shui děbid dětemesa nec, quequin tantiesa mibi neoaic. Adecbidi, Něid chotac nec. Něidic mayu nec, quequin tantiesa mibi neoaic. Adecbidi, Něid yua nec. Něidic yuaquid nec, quequin tantiesa mibi neoaic. Adquid Esuquidistu tantiaquid icnuc aběd icquid aton matses nec. Abi tantiaquidtedi chuiquid dapa abentsēcquiobi Esuquidistu nec.

<sup>12</sup> Aden Nuquin Papan cuěnaido yec ambi bēdambocquid icmebanaidobi abi cudasaiddo yec ambi tantiamiaid nebi, quiash bēdambocquid isadacbimboec nadec tabadteneta. Utsibo natiamiaid icscho isun bēdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid ěmenuec comapenec chushquenquiocquin bēdamboen chuiban. Tantesa uasho isun ismeded-ismededta. <sup>13</sup> Mimbi nacpadomboen utsibon natiapimboesho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquio yec běpiscudta. Nuquin Papa ěbi icsaid cuidenquio yec běpiscudosh, quec adta. <sup>14</sup> Adec tabadtenec tantiananta. Adec tantiananec Esuquidistuběd abentsēc yacbimboec icsaisa mibitedi yanendac.

<sup>15</sup> Adec Esuquidistuběd abentsēc yacbimboecnuc icmiaid nebi, quequin tantiec bēdamboec tabadtenenu, quec mibitedi tabadteneta. Adec tabadtenequin, Mibi bēdambo iquec, Papa, quequin chuideneta. <sup>16</sup> Nuquin Papan Esuquidistu tantiadonemiaiddo icta. Adquido yec abi tantiaquid utsiboběd Esuquidistu chuinanec, Bēdamboec tabadta, quec adquiecbidi tabadec ismenanta. Aden naic chuiquid dapa Dabiděn dada uampid sadmo caidbēdta cuěděnte utsi Nuquin Papan mibi bēdambo icmiaidbědtabi ambi naid utsi chiec cuěděncuededta. <sup>17</sup> Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bēdambo iquebi, Papa, quequin Nuquin Papa chuideneta.

### *Aton shubun icquidběd tabadaid*

<sup>18</sup> Bēdamboec tabadnu, queshun nadota. Chidon min běněn chiacpadomboen nabanta. Esuquidistu tantiaquid icquin adobanta.

<sup>19</sup> Chido inquidën, Con bënëbëd tabadec bëdambo iquebi, camenuen yuachimboecquin aid chuiquin min chido namenda. Mibibi tantiadquïnuidi min chido namenda.

<sup>20</sup> Bacuëbon, Esuquidistu tantiaquid icquin papan chiapadomboen cacuidenquiocquin nabanta. Adembidi, titan chiapadomboen nabanoata. Adosho isashien, Cuishon. Bëdambo iquebi, quependac Nuquin Papa.

<sup>21</sup> Anibëdtan min bacuëbo namenuec comapenen cuëdquin chieshmenda.

<sup>22</sup> Yuan mibi yuaquidën chiapadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icbo, Esuquidistu tantiaquid nebi, queshun adobanta. <sup>23</sup> Con Icbo Esuquidistu nashunu, quiacbimboen mibi yuaquidën chiapadomboen chieshenquiocquin bëdamboen nabanta. <sup>24</sup> Con Icbo Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidënshun abi nashunquid mibi neque. Adobanta. <sup>25</sup> Min icbon chiapadomboen nata. Abi chieshënquid icbon cuidendac. Adembidi Nuquin Papan Esuquidistu tantiaquid nebi, quesho abi chieshënesa menequin bëdamboen cuidendac. Abi chieshënquid menenquiocquin comapenen cuidendac. Adenuidi tantiaquin cuidendac.

## 4

<sup>1</sup> Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

### *Chuibanaid utsi*

<sup>2</sup> Esuquidistu tantiaquid utsibo natiatequidbëd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. <sup>3</sup> Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. <sup>4</sup> Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. <sup>5</sup> Esuquidistu tantiesan ëbi tabadaid istenec, quequin tantiec bëdamboec tabadteneta. Adec tabadquin Esuquidistu tantiesatsen tantiamenuequin Esuquidistu chuideneta. <sup>6</sup> ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdacbimboecnuc Esuquidistu mimbi tantiaid utsibo chuita ma aidon tantiapanu queshun.

### *Abëd icquid chuibanaid*

<sup>7</sup> Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquio icsho ëmbi con utsi caid nec. Aidi Nuquin Icbo nashunquid neoaic. <sup>8</sup> Èbëd icquid utsibo naic tabadaid mibitedi tantiamenuequin aidi mibi yacno nidmembi. Adoac mibi yacno nidash puduedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësquiocboedi cuishon queta. <sup>9</sup> Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

<sup>10</sup> Nëbi mibi yacno nidesa chuinu. Tantiata. Adistadico ëbëd icnuec abembi quënën nauedadondaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. <sup>11</sup> Esus cashumbic Ustus caidën, Codosas yacnocquido tantiec tsadebi, quequin chiapadomboen dada uaimbi. Adistadico yec Madcos yec Ustus yec quec aidtedtsëqui isadaidbo nec. Aidon ëbëdtambi Esuquidistu chuibanquin ëbi bëdambo icmequido neoaic. <sup>12</sup> Epapadas mibi



yacnoshon tishaid Esuquidistu chuibanquidquio nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuequiv icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidën-badiadquidënquieci Nuquin Papa chiec onquec Epapadas. <sup>13</sup> Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquio yec Esuquidistu tantiadonequidombo ma icpanu quiash mibitedi chiec onquedenec. <sup>14</sup> Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chiacpadomboen dada uaimbi.

<sup>15</sup> Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuoata. Adomboembidi chido Nimpas cuëmëdquidën shubun Esuquidistu tantiec iccuededquido chuoata. <sup>16</sup> Adembidi, nëid ëmbi dada uaid isec onquequin mibëd iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid isec onquequin mibëd iccuededquido tantiamëoa, quequin chui. Adembidi ëmbi Daudiseya yacnocquido tantiaquin dada uaid bedshunshun isec onqueshun mibëd iccuededquido tantiamëoata.

<sup>17</sup> Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

<sup>18</sup> Mibitedi tantiaquin ëmbibi nëid dada uaombique. Èbi tantiec nidtiapimbo yec Pabado quënën tsadeque. Aid puduëmeta, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aidtedi dada uaombi.

## TESADONICA YACNOCQUIDON ISTE 1

### *Pabadon tauamboen chiaid*

<sup>1</sup> Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

### *Tesadonica yacnocquidon Esus tantiaid*

<sup>2</sup> Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. <sup>3</sup> “Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. <sup>4</sup> Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. <sup>5</sup> Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —queshun mimbi Esus tantiabenondac. Adembidi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ēmbi chuisho tantiondac. <sup>6</sup> Aden Nuquin Papan Esus tantiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid chuibanac Nuquin Papan Mayanēn namiacpadec cuis-honquequin mimbi Esus tantiondac utsibon: —Padi. Chēn —quequin comapenen chieshēnquionobi. <sup>7</sup> Adec mibi bēdamboec tabadaid chuisho tantiash min nidaidēn icquido Masedonia yacnocquido Esus tantiaquido mibi yacpadquiec tabadtiadquo icpac caosh. Adembidi tantiash nēid nidaid Acaya caid yacno tabadquidotsen adtiadquo icpac caosh. <sup>8</sup> ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aid mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiashun: —Tantiash —queshun nēmbo icquido mimbi naid chienquo iccombi. <sup>9</sup> Mimbi naid naden chuisho tantiombi. —Pabado chedon Esus chuibansho tantiash: “Nuquin Papapadquid utsi nibēdec,” queshun Nuquin Papabēdta Esus tantiabenac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquo yanac caosh —quequin chiochi. <sup>10</sup> Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ēbi cuidmenquo icnuec abided cuidadec unēsacsho Nuquin Papan uincuemiaid Esus choec,” queshun aid istiadquo iquec —quequin mimbi naid chiochi.

## 2

### *Pabadon bēdamboen chuibanondaid*

<sup>1</sup> Mibi yacnoshon tauamboen ēmbi chuibanac Esus tantiaquid yanshun mimbitsen utsibo Esus chuibanondac. <sup>2</sup> Shubu dadpen icquid Pidipos caid yacnoshon quēnēn nauedac ēbi mēyadec tsadboedi puduemeshun nidmiac mibi yacno nidshun Esusēn naid mibi chuibanondambi. Utsibo dadpenshun chieshēnubi Nuquin Papan namiacpadomboen cuesambo icquin mibi Esus chuibanondambi. <sup>3</sup> ¿Ēmbi naidquo namenuendambi

adodionda? Padenquo. ¿Ëbi tantiamenuendambi chuibandionda? Mambi padenquo iccondac. ¿Ambembi chiaidtambi mibi chuibandionda? <sup>4</sup> Mambi mibi abimbo chuibampondac. Matsesën naidtedi tantiaquidënquo Nuquin Papan: —Aidën abimbo chuibantsiashe. Con Mado Esusën naid chuibeneguid icmenu —caidquo nebi. Adquid yec matses: —Mibi bēdambo iquec —cameteuidi bunenquo iquebi. Nuquin Papa: —Mibi bēdambo iquec —camenuembimbi ambi chiacpadomboen naic. <sup>5</sup> Ëmbi tantiacpadomboen mibi namenuec: —Mibi bēdambo iquec —quenquo iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. <sup>6</sup> ¿—Pabado bēdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusën naid tantiamenuembimbi bēdamboen chuibanondac.

<sup>7</sup> —Ëbi chuibeneta —Esuquidistun caidquo nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquo iccondac. Anin bacuë nēishmenquo icquin bēdamboen namiacbimboembimbi nēishmenquo icquin mibi chuibanondac. <sup>8</sup> Mibi tantiaquiquin chieshtoenquo icquin Esusën naid chuibanec yuec mibēd tabadondabi. Aden naic tabadec bēdambo iccondabi. <sup>9</sup> ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimēdnushe —quiash con piucquid bednuec chonoadteniondabi. Mimbi isnubi adondabi.

<sup>10</sup> Mibēd yec Nuquin Papan chiaid niaquenquo yec bēdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanēdashi. <sup>11</sup> Amēn aton mado: —Naden na —quequin nēishmenquo icquin chiacbimboen mibi abentseabentsen bēdamboen chuibanquin <sup>12</sup> mibi bēdambo icmepondambi. —Nuquin Papan: “Icsatiapimbo icquid icmequin ēbēdi tabadmendambi,” quequin Esus tantiamiaido mibi nec. Adquid Nuquin Papan chiacpadec bēdamboec tabadquid neque. Ambi chiaid niaquenquo yec bēdamboec tabadnuna —mibitedi cadeniondambi.

<sup>13</sup> Aden Nuquin Papan chiaidquo chuibanac: —¿Ambembida chuidiosh? Nuquin Papan chiaidquo ma Pabaton chuiboc —mibi quianondac. Aden Nuquin Papan chiaidquo tantiashe Esus tantiaquido yanash aidquiobidi chuisho tantiashe mibi bēdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bēdamboen tabadmequid yec mibi bēdamboeshē iquec, Papa —quequin Nuquin Papa chianembi. <sup>14</sup> Nidaid Udeya caid yacnocquido yacpadquiech chieshtoenquo icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquo icquin chieshēnac chieshtoenquo iccondash. Adomboembidi aid matses mibi yacno tabadquin chieshēnac mibi chieshtoenquo iccondac. <sup>15</sup> Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unēs uapac caondash. Adomboembidi chieshēnquin mibi yacnoshon cuemepondashi. Aden Nuquin Papa chieshēnquinc matses abitedi chieshēnquinc caquin <sup>16</sup> isadaidbon matses utsi isadaidpembo ēbi chuimetiapimbo icpondash. —Esus tantiashe Nuquin Papan bēdamboen isquin mibi cuidenquo iquendac —quequin Ëmbi chuisho: —Padi. Aid chienda. Cueschitomane —capondashi. Aden ambi chiaid ēnenquo icquin niac-niacsho Nuquin Papan aido cuidquiendac.

### *Pabado istante bunaid*

<sup>17</sup> ¿Mibi yacnoshon aden chieshēmēnquidon cuemiac mibi tantienquiodambi ictionda? Mibi unēsquo icnuc mibi istantiadquo iccondabi. <sup>18</sup> Adec: —Padpiden istanu —quesho Satanasën nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasën nacbidi padenquo iccondabi. Nēbi adecbidi mibi istantiadquo iquebi. <sup>19</sup> Nuquin Icho Esuquidistu choan aibdēd tabadquin ¿tsutsimbi

ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ĕmbi chuibanac Esus tantiabenondaido neque —capatsia? Mibibimbi caic. <sup>20</sup> —Esus tantiec bēdamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ěbi tantiabenondash —ěbi caindac Nuquin Icbon.

### 3

#### *Istan, quequin Timoteyo chiaid*

<sup>1</sup> Aden mibi tantiec: —“¿Mitsipadec tabadpec?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ěbēd icquid utsi Sidbano chuiquin: —Timoteyo nidan nuquiuidtsēqui icnuna —caondambi. <sup>2</sup> Ĕmbi: —Nid —caonaid Timoteyo Esus tantiaquid yec nuquin utsi nec. Ĕbēdtan Esus chuibenequidquo nec. Adquid icsho nadopondambi. —Tesadonica yacno nidshun Esus bēdamboen chuibantan. Adembidi: “Esus tantiec chieshtoenquo yec nadquiec tabadquid nendac,” quequin bēdamboec tabadquin ismetan, Timoteyo. <sup>3</sup> Aton matsesēn comapenen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. <sup>4</sup> Aden mibēd icquin chuideniondambi. Adsho ěmbi chiacpadomboen nuqui chieshēnondash. <sup>5</sup> —“Ĕbi nidan chieshēnac ¿adecbidida Tesadonica yacnocquido chieshtoenquo icpatsiashba?” quequinuidtsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanāsēn namiac chieshtoshon Esus tantienquo yanushe. Istan. ¿Ada ěmbi Esus chuibanondaido bēdamboec tabadeque? —caondambi Timoteyo chuiquin.

#### *Timoteyon chuituidaid*

<sup>6</sup> Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. <sup>7</sup> Timoteyon chuiboed tantiash bēdambo yanobi. Nēmbo icquidon chieshēnac shubiantiadtsēcquo iccobi. Adboedi mibi caic: —Chieshtoenquo icquin Esus tantiosh —quesho tantiash bēdambo yanobi. <sup>8</sup> Mimbi aden naid tantiash dayacquio yacbimboec iquebi. <sup>9</sup> Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. <sup>10</sup> Aido istiadquo iquebi. Mimbi chiaid bēdiactsēc tantiasho aidobēd tabadquin bēdamboen chuibantsiambique. Ĕbi ano nidmeta, Papa —quequin Nuquin Papa chianembi.

<sup>11</sup> —Nuquin Icho Esusbēdtan Nuquin Papan nēbimbobi ambo nidmepashuni —caimbi. <sup>12</sup> Adec mibēd ictiadquo icquin Nuquin Papa mibi chianembi. —Ĕmbi aido tantiaquiacpadomboen utsibobēd tantianameta, Papa. Bēdiactsēc tantianantsēchoedobi comapenec tantianamequiota, Papa. Adembidi utsibotsen bēdamboen ismeta. <sup>13</sup> Aden bēdamboec tabadquid icmeta, Papa. Mimbi adoac chieshtoenquo yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

### 4

#### *Chidobēd bēdamboec tabadte chiaid*



<sup>1</sup> Tanta, con utsibo. Chiaid utsitsen mibi chuinu. —“Bëdambo mibi iquec,” Nuquin Papa camenuc bëdamboec tabadta —quequin ëmbi chiondacadquieci tabadta. Nuquin Icbo Esus tantiaquieci adta. —Bëdamboec tabadosh —quesho tantiaashun: —Adquiequi tabadta —caimbi mibi. <sup>2</sup> Nuquin Icbo Esusën namic aidën chiaidquio mibi chuibanondambique. Aid tantiaquieci bëdamboec tabadta. <sup>3</sup> Nuquin Papan tantiamiacpadquieci tabadquidën nadoquid yendac. Utsin chido chudenquio icquin aton chidouidtsëqui chudquid yendac. Adembidi chidon dada utsi chudmenquio icquin aton bënëuidtsëqui chudmequid yendac. <sup>4</sup> Adec Nuquin Papan chiaid niaquenquio yec abi bunaid mëmunec dada ambi inaidquio aton chidouidtsëqui chudec aidbëd bëdamboec tabadsho: —Bëdambo iquec —catsiash Nuquin Papan. <sup>5</sup> Nuquin Papa tantiesabimboec tabadenda. Esus tantiesambien comapenec tsien bunquin aton chidopenquio chudendac. Adembidi Nuquin Papa tantiesaci icquin chidon utsin shui bunquin aton bënëpenquio chudmendac. Adec tabadenda. <sup>6</sup> Bënë nidan aton chido abentsëqui uequid istuidshun chudenda. Adoquid Nuquin Papan cuidendac ëmbi chiondacadomboen. <sup>7</sup> —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquio. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. <sup>8</sup> Aden chuiquin aton Mayan nuqui menequidën Nuquin Papan chiaid chieci nebi. Aden ëmbi chuiboed niacquin Nuquin Papan chiaidquio mimbi niactsiac.

#### *Adecbidi tantiananquiota, quequin chiaid*

<sup>9</sup> —Bëdamboec tantiananta —quequin padpiden chienquio iquembi. Nuquin Papan tantiamiac Esus tantiaquido yec mibi tantiananec. <sup>10</sup> Min nidaid Masedonia caidën tabadquido Esus tantiaquido utsibotedi mimbi tantieci. Mibi yacpadquiecbidi tantiananquioquin utsibotsen tantiaquiota. <sup>11</sup> Ëmbi chiondacadquieci chieshëmënenquio yec bëdamboec tabadta. Utsi icsaiduidi chienquio yec bëdamboec tabad. Chieshenquio yec dayacquio yec chonoadta. <sup>12</sup> Adash bunenquio mibi ictsiac. —Con na nacnenambo iccombique. Mitsana beccho —mibi quenquio ictsiac. Mibi adquio icsho isash Esus tantiesabo: —Esus tantiaquido bëdamboec tabadec —quetsiash.

#### *Esusën abi yacno abi tantiaquido buante chiaid*

<sup>13</sup> Tanta, con utsibo. —“Esusën abi tantiaquido uincuemendac,” quequin chuisho mimbi tantiabi icnushe —queshun mibi bëdamboen chuinu. Esus tantiesabo: —Ëmbi tantiaidquio padpideci isadenquio iquec —quec yuecquio shubiabimboec shubienda. —Ëbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusën uincuemete mibi chuinu. <sup>14</sup> —Unës uaqui Esus uincuenacpadecbidi nuquitsen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantieci. <sup>15</sup> Tanta. Nuquin Icbo Esusën chiaidquio mibi chuinu. Nuquin Icbo Esus nidaidën padpideci chonoc aid istuideci Esus tantiaquido unësabi icquido abia nidenquio iquendac. <sup>16</sup> Padenquio icnubien Nuquin Papa yacnuësh choeci Nuquin Icbo Esusba nua cuëdtuidendac. Adnubien Nuquin Papan abi yacnoshon uaido mayan bëdabo chuiquid dapatsen nua cuëdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uaquin uincuemendac. <sup>17</sup> Adoquien aidobëdi Esus tantiaquido unësabi icquido tsidash aidotedi abuctoendac Nuquin Papabëd tabadec nideci. Abitedi abuctoquimbi abi bëquedeci Esus chosho istuidendac. Adash Esusbëd Nuquin Papa yacno nidash anobi nuqui quenendac. <sup>18</sup> Ëbi adsho tantiaashun nadota. Aton matses unësaid tantieci shubiquido bëdambo icmenuen ëmbi chuiboeci chuita.

## 5

*Esus chote chiaid*

<sup>1</sup> Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo iquebi. Tantienuo iquembi. Naden mibi chiondambi. <sup>2</sup> —“Nëid inchëshëmbi ampequid choec,” quequin tantiatiapimbo yacximboec: “Aid ushën Nuquin Icho choec,” quequin tantiatiapimbo icnuc Esus choaindac —quequin mibi chiondambi. <sup>3</sup> Esus tantienuo yequi matses dadpen: —Cuesnanenuo yec nuqui bëdamboec tabadec —queshobien ambi: —Ëbi cuidendac —cacmaidënuo padpidec choshon cuidquiendac. ¿Mitsipadquo chido bacuë usunquid icpec? —Aid ushënuo tishembi —quequin tantiatiapimbo yequi badedquo nëncuenec. Adecbidi ambi: —Choec —cacmaid Esus badedquo chosho abi tantiesabon cuenëntiapimbo iquendac. <sup>4</sup> ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bëdamboec nuqui tabadnubi Esus chonoc nuqui dacuëdenquo iquendac. <sup>5</sup> ¿Pacuënedacximboecquidoda nuqui nedi? Padenquo. Pabiate paposhquiachimboecnuc Esus bëdamboen tantiamiaido yec bëdamboec tabadquido ma nuqui neyoc. Adecbidi bëdamboec tabadnuna. <sup>6</sup> Ushquin pabiaten tantienuo yacximboen utsibon Nuquin Icho Esus tantienuo iquec. Adec tabadenquo icnuna. —Esus tantienuo icmane —queshun nuqui icsate bunaid nainquo icquin mëmununa. Nuquin Icho chosho istiadquo yec bëdamboec tabadnuna. <sup>7</sup> Esus tantiesaboen inchëshën ushquin tantienuo yacximboec iquec. Adquiecbidi tantiadenuen acte paëmbo icquid acquido nec. <sup>8</sup> Adquidpenquo yec Esus tantiaquido yec bëdamboec tabadnuna. Nuqui icsate bunaid nainquo icquin mëmununa. Sondado: —Shocosh tsasimbo icquid shictonquenu. Sicsenushe —quiachimboec icnuna. Satanasën Esus tantiamenuo icnushe. Esus tantiaquiquin matsesten tantiaquionona. Adecbidi sondado: —Masenushe. Shocosh tsasimbo icquid mauete mauenu —quiachimboecbidi icnuna. Satanasën icsamboen tantiamequin chieshtomenushe. —Esus tantiasho cuidenuo icquin Nuquin Papan abi yacno ëbi tabadmendac —quequin bëdamboen tantianuna. <sup>9</sup> ¿Cuidnuenda Nuquin Papan nuqui Esus tantiamediac? Padenquo. Abëdi tabadmenuen Nuquin Icho Esuquidistu nuqui tantiamiac. <sup>10</sup> Aidi abi tantiaquid cuidmenquo icnuec abided cuidadec unësac caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemiaidobëdta unësabi icquidotedi adoendac. <sup>11</sup> Ëbi adsho tantiashun mimbi nabocpadomboembidi Esus tantiec bëdambo icnuec ëmbi chuiboed chuinanquiota. Adecbidi bëdamboec tabadec: —Adequi tabadnuna —cananta.

*Bëdamboec tabadte Pabadon chiaid*

<sup>12</sup> Esus mibi chuibanquido bëdamboen ista. —Nuquin Icbon chiacpadomboen chieshtenuo icquin nuqui chuiquidën nuqui bëdamboen chuibanec —quequin aido bëdamboen tantiata. Mibi nashunquidombo neque. Aidon: —Nuquin Papan chiaid niaquenuo yec bëdamboec tabadnuna —quequin chuisho bëdamboen tantiata. <sup>13</sup> —Nuquin Papan chiaid bëdamboen tantiaquidombo nec —quequin bëdamboen ista. Adec chieshëmënenquo yec bëdamboec tabadta. <sup>14</sup> Mibëd icquido naden chuiban. Chieshquid icsho: —Mibitsen chonoadta —cata. Dacuëdsho: —Dacuëdenda —cata. Esus bëdiactsëc tantiatsecscho bëdamboen chuiquin Esus tantiamequiota. Dada padishquo icsho nashunta. Aden nëishenquo icquin abitedi bëdamboen ista. <sup>15</sup> Utsin chieshënac cuidnanenuo yec bëdamboec tabadta. Mibëdtan Esus tantiaquidobëd bëdamboec isnanquin utsibotsen bëdamboen ista.

<sup>16</sup> Aden Esus tantiec ënëdenquo yec cuishonquianeta. <sup>17</sup> Adembidi Nuquin Papa chianequin: —Ëmbi chiacpadomboen ëbi nashunquin utsibotsen nashunta, Papa, —quequin chianeta. <sup>18</sup> ¿Mimbi chiacpadomboen Nuquin Papan nasho isunuidida mimbi: —Nuquin Papa bëdambo iquec —cape? Nadoac bëdambo ictsiash. Bëdamboec tabadquin:

—Mibi bēdambošhē iquec, Papa, —cac bēdambo ictsiash. Daicsabudshumbic adembidi nac bēdambo ictsiash. Paēmbo icnubi adembidi. Mitsana icnuc adembidi. Mitsana nibēdnubi adembidi. Utsibon chieshēnaqui adembidi: —Mibi bēdambošhē iquec, Papa —cac bēdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. <sup>19</sup> Nuquin Papan Mayanēn Nuquin Papan chiaid tantiamiac pamumēdabimboec tabadenda. <sup>20</sup> Aden Nuquin Papan Mayanēn tantiamiac utsibontsen chuisho: —Mue nec —badedquio cainda. Chuishoba tantiata. —Nuquin Papan chiaidquio chuinu —quesho mamēnshunenda. <sup>21</sup> Adenquio icquin: —¿Nuquin Papan chiaidquiobida chuibanegue? Tantiabono —cata. Aden tantiashun Nuquin Papan chiaidquio isbanta. Aden isbanquin abimbo chuisho tantiashun: —Ai, Nuquin Papan chiaidquio chiec —queshun aidēn chuisho bēdamboen tantiata. <sup>22</sup> Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquio chiec —queshun aidēn chuisho tantienda. Aidēn chiacpadomboen nainda.

<sup>23</sup> Mibi Nuquin Papa chianembi. —Mates bēdambo icmequid icquin mimbi chiacpadomboen aido name, Papa. Mimbi chiaidquio bēdamboen tantiamequin bēdamboen tabadme, Papa. Mimbi adoac bēdamboec tabadnuc choashun con Icho Esusēn: “Aido bēdambo iquec,” catsiash, Papa —quequin Nuquin Papa chianembi mibi. <sup>24</sup> Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquio iquendac. <sup>25</sup> Nuquin Papa ēbi chianeta. —Abēd icquidobēdta Pabado bēdamboen nameta, Papa —quequin Nuquin Papa chianeta. <sup>26</sup> Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. <sup>27</sup> Nuquin Icbon tantiacpaden chuiquin dada uaombique. Ēmbi dada uaboed nēid isquin ambocquido Esus tantiaquidotedi chuiban. <sup>28</sup> —Nuquin Icho Esuquidistun bēdamboen ispashun —quequin mibi tantiembi. Padi. Aidtedi dada uaombi.

## TESADONICA YACNOCQUIDON ISTE 2

### *Pabado tauamboen chiaid*

<sup>1-2</sup> Pabado nebi. Tesadonica yacnocquido Nuquin Papabēdta Nuquin Icbo Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

### *Nuquin Papan Esusbēdtan matses cuidte chiaid*

<sup>3</sup> —Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatsēchoedombi nēbi Esus tantiabededosh,” quiosh, Papa. “Adechbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. <sup>4</sup> Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

<sup>5</sup> Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. <sup>6</sup> Nuqui chieshēnquidon naidtsen tantiaquid icquin Nuquin Papan aido cuidendac. <sup>7</sup> Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icbo Esusēn adoendac. <sup>8</sup> —Icsaisambo yec matses cuidquid nebi —quequin tantiamenuec bēchamauanquiec choshon Nuquin Papa tantiesabo cuidendac. —“Nuquin Icbo Esus tantiasho Nuquin Papan mibi bēdamboen istsiash,” quequin chuisho tantiatipimbo iquebi —quequin abi tantienquo icsho Esusēn cuidendac. <sup>9</sup> Cacumiacbimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icbo yec bēdamboshē isadsho isec tabadtiapimbo iquendac. <sup>10</sup> Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuec abided cuidadaid Nuquin Icbo bēdamboshē iquec —quequin aton Icbo isec tabadendac. Ēmbi Esus chuibanac aid tantiabenondaido icquin mimbisen Esus chosho isendac.

<sup>11</sup> —Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiapadomboen natiadquo iquebi,” qesho ambi chiapadomboen name, Papa. Comapenen tantiaquidquo mibi neque. Adota, Papa. <sup>12</sup> Aden mimbi con Icbo Esuquidistubēdtan bēdambo icmiac Esus tantiec bēdamboec tabadtsiash, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icbo Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

## 2

### *Icsamboshē icquidba chote chiaid*

<sup>1</sup> Tanta, con utsibo. Mibitedi chuinu. —Abi yacno tabadmenuen buanuec Nuquin Papa yacnuēsh Nuquin Icbo Esus ěnden choac —qesho tantiash <sup>2</sup> dacuēdtanenda. Mibi



yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icbo Esus ënden choac —quec muapash. Ambe-mbi chiaidien chuichitash. —Naden Pabadon chiaid iquec —quequin ëmbi dada uaid-bimboecquid isquimbien chuichitash. <sup>3</sup> Adec muaid tantiash: —Abimboen cachitosh —quenda. ¿Nuquin Icbobada chopadic? Padenquo. Utsibain choendac. —Nuquin Papa caidën chiaid tantiatiapimbo iquebi —quec matses icsamboec tabadnubien Nuquin Papa chieshënquidquo icsamboshë icquidba choash matses dadpenquo chuiquid dapa iquendac. Aid Nuquin Papan cuidtequidquo nendac. Aidba choabi icnuc Esus choenquo iquendac. Icsamboshë icquidbain choendac. <sup>4</sup> Aid chuiquid dapa yanashic Nuquin Papa dëniacte bunquiec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquo nec,” quequin mimbi Nuquin Papa caid nibëdeque. Ëbiuidtsëqui tantiata —caindac matses abitedi chuiquin.

<sup>5</sup> Aden mibi chuideniondambi. ¿Tantienquioda ique? <sup>6</sup> Nuquin Papan tantiacpadënquo chomenuen uidënuac icsamboshë icquid nëbi choenquo iquec. Nuquin Papan tantiacpadënquo choendac. Ëmbi chiondacadquid abi chomenquo icquid mimbi tantiec. <sup>7</sup> Nëbi isadenquo icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquo icquid nidabi icnubi icsamboshë icquid chuiquid dapa yantiapimbo iquendac. Abi chomenquo icquid nidmiambien <sup>8</sup> icsamboshë icquid matses chuiquid dapa iquendac. Adnubien Nuquin Icbo Esusën: —Ëbien matsesën Icbombo nec —quequin matses abitedi tantiamenuc choshon icsamboshë icquid: —Unësta —caquinuidtsëqui unës uashunendac.

<sup>9</sup> Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquo nebique. Istac —quequin ambembi chiaid tantiamenuc aden nadatiambo icquin nabanquin ismendac. <sup>10</sup> Adec icsauid-equi tabadquid yec comapenec muasho tantiash: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdacimboen tantiatiapimbo icquin ambembi chiaiduidtsëqui tantiendac. <sup>11</sup> Aden ambi chiaid niac-niacuidequi icsho Nuquin Papan: —Abi bunaidquo ambembi chiaidquo chuisho ma tantiapanuna —quequin namiac: —Mue nec —quequin tantienquo iquendac. Utsi muasho tantiash badedi: —Abimbo chiec —quetsiash tantienquo yec. <sup>12</sup> Aden ambi chiaidquo tantiatiapimbo icquin aid niac-niaquec icsateuidi bunsho Nuquin Papan cuidquiendac.

### *Nuquin Papan tantiamiaid*

<sup>13</sup> Nuquin Icbon mibi tantiaquiec. Ëndenquimboshë matses uabi Nuquin Papa nuqui caic: —Ëbi yacno tabadmenuc Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquo tantiash Esus tantiec mibi bëdamboec tabadcuendac. —Adquiobidi iccosh —quesho tantiashun Nuquin Papa chianembi naden. —Aden aido bëdamboen namequid yec mibi bëdamboshë iquec, Papa —quequin chianembi mibi tantiaquin. <sup>14</sup> Nuquin Papan chiaidquo ëmbi chuibanac mimbi Esus tantiabenondac. Abi yacnoshon Nuquin Icbo Esuquidistupadquo bëdamboshë icmenuc aden Nuquin Papan mibi Esus tantiamiac. <sup>15</sup> Ëbi adsho tantiashun ëmbi chiondacadomboen chieshtoenquo icquin Esus tantiata. Ëmbi mibi bëisquin chiondaidbëdta ëmbi dada uaqin abimbo chiondaid bëpiscudenda.

<sup>16</sup> Nuquin Icbo Esuquidistubëdtan Nuquin Papan nuqui tantiaquin bëdamboen isec. Adembidi: —Nuquin Papa yacno Esusbëd iquendabi —quequin tantiamequin dayacquo yacimboecnuc nuqui icmec. <sup>17</sup> Adquid icsho chianembi naden. —Tesadonica yacnocquido chieshtomenquo icquin Esus tantiamequin bëdamboec tabadquid icme,

Papa. Adembidi bēdamboec chuinanquid icmequin nashunanquid icme, Papa –quequin Nuquin Papa chianembi mibi tantiaquin.

### 3

#### *Nuquin Papa ēbi chianeta, quiaid*

<sup>1</sup> Tanta, con utsibo. Mibi chuinu. Nuquin Papa ēbi chianeta. –Nidaid utsi-utsiec yacno nidmeshun Pabado chedo matses dadpenquo Esusēn naid bēdamboen chuibame, Papa. Mimbi bēdamboen chuimiac ēmbi Esus tantibenondacpadomboen utsibon dadpeshun Esus tantiabentsiash, Papa. <sup>2</sup> Aden Esus chuibansho isun Esus tantiesabo chieshēmēnquidon: “Pabado cueschitono,” casho cuesmenda, Papa –quequin Nuquin Papa ēbi chianeta. <sup>3</sup> Nuquin Icho bēdambo iquec. Muesambo icquin ambi chiacpadomboen nuqui bēdamboen dayun uaindac. –Ēbi tantienquo yanushe –queshun nuqui chieshtomenquo icquin Satanas nuqui yuametiapimbo iquendac. <sup>4</sup> –Aden Nuquin Icbon bēdambo icmiac ēmbi chiacpadomboen naboedi adembidi Tesadonica yacnocquidon naindac –quequin tantiombi. <sup>5</sup> Aden mibi tantiaquin naden Nuquin Papa chianembi: –Con Icho Esuquidistun tantiamiacpaden: “Nuquin Papan ēbi tantiaquiec,” quequin Tesadonica yacnocquido tantiameta, Papa. Esusēn chieshtoenquo icquin nacpadomboembidi aido chieshtoenquo icquid icmeta, Papa –quequin Nuquin Papa chianembi.

#### *Esus tantiaquido uspuenquo icquid*

<sup>6</sup> Tanta, con utsibo. Nuquin Icho Esuquidistun: –Ēbi chuibeneta –caidquo icquin mibi chuinu. Esus tantiaquido utsi-utsiec ēmbi mibi chiondaid niac-niaquec chieshuid-equi icsho isash aidbēd chieshec tabadenda. <sup>7</sup> –“Ēbēd iquec Pabado dayacquo iccondacpadquiec chieshenquo yequien tabadtiad,” quiosh –quiosh mibi caic. Abimbo mimbi cac. Mibēd yec dayacquo iccondabi. Chieshenquo yec chonoadteniondabi. <sup>8</sup> Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. –Ēbi meniac aton na naimēdnushe –quiash con piucquid bednuec chonoadteniondabi. <sup>9</sup> –Esus tantiaquidon abi chuibanquid menenquo icquid –¿quectabi ique? Padenquo. Esusēn naid chuibanquid ambi chuibanaidon meniaquien bēdambo ictsias. –Chieshenquo icquin ēmbi nacnensho isun ma adembidi Tesadonica yacnocquidontsen nanu –quiashini chonoadteniondac. <sup>10</sup> Mibēd tabadquin naden chiondambi. –Aton na nacnenenquo yec chieshuidequi icsho pemenuo icquid –quequin chiondambi.

<sup>11</sup> Mibi caic: –Utsi-utsiec chieshuidequi tabadosh. Utsi icsaiduidquo chiec tabadosh –quetuidosh. <sup>12</sup> Uspun tanta. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta. <sup>13</sup> Nuquin Papan chiacpadomboen naic chieshtoenda. Chieshtoenquo icquin bēdamboen-uidi nata. <sup>14</sup> Nēid dada uaquin ēmbi chiaid niac-niacsho ista. Adec icsasho isash: –“Icsamboen naombi,” quequin ma tantiabenu –quiash abēduidi iquenda. <sup>15</sup> Aid chieshēnenquo yequi adta. Mibipadquid Esus tantiaquid icsho naden chui. –Esus tantiaquid adesa ye. Padi. Bēdamboequien tabadtiad –quequin chuita.

#### *Pabadon ēnquin chiaid*

<sup>16</sup> Mibi tantiaquin Nuquin Papa chianembi naden. –Bēdambo icmianquidquo icquin Con Icbonquo ma aido dacuēdenquo icquid icmepanuna, Papa. Aidobēd ma Esus tēshēdenquo icpanuna, Papa –quequin Nuquin Papa chianembi. <sup>17</sup> –Ista. Ēmbimbo dada uaid nēid neque –quequin ēmbi nēidtedpactsēc dada uaid isun: –Pabadon chiaidquo nec –quequin mimbi tantiendac. <sup>18</sup> –Nuquin Icho Esuquidistun bēdamboen ispashun –caimbi mibi. Padi. Aidtedi dada uaombi.

## TIMOTEYON ISTE 1

### *Tauamboen chiaid*

<sup>1</sup> Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. <sup>2</sup> Ëmbi chiondac Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubëdtan con mado bédamboen isquin bédambo icmepashun —quiobi.

### *Chiaid utsi chienda, quequin chiaid*

<sup>3</sup> Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nactsusuaquin Nuquin Papan chiaid chienda —cata. <sup>4</sup> Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquiduidtsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bédamboen tantiamepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. <sup>5</sup> Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. <sup>6</sup> Mimbi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec. <sup>7</sup> Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

<sup>8</sup> —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bédambo iqueyoc. —Nëid tantiashun ma abi icsaid ënu —queshun aid abimbo chiac bédambo ictsiash. <sup>9</sup> ¿Bédambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamënshunquido. Nëidic anibi cuesunequido. Nëidic amëbi cuesunequido. Nëidic cuesunianquido. <sup>10</sup> Nëidic aton chidopenquio chudquido. Nëidic aton bënëpenquio chudmequido chido. Nëidic aton chido bunenquio yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. <sup>11</sup> Adembidi Esus chuibenequidon: —Adquid icsambo iquec —quequin chiec. Bédamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiembi.

### *Nuquin Icbon Pabado bédamboen isbenaid*

<sup>12</sup> Tantia, mado. Mibi chuinu. Nuquin Icho Esuquidistun: —Pabadon ëbi bédamboen chuibantsiash —quequin tantiashun: —Ëbi chuibenequid icta, Pabado —queshun ëbi

bëdamboen namec. Adoaid icquin: –Ëbi namequid yec mibi bëdamboshë iquec, Icho –quequin Nuquin Icho Esus chianembi. <sup>13</sup> Ënden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshënquin cuesun secate bunondabi. –Aton Mado Esus tantiasho Nuquin Papan ëbi bëdamboen istsiash –quenquio icquin adopondambi. Adshobini: –Pabadon abimbo tantiabi iquec –qeshun Nuquin Icho cuidenquio icpanëdash. <sup>14</sup> Adec icsambo icquid icsho Nuquin Icho tantiamic: –Abi tantiasho ëbi bëdamboen isbentsiash –quequin Esusquio tantiabenondambi. Esus tantiaquin matsesetsen tantiaquiemi.

<sup>15</sup> Tanta, mado. Naden chiaid bëdambo iqueque. –Icsambo icboedën abi tantiasho cuidmenquio icnuec Esus matsesac caondash –quequin chiaid bëdambo iquec. Ëbibic icsamboshë icpondabi. Utsibon Nuquin Papan chiaid bëdiactsëc niac-niacnubi ëmbimbo comapenen niac-niaccondambi. <sup>16</sup> Adec ëbi yuec icsambo icsho Nuquin Icho Esusën badeë cuidenquio icquin abibi tantiamequin bëdamboen isbempondashi. –Pabado bëdamboen isaïd chiac utsibo: “Pabado icsambo icboedi Nuquin Papan bëdamboen isbenac. Adembidi Esus tantiasho Nuquin Papan ëbitsen bëdamboen isendac,” quequin ëbi tantiendac. Adquid unësacsho ëbi yacno tabadmendambi –qeshun abi tantiamequin Esusën bëdamboen isbempondashi. <sup>17</sup> Aden tantiaquin nadoembi. –Nuquin Papa ambiuidtsëqui abitedi namequid yec abitedishun Icbombo nec. Unëstiapimbo icquid nec. Isadenquio icquid nec. Adquid abentsëcquiobi icnuc abipadquid utsi nibëdec. Adquid icsho abitedishun: “Mibi bëdamboshë iquec, Papa,” capashun ënenquio icquin –caimbi.

### *Matsesën mibi chiondacadombota, quiaid*

<sup>18</sup> Mibi con mado icbobimboecquid neque. Ëmbi chiacpadomboen Nuquin Papan chiaidquio chuibanta, mado. Ënden mibi Esus chuibanquid yanabi icnuc Nuquin Papan oncamiac nuquibëdtan Esus tantiaquidën mimbi chuibante chuipondash. –Esus bëdamboen chuibanquin Timoteyon Esus tantiaquido bëdamboen namendac –quequin mimbi chuibante chuipondash. Aidën chiacpadomboen chieshtoenquio icquin Nuquin Papan chiaidquio chuibanta. <sup>19</sup> Aden Nuquin Papan chiaid niaquenquio icquin Esus tantiaquieëc bëdamboec tabadta. Utsiboen adenquio iquec. Icsamboec tabadquin Nuquin Papan chiaidquio niac-niacquin Esus tantienquio yanosh. <sup>20</sup> Adecandedo caidbëdtan Imeneyo caidën aden Esus tantienquio yanosh. Aid daëdshun Nuquin Papa muauaquin icsamboen chuisho nadopombi. –Adquid Satanasën natiambo icmepashun –qeshun: –Esus tantiaquido cho-choacno choenda –capombi. –“Nuquin Papa muauachitombi. Icsambo icchitebi,” quequin ma tantianu –qeshun adopombi.

## 2

### *Nuquin Papa bëdamboen chianete chiaid*

<sup>1</sup> Tanta. Utsibotedi chuinu. Matses abitedi tantiaquin Nuquin Papa chianenuna. –Matses abitedi min Mado Esusbëdta mibi bëdamboen tantiamequin bëdamboen ista, Papa. Matses nashunquidquio yec mibi bëdamboshë iquec, Papa –quequin Nuquin Papa chianenuna. <sup>2</sup> Adembidi Nuquin Papa chuiquin: –Chuiquid dapambo pedesidente caidtedibëdta chuiquid dapa utsibotedi bëdamboen tantiameta, Papa. Adoac aidon bëdamboen namiac cuesun secananenquio yec matses abitedi bëdamboec tabadtsiash. Adnubi abi chieshënquido nibëdnuc Esus tantiaquido abi tantieëc bëdambo ictsiash, Papa –quequin Nuquin Papa chianenuna. <sup>3</sup> –Con matses Esus tantiameta, Papa –quequin nuqui aden chianesho tantiash: –Bëdamboen chieëc. Ëbi bunaidquio chieëc –quendac Nuquin Papa nuqui cuidenquio icquin abëd tabadmequid. <sup>4</sup> Matses abitedimbo cuidenquio icnuen matses bëdamboen iste bunquid yec: –Ma ëmbi chiaid tantiashun abided ciudadec unësaid ma tantiapanu –quec Nuquin Papa. <sup>5</sup> Nuquin Papan chiaidquio tantiashun nuqui naden tantieëc. –Nuquin Papa matses uaquid abentsëqui icnuc



abipadquid utsi nibëdquiec. Abëd icboedi matsesun: “Nuquin Papapadquid icquin aid tantamequid nebi,” quequin aton Madon matses chuipanëdash. Adecbidi aton Papa matses bëdamboen ismequid yampanëdash Esus. Aid abentsëqui Nuquin Papa bëdamboen ismequid nec. <sup>6</sup> Abi tantiaquid cuidmenquo icnuec abided cuidadec unëspac caondash —quequin chiaidquo nuqui tantiec. Nëbien Nuquin Papan tantiacpadomboen matsesën aden chiaidquo chuiben-chuibenec. <sup>7</sup> Adomboembidî Esus chuibenequidquo nebi. — Matses utsibo isadaidpembo ëbi chuibeneta —Esusën caondaïd nebi. Adoaid icquin: — Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

### *Esus tantiec cuëdënacnoshon nate chiaïd*

<sup>8</sup> Tantia. Datededi chuïnu. Cuëdënacno puduedshun Nuquin Papa chuïnuec bëdamboequien tabadtiad. Nëish bëdanash chieshënanenquo icquimbien Nuquin Papa chuitiad. <sup>9</sup> Chidobotsen chuïnu. Esus tantiec Esus tantiaquido cuëdënacno nidnuec: —Mabi isnu —quequin tantienquo yec bëdamboec dasiuidta. Bëdamboec tabadquid dasiuidac bimboec dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuëdënacno puduedta. <sup>10</sup> —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bëdamboec tabadta.

<sup>11</sup> Esus tantiaquido cuëdënacnoshon dadan Nuquin Papan chiaïd chuïbansho tantiaquid chidon. —Aidën chiacpadomboen natiapimbo iquebi —quequin tantienquo yec bëdamboen tantiec otacquo tabadquid chido. <sup>12</sup> Esus tantiaquido cuëdënacno puduedshun dada chuïbanesa chidon. Adembidi dada ancaïsa chidon. —Otaçquien tabadquid chido —caimbi. <sup>13</sup> Dada Adan caïdba Nuquin Papan matses uapampic. Adshumbic aton chido Eba caïdtsen. <sup>14</sup> Aden dadabëdta chido nacnenacsho isumbien Satanasën: —Icsamequin tanu —queshun muauac icsaquin chidomba Nuquin Papan chiaïd niacpampic. Adan padabi. Aden tantiaquin: —Dadan chido chuïbanquid —caimbi. <sup>15</sup> Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nëbi Esus tantiaquid yanash ambi tishaido bëdamboen namequid nendac. Esusën chiacpadomboen natiadquo icquin matses tantiaquid nendac. Nuquin Papan chiaïd niaquenquo icquid nendac. Aton bënëuidtsëqui chudmequid yendac Esus tantiaquid chidon. Adquid Nuquin Papan bëdamboen isquin abëdi tabadmendac.

## 3

### *Esus chuïbanquid chiaïd*

<sup>1</sup> Tantia. Utsitsen mibi chuïnu. —Esus chuïbanquid ictiadquo iquebi —quesho: — Bëdamboen nate mibi bunec —cata. <sup>2</sup> —Nuquin Papan chiaïd chuïbanquid nadquien ictiad —quequin anocquido chuita. —Bëdamboec tabadquid nec —utsibon caïdquo Nuquin Papan chiaïd chuïbanquid nendac. Adquid chido abentsëc inquid nendac. Abi bunaid ënshun mëmunquidquo nendac. —Bëdamboen tantiaquidquo nec —utsibon caïdquo nendac. Isedanquido bëdamboen isquid Nuquin Papan chiaïd chuïbanquidën. Nuquin Papan chiaïd bëdamboen tantamequin chuïbanquid nendac. <sup>3</sup> Tantiadenuen acte paëmbo icquid aquenquo icquid nendac. Badedquo nëishenquo icquid nendac. Uïmanëmënenquo icquid nendac. Chushcananteuidi bunenquo icquid Nuquin Papan chiaïd chuïbanquid. Piucquid bedteuidi bunenquo icquid nendac. <sup>4</sup> Aidën chiacpadomboen aton chidon aton bacuëbobëdtan naquid. Chieshenquo icquin aton papan chiacpadomboen naquid aton bacuëbon. <sup>5</sup> ¿Ambi chiacpadomboen aton chidobëdta aton bacuëbo bëdamboen namenquo icquinda Esus tantiaquido bëdamboen namepatsiash? Padenquo ictsiash. <sup>6</sup> Ènden Esus tantiabenondaïd chuïquin: —Èbi chuïbanquid icta. Èbi bëdamboen chuïquin ëbi bëdamboen nameta —Esus tantiaquidon cac bëdambo ictsiash. Nëbimbo Esus tantiabenquid aden chienda. Chuïbanquid icmiac adquidën Nuquin

Papan chiaid badedquio niactsiashe. Satanasbimboec: —Ëbiuidtsëqui bédamboshë iquebi —quetsiashe. Adquid: —Ëbi chuibanquid icta —cainda. <sup>7</sup> Ënden Esus tantiabenondaid mibi chuibanquid icmenun Esus tantiesabon: —Bédambo icquid nec —casha tantiata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamëns Huntsiashe. Adquid Satanasën badedi yuatsiashe. —Icsambo icquid nec —caid: —Ëbi chuibanquid icta —cainda.

### *Esus tantiaquido nashunquid chiaid*

<sup>8</sup> Tanta. Esus tantiaquido nashunquidtsen chuinu. —Nuqui chuibanquidën chiacpadomboen ëbitedi nashunquid icta —quequin nadquid chuita. Utsibon: —Bédambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Pucquid bunquin ampenquio icquid nendac. <sup>9</sup> Nuquin Papan chiaid bédamboen tantiaquinc Esus tantiaquinc caic bédamboec tabadquid Esus tantiaquido nashunquid. Adquid bédambo ictsiashe. <sup>10</sup> Esus tantiaquido nashunquid icmenun: —¿Bédambo icquidida nëid nec? —quequin chuimiacta utsibo: —Ai, bédambo icquid nec —abitedi quesheo tantiashe: —Esus tantiaquido nashunquid icta —cac bédambo ictsiashe. <sup>11</sup> Adquidën chido: —Bédambo icquid nec —utsibon caidquio nendac. Utsi icsaiduidi chienquio yec bédamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bédamboec tabadquid. Adquidquio Esus tantiaquido nashunquidën chido bédambo ictsiashe. <sup>12</sup> Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. <sup>13</sup> Abi nashunquidën Esus tantiaquido bédamboen nashunsho isun utsibon bédamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

<sup>14</sup> Tanta. Utsi mibi chuinu. Mibi yacno nëbi nidtiadquio iquebi. —Nidenquio icmane —quesheun nëid dada uaic nebi. <sup>15</sup> Ëbi mibi yacno badedquio nidabi icnuc: —“Esus tantiaquidon nadoquid,” quequin Pabaton chiacpadomboen nanuna —cata. ¿Tsutsi tantiaquido nuqui nepe? Ünëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. <sup>16</sup> Ëndenquio abi bédamboen ismequid ambi tantiamiabi icnëdaidi nëbi Nuquin Papan tantiamiaid Esus bédamboshë iquec.

Aid Nuquin Papan matsesmepanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaqui uincuenaid yec Nuquin Papan abi yacnoshon uaido mayan bédabon isaidquio Esus nec.

Abi chuibenquidën nidaid utsi-utsiec yacno nidshun chuibeniac utsin-utsinquien Esus tantiabenac caosh.

Aidquioibi Nuquin Papan abuc nidmeshun abëdi tabadmeoapanëdash.

## 4

### *Utsibon icsamboen chiaid*

<sup>1</sup> Tanta, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuisho tantiasheun Esus tantienquio yanendac —quequin Nuquin Papan Mayanën abimbo tantiamioshi. <sup>2</sup> Aden muaquidon: —Abimbo caimbi —quequin bédambo icquid damianquien aden muaquin chiendac. —Nuquin Papan cuidnushe —quequin tantienquio iquendac. <sup>3</sup> Adquidon naden chiendac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete

abentse-abentsen chiendac aid pete bēdambo icnubi. ¿Atotsi quequin Nuquin Papan pete uapampic? —Ēmbi chiaidquio bēdamboen tantiaashun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. <sup>4-5</sup> Aidēn pete uaidtedi bēdamboshē iquec. —Ēmbi pete uaid bēdambo iqueque. Ma penu —queshun Nuquin Papan pete icmiaid ma petequid neyoc. —Mimbi pete uaid bēdambo iquec, Papa —queshun pete isuidenquio icquin penuna.

*Esus chuibanquid icquin bēdamboen nata, quiaid*

<sup>6</sup> Esus tantiaquido ěmbi chuibocpadomboen chuibanquin mimbi bēdamboen natsiac, mado. Bacuětsěcsho min matsesěn Nuquin Papan chiaidquio mibi chuibanědash. Aidēn chiaid tantiaquid icquin Esusěn chiacpadomboen nate bunquin ěmbi chiacpadomboen mimbi chuibantsiac. <sup>7</sup> Con tsusedpabon ambembi chiampidbědta něbi matsesěn adem-bidi ambembi chiaid tantienda. Nuquin Papan chiaidquio niactiapimbo yec bēdambo icte bunquiota. <sup>8</sup> Aton dada uiděnquio icmenuec titinquetanequid nuquin matses nec. Esus tantiaquido bēdambo icnuec ¿mitsipadquio icpec? Nuquin Papa tantiaquiec ambi chiaid niaquenquio yec bēdamboec tabadquid nec. Adquid uněsash Nuquin Papa yacno nidash bēdamboshē icquid iquendac. <sup>9</sup> Ēbi adsho tantiaash: —Abimboen caic —queta. <sup>10</sup> Adec: —Abi yacno abědi tabadendabi —quequin Nuquin Papan chiacpadomboen ěnenquio icquin nanuna. —Esus tantiaquid uněsacsho cuidenquio icquin uněstiapimbo icquiděn Nuquin Papan abědi tabadmendac —quec chieshtoenquio yec bēdamboec tabadnuna.

<sup>11</sup> Ēmbi chuiboed chuibanta, mado. —Nuquin Papan chiacpadomboen nanuna —quequin chuibanta. <sup>12</sup> Mibi něbi caniaid neque. Bēdamboec tabadta, mado. Ēnden caniaiděn: —Něbi caniaid icquin Nuquin Papan chiaid mimbi tantienquio iquec —canushe. Bēdamboec tabadta. —Esus tantiaquido utsibotsen ma ěbi yacpadec bēdamboec tabadnu —quiash adta. Bēdamboen chuibanquinc matses tantiaquinc Esus tantiaquinc Nuquin Papan chiaid niaquenquio icquinc caic bēdamboec tabadta.

<sup>13</sup> Ēbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta. <sup>14</sup> Ēnden mibi mamishquin chiondaid ¿ada tantie? Ēnden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquio yec adquid icta, mado. <sup>15</sup> Ēmbi dada uaquin chuiboedtedi isbanshun ěnenquio icquin ěmbi chiacpadomboen bēdamboen nabanta, mado. —Ēmbi adosho isun ma ěmbi chuibanaidon: “Nuquin Papan chiaid chuibanquidquio yanosh,” ma ěbi canu —queshun bēdamboen chuibanta, mado. <sup>16</sup> —Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec tabadpeba? ¿Adambi Nuquin Papan chiaidquio muainquio icquin chuibampoba? —quec mibibi tantiadta. Bēdamboec tabadquin Nuquin Papan chiaidquio ěnenquio icquin chuibanta. Aden Nuquin Papan chiacpadomboen naic aidběd mibi tabadendac. Mimbi chuibanaidobidi adoaindac.

## 5

*Esus chuibanquiděn bēdamboen chuite*

<sup>1</sup> Nuquin Papan chiaid chuibanquid icquin dada ěnden caniaid chushcainda, mado. —Esus tantiaquiděn nadoquid yendac —quequin bēdamboen chui: —Con pabimboecquid nec —quequin. Něbi caniquid: —Con utsibimboecquid nec —quequin adembidi bēdamboen chuiban, mado. <sup>2</sup> —Con tabimboecquid nec —queshun macho bēdamboen chuiban. Chido machobudabi icquidtedi chibibimboecnuc isquin: —Něid chudtiadquio icchitebi —quenquio icquin Nuquin Papan chiaidquio chuibanta, mado.

*Chido niantembo chiaid*

<sup>3</sup> Tanta, mado. Esus tantiaquidon abëdtan Esus tantiaquid icsho niante nashunte chuinu. Niante aton matses nibëdquid: —¿Tsuntsimbini nashumpatsiashba? —quequid Esus tantiaquidon nashunquid. <sup>4</sup> ¿Ada nianten tishaido icpec? Aidëmbi ani nashuntsiash. ¿Ada aton baba icpec? Aidëmbi aton chichi nashuntsiash. Aidëmbidi aton shanuachotsen nashuntsiash. —Ëbi nashundened neque. Nëid nashunu —queshun nashuntsiash. Aden ambi chiapadomboen nasho isash: —Bëdamboen naic —quetsiash Nuquin Papa. <sup>5</sup> Padnuc aton matses nibëdquidënquio nianten Nuquin Papa chianequid: —Nuquin Papan ëbi nashuntsiash —queshun. —Mimbi ëbi tantiaquieque. Ëbi nashunta, Papa —quequin Nuquin Papa chianequid niante icsho abëdtan Esus tantiaquidon nashunquid. <sup>6</sup> Niante utsimbien ambi tantiaquid naic. Petebëdta acteuidi tantiaquin abi bunaiduidi naic. Adquidën unësacimboecquin Nuquin Papa tantienquio iquec. Adquid Esus tantiaquidon nashunenquio icquid. <sup>7</sup> Ëmbi aden niante nashunte chuiboed Esus tantiaquido utsibotsen chuita, mado. —Aton matses nibëdquid niante nashunenquio icsho: “Esus tantiaquido icsambo iquec,” utsibon canushe —queshun chuita. <sup>8</sup> Aton shubun icquidotsen Esus tantiaquidon nashunquid. Abëd icquido menenquio yec pemenquio yec quec nashumënenquio icquid icsamboshë iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquio icquid icsamboshë iquec.

<sup>9</sup> —Nëidtedi chido Esus tantiaquido nashunquidombo iquec —quequin abi cuëmëdquid abi cuëmëdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bënëuidtsëqui chudmedenedquio. <sup>10</sup> —Matses nashunquid nec —utsibon caid. Bacuë bëdamboen cani-uadened machon. Isedanquido bëdamboen isquid. Esus tantiaquido nashundenequid. Matses daicsabudacsho nashunquid. Adec bëdamboec tabadquid: —Esus tantiaquido nashunquid icta —cata.

<sup>11-12</sup> Utsi niante machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon: —Icsambo icquid nec —catsiashe. <sup>13</sup> Adquid shubu utsin shubu utsinquien isedben-isedbenec uspumbo yanash onqueteuidtsëqui buntsiash. Utsibo icsaiduidi chuibenequidquio ictsiash. <sup>14</sup> —Adquid niante machobudabi icquid dadan bedac bëdambo ictsiash —caimbi. Adoac bacuë tishoatsiash. Adshun codocaquinc sicaquinc daëdcaquinc catsiash. Adec bëdamboec tabadsho: —Icsambo icquid nec —Esus tantiesabon catiapimbo ictsiash. <sup>15</sup> Adquid niante machobudabi icquidën utsin-utsinquien Esus tantienquio yanshun Satanasën tantiamiacpadomboen nac caosh. <sup>16</sup> Niantebëd icquid utsi ¿ada Esus tantiaquid chido icpec? Aidëmbi niante nashunac bëdambo ictsiash. —Ëmbi nëid nashumbanuc niante utsi aton matses nibëdquidquio Esus tantiaquido utsibon nashuntsiash —queshun abëd icquidën nashunac bëdambo ictsiash.

*Esus tantiaquido chuibanquid chiaid*

<sup>17</sup> Tanta, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. —Ma penu —queshun menequid. <sup>18</sup> Adembidi chuiquin Nuquin Papan ambi chiaid dada uamepampic. “ ‘Penushe,’ queshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ queshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bëdamboen cuidquin menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.



<sup>19</sup> Padnuc Esus chuibanquid caic: –Nuquin Papan chiaid niac-niacsho isombi –quequin matses abentsëcshun chuisho: –Abimboen cachitec –cainda. Daëdshun chuisho: –Abimboen cachitec –cata. Adembidi abentsë chotsecquin chuisho tantiata. <sup>20</sup> Esus chuibanquidën Nuquin Papan chiaid niacacsho: –Mibi icsaoc. Padi icnuna –cata. Esus tantiaquido dadpeshun tantianubi adota. –Aden chuisho tantiash dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaquenguio icnu –qeshun chushcata. <sup>21</sup> Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui iseqe. Ëmbi chuibocpadomboen nata. Min matsesën mimbi tantiaidënquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. –Con matses ëmbi tantiaidquio neque. Chushcainquio iquembi –cainda.

<sup>22</sup> Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: –Bëdambo icquid nec –quequioshon nata. –Esus chuibanquid icta –mimbi badedquio caboedën Nuquin Papan chiaid badedquio niacsho isash: –Ambi: “Adquid icta,” caidbëd Timoteyo icsamboshë iquec –utsibo quenushe. –Ëbëdtan chuibanquid icta –badedquio cainda. <sup>23</sup> –Daicsabudteniaccosh. “Pucu paëmbo yan-yanebi,” quiosh –quiosh mibi caic, mado. Acteuidi acashien mibi niaque. Actequid utsi paëmbo icquid pistsëc ac ma pucu bëdanuequin. <sup>24</sup> Tantia. Mibi padpiden chuinu. –Ëbëdtan namembi –canuen matsesën naid bëdamboen tantiata. Utsi aton matses ismec icsasho: –Icsambo icquid nec –badedi catsiash aton matsesën. Utsibic ismenquio yec icsasho: –Icsambo icquid nec –quequin badedquio tantienquio icquin yuecshun istuidshumbi adotsiash. <sup>25</sup> Utsien ismequin bëdamboen nasho: –Bëdambo icquid nec –badedi catsiash aton matsesën. Utsimbic ismenquio icquin bëdamboen nabansho: –Bëdambo icquid nec –quequin badedquio tantienquio icquin yuecshun istuidshun adembidi tantiatsiash. Ëbi adsho tantiashun: –Nuquin Papan chiaid chuibanquid icta –badedquio cainda.

## 6

### *Matses yuaido chiaid*

<sup>1</sup> Matses yuabo Esus tantiaquido icsho naden chuita. –Min icbo Esus tantiesa icsho bëdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata –quequin yuabo chuita. <sup>2</sup> Utsibi chuiquin: –Min icbo Esus tantiaquidbidi icsho: “Ëbipadquid nec. Ambi chiacpadomboen natiapimbo iquebi,” cainda. “Ëbipadquid icsho aid tantiaquin con icbon chiacpadomboen nanu,” quequin min icbo bëdamboen nashunta –quequin yuabo chuita. Ëmbi chuiboedtedi Esus tantiaquido chuiban. –Adota –quequin chuibanta, mado.

### *Piucquid bunquin utsibon ambembi chiaid*

<sup>3</sup> Mimbi: –Nuquin Papan chiaid niaquenguio yec bëdamboec tabadnuna –quequin Nuquin Icbon chiaidquio chuisho: –Aden chuisho tantiatiapimbo iquebi –quequin ambembi chiaid chuiquid icsambo iquec. Adquidën chuisho tantienda, mado. <sup>4</sup> Aden icsamboen tantiaquidën: –Ëmbi chiaiduidtsëqui bëdambo iquec –quequin icsamboen chuibanendac. –Mimbi icsamboen chuinuc ëmbimbo bëdamboen chiec –quec chushcanantiadquio iquendac. Abembi onqueteuidi bunendac. Adquid yuec onquesho tantiash: –Utsi onquetiapimbo icnuc abentsëqui onquebudec –quec utsibo nëishendac. Adquidbëd chushcananec muauananec icsamboec tantiashunanendac. <sup>5</sup> Pabiate

shëcuë nibëdacobimboen Nuquin Papan chiaidquio bëdamboen tantienquio yec chushcananendac. Nuquin Papan chiaid chuibanquidën piucquid dadpen bedte danec chuibanquidbidi ictiadquio iquendac.

<sup>6</sup> Nuquien Nuquin Papa tantiaquieç bëdamboec tabadec nuquin na dadpen bedte bunenquio yec bëdambo ictsiac. <sup>7</sup> Tishac chucactsëcnuc nuquin na nibëdpanëdash. Adem-bidi unësquïn nuquin na nuqui buantiapimbo iquec. <sup>8</sup> Nuquin pete dashcutebëd icnuc utsi bunenquio yec bëdambo nuqui ictsiac. <sup>9</sup> Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mëmunenquio icquïn icsamboen nabantsiash. Aden Nuquin Papan chiaid niac-niacquïn icsamboen naic quenenash adenuidi naic unësash icsambo icquido cuidacno nidendac. <sup>10</sup> Adec piucquid natiambo bunquido aid bednuec baded-badedquieç icsadenendac. Adquido: —Esus tantiembi —queboedobi padenquio yanash: —Esus tantienquio yan-chitombi —quec natiaic tabadendac.

### *Bëdamboec tabad, quiaid*

<sup>11</sup> Mibi Nuquin Papa tantiaquidquio neque. Piucquid bedteuidi bunenquio yec bëdamboec tabadte bunquiota, mado. Nuquin Papan chiaid niaquenquio yec chieshtoenquio icquïn Esus tantiata. Matsesesen tantieç nëishëmënenquio yec bëdamboec tabadta. <sup>12</sup> Utsibon chieshënaqui chieshtoenquio icquïn Esus tantiaquieç bëdambo icta. Unësash Nuquin Papabëd tabadnuec adta. —Con Mado Esus tantiaquieç unësacsho ëbëdi tabadmendambi —queshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbi tantiamiondaque. Adembidi aid tantiaquieç bëdamboec tabadta. <sup>13</sup> Abitedi uampidën Nuquin Papan nuqui isequë. —Adquid nebi —quequin ancanquid dapa Ponsio Pidato chieç dacuëdenquio icnëdaidën Nuquin Icho Esuquidistuntsen nuqui isequë. <sup>14</sup> Esus tantiaquin chieshtoenquio icquïn aidën naidquio chuibanta. Nuquin Icho Esuquidistu choabi icnuc ëmbi chuiboed niaquenquio yec bëdamboec tabadta. —Esus tantiaquido icsambo iquec —utsibo quetiapimbo icnuc adta. <sup>15</sup> Nuquin Papan tantiacpadënquio aid ushëmbi Esuquidistu nidaidën padpideç choendac. ¿Esus chomequid mitsipadquio icpeç? Icsaisambo yec bëdamboshë icquid nec. Aid abentsëcquiobi abitedishun Icbombo nec. Aidëmbi chuiquid utsibo abitedi namendac. Aidquio chuiquid utsin dëniactiapimbo iquendac. <sup>16</sup> Aid abentsëqui unëstiapimbo icquid nec. Bëchamauanquieçsho istiapimbo yec utsibo tabadec. Aidi matsesën istiapimbo icquid nec. Adquid icsho: —Mibiuidtsëqui abitedishun Icho yec mibi bëdamboshë iquec, Papa —quequin Nuquin Papa chianenuna ënenquio icquïn.

### *Aton na dadpen dayun uaquido chiaid*

<sup>17</sup> Aton na dadpen dayun uaquido naden chuita, mado. —“Con na dadpenquioshë icnuc ëbiuidtsëqui bëdambo iquebi,” quenda. Nibëdantiapimbo icquid danquin mimbi dayun uaiduidtsëqui tantienda. Nuquin Papambo tantiaquiota. Aidëmbi matses bëdambo icmenuen aton na bedmec —cata. <sup>18</sup> Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquïn mitsana utsibo menianeta. <sup>19</sup> “Mimbi bëdamboen naoque. Èbëdi tabadmequin mibi bëdambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpideç unëstiapimbo icnuc —quequin aton na dadpen dayun uaquido chuita.

### *Pabadon ënquin chiaid*

<sup>20</sup> Èmbi chuiboedquiobidi adembidi bëdamboen chuibanta, mado. Nuquin Papan chiaid chienquio yec abembi onquesho tantienda. —Bëdamboen tantiaquin abimbo caimbi —quequidobi muasho tantienda. Adquidobëd chushcananenda. <sup>21</sup> Aden icsamboen chuïsho tantiashun: —Abimbo caic —quequin utsin-utsinquien Esus tantienquio yanondashe. Adquido tantienda. Chieshtoenquio icquïn Esusquio chuibanta. —Nuquin

Papan con mado bēdamboen ispashun —quequin mibi tantiemi. Padi. Aidtedi chuiquin  
dada uaombi.

## TIMOTEYON ISTE 2

### *Tauamboen Timoteyo chiaid*

<sup>1</sup> Pabado nebi. Nuquin Papan tantiacpadomboen Esuquidistun: —Ëbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac —quequin Esus chuibenequidquio nebi. <sup>2</sup> Con mado icbobimboecquid mibi neque. Mibi chuiquin nëid dada uanu, Timoteyo. —Nuquin Papan aton Mado Nuquin Icho Esuquidistubëdtan bëdamboen isquin bëdambo icmepashun —quequin mibi tantiembi.

### *Chieshtoenquio icquin Esus chuiban, quiaid*

<sup>3</sup> Con tsusedpabon nacpadomboen Nuquin Papauidi tantiaquin ambi chiacpadomboen natiadquio iquebi. Adquid icquin Nuquin Papa mibi chianembi. —Mibi tantiaquid Timoteyo bëdambo iquec, Papa. Adquio icmec mibi bëdamboshë iquec. Adquiouidi icmeta, Papa —quequin Nuquin Papa chianembi. <sup>4</sup> —Ëbi nidnu —quesho tantiash mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. <sup>5</sup> Naden mibi tantiembi. —Aton chichi Doida caidën ani Eunisebëdtan aid daëdshumba Esus tantiabenquiacpadomboen Timoteyontsen nëbi Esus tantiaquiec —quequin mibi tantiembi. <sup>6</sup> Adquid icsho mimbi tantiondaid padpiden mibi chuinu. —Min Mayan nëidbëd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibëd tabadmiac. Adoaid icquin dacuëdenquio icquin Esus chuibanta, mado. <sup>7</sup> ¿Nuquin Papan aton Mayan nuquibëd icmiacta nuqui natia dacuëdpe? Padenquio. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquio icquin mëmunquidquio icnuc nuqui bëdambo icmec.

<sup>8</sup> —Adoaid nebi —queshun dacuëdenquio icquin Nuquin Icho Esus chuibanta. Adembidi dacuëdenquio icquin: —Pabado tantiaquiembi —cata. —Quënën nauedtsaid Pabado tantiatipi —quenda. Utsibon cuestiadquio icquin chieshënaqui Nuquin Papan namiacpadec chieshtoenquio icquin Esus chuibanuna. <sup>9</sup> Nuquin Papan: —Bëdamboec tabadquid icmequin con Mado Esus tantiamembi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquio. Ëndenquimboshë nidaidbëdta matses uabi Nuquin Papan: —Ëmbi chiaid niac-niaquec icsambo icboedëmbi con Mado Esus tantiasho cuidenquio iquendambi —quequin ambi chuipampicpadomboen nuqui Esus tantiamiac. <sup>10</sup> Aden ambi chuipampid tantiamiabi icshumbic nëbi Esuquidistu matsesmeshun matses tantiamiac. Adoac: —Abi tantiaquid unësacsho icsaido cuidacno nidmenquio icquin unëstiapimbo icquid icmequin Nuquin Papa yacno abëdi Esuquidistun tabadmendac —quequin nuqui tantiec. <sup>11</sup> Aden tantiaquin Esus chuibenequidquio nebi. —Ëbi chuibeneta —Esusën caondaaid yec Nuquin Papabëdta Esus tantiamequidquio nebi. <sup>12</sup> Aden chuibeneshobini chieshënquin quënën nauedondash. Adoacqui chieshtotiapimbo icquin Esus tantiembi. —Ëmbi tantiaidquio comapenen tantiaquin nabanquidquio Esus nec. Adquid icquin: “Ëbi tantienquio yanushe,” quesahun abi tantiamequin ëbi chieshtomenquio iquendac. Nidaidën choabi icquin Esusën ëbi chieshtoenquio icquid icmendac —quec dacuëdenquio iquebi. <sup>13</sup> Tantia, mado. Mibi chuinu. Ëmbi abimbo chiondaaidquio chuiban: —Nuquin Papan chiaidquio nec —quesahun. Esuquidistu tantiaquinc matses tantiaquinc caquin adenuidi chuibanta, mado. <sup>14</sup> Nuquin Papan Mayan nuquibëd iqueque. Aidën namiac ëmbi chiondacpadomboen Nuquin Papan chiaidquio chuiquin Esus chuibanta, mado.



### *Onesipodo chiaid*

<sup>15</sup> Ĕmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. <sup>16</sup> Onesipodo caidĕn nĕbi bĕdamboen isposhi. Ĕbi quĕnĕn nauedacsho dacuĕdenquo icquin isuan-isuanquin bĕdambo icmiosi. Adsho isun: —Aton shubun icquidobĕdta aid bĕdamboen ista, Papa —quequin Nuquin Papa chianembi. <sup>17</sup> Aidĕmbi nĕmbo shubu dadpen icquid Doma caid yacno choboshon: —ĵMitsimbo Pabado icpec? —quequin yuen nibĕmbenequin istuidpondashi. <sup>18</sup> Mimbi isnubi Epeso yacnoshon aidĕmbidi baded-badedquien nashundeniondashi. Adsho tantiashun: —Nidaidĕn padpidec choshon Nuquin Icbon Onesipodo bĕdamboen ispashun —caimbi.

## 2

### *Chieshtoenquo icquin chuiban, quiaid*

<sup>1</sup> Chieshtoenquo icquin Esus chuibanta, mado. —Esuquidistun ĕbi bĕdamboen isec. Aidĕn bĕdambo icmiac dayacquo icquin naimbi —qeshun chieshtoenquo icquin Esus chuibanta. <sup>2</sup> Matses dadpenshun tantianuc ĕmbi chuibansho mimbi tantiondac. Ĕmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nĕidĕn chieshtoenquo icquin Esus chuibantsiash —qeshun: —Mimbitsen chuiban —cata, mado. <sup>3</sup> Sondado bĕdambo icquidĕn nacbimboen chieshtoenquo icquin bĕdamboen nabanuna. Matsesĕn chieshĕnubi Esuquidistun chiacpadomboenuidi nanuna chieshtoenquo icquin. <sup>4</sup> Sondadon: —Mibi bĕdambo iquec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado. <sup>5</sup> Ma nuquin matses titinquequidquo. ĵMitsipadquo icpec? Aton uidĕn tanec aton matsesĕn chiaction abia titinquec chosho: —Bĕdamboec titinquiosh —qeshun mauete menequid. Ambi chiaction titinquiabi icsho mauete menenquo icquid. Adembidi: —Mimbi bĕdamboen naoc —Nuquin Icbo camenuen ambi chiacpadomboen chieshtoenquo icquin nabanuna, mado. <sup>6</sup> Ma nuquin matses tied uaquidquo. ĵMitsipadquo icpec? Choadquidĕnquo dayacquo icquin aton tied uashun ambi nitsinaid pequid. Adembidi Esus chuibanquid icquin dayacquo icquin Esus chuiban-chuibanuna ĕnenquo icquin. Adoac utsibon Esus tantiabentsiash. <sup>7</sup> Aden ĕmbi chuiboed tantiata. Adsho Nuquin Icbon mibi bĕdamboen tantiametsiash.

### *Esuquidistu tantiata, quiaid*

<sup>8</sup> Utsibon chieshĕnubi Esus tantiata, mado. Aidi matsesash isadaidbo tsusedpa Daidĕn tsyuecquid nepanĕdash. Nuquin Papan uincuemenĕdaidquo yec abi iquec. Aidquo tantiaquiota. Aid chuibenequidquo nebi. <sup>9</sup> Aden chuisho chieshĕnquin bedshun icsambo icquid uidĕn uacbimboen shocosh nacnenaidĕn mĕtaniac mĕyadebi. ĵĔbi aden uidĕn uacbimboenda Nuquin Papan chiaid uidĕn uapadic? Padenquo. Ĕmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. <sup>10</sup> Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unĕsacsho cuidenquo icquin abĕdi tabadmendac —quec chieshtoenquo iccobi quĕnĕn nauedondaaid yequi. <sup>11</sup> Naden abimbo chiaidquo tantiash chieshtoenquo iccobi.

—Abi bunaid ĕnshun Nuquin Icbon chiacpadomboen naquid chieshĕmĕnquidĕn unĕs uacsho Nuquin Icbon abi yacno abĕdi tabadmendac.

<sup>12</sup> Utsibon chieshĕnaqui chieshtoenquo icquin Esus tantiec unĕsash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

<sup>13</sup> Aden abi tantiesabon ambi chiaid niac-niacsho isun Nuquin Icho Esusën ambi chiacpadomboen naquidquio icquin icsaido cuidendac.

Adembidi ambi chiacpadomboen abi tantiaquido bëdambo icmendac

—quequin chiaid tantiashun ambi chiacpadomboen naquin Esusën naid chuibanuna chieshtoenquio icquin.

### *Nuquin Papan chiaid isbanta, quiaid*

<sup>14</sup> Ëmbi dada uaqin chuiboed mibëd icquido naden chuibanta, mado. —Nuquin Icbon nuqui isnubi Esusquio chienquio yec ambembi chiaid chiec mibi chushcananqueque. Adenda. Adec chushcanansho tantiash matses icsambo yanegue. Padi —cata, mado. <sup>15</sup> —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naid ma Nuquin Papan isnu —queshun adota. Ambi chiaid bëdamboen isbanshun chieshtoenquio icquin Nuquin Papan chiaidquio chuibanta, mado. <sup>16</sup> Ambembi chiaid chuiquidobëd onquec tabadenda. Adec onquequido icsambo icboedi buëdanquiec Nuquin Papan chiaid niac-niaquec icsamboshë yanegue. <sup>17</sup> Tosho bedacbimboec adquidën chiaid tantiaquido dadpen yanegue. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. <sup>18</sup> Aidon Nuquin Papan chiaidquio chienquio icquin muaquin chiec. —Esus tantiaquido unësabi icquido nëbimbobi uincuenacbimboec icpec. Ünësacsho aton dada chuca uaqin uincuenquio iquendac —quequin muaquin chuisho tantiashun utsibon Nuquin Icbon chiaid tantienquio yanac. <sup>19</sup> Aidon Esus tantiabien icchitash. Nuquin Papan Esus tantiamiac ënenquio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icho Esus nec —queshun ambi icsamboen naid ënendac.

<sup>20</sup> Esus tantiaquido nadquio iquec. Shubu dapan tsitsan tabëcaid tabadacbimboecquid nec. Tsitsan abentse-abentsec icsactsëcquio icnubi utsi-utsiec bëdambo iquec. Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Ütsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ënabi: —Esus tantianu —quetsëcquid iquec. <sup>21</sup> Esus tantiaquidquio ictiadquio yec: —Muaid chuisho tantiatiapimbo icquin nëbi Nuquin Icbon chiacpadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bëdamboen nametsiash.

<sup>22</sup> Caniabon mëmunenquio icquin abi bunacpadomboen naquid tanenda, mado. Adenquio yec bëdamboec tabadte bunquiota. Nuquin Papan chiaid niacte bunenquio yec: —Nuquin Icho Esus nec —quequidobëdtan chieshtoenquio icquin Esus tantiata. Matsesten tantiec bëdamboec isnanec bëdamboec tabadta. <sup>23</sup> Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidën chuisho tantiash matses chushcananondashe. Aidën chiac chienda. <sup>24</sup> Nuquin Papan chiaid chuibanquid chushcananenquio icquid nendac. Chieshëmënenquio icquin aton matses bëdamboen isquid nendac. Adembidi nëishënenquio icquin Nuquin Papan chiaid tantiamequid nendac. Utsibon chieshënaqui chieshënanenquio icquid nendac. <sup>25</sup> Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nëishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. <sup>26</sup> —Aden Nuquin Papan ambi chiaidquio tantiamiac Esus tantienquio icboedëmbi Esus

tantiabenshun abi yuaquidën Satanasën namiaid ënendac. Aden Nuquin Papan chi-acpadomboen naindac –queshun chieshtoenquo icquin Nuquin Papan chiaidquo chuibanendac abi chuibanquidën.

### 3

#### *Icsambo icquido iquendac, quiaid*

<sup>1</sup> Tantia, mado. Mibi chuinu. Esus padpidec choabi icnuc matses dadpenquioshë icsamboshë iquendac. <sup>2</sup> Nadquido iquendac. Nëidic utsi tantiatiapimbo yec abiuïdtsëqui datantiadquido. Nëidic piucquid bedte comapenec bunquidombo. Nëidic: –Is. Ëmbimbo naiduidi bëdambo iqueque –quequido. Nëidic utsibo chieshë nec icsamboec onquequido. Nëidic amën chiaid niac-niacquido. Nëidic anin chiaid niac-niacquido. Nëidic aton na nashunaqui nashumënenquo icquido. Nëidic Nuquin Papan chiaid niac-niacquidombo. <sup>3</sup> Nëidic aton matses tantiesabo. Nëidic chiesh bëdanesabo. Nëidic muauanquido. Nëidic abi icsate bunaid ënenquo icquido. Nëidic cuesanquido. Nëidic bëdambo icquid chieshënquido. <sup>4</sup> Nëidic bëdambo icquid damianquiashic cuesunianquido. Nëidic bëdamboen tantienquo yec badedi icsa uanquido. Nëidic: –Ëbiuidtsëqui bëdambo iquec –quec abibi tantiadquido. Nëidic ambi naiduidi bunquin Nuquin Papa tantiesabo. <sup>5</sup> Nëidic: –Nuquin Papa tantiaquid nebi –quec muaquin aidën chiaid niac-niacquido. Adquidtedi icsambo icquido nec. –Adquidbëduidi onquec tabadenda –caimbi.

<sup>6</sup> Adquidon mibi yacnoshon shubu utsin shubu utsinquien isben-isbenac caosh. Adash chidoidquo icnubi shubun puduedshun ambembi chiaid chuibanac caosh. Aden chuisho tantiashun: –Padi –catiadquidi chidon: –Mimbi chiaid tantianu –quequin badedquo tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. <sup>7</sup> Aden icsambo icquidën ambembi chuidenesho tantianeshun Nuquin Papan chiaidquo tantiatiapimbo icpac caosh aid chidobo. <sup>8-9</sup> Aid chidobo chiec muaquido icsambo icpampidobimboec iquec. Icsambo icpampid abentsëc Canes cuëmëdnubi utsi Mambades cuëmëdpampic. Isadaidbo tsusedpa Moisesën Nuquin Papan chiaidquo chuisho tantiashun aidon: –Mue nec. Ëmbimbo comapenen tantiaquin ismenu –queboedombi bëdiactsëc tantiaquin nacnenuidpampic. Adsho isun: –Abimbo cainquo iccosh. Muachitosh –capampic matsesën. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bëdamboen istiapimbo iquec. Adembidi aidon muaquin chuisho tantiashun matses dadpenshun: –Muequi nec –capendac.

#### *Nuquin Papan chiaid isbanec bëdamboec tabadte*

<sup>10</sup> Ëbien muaquidpenquo nec. Ëmbi naid ma mimbi tantieyoc. –Ma Esus tantianu –quequin Esusën naid chuibanec bëdamboec tabadondabi. Esus tantiaquidquo icquin matses tantiaquin Esusën naid chuibeniondambi. Chieshënaqui chieshtoenquo icquin adembi chuibeniondambi. <sup>11</sup> Ëmbi aden chuibansho isun chieshë nondashi. Shubu dadpen icquid Antioquiya caid yacnoshon ëbi: –Cuesnu –casha Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuënoten se-sequin unës uatsempondash. Adsho Nuquin Icbon nac unësenquo iccondabi. <sup>12</sup> Ëbipadquido Esus tantiaquidotedi bëdamboec tabadtiadquido icsho adembidi utsibon comapenen chieshë nendac. <sup>13</sup> Padnuen chieshëmënenquidobëd bëdambo icquid damianquiec muaquido bëdiactsëc icsambo icboedi muauananquiec buëdanquiec icsamboshë yanendac.

<sup>14</sup> Mibi adquidpenquo nec, mado. –Ëmbi isondaïdon bëdambo icquidon abimbo chuibanondashi –quec Nuquin Papan chiaid niaquenquo yec bëdamboec tabadta, mado. <sup>15</sup> Ënden bacuëmpi icquin Nuquin Papan chiaidquo min matsesën chuibansho

mimbi tantianëdac. Adshun: –Aton Mado Esus tantiaquid unësacsho abëdi Nuquin Papan tabadmendac –quequin mimbi tantiabenëdac. Aden Nuquin Papan bëdamboen iste tantiametempo Nuquin Papan chiaid nendac. <sup>16</sup> Nuquin Papan chiaid aton Mayanën tantiamiac matsesën dada uapampic. Aidën chiaid abitedimbo bëdamboshë iquec. Aid isec onquequin: –Nuquin Papan chiacpadec bëdamboec tabadnuna. Esus tantiaquido yec icsainquien ictiad –quequin abi chuibanquidën chuibanec. Adembidi: –Esus tantiaquido adesa. Padi. Bëdamboembien natiad –quequin chuibanec. <sup>17</sup> Nuquin Papan: –Ëmbi chiaidquio tantiashun Esus tantiaquinc matses nashunquinc caic Esus tantiaquido ma bëdamboec tabadnu –quequin ambi chiaidquio dada uamepampic.

## 4

### *Nuquin Papan chiaid chuisho tantienquio yaid*

<sup>1</sup> Nuquin Papabëdtan Esuquidistun mibi isequë. Bëdamboen nata. Esusën nidaidën padpidec choshon abitedishun Icbombo icquin unësaido uincuemiaindo unësabi icquidobëdta chiendac. –Nëid ëbi tantiaquid ëbëdi tabadmembï. Nëid ëbi tantiesacuidembï –quequin chiendac. <sup>2</sup> Aidën chiacpadomboen naquin Nuquin Papan chiaidquio chuibanta, mado. Matsesën tantiatiadquio icnuc adota. Tantiatiapimbo icnubi adembï chuibanta. Esus tantiaquido icsasho isun: –Esus tantiaquido adesambo neque. Bëdamboembien natiad –quequin nëishëmënenquio icquin chuita, mado. Ut-sibo bëdamboec tabadsho: –Mibi bëdamboec tabadoc. Aduidequi tabadta –quequin chieshtoenquio icquin chuita. Bëdiactsëc tantiatsëcquido: –Esus tantiaquidon nadoquid –quequin chuibanta, mado. <sup>3</sup> –Yuecshun Nuquin Papan chiaidquio matses dadpeshun tantiatiapimbo iquendac –queshun nata, mado. Aden tantiatiapimbo icquidën Nuquin Papan chiaidpenquio chuisho tantiash: –Mimbi ëbi bunaidquio chuisho tantianu. Ëbi chiec cho –quequin muaquid utsi-utsien abi yacno puduedmendac. <sup>4</sup> Pamumëdacbimboecquin Nuquin Papan chiaid tantienquio icquin tsusedpabon amembï chiampiduidi tantiendac. <sup>5</sup> Aidën nacpadomboen nainda, mado. Nuquin Papan chiaidquio bëdamboen tantiaquid yec bëdamboec tabadta. Adsho utsibon chieshënaqui chieshtoenquio icquin Esusquio tantiata, mado. Adembidi Nuquin Papan bëdamboen iste Esus tantiesabo chuibanta. –Esus chuibanquidën nadoquid –caïdtedi nabanta, mado.

<sup>6</sup> –Ëbi unës uan ëmbi nacpadomboen: “Adota,” mibi caquid nibëdtsiash –queshun mibi aden chiec nebi. Nëbi Nuquin Papan tantiacpadën chieshëmënenquidon ëbi unës uaic. <sup>7</sup> Utsibon chieshënubi ënenquio icquin Esusën naid chuibeniombi. –Ëbi bunaid bednu –quec comapenec titinguiacbimboen dayacquio icquin Nuquin Papan chiaidtedi naombi. Chieshtoenquio icquin Esus tantiaquidquio nebi. Adshobini nëbi unës uaic. <sup>8</sup> Unës uacshobini matsesën naid abitedimbo tantiaquidën Nuquin Icbon: –Ëbi tantiaquin ëmbi chiacpadomboenuidi naic mibi bëdambo iccoque. Nuquin Papa yacno ëbëdi tabadmequin mibi bëdamboshë icmendambi –caindac. Abi chote ushën choshon aden Nuquin Icbon ëbi chiendac. Adembidi abi chosho iste bunquidotedi abi tantiaquido Nuquin Icbon abëdi tabadmendac.

### *Timoteyo: Cho, caid*

<sup>9</sup> Nëbimbobi ëbi isec cho, mado. <sup>10</sup> Utsibo nidanebon ëbentsëqui tsadebique. Demas caid aton na bedteuidi bunec ëbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon <sup>11</sup> Ducas abentsëqui ëbëd iquec. Madcos bedbëtsenec cho, mado. Ëbëdtan aidëmbi nëshunquio Esus chuibantsiashe. <sup>12</sup> Tiquico caid Epeso yacno mibi yacno nidmiombi. <sup>13</sup> Shubu dadpen icquid Todoas caid yacno Cadpo cuëmëdquidën shubun con na niamëdaccondashe. Con dashcute ëmbi dada uaidbëdta



bedbëtsenec cho, mado. –Abitedi buantiapimbo iquebi –queshun nëish yua bitsi nacnenaïd dada uaiduidtsëqui bëta.

<sup>14</sup> Shocosh nacnenquidën Adecandedo caidën comapenen chieshë nondashi. Aid Nuquin Papan cuidendac, mado. <sup>15</sup> Nuquin Papan chiaïd ëmbi chuïsho tantiatiapimbo icquin icsamboen chuïshunondashibique. Choquin aid isenda: –Ëbitsen icsamboen chuïshunushe –queshun. <sup>16</sup> Ënden tauamboen bedshun: –Quënën nauednu –cac cuidte chuïquid dapa ëmbentsëqui chuïbampondambi. –¿Mitsipadosho isun ëbi bedo? Icsamboen nambo iccombi –capondambi. –Ëbëd icboedon dadpenshun: “Bëdambo icquid nec,” quequin ëmbi naïd chuïbanac ëbi quënën nauedquidon ëbi nidmetsiash –queshun ëbëd icboedo: –Chiec cho –caqui choenquïo iccondash. Aden ëbi cacuidondaido tantiaquin: –Nuquin Papan aïdo cuidenquïo icpashun –caïmbi. <sup>17</sup> Nuquin Icbombini nïanenquïo iccondash. –Isadaïdpembo matses utsïbo ma ëmbi naïd chuïbenenu –quequin cuesambo icmepondashi. Adondaïd icshobini chieshëmënquïdon: –Cuesnu –cabededpondash. Nuquin Icbon nac aid matsesën unës uainquïo icpondashi. <sup>18</sup> Padpiden chieshëmënquïdon ëbi caic: –Ma mëyanac chieshtoshon Esus tantienquïo yanu –casha Nuquin Icbon nac chieshtoenquïo ictsïabi. –Nuquin Icbombidi abi yacno ambi matses dadpen namïacno abëdi ëbi tabadmendac –queshun: –“Nuquin Icbo bëdamboshë iquec,” canuna ënenquïo icquin –caïmbi.

<sup>19</sup> Mibi yacnocquïdo: –Mibi caic: “Unësquïo iquec,” quïosh Pabado –quequin chuïban, mado. Nëïdic Aquïda caïd. Nëïdic aton chïdo Pidïsïda caïd. Nëïdic Onesïpodo caïd chedo. Aïdtedi aden chuïban. <sup>20</sup> Mïmbi isondaïd Edasto caïd shubu dadpen icquid Codïnto yacno tëshëdondash ëbi chonoc. Utsïbic Tëdopïmo caïd aton dada icsabudacsho shubu dadpen icquid Mïdeto caïd yacno nïanondambi. <sup>21</sup> Ue tsasi iquenuanquïd taënushe. Baded cho, mado. Doma yacnocquïdo nëmbo icquïdon: –“Timoteyo unësquïo iquec,” quequin dada ua –caposhi. Nëïdic Eyobudo caïd. Nëïdic Pudente caïd. Nëïdic Dïno caïd. Nëïdic Quëdaudia caïd. Nëïdic Esus tantiaquïdo nëmbo icquïdo utsïbotedi. Aïdtedi adosh. <sup>22</sup> –Nuquin Icbo Esusën abëd icquin con mado bëdamboen ispashun –quequin mibi tantiëmbi. Padi. Aïdtedi chuïquïd dada uaombi, mado.

## TITON ISTE

<sup>1</sup> Pabado nebi. Nuquin Papan chiacpaden chuibenecquid nebi. Adembidi Esuquidistun, Ēbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquio ma icpanuna. Adquid iquec ma bēdamboec tabadpanuna. <sup>2</sup> Muesa Nuquin Papa nec. Adquid icquin, Ēmbi ēnden chiampicpadomboen ēnenquiocquin Esuquidistu tantiaquido ēbēdi tabadendac, quequin ma aidon tantiapanueshun adomboen chiaid chuiquidquio Esuquidistun icmiondashi. <sup>3</sup> Ambi tantiampicpadēn ambi chuiampid Esuquidistu tantiamenuequin aidēn chuibeneta caid nebi.

<sup>4</sup> Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistubēd icquid nebi, quequin ēmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ēbi icsaid cuidenquio yec Nuquin Papa bēpiscudac, quequin ma ēnenquiocquin mimbi tantiapanuna. Adecbidi Nuquin Papabēd tabadendabi, quequin tantiapanuna, Tito.

### *Quideta yacno nidshun Titon natequid*

<sup>5</sup> Ēmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnocquidon ēmpanuna. Adembidi, shubu dadpen icquid uano-uanoecquid yacno nidshun ēmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquiduidquio chuita, Tito. <sup>6</sup> Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquio ictiad, Tito. Bēdamboec tabadquid ictiad. Adecbidi chido abentsēc inquid ictiad. Aton bacuēbotedi Esuquidistu tantiaquidobidi ictiad. Adquidēn bacuēbo icquin bēdamboec tabadquin aton papan chiaidbēdta aton titan chiaid chieshenquiocquin nabantiad. <sup>7</sup> Aidi utsibēd bēdamboec tabadquin, Nuquibi nanuna, queshun utsibēd onquenquiocquin ambibi tantiacpadomboenuidi nabanesa ictiad. Adecbidi badedquio nēishesa ictiad. Adecbidi paēmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. <sup>8</sup> Adecbidi Esuquidistu tantiaquid utsibo yuedquid ictiad. Adecbidi utsibobēd bēdamboec tabadte bunquid ictiad. Adecbidi utsi bēdamboec tabadsho tantiash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, queshun naisa ictiad. Adecbidi, Naden naic bēdamboecquid yantsiabi, queshun adomboen naquidquio ictiad. Adecbidi abimbo chuiquidquio ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bēdamboen tabadmequin chuiquidquio icta, quequin chuita, Tito. <sup>9</sup> Aden utsibo isbanquin bēdamboen tabadmenuequin chuiquid icta, cashun nēid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiash ma utsibo bēdamboec tabadpanuna. Adembidi Nuquin Papan chiaid chuca uaquidēn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuioata, Tito.

<sup>10</sup> Quidetabo nad iqueque. Chuinu. Tantia. Abi chuiquidēn chiacpaden naisa Quidetabo dadpen iquec. Abimbo chiosh, camenuequin abimbo chiacbimboec aido onquec. Dadpenshun isadaidbon nacpadomboen nanuequin, Shui dēbid dētemeta, quequin Quidetabon chiec. <sup>11</sup> Adquidon shubu utsin-utsinquec puduedshun ambi tantiaid icsa chuibanac utsin-utsinquien tantiash cuēshēdec. Adembidi bedte bunquin adquidon muaquin chuibanec. Adquid tantiamenuequin Nuquin Papan chiaid bēdamboen

chuiبانquin ambi muaquin chiaid ëmeta, Tito. <sup>12</sup> Quidetabon matses ënden icnëdaid abentsëcshun naden aton matses chuipanëdash. “Quidetabo muaic chuinanquidombo nec. Aben icquid yuatemaïdbimboec uimanëmënquido nec. Chonoadenquiocquin nua peshun nua actenequido neoaic,” quequin Quidetabo ënden icnëdaïdën chuipanëdash. <sup>13</sup> Abimbo chuiquidënquio aden chuipanëdash. Aden chuipanëdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. <sup>14</sup> Aden mimbi chuibanac Esuquidistu tantiaquid yanash isadaïdbon Nuquin Papan chiaid utsi uain chiampicpaden chuïsho tantiesä ma icpanuna. Aden mimbi chuibanac abimbo chuiquidën chiacbimboen niacquidon chuïsho ma tantiesä icpanuna. <sup>15</sup> Nuquin Papan Esuquidistu tantiamiaïdën icbon chiaid bëdamboen isoaic. Adomboembidi ambi uabanaïd isec. Adash abitedi bëdambo iquec, quec tsadec. Ambi tantiaïd icsambocquid icnuc Esuquidistu tantienquiocquin, Nëïd mishtemaïd nec. Nëïd utsi petemaïd nec. Nëïd utsi actemaïd nec, quequin chuïbanquidën chiaïd tantiec. Aden tantiec aton tantiate icsabudec, Icsaobi, quequin tantienquio iquec. <sup>16</sup> Nuquin Papa tantiembi, qeshumbic Nuquin Papan chiacpadomboen niacquin tantiesä nebi, quiacbimboec tabadsho utsibon adquid isec. Nuquin Papan chiaïd niacquid adquid nec. Nuquin Papan icsamboen isaidquio adquid neoaic. Naïd bëda natiapimbo icquid neoaic, Tito.

## 2

### *Esuquidistu tantiec iccuededquido tantiametequid*

<sup>1</sup> Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuïbanquin tantiamë. <sup>2</sup> Mimbi paëmbocquid nua aquenquio icteni-acpadomboen Esuquidistu tantiaquid tsusiobo chuïbanquin tantiamë. Adembidi, Mibi bëdamboquid nec, utsibo camenu, quec bëdamboec tabadtenequin tsusiobo ismequin tantiamëoa. Adembidi, Naden naic icsatsiabi, qeshun mimbi nainquio yacpadomboen mimbi bëdamboen tantiaïd aïdo chuïbanquin tantiamëoa. Adembidi, Naden naic bëdamboquid yantsiabi, qeshun adomboembidi naquid nebi, quequin tsusiobo chuïbanquin tantiamëoa. Adembidi mimbia Esuquidistu tantiadoniacpadomboen pausunaïd icquin ma adquiobidi tsusiobotsen yampanueshun tantiamëquin chuïbanta. Adembidi, Esuquidistu tantiec utsibobëd tantiananec mibi tabadteniacpadomboen chuïbanquin tantiamë. Adecbidi, natiatequid iquendac, quequin Esuquidistu tantesä uainquiocquin abi choate mimbi caimbudacpadomboen chuïquin tantiamëoata, Tito.

<sup>3</sup> Adembidi, Esuquidistu tantiaquid ënden machoaido tantiamenuequin chuïban. Nuquin Papan bëdamboquid icmiaïd nebi, quec bëdamboec mibi tabadteniacpadomboen tantiamëquin chuïoa. Adembidi, utsi icsamboen chuiquid iquenda, quequin chuïbanquin tantiamëoa. Adembidi, mimbi paëmbocquid nua aquenquio yacpadomboen chuïquin tantiamëoa. Mimbi bëdamboen nabanaid nëbi machocuenaido ismequin tantiamë, quequin ënden machoaido chui, Tito. <sup>4</sup> Aden chiac ënden machoaidon aton bënë aton bacuëbo chedobëd abi tabadaïd tantiamenuequin nëbi machocuenaido bëdamboen ismepec. <sup>5</sup> Adembidi aïdën bëdamboen tantiaquin, Naden naic icsatsiabi, qeshun nainquio iquec. Naden naic bëdambo ictsabi, quequin naquid, quequin ënden machoaidon nëbi machocuenaido chuïbanquin tantiamëoapec. Adembidi, Mibi inesa chudmenquio yec tabadta, quequin ënden machoaidon nëbi machocuenaido chuïquin tantiamëoapec. Adembidi, aton shubun tabadquin ambi nabanacpadomboen ismequin aïdon nëbi machocuenaido tantiamëoapec. Adembidi, utsibo bëdamboen tantiaquin ambi nashunacpadomboen ismequin ënden machoaidon nëbi machocuenaido tantiamëoaic. Adembidi, aton bënë chiacpadomboen nabanquin nëbi machocuenaido ismequin tantiamëoaic. Aden ënden machoaidon abi ismiacpadomboen nëbi

machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

<sup>6</sup> Adembidi, caniabo chuibanquin tantieme, Tito. Naden naic icsatsiabi, quequin nainquo iquembi, quequin mimbi bēdamboen tantiacpadomboen caniabo tantiemequin chuioa. Adembidi, Naden naic bēdambo mibi icpec, quequin mimbi bēdamboen tantiacpadomboen aido tantiemequin chuioa. <sup>7</sup> Bēdamboec tabadaid tantiemequin ismenu, quec mibibi bēdamboec tabadteneta. Mibibi icsainquiocquin ismequin tantieme. Adembidi mamēnenquiocquin bēdamboen chuiquin tantieme. <sup>8</sup> Adec mibibi bēdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshēnquid mibi icsamboen chuitiapimbo yec tabadendac.

<sup>9</sup> Adembidi yuabo chuiquin, Bēdambo iquebi, min icbo camenuquin ambi chiaidtedi chieshenquiocquin nabanta, quequin tantiameta, Tito. <sup>10</sup> Adembidi, min icbon na ampenquiocquin bēdamboen dayun uaqin nashunquin min icbo ismeta, quequin yuabo tantieme. Aden Esuquidistu tanquin nabansho isun min icbo: Con yua Esuquidistu tantiaquid yec bēdamboshē yanac. Con yua bēdambo icmequidēn chiaid tantianu, quendac icbo.

<sup>11</sup> Nuquin Papan matses abēd icmenuquin matses icsaid bedshuntequid Esuquidistu icmenuquin chomepanēdash. <sup>12</sup> Aden chomiac nidaidēn tabadquin utsibo tantiaquin Nuquin Papan chiacpadomboen naquin ismiac adomboembidi naic bēdamboec tabadquid. Nuquin Papan bēdamboen tantiamiac bēdamboen tantiasho, Aidēn bēdambo icmiaid icquin naden naic bēdambo icpec, quequin naquid. Adembidi, Naden naic icsatsiabi, quequin nainquo icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantieme, Tito. <sup>13</sup> Nuquin Papapadquid con Icbo Esuquidistu choaic, quequin caimbudec bēdamboec tabadebi, quequin chuiquin tantiemeoa. <sup>14</sup> Nuqui cainaid: Ēmbi con utsibo caid ēbipadquid iquendac, quiash nuqui icsaid bedshunash abided cuidadec unēsapanēdash. Adacsho aid tantiaquidquio yec bēdamboec tabadquid nec, quequin chuiquin tantieme, Tito. <sup>15</sup> Ēmbi chuiboedtedi chuibanquin tantieme. Mimbia tantiaquid icquin, Ēmbi chiacpadomboen nabanec tabadteneta, quequin Quidetabo chuioata. Mimbi chiacpadomboen nainquiocsho isun cuembo chuioata. Adecbidi, utsibon mibi icsamboen chuitiapimbocon bēdamboec tabadteneta.

### 3

#### *Utsi tantiaquin nabantequid*

<sup>1</sup> Esuquidistu tantiaquidtedi bēpiscudmenquiocnuequin naden chuibanta, Tito. Min tsuibon bēdamboen chiaid naquimbi adembidi mibi chuiquid utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnoquido chui. <sup>2</sup> Adembidi, Utsi muaquin chienda, quequin chuioata. Adecbidi, Utsibobēd tantiananec bēdamboec tabad, quequin chuioa. Adembidi, Mimbi naiduidi tantienquiocquin nabanta, quequin chuioa.

<sup>3</sup> Ēnden Esuquidistu tantiesa nuqui iccondac. Adquid icquin Nuquin Papan chiacpadomboen nainquo nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac. <sup>4</sup> Adquid nuqui icnuc matses tantiec abēd icquid icmenuc nuqui icsaid bedshunash abided cuidadec Esuquidistu chopanēdash. <sup>5-6</sup> Adec choash cuidasho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniāc. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiemequioquin



nuqui emec. <sup>7</sup> Adec aton Mayan nuquibéd icsho isun, Bédambocquid nec. Aidtedi ebédi tabadendac, quequin Nuquin Papan tantiec. <sup>8</sup> Embi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bédamboec tabadpanuna. Embi chiacpadomboen Esuquidistu tantiaquidtedishun nadenec utsibobéd bédamboec tabadquid nec, quequin chuita.

<sup>9</sup> Adec tabadec min tsusedpabo chiec utsibéd nëishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinedaid chuiquin chushcanu qesho adembidi adenda, cata. Aden chiaid Nuquin Papa yacno mibi puduedmetemaid nec, quequin chuita. <sup>10</sup> Adec onquequin Esuquidistu tantiaquido cuëshédmenuequin chuibanquid icsho bédamboen tantiamenuequin chuiban. Aden chiaqui niachidanquin adomboembidi aidèn chuioasho tantiashun aidi comapenen chuibanquin tantiameo. Aden chiaqui padpiden niachidanquin adomboembidi chuioasho tantiashun cacumeta, Tito. <sup>11</sup> Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

### *Utsibo chuiquin chiaid*

<sup>12</sup> Nèbi utsibo chuinu. Tantia. Adtemas Tiquico chedo ebédi iquec. Abentsèqui Quideta yacno nidmembi. Aid mibi yacno choambien mimbi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenec Nicopodis yacno tabadnu, quianec nidendabi. <sup>13</sup> Matses icsasho cuidte chuiquid, Senas mibi isbidanec Apodosbéd udi nidec. Aid daèdi mibi yacno chosho yued. Nidnu, qesho aton na nibédsho isun menequin bédamboen nidme. <sup>14</sup> Peshun acnu, quequin Esuquidistu tantiaquidèn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

<sup>15</sup> Mibi tantiec tabadebi, quequin Tito chuita, ebéd icquidon cacpadomboen dada uaimbi. Adembidi mibéd icquido Esuquidistu tantiaquido tantiec ebéd icquido tabadoaic.

Esuquidistun, Bédambo iquebi, camiaido ma mibitedi icpanuna. Padi. Aidted chiombi, Tito.

## PIDEMONËN ISTE

<sup>1</sup> Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. <sup>2</sup> Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiabimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuioata, Pidemon. <sup>3</sup> Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

### *Nuquin Papa chiec onquiaid*

<sup>4-5</sup> Pidemon Nuquin Icbo tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. <sup>6</sup> Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

<sup>7</sup> Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantias bëdambo iquebi, Pidemon.

### *Onesimo tantiaquin chuidoniaid*

<sup>8</sup> Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. <sup>9</sup> Tantaranquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. <sup>10</sup> Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. <sup>11</sup> Ënden min yua icquin mimbi chiacpadomboen mibi nashunenquio iccondaideëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

<sup>12</sup> Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon. <sup>13</sup> Esuquidistu chuibansho quënën nauedshun tataniac caputiapimbocsho mimbi ëbi nashuntiapimbo iquec. Adec mibi nashumëntiapimboenbi Onesimombini nashunosh, qeshun nidmetiapimbocquimbi mibi yacno nidmembi. <sup>14</sup> Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash. <sup>15</sup> Yuecash cuëshëdenquio yec Pidemombëd Onesimo tabadoaindac, quequin Nuquin Papan tantiondacpadquiec mibi yacnoësh cuenëdaid mibi yacno nidash Onesimo tabadtsiash. <sup>16</sup> Onesimo min yua iccondaid Esuquidistu tantiaquid yansho mimbi con utsi caid aidi nendac. Ëbëd icquin natiapimbocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

<sup>17</sup> Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon. <sup>18</sup> Con na utsibëdtabi con na bedtequid Onesimon bedaccondash, quequin mimbi chiactedi mibi meneoaimbi. <sup>19</sup> Aidedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. <sup>20</sup> ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi. <sup>21</sup> Ëmbi chiactedi daëd uaquin mimbi natsiac, quequin tantiec tsadebi, Pidemon.

<sup>22</sup> Nëidtsen chuinu. Tantia. Ëmbi tantienquiocnoc Pabado chonoshe qeshun abi ushondaaid nacnenueshun nacentata, Pidemon. Mibi ëbi tantiec Nuquin Papa chiec onquiacpadomboen badedquio Nuquin Papan mibëd icmepashuni.

### *Utsibo chuinu quiaid*

<sup>23</sup> Esuquidistu tantiaquid utsibo ëbëdi iquec. Aidon chiaid chuinu. Tantia. Epapadas, abembi ëbëd icnuec quënën nauedadondaïdën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. <sup>24</sup> Madcos yec Adistadico yec Demas yec Ducas yec quec ëbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanoaquido nec.

<sup>25</sup> Nuquin Icho Esuquidistun mibitedi bëdambocquid icmebanacpadquiec ma tabadoapanuna, Pidemon.

Padi. Aided dada uaombique. Isec onqueta.

## EBEDEYON ISADAIDBON ISTE

### *Abi yacnoshon ambi uaidon Icbombo Esuquidistu nendac*

<sup>1</sup> Ĕndenquimboshē Nuquin Papan ěmbi chiacpadomboen chuibanta cac adomboembidi abĕd icquido tsusedpabon chuibanoapampic. Abentsĕc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bĕda budmiac aidĕn chiacpadomboen tsusedpabon chuoapampic. Adembidi nadatiambocquin uabanquin ismequin chiac adomboembidi chuoapampic.

<sup>2</sup> Nĕbi tsyuecquio Nuquin Papan chiacpadomboen abipadquiocquidĕmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubĕdta uashun aidĕnquiocquidtedi aton Papabĕdtan uabanampidquio aton Madombo nec. <sup>3</sup> Aidi, aton Papa bĕdaidquio yampidpadquidquibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubĕd aidĕnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided ciudadec unĕsash, Ĕmbi bĕdamboquid icmebanaido matses nendac, quequin tantiashic abuc nidoash Nuquin Papabĕd tabadoapanĕdash aidquiobi. <sup>4</sup> Ad icnuc ambi abi yacnoshon uaido abipadquid nibĕdec. Aidon con Icbombo caidquio nec. <sup>5</sup> ĤAmbi abi yacnoshon uaid mayan bĕda isec: “Con mado mibi nec.

Ĕbi min papa nendac, quepecta Nuquin Papa iquec? Padenquio.

Adecbidi:

ĤNĕidĕn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

<sup>6</sup> Abĕd Abiambo Yampidi nidaidĕn tabadash choasho isun Nuquin Papan ismequin: “Nĕid con Madombo Abentsĕqui nec. Aidquio tantiec con Icbo nec, quec cuishon quec, ambi naid chiec cuĕdĕn, cac aden ambi abi yacnoshon uaido mayan bĕdabo chuibanec cuĕdĕncuededendac.”

<sup>7</sup> Ambi abi yacnoshon uaido mayan bĕdabo naden Nuquin Papan chiec:

“Ĕmbi chiacpadequi cunquequid yanec.

Adecbidi, ěmbi chiacpadequi cuĕte nĕdĕnquedote iquendac.”

<sup>8</sup> Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ĕnenquiocquin ĕbĕdtan Chuiquid Abentsĕcquio mibi iquendac.

Adecbidi namequid bĕdaidquio mibi iquendac.

<sup>9</sup> Ĕbipadquid iquec bĕdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ĕbi yacpadquidquio Icbo Abentsĕcquiobi mibi nec. Mibĕd icquido adquid nibĕdec.

Mibi abentsĕqui adquidquio iquec. Adquid iquec, Bĕdambo iquebi, quec mibi cuishon quendac.”

<sup>10</sup> Adembidi Nuquin Papan naden aton Mado chuoiaic,

“Tauamboen nidaid abubĕdta uashun aidĕnquiocquidtedi mimbi uabampampic.

Aidtedishun icbombo mibi nec.

<sup>11-12</sup> Aidtedi ĕnĕdendac.

Mibien nibĕdantiapimbo yec abi tabadendac.

Aidtedi dashcute shĕnibudaic niacbimboen chuca uaindac.

Mibien Abiambo Yampid yec abi ĕnĕdesa mibi iquendac.

<sup>13</sup> Nĕbi cainec ĕbĕdquio tabadec cho.



Mibi chieshënquidtedi nibëdquio icmenun nabono. Chiata,”  
 quequin Nuquin Papan chiampic. ¿Ambi abi yacnoshon uaido mayan bëda aden  
 chuipampidta nepadic? Padenquio. Esuquidistu aden chuipampic. <sup>14</sup> Ambi abi  
 yacnoshon uaido mayan bëdabo Nuquin Papan, Èbëd tabadtequidombo nashunta, caido  
 nec.

## 2

### *Ambi chiaid tantiesa icchitomane, qeshun tantiadonequiota caid*

<sup>1</sup> Adec abitedishun Icbombo aton Mado icnuc ambi chiaid chieshënchitomane qeshun  
 tantiadonequiec tabadnuna. <sup>2</sup> Èndenquimboshë ambi, Naden nata, quequin chiaid  
 ambi abi yacnoshon uaido mayan bëdabo chuimiapadomboenuidi naisa icsho isun  
 Nuquin Papan cuidpampic. ¿Aden èndenquimboshë ambi chiaid chieshënquid ambi  
 cuidpampicpaden <sup>3</sup> nëbi icquidtsen ambi chiaid chieshënsho isun cuidenquioda ic-  
 padic? Ambi chiaid niacquid ambi cuidtiadquidi icnubi aton Madoded cuidpanëdash.  
 Adoac, Èbi yacno Yuedanquid nebi, quequin aton Madonquio Esusëmba chiambic  
 adomboembidi abi tantiaquidontsen chuioapondashi. Aden Esusën chiaid tanti-  
 aquidon chuibanubien, <sup>4</sup> Èmbi chiaidquio chuibanoapec, quequin ismenuequin aton  
 Mayanën Nuquin Papabëd icquidën tantiamebanacpadomboen nadatiambocquin utsi-  
 utsien bëdamebanquinc, mayan icsa dapuduedmequinc, unësaid uincuemequinc caquin  
 adquidën-adquidënquien nabededpanëdash.

### *Matses icnu quiash Esuquidistu matsespanëdash*

<sup>5</sup> Adembidi chuinu. Tantiata. Abi yacno Esuquidistu tantiaquido choash tabadsho  
 isun, Nëido ëbi yacnoshon èmbi uaido mayan bëdabo mibi chuiquid nec, quenquio  
 Nuquin Papa iquendac. <sup>6</sup> Èndenquimbo aden tantiaquin dada uaqin naden Nuquin  
 Papa chiec Dabid pado onquepampic:

“Tantiaquiono. Èbi chui, Papa. ¿Atotsieshun matses mimbi uaid pistëcquio icsho mimbi  
 comapenen tantiatequid aido icpec? Papa.

Adembidi, ¿Atotsieshun Adanën tsyuecquido mimbi nashumpe? Papa.

<sup>7</sup> Nëbi chuitan mimbi cac mibi yacnoshon uaid mayan bëdan adomboembidi chuioac  
 matsesën nabanec.

Yuecquiocshon mibipadquid matses mimbi icmendac.

<sup>8</sup> Adquid icmeshun mimbi uaidtedishun icbombobidi aid mimbi icmendac,”  
 quequin abimbo chiampid nec. Nëbi abitedishun icbo matses mimbi icmiambo  
 iquec. <sup>9</sup> Utsien Nuquin Papapadquidquio yequi matsesun Nuquin Papan tantiami-  
 acpaden ambi abi yacnoshon uaido mayan bëdabon chiac nabamboedi nëbi aton  
 Papabëd tsadec abitedishun Icbombo yanac. Aidi Nuquin Papan chiacpadomboen  
 nanuec nidaidënshun tishac matsesash matses tantiec matses icsaid bedshunash abided  
 cuidadec unësash abitedishun Icbombo yampanëdash.

<sup>10</sup> Nuquin Papa abitedi uaquidquio icnuc ambi tantiacpadec iquec. Adquid icquin  
 ambi, Matses icsaisa icmeshun con bacuë icmimbi, quequin tantiacpaden ëbi yacno  
 abi tantiaquid yuedquid con Madombo iquendac, quequin ambi chiampicpadquiequi  
 aton Mado matsespanëdash. Aidi matses yec natiamianquiequi icsaisa yec unësash  
 uincuenash bëyucanec abi yacno dectatonepanëdash ma Nuquin Papan, Matses con  
 bacuë icmimbi, quequin tantiaido ëbi tsibanec dectatonepanu quiash. <sup>11</sup> Matses  
 bëdambo icmequid Esuquidistun Papa ambi bëdambo icmebantequidon Papabidi nen-  
 dac. Aton Papa Abentsëqui icnuc Esuquidistu Nuquin Papa yacno choash, Con utsibo  
 nec, quependac <sup>12</sup> aton Papa chiec:

“Mibi chuiquin con utsibo tantiamenu, Papa.

Aidobëd tabadquimbi mibi chuinu. Tanti, Papa, quependac.”

<sup>13</sup> Adembidi chuioaic:

“Mibi tantiaquin mimbi chiampicpadomboen nabanash choaobi, Papa.  
 Èbi tsibantequid mimbi bēdaidquio icmiaidquio bēc choaobi, quequin mibi chiendambi,  
 Papa,”

quequin matsesabi yec abuc tabadquin Esuquidistun chuipampic.

<sup>14</sup> Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash <sup>15</sup> ma mayan icsan ambi dacuēdmiaido ambi yuaido icboedi matses ěmbi mēnchictequid ma icpanuna.

<sup>16</sup> Ěmbi uaido mayan bēdabo unēstequid icsho mēnchicnu, quenquio yec matsesash Esuquidistu unēspanēdash. Abadauanēn tsyuecquido mēnchicnu, quiash matsespanēdash.

<sup>17</sup> Aden ambi chiacpaden nanuec matsespadquid yampanēdash. Adec matsesash matses nēnacpadquiec nēmpañēdash. Abi bundoacpadquiec bundopanēdash. Abi natiacpadquiec natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēspandēdash matses Nuquin Papan bēdamboen istequid icmenuec. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec. <sup>18</sup> Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ěbi dayacquio icmec cho, cac badedquio choquin chieshesa nuqui icmendac.

### 3

#### *Abi yacno yuedanquidquio icquin Moises dēniacquid Esuquidistu*

<sup>1</sup> Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Èbi chuibeneta, cashumbic adem-bidi ambi matses chuibanec ěbēd onquequid dapa icoata caid Esuquidistu nec, quequin aidquio tantiaquionona. <sup>2</sup> Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuided-chuidedampicpaden Esuquidistun adomboembidi chuibanpanēdash. <sup>3</sup> Aidi Abiambo Yampid yec, Èbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. <sup>4</sup> Nēidted con shubun ěbēdi tabadendac, quequid shubu icbo nec. Aden Nuquin Papan chiacpadomboen aton shubun icquido bēdamboquid icmequid Esuquidistu nec. <sup>5</sup> Nuquin Papan shubun icquid ambi nami-aidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. <sup>6</sup> Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepañēdash. Aidēn shubun icquid nebi, qeshun chieshenquiocquin cainquidquio aton shubun icquidquio nuqui nendac.

#### *Chieshenda*

<sup>7</sup> Aton shubun tabadnuequid naden Nuquin Papan Mayanēn ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

<sup>8</sup> Equipito yacnoēsh cuēte nibēdacno capuquin tsusedpabon,  
 ¿Nuquibēdida Nuquin Papa iqueque? Tantiabono, qeshun ambi chiaid  
 chieshēmpampicpaden chieshēnenda.

<sup>9</sup> Cuēte nibēdacno seta 40ted matamec capucuenequin tsusedpabon Nuquin Papan  
 nadatiambocquin naded-nadedsho isquimbi

¿Ambi chiaid niacshoda Nuquin Papan ěbi cuidpeba?

Isbono, quiacpadquiec tsusedpabo icsamboec tabadpampic.

<sup>10</sup> Adec tabadsho isash nëishpondabi.

Ëmbi chiaid chieshënec ambibi tantiapadequi icsadenepampic.

<sup>11</sup> Adquid icscho isun chushcain: Ëmbi abitedi uabanquin nainash

ëbi tabadacno aidtedi puduedmenquoio iquembi, quequin chiacpadomboen naindambi.

Abimbo caimbi,”

quequin Nuquin Papan isadaidbo chiampid nec.

<sup>12</sup> Abiambo Yampid Nuquin Papa abi iquec, quequin tantiash cuëshêdchitomane queshun tantiadonequiota. <sup>13</sup> Nuquin Papan chiacpadquiec tabadnuna, quec badi-

adquidën-badiadquidënquiec chuinanec onqueta ma adoac icsamianquidën chiac Nuquin Papan chiaid chieshënenquiopanuna. <sup>14</sup> Esusbêd icquid nebi, quiondacaden tanti-

adenequin caimbudec aton matses yec Esus yacno nidanetequidquoio mibi nendac.

<sup>15</sup> Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uainda.”

<sup>16</sup> ¿Tsuntsin Nuquin Papan chiaid tantiashun chieshëmpampic? ¿Equipito yacnoshon bëyucanquin Moisesën buanaido Nuquin Papan chiaid tantiash chieshquido yanen-

quioda icpampic? <sup>17</sup> ¿Tsutsibidi seta 40ted matamec chiesho isash Nuquin Papa aid-

edbidi seta matamec nëishted-nëishtedpampic? Adoac ¿Cuëte nibêdacnoësh icsaquidtedi

unësbudnenquioda icpampic? <sup>18</sup> ¿Abitedi uabanquin nainash ëbi tabadacno puduedmen-

quoio iquembi, quequin tsutsi Nuquin Papan chuipampic? ¿Ambi chiaid chieshënuqid

Nuquin Papan chienquioda icpampic? <sup>19</sup> Ai, tsusedpabon Nuquin Papan chiaid tanti-

ash, Bêdambo iqueque. Adonona, queboedombi, Nuqui nabocpadomboen nanuna, que-

quin ambi chiaid chieshënsho Nuquin Papan abi yacno puduedmetiapimbo icpampic.

## 4

### *Ëbi yacno puduedash ëbêd tabadtequid quiaid*

<sup>1</sup> Ëbi yacno puduedash ëbêd tabadtequid iquendac, quequin Nuquin Papan chiampic-

padomboen nëbimbobi chuioaïque. Abi yacno abêdi ictiapimbo icchitomane quequin Es-

uquidistu tantiadonequionona. <sup>2</sup> Ëbi yacno puduedash tabadtequid iquendac, quequin

ëndenquimboshë Nuquin Papan nuquin tsusedpabo chiampicpadomboen nëbi nuqui

chuioaic. Aden ëndenquimbo chuisho tantiash, Nuquin Papan chiaid abimbo iquec,

quiash tantienquoio yanash, Aid cainu, quetiapimbo tsusedpabo utsi-utsiec yampampic.

<sup>3</sup> Ambi chiaid tantiaquidomboen nëbi aidbêdi tabadec.

“Ënden yampidon tantienquiocsho isash, Abitedi uabanquin nainash ëbi tabadacno

chotiapimbo aido iquendac,”

quequin chushcaquin Nuquin Papan aden chuipampic. Tauamboec ambi tantiac-

padomboen abitedi uabanquin nainash Nuquin Papa quenenash tabadpampic. <sup>4</sup> Abi

tabadaid chuiquin Nuquin Papan naden dada uamiampique. Tantia: “Seistedec

ushquin abitedi uabanash badiad utsin ënash tabadpobi.” <sup>5</sup> Ashumbic nadentsen dada

uamiampic:

“Ëbi ënash tabadacno ëmbi chiaid chieshënuquido chotiapimbo iquendac,”

quequin chuipampic.

<sup>6</sup> Aden chuimiatic ëndenquimboshë ambi chiaid tantiesa icquin niac-niacquec Nuquin

Papabêd tabadtiapimbo icpampid icnubi ambi chiacpadomboen naquin caimpampi-

dobêd nëbi nidaid utsi-utsiec icquido Nuquin Papabêd tabadtequid nendac. <sup>7</sup> Ambi

tantiapadën Nuquin Papan chuimiapaden Dabid padon:

“Icsachitomane queshun Nuquin Papan chiaid tantiaquiota,”

quequin dada uapampic. <sup>8</sup> Chuiquid dapa Dabid tishamboen Equipito yacnoësh

nidaid Canan yacno abi chuiquid dapa Osuebêd isadaidbo cho-chopampic. Capuec

ënêdash nidaid Canan yacno cho-choash isadaidbo ënêdenquoio yec tabadte icnuc, Ëbi

yacno ënëdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. <sup>9</sup> Aden Dabid pado chuimiaid tantiash abi tantiadonequidombo Nuquin Papabëd tabadquido nendac. <sup>10</sup> Aden uabanquin nainash Nuquin Papa tabadacpadec ambi bëdambo icmenuequin tantiactedi nabanquin nainash aïdbëdi tabadendac. <sup>11</sup> Nuquin Papabëd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

<sup>12</sup> Nuquin Papan chiaid ambia chuipampidquio abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquëduc sënaid isacbimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nëid icnubi mimbi tantiaid utsi bëdambo iquec. Adecbidi, mibi bunaid icsa nëid icnubi mibi bunaid utsi bëdambo iquec, quequin tantiamebanshun mimbi tantiaid icsa mibi bunaid icsabëdtabi ënta, quequin Nuquin Papan chiaidënquio mibi tantiamendac. <sup>13</sup> Abitedi isquidquio Nuquin Papa nec. Adquid icquin matses ompodtiapimboenoc isendac. Adembidi, Ëmbi chiacpadomboenda matsesën nabanoshe. Tantienu, qeshun, abi yacno tabadnuequin cainquido bëisquioquin ambi nabanaidtedi chuimendac.

### *Matses chuibanec Nuquin Papabëd onquequid dapa Esuquidistu*

<sup>14</sup> Adec Nuquin Papa abitedi isquidquio icnubi icsambocquid icquin ambembi matsesën aid chuitiapimboesho isun abi tantiaquido chuibanec Nuquin Papabëd onquequid dapa ënden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquio tantiaquionona. <sup>15</sup> Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquio Esuquidistun icpanëdash. <sup>16</sup> Adquid nuqui chuibanec Nuquin Papabëd onquequid dapa iquec, quequin tantiec dacuëdenquio yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquio icmendac.

## 5

<sup>1</sup> Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidën capuquid yua cunesunenedequin taidenedepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cunesuneshun taidenedepampic. <sup>2</sup> Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin <sup>3</sup> nidaidën capuquid yua utsi-utsien cunesunenedepampic.

<sup>4</sup> Aidi, Con matses chuibanec Nuquin Papabëd onquequid dapa icnu, quenquio icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. <sup>5</sup> Adembidi

Nuquin Papan, Matses chuibanec ëbëd onquequid dapa icta, caid Esuquidistu iquec. Ëbibi adquid icnu, quenquo Esuquidistu icpanëdash. Aton Papambien:

“Mibi con Madombo neque.

Con shubun icquido mimbi icmiaido chuibanec ëbëd onquequid dapa icta,”  
capampic aton Papan Esuquidistu chuiquin. Adembidi Esuquidistu chuioaquin aton Papanquo:

“Matsesash icsaisa yec min utsibo icsaid bedshunash ciudadec unësash uincuenash  
matses chuibanec ëbëd onquequid dapa icta,”

capampic. <sup>6</sup> Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.

Adquid yec ënëdenquioctequidquo mibi nendac.”

<sup>7</sup> Adec, Con Pan chiampicpadquid icnu, quiash matsesacsho unës uaqin mëyante nendabi, quequin tantiec shubiec nadpanëdash. Matses icsaid bedshunash ciudadquid ëbi icmenda, quetiapimbo iquebi, Papa. Matses icsaid bedshunash ciudadquid iquendabi. Mimbi chiacpadomboen natiadquio iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquo icmepanëdash. <sup>8</sup> Nuquin Papan Madombo iquequi matsesacsho mëyanac Nuquin Papan chiacpadomboen tantiabempanëdash. <sup>9</sup> Aden tantiabenash matses icsaid bedshunash abided ciudadash Nuquin Papa yacno Yuedanquid yanquiopanëdash. <sup>10</sup> Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

### *Nuquin Papan chiaid ënden tantiaboedi tantiesa yanenda*

<sup>11</sup> Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquiocquin mibi eme uacsho ¿mitsipadomboentsimbi chuibanquin mibi tantiamete? <sup>12</sup> Mibia utsin tantiamiaid icquin ënden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec. <sup>13</sup> Shuma chishquid bacuëmpi, Bëdamboen nata, quequin chiaid tantiesa nec. <sup>14</sup> Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenquidquo yanshun adomboen nabendec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquo iquendac.

## 6

<sup>1</sup> Aden Esus chuiquin abia tantiamiaid bëdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tanta. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquo icta. <sup>2</sup> Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquo icta. Adembidi, Abi tantiesa cuidtequid iquendac, quequin tantiec bëdamboec tabadteneta. <sup>3</sup> Aidedi mimbi tantioc. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. <sup>4</sup> Aden Esuquidistu tantiasho isun aton Mayan Nuquin Papan meniaid icboedi <sup>5</sup> Nuquin Papan chiacpadomboen nadatiambocquin nabamboed, <sup>6</sup> Esus matsesquio yec icsamboquid nepanëdash, quiash, Esus cuesten dectan, quequidbimboecquid icsho Nuquin Papan aid isendac. Aidën oncain Esus mamënshunec. Aden Esus tantienquo yanacsho bëdamboen tantiamenuen chuiquin, Icsaobique. Ëbi icsaid ënu, cametiapimbo Nuquin Papan iquendac.



<sup>7</sup> Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. <sup>8</sup> Echobëd cana shëta chedo ëshë idash dadpen yanushe queshun nëdëncatequid nendac. Adecbidi icsamboen chiaid tantiaquid uquë nësiatequid nendac.

<sup>9</sup> Aden mibi chuiquimbi, Nuquin Papan nësiatemaïd mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. <sup>10</sup> Adoac abi tantiaquid utsibo tantiaquin mimbi nashundeniaïd Nuquin Papan bëpiscudenquiocquin tantiec. <sup>11</sup> Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. <sup>12</sup> Aden nabanec chieshenquiocquin Nuquin Papan chiaïd tantiaquioquin tsusedpabomba caimbudec unësash Nuquin Papa yacno puduedampicpadec Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

### *Naden nanu quec Nuquin Papa muatiapimbo iquec*

<sup>13</sup> Ëndenquimboshë Abadauan bëdamboec tabadsho isun ambia tantiaquidquio abi yampidquibidi icquin, Ëmbibi tantiacpadomboen nanuna. Abimbo caimbi, quequin Nuquin Papan naden chuipampic: <sup>14</sup> “Mimbi tishmiaïdën tsyuecquido dadpen iquendac, queshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan Abadauan chuipampic. <sup>15</sup> Aden chuïsho tantiashun caimbudquin tishtiapimbocquidëmbi Abadauanën chidon aton mado tishpampic.

<sup>16</sup> Abimbo caimbi, quequin abitedi tantiaquidënuquo Nuquin Papan chiac utsi, Muenec, quetiapimbo iquendac. <sup>17</sup> Adembidi, Ëbi yacno tabadte iquendac, quequin ënden yampidën Nuquin Papan chiaïd chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanëdash. <sup>18</sup> Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ëbi yacno tabadte iquec, quequin chiaïd chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac. <sup>19</sup> Aden caimbudquin, Ënden Nuquin Papa yacno puduedshun ëbi yuedquid iquec, quequin nuqui tantiec. <sup>20</sup> Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuc puduedash Medquisedecpadquid yampanëdash.

## 7

### *Medquisedec matses chuibanec Nuquin Papabëd onquequid dapa*

<sup>1</sup> Medquisedec nad icpampic, Saden yacnocquido chuiquid dapa nepampic. Ambi Saden cain cuënaïdi yuecshun Edusaden cain cuënoapampic. Aidbidi Nuquin Papan, Matses chuibanec ëbëd onquequid dapa icta, caïd nepampic. Adquid icquin aton mado bedboedo tsibanshun cuesuniash Abadauan choshö bëqedshun, Nuquin Papan bëdamboen isaidquio mibi nec, quequin Medquisedequën Abadauan chuipampic. <sup>2</sup> Adsho tantiash, Nuquin Papan con mado bedmiaïd nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnocquido chuiquid dapa icquin bëdamboen tabadmequid icsho Medquisedec cuëmpampic. <sup>3</sup> Aïdi aton papabëd aton tita nibëdquid nec. Nëïd ushën tishaid nebi, quetiapimbo aid iquec. Abi unëste ushë adquibidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquiduidquio iquec. Utsi yantiapimbo iquec.

<sup>4</sup> Aidi ëbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. <sup>5</sup> Yuecquiocshon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquoio aton na musucaid bedquid icpampic. <sup>6</sup> Medquisedequëmbien tsyuecquidpenquoio icquimbi Debin tsusedpa Abadauanën na musucaid bedshun, Nuquin Papan bëdamboen isaidquoio mibi nec, quequin Abadauan chuipampic. <sup>7</sup> Bëdambo mibi icmenu, quequin Nuquin Papan chiaid ambia chuiquid Medquisedec icpampic. <sup>8</sup> Yuecshun ambia chuibanec Nuquin Papabëd onquequid dapapadquiocquin aton matsesën na musucaid bedquid Debi unëspampic. Adecbidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic. <sup>9</sup> Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic. <sup>10</sup> Aton tsyuecquid tishambocnobi Debin buchisio Abadauan caidën Medquisedec bëquedtuidshun menepampic.

### *Medquisedec yampidpadquid Esuquidistu*

<sup>11</sup> Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bëdambocquid icmian Medquisedecpadquid choenquoio ictsempampic. <sup>12</sup> Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. <sup>13</sup> Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. <sup>14</sup> Aton tita Uda cuëmëdquidën tsyuecquid icnuc matsesash Udan tsyuecquid Nuquin Icho Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquoio icpampic. <sup>15</sup> Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. <sup>16</sup> Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquoio Esuquidistu yampanëdash. Matsesash icsaisa yec unësan uincuenpanëdash. Adec uincuenquid yec unëstiapimbo iqued matses chuibanec Nuquin Papabëd onquequid dapa yanquiopanëdash. <sup>17</sup> Aid chuiquin Nuquin Papan nadopampic:

“Ënenquiocquin matses chuibanec Nuquin Papabëd onquequid dapa Medquisedecpadquid mibi nendac,”  
quequin chuipampic.

<sup>18</sup> Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. <sup>19</sup> Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabëd onquec tabadec, quequin abi yacno yuedte caimbudec nidaidën Nuquin Papabëd tabadacimboec nuqui tabadec.

<sup>20</sup> Abimbo caimbi. ¿Matses chuibanec Nuquin Papabëd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouidtsëqui chuipampic. Debi unësan

aton tsyuecquid aton matses chuibanec Nuquin Papabéd onquequid dapa icpampic. <sup>21</sup> Nēbi Nuquin Papan aton Madombo caic:

“Icho icquin matses chuibanec ēbi chiec puduedoata, mado, quequin abimbo chiemi. Aden chuiquin chuca uainquo iquemi.

Ēndenquo yampid yec ēbi yacno utsi puduedmenush ēbi chiec puduedash ēnēdenquo yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanēdash. <sup>22</sup> Adquid yec matses icsaid bedshunash abided cuidadash abi tantiaquido yuedec bēyucanquid Esuquidistu nec. Debibéd aton tsyuecquid adecbidi adquid ictiapimbo iquēc.

<sup>23</sup> Debi adecbidi aton tsyuecquido unēstequidquo iquēc yuen chuibanec Nuquin Papabéd onquequid dapa ictiapimbo iquēc. <sup>24</sup> Esusien abi yacno chuibanec bēyucanec puduedash ēnēdenquo yec Nuquin Papabéd onquequid dapa nendac. Adquid utsi nibēdendac. <sup>25</sup> Adec Nuquin Papa yacno ēnēdenquo yec tabadquin abi tantiaquido chuibanec aton Papabéd onquedenenuec abi tantiaquido Nuquin Papa yacno ambi yuedtequid iquēc abipadquid icsaisa yec tabadendac.

<sup>26</sup> Adec aidi abi yacno yuedanquid, icsa nibēdquid, icsa uatiapimbocquid, icsa nibēdquiec yacno tabadquid yec abi tantiaquido chuibanec Nuquin Papabéd onquequid dapa yampanēdash. <sup>27</sup> Debipadquidpenquo yec, Matses icsaquid neque. Nuquin Papan chiampicpaden baded-badedquien nidaidēn capuquid yua cuesunenu, quenquo icpanēdash Esuquidistu. Matses icsaid bedshunash abided unēspanēdash padpidec unēsenquo icnush. <sup>28</sup> Debibēdi abipadquid icsaquid icsho, Min matses chuibanec Nuquin Papabéd onquequid dapa aid icmeta, Nuquin Papan cac Moisesēn Debi adquid icmepampic. Nēbi Medquisedecpadquidien Bēdambocquid icpampid ēbéd onquēc ēbi yacno Puduedquid Abentsēcquiobi mibi iquendac. Abimbo caimbi, quequin Nuquin Papan chiampidquo Esuquidistu nendac.

## 8

### *Matses chuibanec Nuquin Papabéd onquēc abi yacno puduedquid*

<sup>1-2</sup> Adec Esuquidistu abi tantiaquido chuibanec Nuquin Papabéd onquequid dapa Nuquin Papa tabadacnombobi puduedoash aton Papa Abiambo Yampidbēdquo onquēc tabadec. Debipadquidoen aton matses chuibanec nidaidēnshun Nuquin Papa tabadte shubu uashunaidēn puduedash auēshquo Nuquin Papabéd onquepanēdash.

<sup>3</sup> Con matsesbēdi icsaposh icmanendac, qeshun aid shubun puduednu qeshun umanucshun nidaidēn capuquid yua aidon cuesunepampic. Adembidi Nuquin Papa tantiaquin menenuequin aton matsesēn bē-bēaid bedshun nadenepampic. Esusien Nuquin Papa yacno puduedoanush, Ēbi icsaid ēbibi cuidadnu, quenquo yec matses icsaid bedshunash abided cuidadpanēdash. <sup>4</sup> Aidi unēsabi yec nidaidēn tabadnuc Moisesēn chiacpadec Debipadquid matses chuibanec Nuquin Papa chiec onquequid icpanēdash. Adquid icnuc nidaidēnuēsh matses chuibanec Nuquin Papabéd onquequid dapa ictiapimbo Esuquidistu icpanēdash. <sup>5</sup> Nidaidēn tabadquin Nuquin Papa tabadte shubu uashunaidēn puduedshun Debipadquidēn nashumpampic. Ēndenquimbo Nuquin Papan shubu naden icchitec, quequin abi tabadte shubu uanu, qesho tantishun: “Macuēsh yacnoshon chuibocpadomboen shubu uame,” Nuquin Papan cac Moisesēn chuioapampic. Aden chiac Nuquin Papa tabadte shubu uashumpampic.

<sup>6</sup> Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabéd onquēc puduedpanēdash. Aidi abi tantiaquido yuedquid nec. Aid ambō puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabéd

onquec abi yacnombo yuedanquid ictiapimbo icpampic. Esuquidistuen Nuquin Papabëd abia yampid bëyucanec abi yacnombo nidoash abi tantiaquido chuibanec Nuquin Papabëd onquequid yec yuedanquidquo nec.

<sup>7</sup> Èndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquo ictsempandash. <sup>8</sup> Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udan tsyuecquido chiendambi.

<sup>9</sup> Aidën tsusedpabo Equipito yacnoshon bëyucamequin ëmbi chiacpadpenquiocnoc chiaid utsi iquendac.

Èmbi abia naden nata cain chiaid Isadaidbon chieshënsho utsibon natiacquin mëyansho isun isadaidbo mënchicamboccondambi.

<sup>10</sup> Ènden chiaid adquo icnuc:

Nëbi ëbëd tabadmetequid chiaid nendac, quequin isadaidbo chiembi.

Èmbi nadomboen nata cain chiaid isadaidbo pausunendambi tantiate bunquionoc.

Aden tantiamiash aton Papa iquendabi.

Adecbidi adquidquo con matses iquendac.

<sup>11</sup> Adoaid Nuquin Papa tantiaquid icta, qesa iquendac.

Abitedi ëbi tantiaquidquo iquendac.

Nëidtedishun ëbi tantiendac:

Nëidic, bacuëbo; nëidic, caniabo; nëidic, tsusiobo aidtedshun.

<sup>12</sup> Aido icsaidtedi padpiden tantienquo yec bëpiscudendabi,”

quequin Nuquin Papan chiaid utsi nendac. <sup>13</sup> Chiaid utsi nec, quequin ënden abia nadomboen nata cain chiaid ënëndendac.

## 9

### *Nuquin Papa tabadte shubu uashunaidën puduedshun naid*

<sup>1</sup> Nuquin Papan ambi, Èbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ëbi tabadte shubu uashun cacpadomboen abi nidaidën tabadte shubu uashumpampic. <sup>2</sup> Nuquin Papa tabadte shubu uashunaid nitsinaid anquënë uaid daëd icpampic. Baded-badedquiec puduedte anquënë uaidën tabote dectantebëd pan sante cuate nacnenaic icpampic. Icsaisa anquënë uaid nec caid niosh. <sup>3</sup> Aid nuntambidi bitsipambocquid daëdcashun dectanëdaid shëcuë anquënë uaid dayun uequid Isaisa Bëdaidquo cain chianiaidquo niosh. <sup>4</sup> Aid nuntan bëdambo noadquid sandoshon tauite shocosh icpampic. Ambobidi cuate dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonën cuate tiaid dëyucaid icoapampic. Aid sauedaid utsi cuënote pada uashun Nuquin Papan nadomboen nata quequin dada uaid icpampic. <sup>5</sup> Aid sauedte matincash tabadquid ambi abi yacnoshon uaid mayan bëdambocquidbimboecnuc nacnenaic daëd icpampic. Aid daëd Nuquin Papa icsaisambo bëchomuanquiec nac-nacquio ismiantequid icpampic. Nidaidën capuquid cuesunaidën intac daseccaid isun Nuquin Papan matses cuidenquioctsiash, quequin aidën podon dëcatequin dectanaid diadpampic. Aid Icsaisa Bëdaidquo anquënë uaid sanaidtedi chiombi.

<sup>6</sup> Aden shubu uashun aidën icquidtedi nambanash icsaisa anquënë uaidën baded-badedquiec puduedquidon Nuquin Papan Moises chiacpadomboen uesquin nabampampic. <sup>7</sup> Padnuen Isaisa Bëdaidquo anquënë uaidën setan-setanquiec matses chuibanec Nuquin Papabëd onquequid dapa puduedpampic. Baded-badedquiec



puuedtemaid aid nec. Ĕmbi con matsesbēdtan Nuquin Papan chiaid niacposh icmanendac, quequin nidaidēn capuquid yua cuesuneshun intac bedshun buanec nuntan bitsipambocnoc daēdcashun dectanēdaid shēcuē anquēnē uaid dayun uequid Icsaisa Bēdaidquio caidēn puuedquid abentsēqui nepanēdash. Unēsaidēn intac buanenquio yec puuedtemaid aid anquēnē uaid nec. <sup>8</sup> Adec aid anquēnē uaidēn puuedquid isadaidbo abentsēqui icnubi Nuquin Papa yacno aton matses puuedte nibēdec, quequin Nuquin Papan Mayanēn tantiamete nendac. <sup>9</sup> Adembidi, baded-badedquien nidaidēn capuquid yua cuesunedenec, Ĕbibi bēdambocquid nec, quetiapimbo icpampic. Adembidi aton matses icsaisa icmetiapimbo icoapampic. <sup>10</sup> Adecbidi, Nēidic petequid nec. Nēidic actequid nec. Nēid nanush mēpamēdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanēn nuqui tantiamec.

### *Esuquidistu abided unēsac intac chiuidaid*

<sup>11</sup> Ambi chiaid utsi tantiamenuc ambi uacmaid yec abipadquid Esuquidistu Nuquin Papabēd tabadboedi nidaidēn budash matsesash icsaisa yec matses icsaid bedshunash abided ciudadec unēsash Nuquin Papa yacno matses chuibanec aton Papabēd onquequin chuiquid dapa iquec abi yacno Yuedanquid yampanēdash. <sup>12</sup> Nidaidēn capuquid yua cuesuneshun intac bedshun buanec Nuquin Papa yacno puuedenquio Esuquidistu icpanēdash. Aidi abia yampidi icsaisa matses icsaid bedshunash abided ciudadec unēsacsho cudan siac aton intac chiuidash Nuquin Papa yacnombo puduedoapanēdash. <sup>13</sup> Aidi matses icsaid bedshunash abided ciudadabicnuc nidaidēnshun natemaid nasho matses cuēshēdmepanēdash. Adoac utsibēd ictiapimbocsho isun nidaidēn capuquid yua cuesuneshun aidēn intacbēdta sisapuc daēd uashun daseccac icsaisa icmiabi yequi aton shubun puduedoapanēdash. <sup>14</sup> Abia abēd yampid unēsasa aton Mayambēd iquec Esuquidistu icsaisambo yec, Matses icsaid bedshunash ēbided ciudadebi, Papa, quianec unēsacsho siac aton intac chiuidacsho isun uincuemaidēn nuqui pauquec ma Nuquin Papan chiacpadomboen nate bunquidquio nuqui icpanueshun. <sup>15</sup> Adoaidi Nuquin Papan chiaid utsi chuiquin tantiamequid Esuquidistu icpanēdash. Ĕnden matses yampid icsaidbēdtabi nēbi matses icsaid bedshunash abided ciudadec unēsapanēdash ēbi tantiaquido ēbēdi tabadmenu quiash.

<sup>16</sup> Adnubien abi unēste tantiec, Ĕbi unēsan Ĕmbi chiacpadomboen con na abitedi menebanta, matses quepec. Aden chuiquid unēso isun ambi chiacpadomboen menebanec. <sup>17</sup> Aden chuiquid unēsabi icnuc ambi chiacpadomboen utsibon metiapimbo iquec. Icbon na abi iquec. Aid unēsan aidēn na icboedi utsin na yanec. <sup>18</sup> Adembidi ambi nadomboen nata cain chiaid Moises menequin, Ĕmbi chiaidtedi nadenesho isun Ĕmbi chiacnombo mibi buanembi, quequin Nuquin Papan chuipampic. Aden menequin chiac Moisesēn nadopampic. <sup>19</sup> Nuquin Papan chuibocpaden chuishun nidaidēn capuquid yua cuesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaidbēdta matses daseccabampampic: <sup>20</sup> “Nēid Nuquin Papan chuibocpaden mimbi natequidquio nec,” quequin ismequin Moisesēmba abitedi daseccabampampic. <sup>21</sup> Adoshombic Nuquin Papa tabadte shubu uashunaidbēdta aidēn tabēcaidtedi daseccabampampic. <sup>22</sup> Cuesuniaidēn intac daseccatequid nec. Shubu chedo cuesuniaidēn intaquēn daseccabicquid mishtemaid nec. Adecbidi cuesuniaidēn intac chiuidenquiocnoc matses icsaid Nuquin Papa bēpiscudenquio iquendac.

<sup>23</sup> Nuquin Papa yacnombo puuednush icsaisa unēsendac, quequin ismenuen matses chuibanec Nuquin Papabēd onquec nidaidēn capuquid yua cuesuneshun intac bedshun buanec Nuquin Papa nidaidēn tabadte shubu uashunaidēn puuedpampic. <sup>24</sup> Esuquidistu matses icsaid bedshunash abided ciudadec unēsash nidaidēnshun Nuquin



Papa tabadtebimboecnuc shubu uashunaid yacno puduedenquoio icpanëdash. Abi tabadacnombo abi tantiaquido chuibanec aton Papabëd onquec puduedash abi tabadec. <sup>25</sup> Ambo puduedash, Matses icsaid bedshunash ëbided padpidec cuidadnu, quenquoio yec tabadec. Nidaidënshun setan-setanquien Nuquin Papa tabadte shubu uashunaidën puduedquin aton intacpenquoio bedshun daseccadenec. <sup>26</sup> Matses icsaid bedshunash abided cuidadec unësambo yec Nuquin Papa yacno puduedoash padpidec nidaid yacno choash unësash abuc Esuquidistu puduedoatsiandac. Adenquoio iquec matsesash abi unëste ushënquiobi matses icsaid bedshunash abided cuidadpanëdash nëid nidaid naimëdbudte anoentsëqui icnuc. <sup>27</sup> Nidaidën icquid unëste ushë abentsëc iquec. Unësacsho ambi naid Nuquin Papan chuitequid ushë choendac. <sup>28</sup> Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquoio yec aidquoio padpidemboec choendac. Abi cainquido abi yacno puduedmenuec choindac.

## 10

### *Abided cuidadec unëste abentsëquënquiobi*

<sup>1</sup> Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinuec bëyucanec Nuquin Papa yacnoësh yuedanquidquoio choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash.

<sup>2</sup> Aidënquoio daseccaquin matses icsaisa icmiac nidaidën capuquid yua padpiden cuesunenquoio ictsempampic. Adecbidi, Icsambocquid nebi, quenquoio matses ictsiandac.

<sup>3</sup> Aton matses isaisa icmetiapimbocquin setan-setanquien nidaidën capuquid yuaded cuesunepanëdash. <sup>4</sup> Adshun yuan intac bedshun daseccaidën matses icsaisa icmetiapimbo iquec.

<sup>5</sup> Adoquien Esuquidistu nidaidënshun tishac caniaash onquec:

“Nidaidën capuquid yua cuesunenubi ëmbi chiacpadomboen matsesën natiapimbo iquec queshun yua cuesunete bunenquoio mibi iquec, Papa.

Matsesën tishtequid mimbi icmiaidquoio nebi, Papa.

<sup>6</sup> Adecbidi nidaidën capuquid abichobi taideniac matses abi icsambo iquec, quiash, Padi. Adoenda, mibi quec, Papa.

<sup>7</sup> Adsho isun mimbi chuiquin dada uamiampicpadomboen naimbi, Papa.”

<sup>8</sup> Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuec <sup>9</sup> mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. <sup>10</sup> Aden Nuquin Papa bunacpadomboen nash unëstiapimbo yanshun abi unëste ushënquoio abi tantiaquid paucpanëdash.

<sup>11</sup> Aden matses icsaid paucpec, quetiapimbocnoc badiadquiën-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta utsibo icsaid pauctiapimbo iquendac. <sup>12</sup> Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. <sup>13</sup> Ambobi tabadquimbi abi chieshënquido ambi chiacpadomboen naquidquoio icmete ushë cainec. <sup>14</sup> Abided unëste ushënquoio abi tantiaquid ambi icsaisa icmiaid abëd cuëshëdesambo yampanëdash.

<sup>15</sup> Adembidi Nuquin Papan Mayanën Nuquin Papan chiaid utsi naden chiec:

<sup>16</sup> “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquoio icmendambi, quec Icbo.”

17 Adshumbic Nuquin Papan chiaid utsi abi chiec aton Mayan:  
 “Abi icsaidtedi padpiden tantianu quenquo yec bēpiscudendabi, queoaic Icbo,”  
 quequin chuipanēdash aton Mayanēn. 18 Adec abi icsaid bēpiscudash nidaidēn capuquid  
 yua cuesuneta quenquo Nuquin Papa iquec.

*Nuquin Papa yacno puduedte cainta*

19 Adoaidi Esuquidistu unēsacsho isun cudan siac aton intac chiuidan, Ambi paucaid  
 nebi, quec dacuēdenquo yec Nuquin Papan shubu icsaisa caid yacnombo puduedte ushē  
 nuqui cainendac. 20 Matsesash abided ciudadec unēsash Nuquin Papa yacno pudue-  
 doash tabadquid Esuquidistu nec. 21 Ambo nidash Nuquin Papabēd onquequin aton  
 shubun icquido nuqui Esuquidistun chuibanubi, 22 Ambi paucaid ambi dapanacim-  
 boecquidbidi nebi, quequin tantiaquin abi yacno choacbimboen nidaidēnshun Nuquin  
 Papa chiec onquec tabadnuna. 23 Nuquin Papa ambi chiacpadomboen naquidquo  
 nec, quequin abi tantiaquid yec abi yacno puduedebi, quequin caimbudnuna. 24 Aden  
 tantiaquin abi tantiaquid utsibobēd tantiananec bēdamboec tabadquin nashununa.  
 25 Aden nabanec abi tantiaquid utsibobēd iccuededtiapimbo iquebi, utsi-utsiec quiac-  
 padec adenquo icnuna. Adec iccuededec, Nuquin Papan chiacpadquiec bēdamboec  
 tabadnuna, quec chuinanta. Niacquid dadpen icsho isash, Matsesēn naid chuibanquin  
 cuidte ushē badedquo choec, quiash baded-badedquiec chuinanta bēdamboec tabadte  
 bunec.

26 Ēbi icsaid bedshunash abided ciudadec Esuquidistu unēsapanēdash, quequin tan-  
 tiash icsaded-icsadedquid iquec, Adquidquo Esus nec, quetiapimbo iquec. 27 Aid  
 cuidte ushē chonoc nēishun comapenen chushcaindac Nuquin Papan abi chieshēnquido  
 nibēdamequin. 28 Nadomboen nata cain Moisesēn chiaid niacsho isun daēdshun chiac  
 niacquid unēsmiampic. 29 Nuquin Papan abia naden nata cain chiaid niactenequid  
 adomboen cuidnushe quiash ēbi icsaid bedshunash abided ciudadec Esuquidistu  
 unēsapanēdash, queboedi, Ēmbi tantiaboed Nuquin Papan Madopenquo matsesquo  
 ēbipadquid icsacsho cuesuniac, quequin chieshēnsho ¿comapenen Nuquin Papan cuiden-  
 quioda icpadic? Adquid Nuquin Papan Mayanēn bēdamboecquid icmenu quequin chi-  
 aid chieshēnquid nec. 30 Nuquin Papan: “Ēmbimbo ēmbi chiaid chieshēnquid cuiden-  
 dambi,” quequin chiaid nec, quequin nuqui tantiec. Adembidi: “Abi tantiaquid  
 icboedēmbi tantienquo yansho cuidquidquo Nuquin Icbo iquendac. 31 Abi cuidante-  
 quid dacuēdampambo iquec,” quequin Nuquin Papan chiaid nec.

32 Esuquidistu tantiaquid yanash mibi bēdamboec tabadondacpaden tantiamec  
 chuinandereneta. Esuquidistu tantiabenacchuca icsho chieshēmēnquidon mēyanaqui,  
 Esuquidistu tantiaquid nebi, quec dayacquio yec bēdamboec mibi tabadteniondac.  
 33 Dadpen tabadnubi, ēmbi tantiaid Esus nec, qesho mibi utsibon mamēnshunondash.  
 Adembidi aidon natiambocquin mēyanac. Adomboembidi Esuquidistu tantiaquid utsi  
 mēyansho isun, Aidbēd icquid nebi, quequin ismequin mimbi nashundenepondac.  
 34 Esuquidistu tantiaquid utsi quēnēn nauedaid icsho isash abēdi tabadac bimboec  
 natiamianquiec unēsquo yec mibi tabadpondac. Adecbidi mibi chieshēnquidēn mitsana  
 bedacsho isash Nuquin Papan ēbi menetequid ampetiapimbo iquec, quequin tantiec,  
 Bēdambo iquebi, quec mibi tabadpondac.

35 Adoaidi Nuquin Papan bacuē yec bēdambo iquebi, quiash dacuēdenquo yec  
 bēdamboen nabanec mibi ēnden dayacquio iccondacpadquiec adquiecbidi tabadteneta.  
 Adquid Nuquin Papa yacno puduedquid nendac. 36 Ūtsin mēyanaqui Nuquin Papan chi-  
 aid chieshenquiocquin tantiadeneta. Adec tabadquin Nuquin Papa bunacpadomboen  
 nabanash abi yacno tabadendac. 37 Nuquin Papan chiaid nadquo iquec:  
 “Chiata. Nēbien mimbi cainaid mibi mēnchictequid choendac.

38 Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. <sup>39</sup> Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

## 11

### *Nad iquendac, quequin tantiaquin cainquid*

<sup>1</sup> Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacbimboen ëmbi tantiaid nec, quec tabadquidquio nebi. <sup>2</sup> Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

<sup>3</sup> Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadomboentsi aidtedi icmebampampiba? quenquio nuqui iquec. Nuquin Papa: “Yanquiota,” quequin tantiacpadquiequi abitedimbo yampampic.

<sup>4</sup> Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquio abi iquec.

<sup>5</sup> Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdambocquid nec, quequin Nuquin Papan buanacsho nibënquin Enoc istuidambocpampic. <sup>6</sup> Abi tantiesa icsho isashien, Ëmbi bëdamboen isaidquio nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquio nec.

<sup>7</sup> Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Èbëd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano ðapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

<sup>8</sup> Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. <sup>9</sup> Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobot-sen tabadoapampic. <sup>10</sup> Nuquin Papa yacno ambi tantiampicpadomboen shubu uaidën tabadendabi, quequin cainec quenenenquio yec nidaidën Abadauan tabadtenepampic.

<sup>11</sup> Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. <sup>12</sup> Adoac Abadauan tsusiobudaidënquio tsyuecquid dadpen uispatedi yampampic. Masitedbidi yanoapampic.

<sup>13</sup> Aden Nuquin Papan aid nidaid ëbi menendac, quequin tantiec chieshenquio yec Abadauan ambi isacmanombo choash, Con nidaid nendac, quequi Nuquin Papan meniabicnuc queneshash tabadenquio yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic.

<sup>14</sup> Nuquin Papa tantiaquid yec Nuquin Papabëd tabadendabi, quiash nidaidën quenenquo yec aidtedi tabadpampic. <sup>15</sup> Ëbi tishondacnombo tantiec unësquio iquebique. Ambo nidoaibi, quiash nidtsempampic. <sup>16</sup> Adenquo yec, Nuquin Papa yacno tabadendabi, qesho tantias, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

<sup>17-18</sup> Mimbi tishmiadën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquoda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin taita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. <sup>19</sup> Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiad, obeca bënëded seshun tauipampic aton mado uincuen uaidbimboecquid icnuc.

<sup>20</sup> Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuioapampic.

<sup>21</sup> Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuioapampic.

<sup>22</sup> Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitedi: Aid nidaid yacno nidnu, qeshun con canite buanta, quequin chuioapampic Osen.

<sup>23</sup> Adnubien adembidi Nuquin Papan bëdambo icmiad con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnoquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

<sup>24</sup> Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquo nebi, queoapampic.

<sup>25</sup> Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. <sup>26</sup> Yuecshun Nuquin Papa yacno yuedac bëdambo iquendabi, quequin tantiaquin Equipito yacnoquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesën cainpampic. <sup>27</sup> Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquo icpec, quenquo yec Nuquin Papa isacbimboec Moises tabadtenepampic.

<sup>28</sup> Yuecash Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiad min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiadën datampampic.

<sup>29</sup> Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënquido Equipito yacnoquido acte chomiadën mentoadbudnepampic.

<sup>30</sup> Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.



<sup>31</sup> Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquoio yec chiesho Daban matses utsibo cunesunequimbi.

<sup>32</sup> Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpeshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. <sup>33</sup> Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cunesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquio icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbo noc Nuquin Papan quiuëccac deonën penquiocpampic. <sup>34</sup> Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquioc-tiapimbo boedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. <sup>35</sup> Adembidi utsin Nuquin Papa tantiaquin nianten bacuë unësboed uincuetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombetedtsëcquien cunesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. <sup>36</sup> Utsi-utsien shocosh bucun mëtaneshun quënën nauedacsho isun mamënsnunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic. <sup>37</sup> Adembidi utsitsen cuënoten seshunepampic. Adembidi utsitsen sënten nacsënsnunepampic. Adembidi utsitsen nidaidën capuquid bitsi nacenaid dasiuidpampic. Aton na nibëdnubi mëyanaqui Nuquin Papa tantiaquidquio yec aidtedi tabadpampic. <sup>38</sup> Nuquin Papa chieshënnquid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidën utsi tabadpampic.

<sup>39</sup> Aidtedishun, Èbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aidtedi unësbudnepampic. <sup>40</sup> Aidtedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

## 12

### *Aton bacuë Nuquin Papan dayacmenuequin namiaid*

<sup>1</sup> Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna. <sup>2</sup> Esuquidistu, abitedishun icbombo abia yampidquio ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacbimboen adonona. Aidi, Èbi yacno matses yuednu, quiash aton Papabëd tabadteneboedi matsesash icsambocquid-bimboecnuc cuesten dectanac chieshenquio yec unësacsho uincuen uaid yanash aton Papabëdi Icbombo iquec. Aidquio tantiec isacbimboec nidaidën nuquibi tabadnuna. <sup>3</sup> Abi chieshënnquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquio icpanuna.



<sup>4</sup> Ĕbi icsaid padpiden nainquio icnu, queshumbi natiatēquid icnuc mimbi ěnambo iccoc. <sup>5</sup> ¿Con bacuē cain Nuquin Papan mibi dayacquio icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda.  
Adecbidi ambi natiamianquiopec camiaid icash chieshenda.

<sup>6</sup> Ambi matiamianquiopec camiaid dayacquio icmenuequin nametequid con bacuēbo nec,”  
quequin Nuquin Papan chiampid nec.

<sup>7</sup> Natiatēquid mibi dayacquio icmetequid nendac. ¿Ĕbi cudasaidquio con mado dayacquio icmenuequin namebanesa nebi, quecta aton papa icpadic? Padenquio. Ambi: Con bacuē nec, caid natiatēquid icnuc, Dayacquio icmenu, quequin ancaquin chono uaic.

<sup>8</sup> Natiatēquid icnuc ambi dayacquio icmenu quequin namiaidpenquio yec, ambi, Con bacuē nec, caidpenquio mibi nec. <sup>9</sup> Ĕnden dayacquio icmenu quequin mibi ancaquidēn mibi tishmequidēn chiacpadomboen natiatēquid icnuc naquidquio mibi icpondac. Nēbi Nuquin Papan dayacquio icmenu quequin chiacpadomboen natiatēquid icnuc naquidquio icnuna abēdi tabadnuen.

<sup>10</sup> Abi tishmequidēn ambibi tantiacpaden dayacquio icmenu quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac.

<sup>11</sup> Adoac nuqui natiaquiec tabadec. Adoaidi yuecash nuqui bēdamboec tabadendac. Adecbidi natiatēquid icnuc dacuēdēnesa nuqui yanec. Adecbidi Nuquin Papabēd icquid nebi, quequin tantiaquidquio yec natiatēquid dacuēdēnesa nuqui yanec.

<sup>12</sup> Aden tantiec dayacquio ictiapimbochoedi: Abipadquid iquendabi, quiash dayacquio yec tabadta. <sup>13</sup> Adenuidi naic tabadquin utsibo isme ma dayacquio ictiapimbocquin niaquec cuēshēdte bumboedi bēdambo yampanuna.

<sup>14</sup> Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiapimbocquid nendac. <sup>15</sup> Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban.

<sup>16</sup> ¿Ada aton chidopenquio chudquid icpec? Adecbidi, ¿Ada adembidi aton bēnēpenquio chudmequid icpec? quequin isnuequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe queshun ¿ada Nuquin Papan bēdamboen tantiaid chieshēnquin isuidquid icpec? queshun Nuquin Papan chiaid chuiban.

Natia bundoshon aton utsi Acobon codocaid isun bednun Esaun: Unēsnnun tsusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. <sup>17</sup> Yuecshun, Aton utsi Acobo aton papan chuibanosh, quesho tantiaish shubiquin, Mimbi bēdamboen tantiaid ěbitsen chui, papa, cac chuitiapimbocquidēmbi, Ĕnden nibēdquiocnoc uesquin min utsi chiombi, quequin Esau chuipampic aton papan.

<sup>18</sup> Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuēsh Sinai caid yacno choshon aidon isbenampid nēid iquec: natia nēdēnquedote; utsibic, inchēshac bimboec isadquid; utsibic, cunquequid dapabimboec isadquid; <sup>19</sup> utsibic, shocosh shoncaten shoncac bimboec onquenuc pabiate paēmboshē icpampic. Adec onquesho tantiaishun, Papa, mibi onquesho tantiac dacuēdampambo iqueque. Mibi chuitequid Moises icme, capampic. <sup>20</sup> Adec macuēsh yacnombo icquin: “Ĕmbi nadatiambocquin uabanaid ismenubi macuēsh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. <sup>21</sup> Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queoapampic Moisesen uēdēquec.

<sup>22</sup> Mibien dacuëdenquoio yec Macuësh Sion cashumbic Edusaden Chuca Bëdambocquid caid Nuquin Papa ënëdesambo tabadacno choachimboec mibi tabadec caimbi. Aid nuntan Nuquin Papan abi yacnoshon ambi uaid mayan bëdabo tambantiapimbo yec dadpenquioshë tabadec. Aido, ëmbi nashunaidtedi, Esus tantiaquid chotequid iquec, quiash bëdambo iquebi, quec cuëdëndonec tabadendac. <sup>23</sup> Abi tantiaquidtedi Nuquin Papan bacuë icbo yacpadquiec aton shubu abentsëquënuëshu Icbobëd onquec ënden mibi taëpoc. Aidi mimbi naid cuidquid ambi chiacpadomboen nadenequid mibi unësesa icsaisabidi icmequid Nuquin Papa nec. Aidbëd ënden tabadacnimboec abëdi onquec mibi taëpoc. <sup>24</sup> Abëd icquin Nuquin Papan ambi ënden chiaid ëmeshun ambi nëbi chuioaid, mibi chuibanec aton Papabëd onquec bëyucanec yuedanquid Esuquidistubëd ënden mibi onquepoc. Mibi icsaid bedshunash abided cuidadec unëso isun cudan siac intac chiuidnëdaid tantiec aidbëdi mibi onquepoc. Abedën nidaidën capuquid yua cuesuniampicpadquidën intac chiuidec unësaid tantiec Icbobëd mibi onquetiapimbo iquec.

<sup>25</sup> Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ënden chiaid chuiquid tantiate bunesa cuidpampic. ¿Adembidi ambi nëbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? <sup>26</sup> Ënden Macuësh Sinai yacno Nuquin Papan chiacnoshonquoio nidaid ishcampampic. Nëbien: “Padpidemboen nidaibëdta abu ënëdmenuen ishconoaindambi,” quec Nuquin Papa. <sup>27</sup> Aden chuiquin ambi uaidtedi ënëdmenuen padpidemboen ishconoaindac abi yacno choaidtedi icsaisa icmiaido yec ënëdtiapimbo iccuedednuc.

<sup>28</sup> Adoaidi Nuquin Papabëd abi tantiaquido ambi bëdambo icmiaido yec abëd tabadte ëntiapimbocon Nuquin Papan nadatiambocquin nabanaid tantiec cuëdëndonec tabadta. <sup>29</sup> Nadatiambocquid Icsaisabidi icquin aidëmbi, Esuquidistu tantiata, quequin nëbi chiaid tantiesa chian anëdënquequid nësecaindac.

## 13

### *Nadomboen nata cain chiaid*

<sup>1</sup> Esuquidistu tantiaquid yec aid tantiaquidtedi con utsibo nec, quiash tantiananec nashunanta. <sup>2</sup> Adembidi Nuquin Papa yacnoësh choquid abi tantiaquido nashuntequid ambi uaido mayan bëdabo chosho yuedampicpaden mimbi isacmaidquio Esus tantiaquid chosho yuedta. <sup>3</sup> Adembidi quënën nauedaid iquec utsi iste buntsiabi, qeshun quënën nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

<sup>4</sup> Adec tabadec con chidopenquoio chudnu quesa iquec chido utsi isuidquid icta. Adesa icsho Nuquin Papan mibi cuidendac. <sup>5</sup> Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bëdambo iquebi, quec tabadta. Adec tabadquid Nuquin Papan ënden dada uamiampid naden chiec:

“Mibëdi iquebi.

Nianenquiocquin mibi dayun uanuna.”

<sup>6</sup> Adsho tantiash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënuquid dacuëdënenquoio iquembi,”

nuqui quendac. <sup>7</sup> Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquoio yec bëdamboec tabadpanëdash. Aido tanec bëdamboec tabadoata. <sup>8</sup> Con Icbombo Esuquidistu nec. Abia Yampidquio yec nëbi adquiobidi iquec. Aidi ënëdtiapimbo yec abi tabadec.

<sup>9</sup> Adquid Esus icnuc Nuquin Papa chieshënquidën chuisho tantiesa icta. Aidën naden chiec, Nëid petequid icnubi nëid utsi petemaid nec, quequin chiec. Mimbi

piaidën mibi bëdambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icscho isun Icbobëd tabadmequin ambi bëdambo icmiaidquio nendac. <sup>10</sup> Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidën capuquid yua cuesuneshun nibëdquiocnoc tauiaidënquio matses Nuquin Papan bëd tabadmetiapimbo iquec. Adembidi aidënquio nuqui icsaisa icmetiapimbo iquec.

<sup>11</sup> Isadaidbo icsapash, qeshun nidaidën capuquid yua cuesuneshun aidën intac bedshun, Nëid intac Icsaisa Bëdaidquio anquënë uaid nuntan buanshun daseccacsho isun abi yacno puduedac bimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin tauipampic. <sup>12</sup> Adembidi matses tabadenquio yacno Esus buanshun dectanac unësacsho siac aton intac chididiepanëdash nuqui icsaisa icmenuec. <sup>13</sup> Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquio yec tabadta. <sup>14</sup> Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquio nuqui nendac.

<sup>15</sup> Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. <sup>16</sup> Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

<sup>17</sup> Ambia Esus tantiashun chuiquidon chiacpaden nabanta. Nuquin Papan, Ëbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquio.

<sup>18</sup> Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. <sup>19</sup> Adembidi ëbi tantiaquin Nuquin Papa chuidoneta. Mimbi adonoc badedquio mibëd iquendabi.

<sup>20</sup> Adembidi utsibëd bëdamboen tabadmequid Nuquin Papan aton Mado matsesacsho utsibon unës uashun siacsho isun uincuemiac bëyucanec abuc puduedoash abitedishun Icbombo nec. Abi tantiaquido chuinen yuedquid aidi Nuquin Papan icmepanëdash. <sup>21</sup> Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ëbi puduedmenuen Nuquin Papan naid nec, quequin ënenquiocquin chuiquid ma icpanuna.

<sup>22</sup> Mibi tantiamenuen ëmbi dada uaquin chiaid daëdpactsëcquio icscho bëdamboen isec onquequin tantiadoneta.

<sup>23</sup> Nëbi utsi chiembique. Tantia. Timoteyo quënë navedboedi nëbi puduemiac aid badedquio nëmbo choan aïdbëdi mibi yacno nidendabi.

<sup>24</sup> Mibëd icquid Esus tantiaquid utsibobëdta mibi chuiquidtedi tantiec tsadebi quequin Pabodon dada uaosh, quequin chuita. Adecbidi ëbitsen tsadebi quequin chuioata, queoapec nëuësh Itadia yacno tabadquido.

<sup>25</sup> Nuquin Papan bëdambo icmiaid ma mibitedi icpanuna. Padi. Aidtedi dada uaombi.

## SANTIACÓN DADA UAID

<sup>1</sup> Santiaco nebi. Nuquin Papan namiaidquío, Nuquin Icho Esuquidistun namiaidquío-bidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

### *Natiametequid*

<sup>2</sup> Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaíd icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. <sup>3</sup> Adaíd icnuc, ¿Ëbi tantiaquidquioda neque? Isnu, quequin, Nuquin Papan ëbi dayacquío icmec, quequin tantiec adecbidi tabadoata. <sup>4</sup> Aden tantiec tabadsho isun bédamboec tabadte uesquin tantiabenquidquío mibi icmendac ma Esuquidistupadquid yampanueshun.

<sup>5</sup> Mimbi tantienquío yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. <sup>6</sup> Ëbi tantieme, queboedi, ëbi tantiamenquiocpec quequin tantienda. Ëbi tantiemepec queboedi padenquío yanec cuëshëdec capuidequi yampec. <sup>7</sup> Adquid Nuquin Icho pausuntiapimbo icpec. <sup>8</sup> Adquid, Nuquin Papan ëbi tantieme, queboedi capuidequi icquidbimboec icpec.

<sup>9</sup> Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiata. Nuquin Papan bacuë nebi. Abëdi cuëshëdenquío yec tabadebi, quequin aiduidtsëqui tantiec tabadteneta. <sup>10</sup> Aton na dadpen icquidombien aton na bëdiactsec tantiaquin naden tantiendac: Con na nëidic chodquec; utsibic chiuidec. Adecbidi con nami shënibudequi Nuquin Papan bacuë nebi. Abëdi cuëshëdenquío yec tabadebi quequin tantiec tabadta. <sup>11</sup> Tanunquiocquidën tiedën caniquid unësec podo tididiquec. Bédamboeboedi nibëdquiec. Adquiecbidi icho aton nabi bedbanequi aton nami shënibudequi unësec. Icho ichoedi icho ictiapimbo yanec. Adec icho ictiapimbo yanebi, quequin mitsana comapenen tantienda.

<sup>12</sup> Adecbidi natiaic shubitequid icnuc Nuquin Papan chiaíd niaquenquío yec dayacquío yec tabadquid Nuquin Papan bédambo icmiaid nendac. Adquiecbidi, Ëmbi chiaíd niaquenquío yec mibi tabadsho isembi. Èbëd icquid mibi neque. Pudued. Nëuëshquío mibi unëstiapimbo iquec, quendac Nuquin Papa. <sup>13</sup> Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. <sup>14</sup> Nidaídën tabadquidien icsate bunec abibi icsaic. Adecbidi ambibi tantiacpadec icsaoaic. <sup>15</sup> Icsamane quequin tantienquío yec unësacsho abi yacno puduedmenquiocquin Nuquin Papan uquë nësecaindac adquid.

<sup>16</sup> Utsibo, Nuquin Papan chiaíd chieshënesa nebi, quec mibibi mua uadenda. <sup>17</sup> Nuquin Papan pausunaid bédambouidi iquec. Utsi uaquin namiantiapimbo iquec. Adenuidi namec. Adquiouidi Nuquin Papa iquec. <sup>18</sup> Ëmbi chiaíd tantiaquidquío icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquío aton Mado Esus nidaídën budmepadene. Adec budash nidaídën capusho isash abëd ichoedo abi tantiaquido nuquitedi nec. Adquid icsho ambi bëyuc bacuë icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquío dadpen yampanuna.

### *Nuquin Papan chiaíd tantiaquin nabanta quiaíd*

<sup>19</sup> Nëid bédamboen tantiata. Chuinu. Nuquin Papan chiaíd bédamboen tantiaquid icta. Ambi chiaíd bédamboen tantienquiocquin aid badedquío chienda. Adecbidi



badedquo nēishenda. <sup>20</sup>Badedquo nēishquidēn Nuquin Papan chiacpadquiec bēdamboec tabadaid ismesa nec. Adquid, Bēdamboen mimbi naoc, Nuquin Papan catiapimbo iquec. <sup>21</sup>Bēdamboec tabadesa icquin mimbi icsamboen tantiacpaden naid ēnquiota. Aden ēnu quiash, Icsaobique. Mimbi chiaid tantiaquiono. Ēbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquo yec cuēshēdenquo yec abēdi mibi iquendac.

<sup>22</sup>Nuquin Papan chiaid tantiashun nainquo yequi Nuquin Papan chiaid bēdambo iquec, quec mibibi mua uadenda. Nuquin Papan chiaid tantiabocpadomboen nabanta. <sup>23</sup>Nuquin Papan chiaid tantiashun naisa isnanten <sup>24</sup>bēisadash bēpiscudacimboec bēpiscudendac. <sup>25</sup>Padnuen Nuquin Papan nēbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuē caimbi, quequin Nuquin Icbon chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bēdambo icmendac. <sup>26</sup>Padnuen, Nuquin Papan chiaid tantiaquid nebi, queboedi ana bēdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquo chuiquid nec. Adquidbidi bēdamboec tabadaid ismesa nec. <sup>27</sup>Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsēcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsēcquido tantiaquin nashunoatiad. Adembidi niante machobo utsin bedabi samēdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ēmbi chiaid tantiaquin naquidquo nec. Con Madopadquidquo icsaisa nec, quendac Nuquin Papa.

## 2

### *Nēid bēdambo iquec. Nēidien icsambo iquec, quesa icta quiaid*

<sup>1</sup>Utsibo, Nuquin Icho Esuquidistu Bēdaidquo nec. Aid tantiaquid mibi nec. Adquid icquin, Nēid bēdambo iquec. Nēidien icsambo iquec, quenquiocquin icsamboen nainquiocta. <sup>2</sup>Mibi iccuededacno Esus tantiaquid mimbi isacmaid choec. Abentsēc bēdaidquo dasiuidash nac-nacquiocquid mēsiuidquid puduednubien utsi ic-sactsēcquiocquid dasiuidtsash puduedec. Aid daēd chosho isun ¿mitsipadentsi mimbi tantiapatsia? <sup>3</sup>Bēdaidquo dasiuidquid isun naden mimbi tantiatsiac: Bēdamboquid nec. Aton na dadpen icquid nec, quiacimboen, Tsusion dayunquo tsadec cho, quequin mimbi aidi tsadumpec. Adshumbic, icsactsēcquiocquid dasiuidquid isun, Aton nain nibēdchitec, quiacimboen uano tsad mimbi caoapec. <sup>4</sup>¿Nēid icsambocquid nec. Nēidien bēdamboquid nec, quiacimboen Esus tantiaquid utsibo mimbi tsadunenguioda ictio? ¿Aton na tantiaquin adoenquioda ictio? Aden naquin bēdamboen tantiaquin naisa mibi neyoc.

<sup>5</sup>Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ēbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac. <sup>6</sup>Aidi bacuēbimboecnuc mimbi uano tsadumpec. ¿Utsibic tsusio dapabimboecnuc mimbi dayunquo tsadumbocpadquidēn utsin-utsinquien chono uashun mibi daēdpactsēc menenquioda ictiosh? ¿Adquidon mua uain chuiquin mibi utsi-utsien quēnēn nauedmenquioda ictiosh? <sup>7</sup>¿Adoanquidēn baded-badedquien Esus quec onquequin mamēnshunenquioda ictiosh?

<sup>8</sup>Nuquin Papan chiaid nad iquec: “Utsin naden ēbi nashuntiadquo iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquo iquec mibi bēdambo icpec. <sup>9</sup>Nēid bēdambo iquec. Nēidien icsambo iquec, quiacimboen naquid icnuc Nuquin Papan chiaid niacquid mibi iquec. <sup>10</sup>Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec.

<sup>11</sup> “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunquid mibi iquec Nuquin Papan chiaid niacquid mibi nepec.

<sup>12</sup> Mibi tantiaquin mibi icsaid pauquec Esuquidistuded icsambocquidbimboec yec unēspane dash. Aid tantiaquid icscho Esusēn paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bēdamboec tabadta. <sup>13</sup> Esuquidistu tantiaquid utsi icsambocquid nec quesa icta. Ēbi icsaid Esuquidistun paucac. Adomboembidi abi tantiaquid utsi icsaidbidi paucac quequin bēdamboen naban. Icsambocquid nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ēbēdta Esuquidistun paucaid nec quequin utsi tantiaquin nashumēnquid icquin icsambocquid nec quiacbimboen icsamboen nashuntiapimbocquid mibi nec.

*Esus tantiaquid nebi quequin ambi tantiacpadomboen nabanquin isme quiaid*

<sup>14</sup> Utsibo, Nuquin Papan bacuē nebi, qeshun ¿Icbon chiaid nainquiocquina utsi bēdambo mimbi icmepadi? Padenquio. <sup>15</sup> Esus tantiaquid abi dasiuidtebēd pete nibēdquid, Bec cho, qesho <sup>16</sup> menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bēdambo icpadic? Padenquio. <sup>17</sup> Adembidi, Nuquin Papan bacuē nebi, qeshun Icbon chiacpadomboen naisa Icbon bēdambo icmiaidpenquio nec. Nuquin Papan bacuē nebi, qeshun naisa Nuquin Papa yacno puduedtiapimbo icoaic.

<sup>18</sup> Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daēdshun tantiacpadomboen mimbi tantieque? Chui. Tantianu, quequin mimbi chuitsiac.

Adoqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusēn chiacpadomboen naquin mibi ismembidi, caimbi. <sup>19</sup> Nuquin Papa Abentsēcquiobi iquec, quequin mimbi tantiec. Aden tantiaid bēdambo iquec. Adembidi, Nuquin Papa Abentsēcquiobi iquec, quequin mayan icsatedishun tantiaoaic. Aden tantiaquin niacquido yec uēdēquec.

<sup>20</sup> Icsamboen mimbi tantieque. Tantia. Chuinu. Nuquin Papa Abentsēcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec.

<sup>21</sup> Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan ēbi tantiaquidquioda neque? Tantianu, qeshun, Min mado abentsēc mibi cudasaidquio ēbi tantiaquin cuesuneshun tauita, cac Abadauanēn Nuquin Papan chiaid niacmane qeshun tauinuequin aton mado abentsēc setsempampic. Chēshtempi sanandosho isun, Padi. Chēn. Ēmbi chiacpaden nanuesho mibi bēdambo iquec, quequin mibi bēdamboen isembi, ¿quequin chienquioda Nuquin Papan icpampic? <sup>22</sup> Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiacpaden ismepampic. <sup>23</sup> “Mimbi tishmiaidēn tishmiaid dadpenquioshē iquendac,” quequin chiondashumbic Nuquin Papan yuecshun adembidi: “Min mado abentsēc cuesuneshun tauita,” quequin chuioaqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanēn aton mado abentsēc setsempampic. Adosho isashien Nuquin Papa, “Ēbi tantiaquin naquidquio Abadauan nec. Adquid con matsesquio aidi nec. Aden aidi tantiaquin ēmbi yuecquiocshon nanuequin tantiaid Abadauan chiembi,” quepampic Nuquin Papa.

<sup>24</sup> Nuquin Papan bacuë nebi, qeshun ambi chiaid naquidquio Nuquin Papa tanti-  
aquidquio nec. Nuquin Papan bacuë nebi, qeshun ambi chiaid naisa niacquid nec.  
<sup>25</sup> Adashic, Nuquin Papan chiaid tantiashun naquid utsi icpampic. Aidi isadaidbon  
chidopenquio, Daba cuëmédquid, dada dadpen chudmequid icpampic. Isadaidbon  
Icbo nadatiambocquid nec, qesho tantiashien, Adquid abu nidaidbédta aidênquiocquid  
Icbobidi nec, quequin Daban tantiapampic. Aden tantiaquin Daban matses cue-  
sunenuequido isadaidbo abia puduedquin isquid chosho, Nadatiambocquidên matses  
nec, qeshun abi yacnouidtsëqui Daban puduedmepampic aton matses ismenquioc-  
quin. Aden puduedmequin nadomboen tantiapampic. Abi puduedmequidbéd icquido  
cuesunenquiocpec, quequin Nuquin Papan tantiamiacpadomboen omposhon podqued  
utsin nidmepampic. Aden nidmiac yuecash isadaidbo dadpen cho-chonobi abia choam-  
boedên chuibocpadquiobi Dababéd icquido cuesunianenquio yec isadaidbobéd ic-  
quidobimboec isec tabadpampic. <sup>26</sup> Nuquin Papa tantiaquid Daba yanshun bédamboen  
nasho isun mënchicaid Nuquin Papan con matses caidbéd tabadpampic. Padnuen, Esus  
tantiaquid nebi, qeshun Icbon chiacpadomboen naisa cuëshédacimboec tabadec.

### 3

#### *Anan icsamboen chiec onquiaid icsa ënta quiaid*

<sup>1</sup> Utsibo, Nuquin Papan chiaid chuibanquid dadpen iquenquioctiad. Nuquin Papan  
chiaid tantiamenu, quequin ambi chiaidpenquiocnoc chuibanquid abi yacno chosho  
isun Nuquin Papan comapenen cuidendac. <sup>2</sup> Chuibanquidtedishun chua-chuatsëquien  
chuibantsec. Nuquin Papan chiaid cuembo chuibanquid yec icsaisa yanec adquid.  
Bédamboec tabadaid uesquin tantiaquin ismequidquio adquid nendac.

<sup>3</sup> Cabayo anëshquin dëchëdëdcash uidën uash tsadquin nidmec. Aden uidën uaqin  
bidiacmec. <sup>4</sup> Adembidi uncaten cano dapa tsibidiacoaic. Cunquequidên comapenen  
bëcunetiadquiocnobi adembidi icbon nidmec. <sup>5</sup> Cabayo canobidi nua icnuc abi bidiacmete  
aniactsëc iquec. Adecbidi icbo nua icnuc aton ana aniactsëc iquec. Aniaactsëcquidi  
oncamequin icbon ambi naid dadpen comapenen chuibanec. Adembidi oncamequin  
onquiaid icsa chuibanec. Nédênquiaid dëtsisidash badedquio nidacimboec onquiaid  
icsa badedquio nidoaic. <sup>6</sup> Ana onquiaid icsa chuibanacpaden nabanec adecbidi ic-  
sabudquiec icbo. Adquid mayan icsan yua iquec adequi icsate bunec.

<sup>7</sup> Nidaidën capuquid podochoquidbidi matsesën yuampicpaden abi yuaid iquec.  
Yua quenesh cuenenquiocquid. <sup>8</sup> Ad yenquio ana iquec. Quenenenquio yec ana  
onquebudec. Onquiaid icsa adecbidi ënëdtiapimbo iquec. Ana onquiaid icsa tantiabanec  
adecbidi icsabudquiec tabadendac.

<sup>9</sup> Nuquin Icbo bédambo iquec, qeshumbic ana icbon, Nuquin Icbon uaid matses  
icsambo iquec, quequin chuibanoaic. <sup>10</sup> Ana shëcuën utsi bédamboen chuishumbic  
utsi icsamboen chuioaic. Aden nuqui chienquio ictiad. <sup>11</sup> ¿Acte batapenquiocquid  
choaidënuësh batambocquidta chopadic? Padenquio. <sup>12</sup> Adecbidi ¿cuëte bacuë batam-  
bocquidên ëshë bëchi chopecta dëyuctic? Padenquio. Adecbidi, ¿isitodo dataniadaidën  
bacuë batambo yecta dëyucpadic? Padenquio. Aidi adesa yacpadquiec Esus tanti-  
aquidên ana shëcuën utsi bédamboen chuishun utsi icsamboen chiesia ictiad.

#### *¿Tsutsi Nuquin Papan chiaid tantiabenquidquio icpec? quiaid*

<sup>13</sup> ¿Tsutsi Nuquin Papan chiaid tantiabenquidquio icpec? Adquid yec comapenen  
Esus tantiaquid nebi, quenquiocquimbi bédamboec tabadquin ismequid utsi-utsien ma  
icmebampanuna. <sup>14</sup> Utsin tantiamenushe qeshun ëmbia chiacpadomboen ma napanu  
quesa icta. Nuquin Papan chiacpadomboen nabanquin ismequid icta. <sup>15</sup> Adembidi,  
utsin dëniacnushe qeshun namenun chuinuequid Nuquin Papan tantiacpadomboen  
pausunacmaid nec. Adquid mayan icsan tantiacpadomboen pausunaid nec. <sup>16</sup> Aden

aidën icsamboen tantiacpadomboen abëd icquidon adomboembidi tantiec. Aden tantiec, Utsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiante bunesa icpec. Cuesnante bunquie. Ad icnuc icsateuidi bunquid yampec. <sup>17</sup> Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibëd bëdamboec tabadquid iquendac. Adembidi utsi tantiaquin nashunquidquio icoaindac. Adembidi ëbëdtan nabanec cho cac nabanendac. Adembidi, Icsambocquid nec, quenquiocquin bëdamboen nabanquin ismendac. Adembidi, Esus tantiaquid nebi, abi quiacpadomboen bëdamboen naic. Adecbidi utsibo chiec muaisa nendac. <sup>18</sup> Ambia tantiaquid utsibëd bëdamboec tabadquin ismiac adecbidi utsibëd bëdamboec tabadquid dadpen yanendac.

## 4

### *Ëbi nua pausun, quequin chiash Nuquin Papan dayunquio tsadta quiaid*

<sup>1</sup> ¿Atotsi quiash Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquio tantiabudequi mibi chushcanancedec. <sup>2</sup> Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiash chushcananec. Mimbi nauidi naquin Nuquin Papan tantiacpaden naisa mibi nec. <sup>3</sup> Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

<sup>4</sup> Mimbi inaiduidi chudenquio yacpadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshënuquid nec. <sup>5</sup> Adenquiocquin Esus tantiasho isun aton Mayan Nuquin Papan Esus tantiaquidtedi meniac bëdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tanti. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? <sup>6</sup> Aidëmbi abi chieshenquio yacpaden tantiamebanac icsamane quiash chieshenquio yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Ëbi tantiam, Papa, qesho Nuquin Papan nua pausunac aton icbo chieshënenquiocquid iquendac adquid.”

<sup>7</sup> Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquio tsadacimbocquin ambi chiaid tantiata. Nuquin Papa chieshënuquid mayan icsan yuadenda. Adquidën yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac. <sup>8</sup> Aton dayunquio tsadquidbimbocquidbëd tabadquidquio Nuquin Papa nec. Icsash uano tsadquid icboedi bëchishash acten dapanudacimbocquin mimbi tantiaid icsa ënta. Adash, Tantiad bëda pausumenu, quiash Nuquin Papan dayunquio tsadacimbocquin chieshenquiocquin ambi chiauidi tantiadeneta. <sup>9</sup> Aden tantiec tsadboedi, Ëmbibi tantiembi, quec Nuquin Papa chieshënuquidën dayunquio uano tsadashic, Con Icbo tantiec unësquio iquebi, quiash shubiec mamënenquio yec tsadta. Mibibi uano tsadquid yash unësacimboc icboedi choec isadcuenacimboc Nuquin Papan dayunquio tsadacimboc yec chieshenquio yec bëdamboec tsadoata. <sup>10</sup> Uano icboedi choash, Ëbibi icsaobi. Nëbi icsate bunenquio iquebi. Mimbi chiacpadiadquio iquebi, Papa, quequin chui. Aden mimbi chuisho tantias, Puduedash nëmbo ëbëd tsadacimboc mibi yanoaic, quependac Nuquin Papa.

<sup>11</sup> Utsibo, Esus tantiaquidtedi min utsibimbocquid nec. Mibëd icquid icsamboec chuinanenquio yacpadquie. Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid



Nuquin Papan chiaid icsambo iquec quiacbimboecquid nec. <sup>12</sup> Nuquin Papa Chuiquid Dapa Abentsëcquiobi iquec. Ambi chiacpaden naquidquio nec. Nuquin Papa abitedi Isquidquio Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquio abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquin uquë nësecaindac. Nuquin Papan ambi chiacpadomboen naquidbëdtabi ambi chiacpadomboen naisa isquidquio icquin ambi isacpaden cuidendac. ¿Adquidbidida mibi ne? Padenquio. Adquidpenquio icquin ¿atotsieshun, Icsambocquid nec, quequin mimbi chuipe?

*Ma badiadshun nanun chiaid tantiesa neyoc, quequin chiaid*

<sup>13</sup> Tantiacquidquio nebi, quiash, Piucquid bednucec seta abentsëc matamec chonoadec nidebi, quequid chuinu. Tantia. <sup>14</sup> Ma adquid badiadshun nanun chiaid tantiesa mibi neyoc. ¿Tedtsi seta matamec mibi tabadpe? Badiadbudnuc cuen-cuempambo yash badedquio nidacbimboec matses nidaidën tabadash adecbidi mibi nibëdanendac. <sup>15</sup> Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. <sup>16</sup> Aden chienquiocquimbi mibi utsi dëniaquec onquiaid mimbi chiec. Aden chiec icsaic. <sup>17</sup> Nuquin Papan chiaid tantiembi, qeshun adomboen natiadquidi naisa iquec icsaic.

## 5

*Na dadpen bedbanquin dayun uaquido chiaid*

<sup>1</sup> Nëbi aton na dadpen bedbanquin dayun uaquido chiembique. Tantiata. Mibi unësun mimbi bedbanquin daëd uaid mimbi tantiaidquio buantiapimbo mibi iquendac. Aden mimbi bedbanquin daëd uaiduidtsëqui icsho isun Nuquin Papan mibi cuidendac. Adquid nebi, quequin tantiaish shubita. <sup>2</sup> Unësosh, quequin chiac mimbi dadpen dayun uaid nibënquin isac ënden chodquiac. Adembidi mimbi bëdaidquio dectanaid capishton ënden piac. <sup>3</sup> Min shocosh piucquid ënden chiuidac. Adecbidi min piucquid utsi ënden tiadac. Adenuidi tantiaquin bedbanquid unësacsho abi yacno yuedquin, Bëdamboen mimbi naoc, quetiapimbo Nuquin Papa iquendac. Tanunënquio shubu nëdënquiash nibëdapadquiec mimbi bedbanaid nibëdquiendac. Adenuidi tantiaquin, Esus ëbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. <sup>4</sup> Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedën caniquidtsen dayun uanu, quequin mimbi bedmiaido uëshquec bunec sidquesho Nuquin Papan, Nadatiambocquid Abentsëcshun tantiec. <sup>5</sup> Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudacbimboen mibi bunaiduidi bedbanquin dadpen dayun uaquido mibi nec. Aden nabanquin bëdamboec tabadaid ismesa mibi nec. Adec tabadec unësash abi yacno mibentsëqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidëmbi mibi cuidendac. <sup>6</sup> Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daëdpactsëc mimbi menebampoc. Aden nabanec mimbi cunesuniacbimboec bunquiec chonoadequi unësposh.

*Ma Nuquin Icbo chono quiash chieshesa icta quiaid*

<sup>7</sup> Nëbi utsibon chono uaido chuinu. Tantiata. Nuquin Icbo choec quequin tantiec chieshenquio yec tabadta. Nitsinash ma caninu quianec pec nidash cainec icbo tabadec.

<sup>8</sup> Adembidi, Nuquin Icho ëbi bednuec choec, quec bédamboec tabadquin caimbudta.

<sup>9</sup> Adec tabadquin Esus choate cainec Esuquidistu tantiaquid utsibobéd chieshënanenda. Adec utsibobéd bédamboec tabadsho isun abitedi tantiaquidënquo Chuiquid Dapan mibi menequin bédamboen cuidendac. Adesain menenquiocquin cuidendac. Adembidi, Nëidën bédamboen naosh. Nëidëmbien icsamboen naosh, quequin ëbi Chuiquidënquo chiendac, quec chieshenquo yec bédamboec tabadta.

<sup>10</sup> Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquo chuibanu. Tantia. <sup>11</sup> Natiaid icnuc chieshenquiocsho isun Nuquin Papan bédambo icmendac, quequin nuqui tantiondaid nendac. Natiaic cametequid icnuc Nuquin Papa chieshënenquiocquid Obo icpampic. Aton na dadpen icboedi icsatequid utsi-utsiectsëcquiecquidën uesac nibëdquiocsho isash, Con nabéd con nabo nibëdnuc Nuquin Papa bédambo iquec, quec chieshenquiocpampic Obo. Adquid icscho isun daëd uaquin Nuquin Papan meneapampic. Matses tantiaquin naquidquo Nuquin Papa nec, quequin <sup>12</sup> abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

*Nëidic bédampec quequin abimbo tantianuc quiaid*

<sup>13</sup> ¿Natiambo icsatequid icnuc dayactiapimbo icquidta icpec? Adquidënquo Nuquin Papa chuitiad. ¿Bédambo iquebi, quec tsadquidta icpec? Adquid Nuquin Papan naid chiec cuëdëntiad. <sup>14-15</sup> ¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquinqin, Mimbi utsibo bédamenëdacpadomboen mimbi tantiacpaden nëidtsen bédame, Icho, quequin chuita. Aden Nuquin Papa chuinun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bédamepanuna. <sup>16</sup> Abi icsaid uesquin Nuquin Papa chiash bédamboec tabadendac. Adquidën chiac dada icsambocquid Nuquin Papan bédamendac.

<sup>17</sup> Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic.

<sup>18</sup> Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

<sup>19</sup> Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabéd yacbimboec icoaindac. <sup>20</sup> Aden mimbi chiac chieshenquo yec tabadsho isun Nuquin Papan uquë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aitede dada uaombi.

## PETEDON DADA UAID 1

### *Petedon tauamboen chiaid*

<sup>1</sup> Petedo nebi. Abëd icquid icsho Esuquidistun: –Ëbi chuibeneta –caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidënsun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi. <sup>2</sup> Ëndenquio Nuquin Papa: –Ëmbi tantiactedi matses ëbëdta Esus tantiamendambi –quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: –Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi –quequin Esus tantiec nuqui bëdamboec tabadec. Aden tantiaquin Nuquin Papa chianembi naden. –Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa –quequin Nuquin Papa mibi chianembi.

### *Esus tantiaquid Nuquin Papa yacno tabadte chiaid*

<sup>3</sup> –Nuquin Icho Esuquidistun Papa Nuquin Papa bëdamboshë iquec –canuna naden tantiaquin. Icsaquido cuidte bunenquio icquin utsiacimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. –Esuquidistu chococac uincuenash padpidec unëstiapimbo iquendac. Adembidi nuqui unësascho uincuemeshun Nuquin Papan abi yacno nuqui tabadmendac padpidec unëstiapimbo icnuc. <sup>4</sup> Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac –quequin nuqui tantiec. <sup>5</sup> Aden Esus tantiaquid icsho isash: –Con Mado Esus tantienquio yanushe –quiash nadatiambo icquin nabanquid yec Nuquin Papa nuqui cudasec. –Esus chote ushën ëbi yacno tabadmendambi –quec Nuquin Papa nuqui cudasec.

<sup>6</sup> Ëmbi aden chuisho tantias mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. –Nuquin Papabëd tabadec quenenendabi –quec yuec nuqui shubienquio iquendac. <sup>7</sup> Nuqui cudasquid yec ¿atotsi quiash Nuquin Papa: –Padi. Chën. Esus tantiaquido natiamenta –queboedi adenquio icted-ictedpec? Matsu nacnenquidën: –Ma tsasinu –quequin ambi nacnenaid tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: –¿Bëdambo icquidida neque? Isnu –quetanquin matsu tauiec. Adembidi: –¿Esus tantiaquidquiobida neque? Isnu –quequin: –Natiamenta –cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: –Mibi bëdambo iquec. Ëbëdi tabadec cho –quequin utsibo tantiamequin chuishun abi yacno buanendac.

<sup>8</sup> Aden mimbi isacmaidi Esus mimbi tantiaquiec. –Nëbi isadenquio icquidi Nuquin Papan Madombo Esus ëbi bednuec choendac –quec mibi cuishonquianec. <sup>9</sup> –Abi tantiasho icsano nidmenquio icquin Esusën abi yacno ëbi yuedendac –quec Esus tantiec mibi cuishonquianec.

### *Esus chote tsusedpabon chiampid*

<sup>10</sup> Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquio icte dada uapampic. Esusën nate

abitedi tantienquo icquin daëdpactsëc tantiaquin: —¿Mitsipadquid Nuquin Papan chomepeba? —queded-quededquin chuipampic nuquin tsusedpabo isadaidbon. <sup>11</sup> Aidobëd icquin Esuquidistun Mayanën tantiamiac Esus chote abentse-abentsen chuipampic. —Matsesën chieshënquin cuستن dectanac matses cuidmenquo icnuec abided cuidadec unësendac. Adec unëscasho uincuemiac padpidec abitedishun Icho icoaindac —quequin Esus chote chuipampic. —¿Tsutsi chopec? ¿Tedectsi yash chopec? —quequin abitedi tantiatadquo icquimbi daëdpactsëc isadaidbo tsusedpabon tantiapampic. <sup>12</sup> Naden Nuquin Papan tantiamepampic. —Mibi nibëdanan ëmbi chuiboed ëmbi matsesmiacsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatadquo icquimbi abitedi tantienquo iquec.

### *Bëdamboec tabadte tantiamiaid*

<sup>13</sup> Ëmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquo yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquo icquin. <sup>14</sup> Ambi: —Con mado nec. Con champi nec —caido icquin Nuquin Papan chiapadomboen nanuna. Ënden Nuquin Papan chiaid tantiabi mibi bunaid naic mibi icsanëdacpadec icsainda. <sup>15</sup> Mibi Esus tantiamequid icsaisambo Nuquin Papa neque. Ambi chiaid niaquenquo yec bëdamboec tabadnuna. <sup>16</sup> Nuquin Papan ambi chiaid naden dada uamepampic. “ ‘Nuquin Papa icsaisambo nec,’ quiash icsaisa ictiadquo yec bëdamboec tabad,” quequin Nuquin Papan ambi chiaid dada uamepampicpadec bëdamboec tabadnuna.

<sup>17</sup> Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Ëbëdi tabadmenu —quequin matses abitedi chiendac. —Abëdi tabadmenquo icnushe —quiash Nuquin Papabëd icte bunec bëdamboec tabadnuna. <sup>18</sup> Nuquin tsusedpabon chiaiduidi naquin Nuquin Papa tantienquo nuqui icpondac. Aden Satanasën yuaido icsho Nuquin Papan nuqui bëdamboen istiapimbo icpanëdash. Adshun Satanas nuqui bedshunuen ¿piucquidida Nuquin Papan menepanëdash? Padenquo. Adquid icsabudtequid menenquo icquin <sup>19</sup> aton Mado Esus icsaisambo icsho matsesmeapanëdash. Aden matsesmiacsho chieshëmënquidën cuستن dectanac Esus aton intac chididiquec abided cuidadec unëspandash. Nëbi aton Mado Esus tantiaquido bëdamboen isquin Nuquin Papan Satanas bedshunec. Aden Nuquin Papan bedshunaid yec bëdamboec tabadnuna.

<sup>20</sup> Ëndenquimboshë abitedi uabi Nuquin Papa nadpampic. —Ëmbi tantiacpadën yuecash matsesash matses cuidmenquo icnuec mibided cuidadec unësta, Mado —quepampic. Aden ambi chiampicpadomboen badedquo namenquo icboedëmbi nëbi nameshun Esus tantiasho mibi bëdamboen isec. <sup>21</sup> Abi tantiasho Esusëmbi Nuquin Papatsen nuqui tantiamec. Adoac nuqui naden tantiec. —Esus unëscasho uincuemeshun abëdi tabadmenquin abitedishun Icbombo Nuquin Papan icmeoapanëdash. Ambi chiapadomboen naquidquo Nuquin Papa nec. Ëbi unëscasho uincuemeshun abi yacno ëbi tabadmendac —quequin Nuquin Papatsen nuqui tantiec.

### *Esus tantiaquido tantiananquiqote chiaid*

<sup>22</sup> Nuquin Papan chiapadomboen naic bëdambo yanshun mibëdtan Esus tantiaquido utsibo mimbi tantiec. Adecbidi muenquo yec tantiananquionona. <sup>23</sup> Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibëdantiapimbo icquid icnuc ambi chiaid bënudtiapimbo iquec. Aidën chiaid tantiashun mimbi Esus tantiabempanëdac. <sup>24</sup> Ambi chiaid bënudtiapimbo icte Nuquin Papan nuquin tsusedpa dada uamepampic naden chuiquin.



“Uasimbimboec unēsquid matses nec.

Cuēte bacuēc bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

<sup>25</sup> Nuquin Papan nibēdantiapimbo icquid nec. Adnuc ambi chiaid bēnudtiapimbo iquec,” quequin abimbo chuipampic. Aidēn chiaidquio mibi chiac caondash.

## 2

### *Nuquin Papan chiaid iste bunquionona, quiaid*

<sup>1</sup> Aden Nuquin Papan chiaid tantiash chieshēmēnec tabadenda. Utsi muauainda. — Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda.

<sup>2</sup> Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiacbimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiacpadomboen natiadquio yantsiabi —qeshun Nuquin Papan chiaid isbanuna. <sup>3</sup> —Esus tantiec bēdambo iquebi —qeshun Nuquin Papan chiaid isbanuna.

### *Buintadbimboecquid Esus nec, quiaid*

<sup>4</sup> Nuqui tantiaid nadquio iquec. Shubu uanun buintadquio nacsinsinuen istuidshun: —Nēid bēdambo iqueque. Nēidquio naimbi —quiacbimboen Nuquin Papan: —Ēmbi tantiaidquio yec mibi bēdambo iqueque. Ēmbi chiacpadomboen mibi namenu —capanēdash Esus. Adoaidi matses dadpenshunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac. <sup>5</sup> Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantieme, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidi natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. <sup>6</sup> Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinembi,’ quiacbimboen Edusaden yacno ēbi bēdamboen ismequidquio isadaidbobēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’ quequin abi tantiaquido unēsacsho ēbi yacno tabadmendambi,”

quequin Nuquin Papan ambi chiaid dada uamepampic. <sup>7</sup> Aid tantiec: —Bēdamboshē iquec —quependac Esus tantiaquido. Utsibombien Esus chieshēnec. Ēndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinembi,’ quetiadquidi isuidacbimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacbimboen Nuquin Papan tantiamiacpadomboen utsibon ambi namiaid tantiosh,”

quequin Nuquin Papan dada uamepampic. <sup>8</sup> Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiascho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudacbimboec

ēbi bēdamboen ismequid tantienquio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatiapimbo icquin Esustsen tantiatiapimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

*Nuquin Papan matses nuqui nec, quequin chiaid*

<sup>9</sup> Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaiddi nuqui Esus tantiamiepondash paposhquiabimboecnuc. Adoac: —Nuquin Papa bēdamboeshē iquec. Ambi chiapadomboenuidi natiadquoio iquebi —quec bēdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. <sup>10</sup> Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

*Bēdamboec tabadte chiaid*

<sup>11</sup> Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa icsate bunacpadec icsainda. —Esus tantienquoio yamane —quiash bēdamboec tabadta. <sup>12</sup> Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabenombi. Mibi bēdambo iquec, Papa —quendac.

<sup>13</sup> Bēdamboec tabadnuna. —Con Icbo Esus matsesēn chieshēnushe —queshun matses chuiquid dapatedishun chiapadomboen nanuna. Nuquin nidaidēn tabadquido abitedi chuiquid dapa pedesidente caidēn chiapadomboen nanuna. <sup>14</sup> Aidēn: —Mibitsen matses chuiquid icta —caidon chiapadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiapadomboen nanuna. <sup>15</sup> Aden Nuquin Papan chiapadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquoio icquin icsamboen chuiboedombi ambi icsamboen chiaid ēntsiash.

<sup>16</sup> Satanasēn yuaido icsho Esusēn bedshunaid yec nēbi icsambo icquidēn yuapenquoio yec bēdamboec tabadnuna. Icsanuec: —Utsin yuapenquoio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. <sup>17</sup> Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiapadomboen nabanuna.

*Yuabo chiaid*

<sup>18</sup> Tantia, yuabo. Esus tantiaquido icsho mibi chuinu. Min icbon chiapadomboen nata. Min icbo bēdambo icquid icnuc adota. Min icbo dacuēdampambo icquid ancanquidquoio icnubi adembidi nata. <sup>19</sup> Adec Nuquin Papa tantiaquid yec bēdambo icsho cuesaqui chieshēmēnenquoio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiapadomboen nata. <sup>20</sup> ĨIcsamboec tabadquid cuesac chieshēmēnenquoio icquidta Nuquin Papan: —Aid yua bēdambo iquec —capatsiash? Padenquoio. Nuquin Papan chiapadquiec bēdamboec tabadquidi cuesaqui chieshtoenquoio icsho: —Aid yua bēdambo iquec —Nuquin Papan catsiashe. Bēdambo icta.

*Chieshtoenquoio yec Esus unēsaid*

<sup>21</sup> —Chieshēnaqui chieshtotiadquoio iquebi —ĭquecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquoio icnu —queshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquoio icnuec abided ciudadec mēyadec unēspondash. <sup>22</sup> Nuquin Papan dada uamepampicpadquoio “muesambo yec icsaisambo icpondash.” <sup>23</sup> Adquid icsho abi chieshēnquidon mamēnshunaqui Esusēn chushcainquoio icpondash. Aidon matonbudnetanquin buanshun cuesten dectanac: —Mibitsen cuidendambi —cainquoio icpondash.

Adenquio yec nadpondash. —Nuquin Papan matsesën naidtedi tantiaquid icquin bédambo icquid abëdi tabadmequin icsambo icquid cuidquin icsano nidmendac —quiash chieshëmënenquio icpondash. <sup>24</sup> Adash: —Ëbi tantiaquid ma icsaid ucudac bimboec bédamboec tabadnu —quiash nuqui icsaid bedshunec abided cuidadec unëspondash. Adec aton Madoded cuidadec unësacsho isash nëish bédanshun Nuquin Papan aton Mado tantiaquido bédamboen isec. <sup>25</sup> Yuan icbo cuenënac bimboen Nuquin Icho nuqui tantienquio icpondac. Adoboedi nëbi: —Con Icbon ëbi bédamboen dayun uaquin ëbi bédamboen namendac —queshun nuqui Esus tantieque. Bédamboen nanuna.

### 3

#### *Bënëbëdta chido chiaid*

<sup>1-2</sup> Tanta, chidobo. Bënëchoquid icsho mibi chuinu. Esus tantiaquid icquin min bënën chiacpadomboen nata. —Esus tantiec ëbi bédamboec tabadsho isun Nuquin Papan chiaid tantienquio icboedëmbi con bënën Esus tantiabentsiash. “Mimbitsen Esus tantiabenta,” quequin ëmbi chiambobi Esus tantiabentsiash —queshun min bënën chiacpadomboen nata. <sup>3</sup> Bédamboec tabadquid ictiadquio icquin casëdu payuteuidi tantienda. Adembidi dashcute bédambo icquid dasiuidteuidi tantienda. —“Bédambo isadec. Mibi bédambo iquec,” mabi canu —quiash nacnemëdteuidi tantienda. <sup>4</sup> —Bédambo mibi iquec —camenuc bédamboec tabadta. Nëishëmënenquio icquin bédamboen nabanta. Chieshenquio icquin min bënën chiacpadomboen naquid icta. Mibi adquio icsho isash: —Mibi bédambo iquec —quendac Nuquin Papa. <sup>5</sup> Èndenquimbo isadaidbo tsusedpan chido Nuquin Papa tantiaquid yec adquio icpampic. Aton bënën chiacpadomboen naic bédambo icpampic. <sup>6</sup> —Con bënë con icbobimboec iquec —quequin aton bënë Abadauan caidën chiacpadomboen Sada caidën napampic. Esus tantiaquid icsho mamënshunaqui min bënë dacuëdënenquio icquin aidën chiacpadomboen naic bédamboec tabadec Sadapadquio mibi ictsiac. Adquid bédambo iquec. <sup>7</sup> Tanta. Bënëtsen chuinu. Abia uimabudquid icsho min chido bédamboen ista. Mibëdtan Esus tantiaquid yec Nuquin Papa yacno mibëdi tabadtequid neque. Min chido bédamboen ista. —Ëbi bédamboen ista, Papa —quequin mimbi chiaid Nuquin Papan tantienquio icnushe. Min chido bédamboen ista.

#### *Bédamboec tabad, quequin chiaid*

<sup>8</sup> Nëbi Esus tantiaquido abitedi chuinu. Tanta. —Nuquin Papan chiacpadomboen nanuna —quiash bédamboec isnanuna. Cuishonquequid béd cuishonquec shubiquid béd shubinuna. Adec tantiananguionona. —Ëmbi naiduidi naimbi —quenquio icquin utsibon chiaidtsen nanuna. <sup>9</sup> Mibi chieshënaqui cuidnanenda. Mibi chieshënquin icsamboen chuishunaqui cuidnanec icsamboec chuishunanenda. Adenquio icquin Nuquin Papa chianeta. —Ëbi chieshënquid bédamboen isquin bédamboen tabadme, Papa —quequin Nuquin Papa chianeta. —Ëmbi bédamboen isaidon ma aton matses utsibo bédamboen isnu —queshun Nuquin Papan nuqui Esus tantiaquido icmiaye. Bédamboec tabadnuna. <sup>10</sup> Adec bédamboec tabadte chuiquin Nuquin Papan dada uamepampic naden.

“Bédamboec tabadte bunquidën nadoendac.

Adonante bunenquio icquidëmbi utsibo muauainquio iquendac.

Chieshënquin utsibo icsamboen chienquio iquendac.

<sup>11</sup> Icsamboec tabadboedi bédamboec tabadendac. Utsibo chieshënansho isash: ‘Padi. Chieshënanenda,’ quendac.

<sup>12</sup> Adec bédamboec tabadsho Nuquin Papan bédamboen isendac.

Aden bédamboen isaidon: ‘Ëmbi chuisho tanta. Ëbi bédamboen ista, Papa,’ quequin abi chuisho Nuquin Papan tantiendac.

Icsamboec tabadshoen bēdamboen istiapimbo iquendac,”  
quequin Nuquin Papan dada uamepampic.

*Cuesaqui dacuēdenda, quequin chiaid*

<sup>13</sup> ¿Bēdamboec tabadshoda bēdambo icquidēn badedquio mibi cuespatsiash? Paden-  
quio ictsiash. <sup>14</sup> Bēdamboec tabadsho isun icsambo icquidēn cuesacsho mibi Nuquin  
Papan bēdamboen istsiashe. Mibi chieshēnquido dacuēdēnenda. <sup>15</sup> Dacuēdēnenuo icquin:  
—Con Icbo Esuquidistu nec —quequin ambi chiacpadomboen nanuna. Aden mimbi  
Esus tantianuc utsibo: —¿Atotsieshun Esus tantie? —quesho: —“Abided cuidadec unēsaid  
Esus tantiasho Nuquin Papan ēbi bēdamboen isquin unēsacsho abi yacno ēbi tabad-  
mendac,” queshun Esus tantiambi —quequin Esus tantiesabo chuibanuna. <sup>16</sup> Aden  
nēishēmēnenuo icquin Esusēn naid chuibanuna. Aden bēdamboen chuinuec Esus  
tantiaquiec bēdamboec tabadnuna. —Ēbi bēdamboec tabadsho isash ēbi chieshēnquin  
muauaquid: “Bēdambo icquidi muauachitombi. Icsachitobi,” ma quenu —quiash  
bēdamboec tabadnuna. <sup>17</sup> —Ēbi tantiaquid utsibon chieshēnendac —quequin Nuquin  
Papan tantiacpadomboen Nuquin Papa tantiaquido utsi-utsien utsibon chieshēnendac.  
Bēdamboec tabadquid icsho utsibon chieshēnaqui nuqui chieshtoenquo icsho isash:  
—Mibi bēdambo iquec —quetsiash Nuquin Papa nuqui caic. Icsambo icsho quēnēn  
nauedaidi nēishenuo icsho: —Mibi bēdambo iquec —cainquo ictsiash Nuquin Papan.

*Esus unēsaid tantia, quiaid*

<sup>18</sup> Chieshēnaqui Esusbimboec chieshtoenquo yec bēdamboec tabadnuna. Aid  
icsaisambo yequi nuqui icsaid bedshunec abided cuidadec unēspondash. Aden  
Nuquin Papa abi tantiaquido bēdamboen ismenuc abentsecquiobi unēspondash pad-  
pidec unēsenuo icnuec. Aton dada unēsambi aton tantiate unēsabi icpanēdash.  
<sup>19</sup> Adec aton dada unēsambi aton tantiate icnuc ēndenquimboshē Noe caidēn matses  
abi tantiesabo icsho Nuquin Papan cuidquin unēs uampido uidēn uashun quēnēn  
sauedampicno Esus nidpanēdash. Ambo nidshun Nuquin Papan cuidpampido Esusēn  
ambi naboed chuibampanēdash. <sup>20</sup> Naden Nuquin Papan aido cuidquin unēs uapampic.  
Ēndenquimboshē aton matsesbēd tabadec Noe bēdambo icnubi aton matses icsamboshē  
icpampic. Adnubien Nuquin Papan: —Matses icsaquido abitedi uesquin unēs uanuen  
nidaid abitedi acte mabudadmembique. Baded cano dapa nacnen —quequin Nuquin  
Papan Noe caid chuipampic. Adoac badedquio cano dapa nacnemēdenquo yacpadembi  
Nuquin Papan badedi cuidenquo icpampic: —Ma abi icsaid ēnshun ēbi tantianu  
—queshun. Adnubien cano dapa nacentanec Noe chedo 8tedpactsēc cano dapa  
antabēdtopampic. Adnubien aido antabēdtoaic cano dapa acten bedtoac nuadtopampic.  
Utsiboen acte mabudadmiaidēn mentoadbudnepampic. Noe abi tantiaquidquo icsho  
Nuquin Papan cuidenquo icpampic.

<sup>21</sup> Adembidi Esus tantiasho nuqui cuidenquo iquec. —“Esus tantiaquid nebi,” que-  
quin utsibo ismequin acten mentomembi —queshun nuqui acten mentomec. ¿Bēchish  
ucquinda nuqui adodi? Padenquo. Nuquin Papa naden chuiquin: —Esus tantiaquin  
icsaid ucachimboen mimbi chiacpadomboen natiadquo iquebi, Papa —quequin nuqui  
adoec. Aden abi tantiasho Nuquin Papan uincuenēdaidēn Esuquidistun nuqui  
cuidmenquo iquec. <sup>22</sup> Aidi uincuenash Nuquin Papa yacno nidash aidbēdi tsadoaic  
abitedishun Icbombo yanoac. Abitedimbo chuiquid dapa icquin ambi chiacpadom-  
boen abitedi namendac. Nuquin Papan abi yacnoshon uaido mayan bēdabo bēdamboen  
namequimbic Satanas aton yuabo mayan icsabobēdta Esusēn cuidendac.

**4**

*Bēdamboec tabadnuna, quiaid*



<sup>1</sup> Nuquin Papan tantiapadomboen nasho utsibon chieshënquin mëyanaqui Esus chieshtoenquo icpondash. Adembidi chieshëmënquidën chieshënaqui adecbidî chieshtoenda. Abided ciudadec unësaid Esus tantiaquin nuqui icsaid nuqui ënendac. <sup>2</sup> Aden nuqui tantiapadomboen nainquo icquin Nuquin Papan chiacpadomboen natiadquo nuqui iquendac. <sup>3</sup> Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paëmbo icquid acquinc: —Nëid papa canu —quequin matseshimboecnuc nacnenquinc mimbi capondac. Adec icsateuidi bunec mëmuntiapimbo mibi icpondac. Adquid iccondaidi nëbi bëdamboec tabadta. <sup>4</sup> Adec bëdamboec tabadsho isun mibëd icsaondaidën: —¿Atotsieshun nuqui naondacpadomboen nainquo ique? Mimbi Nuquin Papa caid nibëdec —quequin mibi icsamboen chuiquin mibi mamëshunendac. <sup>5</sup> Aden mibi mamëshunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bëdamboec tabado? —cac ënden unësaidobëdtan unësabi icquidotedishun ambi naidtedi uesquin chiendac. <sup>6</sup> Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquo yec.

### *Utsibo nashununa, quiaid*

<sup>7</sup> Tanta. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. —Ma ëmbi abi chianesho Nuquin Papan bëdamboen tantianu —quiash adta. <sup>8</sup> —Tantiananquido chieshënanec cuidnante bunenquo iquec —quiash ënëdenquo yec tantiananquionona. <sup>9</sup> Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho adembidi chieshënenquo icquin min shubun yued. <sup>10</sup> Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquo icmenuen chieshenquo icquin nanuna. <sup>11</sup> ¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquo chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —queshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquo icquin.

### *Chieshënaqui chieshtoenquo icte chiaid*

<sup>12</sup> Ëmbi tantiaido mibi neque. Tanta. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquo chieshëmpayoc. <sup>13</sup> —Chieshënquin Esuquidistu comapenen mëyanacimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuishonquenush adnuna. <sup>14</sup> —Esuquidistu tantiaquid nec —queshun chieshëmënquidon natiamiaid mibi bëdambo iquendac. Nuquin Papan Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. <sup>15</sup> Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënquin icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda. <sup>16</sup> Esus tantiaquid icsho utsibon chieshënac dacuëdenda. Adec dacuëdenquo icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquo icquin Esus tantianuna. <sup>17</sup> —Nuquin Papan cuidte ushë nëbi icnuc ambi con matses caido Esus tantiaquido chieshëmënquidon natiamendac —quiacpaden

nëbi tauaquin mibi natiamec. Adsho isun: —Chieshëmënquidën chieshënac ëmbi tantiacpadomboen abi icsaid ëntsiash —qeshun Nuquin Papan: —Natiamenda —cainquo iquec. Aden abi tantiaquido icsaid ëmete bunquin nashun ¿bëdiactsëcta abi tantiesabo cuidpec? <sup>18</sup> Naden chuiquin Nuquin Papan dada uamepampic. “Aden chieshëdeniac natiambo yan-yanequi unësash Nuquin Papabëd abi tantiaquido tabadendac. Nuqui adnuc ¿bëdiactsëcta ambi chiaid niac-niacquido Nuquin Papan cuidpec? Padenquo. Comapenen cuidendac,” quequin dada uamepampic. <sup>19</sup> Nuquin Papan tantiacpadec mëyadec Esus tantiaquid ma nadpanuna. —Ëbi uaquidën Nuquin Papan ambi chiacpadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

## 5

### *Esus tantiaquido chuibanquid Petedon chiaid*

<sup>1</sup> Tanta. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paëmboshë icmequin Esuquidistu unës uasho isondambi. Aidën padpidec nidaidën choshon abi yacno buanuen nuqui beduanegue. Tanta. <sup>2</sup> Icbo yua cudasac bimboec mibëd icquido Esus tantiaquido cudasta. —Esus tantienquo yanushe —qeshun: —Nuquin Papan chiaid niaquenquo yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquo icquimbi naimbi —quenquo icquin: —Aden Esus tantiaquido nashumbantsiambi —quec Esus tantiaquido chuibanquidquo icta. —Piacquid dadpen bednun nanu —quenquo icquin Nuquin Papan chiacpadomboen natiadquo yec Esus tantiaquido chuibanquid icta. <sup>3</sup> —Nëidtedi Esus tantiaquido bëdamboen name —caidtedi bëdamboen isequi chushcanenda. Adenquo yec: —Ëbi yacpadec ma tabadnu —quec bëdamboec tabad. <sup>4</sup> Aden Esus tantiaquido chuibanquidën bëdamboen namesho isun Nuquin Icbon nidaidën padpidec choshon utsibo ismequin: —Nëid bëdambo icquid nec —qeshun chuibanquid ambi namiaidobëdta abi yacno buanendac.

### *Esus tantiaquidon nate utsi chiaid*

<sup>5</sup> Tanta, caniabo. Mibitsen chuinu. Mibi chuiquid dapabon chiaid niaquenquo icquin aidën chiacpadomboen nata. Aidtedtsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naiduidtsëqui nasho: ‘Adquid icsambo iquec,’ catsiash Nuquin Papan. Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic. <sup>6</sup> Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshënaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ëbi tantiaquidquo mibi neque. Ëbëdi tabadec cho —nuqui caindac Nuquin Papan. <sup>7</sup> Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaidtedi Nuquin Papa chuinuna.

<sup>8</sup> Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasën nuqui chieshënquieq. Esus bedshunuen nuqui icsametiadquo icquin bëdin nëish nibënac bimboen ambi icsametequid Satanasën ënenquo icquin nibëmbeneque. <sup>9</sup> Ista. Icsamenda. Chieshtomenda. —Satanasën icsamechitoshe —qeshun Nuquin Papan chiaid niac-niaquenquo icquin Esus tantiaquionona. —Ëbi chieshënacpadomboen

Esus tantiaquid utsibo nidaid utsi-utsiec yacno tabadquido utsibon chieshēnac caosh –queshun chieshtoenquoio icquin Esus tantianuna. <sup>10</sup> Aden utsibon chieshēnaido yec yuec-yuecpactsēc nuqui tabadec. Adshobien abi yacno buanquin nuqui bēdambo icmequidēn Nuquin Papan Satanas nuqui icsa uamenquoio iquendac. Adembidi Nuquin Papan nuqui bēdamboen isquid icquin dayacquio yac bimboecnuc chieshtoenquoio icquid nuqui icmendac. <sup>11</sup> Ēmbi aden chuisho tantiashun: –Mibi bēdamboshē iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa –Nuquin Papa canuna ēnenquoio icquin.

*Petedon ēnquimbi chiaid.*

<sup>12</sup> Esus tantiaquidquoio Sidas caid nēidtedtsēqui ēmbi dada uaboed mibi yacno buamembi. –Esusquoio isondambi. Aid tantiasho Nuquin Papan matses bēdamboen isbenendac –quequin abimbo mibi chiombique. Chieshtoenquoio icquin Esus tantianuna. <sup>13</sup> Nuquin Papan tantiamiac nuquibēdtan Esus tantiaquido ēmbi Babidonia caid yacnocquidon: –Aido unēsquoio iquec –mibi caosh. Babidonia caidbidi Doma caic. Con madobimboecquid Madcosēn –Aido unēsquoio iquec –mibi caosh. <sup>14</sup> –Ēbēdtan Esus tantiaquido nec –quiash: –Mibi unēsquoio iquec –cananuna. –Ma Nuquin Papan mibi Esus tantiaquidotedi bēdambo icmepanu –quequin Nuquin Papa chianembi. Padi. Aidedi chuiquin dada uaombi.

## PETEDON DADA UAID 2

### *Tauamboen chiaid*

<sup>1</sup> Petedo Simon caid nebi. Abëd icquid yec aton yuambo icscho Esuquidistun: —Ëmbi naid chuibeneta —caidquio nebi. Èbëdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec. <sup>2</sup> Èbëdtan Esus tantiaquido icscho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

### *Nuquin Papan bëdambo icmete chiaid*

<sup>3</sup> Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaido nuqui nec. <sup>4</sup> Abipadquidquio Esusën chiondacadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

<sup>5</sup> Aden Nuquin Papan Esus tantiamiaido yec dayacquio yacbimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna.

<sup>6</sup> Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshënquidbëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna.

<sup>7</sup> Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. <sup>8</sup> Ëmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactsëc tantiatsëcboedëmbi chieshtoenquio icquin nuqui Esus tantiaquiotsiac. <sup>9</sup> Ëmbi chuibocpadomboen naisa pamumëdadbimboec iquec. Adquidon: —Aton Mado Esus tantiasho icsaid ucuadacbimboecnuc Nuquin Papan nuqui bëdamboen isec —queboedombi bëpiscudquin tantienquio yanec.

<sup>10</sup> Èbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantiash chieshtoenquio icquin Esus tantiec bëdamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabenombi —quequin nuqui tantiendac. Aden tantiec Esus tantienquio icquid nuqui yanenquio ictsiaic. <sup>11</sup> Adec bëdamboec tabadash unësacsho: —Ëbi tantiaquid mibi neque. Èbëdi tabadec cho —queshun ambi namiacno abëdi tabadmequin Nuquin Icho Esuquidistun nuqui bëdambo icmendac padpidec unësenquio icnuc. <sup>12</sup> Ëmbi aden chuiboedtedi mimbi tantiondac. Aden tantiabosh Esus tantiec mibi bëdamboec tabadcuendac. Aden mimbi tantiondaidi mibi chuided-chuidedendambi. <sup>13</sup> —Nëbi unësendabi —queboedi ëbi unësabi yacpadembi mibi chuided-chuidedendambi. <sup>14</sup> —

Adënquio mibi unësendac —quequin Nuquin Icho Esuquidistun chiapadën nëbi unësebi. <sup>15</sup> —Ëbi unësan ëmbi chiondaid ma bëpiscudenquio icnu —queshun mibi chuiquin dada uanu.

### *Nuquin Papan Esus chiaid*

<sup>16</sup> ¿Muaquindambi mibi Esus chuidionda? Padenquio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquio. Ëmbimbo isondaidquio mambi



mibi chiondac. —Nëid con Madombo nec —quequin Nuquin Papan ismiac Esus isondambi. <sup>17-18</sup> Nadquio iccondash. Macuësh dapan dectatoash Esus bëchamuanquiec iccondash. Adnubien Nuquin Papan: —Con Madombo nec. Ëmbi tantiaidquio yec bëdamboshë iquec. Nëid isec bëdambo iquebi —quequin abucshun dacuëdampamboecnuc chuipondash.

<sup>19</sup> ¿Ëmbentsëquidambi Esus chuibanquin nape? Padenquio. Ëndenquimboshë Esus chote tantiamequin Nuquin Papan isadaidbo tsusedpabo dada uamepampic. Pacuënëdacimboen utsibon tantienquio icnubi paposhquiacbimboecnuc Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —queshun. —Abitedishun Icbombo nebi —quequin ismenuc padpidec Esus choabi yacpadembi Nuquin Papan chiaid bëdamboen tantianuna. <sup>20</sup> —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquio. <sup>21</sup> Ambembi chiaid dada uainquio icquin Nuquin Papan chiaidquio dada uapampic. Nuquin Papan Mayanën tantiamiac abimbo chuipampic.

## 2

### *Muaquido iquendac, quequin chiaid*

<sup>1</sup> Nuquin Papan chiaidquio isadaidbo tsusedpabon chuinubien utsibo: —Nuquin Papan nadoendac —quec muapampic. Nëbi adquidbidi iquendac. Mibi yacno puduedash ambembi chiaid chiec muasho tantiaishun: —Mibi muequi nec —badedquio cainquio mimbi iquendac. —Abided ciudadec unësaid Esus tantiaquid nebi —queboedi: —Esusën chiacpadomboen natiapimbo iquebi. Adshobi Nuquin Papan ëbi cuidenquio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. <sup>2</sup> Aden muaquidën chuisho tantiaishun Esus tantiauidtsëcboedombi dadpenshun aidën chiaid tantiendac. Adashic Nuquin Papan chiaid niac-niaquec muaquido tabadacimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. <sup>3</sup> Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiaishun aido cuidendac. —Adquid icsano nidmequin cuidendambi —quequin ambi ëndenquimboshë tantiapampicpadomboen comapenen Nuquin Papan cuidendac.

<sup>4</sup> Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anëdënquiacno nësecanumbi nabono —queshun aden tauamboen Satanas chedo cuidpampic. <sup>5</sup> Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unës uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquio icpampic. <sup>6</sup> Adshumbic yuecquio ictanquin matses utsibon Nuquin Papan chiaid niac-niacsho cuidquin nëdëncapampic. Shubu dadpen icquid nëid daëd icpampic. Nëidic Sodoma caid. Nëidic Comoda caid. Ambo tabadquido aton shububëdi abucuësh taboadampamboec paëdquidën pichiquepampic matses nibëdquio yec. —Aden icsambo icquido cuidquid nebi —quequin Nuquin Papan adopampic. <sup>7-8</sup> Sodoma caid yacnocquid abentsëqui Dod caid pichiquenquio icnuc Nuquin Papan cuemepampic. Bëdambo icquid yec: —Nuquin Papan chiaid niac-niaquec nëmbo icquido icsamboecuidi tabadec —quec shubiec tsadsho cuemetsaidi pichiquiambo ictsampic. <sup>9</sup> Aden abi tantiaquido daëd Noebëdta Dod Nuquin Papan

cuidambo icpampic. Adembidi nēbi abi tantiaquido cuidenquo icquid Nuquin Papa nendac. Utsibon chieshēnāidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

<sup>10</sup> Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcuē nibēdacbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidsēqui bunebi —queshun ambi naiduidtsēqui naic. Dacuēdtiadquidi dacuēdenquo icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec.

<sup>11</sup> Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsēc tantiaquido icnubi comapenen tantiaquido icquin mayan bēdabon Nuquin Papa naden chienquo iquec. —Aido baded cuid, Papa —cainquo iquec. —Ambi cuidte ambentsēqui tantiaquid Nuquin Papa nec —queshun adoengquo iquec. <sup>12</sup> Padnuen ěmbi chuiboedo muaquidon Nuquin Papambo tantienquo icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquo. Adembidi abi cuidte tantienquo icsho Nuquin Papan cuidendac.

<sup>13</sup> Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchēshēn icsash badiadēntsen icsaic: —Bēdambo iquebi —quec adquido cuishonquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidbidi nebi —quiash mibēd tabadec aid icsasho isash: —Esus tantiaquid abitedi icsaic —quependac utsibo.

<sup>14</sup> Muaquido utsin chido mēismec tabadec. Nuquin Papan chiaid niac-niaquec icsaic ěnēdenquo iquec. Adquid icquin Esus tantiatsēcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. <sup>15</sup> Nuquin Papan chiaid niac-niaquec icsateuidi bunquiec. Ěndenquimboshē matses utsi Beyod caidēn mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. <sup>16</sup> Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

<sup>17</sup> —Mibi bēdambo icmete chuinu —quequin muaquidon chuisho tantiash: —Ai, mimbi chiacpadte bunebi —queuidtsiash matses. Uispa dadpen icboedi badiadnuc abu chēshēn bētīnacsho isash: —Tanunquien badiadec —queuidacbimboec: —Ambi chiacpadquio bēdambo icnu —queuidtsiash matses. Adec muasho tantiash: —Adquid chian anēdēnquiacno nēsecaindami —quendac Nuquin Papa. <sup>18</sup> Adec muaquido abembi onqueuidequi onquec. Utsin chiaid tantienquo icquin ambi tantiauidi chiec naden. —Mibi bunacpadec mibitsen icsata —cac Ěsus tantiatsēcquin Nuquin Papan chiaid nauidsēcquimbi abi icsaid ěnuidboedi padpidemboec icsaquiec. <sup>19</sup> Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid ambembi ěntiapimbo yec icsamboshē iquec. Adec icsamianquidēn chiacpadomboen naic matses icsaquid nendac. Adecbidi ambi naiduidi naic icsaquid matses nendac. <sup>20</sup> Nuqui cuidmenquo icquid Esuquidistu tantiatsēcquin abi icsaid ěnuidboedi padpiden Nuquin Papan chiaid niac-niaquec icsamboshē muaquido yanec. <sup>21</sup> Ěnden Esus chiondac: —Ai, aid tantiembi —quetsēccondaidi aden Esus tantienquo yanec icsamboshē yansho isun: —“Esus tantiembi,” quenquo icpatecnēdan —caimbi. <sup>22</sup> Adquid chuipanēdash naden. —Ambi ucbudaid opan chequid. Opa nesmiaqui nidaidēn nocoshquec padpidec bēchishoaquid —quepanēdash. Adecbidi Esus tantiauidtsēcquido icsaid ěnuidboedi muaquid padpidemboec icsadenechitequien iquec.

## 3

*—Esus chote chiaid*

<sup>1</sup> Tantia. Ęmbi tantiaido mibi neque. —Pabiate cuembo icquin Nuquin Papan chiaid tantiaquiec bēdamboec tabad —quequin mibi chuiquin dada uaondambi. Adomboembidi mibi chuiquin nēid dada uanu. <sup>2</sup> Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidēn Nuquin Icbo Esusēn chuibanondash. Aidēn chiondaid abēd ictened utsin mibi chuinēdash. Aden chiaid tantiata. Aidbidi chuinu. <sup>3</sup> Esus nidaidēn padpidec choabi icnuc Esus tantiesabon abi icsate bunaiduidi naquin Esus mamēnshunendac. <sup>4</sup> —“Utsi uanuec padpidec nidaidēn choaindabi,” ¿quenēdaidta chopec? Ma choenquio icpayoc. “Nēbi Esus choec,” quenededi con mēdimbo abitedi unēsbudniac. Esus choambobi —quependac Esus tantiesabo. Nadembidi chiendac. —Taēc nidaid yanubi matses nidaidēn tabadpampic. Adecbidi aton tsyuecquido tabadpampic. Nēbi adecbidi matses nidaidēn tabadec. Ębi nibēdnuc adiquendac. Utsi uanuec Esus choenquio iquec —quependac Esus tantiesabo. <sup>5</sup> ¿Abimboda capec? Aden chuiquin Nuquin Papan chiaid tantienquio iquec. Ęndenquimboshē ambi uaidtedi nibēdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nēnantan yampampic. Aden Nuquin Papan abitedi uapampic. <sup>6</sup> Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unēs uapampic. <sup>7</sup> Aden ambi chiacpadomboen Nuquin Papan naindac. Ambi icsambo icquido cuidte ushēn abu nidaidbēdta nēdēncaindac. Adembidi matses Esus tantiesabo cuidendac.

<sup>8</sup> Ęmbi aden chiac: —¿Tedecksiash Esus chopeba? —¿quecta ique? Tantia. Mibi chuinu. Ambi tantiacpadēmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsēcbimboecquid nec. Adecbidi seta abentsēqui icquidquio iquequi dadpen seta icquidbimboecquid nec —quequin Nuquin Papan tantiec. <sup>9</sup> —Ęndenquio: “Padpidec choendabi,” quenēdaidi Nuquin Icbo Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiasun Ęmbi chiaid niac-niacboedi Ęnushē. Isbono. Ęnacsho icsamboshē yacno nidmenquio ictsiambi —quesun Nuquin Papan Esus chomiabi iquec.

<sup>10</sup> Adnubien matses: —Nēbi choec —quenquio icnuc Esus badedquio choendac. —¿Nēid ushēmbi ampequidēn con na ampec —quequinda tantiapec? Padenquio. Adembidi: —Nēbi choec —quequin tantienquio icnubi Esus choendac. Choshon acquimboen toncac abitedi nibēdanendac. Uispa yec inchēshēn ushē yec badiadēn ushē yec queboedi nibēdquiecnuc nēdēncaindac. Nidaid abichobimbo nēdēnquenuc aidēn icquidtedi nēdēnquendac nibēdquio yec. <sup>11</sup> —Nuquin Icbon nac adquidtedi nēdēnquendac —quiash Esus tantiec bēdamboequien tabadtiad. <sup>12-13</sup> Esus chobon Nuquin Papan cuidquin ambi uaidtedi nēdēncaindac. Abu yec uispa yec inchēshēn ushē yec badiadēn ushē yec queboedi nēdēncaindac nibēdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacneaidēn bēdambo icquidoudiquo nuqui tabadmendac. Ęmbi aden chuisho tantiasun: —Ma Nuquin Papan Esus chomenu —quequin utsibo tantiamequin Esusēn naid chuibanec bēdamboec tabadnuna.

<sup>14</sup> Ęmbi tantiaido mibi neque. Tantia. —Choshon abi yacno Esusēn nuqui tabadmendac —quec chieshtoenquio yec bēdamboec tabadnuna. Choshon Esusēn: —Mibi icsambo iquec —cainquio icnuc Nuquin Papan chiaid niaquenquio yec bēdamboec tabadnuna. <sup>15</sup> Adec tabadquimbi Ęmbi chuiboed tantiasun naden tantia. —“Utsitsen ma Esus tantiaquid yanu. Aden Esus tantiasun aid cuidenquio ictsiambi,” quesun Nuquin Papan Nuquin Icbo chomiabi iquec —quequin tantiec tabadta. Adembidi mibi

chuiquin nuquin buchibimboecquidën Pabadon dada uapaccondash. Nuquin Papan tantiamiac bëdamboen chiaccondash. <sup>16</sup> Ëmbi chuiboedbidi chuiquin dada uadenepaccondash. —Pabadon dada uaid abentse-abentsec badedquoio tantiadenquoio iquec —queshun utsibon aidën chiacpadoemboen chienquien icchitosh. Nuquin Papan chiaid niac-niactiadquoio icquidon Pabadon chiaidquoio tantienquoio icquin icsamboen chiosh cashnad-cashnadacbitsëccquiecnuc. Nuquin Papan chiaidquoio nuquin tsusedpabon dada uapampidtsen isbanshun adembidi tantienquoio icquin icsamboen chiec. Adquido Nuquin Papan cuidendac.

<sup>17</sup> Ëmbi tantiaido mibi neque. Tanta. Chuinu. —Abimbo tantienquoio icquin Nuquin Papan chiaid niac-niacquidon muauaic —ëbi quesheo tantiasheun: —Esus tantienquoio yamane. Muasho tantiatiapimbo iquebi —quequin ënenquoio icquin Esus tantianuna. <sup>18</sup> —Abi tantiaquid cuidmenquoio icnuec abided ciudadec Esus unëspondash. Aid tantiasheo Nuquin Papan nuqui bëdamboen isec —quequin Esus bëdiactsëc tantiatsëcshun comapenen Esus tantiaquionona. Adshumbic: —Nuquin Icbo Esuquidistu bëdamboshë iquec —canuna ënenquoio icquin. Padi. Aidtedi chuiquin dada uaombi.

## UANËN DADA UAIÐËMPI 1

### *Nuquin Papabëd ënëdenquo yec tabadte chianiaidquo*

<sup>1</sup> Abia Yampidënquo matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquo yec tabadte chianiaidquo nec. Aidquo chuiquin dada uaid nëid nendac. Aidquo tantiaquido icquin bëdamboen ista. <sup>2</sup> Aid, abuc Nuquin Papabëd ënëdenquo yec tabadboedi nidaidënuësh matses icnuec chopanëdash. Choshon abipadquo yec Nuquin Papabëd ënëdenquo yec tabadte ismequin chianiaidquo ëbëd icquidobëdtan isteneshun chuibanec nebi. <sup>3</sup> Aidi ëbëd icquidobëdtan ispadened adembidi ëbëd icquidobëdtan tantiapadened chuibanec nebi ma mibitedishun tantiash shubu abentsëquën tabadacimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac. <sup>4</sup> Esuquidistu tantiaquidtedi shubu abentsëquën tabadacimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadec ma mibitedi tabadpanueshun.

### *Nuquin Papa Bëdambocquid Abentsëcquiobi nec quiaid*

<sup>5</sup> Esuquidistun Nuquin Papa chuibansho nuqui tantiondacadomboen chuioaimbique. Tantiata. Nuquin Papa Bëdambocquid Abentsëcquiobi nec. Icsapenquiocquid aidi nec. <sup>6</sup> Adquid icnuc, Nuquin Papan shubun icquid nebi, queboedi ambi chiaid niacquin abipenquo chuiquid nuqui nendac. <sup>7</sup> Nuquin Papan chiacpadomboen nabanquidquo iquec abi tantiaquid utsibobëd shubu abentsëquën tabadacimboecquid nuqui nendac. Adquid nuqui icmenuc nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënquo nuqui icsaidtedi paucbantequid nendac.

<sup>8</sup> Icsaisa nebi, quequi mua uadquin abipenquo chuiquid nendac. <sup>9</sup> Icsaobique. Ëbi pauc, Papa, qesho tantiashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. <sup>10</sup> “Matses icsaisa nibëdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiachimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesa nec.

## 2

<sup>1</sup> Ma icsainquo icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquo Esuquidistun nuqui icsasho aden chiendac. <sup>2</sup> Aidi matsestedi icsaid bedshunash abided cuidadec unëspondash.

<sup>3</sup> Ambi chiacpadomboen nabanquin Esuquidistu tantiaquid nebi, qeshun nuqui tantiendac. <sup>4</sup> Esuquidistu tantiaquid nebi, qeshun Icbon chiacpadomboen nainquiocquin abipenquo chiendac adquidën. <sup>5</sup> Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. <sup>6</sup> Aden pausunac Nuquin Papan Madonquo bëdamboec tabadquin nabanacpadomboen naimbi, quec nidaidën bëdamboec tabad.

<sup>7</sup> Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. <sup>8</sup> Mimbi tauamboen tantiondaid Esuquidistun, Naden



nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbit-sen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmëñquid icboedi aidën pausunac tantianquidquio yanec.

<sup>9</sup> Esuquidistu tantiaquid nebi, qeshun abi tantiaquid utsi chieshënec Nuquin Papan tantiacpadomboen pausunacmaid adquid nec. <sup>10</sup> Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. <sup>11</sup> Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiadquio yaid tantiesa nec.

<sup>12-14</sup> Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

### *Icsate bunesa icta, quequin chiaid*

<sup>15</sup> Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. <sup>16</sup> Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaqin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. <sup>17</sup> Mayan icsan tantiaid ënëdendac. Aidën tantiacpadomboen tantiaquid icbobëd Nuquin Papa yacno tabadtiapimbo iquec. Nuquin Papan chiacpadomboen naquidien ënëdenquio yec Icbobëd tabadendac.

### *Esuquidistu chieshënquid dadpen choendac, quequin chiaid*

<sup>18</sup> Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshënquid dadpen choendac, quequin chiondacadquiec ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. <sup>19</sup> Esuquidistu chieshënquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënquid iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquio icquido niosh, quequin nuqui tantiendac.

<sup>20</sup> Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac. <sup>21</sup> Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. <sup>22</sup> ¿Tsutsi muaquid nepec? ¿quepecta mibi ique? Nuquin Papan Madombo nidaidëñshun chidon tishac matsesash aton Papan chuimiadquio nec, quesa muaquid nendac. Adquid Esuquidistu chieshënquid nendac. Abentsëcquidquibi

Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. <sup>23</sup> Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

<sup>24</sup> Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadacimboecquido mibi iquendac. <sup>25</sup> Èbëd shubu abentsëquën nidaidën tabadacimboecquido èbëd abuc ènëdenquio yec tabadte iquendac, quequin Esuquidistun chiaid nendac.

<sup>26</sup> Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. <sup>27</sup> Nuquin Icbo Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiaish bëdambo iquebi, mibi quendac. Aden Esuquidistun tantiamiaidquio yec abëd cuëshëdesa icnuec adequi tabadta.

### *Nuquin Papan chiaid tantiaquid ambi bacuë icmiaid*

<sup>28</sup> Adembidi con nabo quequin mibi chuioaimbique. Adembi tantia. Esuquidistun chiaid tantiadonequiec tabadteneta. Adec tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. <sup>29</sup> Nuquin Papa bëdambocquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

## 3

<sup>1</sup> Matses tantiaquin naquidquio Nuquin Papa nec. Ma èmbi unësquiocquin comapenen tantiaido èbëdi tabadpanueshun con bacuëbo caimbi, quequin Nuquin Papan icsaisanquio tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquio Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. <sup>2</sup> Nuquin Papan comapenen tantiaido mibi nec. Adquid icsho adembi mibi chuinu. Tantiata. Nèbi Nuquin Papan con bacuë caido nuqui nec. Aden ambi con bacuë caid icsho, Nadquidquio mibi icmendambi, ¿ada Nuquin Papa capec? Padenquio. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquio nendac. Esuquidistu nuqui bedec chosho isash, Nèbi aidpadquidquio Nuquin Papan nuqui icmendac, quequin tantiembi, nuqui quendac. <sup>3</sup> Aid choabicnuc, Abipadquid iquendabi, quequin caindonequido nèbi Esuquidistu icsainquio yec tabadacpadquiec tabadte bunquid nuqui nendac.

<sup>4</sup> Nuquin Papan nadec bëdamboec tabadta, quequin chiaid niacquid abibi icsaquid nendac. <sup>5</sup> Adnubien, Esuquidistu abuc tabadboedi nidaidënshun chidon tishac matsesun nuqui icsaid bedshunash abided cuidadec unëspanëdash, quequin nuqui tantien-dac. Icsapenquiocquid Esuquidistu nec. <sup>6</sup> Icbopadquidquio icnu quiash Esuquidistubëd tabadacimboecquid icsadenesa nec. Icsadenequid, Nuquin Papan Esuquidistu tantiamioishi, quetiapimbo iquec. Esuquidistu tantiesa adquio iquec.

<sup>7</sup> Con nabo, tantesa uamane qeshun muaquin chuibanaid tantiesa icta. Esuquidistu bëdamboec tabadacpadquiec tabadquid icsaisa nec. <sup>8</sup> Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadiapimbo yampanuna. <sup>9</sup> Nuquin Papan con bacuë caido icsadenesa

nec. Ambi con bacuë caido Nuquin Papapadquidquio yec icsadenetiapimbocquid nendac. <sup>10</sup> Mayan icsan yua Nuquin Papan chiacpadomboen naisa nec. Utsi tantiesadquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquio nendac.

### *Esuquidistu tantiaquido tantiananaid*

<sup>11</sup> Esuquidistu tantiaquid utsibo tantiaquiota, quequin chiaid nuqui abia tantiondaid nendac. <sup>12</sup> Aton utsimbo chieshënnquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaidën aton utsi Abedën abi tantiaquin nadenesho Nuquin Papan aid bëdamboen isnubi Cainën ambibi tantiacpaden nadenesho Nuquin Papan bëdamboen istiapimbo icpampic. Aden isac Cainën aton utsimbo Abed chieshënnquin cuesunepampic. <sup>13</sup> Cainën aton utsimbo chieshënnacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënshe isash, ¿Adquidshenda mibi nepec? quenda. Nuquin Papan chiaid tantiesabimboec adenda. <sup>14</sup> Esuquidistu tantiaquid tantienquiocboedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabëd tabadquidbimboecquid nebi, quequin nuqui tantiendac. Aton utsibo tantiesac cuëshëdadbimboecquid nec. <sup>15</sup> Aton utsibo chieshënnquid, Con utsi cuesunenu, quiacimbocquid nec. Adquid Nuquin Papabëd tabadtemaid nendac, quequin nuqui tantiendac.

<sup>16</sup> Matses tantiaquin nashunquidquio Esuquidistu icpondash. Nuqui tantiec, ma ëbëd ënëdenquio yec tabadpanu quiash unësmanc, quenquio yec nuqui icsaquido icsho cuidnushe quiash abided cuidadec unëspondash. Abi tantiaquid icquin abi tantiaquid utsibo tantiaquin nashunec unësmanc quenquio yec nuqui tabadendac. <sup>17</sup> ¿Aton nachoquid icnuc Esuquidistu tantiaquid utsin na nibëdquiocsho isec, Con utsi menenquio iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. <sup>18</sup> Ëmbi con nabo caid, Utsi tantiec bëdamboec tabadquidquio nebi, quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta. <sup>19</sup> Aden mimbi chiacpadomboen nabansho isun Nuquin Papan tantiamiac dacuëdenquio yec Nuquin Papa chuinu quiash abi yacno puduedquidbimboecquin nuqui chuidedchuidedec. <sup>20</sup> Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

<sup>21</sup> Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënquio Nuquin Papa bëisquidëmbimboen, Ëbi menepec, quequin dacuëdenquiocquin chianendac. <sup>22</sup> Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac. <sup>23</sup> Naden tantiata, quequin Nuquin Papan chiaid nad iquec: Abëd Abia Yampidquio, Esuquidistu, nidaidënsun chidon tishac matsesaid Nuquin Papan chomiaid aton Madombo nec quequin nuqui tantiaidquio nendac. Adembidi Esuquidistun chiacpadec abi tantiaquid utsibobëd tantiananendac. <sup>24</sup> Aden ambi chiacpadomboen naquidbëd Nuquin Papa iquec. Adquiduidquio Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

## 4

*¿Nuquin Papan chiaidquiobida chuibanoshe? Isnu, queshun Nuquin Papan chiaidquio isteneta quiaid*

<sup>1</sup> Utsibo, Nuquin Papa chieshënquidën chuimiaido dadpen iqueque. Aidën chuimi-aidën chuisho tantiashun, ¿Nuquin Papan chiaidquiobida chuibanoshe? Isnu queshun Nuquin Papan chuiquin dada uamiaidquio isteneta. ¿Adquiobida iqueque? Isnu, queshun isteneta. <sup>2</sup> Nuquin Papan pausunaidën naden chiendac: Nidaidënshun chidon tishac matsesaid Nuquin Papan chomiaid aton Madombo nec, quequin chuibanendac. <sup>3</sup> Nuquin Papa chieshënquidën chuimiaidën naden chiendac: Nuquin Papan chomiac-maid Esus niondash. Aid aton madopenquio nec, quequin chiendac. Aden chuiquid Esuquidistu chieshënquid nec. “Ëmbi chomiaid chieshënquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

<sup>4</sup> Con nabo quequin Nuquin Papan aton Mayan meniac aidënquio tantiamiac Esuquidistu chieshënquidon chuisho, Tantianu, quesa mibi nendac. Nuquin Papan meniaidën tantiamiac Nuquin Papan chiaid chiác dëniacacpadquiec mibi chieshënquid cuenendac. <sup>5</sup> Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. <sup>6</sup> Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibansho Nuquin Papa tantiabenuid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibansho, Tantianu, quesa iquendac. Adsho isun, Abipenquio chuiquidën yua nec, quequin nuqui tantiendac.

*Nuquin Papan ismiac adecbidi tantiananquidquio ma nuquitedi icoapanuna quiaid*

<sup>7</sup> Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec. <sup>8</sup> Utsi tantiaquidquio Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. <sup>9</sup> Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquio yec tabadendac. <sup>10</sup> Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash. <sup>11</sup> Nuquin Papa comapenen tantiaquidquio icquin Nuquin Icbopadquiocquin Esuquidistu tantiaquid utsi tantiaquiotiad. <sup>12</sup> Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

<sup>13</sup> Aton Mayan meniac ambi tantiamiaidquio yec Nuquin Papa ëbëd iquec, nuqui quendac. <sup>14</sup> Nuquin Papan Madomboen nuqui isaidquio icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

<sup>15</sup> Esuquidistu Nuquin Papan Madombo nec, quequin tantiaquidquio Nuquin Papan pausunquin aton Mayan meniaid nec. <sup>16</sup> Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquio nendac. Adecbidi Icho abëd icquidquio nendac. <sup>17</sup> Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquio yec Nuquin Papa tantiaquid aton Madopadquiocquid Nuquin Papa yacno

puuedendac. <sup>18</sup> Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesa, Èbi icsaquid icscho cuidtsiash, quec dacuëdendac. Aidi utsi tantiesa yec dacuëdec.

<sup>19</sup> Nuquin Papa Ambia Tantiacid icquin ismiac tantiananquidombo nuqui nendac.

<sup>20</sup> Èmbi isacmaidquo Nuquin Papa icscho, Aid tantiaid nebi, quequin Esuquidistu tantiaid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac. <sup>21</sup> Nuquin Papan chiaid nad iqueque. Tantiata. Nuquin Papa tantiaid nebi, quequin Nuquin Papa tantiaid utsibo tantiatad.

## 5

### *Nuquin Papan Madombo abimbo tantiaid*

<sup>1</sup> Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaid Nuquin Papan con bacuë caid nendac. Ambi con bacuë caidënquo Nuquin Papa tantiendac. Adembidi Nuquin Papan con bacuë caid utsibo nuqui tantiendac. <sup>2</sup> Ambi con bacuë caidën Nuquin Papa tantiaquin ambi chiapadomboen naquidquo icquin ambi con bacuë caido nuqui tantiendac. <sup>3</sup> Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. <sup>4</sup> Aden Nuquin Papan con bacuë caid icquin ambi chiapadomboen nabanec tabadquin dëniacabimboen icsamenuequid nuqui cuemendac. Adembidi Abia Yampid nidaidënshun chidon tishac matsesash tabadec aton Papabëd cuëshëdesa Esuquidistu nec, quequin tantiaid nuqui icnuc icsamenuequid cuenendac. <sup>5</sup> Esuquidistu Nuquin Papan Madombo Yampid nec, quequin tantiaidënquo ismiac icsamenuequid cuenendac. Ai, icsamenuequidën yuadesa Esuquidistu tantiaidquo nendac.

<sup>6</sup> Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënshun chidon tishac matsesash capusho acten mentoacsho: “Èmbi bëdamboen tantiaidquo mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unësec aton Papa chiec: “Èbi yuedta, Papa,” quiash Esuquidistu unësacsho nacsiaç aton intac chididiquepondash. Adashic, Nuquin Papa abimbo chuiquidpadquidquo icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui. <sup>7</sup> Nuquin Papa yec aton Mado yec aton Mayan yec quequin abucshun aidtedishun abentsëc yacbimboecquin Esuquidistu Nuquin Papan nidmiac chosho nidaidënshun tishac matsesaid nec, quequin chuided-chuidedec. <sup>8</sup> Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucuësh budash aidbëd icpondash. Adembidi yuecshun ambi chiapadomboen acten mentomiacsho, Con madombo nec, quequin chuiopondash. Adembidi yuecshun ambi chiapadec unëso isun, Con madombo nec, quequin inchëshacbimboecnuc icmequin Nuquin Papan nadatiambocquin ismebampondash. <sup>9</sup> Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icscho tantiadonetequidquo nuqui nendac. <sup>10</sup> Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiopac nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacbimboen chuiquid nendac. <sup>11</sup> Con Madombo, Esuquidistu nec, quequin Nuquin Papan chiaid tantiaidquo abi yacno nidash abëdi ënëdenquo yec tabadendac. Matses icsaid bedshunash abided



cuidadec aton Mado unëspanëdash, quequin tantiaquid Nuquin Papa yacno tabadtequid nuqui nendac. <sup>12</sup> Esuquidistu tantiaquid ënëdenquio yec Nuquin Papa yacno tabadendac. Aid tantiesa aidbëd tabadtiapimbo iquendac.

*Ma tantiaquidquio mibi icpanuequin chiaid*

<sup>13</sup> Nuquin Papan Madombo Esuquidistu nec, quequin tantiaquid, Icbobëd ënëdenquio yec tabadtequid nendac, quequin ma tantiaquidquio mibi icpanuequin mibi chuiquin dada uaimbi. <sup>14</sup> Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. <sup>15</sup> Abitedi tantiaquidquio icquin ambi tantiacpadomboen tantiamiac nuqui chuisho Nuquin Papan menendac.

<sup>16</sup> Esuquidistu tantiaquid nebi, queboedi icsasho isun, Cuëshëdnushe qeshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe qeshun aid bëdamboen tabadme, Papa, cainda. Nuquin Papan chiaid tantiate bunesa aid nec. <sup>17</sup> Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquio yec Nuquin Papabëd tabadendac.

<sup>18</sup> Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënquidën adquido yuadtiapimbo iquendac. <sup>19</sup> Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënquidën yua nec, quequin nuqui tantiec. <sup>20</sup> Nuquin Papan Madombo abuc abëd icboedëmbi nidaidënsnun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquio yec nuqui tabadendac, quequin nuqui tantiendac.

<sup>21</sup> Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aideded chiombi.

## UANËN DADA UAIÐËMPI 2

### *Nuquin Papan chiaid abimbo iquec, quequid tantiaid*

<sup>1</sup> Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquiec icquin mibëd Nuquin Papan chiaid tantiec iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantias mibitedi tantiec tsadebi. ¿Ëbentsëquidabi mibitedi tantiec tsadpe? Padenquio. Aden chuisho tantias utsibotsen adecbidi mibi tantiec tabadoaic. <sup>2</sup> Nuquin Papan chiaid abimbo iquec, quequin ënenquiocquin nuqui tantiendac.

<sup>3</sup> Uquë nësiatiadquido nuqui icsho isash abëdi ënëdenquio yec nuqui tabadmenuec nuqui icsaid bedshunash abided ciudadec Esuquidistu unëspondash. Adembidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papan abëd tan aton Mado Esuquidistun adquid icmiac, Ambi chiaid abimbo iquec, quequin tantiec utsibobëd tantiananquidquio nuqui nendac.

<sup>4</sup> Mimbi chiac utsi-utsiec Nuquin Papan chiacpadomboen nabanec tabadsho isash bëdambo iquebi. <sup>5</sup> Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. <sup>6</sup> Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquiec ma tabadpanuna.

### *Muaquin chuiquid*

<sup>7</sup> Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec. <sup>8</sup> Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. <sup>9</sup> Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabëd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadac bimboec tabadendac. <sup>10</sup> Esuquidistu Nuquin Papan Madombo nec, quequin chiesha chosho isun yuedenda. Adembidi, Bëdambo icta, quequin adquid chienda. <sup>11</sup> Adquid yuedquid ambi yuedaidbëd tan muaquin chuiquin ismequid nendac.

### *Ënquin chiaid*

<sup>12</sup> Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

<sup>13</sup> Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

## UANËN DADA UAIÐËMPI 3

### *Cayon naid chuiquin utsibon chiaid*

<sup>1</sup> Ëmbia Esuquidistu tantiondaidquoio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

<sup>2</sup> Mimbi Nuquin Papan chiaid tantiapadquieci min nami bédambo icpashun. Adem-bidi Nuquin Papan chiapadec tabadquin ismiac ma utsibobéd bédamboec tabadpanuna. <sup>3</sup> Mibéd icquidon nēmbō choshon naden chiochi. Esuquidistun chiapadomboen nabanec tabadquid Cayo nec, quequin chuibanoshi. Aden chiaid tantiabosh, Bédambo iquebi, quec tsadebi. <sup>4</sup> Mimbi chuibanac Esuquidistu tantiaquin muainquiocquin utsibon chuioaic, quequin chuisho tantiash bédambo iquebi, quec tsadebi. Ëmbi con mado caidēn bédamboen naid chuisho tantiash bédambo iquebi.

<sup>5</sup> Mimbi yuedaidon naden chiochi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chiochi. <sup>6</sup> Mimbi yuedshun nashunaid utsi-utsiec nēmbō choshon mimbi abi tantiaquin nashunaid nēmbocquido Esuquidistu tantiec iccuededquidobēdta chuibanoshi. Bédamboen mimbi naic. Adembidi nabanquin adquid mibēdi tabadash, Nidnu, qesho meneta ma buaneshun. Aido Nuquin Papan con bacuē caido ambi chuimiaidquoio nec. <sup>7</sup> Aido isadaidpembo chuinuec nidshun adquid yacno choshon Esuquidistu tantiesa nec quec ēbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiash mibi yacno puduedendac. <sup>8</sup> Esuquidistun chiaid tantiaquid icquin Esuquidistu tantiaquid ambi chuimiaido yuedtiad. Adoquin aidobēdtambi Esuquidistun nacpadomboen ismendac.

### *Diotedepesēn icsamboen naid*

<sup>9</sup> Mibéd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbéd icquidon chiaid tantiate bunesa nec. <sup>10</sup> Mibi yacno choshon Diotedepesēn muaquin chiaid mibéd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshēdmequid aidi nec.

### *Demetedio caid bédambocquid nec, quequin chiaid*

<sup>11</sup> Aidēn nacpadec icsainda, caimbi mibi. Nuquin Papan Icsaisanquoio chiapadomboen naquid aidēn con bacuē caid nec. Icsaquidēn nacpadomboen naquid Nuquin Papan chiaid tantienquoio yec tabadquid nendac. <sup>12</sup> Utsien Demetedio caid bédambocquid nec, quequin utsibon chiec. Abimbo chiec. Aidi Nuquin Papan chiapadomboen nabanec tabadquidquoio nec, quequin ëbéd icquidobēdtan chuioaimbi. Uanën chiaid abimbo iquec, quequin mibitedishun tantiendac.

### *Ënquin chiaid*

<sup>13</sup> Dadpen dada uatiadquiocquimbi daēdpactsēc dada uaombi. <sup>14</sup> Daēdec ushtanquin mimbi ispashuni. Mibi yacno nidash mibēdi onquendabi.

<sup>15</sup> Esuquidistun chiaid tantiaquid utsibéd bédamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nēmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanooata.

**Padi. Aided dada uaombi.**

## UDASËN DADA UAID

### *Tauamboen chiaid*

<sup>1</sup> Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquoio yanushe —quiash Esus mibi cudasec. <sup>2</sup> —Aido bédamboen isquin bédambo icme, Papa —quequin Nuquin Papa chianembi mibi tantiaquin.

### *Muaquido iquendac, quequin chiaid*

<sup>3</sup> Ëmbi tantiaido mibi neque. Tantia. Nuqui cuidmenquoio icnuec Esus abided cuidadec unësaid tantiateuidi mibi chuitiadquoio iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquoio chuisho: —Mua. Esusën chiaidpenquoio mimbi chiec. Aid tantiatipimbo iquebi —cata. Nuquin Papan tantiacpadomboen Esusën abëd icquido chuibanëdaid nuqui tantiaid neque. Utsi tantienda. <sup>4</sup> Esus tantiaquido mimbi danubi mibi icsamenuec mibi yacno muaquido puduedac caosh. Ambi ëndenquoio tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaido icsauidequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bédamboen isec —quec comapenec muaique. Muasho tantienda. Esuquidistu Nuquin Icho abentsëcshun chiaid niac-niaquec icsaïque.

<sup>5</sup> Adquid Nuquin Papan comapenen cuidendac. Tantia. Nuquin Papan cuidampid mimbi tantianëdaid mibi chuinu. Equipito yacnoshon unësmenuec ancanquidën icsamboen chonoa uasho isun ashunquoio Nuquin Papan con matses isadaidbo tsusedpabo puduamepampic. Adoac yuectanquin puduamiaidombi ambi chiaid niac-niacsho isun Nuquin Papan uesquin unës uapampic. <sup>6</sup> Adembidi utsibotsen cuidpampic. Abëd icpampido ambi abi yacnoshon uaido mayan chedo abëdtan namequido icboedobi Nuquin Papan chiaid niac-niacte buncuenash Nuquin Papabëd icte bunenquoio yampampic. Adec Satanas chedo abëd icte bunenquoio icsho isun puuentiapimbo yacno icsamboshë yacno Nuquin Papan nidmepampic. —¿Ada mibi bédambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic. <sup>7</sup> Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquoio chudnubi adembidi chidon aton bënëpenquoio chudmepampic. Dada aton dada utsibëdi chichudnanquidquoio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nëdëncapampic nibëdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anëdënquiacno nësecaindac —quequin nuqui tantiec.

### *Muaquido icsaid*

<sup>8</sup> Cuidte tantienquoio yec adecbidi muaquido icsamboecuidi tabadec. Aton dada utsibëdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. <sup>9</sup> Mayan bédabo chuiquid dapa Miqued caidën adotiapimbo icpampic. Aidi Moises unësacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquoio icpampic Miquedën. Adenquoio icquin: —Nuquin Papambien mibi cuiddec —capampic Miqued caidën mayan bédabo namequid dapa icquin. <sup>10</sup> Muaquidombien ambi tantienquoio yaid icsamboen chuishunec. ¿Ada



bëdi cuidnushe quepadic? Adembidi abi cuidte tantienquo icquin ambi tantiaiduidi naic tabadsho Nuquin Papan cuidendac.

<sup>11</sup> Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niac-tiadquo yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac.

<sup>12</sup> Muaquido icsambo iquec. Mibi icsametiadquien icchitec. Esus tantiaquidon pebedacno puduedshun mibëdtambi muaquidon piac caosh. —Esus tantiaquidquo nebi —quiash puduedash dacuëdenquo yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquo. Ambi naiduidi naquin ambembi chiaid chiac matses nadquo iquec. Uispa dadpen icboedi badiadnuc abu chëshën bëtinaçsho isash: —Tanunquien badiadec —queuidac bimboec matses iquec. Pete ambi nitsinaid unësacsho istuidash: —Pete nitsinuidombi —quiac bimboec muaquidon chuisho tantiaquido: —Bëdamboen chiaid tantianu —queuidendac. <sup>13</sup> Acte tēccuasquequidën cuëmano nushan uaquin icsa uac bimboen icsaquin muaquidon mibitsen icsamec. Abi capuaid tantienquo yequi: —Ëbi capuaid tantiaquidquo nebique. Isec cho —queboedi bēnuidtaniac bimboen: —Nuquin Papan chiaid tantiamequidquo nebi —queboedëmbi tantiamenquo iquec. Adec muasho cuidquin Nuquin Papan puuenti-apimbo yacno icsamboshë yacno nidmendac.

<sup>14</sup> Adquido con tsusedpa Enoc caidën chuipampic. Abia matses uaid Adanën madon baban tishmiadën baba Enoc nepampic. Naden chuipampic. “Nuquin Papan abi yacnoshon uaid mayan bëdabo dadpenquioshë Nuquin Icbobëd choendac. <sup>15</sup> ‘¿Ada mibi bëdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. <sup>16</sup> Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquiëc. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquo mibi nec —quec muaic.

### *Esus tantiaquionona, quiaid*

<sup>17</sup> Ëmbi tantiaido mibi neque. Tantia. Esusbëd iccondaidon chiaid mibi chuinu.

<sup>18</sup> Nadpondash. “Esus padpidec choabi icnuc Nuquin Papan chiacpadec bëdamboec tabadsho Esus tantiesabon mamënshunendac. Nuquin Papan chiaid niac-niaquec abi bunacpadec icsaquiendac,” quepondash. <sup>19</sup> Adquido muaquido iquec. Aton padi yec icsaiqui chieshëmënquin mibi cuësh-cuëshëdmec. Nuquin Papan aton Mayan aidobëd tabadmenquo iquec.

<sup>20</sup> Adquid icsacpadec icsainquo icquin Esus tantiatsëchoedëmbi Nuquin Papan chiaid isban-isbanquin ënenquo icquin Esusbëdta Nuquin Papa tantianuna. Nuquin Papan Mayanën tantiamiacpadomboen Nuquin Papa chianenuna. <sup>21</sup> —Abi tantiasho bëdamboen isquin abi yacno Esusën nuqui tabadmendac —queshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. <sup>22</sup> Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantias: —¿Abimbobida capeba? —quesho tantiasahun nëshenquo icquin Nuquin Papan chiaidquo tantiamenuna. <sup>23</sup> Bacuëmpi cuëten pichiquetsensho: —Baded bed. Tavidnushe —quiac bimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen

icsamane –quiash aido icsacpadec icsainda. <sup>24</sup> Nuquin Papa bēdamboshē iquec. Aid tantiasho nuqui icsamenquo iquendac. Adshumbic: –Icsambo mibi iquec –utsibo quetiapimbo icnuc bēdambo icmeshun bēdamboshē yacno abēdi nuqui tabadmendac. Adoac nuqui cuishonquendac. <sup>25</sup> Aden tantiaquin nadonona. –Abipadquid utsi nibēdnuc abentsēcquiobi Nuquin Papa iquec. Nuquin Icbo Esusded cuidshun abi tantiaquido cuidenquo icquid nec. Abitedishun Icbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bēdamboshē iquec –canuna ēnenquo icquin. Esus tantiaquido icquin adonona. Padi. Aidedi chuiquin dada uaombi.

## ESUSËN UAN ISMIAID

### *Nëidba chuiquin Uanën dada uaid*

<sup>1</sup> Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. <sup>2</sup> Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. <sup>3</sup> Nëid dada uaid tantiaash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

### *Esus tantiaquidon iste dada uaid*

<sup>4</sup> Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. <sup>5</sup> Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemiaidquio nec. Adquid yec abitedishun Icbombo nec. Ambiuidsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. <sup>6</sup> Abi tantiaasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. <sup>7</sup> Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

<sup>8</sup> Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

### *Dacuëdampamboecnuc Esusën ismiaid*

<sup>9</sup> Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiaasho Esus tantiesabon chieshëmpondashi. Adoac Esusën namiacpadec chieshtoenquio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. <sup>10</sup> Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacimboec comapenec onquesho tantiapombi. Ushenquio icquimbi ushquin isacimboen tantiombi. <sup>11</sup> Naden chuiposhi. —Nëbi mibi dadpen ismenu. Adoac ëmbi

ismeboedtedi dada uabanta. Nèidtedishun iste dada uata. Nèidic shubu dadpen icquid Epeso caid yacnocquidon. Nèidic shubu dadpen icquid Esmidina caid yacnocquidon. Nèidic shubu dadpen icquid Pedcamo caid yacnocquidon. Nèidic shubu dadpen icquid Tiatida caid yacnocquidon. Nèidic shubu dadpen icquid Sadis caid yacnocquidon. Nèidic shubu dadpen icquid Pidadepia caid yacnocquidon. Nèidic shubu dadpen icquid Daudiseya caid yacnocquidon. Aidedishun iste dada uashun buame –quequin comapenec onquequin chuiposhi.

<sup>12</sup> Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaidquio neposh. <sup>13</sup> Aid nënantanquio Esusquio icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacquid dapambo icposh. <sup>14</sup> –Icsaisambo nec –camenuc aton mapi aton manëdaidbëdi abu ushubimboec ushumboshë icposh. –Matsesën naidtedi tantiaquidquio nec –camenuc cuëte isquidbimboec aton ëshë isquid-isquidquio icposh. <sup>15</sup> –Utsin: “Ëmbiquen abitedi namenu,” catiapimbo icnuc abitedimbo namequid nec –camenuc shocosh piu nacnenaidbimboec nac-nacquio aton taë icposh. –Nuquin Papapadquidquio nec –camenuc acte chododoquiabimboec comapenec onqueposh. <sup>16</sup> Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. –Matses icsaid cuidquidquio nec –camenuc adposh. Aton bëtantete ushëbimboec bëchamauanquiecposh. –Bëdambo icquidquio nec –camenuc ad icposh.

<sup>17</sup> Dacuëdampamboecsho istanequini Esusën dayumbi uebudpaccoc unësaniabimboec padishec. Adshobini Esusën camishquin bëdameposh. –Dacuëdenda. Nuquin Papapadquidquio nebi. Nidaid uabi yec ictenedi nëbi adquid yec nibëdantiapimbo icquidquio nebi. Adquid yec abitedishun Icbombo nebi. <sup>18</sup> Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac –queposh Esus.

<sup>19</sup> Adashic abi onquec: –Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. <sup>20</sup> Tanta. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi –quequin aden ismeposhi Esusën.

## 2

### *Epeso yacnocquido Esusën chiaid*

<sup>1</sup> Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. –Ëbi tantiaquido chuibanquidën Icho yec ëbi tantiaquidobëd iquebi –quequin aden ismeposhi. Adshumbic naden chuiposhi. –Epeso yacnocquidon ëbi tantiaquidon iste ëmbi naden chuiboed dada uata. “Tanta, Epeso yacnocquido. Mibitedi chuinu. <sup>2</sup> Mimbi naidtedi tantiaquid nebi. Dayacquio icquin ëmbi chiacpadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Ëbi tantiaquido icsamenuen chiec: ‘Esusën namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquio mimbi chuibanoque. Utsibo chienda,’ quequin mimbi aidon chiaid tantienquio iccoco. Aden mimbi bëdamboen naoc. <sup>3</sup> Adembidi utsibon chieshënaqui chieshtoenquio icquin Nuquin Papan chiaidbëdta ëmbi naid mimbi chuibanoc.

<sup>4</sup> Aden bēdamboen nasho isun mibi icsaid abentsēc chuitsēcnu. Tauamboen mimbi ēbi tantiaquiopadenec. Aden ēbi tantiaquidquo icquin mimbi utsibotsen tantiaquiopadenec. Adodenedēmbi pacuēnēdācbimboen ēbi bēdiactsēc tantiatsēcquin utsibotsen mimbi bēdiactsēc bīdi tantiatsec. Adec mibi icsacuededec. <sup>5</sup> Ēmbi chuiboed tantiash: ‘Ai, abimbo caic. Tauamboen Esus tantiaquiondaidi nēbimbi bēdiactsēc tantiatec. Adchitequini icsaoc,’ queshun tauamboen mimbi naondacpadomboen ēbi tantiaquiota. Adembīdi utsibotsen tantiaquiota. Adoenquo icschoembi mibi yacnoshon ēmbi chiaid mibi chuibanquid nibēdmendac. Adnuc ēbi tantiec cuēdēnuēc mibi puduedpuduedenquo ictsīandac. <sup>6</sup> Mibi icsaid ēnquin chiombi. Nēbi mimbi naid utsitsen isash bēdambo iccobi. Mibi cuēdēnacno puduedshun nicodaitabon mibi icsamenuen icsamboen chuisho tantiashun: ‘Aido icsamboshē iquec,’ mimbi caoc. Adembīdi aido bēdamboen istiapimbo icoaibi. <sup>7</sup> Nēbi ēbi tantiaquido utsibo chuīnu. Ēmbi Epeso yacnocquido chuībocpadomboen con Mayanēn mibitsen tantiametsiashe. Pabiate cuembo icquin ēmbi chiaid tantiata. Satanasēn: ‘Icsamenu,’ caqui chieshtoenquo icquin ēbi tantiasho Nuquin Papa yacno ēbēdi tabadmendambi. Tauamboen matses uashun Nuquin Papan aid dada tsadacno tied bēdamboshē yacno tied nēnantan icquid cuēte matses unēstiapimbo icquid icmete icmepampic. Aid cuēte bacuē meniācbimboecnuc mibi padpīdec unēsenquo icnuc ēbēdi tabadmendambi,” quequin ēmbi chuiboed dada uata —quequin Esusën chuiposhi.

#### *Esmidina yacnocquido Esusën chiaid*

<sup>8</sup> Adshumbic Esusën padpīden chuīaposhi. Aid nidaid uabi yec icpampidi nēbi adquid yec nibēdantiapimbo icquid nec. Adquid yec abitedishun Icbombo icshobi chieshēmēnquidon unēs uacsho chococaqui uincuempaccondash. Adondaaid yec unēsaid uincuemquidquo nec. Aidēn naden chuiposhi. —Esmidina yacnocquidon ēbi tantiaquidon iste ēmbi naden chuiboed dada uata. “Tantia, Esmidina yacnocquido. Mibītedi chuīnu. <sup>9</sup> Ēbi tantiaquido icsho utsibon chieshēnac mimbi dayun uaid nibēdquīendac. Nēbi mitsana nibēdquid yequi con Pa yacnuēsh dadpen dayun uaquidbimboec mibi bēdamboshē iquendac. Chieshēmēnquidon mibi icsamboen chuishumboedtsen tantiēmbi. Mibi yacnoshon Satanasēn namiāc: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasēn yuaboen nec. <sup>10</sup> Aido tantiash: ‘Ashibi mēyampatsiashe,’ quec dacuēdēnda. Satanasēn: ‘¿Ada Esus tantiaquido chieshtoenquo ictsiashe? Tanu,’ quequin namiācpadomboen chieshēmēnquidon mibi utsi-utsien quēnēn nauedbanēndac. Adoac daēdpactsēc ushec mibi mēyadēndac. Puduenabi yec chieshtoēnda. Chieshēmēnquidon: ‘Esus tantiaquido icsho mibi cuesunenu,’ caqui chieshtoēnda. Aidon cuesuniācsho mibi Nuquin Papa yacno puduedmeshun ēbēdi tabadmendambi. <sup>11</sup> Nēbi ēbi tantiaquido utsibotsen chuīnu. Ēmbi Esmidina yacnocquido chuībocpadomboen con Mayanēn mibitsen tantiametsiashe. Pabiate cuembo icquin ēmbi chiaid tantiata. Chieshtoenquo icquin ēbi tantiasho isun icsaido cuidquīacno nēsecainquo iquēndambi,” quequin ēmbi chuiboed dada uata —quequin chuiposhi Esusën.

#### *Pedcamo yacnocquido Esusën chiaid*

<sup>12</sup> Adoshombic ana shēcuēnuēsh chēshte cuēnumboshē icquid cueshqueboedēn Esusën naden chuīaposhi. —Pedcamo yacnocquidon ēbi tantiaquidon iste ēmbi naden chuīboed dada uata. “Tantia, Pedcamo yacnocquido. Mibītedi chuīnu. <sup>13</sup> Mibi yacno Satanasēn yuabo dadpen icnuc ēbi tantiec mibi chieshtoenquo iquec. Ēnden Satanasēn namiāc mibi yacnoshon chieshēmēnquidon con yua Antīpas caid cuesunēpondash. Aidēn chieshtoenquo icquin ēmbi naid chuībansho cuesuniācsho isumbic adembīdi chieshtoenquo icquin mimbi ēbi tantiaquiopondac. Aden mimbi bēdamboen naid tantiēmbi.



<sup>14</sup> Adondaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. <sup>15</sup> Adec nicadaitabo caido ëbi tantiate shubun puduedash mibëdi cuëdëncuededec icsamiantë bumpec. <sup>16</sup> Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuëdëncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacbimboen mibi cuidtsiambique. <sup>17</sup> Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquio icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquio yec ëbi yacno puduedtequid nec,’ qeshun cuënote ushu menendambi. Abi cuëmëdquid icnubi utsi uain cuënquin aid cuënoten dada uatanquin menendambi. ‘Ëmbi meneboedënuidtsëqui ma isnu,’ quequin adoendambi,” quequin ëmbi Pedcamo yacnocquido chuiboed dada uata –quequin chuiposhi Esusën.

#### *Tiatida yacnocquido Esusën chiaid*

<sup>18</sup> Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquio yequi aton taë shocosh piubimboec nac-nacpambo icposh. – Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec –camenuc adquio isadquidën naden chuiposhi. –Tiatida yacnocquidon ëbi tantiaquidon iste ëmbi naden chuiboed dada uata. <sup>19</sup> “Tantia, Tiatida yacnocquido. Mibitedi chuinu. Mimbi naid abitedi tantiembi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiash,’ quequin chieshtoenquio icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquio icquin ëbi tantiapec. Tauamboen ëbi tantiaquin daëdpactsëc naondaiddi nëbi ëbi tantiaquioshon ëmbi chiacpadomboen mimbi dadpen naic.

<sup>20</sup> Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquio yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuinu,’ quequin abi bunaidquidquio chuibanosh. Adoac ëbi bëdiactsëc tantiauidtsëcboedi aidën chiacpadec icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuëdedquimbi aton chidopenquio chudbededposh. <sup>21</sup> Adsho isun aid chido: ‘Ma abi icsaid ënu,’ qeshun badedquio cuidenquio iccombi. Adoboqui abi icsaid ënte bunenquio iccosh. <sup>22</sup> Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquieci aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquio ictsiac. <sup>23</sup> Aid chido cuidquioquimbi aton bacuëbobimboecquido aidën chiacpadomboen naquid ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: ‘Matsesën otacquio tantiaid tantiaquidquio Esus nec. Adquid

icquin abi icsaid ënenquo icquido cuidquin abi tantiaquido bëdambo icmendac,' quequin tantiatsiash.

<sup>24</sup> Tanta. Ambocquido ëbi tantiaquidombotsen chuinu. Aden Satanasën chuimi-aidën chuisho: 'Aden chuisho tantiatiapimbo iquebi,' mimbi capoc. Aden bëdamboen nasho isun utsi chienquo iquembi. <sup>25</sup> Nëiduidtsëqui chuinu. Mimbi bëdamboen nabocpadomboen chieshtoenquo icquin ëbi tantiata. Ëbi choabi yacpadembi adota. <sup>26</sup> Choshombimbi chieshtoenquo icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. <sup>27</sup> Aden Nuquin Papan aido ëbëdta chuiquid dapa icmiacsho utsibon: 'Dëniacquin ëmbiquen nanu,' catiapimbo iquendac. Ëbi chieshënquido: 'Esus dëniacquin ëmbiquen matses namenu,' qesho tantiashun matsu nacnenquidën ambi nacnenaid icsambo icsho isun pos-posacimboen cuidquiendambi. <sup>28</sup> Badiadte anoentsëc uispa dapa choded-chodedbocpadquiec ënëdenquo yec ëbi tantiaquidobëd iquendabi. <sup>29</sup> Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiata. Chieshtoenquo icquin ëbi tantiasho adembidi bëdambo icmendambi," quequin ëmbi chuiboed dada uata —quequin chuiposhi Esusën.

### 3

#### *Sadis yacnocquido Esusën chiaid*

<sup>1</sup> Adoshombic Nuquin Papan Mayan abi tantiaquidobëd tabadmequidquo icquin Esusën padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. "Tanta, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: 'Bëdambo icquido nec,' mibi canubi ëmbien adotiapimbo iquec. Mibi bëdapenquo iquec. Unësacimboen mimbi ëbi bëdamboen tantienquo iquec. <sup>2</sup> Isucunacimboen ëbi padpiden tantiaquiota. Nuquin Papan chiacpadomboen mimbi nauidtsëccoque. Mimbi ëbi tantienquo iqueque. 'Nuquin Papan chiacpadquiec bëdamboec tabadnuna. Esus tantiaquionona,' cananta. <sup>3</sup> Mimbi ëbi tantiabenondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenquo yacimboen ëbi tantienquo icshoembi mibi cuidendac. 'Ampequid choec,' quequin tantienquo yacimboen ëmbi cuidte tantienquo icsho mibi cuidtsiambique. Ëbi tantiaquiota.

<sup>4</sup> Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacimboec icsainquo yec bëdamboec tabadec. Adec bëchish ucudacimboec abi icsaid ënash bëdamboec tabadsho isun ëbëdi tabadmequin icsaisa icmendambi. <sup>5</sup> Ëbi tantiaquido utsibotsen chuinu. Ëmbi chuibocpadquidën chieshtoenquo icquin ëbi tantiasho adembidi bëdamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. 'Aido ëbi tantiaquidotedi neque. Nuquibëd tabadmenuna,' quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquo yacimboen bëshunenquo icquin ëbëdi tabadtequido abitedi tantiembi. <sup>6</sup> Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi," quequin ëmbi chuiboed dada uata —quequin Esusën chuiposhi.

#### *Pidadepia yacnocquido Esusën chiaid*

<sup>7</sup> Adoshombic icsaisambo icquin ambi chiacpadomboen naquidënquo Esusën padpiden chuiposhi. Con tsusedpa Dabid yampicpadquid matses namequidquo yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata. <sup>8</sup> “Tantia, Pidadepia yacnocquido. Mibitedi chuinu. Mimbi naid tantiembi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquo icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. <sup>9</sup> Aden isadaidbon mibi ëmetiadquido iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno chochosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. <sup>10</sup> Ëmbi chiacpadec chieshtoenquo icquin ëbi tantiasho isash mibi cudasendabi. ‘¿Ada Esus tantienquo yantsiashe? Tanu,’ qeshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquo icquid icmendambi.

<sup>11</sup> Tantia. Nëbi choendabi. Utsibon chieshënaqui mibi icbocpadquiec chieshtoenquo yec bëdamboec tabadta. ‘Ëbi adenquo icsho isun Esusën abi yacno puduedmenquo ictsiashi,’ quiash bëdamboec tabadta. <sup>12</sup> Aden chieshtoenquo icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yachimboecnuc con shubun icquido mibi icmendambi auëshquo cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adem-bidi abitedi ismequin: ‘Con Pabëdtan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. <sup>13</sup> Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiaata. Chieshtoenquo icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

### *Daudiseya yacnocquido Esusën chiaid*

<sup>14</sup> Adoshombic abitedishun naid tantiaquin abimbo chuiquidënquo Esusën padpiden chuoaposhi. Nidaidbëdta abitedi uaquidënquo abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. <sup>15</sup> Mimbi naid tantiembi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bëdamboen tantiaquidon adopendactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiasahun: ‘Dayacquio yachimboen ëbi tantiaquiopashun,’ caimbi mibi. <sup>16</sup> Mibi adec chieshtonoc ëbitsen chieshtotiadquido iquebi. ‘Cacumiachimboen Nuquin Papa yacno ëbëdi mibi tabadmenquo iquendambi,’ mibi catiadquido icchitebi. <sup>17</sup> ‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquo yec bëdambo iquebi,’ mibi quepoc. ‘Esus tantienquo yec Nuquin Papabëd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubi-uatiadquido iquebi. Bëchish ucabi yachimboen mibi icsaid ënabi icsho mibi bëdamboen istiapimbo iquebi. Pacuënëdacimboen ëbi tantienquo mimbi iquec. <sup>18</sup> Adboedëmbi Nuquin Papabëd tabadte bunquin ëbi tantiaquiota. Ëbi tantiaquin bëchish ucachimboen mibi icsaid ënta. Adsho icsaisabimboecnuc mibi bëdamboen isquin ëbëdi tabadtequid

icmetsiambique. Pacuënëdaid paposhquiabimboecnuc ëmbi naid mibi bëdamboen tantiametsiambique. Ëbi tantiata.

<sup>19</sup> Ëmbi tantiaindo bëdamboen tantiamembi. Aton papan: ‘Padi, mibi icsambo iquec,’ quequin bacuë ëmiabimboen ëbi tantiaquido icsasho isun ambi naid ëmenuequin nati-ambo icmendambi. Ëbi tantiaquin mimbi icsamboen naid ënash bëdamboec tabadta. <sup>20</sup> Mibi tantiaquiembrie. ‘Ëbi tantiata,’ ëmbi cac mibi: ‘Ai,’ qesho tantiash mibëd iquendabi. Pec tabadec bëisnauquiabimboec mibëd iquendabi. <sup>21</sup> Tanta. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi. <sup>22</sup> Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuiboed dada uata –quequin chuiposhi Esusën.

## 4

### *Nuquin Papa Uanën isaid*

<sup>1</sup> Asia yacnocquido Esusën ëmbudquin chuibon abuc ispombi. Adshun isquien shëcuë shëcniabimboec isadpec. Adnubien chuibocpadquiec shoncacimboec comapenec on-queoaposh. –Nëmbo cho. “Nadquid iquendac. Nadotsiandac,” quequin mibi dadpen ismenu –caposhi.

<sup>2</sup> Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec. <sup>3</sup> –Chuiquid dapa abentsëcquiobi nec. Bëdamboshë iquec –camenuc matses bunaidquo casëdubimboec nac-nacquio yec piumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. –Bëdamboshë icquidquo nec –camenuc adquo icposh. <sup>4</sup> Nuquin Papa nënantan icnuc abi dacuenadec matses tsusiobo Esus tantiaquido chuiquid 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaindo yec ushumboshë icquidquo dasiuidcuededposh. Chuiquid dapan mauetempo shocosh nacnenaidquo maecuededposh. <sup>5</sup> Adnubien Nuquin Papa yacnuësh abubimboec bed-bedquetanenubien abu tesquianiacimboec cuëdtoposh. –Abitedishun Icbombo nec –camenuc adec cuëdtoposh. Nuquin Papan bëntsiaucquo tabote taboaid 7tedi icnuc tabëcaid icposh. –Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic –camenuen aden ismeposhi. <sup>6</sup> Bëntsiaucbidi actepenquo chian dapa acte-actetsëcquo isadposh.

Nuquin Papa tsadaid anoen daëdtsëcquo abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquo. Abimbouidquo istequidquo icposh. Cachoc icnubi tachiduc adquiobidi icposh. <sup>7</sup> Abentsëc bëdi dapambo tëbucquidbimboec icposh. Utsibic baca bënëbimboec isadposh. Utsibic mat-sesën bëtantetebimboec bëisadposh. Utsibic chiqui dapabimboec isadposh. <sup>8</sup> Icbo-icboec aton podo uicchunën podobimboec 6tedi icposh. Podonotsen adquiobidi ëshëuidquo isadposh. Podo ananquo adquiobidi icposh. Aidonquiobi ënenquo icquin Nuquin Papa chuiposh nadec cuëdënuin.

–Icsaisambo yec bëdamboshë icquidquo mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquo mibi icnuc mimbi tantiacmaid nibëdec.



Matses uabi yec icpampidi mibi nec. Nëbi adquid yec mibi nibëdantiapimbo icquidquo nec

—quec badiadquidën badiadquidënquiecu cuëdënashic inchëshëntsen cuëdëdeneposh.

<sup>9</sup> Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsiash, Papa — Nuquin Papa cadonenubi <sup>10</sup> tsusiobo 24ted icquido ambo tabadquido danëshën tinquebudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbi aidontsen Nuquin Papa chuiposh nadec cuëdënquin.

<sup>11</sup> —Mibi bëdamboshë iquec, Papa. Adembidi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquo mibi nec.

Comapenen tantiaquidquo icquin mimbi abitedimbo uapampic.

Mimbi tantiacpadomboen mimbiuidtsëcquiobi abitedi uapampic.

Adoac mimbi tantiacpadequi mimbi uaido nibëdanabi yec abi iquec.

—quec tsusiobo cuëdëncuededposh.

## 5

### *Nuquin Papan chiacpadomboen namequid Esus isadaid*

<sup>1</sup> Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitacatempin bitaccabanaid neposh. <sup>2</sup> Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitacaid chicbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. <sup>3</sup> Adoquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidtedi dada uaid bedshun bitaccaid chicbanquin istequid nibëdposh. <sup>4</sup> Adsho isashini unësqiuo icnuc shubipoc: —Aid dada uaid bedshun chicbanquin chuibanquid nibëdec —quiash. <sup>5</sup> Adshobini anocquid tsusion: —Otac. Shubienda. Ënëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

<sup>6</sup> Adoac isquien isadaidbon Nuquin Papa cuidmenquio icnuen abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunuec abided cuidadec unësaid Esusquio nec —camenuc adec isadposh. Ut-sibo dacuenadec tabadnuc nënantanquio Nuquin Papabëdquio icposh. Anointsëqui dadanobi ëshëcquido dacuenadec tabadnuc abi uquëtsëc tsusiobuidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbo aidtedquibidi icposh. —Abitedishun Icbombo yec utsin dëniacadiapimbo icquid Esusquio nec —camenuen aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec —camenuen ëshë 7tedi ismeposhi ushquin isacbimboecnuc. <sup>7</sup> Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. <sup>8</sup> Bedsho istanequien dadanobi ëshëcquidobëd



tsusiobo 24ted icquido Esus ismec danëshën tinquebudcuededposh. —Bëdamboshë icquidquio mibi nec —quiash adcuededposh. Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi tentencamequin Nuquin Papa cuishoncamiacimboec Esus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidacimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. <sup>9</sup> Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquio icnuec mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

<sup>10</sup> Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

—quec cuëdëncuededposh tsusiobo.

<sup>11</sup> Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquiduidquio dacuenadec tabadposh. Abi uquëcstëc dacuenadec tsusioboidquio tabadposh. Aid uquëcstëc dacuenadequic mayan bëdaboidquio tabadposh. <sup>12</sup> Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidacimboec matses icsaid bedshunuec abided cuidadec Esus unëspondash.

Esusquio bëdamboshë icquidquio nec.

Adquid icsho: “Abitedishun Icbo icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bëdamboshë iquec. Mibi tantiaquiembi,” abitedishun capashun

—quec cuëdëncuededposh mayan bëdabo Esus tantiec.

<sup>13</sup> Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bëdamboshë iquec. Obeca bacuëbimboecquid abided cuidadec unësaid Esustsen bëdamboshë iquec,” canuna, ënenquio icquin.

“Abiuidtsëqui Nuquin Icbo nec. Utsi adquid ictiapimbo iquec.

Aidën nac nuqui bëdamboshë iquec.

Abipadquid utsi nibëdec,” canuna ënenquio icquin

—quec cuëdëncuededposh abitedimbo.

<sup>14</sup> Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bëdamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

## 6

### *Bitaccaid chicaid chiaid*

<sup>1</sup> Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacimboec comapenec cuëdquin: —Cho —caposh. <sup>2</sup> Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënquido uesquin cuesun secaquidquio mibi nec —quetanquin chuiquid dapan mauetempo mauemeposh. Adoac adecbidi abi chieshënquido cuesun secanuec nidposh.

<sup>3</sup> Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac <sup>4</sup> cabayo piumbo icquid catsadec dada choposh. —Mates cuesun secananenquio icsho Nuquin Papan tantiacpadomboen aidën nac mates abitedimbo mates utsibobëd cuesun secananendac —qeshun chështe dapa mates siante dapa meneposh. Adomboen Nuquin Papan mates cuidte tantiameposhi.

<sup>5</sup> Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. <sup>6</sup> Adnubien dadanobi ëshëcquido dacuenadec tabadnuc nënantanshunquio Nuquin Papan cabayo chëshëmbo icquid catsadquid chuiquid. —Pucquid dadpenquio meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiquid. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquio icquin nata —quequin chuiquid. —Nuquin Papan cuidac adec pete nibëdnuc mates pete bunquiendac —quequin cuidte utsi aden ismeposhi.

<sup>7</sup> Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac <sup>8</sup> cabayo bëdiactsëc ushu-ushupactsëcquid catsadec dada choposh. —Aid mates unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen mates cuidquin mates dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

<sup>9</sup> Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquio icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. <sup>10</sup> Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquio mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ¿tedectsicshun mimbi cuidpe? —caquin chuidoneposh. <sup>11</sup> Adoaquien: —Chiata. Yuec-yuecpactsëcshun naindambi. Min utsi-bobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmembi —qeshun abitiombi dasiuidbudte ushumbo icquid dasiuidbamposh.

<sup>12</sup> Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh. <sup>13</sup> Uispabic natiambo cunquenec cuëte bacuë tididiquiacimboec nidaidën tididieposh. <sup>14</sup> Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. <sup>15</sup> Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. <sup>16</sup> Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusëntsen cuidnushe. <sup>17</sup> Aidon ambi tantiacpadënquiobini nëbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

## 7

### *Isadaidbo Nuquin Papa tantiaquidombo bësiaid*

<sup>1</sup> Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenec icsa uanushe —qeshun adoposh. <sup>2</sup> Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. <sup>3</sup> —Chiata. “Nidaid yec acte yec cuëte yec quenec icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

<sup>4</sup> Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. <sup>5</sup> Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. <sup>6</sup> Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. <sup>7</sup> Nëidic Acobon madobidi Simeyon caidën matses tsyuecquido aidtedquiobidi. Nëidic Acobon madobidi Debi caidën matses tsyuecquido aidtedquiobidi. Nëidic Acobon madobidi Isacad caidën matses tsyuecquido aidtedquiobidi. <sup>8</sup> Nëidic Acobon madobidi Sabadon caidën matses tsyuecquido aidtedquiobidi. Nëidic Acobon madobidi Ose caidën matses tsyuecquido aidtedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquendac —quequin adoposhi.

*Esus tantiaquido Nuquin Papa yacno tabadaid*

<sup>9</sup> Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nëidic nidaid utsi-utsiec yacno tabadquido. Nëidic matses utsibo. Nëidic matsesquïo. Aidtedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesën chuiquid dapa ismiac bimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. <sup>10</sup> Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidac bimboen aton Mado Esused cuidpanëdash.

Adoac nuqui icsaid bedshunuec abided ciudadec unëspondash Esus.

Aid tantiasho icsaido cuidacno nidmenquïo icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

<sup>11</sup> Adsho tantiash ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquïo Nuquin Papabëd Esus tabadnuc abi uquëtsëc dacuenadec dadanobi ëshëcquido 4tedi icquiduidquïo tabadposh. Abi uquëtsëc dacuenadec tsusiobo 24tedi icquiduidquïo tabadnuc abi uquëtsëc dacuenadequic mayan bëdabouidquïo tabadposh. <sup>12</sup> Aid mayan bëdabotedi danëshën tinquebudcuededequic comapenec cuëdëncuededposh.

—Aden abi tantiaquido abëdi tabadmequid bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquïo icnuc ambi tantiacmaid utsi nibëdec.

Aiduidtsëqui bëdamboen tantiaquidquïo nec.

Aidën nashunac bëdamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bëdamboshë iquec,” canuna

—quecuededposh mayan bëdabotedi.

<sup>13</sup> Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuëshquïo aido chosh? —cac: <sup>14</sup> —Tsaudi, tsusio. Mimbibien tantiec —capombi. Adsho tantiash: —Tantia. Mibi chuïnu. Satanasën: “¿Ada chieshtoenquïo ictshashe? Tanu,” queshun natiamboshë icmiac Esus tantiec chieshtoenquïo ictenedo nec. Adec chieshtoenquïo icsho isun Satanasën tantiacpadomboen chieshëmëncquïdon unës uapondash. Abided ciudadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. <sup>15</sup> Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquïo icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” queshun abëdi tabadmequin bëdamboen dayun uaic. <sup>16-17</sup> Isadaidbo matsesën nëish yua obeca dadpen dayun uacpaden abided ciudadec unësaidën Esusën abi tantiaquido bëdamboenshë dayun uaindac padpidec unëstiapimbo icnuc. Adoac pete bunenquïo iquendac. Actetsen bundoenquïo iquendac. Abi yacnuësh ushën pichiquenquïo iquendac. Chun mëyadenquïo iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquiec iquendac. Unësquïo icmiantë nibëdquiec iquendac. Bacuë shubisho anin bëucquin



bëdambo icmiachimboen abi yacnoshon Nuquin Papan Esus tantiaquido bëdambouidquio icmendac —quequin chuibamposhi tsusion.

## 8

### *Dada uaid bitaccaid nainquin chicaid*

<sup>1</sup> Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpectsëc otacquio tantiec tabadposh. <sup>2</sup> Adnubien Nuquin Papan abi yacnoshon uaido mayan bëdabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. <sup>3</sup> Adnubien mayan bëda utsi ambobidi choposh. Choash bëdambo nuadquid tauinuequin shocosh nacnenaid tauite dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: —Nëid tauiac pushudquid Nuquin Papa yacno nidacbimboec Esus tantiaquidon chianiaid iquec —quequin bëdambo nuadquid sanshun tauite nacnenaid dapan tauiposh bëdambo nuadnuc. <sup>4</sup> Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiashun Nuquin Papan abi tantiaquido chieshënquido cuidendac —quequin aden ismeposhi. <sup>5</sup> Adshumbic aid mayan bëdan tauite dapan samëdquid cuëte dëtsisadaid isquidquio icquid bedshun shocoshëmpin sandoposh. Aden sandotanquimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiachimboec cuëdtoposh. Adnubien nidaid abichobi saca-sacaquemboec uëdëqueposh. —“Nuquin Papan ëbi chieshënquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

### *Shoncate shoncaquin ismiaid*

<sup>6</sup> Matses tabadacno cuëte dëtsisadaid isquidquio icquid masiabudnubien shoncate bedboedon mayan bëdabon shoncanuen sanamposh. <sup>7</sup> Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid yec intac yec quenuc chomeposh ue dapa choacbimboecnuc. Aden chomiaidën nidaid nuamboshë taidposh. Cuëte dadpenquioshë taidposh. Uasin dadpenquioshë pichiqueposh.

<sup>8</sup> Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. <sup>9</sup> Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

<sup>10</sup> Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. <sup>11</sup> Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

<sup>12</sup> Adnubien mayan bëda utsin shoncaposh 3tedishun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactsëcquio chënquiansëccosh.

<sup>13</sup> —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuempsh. —Esus tantiesabo Nuquin Papan cuidtequido tantiac unësqioshë iquec. Shoncabi icboedon mayan bëda utsin



3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

## 9

### *Mayan bëda utsin shoncanuc isaid*

<sup>1</sup> Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempo meneposh. Podobitsi icsabo uidën uacno nidaid shëcuë uquëducquio icquid bëtashte chichte neposh. <sup>2</sup> Aid chictempin chicaquien uquëducquësh tied nëdënquedoachipamboec pushudtoposh. Abuc inchëshquio pushudquid icnuc ushë isadenquio icposh. <sup>3</sup> Adsho isaquien pushudacnuëshquio tsectsecbiecquid dadpenquioshë cho-choposh. Chichumbimboec sianquidquio niosh. <sup>4</sup> Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquiduidquio sebudneta —quequin chuiposh. <sup>5</sup> Adshumbic: —Unësnu seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsecbiecquidën sebudnequin ismeposhi. <sup>6</sup> Aid tsectsecbiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

<sup>7</sup> Aden tsectsecbiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsecbiecquid isadposh. Shocosh mauetebimboecquid mauecuededposh. Matsesën bëtantetembobi bëisadposh. <sup>8</sup> Chidon tëbucshumbimboec isadposh. Bëdin shëtabimboec aton shëta icposh. <sup>9</sup> Bëntsiauc shicdiadquid cudaste shocosh nacnenaibimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. <sup>10</sup> Aid tsectsecbiecquid chishpichoquid yec chichumbimboec sianquidquio neposh. Inchëshën ushë 5tedi nidmequin adquidën dadpenhun natiamboshë icnuc matses sebudneposh. <sup>11</sup> Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

<sup>12</sup> —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

### *Chiqui dapan chuiboed utsi*

<sup>13</sup> Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiauc tsadunaid yacnuëshquio onquedosh tantiombi. <sup>14</sup> Adec onquequidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. <sup>15</sup> Aden chuitanac aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. <sup>16</sup> Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

<sup>17</sup> Èmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo

yec choposh. Cachinan bacuë pisenaid nuadacimboec asupede caid icsamboshë nuadposh. <sup>18</sup> Adshumbien ana shëcuënuësh choaidën matses dadpenquioshë cuesun secabudneposh. <sup>19</sup> Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

<sup>20</sup> Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Ëntiadquidi abi icsaquioposh. Nuquin Papa tantienquio icquin podobitsi icsabo tantiaquin ëntiapimbo icposh. Adembidi ambibi nacnenaïd ambi papa caid ënenquio icquin tantiaposh. Utsibon shocosh nacnenaïd tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaïd anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacnenaïduidi tantiaposh. <sup>21</sup> Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquio chudquidombic adembi utsi chudshumbededposh. Adembidi aton bënëpenquio chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ëbi icsaid ënu —quetiadquidobi adenquio icposh.

## 10

### *Mayan bëdan dada uaidëmpi pemiaid*

<sup>1</sup> Cabayo uinsadpambo icquid ismeposhombic utsitsen ismeposhi. Adoac mayan bëda chuiquid dapa utsi dacuëdampambo icquidquio Nuquin Papa yacnuëshquio budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacipamboec mapino icposh. Ushëbimboec bëtantete bëchamauanquiecposh. Buintad nitsinaïd nëdënquiacipamboec isquid-isquidpambo nidte icposh. <sup>2</sup> Dada uaidëmpi bëcadotsaid sanamposh. Budash niduntidposh. Tsiembudcuenshun taë abiucshun chian dapa mad caid nëtıncaquimbi taë opiocshon mananuc tincaposh. Ënapenquioshë icquid niosh. <sup>3</sup> Adashien bëdi noshquiacimboec nuamboshë cuëdtoposh. Adec cuëdquin chiac abu 7tedec cuëdtonequin ëcbedtoneposh Nuquin Papan chiaïd chuiquin. <sup>4</sup> Aden abu cuëdquin ëcbedtonesho tantiasshun: —Abu cuëdquin chiaïd dada uanu —queshobi: —Padi —caposhi Nuquin Papa yacnoshon chuiquin. —Abu cuëdquin chiaïdtedi dada uainda. Padi. Utsibo chuiquin dada uainda —caposhi. Adoac dada uainquio iccombi.

<sup>5</sup> Adnubien mayan bëda tsiembudcuenshun chian dapa nëtıncaquin utsiucshun mananuc tincaboedën ambibi podo abiucquio cadoposh. —Nuquin Papan isnubi abimbo chuiquidquio nebi —quequin tantiamenuen aden ambibi podo abiucquio cadoposh. <sup>6</sup> Adotanquin chuiposhi. —Tantia. Mibi chuinu. ¿Tsutsi nidaïd uabi yec ëndenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaïd uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaïdquio chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. <sup>7</sup> Ëbi padquid mayan bëda utsin shoncate sanamboedën: “Nëbi nainquin shoncanu,” cacpadënquio Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

<sup>8</sup> Adnubini abucuësh cuëdquidën chuiposh. —Aid mayan bëdan sanamboed dada uaid bed —cac: <sup>9</sup> —Dada uaid beccho —capombi. Adoacquen: —Në bed. Bedshun che.

Batambo icboedi min ana mucambo yanendac –caposhi. –Nëid bedshun chiacbimboen Nuquin Papan chiaid cuishonquequin isban-isbanash mucambo yanacbimboec Nuquin Papan cuidte tantiash shubitiadquoio mibi yanendac –quequin tantiamenuen aden chuiposhi.

<sup>10</sup> Adoac aid bedshun chiash adquoio yanobi. <sup>11</sup> Adquoio yansho isun mayan bédabo chuiquid dapan chuioaposhi. –Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebédta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac –quequin chuiposhi mayan bédabo chuiquid dapan.

## 11

### *Nuquin Papan namiaidon daëdshun naid*

<sup>1</sup> –Nuquin Papan tantiacpadomboen mimbi chuibanendac –quequin chuishumbic mayan bēda chuiquid dapan piabimboecquid tambante meneposhi. Adotanquin naden chuioaposhi. –Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bēdambo nuadnuc tauinuequin nacne- naid dapatsen tambanta. Adotanquimbic Nuquin Papa tantianuec aid shubun pudued- puduedquido tambanta. <sup>2</sup> Shubu nuntanquoio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabud- nendac. Adash Nuquin Papa tabadte shubu uashunaid daquënë uaidën pudued- puduedendac,” qeshun aid shubu daquënë uaid tambanenda. Aden Edusaden icsa uaquin seta 3tedi matamendac –quequin chuiposhi. –“Muainquoio icquin Esusbēdta ëbi tantiaquidombo nec,” quequin Nuquin Papan tantiec –camenuen aden tambanaido tantiameposhi. <sup>3</sup> Adnubini Nuquin Papan chuiposh. –Aden Edusaden icsa uanubi matses daëdquiobi ëmbi chuiboedquoio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquoio iquebi,” quequin icsambo icquid abi icsaid ëmenuec dashcute icsactsëcquidquoio dasiuidendac –quequin Nuquin Papan chuiposhi.

<sup>4</sup> Adshobini mayan bēdan chuioaposh. –Aido Nuquin Papan oncamiaid daëd isadaidbo matses tsusedpan chuipampid nendac. “Nuquin Papan bēntsiauc cuëte odibos caid nitsinaid daëd bēdambo icquid iquendac. Ambobidi tabote daëd bēdambo icquid iquendac,” quequin chuipampid nendac. “Nuquin Papan Mayanën tantiamiaidquoio icquin ambi chiaidquoio chuibanendac,” camenuen aden chuipampic. <sup>5</sup> Aden abi chuibansho abi chieshënquidën: “Mibi cuesunenu,” caqui cuesuniadenquoio iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacbimboen abi cuesunenuequidotedi unës uaindac. Nuquin Papan cuidte tantiamenuen adoendac. <sup>6</sup> Adembidi Nuquin Papan cuidte tantiamenuen Nuquin Papan Mayanën namiaidquoio icquin comapenen tantiaquin ismebanendac. Aden ismequin nac abi nidabi yacpadequi ue choenquoio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

<sup>7</sup> Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun se- caindac. Satanasën namiacpadomboen adoendac. <sup>8</sup> Edusaden yacnoshon cuesun secashun chococainquoio iquendac. “Ma cuesun secaid ischitono,” qeshun chococain- quoio icquin podqued ansanendac. Nuquin Icbo Esus cuesten dëctanacnoshonquoio matsesën adoendac. Equipito yacno icpampido yec Sodoma yacno icpampido yec

quequidbimboec icsamboshë icquin aden Nuquin Papan chiaid chuibanquido cuesun secaindac. <sup>9-10</sup> Aden cuesun secabosh: “Nuqui mëyanquid nëid daëd neque. Chococati-apimbo iquebi,” queshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuis-honquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidedi menenancuededendac. Abentsë chotsec ushquin aden ambi cuesun secaboed isbededec tabadendac –quequin chuiposhi mayan bëdan.

<sup>11</sup> Adashic abi onquec: –Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiasho isash cuishonqueboedobi natia dacuëdec tabadendac. <sup>12</sup> Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac. <sup>13</sup> Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatid,” quecuededendac –quequin chuiposhi mayan bëdan. <sup>14</sup> Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

### *Nainquin shoncaquin Uan ismiaid*

<sup>15</sup> Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

–Nuquin Papabëdi aton Mado Esuquidistu abided cuidadec unësaid bëdamboshë iquec. Abi chieshënquidon naid ëmeshun aid abentsëcshumbi matses abitedimbo namendac ënenquio icquin.

Abitedishun Icho nec

–quec cuëdëncuededposh. <sup>16</sup> Adashic Nuquin Papa yacnombo icho-ichoec tsadten tabadboedobi tsusiobo 24tedi icquido: –Mibi bëdamboshë iquec –quequin ismec danëshën tinquebudcuededposh. <sup>17</sup> Adtanequi nadec cuëdëncuededposh.

–Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

<sup>18</sup> Nidaid utsi-utsiec yacno tabadquidon abi chuiquidobëdtan mibi chieshëndene.

Mimbi uaidtedi icsa uadenec.

Adsho mimbi tantiacpadënquio nëbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobëdta mibi tantiaquido abitedimbo mibi yacno mibëdi mimbi tabadmendac.

Chuiquid dapambobëdta chuiquidpenquio mibi tantiaquidotedi bëdambo icmequin mimbi adoendac

–quequin tsusiobon Nuquin Papa chuisho tantiapombi ushquin isacbimboen.

<sup>19</sup> Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. –Ëndenquimboshë ambi chiampicpadomboen Nuquin Papan ambi tantiaidtedi nainquin naindac –camenuen aden ismeposhi. Aden ëbi ismenubien bed-bedquetanec abu teshquianiabimboec nua



cuëdtoneposh. Nidaid saca-sacaquemboec uëdëqueposh. Ue dapa nuamboshë choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

## 12

### *Chidobëdta nisibimboecquid dapa ismiaid*

<sup>1</sup> Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidacbimboec bëchamuanquiecshe ispombi. Inchëshën ushë tincash tsadposh. Uispa 12tedi nacnenaid mauete maueposh. <sup>2</sup> Bacuë nua usunec tishtiadtsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. <sup>3</sup> Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete maueducuededposh. Satanas niosh. <sup>4</sup> Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo icboedo utsi-utsien yuapampic. Aden yuash aton yuabobëdi nidaidën choshon matsesetsen icsamete bunquieci —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. <sup>5</sup> Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. <sup>6</sup> Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

<sup>7</sup> Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aido chuiquid dapambo Miqued caid. Aidtedi ispombi. Adnubien Satanas nadposh. —Aton yuabo mayan bëdabo cuemiash Nuquin Papa dëniaquec ëbimbo abitedishun icho yantsiabi —quiash nicantiadquio icposh. Satanas chedo nidaidën nidmiabi icnuc neposh. <sup>8</sup> Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidënquio icquido yec niadenquio icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. <sup>9</sup> Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquieci.

<sup>10</sup> Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquio icposh. Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Ëmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided cuidadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. <sup>11</sup> Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui:



“Padi. Esusën yuambo nebi,” quec chieshtoenquo icposh.

Cuidmenquo icnuec abided cuidadec unësaid Esus tantiec chieshtoenquo icposh.

Adsho abi chieshënquidon matsesën: “Padi. Esus tantienda. Cueschitomane,” caqui chieshtoenquo icquin adenuidi Esus tantiasho cuesun secameposh Satanasën aton yua icmiambobi.

<sup>12</sup> Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiac mibi yacno budash Nuquin Papa chieshënquiec Satanas chieshëmënquiec tabadec.

Mibi icsamete bunquiec. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

<sup>13</sup> Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —qeshun chieshënquin nisibimboecquid Satanasën aid chido nadancaposh. <sup>14</sup> Adnubien Nuquin Papan chiqui dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh. <sup>15</sup> Adnubien nisibimboecquidën: —Aid chido unës uachitono —quequin ambibi ana shëcuëshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec. <sup>16</sup> Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquo icnuc. <sup>17-18</sup> Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquo icquin bëdamboen naquido Esus tantiaquido caimbi.

## 13

### *Bëdibimboecquid dapa ismiaid*

<sup>1</sup> Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Ëbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampaccosh.

<sup>2</sup> Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi. <sup>3</sup> Adshumbic padpiden ismeposhi. Adoac aid bëdi dapabimboecquid acte uquëducuësh choboedën mapi abentsëc mëmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —qeshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabededposh. <sup>4</sup> Adshumbic: —Ëbi chuiquid dapa namequid mibi nec —quequin Satanas papa caquin matsesën tantiabededposh. —Aden

Satanasën namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec –queshun abi chuiquid dapa acte uquëducuësh choboedtsen tantiaquioposh. <sup>5</sup> Aden matsesën tantiaid icquin Satanasën tantiamiacpadomboen Nuquin Papa chieshënquie: –Nuquin Papa caid nibëdquie. Ëmbiuidtsëqui namembi –quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. <sup>6</sup> Aidën Nuquin Papa chieshënquin naden muauaposh. –Nuquin Papa caid nibëdquie. Abi tabadaidtsen nibëdquie. Abi yacno tabadquido abitedi nibëdquie. Ambembi chiaid niosh –quec muaposh. <sup>7</sup> Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. –Matses icsamboshë icquid matses abitedi chuiquid dapa iquendac –quequin ushquin isacbimboecnuc ismeposhi. <sup>8</sup> Aid caic matses abitedishun: –Nadatiambo icquid nec –quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. –Adquido yec Nuquin Papan: “Ëbëdi tabadmendambi,” quequin chiacmaidombo nec –quequin aden ismeposhi.

<sup>9</sup> Pabiate cuembo icquin bëdamboen tantia. Esus tantiaquido icsho mibi chuinu. <sup>10</sup> Nuquin Papan: –Ëbi tantiaquid chieshënquin quënën nauedquido cuidendambi –caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantias mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

### *Nidaid shëcuënuësh choboedtsen ismiaid*

<sup>11</sup> Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. <sup>12</sup> Adsho isun Satanasën abia chuiquid dapa icmeboedën nidaid shëcuënuësh puduemoed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. –Seshuniaid uincuemiondaidën nuqui chuiquid dapan chiaiduidtsëqui natiad –caposh. <sup>13</sup> Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh. <sup>14</sup> Aden Satanasën namiacpadomboen comapenen tantiaquin ismiac matses dadpenshun: –Abimbo caic –quequin abi chuiquid dapa icsamboshë icquidën chiaid nabededposh Nuquin Papambo tantienquio icquin. Abi chuiquid tantiamequid nidaid shëcuënuësh choboedën: –Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacenata –cac matsesën nacenmeposh. <sup>15</sup> Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacenmoedi tibocameshun oncameposh. Adoquien nacenmoedquibi chuiquid dapa icsabimboec onquequin: –Ëbi tantiesabo neque. Cuesun secatan –cac yuabon abi chuiquid dapa tantiesabo cuesun secatamposh. <sup>16</sup> Adnubien nidaid shëcuënuësh choboedën: –Nuqui chuiquid dapan yuabo nuqui nec –quequin ancabudquin matses dadpenquio dada uaqin bësiadmeposh nëidtedi. Nëidic chuiquid dapabo. Nëidic chuiquidpenquio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquio. Aidtedi matses dadpenquioshë dada uaqin bësiadmeposh. Utsi-utsien bëtanteteno bësiadmeposh.

Utsi-utsien mëdante abiucquio mësiadmeposh. —Acte uquëducuësh choboedën ëbi chuiquid dapan yuabo nec —queshun nameposh. <sup>17</sup> Adshumbic nidaid shëcuënuësh choboedën chuiquid. —Adec ëmbi chiacpadec siadambo icquido piucquidbëdta mit-sana utsi menenda. Ëmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh. <sup>18</sup> ¿Ada ëmbi chui-boed tantio? Bëdamboen tantiaquidën: —Abi cuëmëdquidquio chienquio icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isacbimboecnuc aden ismeposhi.

## 14

### *Nuquin Papan cudasënaido ismiaid*

<sup>1</sup> Adoshombic padpiden ismiac abided cuidadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. <sup>2</sup> Adnubien Nuquin Papa yacnuësh ¿midapadpamboec cuëdtoposh? Acte nua chododoquiacbipamboequien niacbi-posh. Abu tesquianiabipamboequien nechitosh. Ten-tencate dapa dadpen icbo-icboen sananquin ten-tencacbipamboec comapenec cuëdëncuededposh. <sup>3</sup> Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdtdan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. <sup>4</sup> Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatipimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. <sup>5</sup> Chieshtoenquio icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

### *Mayan bëda utsi 3tedshun chiaid*

<sup>6</sup> Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacbimboec abuc cuensho ispombi. Bënuytiapimbo icquid Nuquin Papan chiaidquio matses chuinuec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. <sup>7</sup> Abuc cuenquimbi chuibemposh. —Nuquin Papauidtsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiata. Nëbi ambi chiaid niacniacquido cuidquieque. Aidquio tantiata —quequin chuibemposh abuc cuenquimbi.

<sup>8</sup> Adnubien mayan bëda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacimboen matses utsibo abitedi Nuquin Papa tantiamenquio icquin icsamequioposh. Auid-equi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

<sup>9</sup> Adnubien mayan bëda utsitsen abuc cuenoaposh. Aidëntsen chuibenaposh. –Tantia. Nuquin Papan cuidtequido chuinu. Chuiquid dapa icsamboshë icquid acte uguëducuësh choboed tantiaquin aidbimboecnuc nacnenaïd tantiaquïoposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaïdën chiacpadec utsi-utsiec bësiadcuëdednubi utsi-utsiec mësiadcuëdedposh. Aden abi chuiquid icsamboshë icquid tantiaquïdon abi tantiatipimbo icsho Nuquin Papan cuidquiendac. <sup>10</sup> Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquïdo cuidquiacno chian anëdënquiacno nësecain adoendac. Abided cuidadec unësaid Esusënquïo mayan bëdabobëdtan isnubi adoendac. <sup>11</sup> Ènenquïo icquin adoendac. Aden Nuquin Papa chieshënquïdquïo tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquïo icquin adembi cuidquiendac ënenquïo icquin –quequin chuïbemposh mayan bëdan. Aden ismeposhi.

<sup>12</sup> Èmbi chuïboed tantïashun mimbi nabocpadomboembi chieshtoenuïo icquin Esus tantiaquin ambi chiacpadomboenuïdi nabanta. Utsibon chieshënquïn: –Padi. Esus tantienda. Cueschitomane –caqui adenuïdi ënenquïo icquin Nuquin Papabëdta Esus tantiaquïota.

<sup>13</sup> Adnubi Nuquin Papa yacnuësh comapenec onquequin chuïoaposhi. –Naden chuïquin dada uata. Chieshëmënquïdon: “Esus tantiec,” queshun cuesun secaido Esus tantiaquïdo cuïshonquendac –quequin chuïposhi. Adnubien Nuquin Papan Mayanëntsen: –Ai, abimbo caosh. Esus tantiaquïdo natiaic tabadtenedobi unësash bëdamboshë iquendac shubitiapimbo yacno tabadec. Ambi chiacpadquïec bëdamboec tabadec unësacsho Nuquin Papan aden bëdamboshë icmendac –quequin chuïposhi.

### *Intac nua icnuc Nuquin Papan cuidtequid chiaïd*

<sup>14</sup> Adoshombic padpiden ismiac abu ushunquïo Esus tsadsho ispombi. –Abitedishun Icbombo nebi –quec chuiquid dapan mauetembo shocosh nacnenaïd maueshun chështebimboecquïd sanamposh. <sup>15</sup> Adnubien mayan bëda utsin abi yacnuësh choquin comapenec onquequin Nuquin Papan chuïboed Esus chuituidposh. –Nëbi nidaïdën icquid sinaïd butebanquin sando. Nuquin Papan tantiacpadën nëbimbobi nata <sup>16</sup> –caquïen chështebimboecquïdën sinaïd butebanquin sandoposh. –Aden Nuquin Papan tantiacpadomboen abi tantiaquïdotedi bedshun abi yacno Esusën buanendac –camenuen aden ismeposhi.

<sup>17</sup> Adnubien mayan bëda utsi Nuquin Papa yacnuëshquïobidi choposh chështebimboecquïd sanampamboec. <sup>18</sup> Adec chështebimboecquïd sanampamboec choshobien mayan bëda utsin matses tabadacno cuëte dëtsisadaïd isquïdquïo icquïd nidaïd masiabudboedën tauite dapa dayunuëshquïo choshon comapenec cuëdqïn chuïposh. –Shancuïn bimboecquïd uba caïd nidaïdën caniquïd chështebimboecquïdën mëtebanquin sandoshon buanshun uba tish-tishten sando <sup>19-20</sup> –caquïen uba caïd mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquïen ënë nuamboshë yec piumbo icposh. –Intac nuambo icnuc Nuquin Papan cuidendac –camenuen aden ismeposhi. Adomboen uesquin cuidnuen Nuquin Papan matses icsambo icquïdo cho-chomendac. Edusaden yacno cho-chomeshun ashunquïo Nuquin Papan cuidac matsesën intac nuamboshë chididiquëc nua mauanendac. Acte nua chëuëdacbipamboec cabayon mapi yaction intac chëuëdsho isombi. Ènapenquïo quïdometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. –Aden Nuquin Papan abi chieshënquïdo cuidendac –quequin ismeposhi.



## 15

### *Nuquin Papan cuidtequid 7tedbidi nabanaid*

<sup>1</sup> Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icscho ispombi. Mayan bëdabo niosh. —Aidon ambi chiacpadomboen ënquimbi matses icsaïdo cuidsho isash Nuquin Papa nëish bëdanendac —quequin tantiaquin ispombi.

<sup>2</sup> Nuquin Papa yacnobidi chian dapa icposh. Actepenquio yec acte-actectsëcquio isadposh. —Nuquin Papa icsaquido cuidquidquio nec —camenuc tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën nami-aidën acte uquëducuësh choboedën chuiquid dapa icsamboshë icquidën: —Yuanu —cauidaïdo niosh. Chuiquid dapa icsamboshë icquidbimboecnuc nacnenaïd tantiatiapimbo icquido aïdo niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaïdbimboecquid 666 dada uaqun siadmetiapimbo icquido niosh. Adec abi tantiaquido icscho Nuquin Papan meniaïd tentecate cuëdëmec cuëdëncuededposh. <sup>3</sup> Nuquin Papan namiaïd Moises: —Nuquin Papan nac ëbi chieshënquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bëdamboen ismenuc abided cuidadec unësaïdquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naïd abitedi tantiaquidquio abimbo chuiquidquio mibi nec, Papa.

Mimbi naïd bëdambo icnuc dacuëdampambo mibi iquec, Papa.

Nidaïd utsi-utsiec yacno tabadquidon Icho icpampidi adecbidi matses abitedishun Icbombo mibi nec.

<sup>4</sup> Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaïd utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

<sup>5</sup> Adshun isquien isadaïdbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi. <sup>6</sup> Auëshquio Nuquin Papan chiacpadec ëmbi isboedo mayan bëdabo 7tedi chochoposh. Matses icsaquido cuidquido niosh aïdo. —Nuquin Papan yuabombo nec —camenuc dashcute nac-nacquo icquid dasiuidcuededash dashcute bëshpiu-bëshpiumbo icquid shictonquecuededposh. <sup>7</sup> Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaïd icbo-icboen menëbamposh. Unëstiapimbo icquidën Nuquin Papan nëishënquioshon cuidte cushtoaid maspanëmpi niosh. <sup>8</sup> Adnubien Nuquin Papa tabadaïd nuntanuësh pushud-pushudpambo icposh. Adec dacuëdampamboecsho isash Nuquin Papa chuïnuec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden ismeposhi.

## 16

### *Maspanëmpin cushtoaid*



<sup>1</sup> Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

<sup>2</sup> Adoaquien abentsëcshun ambi bedboed maspanëmpin cushtoaid nidaidënshun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaid tantiaquido yec aton icbo cuëmëdquid dada uaqin siadmiaido icsho aden cuidposh.

<sup>3</sup> Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacbipamboecnuc intacuac. Intacuidpambo icnuc acten icquidtedi unësbudneposh.

<sup>4</sup> Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. <sup>5</sup> Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

<sup>6</sup> “Ëmbi chiaid chuibanquidobëdta ëbi tantiaquido nua intac icnuc chieshëmënquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

<sup>7</sup> Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

<sup>8</sup> Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquiec ushën pichiebudneposh. <sup>9</sup> Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

<sup>10</sup> Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh. <sup>11</sup> Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

<sup>12</sup> Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuëquin aden acte uesadmeposh.

<sup>13</sup> Adec aid matses cho-choabi icnuc ushë choacmishun cho-chometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho

ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi. <sup>14</sup> Satanasën yuabo icquin comapen-nen tantiaquin nacnenquido niosh. Matses utsi-utsien abi chuiquid dapabobëdtabi namenuec niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

<sup>15</sup> Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yachimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

<sup>16</sup> Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

<sup>17</sup> Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh.

<sup>18</sup> Adnubien abu bed-bedquetanepamboec abu tesquianenuec natiamboshë shëcshëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh.

<sup>19</sup> Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. <sup>20</sup> Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. <sup>21</sup> Abucuëshquio ue dapa choachimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacbimboecnuc aden ismeposhi.

## 17

### *Chido chishpidabimboecquid ismiaid*

<sup>1</sup> Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. <sup>2</sup> Aido icsamboshë iquec. Matses utsi-utsien abi chuiquid dapabobëdta uisma uanten danoshcachimboen Nuquin Papambo tantiamenquio icquin ambi chiaid niac-niacmequioposh. Aido cuidsho isec cho —queposh.

<sup>3</sup> Adshumbic ushquin isacbimboecnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio

iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi. <sup>4</sup> Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aidbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcacbimboen: “Nuquin Papa caid nibëdquiec,” quequin tantiamequin matses utsibo dadpenquio icsamequiendac —camenuen aden ismeposhi. <sup>5</sup> Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh. <sup>6</sup> Aid chido paëmbo icquid acacbimboec Esus tantiaquidon intac acash tantiadenquio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquioibi.

<sup>7</sup> Adbudquioshobini aid mayan bëdan: —“Tantiadenquio iquec,” ¿quecta ique? Tantia. Chido chishpidabëdta abi catsadaid aben icquid chuinu. <sup>8</sup> Mimbi isboed aben icquid icsamboshë icquid ictenedi nëbi nibëdec. Yuecshun Satanasën abi tabadacnoshon padpiden chomendac. Adoacsho yuecshun Nuquin Papan chian anëdënquiacno nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquio adoendac —queposh mayan bëda.

<sup>9</sup> Adshumbic padpiden chuiposhi. —Tantia. Ëmbi chuiboed bëdamboen tantiamenuen chuinu. Naden tantiamenuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. <sup>10</sup> Aid chuiquid dapabo 5tedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquio nibëdanendac. <sup>11</sup> Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiacbimboen aton matses icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

<sup>12</sup> Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. <sup>13</sup> Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” queshun aden icsamboshë icquid abi chuiquid dapa icmendac. <sup>14</sup> Aden Esus chieshënquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshënquid cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

<sup>15</sup> Adashic padpidec: —“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi. <sup>16</sup> Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënendac. Aden chieshënquid cuesun

secatanquin shububëdtabi nêdêncaindac nibêdquiecnuc. <sup>17</sup> “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. <sup>18</sup> “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nêbi ismiombi —quequin mayan bédan chuiposhi.

## 18

### *Nuquin Papan Babidonia caid yacnocquido cuidaid*

<sup>1</sup> Aden Babidonia yacnocquido cuidte chuisho tantiaboshombic mayan bēda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bēdabo chuiquid dapa yec bēchamauanquiecposh. <sup>2</sup> Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibêdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. <sup>3</sup> Babidonia caid yacnocquidon matses utsibo abitedimbo abi chuiquid dapabobēdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bēdabon chuiposhi. <sup>4</sup> Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobēdi icsasho ēbitsen cuidquionoshe,” queshun aidon namiacpadomboen nainda. Auëshquio niqueta —quesho tantiombi. <sup>5</sup> Nuquin Papa yacnoshombidi utsin chuiposh. —Ēnēdenquio yec icsauidequi icsho isun ambi tantiacpadomboen Nuquin Papan cuidquiendac. <sup>6</sup> Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nēbi nēishquioshon uesquin cuidquiopashun —queposh mayan bēda. <sup>7</sup> Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bēdambo iquebi,” quepec Nuquin Papan cuidte tantienquio yequi. Adsho tantishun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bēdamboec tabadec. Chido niante bēnē unēsaid mēyadac bimboec mēyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. <sup>8</sup> Adsho ambi: “Nēbi ēbi cuidec,” cacmaidēnquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unēs uabudniacscho isash natiambo sedenquecuededendac. Aton pete nibêdquiecnuc natia bunendac. Aton shububēdi dadpenquio nêdênquendac —queposh mayan bēda.

<sup>9</sup> Adashic abi onquec: —Adec Babidonia yacnuësh nêdênquec pushudtonesho isash: “Aidon namiacpadomboen Nuquin Papa tantienquio icquin con na dadpen bedtenembi,” quequin chuiquid dapabon nadambocain sedencabededendac. <sup>10</sup> “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unēsquimboshē iquec. Aton matses aton yuabobēdi dadpenquio icpadenec. Ambi dayun uaid dadpenquio icpadenec. Matses utsibo dadpen namepadenec. Aido tantiac unēsquimboshē iquec. Badedquio uesquin cuidquiopac,” quec sedenquecuededendac Babidonia caid yacnocquido tantiec —queposh mayan bēda.

<sup>11</sup> Adashic abi onquec: —Babidonia caid yacnocquido aden cuidacscho isash utsibotsen: “Ēmbi meniaid bedshun piucquid dadpen menedenebi. Nēbi adquid nibêdquiecnuc. ¿Tsuntsimbini ēmbi meniaid cuidquin piucquid menepatsiashba?” quec sedenquecuededendac. <sup>12</sup> Aidobidi: “Nadquid Babidonia caid yacnocquido menequin piucquid dadpen bedtenembi. Nēdic shocosh piu. Nēdic shocoshquio. Nēdic casēdubimboecquid cuēnote bēdambo icquid. Nēdic dashcute bēdambo icquid. Nēdic dashcute piumbo



icquid. Nëidic dashcute umumbo icquid. Nëidic sëntebimboecquid nacnenaïd. Nëidic aben icquid edepanten shëta nacnenaïd. Nëidic cuëte utsi bëdaïdquïo nacnenaïd. Nëidic shocosh utsi nacnenaïd. Nëidic cuënote nac-nacquïo icquid nacnenaïd. Piuçquid dadpen menequin adquidtedi Babidonia caïd yacnocquïdon bedpadenec. <sup>13</sup> Utsitsen dadpen bedpadenec. Nëidic batambo icquid sabimboecquid. Nëidic bëdambo nuadte. Nëidic bëdambo nuadec danoshquete. Nëidic acte paëmbo icquid. Nëidic bëchi. Nëidic pan nacnentequid. Nëidic nëish yua baca caïd. Nëidic nëish yua utsi obeca caïd. Nëidic nëish yua cabayo caïd. Nëidic matses antsadsho cabayon nimbanquin buante. Nëidic ambi chonoa uatequïdo matses ambi ampequin bedaido dadpen. Babidonia caïd yacnocquïdon aidtedi dadpenquïo bedtenesho aton piuçquid dadpen bedpadenembi,” quependac nidaïd utsi-utsiec yacno tabadquïdo –queposh mayan bëda.

<sup>14</sup> Adashic abi onquec: –Abi piuçquid menedenedën dayun uaid nibëdanesho isash: “Aid matses bunaidquïo ambi dayun uaid pete nibëdquïec. Ambi dayun uaid dashcute bëdambo icquidbëd aton na utsi dadpen abitedi nibëdquïec,” <sup>15</sup> quiash natiambo dacuëdec uanoshon isec tabadec sedenquecuededendac abi piuçquid menedenedo tantiec. <sup>16</sup> “Aid matses tantiac unësquimboshë iquec. Matses dadpen yuaquin matses dadpen namepadenec. Aton matses dashcute bëdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casëdubimboecquid shocosh piu nacnenaïd payudenec. Utsibic casëdubimboecquid utsi payuec mësiuidtenec. Adec: ‘Con na dadpenquïo icnuc bëdamboec tabadebi,’ quepadenec Babidonia caïd yacnocquïdo. <sup>17</sup> Adsho isun Nuquin Papan abi ushëmbi cuidquiac ambi dayun uaidbëd aid matses badedquïo nibëdanac,” quec sedenquecuededendac abi piuçquid menedenedo tantiec. Adecbïdi nidaïd utsin icquidotsen sedenquecuededendac. Nëidic cano dapa dancha icbo. Nëidic dancha icbobëd nidquïdo aton yuabo. Nëidic icbo piuçquid meniash dancha antabëdtoquïdo. Nëidic nuëcquid bedshun piuçquid bednuen menequïdo. Aidtedi uanoshon isec sedenquecuededendac. <sup>18</sup> Nëdënquec pushudtonesho uanoshon isash: “Adquïdo utsi nibëdec,” <sup>19</sup> quiash natiaquïec sedenquecuededendac. Adec shubiec: “Ëbipadquid dancha icbon bëaidtedi bedshun piuçquid dadpen menedenedo tantiac unësquimboshë iquec. Is. Cuidquiac badedquïo nibëdanaque,” quec sedenquecuededendac –queposh mayan bëda.

<sup>20</sup> Adashic mayan bëdabidi: –Ëbien cuishonquendac. “Nuquin Papa yacno tabadquïdotsen ëbëdi cuishonque,” quequin chiendambi. Esus tantiaquïdo chuiquinc Esusbëd icquïdombo chuiquinc Nuquin Papan chiaïd chuibanquïdo chuiquinc caquin: “Cuishonquec tabadnuna. Mibi chieshënquin natiamiacpadomboen mibi chieshënquïdo Nuquin Papan uesquin cuidquioshe,” quequin chiendambi –queposh mayan bëda.

<sup>21</sup> Adnubien mayan bëda utsin uidënquïo icquidënquïo nidaïd moco nuacquid dapa yuëmboshë icquid cadotanquin acquimboen acte nënebidanquimbi chuiposh. –Ëmbi acquimboen nënebocpadomboen Nuquin Papan Babidonia caïd yacnocquïdo uesquin cuidquiendac nibëdquïecnuc. <sup>22</sup> Adoac aido ictenecnombo nadimbo iquendac. Tentencate ten-tencaïnquïo iquendac. Utsibobic cuëdënenquïo iquendac. Utsibombic shoncate shoncainquïo iquendac. Cuëte chëshun nacnenenquïo iquendac. Piacbo macuesenquïo iquendac. Nadimboshë iquendac. <sup>23</sup> Tabote taboadaïd nibëdendac. Dada aton chido ambi nëbi bedaidbëdi mamënenquïo iquendac. Nibëdec. Nadimboshë iquendac. Adsho isash utsibo: “Babidonia caïd yacnocquïdon aton piuçquid bednuen comapenen tantiaquin ambi naiduidi napadenec. Aden naquin ambi icsamboen tantiaïd matses utsibo abitedi adembidi tantiamequin icsamepadenec,” quendac. <sup>24</sup> Nuquin Papan cuidabi icnuc aden icsamequin Babidonia caïd yacnocquïdon Nuquin Papa chieshënquin ambi chiaïd chuibanquïdobëdtabi Esus tantiaquïdo dadpen cuesun



secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

## 19

### *Chieshënquido cuidacsho isash cuishonquiaid*

<sup>1</sup> Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

<sup>2</sup> Muesambo icquin ambi chiacpadomboen naquidquio nec.

Abi tantiesabo ënëdenquio yec icsauidequi icsho cuidquidquio nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

—quec cuëdëncuededposh.

<sup>3</sup> Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncuquin Babidonia caid yacnocquido uesquin cuidquioshe

—quec cuëdëncuededposh Esus tantiaquido dadpenquioshë.

<sup>4</sup> Adsho tantiash Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icbo nec —quequin ismenuec danëshën tinguëbudcuededposh. Adec tinguëbudcuededequi: —Abimbo caic. Nuquin Papa bëdambo iquec —quecuededposh dadanobi ëshëcquido 4tedi icquido tsusiobo 24tedi icquidobëdi.

<sup>5</sup> Adashic auëshquiobidi abentsëc cuëdposh.

—Nuquin Papa matses uaquidquio yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

—queposh.

### *Esusën abi tantiaquido beduante chiaid*

<sup>6</sup> Adsho tantiash abu tesquianiacbimboec acte nua chododoquiacbimboec Nuquin Papa yacnocquido dadpenquio cuëdëncuededposh.

—Abi chieshënquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

<sup>7</sup> Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquio beduanacbimboen abided ciudadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacenëmëdquiacbimboec:

“Nëbien con Icbo chochitec.”

quiash Esus tantiaquido bëdamboec tabadec.

<sup>8</sup> Abi tantiasho Nuquin Papan bëdamboen isaïdo yec abi icsaïd ënash:

“Nëen con Icbo chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiuinacbimboen abitedi icsaisa icmendac

—quec comapenec cuëdëncuededposh.

<sup>9</sup> Adnubi mayan bëdan chuioposhi. —Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bëda.

<sup>10</sup> Adsho tantiashini Nuquin Icbo danec ismenuec danëshën tinquebuidpoc. Adshobini: —Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

### *Cabayo ushu catsadquid bëdamboshë icquid*

<sup>11</sup> Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiapadomboen naquidquio Esusquio nec —quequin tantiombi. Ambi chiapadomboen icsaido cuidquidquio icquin icsaido cuesun secanuec niosh. <sup>12</sup> —Matsesën ompodëmëdtiapimbo icquidquio nec —camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bëdada uadaid tantiadenquio icposh. Utsibon tantiatiapimbo icnuc ambentsëqui tantiante niosh. —Nuquin Papabëdtan Esusën naidtedimbo matsesën tantiatiapimbo iquec —camenuc adec bëdada uadaid ismeposhi. <sup>13</sup> Abi cuëmëdquid utsiembi tantiatsëccoc. —Nuquin Papapadquidquio yec abi tantiamianquid nec —quequin cuënaid niosh. Aton dashcute bëntse icquid cuidaidën intaquën punacimboec piumboshë isadposh. —Abi tantiesabo cuidquidquio nec —camenuc aden ismeposhi. <sup>14</sup> Esus bëyuc nidnuc abi tsibanec abi tantiaquidobëd mayan bëdabo cabayo ushucquidquidquio catsadcuededec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuededposh. <sup>15</sup> Abi bëyucquid ana shëcuënuëshquio chështe cuënumbo icquid cueshqueposh. —Ambi chiapadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiapadomboen naquin shancuinbimboecquid uba caid nua ënë icnuc tish-tishacimboen nua intac icnuc cuesun secaindac. <sup>16</sup> Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacombo adembidi dada uaccosh.

<sup>17</sup> Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuioposh. —Nuquin Papan cuidquin cuesun secaidon nami chec cho-cho. <sup>18</sup> Ëmbi chiapadec cho-choshon matsesën nami mimbi nua tēpuisquin chendac nēidtedi. Nēidic matses utsi-utsien chuiquid dapabo. Nēidic sondado chuiquid dapabo. Nēidic dada cuesabo. Nēidic cabayo chedo abi catsadquidobëdtabi. Nēidic matses utsibo abitedimbo. Nēidic matses yuabo. Nēidic matses yuapenquio. Nēidic bacuëbo. Nēidic caniaido abitedi. Adquidtedi uesquin chec cho —quequin edeste chedo chuioposh. —Ambi tantiapadomboen Nuquin Papan matses uesquin cuidquiendac —quequin aden ismeposhi.

<sup>19</sup> Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiapadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui <sup>20</sup> cuesun secadenquio

icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiadtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiapadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsami-anquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. <sup>21</sup> Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

## 20

### *Satanas uidën uaid*

<sup>1</sup> Adshumbic padpiden ismeoposhi. Adoac mayan bëda utsi Nuquin Papa tabadac-nuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaid dapa sanamposh. <sup>2</sup> Adshumbic Eba icsamenuc nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. <sup>3</sup> Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puuentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiacquin uidën uaquioposh. Aden ismeposhi.

<sup>4</sup> Adshumbic utsitsen ismeoposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiac-padquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacnenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiactabaposh. <sup>5</sup> Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. <sup>6</sup> Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

### *Satanasquio chian anëdënquequid nëniaid*

<sup>7</sup> Adshumbic aidtedquio seta 1000tedi matameshun uidën uaid chicquin Satanas cuemendac. <sup>8</sup> Adoquien matses icsamenuc muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

<sup>9</sup> Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. <sup>10</sup> Adshumbic

aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

### *Icsambo icquido cuidte chiaid*

<sup>11</sup> Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac — camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. <sup>12</sup> Nuquin Papa yacno unësaïdo uincuemiaïdo abitedimbo tabadposh. Adnubien bëshunenquio icquin dada uaten dada uabanacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. <sup>13</sup> Unësaïdo abitedi icposh. Utsi-utsiec unësacsho chian dapa mad caid nëniaïdo uincuemiaïdo niosh. Utsi-utsiec nidaidën chococaid uincuemiaïdo niosh. Adsho aidon naidtedi Nuquin Papan chuibamposh. <sup>14-15</sup> Adshumbic Esus tantiesabo icsho documento nibëdquidbimboecsho abi yacno tabadmenquio icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unëstiapimbo icquiduidquio icposh. —Adquid iquendac —quequin aden ismeposhi.

## 21

### *Nuquin Papabëd tabadaidquio*

<sup>1</sup> —Esus tantiesabo chian anëdënquequid nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquio icposh. Ënden iccondaid chian dapa mad caidtsen nibëdposh. <sup>2</sup> Adnubien Esusbëdi Nuquin Papa tabadaidquio abichobi Edusaden chuca caid abucuësh budposh. Chido nëbi bedboedën aton bënë cuis-honcamiacimboec cuishoncamianquid yec bëdamboshë icposh. <sup>3</sup> Adnubien Nuquin Papa tsadacnuëshquio comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquio yec. Adsho isun aton yuabo icquin matses abitedishun: “Nuquin Icbombo nuqui tantiaidquio nec,” caindac. <sup>4</sup> Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboec. Nidaid shënin tabadec abitedi unëstequiduidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

<sup>5</sup> Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaid nec —queposh Nuquin Papa Esusbëdi.

<sup>6</sup> Adashic Nuquin Papa padpidec onquec: —Ëmbi chuiboctedimbo nainquin naindambi utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboec ëbëd tabadte bunquidon con Mado Esus tantiasho ëbëdi tabadmendambi. <sup>7</sup> Satanasën: “Chieshtomenu,” cauidaïdo Esusbëdta ëbi chieshtoenquio icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi



mibi nec,” caindambi. <sup>8</sup> Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsëc tantiauidtsëchoedobi chieshëmënquidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsamianquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

*Abi tantiaquido Esusbëd icte chiaid*

<sup>9</sup> Adnubien mayan bëdan Nuquin Papan matses cuidte cushtoaid chiuimboed abentsëc choshon chuioposhi. —Isec cho. Chido nëbi bedboedën aton bënë cuis-honcamiacimboen abided ciudadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen. <sup>10</sup> Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucüesh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. <sup>11</sup> Aid tabadaidquio aid shubutedi Nuquin Papa tabadaid yec abi yacpadquio abichobi bëchamuanquiecposh. Casëdu bëdambo icquidbimboec isquid-isquidquio isadposh. <sup>12</sup> Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. <sup>13</sup> Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidtedbidi shëcuë icoaposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh. <sup>14</sup> Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

<sup>15</sup> Adshumbic ëbi chuiboedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh. <sup>16</sup> Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtioniuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. <sup>17</sup> Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

<sup>18</sup> Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaiduidquio yec nac-nacquio icposh. <sup>19</sup> Aid daquënë uaquin tauaquin sandoaid nidaid cuënote dapa casëdubimboecquid



bëdambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumboctscquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. <sup>20</sup> Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaccosh. —Nuquin Papa yacnombo bëdamboshë iquendac —camenuen aden ismeposhi. <sup>21</sup> Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctscquid acte-actectscquio icnuc mabiunaid icposh. —Esusbëd Nuquin Papa tabadacnombo bëdambo icquiduidquio iquendac —camenuen aden ismeposhi.

<sup>22</sup> Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquioquin tantiec anocquido tabadendac. <sup>23</sup> Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi. <sup>24</sup> Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenec tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac. <sup>25</sup> Nuquin Papa matsesbëdi tabadacnombo inchëshenquio icnuc: —Icsambo icquido puduednushe. Bëdashnu —quetiapimbo icsho isun daquënë uaid shëcuë bëtashenquio iquendac. Shëcniacchobi iquendac. <sup>26</sup> Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi. <sup>27</sup> Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquio iquendac —quequin aden ismeposhi mayan bëdan.

## 22

### *Nuquin Papa yacno acte ismiaid*

<sup>1</sup> Adshumbic aid mayan bëdan padpiden ismeaposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmetequid acte bëdambo icquid nushan nibëdquidquio chëuëdsho ispombi. <sup>2</sup> Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmetequid cuëtetsen icposh. Baded-badedquiec bacuëquidquio niosh. Inchëshën ushë choan-choanquiec badedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi.

—Matses utsi-utsiec Esus tantiaquid icsho abëdi tabadmequin Nuquin Papan daic-sabudtiapimbo icquid icmendac —camenuen cuëte aton podobëdta ismeposhi. <sup>3</sup> Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquiec Esus tantiaquido tabadendac. <sup>4</sup> Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquiec tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi. <sup>5</sup> Ambo bëdambouidquio yec inchëshenquio iquendac. Nuquin Papa bëchamuanquiecquidëmbi ushëmbouidquio iquendac inchëshaid tantiadenquio yec. — Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

<sup>6</sup> Adshumbic mayan bëdan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

### *Esus chote chiaid*

<sup>7</sup> Adnubini Esusënquio naden chuiposh. —Chieshtoenquio icquin ëbi tantiata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

<sup>8</sup> Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. <sup>9</sup> Adshobini: —Padi. Aden ëbi ismenda. Mibipadquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaidbon ambi chiaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsëqui tantiaquin aden ismeta —caposhi mayan bëdan.

<sup>10</sup> Adashic padpidec: —Èmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquio icquin Esus tantiec ma tabadnu,” qeshun dada uata.

<sup>11</sup> Nëbimbobi Esus chonoc Esus tantiesabo badedquio bëdamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

<sup>12</sup> Adnubini Esusën chuioaposh. —Chieshtoenquio icquin ëbi tantiata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. <sup>13</sup> Nuquin Papapadquidquio nebi. Èmbi tantiacmaid nibëdnuc abitedi comapenen tantiaquidquio nebi. Nidaid uabi yec ictenedi nëbi adquidquio yec nibëdantiapimbo icquid nebi. Adquid yec abitedishun Icbombo nebi.

<sup>14</sup> Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen. <sup>15</sup> Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaide tantiaquido. Nëidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

<sup>16</sup> Ëmbi chiacpadomboen mayan bēdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi –quequin chuiposhi Esusën.

<sup>17</sup> Adsho tantiashun Nuquin Papan Mayanën tantiamiacpadomboen chuiquin: –Nëbimbobi Esus chonoshe. Aidquio tantiabenta –caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: –Nëbimbobi chonoshe. Aidquio tantianuna –cac bēdambo ictsiash. Adsho tantiash Esus tantiesabo acte bunacximboec Esus tantiate bunsho Nuquin Papan bēdamboen isendac. Nuquin Papa bēdamboen ismenuen menete nibēdnuc Esusuidi tantiasho Nuquin Papan bēdamboen isquin abēdi tabadmendac.

<sup>18</sup> Tantia. Ëmbi chuiboed tantiaquido chuinu. Nuquin Papan: –Nadquid iquendac. Yuecash utsi iquendac –quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. <sup>19</sup> Adembidi ëmbi dada uaboed utsi uainquio icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquio ictsiash. Adembidi bēdamboshë yacno abēdi mibi tabadmenquio ictsiash.

<sup>20</sup> –Ma aidtedi tantianu –quequin Esusën chiacpadomboen mayan bēdan aidtedi ismeposhi. Ëmbi chuibocpadomboen Esusën: –Nëbimbobini choendac –caposhi. Adsho tantiashun: –Ai, nëbimbobi chota –capombi.

<sup>21</sup> Mibitedi Esus tantiaquidotedi tantiaquin: –Ambi nabocpadomboen Nuquin Icho Esusën bēdamboen isquin bēdambo icmepashun –caimbi. Padi. Aidtedi chuiquin dada uaombi.